


# Gandja na Mbia



Mayogo: Gandja na Mbia (New Testament)

**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 25 Nov 2022 from source files dated 29 Jan 2022  
6b4904fb-f8ce-5931-8218-7cee8914232c

## Contents

Matié . . . . .	1
Maloko . . . . .	61
Luka . . . . .	98
Djaa . . . . .	159
Kulu . . . . .	203
Loma . . . . .	261
1 Kolito . . . . .	290
2 Kolito . . . . .	318
Galate . . . . .	336
Efeso . . . . .	345
Filipoi . . . . .	354
Kolosai . . . . .	361
1 Tesalonike . . . . .	367
2 Tesalonike . . . . .	373
1 Timoté . . . . .	377
2 Timoté . . . . .	385
Tito . . . . .	391
Filemo . . . . .	395
OmaEbele . . . . .	397
Djaki . . . . .	417
1 Piele . . . . .	424
2 Piele . . . . .	432
1 Djaa . . . . .	437
2 Djaa . . . . .	444
3 Djaa . . . . .	446
Djude . . . . .	448
Apokalipisi . . . . .	451

**Bádha Ngali  
gba Yesu Kilisito maka  
li  
Matié  
aye lie ko  
Eli na kalanu**

Bádha Ngali inde li Matié aye e ngakpokpo me Yesu ne Mukobho inde li Ebhe abhu nani e-o. A ko kpála inde li Ebhe amene li pápá gba e ongú inde aní apa nani bhú Gandja na Didili-e me ni améne e pi okpála gba ni-o. Bádha Ngali angó-o bha bini pi opiga gba omaYuda ade inde u azu Yesu bhú e di ne bhe aní abhele bhú e-o. Engú bini, a la di pi ndu okpála na píla doto hana.

Bádha Ngali angó-o ngasuno Yesu maka 'ngbé musuno inde ne angu nambamba 'ta líli gba Ebhe, inde la di ngasuno pindji Nau gba Ebhe-o . Ongú na ngbengbengbe inde bhú nasuno gba aní-e a bhu-luvue: (1) Nasuno a pí 'ta (alo 5-7). (2) Olíli pi omukpata ndjikpa ne ká bhisi (alo 10). (3) Ogbitaku pindji Nau na abhúlá (alo 13). (4) Nadu mukpata gba Yesu (alo 18). (5) Ekpí na soso (oalo 24-25).

**Ongbengbe ongú inde bhú bhuku inde-e ngae inde:**

Onguo ogbi Yesu Kilisito di ne nazu lie ka aní 1:1 – 2:23

Kulu gba Djaa bhulu nabatisa okpála 3:1-12

Batisimo di ne nale inde li Djabulu ale Yesu ne e-o 3:13 – 4:11

Kulu inde li Yesu amene e bhú ká okpála na Galilaya 4:12 – 8:34

Dhuku gba Yesu nayie bhú Galilaya ngú nanu abhú Yelusalema 9 – 20:34

Oekpi na soso gba Yesu abhú Yelusalema 21:1 – 27:66

Nakpi ne nazuku gba Yesu di ne nakoto ka aní li okpála 28:1-20

*Onguo ogbi Yesu Kilisito  
(Tsia bhú Luk. 3:23-38.)*

<sup>1</sup> A inde-e 'li onguo ogbi Yesu Kilisito , inde u azu e bhú piga gba 'ngbé ngámá Davidi, di ne bhú piga gba Abalahama-o.

<sup>2</sup> Abalahama azu Isaka, Isaka azu Yakobho, Yakobho azu Yuda di ne ondaise e,

<sup>3</sup> Yuda azu Peledje ne Djala li Tamala,

Peledje azu Esilome, Esilome azu Lama,

<sup>4</sup> Lama azu Aminadaba, Aminadaba azu Nasone, Nasone azu Salimona,

<sup>5</sup> Salimona azu Boadja li Laaba, Boadja azu Obede li Luta, Obede azu Yese,

<sup>6</sup> Yese azu 'ngbé ngámá Davidi. Davidi azu Salomo li olo gba

Ulia,

<sup>7</sup> Salomo azu Loboama, Loboama azu Abia, Abia azu Asa,

<sup>8</sup> Asa azu Djodjafata, Djodjafata azu Djolama, Djolama azu Odjiasi,

<sup>9</sup> Odjiasi azu Djoatama, Djoatama azu Akadji, Akadji azu Edjekia,

<sup>10</sup> Edjekia azu Manasi, Manasi azu Amosi, Amosi azu Djodjiasi,

<sup>11</sup> Djodjiasi azu Djekonia di ne ondaise e. Abhomu-o, u atsia abha omafsalaele bhú bali abhú kuti na Babilona.†

<sup>12</sup> Pita nabha uo bhú bali bhú Babilona-a,

Djekonia azu Salatiele, Salatiele azu Djolobabele,

<sup>13</sup> Djolobabele azu Abiuda, Abiuda azu Eliakime,

Eliakime azu Adjole, <sup>14</sup> Adjole azu Sadoka,

† 1:11 1:11 Tsia bhú 2 Ong. 24:12-16.

Sadoka azu Akime,  
Akime azu Eliude,  
<sup>15</sup> Eliude azu Eleadjali,  
Eleadjali azu Matana,  
Matana azu Yakobho,

<sup>16</sup> Yakobho atsia azu Djodjefu  
'ko Malia inde azu Yesu, u a'i  
e me Masiya-o .

<sup>17</sup> Nako ndu opiga bhomu-  
o hana-a, nayie li Abalahama  
nakolo li Davidi-e, a ko opiga  
ndjikpa ne ka badha, nayie li Da-  
vidi nakolo li namba omafsalaele  
bhú bali na Babilona-a, a ko opiga  
ndjikpa ne ka badha, nayie li nanu  
bhú bali abhú Babilona-a nakolo  
li nazu Masiya-a, a ko di opiga  
ndjikpa ne ka badha.

*Malia azu Yesu  
(Tsia bhú Luk. 2:1-7.)*

<sup>18</sup> A inde-e lele maka u azu Yesu  
Kilisito lie ko. Malia, 'hi ani-e adu  
adjeke kuva gba o ne Djodjefu-  
o. Engú bini, kala me u mbila  
lio na elø ne bhoko-o, ani abi  
ebhi bhú angu gba Bu Bhobua .  
<sup>19</sup> Abhomu-o, 'ko ani Djodjefu inde  
adu nani kpála namanga Ebhe-e,  
du akunda naha namu pi ani bhú  
ká djila okpála de. Ani atsia au  
ndjindji me ni tse ani bhú pepe.  
<sup>20</sup> Nedhinga ani adu abhundja lie  
mo-o, andjelu bini gba Ngámá  
akoto li ani bhú loto. Ani atsia  
apa pi ani me: «Djodjefu, ndili  
gba Davidi, mo okpé naha wala  
mu Malia de, anga ebhi inde ani  
nde ne e ayie ka Bu Bhobua. <sup>21</sup> Ani  
azú ndili na bhobhoko inde mo  
ogísila 'li e me Yesu,\* anga ani  
akóbho omaha e bhú osisiti 'ngú  
gba o-o.» <sup>22</sup> Ndu 'ngú bhomu-o  
hana amene lie ngubula me engú  
li Ebhe Ngámá apa nani e bhú 'li  
polofeta mene lie. Engú inde ani  
apa nani e me:

\* 1:21 1:21 Yesu: 'Hi inde me Yesu-o, a akunda napa me Ebhe ne mukobho gba okpála.

† 1:23 1:23 Tsia bhú Isa. 7:14. \* 2:1 2:1 Beteleme: A ko kuti inde u azu nani 'ngbé ngámá Davidi bhú e-o. † 2:1 2:1 Tsia bhú Mik. 5:1. † 2:6 2:6 Tsia bhú Mik. 5:1.

<sup>23</sup> «Tsia nga, elø inde i mbila nga  
'ngú na bhoko de-e abí 'bhi,  
ani tsia zú ndili na bhobhoko inde  
u agísila 'li e me fmanueli.†»

(A akunda napa me: Ebhe bhú  
dabili bini ne ní.) <sup>24</sup> Li Djodjefu  
azuku lie, ani amene maka li  
andjelu gba Ngámá apa pi ani lie-  
o. Ani atsia aha Malia maka wala  
e. <sup>25</sup> Engú bini, u si ne ani pí  
polo bini maka elø ne bhoko de  
nakolo li 'kpí li Malia azu ndili na  
bhobhoko inde li Djodjefu agisila  
'li e me Yesu-o lie-o.

## 2

*Obhulu imbilangu ago ngú  
nadhøge Yesu*

*(Tsia bhú Luk. 2:8-20.)*

<sup>1</sup> U azu nani Yesu bhú  
Beteleme.\* Kutí bini na ndu doto  
na Yudaya, bhú nedhinga gba  
'ngbé ngámá Elode† me-e, obhulu  
imbilangu ayie ne andjongu,  
u akolo bhú Yelusalema. <sup>2</sup> U  
atsia ayi me: «'Ngbé ngámá gba  
omaYuda inde u azu e mbia inde-e  
su? Padhá de, anga ya au ikupala  
inde asuno me u azu ani-e akoto  
ne andjongu, abhomu-o, ya atsia  
ago ngú nadhøge ani.»

<sup>3</sup> Li Elode adje lie mo-o, mab-  
hundja gba ani di ne bhe gba  
ndu okpála na Yelusalema hana  
angbingi. <sup>4</sup> Abhomu-o, ani apo  
bhúla ongbenge odimandé gba  
Ebhe , di ne omusuno na líli gba  
Moidje-o . Ani atsia ayi uo me:  
«Bili inde a ayo me u zu Masiya  
li e ngae dho?» <sup>5</sup> U agie pi ani me:  
«Abhú Beteleme, bhú ndu doto na  
Yudaya, anga polofeta aye nani  
me:

<sup>6</sup> «Ngamu, Beteleme inde bhú ndu  
doto na Yudaya,  
mu mbomboyé ane okuti  
koko na Yudaya mane ade.

Padhá de, anga ngámá inde alála okpála gba ma na Isalaele, akóto bhú m̀.†»

<sup>7</sup> Abhomu-o, Elode a'i obhulu imbilangu-o bhú pepe. Ani ayi uo li kukulu nedhinga inde li ikupala ango-o akoto lie-o. <sup>8</sup> U agie 'ngú lie pi ani tété-e, ani atsia atima uo bhú Beteleme ne napa pi uo me: «Yi nuna, yi gili 'ngú pindji ndili-e na paká paká. Li yi u ani-e, yi de go pa muma, amba ngama di-e, ma nu dhogè ani.»

<sup>9</sup> Pita u adje engú li 'ngbé ngámá Elode apa e lie, u atsia aholo 'nú. Me-e, ikupala u au e andjongu-o adu adholo kala uo, a atsia anu ala pi bili inde li ndili-e adu li e-o. <sup>10</sup> U au matá ikupala-a lie me-e, u abedhe ne djali bedhe. <sup>11</sup> U ali abhú 'ti-o, u atsia au ndili-e ne 'hi e Malia . Abhomu-o, u akikita lipuku o kuto, u atsia adhogè ani. U abhulu okili gba o-o. U atsia aha apepe pi ani li olo, ne mungotsi, la di ne mungotsi koko na mase naali inde 'li e me mila . <sup>12</sup> Pipita-a, Ebhe atsia apa pi uo bhú loto me u agie matá lio agba Elode de. Abhomu-o, u atsia agie lio agba o li kpadji koko.

*Malia ne Djodjefu akpe kpata bhú Edjipeto*

<sup>13</sup> Pita li obhulu imbilangu-o agbida lie, andjelu bini gba Ngámá-a akoto li Djodjefu bhú loto, ani atsia apa pi ani me: «Yie bhúlá, ha ndili-e ne 'hi e, amba m̀ kpe ne uo bhú Edjipeto. Du oo akólo li nedhinga inde ma agáma 'ngú pi m̀ lie-o. Padhá de, anga Elode agili ndili-e ngú nabholè ani.» <sup>14</sup> Sukpe-e, Djodjefu ayie bhúlá, ani aha ndili-e ne 'hi e, ani atsia akpe ne uo bhú Edjipeto. <sup>15</sup> Ani adu oo akolo li 'kpí li Elode akpi lie, ngubula me engú inde li Ebhe

Ngámá apa nani e pi polofeta-a, amene lie. Ngámá apa nani pi opolofeta me: «Ma a'i ndili gba ma me ani koto bhú Edjipeto kokoto.†»

*Elode abhili ongisi na djedjedje*

<sup>16</sup> Li Elode au lie me obhulu imbilangu-o apite ni-e, ani abi 'gú naali. Abhomu-o, ani atsia aha líli me u nu bhú Beteleme di ne bhú ndu doto gba ni-e hana, amba u bhili ndu ongisi na djedjedje hana nayie bhú kalanga bhisi akè ne kuto. Ani aha líli bhomu-o nakpata lele kalanga inde li obhulu imbilangu-o aha e pi ani-o. <sup>17</sup> Abhomu-o, engú inde li polofeta Djelemi apa nani e, atsia amene lie. Djelemi apa nani me:

<sup>18</sup> «U adje eli bini bhú kati na Lama,

oegbá di ne omulopolo.

A ngaku 'gbá ongisi gba e bhomu-o Lasele.

Ani kunda de me u yoko ni-e de, anga ndu ongisi gba ani-e hana amu.†»

*Djodjefu, ne Malia di ne Yesu agie lio bhú Nadjaleta*

*(Tsia bhú Luk. 2:39-40.)*

<sup>19</sup> Pita li Elode akpi lie-e, andjelu bini gba Ebhe Ngámá-a akoto li Djodjefu bhú loto bhú Edjipeto. <sup>20</sup> Ani atsia apa pi ani me: «Yie bhúlá, ha ndili-e ne 'hi e, yi holo kpadji, amba yi gie liyi ne uo bhú doto na Isalaele. Padhá de, anga okpála inde adu nako nakunda nabholè ndili-e amu.» <sup>21</sup> Djodjefu ayie bhúlá, ani aha ndili-e ne 'hi e, ani atsia agie lie bhú doto na Isalaele. <sup>22</sup> Engú bini, ani adje la lie me Alikilausi ne 'ngbé ngámá bhú ndu doto na Yudaya bhú da 'dyi e Elode-e, ani atsia adje tsulu ngú nanu oo. Ebhe agbele matá 'dje ani bhú loto, ani atsia agie lie bhú ndu doto na Galilaya.

† 2:15 2:15 Tsia bhú Oz. 11:1. † 2:18 2:18 Tsia bhú Djlm. 31:15.

23 Aní anu asi kuti bhú gudhu na Nadjaleta, ngubula me engú inde li opolofeta apa nani e, amene lie. Opolofeta apa nani me: «U adú a'í aní me Kpála na Nadjaleta.»

### 3

*Djaa bhulu nabatisa okpála apa pi okpála me u dji bua o*

*(Tsia bhú Mlk. 1:2-6; ne bhú Luk. 3:1-6; di ne bhú Dja. 1:19-23.)*

<sup>1</sup> Bhú oekpí bhomu-o, Djaa bhulu nabatisa okpála akoto nani abhú mili bili na ndu doto na Yudaya. Aní adu atotobhila me: <sup>2</sup> «Yi dji bua yi, anga Nau na abhúlá akolo masikpe!» <sup>3</sup> Djaa nani ne kpála inde li polofeta Isaya akpokpo 'ngú gba e me:

«Kpála bini ngatotobhila bhú mili bili me:

«Yi leke kpadji gba Ngámá-o.

Yi leke bua yi ngú nago ka ani-o.†»

<sup>4</sup> Djaa adu adyi bongo inde u adu e li su enu, aní adu agbite ekpú na kó 'nu ludu e. Aní atsia adu azu omakindolo di ne nadha eu. <sup>5</sup> Abhomu-o, okpála na Yelusalema di ne okpála na Yudaya libhomu ne obhende na ndu doto inde lingo ngade 'ngu na Djuludani libhomu adu ago nadije engú inde aní adu akpokpo e-o. <sup>6</sup> U adu ambamba ta osisiti 'ngú gba o-o kala ndu okpála hana. Djaa atsia adu abatisa uo bhú ngade 'ngu na Djuludani.

<sup>7</sup> Bhití omuFalisai di ne oSadukai adu ago ngú nasia batisimo. Li Djaa au lie mo-o, aní atsia ayi uo me: «Ngayi opiga kpulu inde-e, a asuno pi yi da me yi kpe egú gba Ebhe inde ngago-o? <sup>8</sup> La-a, yi suno bhú okulu gba yi-e me yi adji bua yi adji, <sup>9</sup> amba yi 'o nabhundja li bhobua yi makpe me: «Engú li ya ade anga Abalahama ne ogbi

ya.» Padhá de, anga ma ngapa pi yi me, Ebhe ti da nagbe ongisi pi Abalahama bhú ká oteme yi ngau e inde-e mada yi. <sup>10</sup> 'E-e! Mbia inde-e, ngbakpa a'o lie bhú li 'dhu ondula-a ngubula nadodolo. Ndu ndula hana inde i li lílí na babadha de-e, u adé, u tsia bhike bhú djua. <sup>11</sup> Ngama-a, ma ngabatisa yi bhú engu ngú nasuno me yi adji bua yi adji. Engú bini, kpála bhende i ngago pita ma-a, ane ma ne angu. Ma la ne mangua tetele kpála dho me ma gbe maloké bhú 'dhu ani-e! Ngaani-e, aní abátisa yi ne Bu Bhobua di ne djua. <sup>12</sup> Aní aholo kakpa gba e sa 'kpa e ngú nape fufukudha bhú nguwa gba e amba ni bu nguwa bhú ngbokopi. Engú bini, fufukudha-a, aní atsúlu bhú djua inde na duduma ne duduma.»

*Yesu asia batisimo*

*(Tsia bhú Mlk. 1:9-11; ne bhú Luk. 3:21-22; di ne bhú Dja. 1:29-34.)*

<sup>13</sup> Abhomu-o, Yesu ayie bhú Galilaya, aní anu abhaka Djaa bhú ngade 'ngu na Djuludani ngú nasia batisimo ka aní. <sup>14</sup> Djaa di me yala. Aní atsia adu apa me: «Ma sía mangbo batisimo ka mu ngama. Mu ngago matá abhaka ma ngamu!» <sup>15</sup> Engú bini, Yesu atsia agie pi aní me: «Ziba me amene lie moko mbia inde. Padhá de, anga a ayo me ni mene ndu 'ngú hana inde li Ebhe ayo e ka ní-o.» Abhomu-o, Djaa atsia aziba me amene lie moko. <sup>16</sup> Li Yesu asia batisimo lie, aní atsia akoto bhú 'ngu-o. Me-e, kokpí abhulu lie. Aní atsia au Bu Bhobua gba Ebhe-e ngaké maka pidjo, a nde ngago pí aní. <sup>17</sup> Abhomu-o, eli bini atsia ayie abhúlá ne napa me: «A inde-e ndili gba ma na mukunda-o. A ko kpúkpú na bua ma.»

† 3:3 3:3 Tsia bhú Isa. 40:3.

## 4

*Djabulɔ ale Yesu*  
(*Tsia bhú Mlk. 1:12-13; di ne bhú Luk. 4:1-13.*)

<sup>1</sup> Abhomu-o, Bu Bhobua atsia amba bhúla Yesu abhú mili bíli ngubula me djabulɔ le ani. <sup>2</sup> Pita namene ngbikpi ndjikpa badha ne sukpe ndjikpa badha mandí nazú 'he-e, ani adje gumu. <sup>3</sup> Djabulɔ, kpála inde adji ale ani-e atuto lie de ani. Ani atsia apa pi ani me: «Í dɔ me mu nde ne Ndili gba Ebhe-e, ha líli pi oteme inde-e me akolo mapa.» <sup>4</sup> Engú bini, Yesu agie me: «U aye bhú Bhuku me:

«Kpála kóbho bha bini ka ezɔ de, engú bini, ani akóbho ka ndu oeli hana inde

í ngakoto bhú 'bhø Ebhe-o.†»

<sup>5</sup> Abhomu-o, Djabulɔ aha ani, anu ne ani bhú Yelusalema, gudhu na bubu-o. Ani atsia a'o ani pí tulundji 'ngbé 'ti Ebhe gba omaYuda-o. <sup>6</sup> Do ani pi Yesu de me: «Í dɔ me mu nde ne ndili gba Ebhe-e, 'ulu mu kø kuto! Padhá de, anga u aye bhú Bhuku me:

«Ebhe ahá líli pi oandjelu gba e ngú mu.

U tsia bí mu sa 'kpa o

ngubula me mo otá 'dhu mu lí teme bini de.†»

<sup>7</sup> Yesu apa pi ani me: «U aye di bhú Bhuku gba Ebhe-e me: «Mo olé Ebhe, Ngámá gba mu-o de.†»

<sup>8</sup> Djabulɔ anu a'o matá ani pí 'ndjá eta na ndjándjá nane mane. Ani atsia apana pi ani ndu nau na doto hana bhú dabilí bini ne sangu gba o-o. <sup>9</sup> Ani atsia apa pi ani me: «Ndu 'he inde-e hana, ma ahá pi mu í dɔ me mu nde akíkita lipuku mu kuto kala ma ngú nadhøø ma-o.» <sup>10</sup> Abhomu-o, Yesu atsia apa pi ani me: «Yie oo ko, Satana

! Padhá de, anga u aye bhú Bhuku me:

«Dhøø Ebhe 'ngbé Ngámá gba mu-o, amba mu yo la bhadi ani kpi e kpi.†»

<sup>11</sup> Abhomu-o, Djabulɔ a'o ka ani. Me-e, oandjelu ago de ani, u atsia aholo nateteke ani.

*Yesu asuno bhú Galilaya*

(*Tsia bhú Mlk. 1:14-15; ne bhú Luk. 4:14-15; di ne bhú Dja. 4:1-3, 43-46.*)

<sup>12</sup> Lí Yesu adje lie me u aholo Dja-a,\* ani atsia agbe lie ne abhú ndu doto na Galilaya. <sup>13</sup> La-a, ani nu bhú kuti na Nadjaleta de, ani anu mangbo bhú Kapalanauma, dengo ekpø na Galilaya, bhú kuti gba okpála na Djabulona ne Nefitali. <sup>14</sup> Ani amene mo-o ngubula me engú nani lí polofeta Isaya apa e amene lie. Engú nani ani apa e me:

<sup>15</sup> «Ngayi okpála na doto na Djabulona ne Nefitali, ne yi okpála na kpadji na ekpø,

ne yi okpála na kuti inde ayi 'ngu na Djuladani, inde akolo mbia inde-e okpála na Galilaya

inde lí ogandji okpála ngadulu bhú e-e,

yi dje nga engú inde!

<sup>16</sup> Ngayi okpála inde adúdu bhú bití má ndundulundu-o, yi aú zí 'kpi na ngbéngbé na kuo kuo.

A akunda napa me zí 'kpi ang-o akóto pi yi

okpála inde abedhe ndu 'kpi hana ne tsulu kuo-o.†»

<sup>17</sup> Nayie lí nedhinga bhomu-o, Yesu aholo akpokpo mbámá me: «Yi dji bua yi. Padhá de, anga Nau na abhúlá akolo masakpe.»

† 4:4 4:4 Tsia bhú Det. 8:3. † 4:6 4:6 Tsia bhú Ets. 91:11-12. † 4:7 4:7 Tsia bhú Det. 6:16. † 4:10 4:10 Tsia bhú Det. 6:13. \* 4:12 4:12 Dja: A ko Dja bhende Bhulu nabatisa okpála-o. † 4:16 4:15-16 Tsia bhú Isa. 8:23 - 9:1.



*Yesu a'i omùkpata na gigina*

(*Tsia bhú Mlk. 1:16-20; ne bhú Luk. 5:1-11; di ne bhú Dja. 1:35-51.*)

<sup>18</sup> Li Yesu adu adhuku lie lingo ekpe na Galilaya-a, ani au obhosi bhisi me u nde ngagbe sungu. A adu ondaise. A adu Simo inde u agisila 'li e me Piele ne ndai e Andili. <sup>19</sup> Ani atsia apa pi uo me: «Yi go kpata ma, amba ma mene me yi du ibili nagili okpala pi Ebhe maka yi agbegbe osungu lie-o.» <sup>20</sup> Ma gala kolo me-e, u abala 'kpa li onado gba o-o, u atsia anu ne uo. <sup>21</sup> Yesu adyudyo mata lie ne kalanu, ani au obhosi koko bhisi, a adu Djaki ne uo ne ndai e Dja , ongisi gba Djebedayo-o. U adu bhú zabu gba o bhú dabili bini ne 'dyi o me u nde ngaleke onado gba o-o. Ani a'i uo me u go kpata ni. <sup>22</sup> Ma gala me-e, u a'o ka 'dyi o ne zabu gba o-o. U atsia anu ne uo.

*Yesu asuno pi okpala, ani atsia akobho di obhulu kuo*

(*Tsia bhú Mlk. 1:39; di ne bhú Luk. 4:44, 6:17-18.*)

<sup>23</sup> Abhomu-o, Yesu adhuku bhú Galilaya libhomu. Ani adu asuno bhú oeti nadje lili gba Moidje inde na ndu doto bhomu-o. Ani adu di akpokpo Bádha Ngali Nau na abhúla-o. Ani atsia adu di akobho ndu okuo hana di ne ndu eze hana li okpala adu ne e-o. <sup>24</sup> Abhomu-o, ngali gba ani ayangba bhú ndu doto na Silia libhomu. U atsia ago pi ani ne okpala inde adu ne okuo ngangá-a hana: obhende li osisiti bua adu ato mbolo li o, obhende li kuo nagbulu magbulu adu amene o, ne obhende na eze. Ani atsia akobho uo. <sup>25</sup> Abhomu-o, okpala bhelé inde ayie bhú Galilaya, ne bhú ogudhu Ndjikpa, ne bhú Yelusalema, ne bhú Yudeya la di ne ayi 'ngu na Djuludani atsia akpata ani.

**5**

*Djali na kukulu*

(*Tsia bhú Mlk. 3:13; di ne bhú Luk. 6:12-13, 20-23.*)

<sup>1</sup> Li Yesu au bhiti okpala lie-e, ani a'u apí 'ta. Ani adu kuto, omùkpata gba ani-e atsia adyudyo lio de ani. <sup>2</sup> Abhomu-o, ani aholo nasuno pi uo me:

<sup>3</sup> «A ko djali pi okpala inde ngau lio padhá kala Ebhe, anga ngauo-o, Nau na abhúla-a pi uo.

<sup>4</sup> A ko djali pi obhende ngaku 'gbá, anga ngauo-o, Ebhe akúo ngula sala uo ngae.

<sup>5</sup> A ko djali pi obhende na bhuku bua, anga ngauo-o, u agbógbo bhusu o li doto inde li Ebhe apana e pi uo-o.

<sup>6</sup> A ko djali pi obhende akunda bha ndju namene ngbili 'ngú , anga ngauo-o, Ebhe améne me u du bedhe ngú namemene.

<sup>7</sup> A ko djali pi obhende ngadje ndjinga okpala koko, anga ngauo-o, Ebhe adjé ndjinga uo.

<sup>8</sup> A ko djali pi obhende bubu li bua o, anga ngauo-o, u aú Ebhe.

<sup>9</sup> A ko djali pi obhende ngato guo 'ngú sánda okpala, anga ngauo-o, u a'í uo me ongisi gba Ebhe.

<sup>10</sup> A ko djali pi obhende u ngato mbolo li o ka anga u ngamene ngbili 'ngú, anga ngauo-o, Nau na abhúla-a pi uo.

<sup>11</sup> A ko djali pi yi i du me okpala nde ngasobho yi, u nde ngato mbolo li yi, u nde di ngapa ndu sisiti 'ngú li yi hana ne eu ka yi abhuka ma lie-o. <sup>12</sup> Yi mbila me, u ato bhadi nani mbolo li opolofeta na kalanu-o moko. Kaka-a, yi du bhú djali, amba yi du di bhú ndjili,

anga makalá gba yi inde abhúlá-a adú ngbéngbé.»

*Yi ne ngutu di ne zi 'ke na pílá doto*

*(Tsia bhú Mlk. 9:50; di ne bhú Luk. 14:34-35.)*

<sup>13</sup> «Ngayi-e, yi ne ngutu na pílá doto. I ða la me ngutu nde andapa-a, a akólo matá dédé lele pi? A matá li kulu ade. A ayo bha ibili nababala kilidjo, li okpála tsia dédele ne 'dhu o.

<sup>14</sup> Ngayi-e, yi ne zi 'ke na pílá doto. Gudhu inde ayiki lie pí eta-a, a awó lie belegu de bini. <sup>15</sup> U dhedhe eke-e, a ko ngú na'o'o asa lusa de. Engú bini, a ko ngú na'o'o apí misa ngubula me aziga ndu okpála inde abhú 'ti-e hana. <sup>16</sup> A bhadi pi yi moko. A ayo me zi yi suno lie bhú djila ndu okpála hana ngubula me u u babadha kulu gba yi-e, u de dhogo 'Dyi yi inde abhúlá-o.»

*Yesu go ngú nabhelo líli gba Moidje-e de*

<sup>17</sup> «Yi abhúndja de me ma ago ngú nabhelo líli gba Moidje di ne me ma ago nabhelo nasuno gba opolofeta-a\* de. Ma go ngú nabhobhelo de. Engú bini, ma ago mangbo ngubula nambamba tata hana. <sup>18</sup> Ma apa pi yi na paká me: abana li kokpí ne doto bhue bha pi-ie, ndu 'ngú hana inde bhú líli gba Moidje-e, améne lie. U búlu belegu mboye 'dhu balua, i ða di-e mboye 'kpú balua bini bhúbhú de, nakolo bha li sokpí. <sup>19</sup> Kaka-a, kpála bhende i gumu mboye 'ngú bhú ká olíli gba Moidje-e, ani suno la di pi okpála koko namene mo-o, ani adú kpála na yeye bhú Nau na abhúlá. Engú bini, kpála bhende i lila-a, ani nde di ngasusuno pi okpála koko-o, ani adú kpála na ngbéngbé bhú Nau

na abhúlá. <sup>20</sup> Ma pa pi yi mo-o padhá de, anga li ngbili 'ngú gba yi-e ðu ngbéngbé nane bhende gba omusuno na líli gba Moidje ne omuFalisai-e mane de-e, yi ti da nali bhú Nau na abhúlá-a de.»

*Yesu asuno pindji nake 'ngú líli*  
*(Tsia bhú Mlk. 11:25; di ne bhú Luk. 12:57-59.)*

<sup>21</sup> «Yi adje me u apa nani pi onguo ogbi yi me: «Mo obhelo kpála de. Kpála bhende i bhelo kpála bhú gandji-e, a ayo me u gbe ani kala Libi okpála natsia 'kpí li 'ngú gba omaYuda .† <sup>22</sup> Engú bini, ngama-a, ma ngapa pi yi me: kpála bhende i bi 'gú ne ndai e, a ayo me u gbe ani bhú tilibinale. Kpála bhende i pa pi ndai e me: «Mu ne ngingi», a ayo nagbe ani kala Libi okpála natsia 'kpí li 'ngú gba omaYuda-o. Kpála bhende i sobho ndai e me: «Mu ne bhulu pele», a ayo me u bhike ani bhú dé djua na ðuduma-o. <sup>23</sup> I ða me mu nde adji naha makiso pi Ebhe li bili natsulu enu pi ani-e, i ða la me mu nde abhúndja me ni amene siti 'ngú li pabíli gba ndai ni-e, <sup>24</sup> mu de 'o ka makiso gba mu-o kala bili natsulu enu-o oo, amba mu gie ngaiza limu nato guo 'ngú sunda yi ne ndai mu. Pipita la-a, mu go ha makiso gba mu-o pi Ebhe.

<sup>25</sup> I ða di me kpála nde akunda nagbe mu kala odjudji-e, yi de dje kolo liyi ne ani me yi nde nga bha li kpadji, ngubula nalila me kpála yi nde ne e bhú 'ngú-o agbe mu bhú tilibinale de, amba djudji a'í polisi de me ani to mu bhú tikpu-o de. <sup>26</sup> Ma apa pi mu na paká me, mu ti da nakoto oo padhá de i ða me mu nde di mangimbo bhomu-o nakolo li senge na soso-o de ko.»

\* 5:17 5:17 Líli gba Moidje di ne ongu inde li opolofeta aye e, a ko Gandja na Didili-e libhomu.

† 5:21 5:21 Tsia bhú Eki. 20:13; di ne bhú Det. 5:17.

*Nasuno pindji nakunda bhoko, i du di-e elø koko*  
(*Tsia bhú Mat. 18:8-9; di ne bhú Mlk. 9:43, 47-48.*)

<sup>27</sup> «Yi adje me u apa nani me: «Mo okúnda bhoko, i du di-e elø koko de.†» <sup>28</sup> Engú bini, ngama-a, ma apa pi yi me: kpála bhende i tsia elø koko ne gumu ani-e, kpála ango-o akunda elø ango-o li bhobua e akunda.

<sup>29</sup> † du me lí djila mu na kokpa nde ngato mu bhú siti 'ngú-o, mu de gbe, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na duduma. <sup>30</sup> † du la di me 'kpa mu na kokpa nde ngato mu bhú siti 'ngú-o, mu de kodho, mu bhike de mu tsutsu. Padhá de, anga nakpi ka yá mu bini-e, a pi mu ndjindji ane me u bhike 'lá mu libhomu bhú djua na duduma.»

*Nasuno pindji nagbo bhusu o bhú kava*

(*Tsia bhú Mat. 19:7-9; ne bhú Mlk. 10:4-5; di ne bhú Luk. 16:18.*)

<sup>31</sup> «U apa di nani me: † du me kpála bini nde agie wala e-e, a ayo me ani ye balua inde li ongámási adéle 'kpa o bhú e pi ani. Balua ango-o asúno ngae me ani atse ani atse.†» <sup>32</sup> Engú bini, ngama-a, ma apa pi yi me, kpála bhende i 'e wala e me ani nde holo ani ne bhoko koko de-e, ani ngakata ani bhú nakunda bhoko koko. A akunda napa me, kpála bhende i ha elø inde li bhoko koko agie e, ani akunda bhomu-o elø gba kpála koko.»

*Nasuno pindji natu silika*

<sup>33</sup> «Yi adje matá nani me u apa pi onguo ogbi ní me: «Mo ogúlu silika mo otu e de. Engú bini, mene engú mo otu silika li e kala

Ngámá-o.» <sup>34</sup> La ngama-a, ma apa pi yi me, yi atu silika belegu de bini: yi atu silika ne 'li kokpi de, anga a bhomu-o bili li Ebhe ngadu li e-o. <sup>35</sup> Yi atu silika ne 'li doto de, anga a ko bili inde ani nga'o 'dhu e li e ko. Yi atu silika ne 'li Yelusalema de, anga a ko gudhu gba Ebhe, 'Ngbé Ngámá. <sup>36</sup> Mo otú la di silika ne 'li 'ndji mu de, anga mu ti da nadjí lí sundjo mu bini de me akolo bubu, i du di-e bibili-e de. <sup>37</sup> † du me yi nde ngagama 'ngú-o, yi de pa bha me: «A moko», di ne me «A mo-o ade.» Padhá de, anga ndu ongú bhe pépé-e hana ayie ka Djabulu.»

*Nasuno pindji nagie siti pi siti*  
(*Tsia bhú Luk. 6:29-30.*)

<sup>38</sup> «Yi adje nani me u apa me: «Li kpála du djila mu-o, mu de du di djila ani», u apa di me: «Li kpála gumu 'te mu-o, mu de gumu di 'te ani.»† <sup>39</sup> La ngama-a, ma apa pi yi me, i du me kpála nde amene siti 'ngú li yi-e, yi agisila de. Engú bini, i du me kpála bini nde asu pabhø mu na kokpa-a, mu de dji di pabhø mu na gali-e pi ani, amba ani su di. <sup>40</sup> † du me kpála bini nde akunda nagbe mu bhú ngbanga ngubula simisi gba mu-o, mu de 'o di ká koti gba mu-o pi ani. <sup>41</sup> † du me kpála nde aholo mu ne kpéke me mu bi 'he gba ni-e ngubula kilometele bini-e, mu de bi bha ibili pi ani ngú kilometele bhisi. <sup>42</sup> † du me kpála nde ayo 'he ka mu-o, mu de ha pi ani. † du me kpála nde ayo bopulu ka mu-o, mu de ha pi ani. Mo oyála naha bopulu pi kpála inde akunda nayoyo ka mu-o de.»

*Nasuno pindji nakunda bhulu yala gba o*

(*Tsia bhú Luk. 6:27-28, 32-36.*)

† 5:27 5:27 Tsia bhú Eki. 20:14; di ne bhú Det. 5:18. † 5:31 5:31 Tsia bhú Det. 24:1. † 5:38 5:38 Tsia bhú Eki. 21:24; ne bhú Lev. 24:20; di ne bhú Det. 19:21. † 5:43 5:43 Tsia bhú Lev. 19:18.

43 «Yi adje me u apa nani me: «Kunda kilí mụ, amba mụ yala bhulụ yala gba mụ-o.†» 44 Engú bini, ngama-a, ma apa pí yi me, yi kunda obhulụ yala gba yi ko. Yi yo Ebhe pí obhende ngato mbolo lí yi-o. 45 Yi mene mo-o, yi dú ne kukulụ ongisi gba 'Dyi yi inde abhúlá-o. Padhá de, anga ani ngagbe zindjila gba e pí osisiti okpála di ne pí obabadha okpála. Ani ngatuko ebha pí okpála na ngbingbili di ne pí obhende na ngbingbili ade ko. 46 Ma pa mo-o padhá de, anga i dú me yi nde ngakunda bha obhende ngakunda yi-e, yi asía tété mangua makalá dho? Ondombi na mandjandja bhadi ngamemene moko! 47 I dú la di me yi nde ngayi bha bini ondaise yi-e, yi ngamene bhomu-o mangua ngamba 'ngú dho? Omupagano bhadi ngamemene moko. 48 La ngayi-e, yi dú ngbingbili bhú ndu 'ngú hana maka lí 'Dyi yi inde abhúlá-a nde lie ngbingbili ko.»

**6**

*Nasuno pindji napu 'he pi obhulụ ndibhili*

1 «Yi lila liyi me yi améne bádha 'ngú gba yi-e kala okpála de me u u yi mau-o de. I dú mo-o de-e, yi sía makalá ka 'Dyi yi inde abhúlá-a de. 2 Nedhinga inde mụ ngapu 'he lie pí bhulụ ndibhili-e, mo oméne de me ni bhí tété makpə maka lí obhulụ kali amemene lie bhú oti nadge líli gba Moidje di ne lí ohi kpadji-e de. U memene mo-o ngubula me okpála dhөгө o. Ma apa pí yi na paká me u asia makalá gba o asia. 3 La pí mụ-o, nedhinga mụ ngapu 'he lie pí bhulụ ndibhili-e, a ayo de me 'kpa mụ na gali-e mbila ehe inde lí 'kpa mụ na kopya ngamene e de. 4 A moko, a ayo me napu 'he gba mụ-o tigala bhú pepe, amba 'Dyi mụ

inde ngau 'kpí bhú pepe-e gie pí mụ ngae.»

*Nasuno pindji nayo Ebhe (Tsia bhú Luk. 11:2-4.)*

5 «Nedhinga yi ngayo Ebhe lie, yi adú maka obhulụ kali de. Padhá de, anga u kükunda nayo Ebhe me u nde alụ malụ bhú oti nadge líli gba Moidje di ne lí odikpadji, amba okpála dú au o mau. Ma apa pí yi na paká me u asia makalá gba o asia. 6 La pí mụ-o, nedhinga mụ ngayo Ebhe lie, a ayo me lí bhú tina 'ti gba mụ-o. Dho bhəbhə nganda mụ madho, amba mụ yo 'Dyi mụ inde lí bíli na pepe bhomu-o. Abhomu-o, 'Dyi mụ inde a uu 'kpí bhú pepe hana-a, tsia há makalá pí mụ ngae. 7 Nedhinga yi ngayo Ebhe lie, yi agié liyi pí oeli bini bhutsibhutsi maka omupagano de. Padhá de, anga u ngabhundja me Ebhe adjé o i dú me o nde ngakpokpo kambí oeli. 8 Yi améne maka uo de, anga 'Dyi yi mbila ehe yi nde ne gumu e hana kala me yi yo ka ani-o. 9 Ngayi-e, yi yoyo Ebhe me:

'Dyi ya inde abhúlá,  
 a ayo me kpála ne kpála mbila me,  
 mụ ne Ebhe inde bubu.  
 10 A ayo me mụ go u ngámá píla doto.  
 A ayo me kpála ne kpála píla doto mene mukunda gba mụ-o maka i ngamene lie lie abhúlá ko.  
 11 Ha ezụ inde atí ne ya lí 'kpí na naki-e pí ya.  
 12 'E siti 'ngú gba ya inde ya amene e lí pabíli gba mụ-o.  
 Padhá de, anga ngaya makpe ya ngambu di lí obhende ngamene osisiti 'ngú lí pabíli gba ya-o.  
 13 I dú me ya nde alí bhú nale-e, mo o'ó de me ya mene siti 'ngú-o de.  
 Engú bini, lila ya sakpa Djabulụ malila.

[Padhá de, anga Nau ne angu la di ne sangu ,

a ko naamu 'he, duduma ne duduma. A adu moko.]

14 I du me yi nde ngambu li osisiti 'ngú gba okpála-a, 'Dyi yi inde abhúlá-a a'é bhadi osisiti 'ngú gba yi-e moko. 15 Engú bini, i du me yi nde mbu li osisiti 'ngú gba okpála de-e, 'Dyi yi 'é di osisiti 'ngú gba yi-e de.»

*Nasuno pindji natse 'zu ngú nayo Ebhe*

16 «Nedhinga yi ngatse 'zu lie ngú nayo Ebhe-e, yi aná bhúla yi maka obhulu kali amemene lie de. U memene mo-o ngú nasuno pi okpála me o ngatse 'zu ngú nayo Ebhe. Ma apa pi yi na paká me u asia makalá gba o asia. 17 La pi mu-o, nedhinga mu ngatse 'zu lie ngú nayo Ebhe-e, vulu bhúla mu, amba mu pulu ne emu ndjindji, 18 amba okpála ambála de me mu ngatse 'zu-o de. 'Dyi mu inde ne ndu bili hana, abana bhú bili na pepe-e, mbila bha ngae kpi e kpi. Abhomu-o, 'Dyi mu inde a uu 'kpi bhú pepe hana-a, tsia há makalá pi mu ngae.»

*Yesu apa me yi po bhúla tia gba yi-e abhúlá*

*(Tsia bhú Luk. 12:33-34.)*

19 «Yi apó bhúla tia pi yi píla doto inde-e de. Padhá de, anga yi po bhúla tia pi yi ei-e, opálanga ne mbelende síti, li obhulu 'zi dúdu pabu 'ti-e, u tsia zí. 20 Engú bini, yi po mangbo bhúla tia pi yi abhúlá. Padhá de, anga oo, opálanga ne mbelende ngú nasisiti ade, obhulu 'zi di ngú nadudu pabu 'ti-e me u zi-e ade. 21 Padhá de, anga bili inde li tia gba mu nde lie, bua mu dú bhadi oko.»

*Djila kpála ne zi 'ké na kute ani*  
*(Tsia bhú Luk. 11:34-36.)*

22 «Djila kpála ne zi 'ké na kute ani. I du me djila mu nde ndjindji-e, kute mu libhomu dú li zi 'kpi. 23 Engú bini, i du li djila mu ne kuo-o, kute mu libhomu dú bhú biti. I du me zi 'kpi inde mu ngabhundja me a bhú ni-e nde biti-e, biti ango-o né la matá dada mane.»

*Yi 'o bha nabhuka gba yi-e bhú Ebhe, yi a'ó bhú tia de*

*(Tsia bhú Luk. 16:13.)*

24 «Kpála bini ti da namene kulu pi ongámási bhisi de. A akunda napa me, ani ú bhe bini-e padhá, ani tsia tsé ani, ani kúnda bhe koko-o, ani tsia dháka li ani. Yi ti da nadu bali pi Ebhe ne pi tia\* bhú nedhinga bini de.

25 Kaka-a, ma apa pi yi me, yi a'ó bua yi abhúlá ngubula mukobho gba yi-e de. Yi adú akina liyi de me ya azú si ni, di ne me ya andji si ni-ie de. Mukobho gba kpála ane ezú mane adi? Yi akina di liyi de me ya adyí si ni-ie de. Kute kpála ane bongo mane adi? 26 Yi tsia nga maka li odhu nde lie abhúlá: u lulu 'dyi de, u gbegbe di nguwa abhiye de, u 'o'o la di 'he bhú ngbokopi de. Engú bini, 'Dyi yi inde abhúlá-a ngaku uo! La ngayi-e, yi ane uo ne tata. 27 A ko da bhú ka yi ka nakina lie i ti da na'o mbo ekpi koko pi mukobho gba e?

28 Ka ni la yi ngabhelo bua yi lie li 'ngú na bongo-o? Yi tsia nga maka li ofelele ngabhele lie abhiye: u memene kulu de, u dudu di bongo de. 29 Ma apa la pi yi me, abana 'ngbé ngámá Salomo bhú ká tia gba e hana-a, ani dyi belegu nani bongo maka suka uo de. 30 I du me Ebhe nde ngato bongo li ulu inde abhiye mo-o, ulu inde naki oo-o, inde u abhike la mambi e bhú djua-a, ani méne pi

\* 6:24 6:24 Tia: Bhú eli na Giliki-e, u aye me «Mamo», a akunda napa me na'o tia maka ebhe.

yi ane mane di? Nabhuka gba yi-e yeye mo-o ka ni? <sup>31</sup> Ka 'ngú angoo, yi akína liyi de me: 'Ya azú ni? Ya andjí ni? Ya adyí li ya mangua bongoo dho?' <sup>32</sup> Ndu ongú bhomu-o hana, omupagano ngagigili ngao. U gili ne ndala de. La-a, 'Dyi yi inde abhúlá-a, mbíla ndjindji me yi ne gumu ndu 'he bhomu-o hana. <sup>33</sup> Yi gili ngaiza Nau gba Ebhe-e bhú dabili bini ne namene ngbili 'ngú inde aní akúnda e-o. Pipita-a, li Ebhe tsia há di ndu oehe koko bhomu-o hana pi yi. <sup>34</sup> Kaka-a, bua yi angámba li 'ngú na mambi de. Mambi abhúndja 'ngú gba e ngae. A li ekpí bini ne bini ne líkabhu inde ati ne e.»

## 7

*Yi akódho 'ngú gba okpála koko de*

*(Tsia bhú Luk. 6:37-38, 41-42.)*

<sup>1</sup> «Yi akódho 'ngú gba okpála koko de, amba Ebhe akódho di engú gba yi-e de. <sup>2</sup> Padhá de, anga lele maka yi ngakodho 'ngú gba okpála koko lie, Ebhe akódho bhadi engú gba yi-e moko. La di-e, aní améne bhadi pi yi maka yi ngamemene lie pi okpála koko-o. <sup>3</sup> Ka ni mu ngau mboye ku musoli inde bhú djila ndai mu-o lie, mu nde u la pála ndula inde bhú djila mu-o de? <sup>4</sup> Lele pi mu ti da napa pi ndai mu lie me: 'Djedjeke, ma go gbe ku musoli inde bhú djila mu bhomu-o», me a nde bhú djila mu ne pála ndula-a? <sup>5</sup> Bhulu kali, gbe ngaiza pála ndula inde bhú djila mu-o, amba pipita-a, mu tsia ú la 'kpí ndjindji ngú nagbe mboye ku musoli inde bhú djila ndai mu ko.

<sup>6</sup> Yi ahá ehe na bubu gba Ebhe-e pi obulu de, anga i du mo-o de-e, u gó sisidha yi má tsue tsue! Yi abála omayaka gba yi na tia bhelé-e pi opame de, ngú nakpe me u anú adedele ne 'dhu o de.»

*Nazi 'ndji o bhú mayo*

*(Tsia bhú Luk. 11:9-13.)*

<sup>7</sup> «Yi yo 'he, amba u ha pi yi. Yi gili 'he, amba yi sia. Yi bhi bhoti, amba u 'u pi yi. <sup>8</sup> Padhá de, anga kpála bhende ngayo 'he ngasisia. Kpála bhende ngagili 'he ngauu. Kpála bhende ngabhi bhoti-e, u nga'u'u pi ani. <sup>9</sup> Bhú ká yi-e, a ko da inde i du me ndili gba ani-e nde ayo mapa ka ani-e, ani tsia há pi ani teme? <sup>10</sup> I du di-e me ndili nde ayo sungu ka 'dyi e, ani tsia há pi ani kpulu? <sup>11</sup> I du la me, ngayi okpála-kuti inde sisiti-e, yi nde ambíla naha ohe na babadha pi ongisi gba yi-e, lele pi li 'Dyi yi inde abhúlá-a há ohe na babadha lie pi obhende ngayoyo ka ani-e de-e?»

*Lili na kukulu*

*(Tsia bhú Luk. 13:24.)*

<sup>12</sup> «Ndu 'ngú hana inde yi ngakúnda me okpála mene e pi yi-e, yi mene di engú angoo pi uo. A bhomu-o engú inde li líli gba Moidje apa e, la di ne ongú inde li opolofeta aye e-o.»

*Nasuno pindji okpadji bhisi kpi kpi*

*(Tsia bhú Luk. 13:25-27.)*

<sup>13-14</sup> «Yi li li bhoti bhende na mbomboye ko! Padhá de, anga a ngato kpála bhú mukobho ngae. La-a, kpadji angoo dada kpekpeke. Kaka-a, okpála ngali li kpadji angoo bhelé ade. Yi alí li bhoti bhende na ngbéngbé-e de. Padhá de, anga a ngato kpála bhú ngita ngae. La-a, dada kpekpeke ade. Kaka-a, okpála bhelé ngagbida li kpadji angoo.»

*Opolofeta na eu*

*(Tsia bhú Luk. 6:43-44.)*

<sup>15</sup> «Yi lila liyi ka opolofeta na eu-o malila. Padhá de, anga u ngago agba yi me u nde adyí kó kandelø, engú bini, abhú uo-o, a ko onute. <sup>16</sup> Yi ambíla uo li okulu gba o-o. U

koko manga li ondula na eti de. U koko la di malibhombi li kobe de. <sup>17</sup> A moko, ndula na babadha ngali bhadi olíli na babadha. Engú bini, ndula na sisiti ngali bhadi olíli na sisiti. <sup>18</sup> Ndula na babadha ti da nali olíli na sisiti de, la di-e, ndula na sisiti ti da nali olíli na babadha de. <sup>19</sup> Ndú ndula hana inde i li líli na babadha de-e, u adé, u tsia bhíke bhú djua. <sup>20</sup> A moko, yi ambíla opolofeta na eu li okulu gba o-o.»

### *Omukpata na kúkulu*

*(Tsia bhú Luk. 13:25-27.)*

<sup>21</sup> «A ko de me okpála bhende ngapa muma me «Ngámá, Ngámá-a!» alí ndú o hana bhú Nau na abhúlá-a de. Engú bini, a alí bha bini ne obhende ngamene engú inde li 'Dyi ma inde abhúlá-a ngakunda e ko. <sup>22</sup> Li 'kpí nakodho 'ngú-o, okpála bhelé apá muma me: «Ngámá, Ngámá, ya mene nani kulu na polofeta ne 'li mu di? Ya pandja nani osisiti bua bhú okpála ne 'li mu di? Ya mene nani ongamba 'ngú ghele ne 'li mu di?» <sup>23</sup> La-a, ma tsia ghele pi uo me: «Ngayi obhulu namene siti 'ngú inde-e, ma mbila nani yi belegu de bini. Yi gbe liyi de ma tsutsu!»

### *Oeti bhisi*

*(Tsia bhú Luk. 6:47-49.)*

<sup>24</sup> «A moko, ndú kpála hana inde adje eli inde ma apa e, ani atsia amene maka li eli ango-o apa lie, ani maka kpála na imbilangu inde a'o 'dhu 'ti gba e pí teme. <sup>25</sup> Ebha adhi, engu asi, anvi ago ne engu-o, a atsia atu lie li kute eti-o. La-a, eti-e ti de, anga odhudhu adu me a nde pí teme. <sup>26</sup> Engú bini, ndú kpála hana inde adje eli inde ma apa e, ani tsia mene maka li eli ango-o apa lie de-e, ani maka kpála bini na ngingi inde ayiki

eti gba e pí sike. <sup>27</sup> Ebha adhi, engu asi, anvi ago ne engu-o, a atu lie li kute eti bhomu-o. Eti ango-o atuko kuto, a atsia atsambala hana!»

<sup>28</sup> Li Yesu andjia nakpo ongú bhomu-o lie, ndú okpála hana atsia angamba li nasuno gba ani-e naali. <sup>29</sup> Padhá de, anga ani du nasuno pi uo maka omusuno na líli gba uo-o de. Engú bini, ani adu asuno pi uo maka ngámá.

## 8

### *Yesu akobho bhulu kaba bini*

*(Tsia bhú Mlk. 1:40-45; di ne bhú Luk. 5:12-16.)*

<sup>1</sup> Li Yesu akø eta-a lie, okpála bhelé atsia akpata ani. <sup>2</sup> Abhomu-o, bhulu kaba bini adyudyo lie, ani atutu lipuku e kuto kala ani. Ani atsia apa me: «Ngámá, i du me mu nde akunda-a, mu ti da nakobho ma.» <sup>3</sup> Yesu ato 'kpa e, ani 'o li kute ani ne napa me: «Ma akunda moko, kokobho!» Ma 'li ma me-e, kaba agulu bha kolo li ani hana. <sup>4</sup> Abhomu-o, Yesu atsia apa pi ani me: «Gbo dje mu, mo opa 'ngú inde-e pi kpála bini de. Engú bini, nu suno bha limu pi dimandø gba Ebhe, amba mu ha makiso maka li líli gba Moidje apa lie ngubula nasuno pi okpála me mo okobho.\*»

### *Yesu akobho kpála na kulu*

*gba ngámá gba osudha na Loma*

*(Tsia bhú Luk. 7:1-10; di ne bhú Dja. 4:43-54.)*

<sup>5</sup> Abhomu-o, Yesu ali bhú kuti na Kapalanauma. Ani adu ali lie oo, ngámá bini gba osudha na Loma† adyudyo lie de ani. Ani atsia akikiliki lie pi ani <sup>6</sup> me: «Ngámá, kpála na kulu gba ma-a asi kuto abhú 'ti. Ani agugumu kuto, ani ngadje likabhu na kuo

\* 8:4 8:4 Nasuno pi okpála me mo okobho: A ko nasuno me ni akpata líli gba Moidje ndjindji. Tsia bhú Lev. 14:2-32. † 8:5 8:5 Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adu nani maYuda de.

kuo.» <sup>7</sup> Yesu apa pi aní me: «Ngama-a, ma adjí akobho aní.» <sup>8</sup> Engú bini, ngámá gba osudha-a atsia agie me: «Ngámá, ma ne tetele kpála† ade, ngubula me mu lí bhú 'tí gba ma-o. La-a, mu pa bha kolí eli bini-e, lí kpála na kulu gba ma-a kóbho. <sup>9</sup> Padhá de, anga ngama makpe-e, ma sa lílí gba ngámá, ma la di ngaha lílí pi osudha. Ma pa pi bhe bini-e me: «Nunú!» Aní nú. Ma pa pi bhe koko-o me: «Gogo!» Aní gó. Ma pa pi balí gba ma-a me: «Mene 'he inde!» Aní méne.»

<sup>10</sup> Lí Yesu adje engú bhomu-o lie, aní angamba naali. Aní atsia apa pi okpála inde adu akpata aní-e me: «Ma apa pi yi na paká me, ma bhaka nga ngua nabhuka inde-e bhú kpála bini bhú ká omafsalaele de! <sup>11</sup> Ma atsia apa la di pi yi me: okpála bhelé ayie ne andjongu di ne akati, u tsia dúlu pí dabilí na anokomia bhú dabilí bini ne Abalahama, ne Isaka, la di ne Yakobho bhú Naú na abhúlá ko. <sup>12</sup> Engú la bini, obhende ayo nani me u sia dabilí bhomu-o, u abála uo bhú bití akilidjo. Oo, u adu naku 'gbá di ne nazú tate o.» <sup>13</sup> Abhomu-o, Yesu atsia apa pi ngámá gba osudha-a me: «Gie límá agba mu! Maka mo obhuka lie, a ayo me amene lie pi mu moko.» Kpála na kulu-o atsia akobho bha bini lí nedhinga angoo ko.

*Yesu akobho 'hi wala Piele*  
(*Tsia bhú Mlk. 1:29-34; di ne bhú Luk. 4:38-41.*)

<sup>14</sup> Pipita-a, Yesu alí bhú 'tí gba Piele. Aní abhaka me 'hi wala aní nde así kuto, kute aní nde kpákpá. <sup>15</sup> Yesu a'o 'kpa e lí 'kpa aní, kute

aní atsia aguo. Aní ayie bhúlá, aní atsia aholo nalú 'zú pi aní.

*Yesu akobho okpála bhelé*

<sup>16</sup> A akolo lie tagolo-o, u ago pi Yesu ne okpála bhelé inde lí osisiti bua adu nadu bhú o-o. Aní apandja osisiti bua ango-o ne 'lí e, aní atsia akobho di ndu okpála na kuo hana. <sup>17</sup> Aní amene mo-o ngubula me eli inde lí polofeta Isaya apa nani e amene lie. Engú inde aní apa nani e me: «Aní abha ndu olíkabhu gba ya hana, aní atsia abí ndu okuo gba ya hana lí kute e.†»

*Líli pi okpála inde akunda nakpata Yesu*

(*Tsia bhú Luk. 9:57-62.*)

<sup>18</sup> Lí Yesu au kambí okpála lie lingo e, aní atsia aha lílí pi omukpata gba e me o kodho 'kpí ne ayí ekpe na Galilaya. <sup>19</sup> Abhomu-o, musuno bini na lílí gba Moidje adyudyo lie, aní atsia apa pi Yesu me: «Musuno, ma akpáta mu lí ndu bilí mo onú lí e hana.» <sup>20</sup> Yesu apa pi aní me: «A ka onekpe ne gudho u asisi bhú e, a di ka odhu ne 'tí o. Engú la bini, ngama Ndíli gba kpála-a, dabilí ka ma ngú nasi tété ngú nago ade.» <sup>21</sup> Kpála koko inde adu di suka omukpata gba aní-e apa pi aní me: «Ngámá, ha kpadji muma, amba ma nu zí ngaíza 'dyí ma.» <sup>22</sup> Engú bini, Yesu apa pi aní me: «'O okpála koko u zí aní ngao.‡ La ngamu-o, go kpata ma.»

*Yesu ayoko anvi na kpekpeke*  
(*Tsia bhú Mlk. 4:35-41; di ne bhú Luk. 8:22-25.*)

<sup>23</sup> Pipita-a, Yesu a'u bhú zabu, omukpata gba aní-e atsia a'u'u

† **8:8** 8:8 Ngámá bhomu-o ambila nani ndjindji me lílí gba omaYuda ziba de me maYuda bini lí bhú 'tí gba kpála inde ne maYuda ade-e de. † **8:17** 8:17 Tsia bhú Isa. 53:4. § **8:22** 8:22 'O okpála koko u zí aní ngao: Bhú eli inde u aye nani Gandja na Mbia bhú e-e (eli gba oGílikí), u aye me: «'O okpála bhende amu-o, u zí okuo gba o-o.» A akunda napa me: «'O okpála bhende í bhuka nga de-e me u zí okpála bhende amu-o.»



nganda ani. <sup>24</sup> Ma gala kolo me-e, anvi bini na kpekpeke aholo nape pí ekpø-o masikpe de me zabu-o linda ka ngbo 'ngu-o. La ngaani Yesu-o, ani adu tila. <sup>25</sup> Abhomu-o, omukpata-a adyudyo lio de ani masikpe, u atsia azuku ani ne napa me: «Yaka! Ngámá, kobho ní, ní adji amú!» <sup>26</sup> Yesu atsia agie pí uo me: «Yi ne tsulu mo-o ka ni? Nabhuka gba yi-e nga bha yeye!» Ani ayie bhúlá, ani ambe bhú 'ndji anvi di ne engu-o. Abhomu-o, ndundu hana atsia akolo guguo! <sup>27</sup> Okpála angamba, u atsia adu apa me: «Kpála inde-e, a ko mangua kpála dho ngubula me belegu anvi di ne engu du namanga ani-e!»

*Yesu akobho okpála bhisi li osisiti bua adu nadu bhú o-o*  
(*Tsia bhú Mlk. 5:1-20; di ne bhú Luk. 8:26-39.*)

<sup>28</sup> Li Yesu akolo lie ayi 'ngu, bhú doto gba okpála na Gadala-a,\* okpála bhisi ayie bhú ká olata, u atsia ago abhaka ani. A adu bhú okpála ango-o ne osisiti bua, u atsia adu azi 'gú naali. Kaka-a, okpála du apu li kpadji li pápá bhomu-o de. <sup>29</sup> Abhomu-o, u aholo nasusula me: «Mo okunda namene ngu ya pi, Ndili gba Ebhe? Mo ogo ei ngu nato mbolo li ya kalanu me nedhinga nakodho 'ngu-o nde kolo nga di?» <sup>30</sup> A abhaka me de bili ango-o, 'ngbé piga opame† nde oo, u nde ngazu 'he. <sup>31</sup> Osisiti bua adu nakikiliki lio pi Yesu me: «I du me mu nde akunda napandja ya-a, mba ya bhú piga opame inde.» <sup>32</sup> Ani apa pi uo me: «Yi nunu.» U aze bhú okpála bhomu, u atsia anu alili bhú opame-o. Me-e, ndu opame ango-o hana akø eta ne holo, u

anu atuko bhú 'ngu má dhululu, ne namu ka o.

<sup>33</sup> Omulila gba uo atsi ne holo, u agbida bhú gudhu, u atsia akpokpo ndu 'ngu hana di ne engu inde akodho 'kpí li okpála bhisi inde adu ne osisiti bua bhú o-o. <sup>34</sup> Me-e, ndu okpála hana na gudhu ango-o anu ngu nabhaka Yesu. U au ani lie, u atsia akikiliki lio pi ani me ani yie bhú kuti gba o mayie.

## 9

*Yesu akobho kpála inde agugumu kuto*

(*Tsia bhú Mlk. 2:1-12; di ne bhú Luk. 5:17-26.*)

<sup>1</sup> Pipita-a, Yesu a'u bhú zabu, ani agulu matá ekpø-o, ani atsia akolo bhú Kapalanauma, gudhu ani adu nadu bhú e-o. <sup>2</sup> Me-e, okpála ago pi ani ne bhoko bini inde agugumu kuto. U ago ne ani pí kalagba. Li Yesu au nabhuka gba uo lie, ani atsia apa pi kpála inde gugumu e bhomu-o me: «Atou, ndika ma, u a'e osisiti 'ngu gba mu-o a'e.» <sup>3</sup> Abhomu-o, omusuno koko na lili gba Moidje atsia apa li bua o me: «Kpála inde-e ngasobho Ebhe!»

<sup>4</sup> Li Yesu ambila mabhundja gba uo lie, ani atsia apa pi uo me: «Ka ni yi ngabundja lie li bua yi sisiti mo-o?» <sup>5</sup> Padhá de, anga ane ne bhuku ne bhedho? Ne napa me: «U a'e osisiti 'ngu gba mu a'e», ne napa me: «yie bhúlá, dhudhuku?» <sup>6</sup> Ngu nasuno me ngama, Ndili gba kpála, ma ne angu píla doto ngu na'e osisiti 'ngu-o, a ayo me ma kobho bhoko inde.» Abhomu-o, ani atsia apa pi kpála inde agugumu-o me: «Yie bhúlá, ha kalagba gba mu, amba mu gie limu agba mu!» <sup>7</sup> Kpála ango-o

\* **8:28** 8:28 Gadala: A ko nani gudhu ka omaYuda de. † **8:30** 8:30 Opame: Pi omaYuda-a, pame nani ne enu na sisiti. Kaka-a, u 'o nani uo de. A du bha nani na'o opame ne okpála inde naao ne omaYuda ade ko. *Tsia bhú Mlk. 5:11.*

ayie bhúlá, aní atsia atapa agba e.  
 8 Li okpála au 'ngú angó-o lie, a'ò tsulu li uo naali, u adhögö Ebhe inde aha ngua angu bhomú-o pí okpála-kutí-o.

*Yesu a'i Matié  
 (Tsia bhú Mlk. 2:13-17; di ne bhú Luk. 5:27-32.)*

9 Pipíta-a, Yesu ayie oo. Aní adu akodho 'kpí lie, aní au kpála bini, a adu 'li aní me Matié. Aní adu me aní nde adu kuto bhú bilo inde u adu akala mandjandja bhú e-o. Aní apa pí aní me: «Kpata ma!» Matié ayie bhúlá, aní atsia akpata aní. 10 Pipíta-a, Yesu anu nazú 'he abhú 'tí gba aní. Abhomú-o, bhiti ondombi na mandjandja di ne okpála koko na sisiti ago adulu nazú 'he bhú dabilí bini ne Yesu di ne omukpata gba e-o. 11 Li omufalísai au lie mo-o, u atsia ayi omukpata gba aní-e me: «Ka ní li masuno gba yi-e ngazú 'he lie bhú dabilí bini ne ondombi na mandjandja di ne okpála na sisiti-e?» 12 La-a, Yesu adje engú angó-o, aní atsia apa me: «Okpála bhende ne kuo ade-e, u ne gumu mutia ade. Engú bini, okpála bhende ne kuo mangbo ne gumu mutia ngao. 13 Kaka-a, yi nu gili ta 'ngú inde li Bhuku gba Ebhe-e apa e me: «Engú inde anga li ma naali-e, a ko nadjé ndjinga okpála koko, a ko naha makiso de.» Padhá de, anga ma go na'i okpála bhende apa me o ngbingbili-e de. Engú bini, ma ago mangbo na'i okpála bhende au lío me o ne osisiti okpála-o.†»

*Yesu apa me u amáta nasuno gba ní-e ne nasuno koko de  
 (Tsia bhú Mlk. 2:18-22; di ne bhú Luk. 5:33-39.)*

14 Ekpí bini, omukpata gba Djaa bhulu nabatisa okpála adyudyo lío de Yesu, u atsia ayi aní me: «Ka ní li ngaya ne omufalísai, ya ngatse 'zú lie gemö ngú nayo

Ebhe-e, la-a, omukpata gba mu-o ngamemene mo-o ade-e?» 15 Yesu atsia agie pí uo me: «Okpála bhende u a'i o bhú anokomia na kuva tí da nayala nazú 'he uo me 'ko òlò-o nde ngabha bhú dabilí bini ne uo-o? Engú bini, oekpí akólo makolo, ekpí inde u a'é 'ko òlò-o lie bhú ká uo-o, li oekpí bhomú-o, u tsia tsé 'zú.

16 Kpála bini tí da nadu pála bongo na mbia li bhe na didili de. Padhá de, anga pápála bhende u a'o e pépé-e sídha bongo-o, li kaka-a tsia dú la matá sisiti naali.

17 U 'o'o pandi na mbia bhú odidili dhudhu na kó 'nu de. † du mo-o, li odhudhu-o úpa, li pandi-e túko, li odhudhu-o tsia síti di. U 'o'o mangbo pandi na mbia bhú odhudhu na mbia. Abhomú-o, ndundu hana tsia líla lie ndjindji.»

*Yesu akobho òlò bini, aní atsia azuku di ndili na òlò gba Yailo*

*(Tsia bhú Mlk. 5:21-43; di ne bhú Luk. 8:40-56.)*

18 Li Yesu adu agie 'ngú pí omukpata gba Djaa lie, ngámá bini adyudyo lie de aní masikpe, aní atutu lipuku e kuto kala aní. Aní atsia apa pí aní me: «Ndili gba ma na òlò-o andjili mbia inde. Engú bini, go 'o 'kpa nu pí aní, amba aní zuku.» 19 Abhomú-o Yesu ayie bhúlá, aní atsia akpata aní bhú dabilí bini ne omukpata gba e-o.

20 Bha li nedhinga bhomú-o, òlò bini inde li ngute adu natuko lie ngubula kalanga ndjikpa ne ká bhisi-e ago de Yesu ne akele aní, aní atsia abu 'kpa e li 'so bongo gba aní-o. 21 Padhá de, anga aní adu apa li bua e me: «† du bha me ma nde abu 'kpa ma li bongo gba aní-e, ma kóbho.» 22 Engú bini, Yesu adji lie, aní au aní, aní atsia apa me: «Atou, ndika ma!

† 9:13 9:13 Tsia bhú Oz. 6:6.

Nabhuka gba m̄-o akobho m̄ akobho.» Bha li nedhinga bhom̄-o, ēl̄e ang-o atsia akobho.

<sup>23</sup> Yesu akolo agba ngámá-o. Aní abhaka me okpála nde má dja dja dja ngú nan̄ azi kuo-o, omavul̄ mbálá-a nde nga'u mbálá. <sup>24</sup> Abhom̄-o, aní atsia apa me: «Yi gbe liyi ne sidi, anga ndili na ēl̄e inde-e kpi de, engú bini, aní ngala.» Abhom̄-o, u aholo nam̄ aní. <sup>25</sup> Li u apandja ndu okpála hana lie kilidjo-o, Yesu ali abhú 'ti. Aní aha 'kpa ndili-o. Abhom̄-o, ndili-e atsia ayie bhúlá. <sup>26</sup> Ngali na engú ang-o atsia ayangba bhú ndu doto bhom̄-o libhomu.

*Yesu akobho okpála bhisi inde i u 'kpí de*

<sup>27</sup> Li Yesu aholo 'nú lie, okpála bhisi inde i u 'kpí de-e, aholo akpata aní ne nasusula me: «Ndili gba Davidi, dje ndjinga ya!» <sup>28</sup> Aní ali lie abhú 'ti-e, okpála bhisi inde i u 'kpí de bhom̄-o adyudyo lio de aní. Yesu atsia ayi uo me: «Yi abhuka me ma ti da nateteke yi?» U agie pi aní me: «Heni, Ngámá.» <sup>29</sup> Abhom̄-o, aní abu 'kpa e li djila uo ne napa me: «A ayo me amene lie pi yi maka nabhuka gba yi-e nde lie ko.» <sup>30</sup> Abhom̄-o, djila uo abhulu, Yesu atsia agbele 'dje uo kpekpeke me: «Yi gbo 'dje yi! A ayo de me kpála bini mbila engú inde-e de!» <sup>31</sup> Engú bini, bha naze ka uo me-e, u apandjala ngali gba ani-e bhú ndu doto ang-o libhomu.

*Yesu akobho kpála bini inde i bhú 'ngú de*

<sup>32</sup> Nedhinga li okpála bhisi inde li Yesu akobho o bhom̄-o adu nan̄ lie, bha li nedhinga bhom̄-o, okpála ago pi Yesu ne kpála bini inde i bhú 'ngú de ka siti bua inde adu nadu bhú ani-o. <sup>33</sup> Li Yesu agbe siti bua ang-o lie bhú ani-e,

kpála ang-o atsia aholo nagama 'ngú. Abhom̄-o, kambí okpála angamba, u atsia adu napa me: «Nguwa 'ngú inde-e u nga lie bhú ká omafalaee belegu de bini!» <sup>34</sup> La-a, om̄Falisaí adu napa me: «Ngámá gba osisiti bua ngaha angu pi aní ngú napandja osisiti bua ngae bha-a!»

*Yesu adje ndjinga kambí okpála*

<sup>35</sup> Abhom̄-o, Yesu adu adholo bhú ndu ogudhu di ne bhú ndu okuti hana. Aní adu nasuno bhú oeti nadje líli gba Moidje . Aní adu akpokpo Bádha Ngali Nau gba Ebhe , aní atsia adu nakobho ndu kuo hana di ne ndu oeze hana. <sup>36</sup> Li aní au kambí okpála lie, aní adje ndjinga uo naali, anga u adu me u nde andala, angu uo nde la di andjia maka piga okandele inde li mulila nde ka o ade. <sup>37</sup> Abhom̄-o, aní atsia apa pi om̄kpata gba e me: «Nguwa abhiye-e bhelé, engú la bini, okpála na kulu-o bhelé ade. <sup>38</sup> Yi yo ka bhul̄ 'dyi-e me aní tima okpála na kulu bhú edyi gba e ngú na'e nguwa-o.»

## 10

*Yesu atima om̄kpata ndjikpa ne ká bhisi gba e-o*

*(Tsia bhú Mlk. 3:13-19; di ne bhú Luk. 6:12-16.)*

<sup>1</sup> Pipita-a, Yesu a'i om̄kpata ndjikpa ne ká bhisi gba e-o. Aní aha angu pi uo ngú napandja osisiti bua bhú okpála, di ne nakobho ndu okuo hana, la di ne ndu oeze hana. <sup>2</sup> A inde-e 'li obhul̄ titima ndjikpa ne ká bhisi-o: kpála na kalan̄-o, a ko Simo inde li Yesu agisila 'li e me Piele, ne uo ne ndai e Andili, a la di-e ongisi bhisi gba Djebedayo-o. A adu naní Djakí ne uo ne ndai e Djaa , <sup>3</sup> a la di-e Filipino ne uo ne Batelemi; a la di-e Tuma ne uo

ne Matié, ndombi na mandjandja-o; a la di-e Tade ne uo ne Djaki, ndili gba Alafayo-o; <sup>4</sup> a la di-e Simo kpála na Kanana ngauo ne Yuda tsikalioite. Simo nani ne sũka omaYuda inde adũ agili ne kpéke me o ze bhú bali sa kpa okpála na Loma zeze-o. Yuda tsikalioite nani ne kpála inde apú ngbángá Yesu pi obhũu yala-o.

<sup>5</sup> Abhomũ-o, Yesu atima obhũu titima ndjikpa ne ká bhisì bhomũ-o. Anì tsia aha olfìi inde-e pi uo me: «Yi adjì-e, yi anũ agba okpála inde ne omaYuda ade-e de. Yi alí di bhú ogudhũ gba okpála na Samalia de. <sup>6</sup> Engú bini, yi nu mangbo agba omatsalaele. Padhá de, anga uo maka okandøle inde angita. <sup>7</sup> Li kpadji-e, yi kpokpo Bádha Ngali gba Ebhe-o. Yi pa pi okpála me: «Nau na abhũlál akolo masikpe!» <sup>8</sup> Yi kobho okpála na kuo, yi zuku okpála inde amu, yi kobho obhũu kába, yi pandja osisiti bua bhú okpála. Yi asia padhá, yi ha bhadi pi okpála koko padhá.\* <sup>9</sup> Yi ahá belegũ ku li falanga de bini. <sup>10</sup> Yi ahá gonia ngũ enũ-o de. Yi ahá bongo na mbulu bhisì de, yi nu bha ne koli maløkø inde bhú 'dhũ yi ko, yi ahá ndula de. Padhá de, anga okpála inde yi adjì amene kulu bhú ká o-o abí mukobho gba yi-e ngao.

<sup>11</sup> Yi li bhú gudhũ bini, i dũ di-e bhú kuti bini-e, yi de gili kpála inde bedhe ngũ nasia yi, amba yi dũ gba kpála ang-o akólo bhú nayie ka yi ko. <sup>12</sup> Yi li bhú eti bini-e, yi de yi okpála inde bhú 'ti ang-o mayi. <sup>13</sup> I dũ me okpála na eti ang-o nde asia yi-e, guo 'ngũ yi adhũku ne e de dũ ne uo. Engú bini, i dũ la me okpála ang-o nde sia yi de-e, guo 'ngũ gba yi-e de gie lie pi yi. <sup>14</sup> I dũ me u nde sia yi de-e, u dje la di 'li

yi de-e, nedhinga inde yi ngakoto lie bhú 'ti ang-o, i dũ di-e bhú gudhũ ang-o, yi de dyiki ndju doto na 'dhũ yi ngũ nasuno pi uo me yi atse uo atse. <sup>15</sup> Ma apa pi yi na paká me, li 'kpí nakodho 'ngũ-o, okpála na gudhũ ang-o asía likabhũ kpekpeke ané okpála na Sodomũ ne Gomolo mane.»

*Okpekpeke da 'ngũ inde akólo li omũkpata gba Yesu*

*(Tsia bhú Mlk. 13:9-13; di ne bhú Luk. 21:12-17.)*

<sup>16</sup> «Yi gbo nga 'dje yi! Ngama-a, ma ngatima yi maka okandøle bhú ká onũte. 'E-e! Yi alá-a de, amba yi dũ di ne bhũku bua maka opidjo. <sup>17</sup> Yi lila liyi ka okpála ndjindji. Padhá de, anga u ambá yi bhú otilibinali, u tsia bhí yi ne fimbo bhú otì gba o nadje líli gba Moidje-o. <sup>18</sup> U anũ ne yi kala ongámási na ndu doto di ne kala ongbengbe ongámási anga yi abhuka ma. A améne lie mo-o ngubula me yi kpokpo 'ngũ gba ma-a kala uo di ne kala okpála inde ne omaYuda ade-o. <sup>19</sup> Nedhinga u anũ ne yi lie kala okpála ang-o, yi akina liyi li 'ngũ inde yi apá e de, di ne lele maka yi ayípa 'ngũ li 'ngũ ang-o lie de. Ongú inde a ayo me yi pa e, a ahá bha lie pi yi li nedhinga ang-o. <sup>20</sup> Padhá de, anga engú inde yi agáma e yíe ka yi de. Engú bini, Bua gba 'Dyi yi-e agáma 'ngũ bhú yi ngae.

<sup>21</sup> Okpála apú ondaise o me u bhili uo. 'Dyi ndili apú ndili gba e me u bhølø anì. Ongisì akólo ne kpekpeke 'ndji pi okpála inde azu o, u tsia pú okpála azu o me u bhili uo. <sup>22</sup> Ndu okpála hana ayála yi ka 'li ma. Engú bini, kpála bhende akíbila nakolo bha bini makolo ali soso-o, anì tsia kóbbho. <sup>23</sup> U mene

\* **10:8** 10:8 Li bili inde-e, Yesu ngakpokpo 'ngũ bhomũ-o pindji angu inde ani aha e pi obhũu titima gba e ngubula nateteke okpála-o.

yi sisiti bhú gúdhú bini-e, yi de kpe bhú gúdhú koko. Ma apa la pi yi na paká me yi ndjia nadhuku bhú ogúdhú na Isalaele hana de me Ndili gba kpála nde go de-e de.

<sup>24</sup> Yi mbila ndjindji me mukpata ne musuno gba e ne engbé de, kpála na kulu ne di ngámá na kulu gba e ne engbé de. <sup>25</sup> A ayo me mukpata kolo maka musuno gba e-o. A ayo di me kpála na kulu kolo maka ngámá na kulu gba e-o. I du me u nde nga'i bhulu eti-e me Baladjebula-a,† u a'í la ibili okpála na eti gba ani-e pi!

<sup>26-27</sup> Kaka-a, yi akpé okpála inde améne yi sisiti-e de! Engú inde ma apa e pi yi bhú biti-e, yi pa ibili ne ngbikpi. Engú inde u apa e pi yi bhú tupele-e, yi totobhila ibili ne di apí ongbati. Padhá de, anga ndu 'he inde awo lie mawo-o hana akóto bhú mbasu, la di-e, ndu 'he inde na pepe hana ambila lie mambila. <sup>28</sup> Yi akpé obhende ngabhelo kute yi, inde i ti da nabhelo bua yi de-e de. Yi kpe mangbo Ebhe inde i ti da nabhelo bua yi, la di ne kute yi libhomu bhú djua na duduma ko. <sup>29</sup> Li mu tsindji oindjilindjili bhisi-e, mo osia tété mangua tetele tia dho? La-a, suka uo bini kpi padhá de me 'Dyi yi Ebhe nde ziba de-e de. <sup>30</sup> La pi yi-e, Ebhe atanga belegu osundjo yi hana. <sup>31</sup> Kaka-a, yi akpé ehe bini de. Ngayi-e, abana u po bha bhúla oindjilindjili bhelé-e, yi ane uo ne tata.

<sup>32</sup> Li kpála bini pa bhú ká djila okpála me ni ne kpála ka ma-a, ngama-a, ma apa bhadi bhú djila 'Dyi ma inde abhúla-a me a ko naama kpála. <sup>33</sup> Engú bini, li kpála bini pa bhú ká djila okpála me ni ne kpála ka ma ade-e,

ngama-a, ma apa bhadi bhú djila 'Dyi ma inde abhúla me a ko naama kpála de.»

*Yesu ago nato egú sunda okpála (Tsia bhú Luk. 12:51-53, 14:26-27.)*

<sup>34</sup> «Yi abhúndja de me ma ago ngú na'o guo 'ngú píla doto de. Ma go ngú na'o guo 'ngú de, engú bini, ma ago mangbo ngú nagbogbo bhusu okpála. <sup>35</sup> A moko, ma ago nagbogbo bhusu kpála ne 'dyi e. Ma ago nagbogbo bhusu ndili na oelo ne 'hi e.

Ma ago nagbogbo bhusu elo gba ndili-e ne ogbi e na oelo.

<sup>36</sup> Kaka-a, obhulu yala gba kpála adú bha okpála na abhú 'ti gba ani ko.†

<sup>37</sup> Kpála bhende ngakunda 'dyi e, i du di-e 'hi e ane ma mane-e, kpála ango-o ti ne ma de. La di-e, kpála bhende ngakunda ndili na bhobhoko gba e, i du di-e ndili na oelo gba e ane ma mane-e, kpála ango-o ti ne ma de. <sup>38</sup> Kpála bhende i bi kulusi gba e‡ de, i tsia kpata ma de-e, kpála ango-o ti ne ma de. <sup>39</sup> Kpála bhende alila mukobho gba e-e, ani kpi. Engú bini, kpála bhende atsé la mukobho gba e ngubula ma-a, ani sia mukobho na kukulu.»

*Makalá gba kpála inde asia omukpata gba Yesu*

*(Tsia bhú Mik. 9:41.)*

<sup>40</sup> «Kpála bhende asia yi-e, ani asia bhomu-o ma. La di-e, kpála bhende asia ma-a, ani asia bhomu-o kpála bhende atima ma ko. <sup>41</sup> Kpála bhende asia polofeta anga a ko polofeta-a, ani asia makalá inde ati ne opolofeta. La di-e, kpála bhende asia kpála na ngbingbili anga a ko kpála na ngbingbili-e, ani asia makalá

† **10:25** 10:25 Baladjebula: A bhomu-o suka 'ili gba Djabulu. † **10:36** 10:35-36 Tsia bhú Mik. 7:6. ‡ **10:38** 10:38 Nabi kulusi gba e: A ko naziba nazu likabhu di ne nakpi kabula Yesu.

inde ati ne okpála na ngbingbili-o.  
 42 Ma apa pi yi na paká me kpála  
 bhende ahá ngabha kópo kpina  
 'ngu bini pi suka okpála inde li  
 okpála ngau o padhá inde-e anga  
 a ko mukpata gba ma-a, kpála  
 ango-o asía makalá gba e masia.»

## 11

1 Li Yesu andjia naha olifi  
 bhomu-o lie pi omukpata gba e  
 ndjikpa ne ká bhisi-e, ani ayie  
 oo. Ani atsia anu ngú nasuno di  
 ne nakpokpo eli gba Ebhe-e bhú  
 ogudhu na ndu doto na Galilaya.

*Djaa bhulu nabatisa okpála  
 atima okpála naya 'ngú pindji Yesu*

2 Li Djaa bhulu nabatisa okpála  
 adu lie bhú tikpu-o, ani adje ngali  
 okulu li Kilisito adu amene e-o.  
 Abhomu-o, ani atsia atima  
 omukpata gba e 3 me u nu yi ani  
 me: «Mu ne Masiya inde ayo me  
 Ebhe tima e? Ne me ayo me ya  
 adjeke kpála koko?» 4 Yesu agie pi  
 uo me: «Yi nu kpokpo engú inde  
 yi ngadje e ne bhende yi ngau e pi  
 Djaa: 5 okpála i u 'kpí de-e ngau  
 'kpí, obhende ne eze li 'dhu o-o  
 ngadhuku ndjindji, obhulu kába  
 ngakobho, obhende i dje 'kpí de-  
 e, la di ngadje 'kpí, obhende amu-  
 o ngazuku, okpála bhende ngau  
 lio padhá kala Ebhe-e la di ngadje  
 Bádha Ngali . 6 A ko djali pi  
 kpála inde li engú gba ma-a bhólo  
 nabhuka gba e mabhelo de ko.»

*Yesu akpokpo 'ngú pindji Djaa  
 bhulu nabatisa okpála*

*(Tsia bhú Luk. 7:18-35.)*

7 Li omukpata gba Djaa aholo  
 'nú lie, Yesu atsia aholo nakpokpo  
 'ngú li 'ngú gba Djaa pi kambi  
 okpála inde adu oo me: «Yi anu  
 igini natsia abhu mili bili-e ni?  
 Yi anu igini natsia mbamba inde  
 li anvi ngadyiki e? A mo-o ade.

8 I du mo-o de-e, yi anu nga igini  
 natsia ni? Yi anu igini natsia kpála  
 inde adyi babadha bongo-o? La-a,  
 okpála bhende adyidi obabadha  
 bongo-o, u dudu bhú oeti gba  
 ongbengbe ongamási. 9 Yi anu nga  
 la igini natsia ni? Yi anu igini  
 natsia polofeta? A moko. Ma apa  
 pi yi me, yi anu igini natsia kpála  
 inde ane belegu polofeta mane.  
 10 Padhá de, anga a ko kpála inde  
 li Bhuku gba Ebhe-e apa nani li  
 'ngú gba e me:

«Ebhe apa me, ma ngatima bhulu  
 titima gba ma-a pi mu  
 kalanu

ngú naleke kpadji pi mu.†

11 Ngama-a, ma apa pi yi na paká  
 me, bhú ká okpála-kuti-e, kpála  
 bini inde akoto, inde ngbéngbé  
 ane Djaa bhulu nabatisa okpála  
 belegu ade bini. La-a, ndu okpála  
 hana inde aziba Nau na abhúla-a  
 , abana ani du bha mbomboyé pi-  
 ie, ani ane Djaa ne engbé.

12-14 Padhá de, anga ndu  
 opolofeta hana di ne líli gba  
 Moidje akpokpo ngali Nau na  
 abhúla nakolo makolo li nedhinga  
 gba Djaa-o. I du me yi nde akunda  
 naziba engú ma apa e, Djaa ne  
 Eliya inde a ayo nani me ani go-  
 o ngae. Nayie bhú nedhinga gba  
 Djaa bhulu nabatisa okpála akolo  
 pi mbia inde-e, Nau na abhúla  
 bhú gbene. La di-e, omangopu  
 ngamene ne kpéke hana me o siti  
 masiti. 15 A ayo me kpála inde li e  
 ne djedje ngú nadjé 'kpí-e djedje!

16 Ma tí da nasuno okpála na  
 naki inde-e li da? Uo maka ongisi  
 inde adulu bhú mbadhasu.

17 Okoko nga'u mbálá na ebi pi obi  
 o,

engú bini, obhe u a'u mbálá  
 ango-o pi o ayala nadho 'bi!

U ali matá etsi na da kuo pi uo,

engú bini, u ayala naku 'gbá!

† 11:10 11:10 Tsia bhú Mal. 3:1.

18 Yi maka ongisi inde ayala nadho 'bi di ne naku 'gbá bhomu. Padhá de, anga a maka li Djaa ago nani lie-o. Ani ago maka kpála inde bhú dá kuo. Ani za 'he de, ani ndji di vino de, yi atsia apa me: «A bhú ani ne siti bua!»  
 19 Ndili gba kpála ago di. Ani ago maka kpála inde bhú dá 'bi. Ani azu 'he, ani andji di vino, do yi de me: «Yi tsia nga kpála inde. Ani bha bini ngabhundja nazu 'he ne nandji vino! A ko olia ondombi na mandjandja, di ne okpála na sisiti!» Engú bini, bhú natsia nganda okulu gba Ebhe-e, a ngasuno pi yi me imbilangu gba ani-e ngbingbili.»

*Okpála na ogudhu gba omaYuda inde ayala nadi bua o*  
 (Tsia bhú Luk. 10:13-15.)

20 Abhomu-o, Yesu aholo nagama 'ngú ne ndje djila pi okpála na ogudhu inde ani amene nani ongamba 'ngú gba e bhelé bhú e-o. Padhá de, anga okpála ango-o dji nani bua o de. 21 Ani adu apa me: «A ko likabhu pi yi, okpála na gudhu na Koladjina! A ko likabhu pi yi, okpála na gudhu na Betesaida! Padhá de, anga na amene ongamba 'ngú bhelé bhú ogudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o bhú ogudhu na Tile ne Sidona-a,\* okpála na ogudhu ango-o de adyi nani gonia, u túko embi bhú 'ndji o didili naali, u tsia dji bua o. 22 A moko. Ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane.

23 Ne yi di, okpála na gudhu na Kapalanauma, yi abhundja naayi me u a'é'e yi akolo abhúlá-a? A

mo-o ade. U akó yi ne kuto, akólo bha bini li bili gba okpála inde amu. Padhá de, anga ma amene ongamba 'ngú bhelé bhú gudhu gba yi-o. Engú bini, yi dji bua yi de. La-a, ma méne nani ongamba 'ngú bhomu-o bhú gudhu na Sodomu-o, gudhu ango-o de nga bha bhúka, nakolo pi naki. 24 Kaka-a, ma apa pi yi me, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Sodomu mane.»

*Ako djali pi okpála inde ngau lio padhá kala Ebhe*

(Tsia bhú Luk. 10:21-22.)

25 Bhú nedhinga bhomu-o, Yesu atsia apa me: «Ma ngadhoge mu, 'Dyi ma, Ngámá na abhúlá ne Ngámá na doto. Padhá de, anga engú inde mo owo e pi okpála inde ngabhundja me a bhú 'ndji o ne imbilangu-o, mo ombamba tata pi obhende ngau lio me o ne okpála na padhá kala mu! 26 A moko, 'Dyi ma, anga bhú bádha bhú 'bu gba mu-o, mo okunda bha nani me a adu moko.

27 Yi mbila ndjindji me 'Dyi ma asuno ndu 'ngú hana mama. Kpála bini mbila Ndili-e de, bha bini 'Dyi Ndili-o. Kpála bini mbila la di 'Dyi Ndili-e de, bha bini Ndili gba ani-o, a la di-e kpála bhende li Ndili-e akunda nasuno ani pi e ko.

28 Yi andala ka okpekpeke líli di ne okpekpeke da 'ngú inde u ngabu e pí yi-o. Mbia inde-e, yi go bhaka ma, ma 'e pí yi ma'e, amba ma ha naguo pi yi. 29 Yi mene olíli gba ma-o, amba yi 'o me ma suno engú pi yi. Padhá de, anga ma súno pi yi ne bhuku bua di ne na'o lima ne kuto. Yi mene mo-o, yi tsia sía naguo pi yi makpe. 30 A moko, da namene ongú inde

\* 11:21 11:21 Tile ne Sidona nani ne ogudhu ka omaYuda ade. Tsia bhú fsa. 23, ne bhú Edj. 26-28, di ne bhú Ams. 1:9-19.

ma akunda e di ne olíli gba ma-a kpekpeke ade.»

## 12

*Yesu ne ngámá pí 'ndji ekpí nago gba omaYuda*

*(Tsia bhú Mlk. 2:23-28; di ne bhú Luk. 6:1-5.)*

<sup>1</sup> Bhú oekpí bhomu-o, Yesu ne omukpata gba e adu akodho 'kpí bhú ngu 'zú inde u a'i e me ngano. A adu ekpí nago gba omaYuda-o . Omukpata gba aní adu ne gumu. Abhomu-o, u aholo nakodho 'ndji 'ndji, u atsia adu nazuzu. <sup>2</sup> Li omufalisai au lie mo-o, u atsia apa pí Yesu me: «Ka ni li omukpata gba mu-o ngamene kulu lie bhú 'kpí nago me líli gba ní-e nde ziba mo-o de-e?» <sup>3</sup> Yesu agie pí uo me: «Yi tanga nga engú inde li Davidi amene nani e di, nedhinga inde li ngaani makpe ne okpála gba e, u adu lie ne gumu-o?» <sup>4</sup> Aní alí nani bhú 'ti Ebhe, ngaani ne okpála gba e, u atsia azu mapa inde u aha e pí Ebhe-o. A ayo la nani pí suka uo bini nazuzu de. Engú bini, a ayo bha nani me azu mapa angoo ne odimandé gba Ebhe .

<sup>5</sup> Ne me engú inde bhú líli gba Moidje-e , yi tanga nga di? Líli gba Moidje apa me, li 'kpí nago gba omaYuda-a, odimandé inde ngamene kulu bhú 'ngbé 'ti Ebhe-e ngagumu bhomu-o líli na ekpí nago-o. La-a, u 'ó 'ngú pí uo kaka de! <sup>6</sup> Engú bini, ma apa la pí yi me kpála bini bhú ká yi sí, aní ane 'ngbé 'ti Ebhe mane. <sup>7</sup> I dú me yi mbíla engú inde li Bhuku gba Ebhe-e apa e uu-o, yi de 'ó engú pí okpála bhomu-o de. Padhá de, anga Bhuku gba Ebhe apa me: «Engú inde a nga li ma naali-e, a ko nadje ndjinga okpála koko, a ko naha makiso de.†» <sup>8</sup> Yesu atsia

abu tata-a me: «Ngama, Ndili gba kpála-a, ma ne ngámá pí 'ndji ekpí nago.»

<sup>9</sup> Pipita-a, Yesu ayie oo, aní atsia anu alí bhú eti gba uo nadje líli gba Moidje-o . <sup>10</sup> Bhú 'ti oo, kpála bini inde li 'kpa e andia adu oo. Omufalisai adu akunda na'o 'ngú pí Yesu. Kaka-a, u ayi aní me: «Líli gba ní-e aziba me u kobho kpála bhú 'kpí nago uu?» <sup>11</sup> Yesu agie pí uo me: «A ko da bhú ká yi inde i dú ka e ne koli kandole bini-e, li kandole angoo ti bhú 'dú li 'kpí nago, aní nú nagbe aní de-e?» <sup>12</sup> La-a, kpála-kuti ane kandole bhutsibhutsi! Kaka-a, líli aziba namene bádha 'ngú bhú 'kpí nago.» <sup>13</sup> Abhomu-o, aní atsia apa pí kpála angoo me: «Gbele 'kpa mu.» Kpála angoo agbele 'kpa e, 'kpa aní atsia akolo ndjindji maka 'kpa aní bhe koko-o. <sup>14</sup> Pipita-a, omufalisai aze kilidjo. U apo bhála o ngú nagili kpadji me o bhole Yesu.

*Yesu ne kpála inde li Ebhe abhu e ngú kulu gba e-o*

<sup>15</sup> Li Yesu ambila lie me omufalisai ngagili nabhole ní-e, aní ayie li bíli angoo. Bhiti okpála akpata aní, aní atsia akobho ndu obhende adu ne kuo hana. <sup>16</sup> Engú bini, aní agbele 'dje uo kpekpeke me u apa pí kpála bini de me ni ne da-ie de, <sup>17</sup> ngubula me engú inde li polofeta Isaya apa nani e amene lie. Polofeta Isaya apa nani me:

<sup>18</sup> «Ebhe apa me:

«Tsia nga bali gba ma inde ma abhu nani e-o,

ma kunda aní naali, engú gba aní-e nga li ma naali.

Ma a'ó Bu Bhobua gba ma-a pí aní, aní tsia kpókpo ngbili 'ngú pí ndu opiga hana.

<sup>19</sup> Aní bí bhaiki ne kpála bini de, aní gáma kpéke 'ngú de.

† 12:7 12:7 Tsia bhú Oz. 6:6.



U dje 'li ani li okpadji de.

<sup>20</sup> Ani bu du mbamba inde agumu-o de,  
ani bulu dhegu eke inde  
ngatsi-e de.

Ani amene mo-o akolo li 'kpi inde  
ani a'olo lie me ngbili 'ngu kolo  
angu e pila doto ko.

<sup>21</sup> Abhomu-o, li ndu opiga hana  
tsia 'o nabhuka gba o-o bu  
ani.†»

*Omufalaisi apa me Yesu  
ngamene kulu ne angu  
gba Baladjebula*

*(Tsia bu Mlk. 3:22-30; di ne  
bu Luk. 11:14-23.)*

<sup>22</sup> Abhomu-o, u ago pi Yesu ne  
kpala bini inde i u 'kpi de, i bu di  
'ngu de, anga adu bu kpala angoo-  
o ne siti bua . Yesu akobho kpala  
ango-o, ani atsia aholo nagama  
'ngu di ne nau 'kpi. <sup>23</sup> Bhiti okpala  
hana angamba, u atsia aholo napa  
me: «A inde-e Ndili gba Davidi-  
e di?» <sup>24</sup> Li omufalaisi adje  
engu bhomu-o lie, u atsia apa me:  
«Kpala bhomu-o ngapandja osi-  
siti bua padha ade, Baladjebula,  
ngama gba osisiti bua-a, ngaha  
angu pi ani ngae!»

<sup>25</sup> Engu bini, Yesu adu ambila  
mabundja gba uo hana. Ab-  
homu-o, ani atsia apa pi uo me:  
«Ndu kuti hana, i du me okpala  
kpala nde dje lio de-e, kuti angoo-  
o pipilo me a nde akpødhøø.  
Okpala na gudhu bini, i du di-  
e piga bini, i du me u nde dje  
lio de-e, gudhu angoo-o, i du di-  
e piga angoo-o lu-u de. <sup>26</sup> I du  
me Satana nde ngabhike Satana-  
a, amba ani agbogbo bhomu-o  
bhusu e ngae makpe. I du la  
mo-o, kuti gba ani-e lu lele pi?  
<sup>27</sup> I du me ngama-a, ma nde nga-  
pandja osisiti bua ka angu gba  
Beledjebula-a, omukpata gba yi-e  
ngapandja naao uo ka angu gba

da? Kaka-a, omukpata gba yi-e  
akodho galikpe 'ngu gba yi-e ngao  
makpe. <sup>28</sup> Engu bini, i du la me ma  
nde ngapandja osisiti bua ka angu  
gba Bua gba Ebhe-e, bhobhomu-o  
asuno me Nau gba Ebhe-e akolo li  
yi akolo.

<sup>29</sup> Kpala bini ti da nali bu 'ti  
gba kpeke kpala, ani tsia bu ohe  
gba ani-e de. Ani kunda nali bu  
'ti gba ani ngu nabha ohe gba  
ani-e hana-a, ani gbite ngaiza ani  
kalanu. Pipita-a, ani tsia li bu 'ti  
gba ani ngu nabha ohe gba ani-  
o. <sup>30</sup> Kpala bhende ne ma bu  
dabili bini ade-e, a ko bulu yala  
gba ma. Kpala bhende ngapo la  
di bu la okpala bu dabili bini  
ne ma ade-e, ani ngatsambala uo  
matsambala.

<sup>31</sup> Kaka-a, ma apa pi yi me,  
okpala asia mambu li ndu osisiti  
'ngu di ne li ndu osobho inde li  
okpala ngasobho Ebhe ne e hana.  
Engu la bini, li kpala sobho Bu  
Bhobua-a, ani sia mambu de. <sup>32</sup> I  
du me kpala nde apa siti 'ngu li  
kute ma, ngama Ndili gba kpala-  
a, Ebhe mbu li ani tetè. Engu la  
bini, i du me kpala nde asobho  
Bu Bhobua-a, Ebhe mbu li ani  
tetè bu nedhinga na naki inde-  
e de, ani mbu di li ani tetè bu  
nedhinga inde ngago-o de.»

*U mbimbila ndula li li e  
(Tsia bu Luk. 6:43-45.)*

<sup>33</sup> «I du me ndula nde ndjindji-e,  
li li-e du bhadi ndjindji. I du me a  
nde bu ndula ne kuo-o, li li-e du  
sisiti. U mbimbila ndula li li e.

<sup>34</sup> Ngayi opiga mbuma inde-e,  
yi ti da napa ongu na babadha  
lele pi, me yi nde ne okpala  
na sisiti-e? Padha de, anga  
ebhe ngapa engu inde abedhe li  
bhobua mabedhe ko. <sup>35</sup> Kpala na  
babadha-a, ka badha 'ngu inde  
li bhobua ani-e, ani apa bhadi

bádha 'ngú. Engú bini, kpála na sisiti-e, ka siti 'ngú inde li bhobua ani-e, ani apa bhadi engú na sisiti. <sup>36</sup> Kaka-a, ma apa pi yi me, bhú nedhinga nakodho 'ngú gba okpála-a, okpála apa ta oeli na padhá padhá inde li u apa e hana. <sup>37</sup> Padhá de, anga Ebhe akódho 'ngú gba mu-o li nakpata 'li mu. † du me mu nde apa oeli na babadha-a, ani 'ó mangimbo pí mu de, i du me mu nde apa oeli na sisiti-e, ani 'ó mangimbo pí mu.»

*Omusuno na líli gba Moidje ne omuFalisai ayo ngamba 'ngú ka Yesu*

*(Tsia bhú Mlk. 8:11-12; di ne bhú Luk. 11:29-32.)*

<sup>38</sup> Abhomu-o, omusuno koko na líli gba Moidje di ne omuFalisai koko apa pi Yesu me: «Musuno, ya akunda me mene ehe bini pi ya inde asuno me mo oyie bha ndju agba Ebhe.» <sup>39</sup> Do ani pi uo me: «Okpála na naki inde-e sisiti, u bhuka la di Ebhe ne bua o bini de, u ngayo ngamba 'ngú. Engú bini, Ebhe méne ngamba 'ngú pi uo bini de, bha bini bhende ani amene nani e li polofeta Djonasi ko. <sup>40</sup> Padhá de, anga maka li Djonasi asi nani lie ekpí bata, di ne sukpe bata bhú 'bu 'ngbé sungu-o, ngama Ndili gba kpála-a, ma así bhadi bhú lata ekpí bata di ne sukpe bata moko. <sup>41</sup> Li 'kpí li Ebhe akódho 'ngú gba okpála lie, okpála na Ninive akóto kala Ebhe bhú dabili bini ne okpála na naki inde, li okpála na Ninive tsia 'ó 'ngú pí okpála na naki-o. Padhá de, anga u adji nani bua o li nedhinga u adje ngali gba Ebhe inde li Djonasi adu akpokpo e-o. Yi mbila la ndjindji me, kpála

bini si, ani ngbéngbé ane Djonasi mane!

<sup>42</sup> Matá di-e, li 'kpí li Ebhe akódho 'ngú gba okpála lie, 'ngbé ngámá na eole inde adu nani atsia 'kpí li ndu doto na Saba-a, akóto kala Ebhe bhú dabili bini ne okpála na naki inde. Ani tsia 'ó 'ngú pí uo, anga ani ayie nani tsutsu ngú nanu nadje eli na imbilangu gba Salomo-o. Yi mbila la ndjindji me, kpála bini si, ani ngbéngbé ane Salomo mane! Engú bini, ngayi-e, yi dje ani de.»

*Gbitaku pindji nagie matá lie ka siti bua bhú kpála*

*(Tsia bhú Luk. 11:24-26.)*

<sup>43</sup> Abhomu-o, Yesu atsia apa matá gbitaku pi kambí okpála me: «Adu nani bhú kpála bini ne siti bua. Nedhinga li siti bua akoto lie bhú ani-e, siti bua ang-o anu ne djakadha abhú obili inde li engu nde li e ade\* ngú nagili bili naguo ka e tété. Engú bini, ani u de. <sup>44</sup> Ani atsia apa li bua e me: «Ma gie nga lima bhú 'ti gba ma inde ma akoto nako bhú e-o.» Ani akolo oo, ani abhaka me a nde padhá, u nde apo mapo, u nde aleke ndjindji. <sup>45</sup> Abhomu-o, ani anu, ani abha osisiti bua koko mananika inde ane ani ne siti. U agie lio, u ali bhú 'ti-o, u atsia dulú oo. Mukobho gba kpála ang-o atsia akolo la matá pipita-a sisiti naali ane bhende na kalanu-o mane. A adu bhadi pi osisiti okpála na naki inde-e moko.»

*'Hi Yesu ne ondaise Yesu ngao dho?*

*(Tsia bhú Mlk. 3:31; di ne bhú Luk. 8:19-21.)*

<sup>46</sup> Yesu adu ngabha nagama 'ngú pi kambí okpála-o. Me-e, 'hi ani di ne ondaise ani akolo. U

\* **12:43** 12:43 Bili li engu nde lie ade-e, a ko bili inde li kpála ti da nasi kati li e de ka ndibhili engu. La pi omaYuda-a, a ko bili inde li osisiti bua ngadulú li e ko. † **12:47** 12:47 Lukuluku inde-e, a bhú obhuku koko na didili u aye e bhú eli na giliki ade. [Kpála bini apa pi ani me: «Tsia nga 'hi mu ne ondaise mu alulu akilidjo aoo. U ngagili nagama 'ngú ne mu.»]

alɔlɔ akilidjo, u adɔ agili me o gama 'ngú ne ani. [ 47 †] 48 Yesu agie pi kpála inde apa 'ngú pi ani-e me: «'Hi ma ngae dho, ondaise ma la di ngao dho?» 49 Pipita-a, ani a'e 'kpa e, ani asuno omɔkpata gba e-o. Ani atsia apa me: «Yi tsitsia, 'hi ma ne ondaise ma ngao inde. 50 Padhá de, anga kpála inde ngamene engú li 'Dyi ma inde abhúlá-a ngakunda e, kpála angoo, a ko ndai ma na bhobhoko, a ko ndai ma na øeøe, a ko la di 'hi ma-a ngae.»

### 13

*Gbitaku gba kpála nalu nguwa (Tsia bhú Mlk. 4:1-9; di ne bhú Luk. 8:4-8.)*

1 Bha li 'kpí angoo, Yesu akoto kilidjo. Ani atsia anɔ adɔ kuto lingo ekpø. 2 Abhomɔ-o, bhiti okpála na bhibhiti ago apo bhúla o de ani. Kaka-a, ani anɔ a'ɔ bhú zabɔ bini, ani atsia adɔ bhúbhú ngú nasuno pi uo. Bhiti okpála bhomɔ-o atsia alɔlɔ naao lingo 'ngu-o.

3 Ani atsia aholo nakpokpo 'ngú pi uo bhelé bhú ogbitaku. Ani adɔ apa pi uo me: «Ekpí bini, kpála bini nalu nguwa anɔ abhiye gba e ngú nabala nguwa. 4 Nedhinga ani adɔ ababala lie, té nguwa koko abala lingo 'hi kpadji. Odhu ago, u atsia ahopo nguwa angoo hana má kpekøbhe! 5 Olí nguwa koko abala li bili na teme, inde li doto dɔ li e bhelé de. † nde lie me doto dɔ sasa bhelé de-e, ezɔ-o akø má gala ka li doto akpa sasa lie-o. 6 Li ela akolo la lie kpekpeke-e, a atsulu ezɔ-o, ezɔ atsia a'ulɔ ka ndibhili sisie-o, 7 Olí nguwa koko abala li bili li lí oulu na eti adɔ lie. Oeti abhele, a atsia anguvo bhobhomɔ-o hana. 8 Olí nguwa koko abala bhú doto na

dobho, a atsia ali lílí: bhe bini-e ali lílí kámá bini, koko-o ali lílí ndjikpa madhia, koko-o ali lílí ndjikpa bata.» 9 Yesu atsia apa matá me: «Yi dje ndjindji, i dɔ me a nde li yi ne djedje ko!»

*Yesu adɔ akpo 'ngú pi okpála bhú ogbitaku ka ni?*

*(Tsia bhú Mlk. 4:10-12; di ne bhú Luk. 8:9-10.)*

10 Abhomɔ-o, omɔkpata gba Yesu adyudyo lio de ani, u atsia ayi ani me: «Mɔ ngakpokpo 'ngú pi okpála bhú ogbitaku ka ni?»

11 Do ani de-e: «Ma ngakpo 'ngú pi uo bhú ogbitaku anga Ebhe ha nambila ngbadhu 'ngú na Nau na abhúlá-a pi uo de. Ani aha mangbo pi yi. 12 Padhá de, anga kpála inde ani aha ngbadhu 'ngú angoo pi e-e, ani a'ó matá koko pi ani pépé. Kpála angoo tsia dú ne di bhelé. Engú bini, kpála bhende ani ha pi e de-e, ani adhépe belegu dhegu bhende ka ani-o. 13 Ka 'ngú angoo, ma ngakpo 'ngú pi uo bhú ogbitaku.

Padhá de, anga u ngatsia 'kpí, u u la 'kpí de,

u ngagbo 'dje o, u dje la 'kpí de, u kø la di mboli 'ngú bini de.

14 Abhomɔ-o, engú inde li polofeta Isaya apa e, a atsia amene lie pi uo, engú inde me:

«Ebhe apa me: Yi adú adje 'kpí, yi ké la mboli engú angoo de.

Yi adú atsia 'kpí, yi ú la 'kpí de.»

15 «Padhá de, anga Ebhe apa me: okpála inde-e agbite bua o, ngubula me o ké matá mboli 'ngú de.

U anini djila o,

amba o ou matá 'kpí de,

u anini 'dje o,

amba o odjé matá 'kpí de.

U kunda nani nadi bua o de,

abhomu-o, ma tsia ti nani da nakobho uo de.†

<sup>16</sup> La pi yi-e, a ko djali pi yi anga djila yi ngau 'kpí, 'dje yi la di ngadje 'kpí. <sup>17</sup> Ma apa pi yi na paká me opolofeta bhelé, di ne okpála na ngbingbili bhelé adu nani ne gumu nau ongu yi ngau e inde, la-a, u tsia u de. U adu nani ne gumu nadjé ongu yi ngadje e inde, la-a, u tsia dje de.»

*Yesu ambamba ta gbitaku gba kpála nalu nguwa*

*(Tsia bhú Mlk. 4:13-20; di ne bhú Luk. 8:11-15.)*

<sup>18</sup> Abhomu-o, Yesu atsia apa matá pi omukpata gba e me: «Ngayi-e, yi dje nga la ta gbitaku gba kpála nalu nguwa-o. <sup>19</sup> Obhende ngadje ngali na Nau gba Ebhe-e , i kè mbolimboli de-e, uo maka ngo 'hi kpadji inde li nguwa ati li e-o. Djabulu ngago, ani tsia dhépe 'li Ebhe inde u asia e li bua o-o. <sup>20</sup> Okpála koko maka bili na teme inde li nguwa ati li e-o. U ngadje eli-o, u tsia sía kolo ne djali. <sup>21</sup> Engú bini, u 'o de me eli-e toto sie e abhú o-o de. U ngaha lío ngánga bha ngubula nedhinga bedi. Abhomu-o, i du me likabhu, i du di-e mbolo nde ago kabula eli gba Ebhe-e , u ngabala 'kpa li nabhuka má gala!

<sup>22</sup> Okpála koko maka bili li lí oulu na eti adu lie-o. U adje eli-o, engú bini, gumu 'he na doto inde bhú dabili bini ne eu li tia na doto inde-e ngapite uo ne e, nganguvo eli gba Ebhe-e bhú uo. Kaka-a, a tsia lí líli belegu de bini. <sup>23</sup> Engú bini, okpála koko maka doto na dobho. U ngadje eli-o, u la di ngakè mbolimboli. Kaka-a, kulu gba uo ngazu nguwa. Kulu gba okpála koko ngazu nguwa kámá bini, bhe gba okoko ndjikpa

madhia, bhe gba okoko ndjikpa bata.»

*Gbitaku pindji siti ulu*

<sup>24</sup> Yesu atsia apa matá gbitaku koko pi okpála adu adje ani-e me: «Nau na abhúlá-a mana lie ne engú inde: bhoko bini alu nani bádha nguwa abhiye gba e. <sup>25</sup> Sukpe bini, nedhinga li ndu okpála hana adu lie tila-a, bhulu yala gba ani-e ago. Ani atsia alu siti ulu bhú ká nguwa-o, ani atsia atapa. <sup>26</sup> Ezu-o akè, abhele, atsia aba líli. Abhomu-o, siti ulu-o atsia akoto di. <sup>27</sup> Okpála na kulu gba bhulu edyi-e ago ayi ani me: «Ngámá, siti ulu inde-e ayie bhú bádha nguwa mo olu nako e bhú 'dyi gba mu-o su?» <sup>28</sup> Do ani pi uo me: «Bhulu yala amene engú bhomu-o ngae.» Abhomu-o, okpála na kulu-o atsia ayi ani me: «Mo okunda me ya nu luko siti ulu ango-o?» <sup>29</sup> Ani agie pi uo me: «Yi alúko de, anga yi luko-o, yi nú lúko siti ulu bhomu-o ne ezu-o bhú dabili bini. <sup>30</sup> Yi 'o me ndundu bhisi hana bhele bhú dabili bini akólo nedhinga na'e nguwa abhiye-o. Nedhinga na'e nguwa abhiye-e, ma apa pi okpála na'e nguwa-a me u 'e ngaiza siti ulu-o. U gbigbite 'i'i ngubula natsutsulu, amba pipita-a, u 'o nguwa-a bhú ngbokopi gba ma-o.»

*Gbitaku pindji lí mutadi*

*(Tsia bhú Mlk. 4:30-32; di ne bhú Luk. 13:18-19.)*

<sup>31</sup> Yesu akpokpo matá gbitaku koko pi okpála adu adje ani-e pindji lí ndula inde u a'i e me mutadi.\* Ani pi uo me: «Nau na abhúlá-a mana lie ne lí mutadi. Kpála bini aha, ani atsia alu abhiye gba e. <sup>32</sup> A ko lí ndula na yeye ane mane bhú ká olí nguwa hana.

\* 13:31 13:31 Lí mutadi: A ko mboye lí ndula maka lí kundja.

Engú la bini, i ðu me a nde akè-o, i né ndu ezu inde abhú 'dyi-e hana ne endjá, i kólo 'ngbé ndula da napa me odhu na abhúlá go nayiki 'ti o bhú oyáyá-o.»

*Gbitaku pindji levile*

*(Tsia bhú Luk. 13:20-21.)*

<sup>33</sup> Yesu akpokpo matá gbitaku koko pi okpála adu adje ani-e me: «Nau na abhúlá mana lie ne levile inde li olé aha e, ani atsia akpèdhèlè ne bhiti fufú. Abhomu-o, fufú-o hana atsia afuka.»

*Yesu adu akpo 'ngú bhú ogbitaku ka ni?*

*(Tsia bhú Mlk. 4:33-34.)*

<sup>34</sup> Yesu adu akpokpo ndu 'ngú bhomu-o hana pi bhiti okpála bhú ogbitaku. Ani kpo 'ngú pi uo mandí gbitaku belegu de bini. <sup>35</sup> Ani adu amene mo-o ngubula me engú inde nani li polofeta akpokpo e-e amene lie, engú inde mé:

«Ma akpókpo 'ngú bhú ogbitaku.  
Ma akpókpo 'ngú inde awo lie  
naye maka

u abho nani doto lie-o.†»

*Yesu ambamba ta gbitaku pindji siti ulu*

<sup>36</sup> Abhomu-o, Yesu a'o ká bhiti okpála inde ani adu akpo 'ngú pi o-o, ani atsia agie lie li bili ani adu nadu li e-o. Omukpata gba ani-e adyudyo lio de ani. U atsia apa pi ani me: «Kpokpo nga ta gbitaku pindji siti ulu inde abhiye-e pi ya.»

<sup>37</sup> Yesu atsia agie pi uo me: «Kpála bhende i ngalu bádha nguwa-a, a ko ma Ndili gba kpála-o. <sup>38</sup> Edyi-e, a ko doto. Bádha nguwa-a, a ko okpála inde i ngaziba nadu sa líli na Nau na abhúlá-o. Siti ulu-o, a ko okpála bhende ngaziba nadu sa líli gba Djabulu-o. <sup>39</sup> Bhu lu yala inde alu siti ulu-o, a ko Djabulu. Nedhinga na'e nguwa abhiye-e, a ko ekpi na soso-o. Obhulu na'e

nguwa abhiye-e, a ko oandjelu .  
<sup>40</sup> Maka u akukuo siti ulu lie ngú nabubu bhú djua-a, a adú bhadi li sokpi-e moko. <sup>41</sup> Ndili gba kpála atíma oandjelu gba e, u tsia kúo ndu obhulu nato okpála bhú nale ne ndu obhulu namene siti 'ngú hana-a ngú napandja uo bhú ká omaha e mapandja. <sup>42</sup> Pipita-a, u tsia bála uo bhú dé djua. Oo, u adú aku 'gbá, u tsia dú di nazu tate o. <sup>43</sup> Abhomu-o, okpála bhe na ngbingbili-e adú nasu má ngbi ngbi ngbi maka ela bhú Nau gba 'Dyi o-o. Yi dje ndjindji, i ðu me a nde li yi ne djedje-o!»

*Gbitaku pindji tia awo lie di ne pindji léké*

<sup>44</sup> «Nau na abhúlá-a mana lie ne tia inde li kpála awo e abhú 'dyi. Kpála bini akoto tété, ani atsia awo ne toto. Li djali abhèlè la ani lie má kusu-o, ani anu atsindji ndu 'he gba e hana, ani atsia ago akala edyi bhomu-o.

<sup>45</sup> Nau na abhúlá-a mana di matá lie ne kpála natsindji 'he inde ngagili nakala babadha léké. <sup>46</sup> Nedhinga ani au léké bini na kpéke mase lie, ani anu atsindji ndu 'he adu ka e hana. Ani atsia ago akala léké na kpéke mase-o.»

*Gbitaku pindji nado*

<sup>47</sup> «Nau na abhúlá-a mana matá lie ne nado inde u abhike e bhú 'ngu, inde i ngadhe ndu djua osungu hana. <sup>48</sup> Nedhinga abedhe lie, obhulu nagbe sungu-o gbéle lingo 'gè. Pipita-a, u dúlu, u bhá osungu na babadha-a bhú kili, u tsia bála obhende azi-o. <sup>49</sup> A adú bhadi li sokpi-e moko: oandjelu agó, u tsia gbógbo bhusu okpála na ngbingbili-e ne obhende na sisiti-o. <sup>50</sup> U tsia bála okpála na sisiti-e bhú dé djua. Oo, u adú aku 'gbá, u tsia dú di nazu tate o.»

<sup>51</sup> Yesu atsia ayi omukpata gba e me: «Yi akè mboli ndu ongu bhomu-o hana akò?» U agie me: «Heni.» <sup>52</sup> Abhomu-o, ani atsia apa pi uo me: «A moko, yi maka ndu omusuno na líli gba Moidje hana inde aziba engú pindji Nau na abhúlá-o, Yi maka obhulú 'ti. Yi ngalo bhú ká oehe inde bhú 'ti gba yi-e obhe na mbia, yi tsia ló di obhe na didili.»

*Okpála na Nadjaleta ziba Yesu de*

*(Tsia bhú Mlk. 6:1-6; di ne bhú Luk. 4:16-30.)*

<sup>53</sup> Li Yesu andjia nakpokpo ogbitaku bhomu-o lie, ani ayie oo. <sup>54</sup> Ani atsia anu bhú Nadjaleta, kuti inde ani abhele bhú e-o. Ani aholo nasuno bhú 'ti nadje líli gba Moidje na kuti bhomu. Nasuno gba ani-e atsia adu nangamba okpála naali. Kaka-a, u atsia adu ayi lio me: «Ani asia ngua imbilangú inde-e su? A aha angu pi ani ngu namene ongamba 'ngú inde-e da? <sup>55</sup> A inde-e ndili gba salapaté-e di? A 'li 'hi ani me Malia adi? Djaki, ne Djodjefu, ne Simo la di ne Djude ne ondaise ani ngao adi? <sup>56</sup> Ondaise ani na olisilisi-e, ndu uo hana gba ní sii adi? Ani ayie la ne ndu 'ngú bhomu-o hana su?» <sup>57</sup> Ka u ambila du ani lie ndjindji-e, u tsia kunda nabhuka ani de. Abhomu-o, Yesu atsia apa pi uo me: «U mamanga polofeta ne ndu bili hana, naneke bha bini bhú kuti u azu ani bhú e di ne bhú piga gba ani.» <sup>58</sup> Yesu atsia amene bha mbo oo ongamba 'ngú bedi ka u bhuka ani lie de-o.

## 14

*Elode aha líli me u bhөлө Djaa bhulú nabatisa okpála*

*(Tsia bhú Mlk. 6:14-29; di ne bhú Luk. 9:7-9.)*

<sup>1</sup> Li nedhinga bhomu-o, Elode Atipasi inde adu ngámá na ndu

doto na Galilaya adje engú gba Yesu-o. <sup>2</sup> Ani atsia apa pi omaha e me: «Kpála u ngakpo 'ngú gba e bhomu-o, a ko Djaa bhulú nabatisa okpála! Ani azuku bhú ká okpála amu-o bhomu ngae. Kaka-a, angu namene ongamba 'ngú bhú ani.» <sup>3</sup> Elode pa mo-o padhá de. Ani apa mo-o, anga ani aha nani líli me u holo Djaa, u gbigbite ani, amba u bhike ani bhú tikpu li 'ngú gba Elodiade, wala Filipino, ndai ani-o. <sup>4</sup> Ani aholo nani Djaa, anga Djaa adu apa pi ani me: «A ayo de me mu ha Elodiade maka wala mu-o de.» <sup>5</sup> Elode adu akunda nabhele Djaa na paká. Engú bini, ani adu akpe okpála makpe. Padhá de, anga u adu au Djaa maka polofeta .

<sup>6</sup> La-a, li ekpi nakina nazu Elode-e, ndili na eөлө gba Elodiade adho 'bi kala okpála u a'i o bhú 'bi-o. Ebi ango-o atsia anga li Elode naali. <sup>7</sup> Kaka-a, ani atsia atu silika me ni ahá pi ndili na eөлө bhomu-o ndu 'he hana inde ani ayó e-o. <sup>8</sup> Hi ani atsia ato pi ani me ani yo 'ndji Djaa bhulú nabatisa okpála. Abhomu-o, ndili-e atsia anu apa pi ngámá Elode me: «Ha 'ndji Djaa, Bhulú nabatisa okpála muma mbia inde-e bhú tsakpa saani!» <sup>9</sup> Ngámá adje likabhu li bua e naali. La ka silika ani atu e di ne nakpe djila okpála ani a'i o bhú 'bi-e, ani atsia aha líli me u ha 'ndji Djaa pi ani haha. <sup>10</sup> Abhomu-o, ani atsia atima kpála bini me ani nu kodho ngulú Djaa bhú tikpu. <sup>11</sup> Kpála ango-o, anu. Ani akodho ngulú Djaa, ani atsia ago ne di bhú tsakpa saani. Ani atsia aha pi ndili na eөлө bhomu-o. Abhomu-o, ndili na eөлө ango-o atsia anu ne di pi 'hi e. <sup>12</sup> Omukpata gba Djaa anu aha kuo ani, u anu azi. U atsia anu akpokpo engú akodho 'kpi bhomu-o pi Yesu.

*Yesu aha 'zɛ pi okpála kutu bhuluvue*

*(Tsia bhú Mlk. 6:30-44; ne bhú Luk. 9:10-17; di ne bhú Dja. 6:1-14.)*

<sup>13</sup> Li Yesu adje engú li omukpata gba Djaa akpokpo e pi ani-e lie, ani agbe lie li bili bhomu. Ani a'u ne omukpata gba e bhú zabu, u atsia anu adulu kpi o kpi li bili li kpála nde li e ade. Li okpála ambila lie, u aloko ne ogudhu ngangá, u aha 'nú ne 'dhu o lingo 'ngu-o ngú nanu nakpata ani. <sup>14</sup> Li Yesu ako lie bhú zabu-o, ani au bhiti okpála-o. Ani adje ndjinga uo, ani atsia akobho okpála na kuo inde adu bhú ká uo-o.

<sup>15</sup> A akolo lie tagolo-o, omukpata adyudyo lio de ani. U atsia apa pi ani me: «Ngámá, ekpí-e asegele, bili inde-e la di mimili, gie bhiti okpála inde-e, amba u nu kala ehe nazu mazú pi o bhú okúti.» <sup>16</sup> Engú bini, Yesu agie pi uo me: «Tata lie nagie lie ka uo ade. Yi ha ezú pi uo ngayi makpe.» <sup>17</sup> Abhomu-o, omukpata apa pi ani me: «A bha ka ya si ne koli mapa bhuluvue ne osungu bhisi má kpikili!» <sup>18</sup> Yesu agie pi uo me: «Yi go muma ne di ei.» <sup>19</sup> Pipita-a, ani aha líli pi bhiti okpála bhomu-o me u dula kuto pí ulu-o. Ani atsia aha mapa bhuluvue ne osungu bhisi-o. Ani a'e djila e ne abhúlá, ani agie heni pi Ebhe. Pipita-a, ani agugumu mapa-o, ani aha pi omukpata, omukpata-a atsia agapa li bhiti okpála me u zuzu. <sup>20</sup> U azu ndu o hana, u atsia a'u'u. U alo dudu bhe atigala-o, a atsia abebedhe okili ndjikpa ne ká bhisi. <sup>21</sup> Okpála hana inde azu-o, u adu masakpe de okpála kutu bhuluvue mandí natanga olisi ne ongisí.

*Yesu adholo pí 'ngu*

*(Tsia bhú Mlk. 6:45-52; di ne bhú Dja. 6:15-21.)*

<sup>22</sup> Pipita kolo me-e, Yesu akata omukpata gba e me u 'u'u bhú zabu, amba u gulu 'ngu pi ni kalanu bhú nedhinga ni nde nga lie ngaha kpadji pi bhiti okpála-o. <sup>23</sup> Pita ani aha kpadji pi bhiti okpála lie, ani a'u apí 'ta ngú nayo Ebhe. Ekpí abi li ani kpi e kpi me ani nde nga bha oo. <sup>24</sup> Li zabu li omukpata-a adu bhú e akolo lie mbo ne atu 'ngu-o, anvi aholo nape pí 'ngu-o, atsia adu nandi uo ne sidi. Zabu-o atsia adu adimba ka ngbo 'ngu-o.

<sup>25</sup> Bhú 'gbá 'ngu na bini-e, Yesu aholo nago ne li pápá ne apí uo me ani nde ngadholo pí 'ngu. <sup>26</sup> Li omukpata au ani lie ngadhuku pí 'ngu-o, tsulu aholo uo naali. U adu apa me: «A ko igbadyibhe!» U atsia aholo atu 'ue ka tsulu-o. <sup>27</sup> Engú bini, Yesu atsia apa kolo pi uo me: «A ko ma, yi adjé tsulu de. Yi gbite bua yi.»

<sup>28</sup> Abhomu-o, Piele atsia apa pi ani me: «Ngámá, i du me a nde mu na paká-a, ha líli me ma go bhaka mu me ma nde ngadhuku pí 'ngu.» <sup>29</sup> Do Yesu de-e: «Gogo.» Abhomu-o, Piele aké bhú zabu-o, ani aholo 'nú nabhaka Yesu me ani nde ngadholo pí 'ngu. <sup>30</sup> Engú bini, ani au lie me anvi-e ngape kpekpeke-e, ani adje tsulu. Abhomu-o, ani aholo nalinda bhú 'ngu. Ani atsia asula me: «Ngámá, kobho ma!» <sup>31</sup> Ma 'li ma me-e, Yesu ato 'kpa e, ani atsia aholo ani ne napa pi ani me: «Ngamu, kpála li nabhuka gba e nde yeye, mo osia bua na bhisi bhisi ka ni?» <sup>32</sup> Pipita-a, u a'u'u ndu o bhisi hana bhú zabu-o. Anvi atsia aguo. <sup>33</sup> Abhomu-o, omukpata bhe adu igini bhú zabu-o akikita lipuku o kuto kala Yesu. U atsia apa pi ani me: «A na paká me mu ne Ndili gba Ebhe!»

*Yesu akobho okpála na kuo bhú*

*ndu doto na Genedjaleta*

(*Tsia bhú Mlk. 6:53-56.*)

<sup>34</sup> Pita li Yesu ne omukpata gba e agulu 'ngu-o lie, u akolo bhú ndu doto na Genedjaleta. <sup>35</sup> Okpála na kuti ango-o ambila lie me a ko Yesu-o, u agapa ngali nago ka ani-e bhú ndu doto ango-o libhomu. Okpála atsia ago pi ani ne ndu obhulu kuo hana. <sup>36</sup> U atsia adu akikiliki lio pi ani me ani 'o o me o bu nga bha mbo 'kpa o li 'so bongo gba ani-o. Abhomu-o, ndu obhende hana adu abu 'kpa o tété-e adu akobho.

## 15

*Kpekebhe pindji dasundu gba omuFalisai*

(*Tsia bhú Mlk. 7:1-13, 14-23.*)

<sup>1</sup> Abhomu-o, omuFalisai di ne omusuno na líli gba Moidje inde ayie bhú Yelusalema anu abhaka Yesu. U atsia ayi ani me: <sup>2</sup> «Omukpata gba mu-o ngagumu líli li onguo ogbi ya a'o nani e ka ni? Padhá de, anga u ngavulu 'kpa o kala nazú 'he maka lele li líli-e apa lie ade.» <sup>3</sup> Ani atsia agie pi uo me: «Ala yi-e, yi ngagumu líli gba Ebhe-e ne 'li dasundu gba yi-e ka ni? <sup>4</sup> Padhá de, anga Ebhe apa me: «Manga 'dyi mu ne 'hi mu mamanga.» Ani apa di matá me: «Kpála inde agbó nganda 'dyi e, i du di-e 'hi e, a ayo me u bhelo ani mabhelo.»<sup>†</sup> <sup>5</sup> Engú bini ngayi-e, yi ngapa me: «I du me kpála bini nde apa pi okpála inde azu ani-e me, tia inde a ayo igini me ni teteke uo ne e, ni a'o pi Ebhe-e, <sup>6</sup> kpála ango-o matá ne engú namene mamene pi uo ade.» Yi ngagumu líli gba Ebhe-e li ongua okpadji bhomu ngú nakpata lele odasundu gba yi-o. <sup>7</sup> Yi ne obhulu kali! Polofeta Isaya pa nani li 'ngú gba yi-e tala me Ebhe apa me:

<sup>8</sup> «Opiga inde-e ngadhogo bha ma ne 'bhè-o, engú bini, bua uo de ma tsutsu.

<sup>9</sup> Mayo u ngayo ma lie, tata tété ade. Padhá de, anga nasuno inde u ngasuno e, a ko bha ndu olíli li okpála ngagbe e ngao.†»

<sup>10</sup> Pipita-a, Yesu a'i bhiti okpála inde adu oo me u dyudyo lio de ni masakpe, ani atsia apa pi uo me: «Yi djedje nga, amba yi ko di mboli engú inde ma adji apa e inde: <sup>11</sup> A ko de me oehe inde ngali bhú 'bhè kpála ngamene ngae me ani adú bubu kala Ebhe de-e de. Oehe bhe ngakoto bhú 'bhè kpála mangbo ngamene ngae me ani adú bubu kala Ebhe de.» <sup>12</sup> Abhomu-o, omukpata-a adyudyo lio de ani, u atsia apa pi ani me: «Musuno, mu mbila uu me engú mo opa e ake li bua omuFalisai make-e?» <sup>13</sup> Ani agie pi uo me: «Ndu 'he hana inde li 'Dyi ma inde abhúlá-a lu e ngae de-e, u alúko maluko. <sup>14</sup> Yi 'o uo: a ko okpála i u 'kpí de inde aholo 'kpa obi o ngú nasuno kpadji pi uo. La-a, i du me kpála i u 'kpí de-e nde aholo 'kpa kilí e ngú nasuno kpadji pi ani-e, ndu uo bhisi hana bála bhú 'dú!»

<sup>15</sup> Piele atsia apa pi ani me: «Kpokpo nga ta gbitaku bhomu-o pi ya.» <sup>16</sup> Do Yesu de-e: «Ngayi di-e, imbilangu nga bhú yi adi? <sup>17</sup> Yi mbila de me ndu 'he hana inde ngali bhú 'bhè kpála ngakodho 'kpí abhú 'bu, u tsia bhíke bhú pedu-o di? <sup>18</sup> Engú bini, ndu 'he hana inde ngakoto bhú 'bhè kpála ngayie li bua ani. A la bhomu-o bhende i ngamene me ani adú bubu kala Ebhe de-o. <sup>19</sup> Padhá de, anga bua kpála ngamene ngae me ani du ne mabhundja na sisiti,

† 15:4 15:4 Tsia bhú Det. 5:16; ne bhú Eki. 20:12, 21:17; di ne bhú Lev. 20:9. † 15:9 15:8-9 Tsia bhú Isa. 29:13.



ani bhөлө kpála bhú gandji, ani kúnda өлө, i dү di-e bhoko koko, ani kúnda olisi, i dү di-e obhosi ngangá, ani zi 'he, ani pa 'ngú li obi e ne eu, ani sobho la di kpála. <sup>20</sup> A bhomү-o ndү ongú inde ngamene me kpála adú bubu kala Ebhe de-o. A ko de me nazү 'he mandí navүлү 'kpa o ngamene me kpála adú bubu kala Ebhe de-e de.»

*Yesu akobho ndili na өөлө gba igba Kanana*

*(Tsia bhú Mlk. 7:24-30.)*

<sup>21</sup> Pipita-a, Yesu ne omүkpata gba e ayie li bili bhomү, u atsia anү li pápá na ndu doto li ogүdhү na Tile ne Sidona adү bhú e-o. <sup>22</sup> Өлө bini dү nani nadү bhú ndu doto ango-o. A adү nani igba maYuda de, a ko nani naae igba Kanana. Me-e, ani ago abhaka Yesu ne nasusula me: «Ngámá, ndili gba Davidi, dje nga bha-a mbo ndjinga ma! Siti bua ngato mbolo li ndili na өөлө gba ma-naali.» <sup>23</sup> Engú bini, Yesu gie engú pi ani belegү de bini. Omүkpata gba ani adyudyo lio de ani, u atsia apa pi ani me: «Mүsuno, mү ti da namene engú ani ngayo e ka mү-o pi ani di, amba ani 'o nakpata ní ne tolo gba e bhomү-o?»

<sup>24</sup> Yesu agie pi uo me: «Ebhe atima bha ma ngú nagili okpála na Isalaele inde maka okandөlө inde angita-o.» <sup>25</sup> Engú bini, өлө ango-o ago atutү lipүkү e kuto kala ani ne napa me: «Ngámá, go teteke nga bha mbo ma!» <sup>26</sup> Yesu agie pi ani bhú gbitaku me: «A ndjindji ade me u ha ezү gba ongisi-e, u bhike pi obүлү-o de.» <sup>27</sup> Өлө ango-o agie me: «A ko paká Ngámá, la-a, obүлү ngazү okүлү 'zү inde ngabala sa misa gba omakүlasi o-o.» <sup>28</sup> Abhomү-o, Yesu agie pi ani me: «'Hi ma-a, nabhuka gba mү-o ngbéngbé! A ayo me Ebhe ha ehe inde mo okúnda e pi mү.» Abhomү-o,

ndili gba ani-e atsia akobho bha li nedhinga bhomү.

*Yesu aha 'zү pi obhosi kutu badha*

*(Tsia bhú Mlk. 8:1-10.)*

<sup>29</sup> Abhomү-o, Yesu ayie oo, ani atapa lingo ekpө na Galilaya. Ani a'ү apí 'ta, ani atsia adү kuto. <sup>30</sup> Okpála bhelé ago abhaka ani. U ago ne okpála adү ne eze li 'dhү o, ne okpála li djila o adүdү, ne okpála li yá o apү, ne obhe i bhү 'ngú de, la di ne okpála koko bhelé inde adү li o ne kuo. U abu uo bhú li 'dhү Yesu, ani atsia akobho uo. <sup>31</sup> Okpála atsia adү angamba naali nedhinga u adү au okpála i bhү 'ngú de-e lie ngagama 'ngú-o, obhe li yá o apү adү lie akólo ne angu-o, nedhinga di li obhe adү ne eze li 'dhү o adү adhölө lie ndjindji-o, ne nedhinga li obhe i u 'kpí de-e adү lie au 'kpí-o. U atsia aholo nadhөгө Ebhe gba omafsalaele-o.

<sup>32</sup> Abhomү-o, Yesu a'i omүkpata gba e-o. Ani atsia apa pi uo me: «Ma ngadje ndjinga bhiti okpála inde, anga akolo mbia inde-e 'kpí bata u bha ngadү de ma si, ehe nazү mazү la matá di ka uo ade. Ma kúnda nagie uo gumү de, anga angu uo ti da nandjia li kpadji.» <sup>33</sup> Omүkpata atsia ayi ani me: «Ní ti da nasia mapa na tetele bhú mili bili inde-e su, inde i ti da nale ne bhiti okpála inde-e?» <sup>34</sup> Yesu atsia ayi uo me: «A ka yi ne mapa madho?» U agie pi ani me: «A ka ya ne mapa mananika ne mbo odjedje sungu.» <sup>35</sup> Abhomү-o, Yesu apa pi bhiti okpála me, u dүлү kuto. <sup>36</sup> Ani atsia aha mapa mananika ne osungu-o. Pita nagie heni pi Ebhe-e, ani agүgүmү, ani aha pi omүkpata-o, u atsia agapa li bhiti okpála me u zүzү. <sup>37</sup> U azү ndү o hana, u atsia a'u'u. Omүkpata apo bhúla dudu-o, atsia abebedhe okili mananika. <sup>38</sup> Okpála hana

inde azu-o, adu obhosi kutu badha mandí nako olisi ne ongisi. <sup>39</sup> Pita lí Yesu aha kpadji pí bhiti okpála lie, aní a'ú bhú zabú, aní atsia atapa bhú ndu doto lí gudhu na Magadana adu bhú e-o.

## 16

*Omufalisai ne oSadukai ayo ngamba 'ngú ka Yesu*

*(Tsia bhú Mlk. 8:11-13; di ne bhú Luk. 12:54-56.)*

<sup>1</sup> Abhomu-o, omufalisai ne oSadukai ago abhaka Yesu. U adu akunda nale aní. Kaka-a, u atsia ayo ka aní me aní mene nga bha ngamba 'ngú bini pí o inde asúno me Ebhe atima aní ngae. <sup>2</sup> Aní agie pí uo me: «Í kolo tagolo-o, yi pá me: «Ekpí-e adú babadha, anga bhúla 'kpí-e akodho má ngbí, oikupala aze la di bhelé.» <sup>3</sup> Í dú di-e kòkpi-e, yi pá me: «Naki-e, ekpí-e adú sisiti, anga bhúla 'kpí-e mbembe, a la di ne biti.» Yi mbíla hana me bhúla 'kpí-e dú me-e, a akunda napa pí-ie. La-a, ongú inde ngakodho 'kpí bhú onedhinga inde-e, yi mbíla de me akunda napa pí-ie de! <sup>4</sup> Okpála na nakí inde-e sisiti, u bhuka la di Ebhe ne bua o bini de! U ngayo ngamba 'ngú. Engú bini, Ebhe méne ngamba 'ngú bini pí uo de, bha bini bhende aní amene nani e lí polofeta Djonasi ko.» Pí-píta-a, Yesu a'o ka uo oo, aní atsia atapa.

*Yesu agbele 'dje omukpata gba e lí 'ngú gba omufalisai ne oSadukai*  
*(Tsia bhú Mlk. 8:14-21.)*

<sup>5</sup> Lí Yesu ne omukpata gba e agulu ekpò na Galílaya lie, omukpata-a a'ili 'to o lí naha mapa. <sup>6</sup> Yesu atsia apa pí uo me: «E-e! Yi lila liyi ka levile gba omufalisai ne oSadukai-e malíla!» <sup>7</sup> Abhomu-o, omukpata aholo napa sùnda o me: «Aní ngapa mo-o, anga ní go ne mapa de.» <sup>8</sup> Engú bini, Yesu ambíla

engú angó-o, aní atsia apa pí uo me: «Nabhuka gba yi-e yeye. Ka ní yi ngapa lie sùnda yi me, yi go ne mapa di-e?» <sup>9</sup> Yi kò nga mboli engú bini di? Yi a'ili 'to yi lí mapa bhuluvue inde ma agapa nako e lí okpála kutu bhuluvue a'ili? Yi atsia a'ili la di 'to yi me o obebedhe nako okíli madho-ie ne dudu-o?

<sup>10</sup> La di-e, yi a'ili 'to yi lí mapa mananika inde ma agapa nako e lí okpála kutu badha a'ili? Yi atsia a'ili la di 'to yi me o obebedhe nako okíli madho-ie ne dudu-o? <sup>11</sup> Ma apa ígini lie pí yi me yi lila liyi ka levile gba omufalisai ne oSadukai malíla-a, ma pa ígini bhomu-o engú na mapa de. Yi kò mbolimboli de ka ní?» <sup>12</sup> Abhomu-o, omukpata-a atsia akò la mboli 'ngú angó-o me aní pa engú nalíla lie ka levile na mapa de, engú bini, a kò nalíla lie ka nasuno gba omufalisai di ne oSadukai ko.

*Piele apa me Yesu ne da-ie*

*(Tsia bhú Mlk. 8:27-30; di ne bhú Luk. 9:18-21.)*

<sup>13</sup> Lí Yesu ne omukpata gba e akolo lie bhú ndu doto lí gudhu na Sedjale gba Filipo adu bhú e-e, aní ayi uo me: «Okpála ngapa me ngama Ndíli gba kpála-a, ma ne da?» <sup>14</sup> U agie pí aní me: «Pí okpála koko-o, mu ne Djaa bhulu nabatísa okpála. Pí okoko-o, mu ne Eliya. Pí okoko matá-a, mu ne Djelemi, í dú di-e sùka opolofeta koko.» <sup>15</sup> Aní apa pí uo me: «A la yi-e, yi ngapa naayi me ma ne da?» <sup>16</sup> Simo Piele atsia agie pí aní me: «Mu ne Masiya, Ndíli gba Ebhe inde uu-o.»

<sup>17</sup> Abhomu-o, Yesu atsia apa pí aní me: «A kò djali pí mu, Simo, ndíli gba Djaa, anga ambamba ta engú na kùkulú inde-e pí mu ne kpála de, engú bini, ambamba tata pí mu ne 'Dyi ma inde abhúlá ko. <sup>18</sup> Kaka-a, ma apa pí mu me

a 'li m̄u me Piele, m̄u maka teme. Piga gba ma-a alú pí teme ango-o.\* Angu kuo kólo tété de. <sup>19</sup> Ma ahá olifungula na Nau na abhúlá-a pí m̄u. Ne angu inde ma aha e pí m̄u bhomu-o, ndu 'he hana inde mo ogbíte e p̄la doto-o, agbíte bhadi lie abhúlá moko. Ndu 'he hana inde mo obhúlu e p̄la doto-o, abhúlu bhadi lie abhúlá moko.» <sup>20</sup> Abhomu-o, Yesu atsia aha líli pí omukpata-a me u apá belegu pí kpála bini de me ni ne Masiya-a de.

*Yesu akpo 'ngú pindji nakpi ne nazuku ka e*

*(Tsia bhú Mlk. 8:31, 9:1; di ne bhú Luk. 9:22-27.)*

<sup>21</sup> Nayie bhú nedhinga bhomu-o, Yesu aholo nasuno pí omukpata gba e mbámá me: «A ayo me ma nu bhú Yelusalema. Oo, ma djé likabhu naali sakpa obhelesi okpála, sakpa ongbengbe odimandø gba Ebhe , di ne sakpa omusuno na líli gba Moidje-o . U abhélø ma. La-a, bhú 'kpí na bata-a, ma tsia zúku.» <sup>22</sup> Abhomu-o, Piele agbele ani ne li ngongo, ani aholo naboyo ani ne napa pí ani me: «Ngámá, a ayo me Ebhe lila m̄u! A mo-o ade, engú bhomu-o kólo li m̄u de!» <sup>23</sup> Engú bini, Yesu adjí lie, ani atsia apa pí Piele me: «Yie oo ko, Satana ! M̄u ne ndjukudu li kpadji gba ma-o. Padhá de, anga omabhundja gba m̄u-o, a ko bhende gba Ebhe-e de, engú bini, a ko bhende gba okpála.»

*A ayo namene ni ngú nakpata Yesu-o?*

<sup>24</sup> Abhomu-o, Yesu atsia apa pí omukpata gba e me: «Í d̄u me kpála bini nde akunda bha nakpata ma na paká-a, a ayo

me ani 'o nabhundja 'ngú gba e makpe. A ayo me ani bí kulusi gba† e-o, amba ani kpata ma. <sup>25</sup> Padhá de, anga i d̄u me kpála nde akunda nalila mukobho gba e, ani kpí. Í d̄u la me kpála nde atse 'kpa li mukobho gba e ngubula ma-a, ani sía mukobho na kakul̄u. <sup>26</sup> La di-e, i d̄u me kpála nde asia ndu 'he hana na doto, engú la bini, ngaani makpe ani kpi-e, ani asía bhúbhú mangua 'he dho? Kpála ti da nakala mukobho gba e ka Ebhe ne mangua 'he dho? <sup>27</sup> Padhá de, anga Ndili gba kpála agó ne oandjelu gba e bhú sangu gba 'Dyi e-o. Abhomu-o, kpála ne kpála tsia sía mbini kulu gba e sakpa ani nakpata lele kulu inde ani amene e-o. <sup>28</sup> Ma apa pí yi na paká me, okpála koko bhú ké obhende inde si-e, mú padhá de, u aú ngaiza nago gba Ndili gba kpála maka 'ngbé ngámá kalanu.»

## 17

*Zi Ebhe asa Yesu ngbalina*

*(Tsia bhú Mlk. 9:2-13; di ne bhú Luk. 9:28-36.)*

<sup>1</sup> Pita ekpí madhia, Yesu aha Piele, ne Djaki ne ndai e Djaa . Ani anu ne uo titi o apí 'ndjá 'ta. <sup>2</sup> Bha si me-e, ani adjí lie kala uo kpi. Bhúla ani aholo nasu má ngbi ngbi ngbi maka zi 'ndji 'la! Obongo li kate ani-e, akolo bububu maka zi 'kpí. <sup>3</sup> Kolo me-e, Moidje ne Eliya aze li uo, u atsia aholo agama 'ngú ne ani. <sup>4</sup> Abhomu-o, Piele atsia apa pí Yesu me: «Ngámá, a ndjindji me ní d̄ulu si. Í d̄u me m̄u nde akunda-a, ma yíki 'ti ngangbali bata: bini pí m̄u, bini pí Moidje, bini pí Eliya.»

\* **16:18** 16:18 Piga gba ma-a alú pí teme bhomu: A akunda napa me Piga gba Ebhe-e alu pí 'li Piele inde ani apa e me Yesu ne Masiya, Ndili gba Ebhe inde uu-o. Tsia bhú Mat. 16:16, di ne bhú Efe. 2:20. † **16:24** 16:24 Nabi kulusi gba e: A ko naziba nazu likabhu di ne nakpi kabula Yesu.

<sup>5</sup> Nedhinga ani adu nga bha lie nagama 'ngú-o, ndindi inde adu li e ne zizi-e ago abuku uo hana. Me-e, eli akoto bhú ndindi ang-o atsia apa pi uo me: «Kpála inde-e ne Ndili gba ma na mukunda. Engú gba ani-e nga li ma naali. Yi dje ani!» <sup>6</sup> Li omukpata adje lie mo-o, u adje tsulu naali. Kaka-a, u atuko kuto, u atsia atutu bhúla o bhú doto. <sup>7</sup> Abhomu-o Yesu adyudyo lie de uo, ani a'o 'kpa e li kute uo, ani atsia apa me: «Yi yie bhúla! Yi adjé tsulu de!» <sup>8</sup> Na'e djila o ka uo me-e, u u kpála bini de, u au bha Yesu kpi e kpi. <sup>9</sup> Nedhinga u adu nako eta-a lie, Yesu atsia aha líli inde-e pi uo me: «Yi apá engú inde yi au e pi kpála bini de, nakolo bha li nedhinga li ngama Ndili gba kpála ma azúku lie ko.»

<sup>10</sup> Abhomu-o, omukpata ayi ani me: «Ka ni li omusuno na líli gba Moidje ngapa lie me, a ayo me Eliya go ngaiza kala me Masiya go-o?» <sup>11</sup> Ani agie me: «A moko, Eliya agó mago, ani tsia léke ndu 'ngú hana ndjindji. <sup>12</sup> Engú la bini, ma apa pi yi me Eliya ago nani ago. Okpála mbila ani de, engú bini, u amene ndu 'ngú hana li kute ani maka u akunda lie. A ayo me ngama Ndili gba kpála ma dje bhadi likabhu ka uo moko.» <sup>13</sup> A la bhomu-o, nambila ka omukpata-a me ani adu akpo 'ngú pi o pindji Djaa bhulu nabatisa okpála.

*Yesu akobho ndili bini na bhobhoko li siti bua adu nadu bhú e (Tsia bhú Mlk. 9:14-29; di ne bhú Luk. 9:37-43a.)*

<sup>14</sup> Yesu ne omukpata gba e bata aké eta-o. U akolo lie de kambí okpála-a, kpála bini adyudyo lie de Yesu. Ani atutu lipuku e kuto kala ani, <sup>15</sup> ani atsia apa pi ani me: «Ngámá, dje nga mbo ndjinga ndili gba ma na bhobhoko-o. A li ani ne kuo na gbulu magbulu.

A ngagbo 'i ani bhú djua, i du di-e bhú 'ngu piko. Ani ngadje likabhu naali. <sup>16</sup> Ma anu ne ani pi omukpata gba mu-o, la-a, u ti da nakobho ani de.» <sup>17</sup> Do Yesu de-e: «Ngayi-e, nabhuka gba yi-e su? Yi ne okpála na sisiti. Ma adu bhú dabili bini ne yi akólo bhú mangua nedhinga dho? Ma akibila yi akólo bhú mangua nedhinga dho? Yi go ne ani muma ei.» <sup>18</sup> U ago pi ani ne ndili-o. Yesu ambe bhú 'ndji siti bua-o, siti bua ang-o atsia akoto bhú ndili-o. Nayie bha li nedhinga bhomu-o, ndili ang-o atsia akobho.

<sup>19</sup> Abhomu-o, omukpata-a adyudyo lio de Yesu, u atsia ayi ani me u nde ne uo kpi o kpi me: «Musuno, ka ni ngaya makpe ya ti igini da nagbe siti bua bhomu-o lie di-e?» <sup>20</sup> Yesu agie pi uo me: «A ko anga nabhuka gba yi-e mbomboyé. Padhá de, anga ma apa pi yi na paká me, i dú me li nabhuka gba yi-e dú nga bha bhú 'ngbé lie maka lí kundju-o, yi de pá pi eta inde-e me: «Yie si, nu aoo», i tsia nú oo. Kpéke da 'ngú de dú pi yi de. [ <sup>21</sup> La di-e, ngua siti bua bhomu-o tí da nakoto bha ka mayo bhú dabili bini ne natse 'zu ngú nayo Ebhe.»]

*Yesu akpo 'ngú pindji nakpi ne nazuku ka e bhutsibhutsi na bhisi (Tsia bhú Mlk. 9:30-32; di ne bhú Luk. 9:43b-45.)*

<sup>22</sup> Ekpí bini, Yesu ne omukpata gba e anu apo bhúla o ndu o hana abhú ndu doto na Galilaya. Ani atsia apa pi uo me: «A ayo me u pu ma Ndili gba kpála pi okpála na doto, <sup>23</sup> amba u bhéle ma, engú bini, bhú ekpí na bata-a, ma tsia zúku.» Abhomu-o, bua omukpata atsia asia likabhu naali.

*Yesu akala mandjandja na 'ngbé 'ti Ebhe gba omaYuda-o*

<sup>24</sup> Yesu ne omukpata gba e akolo bhú Kapalanauma. Li u

akolo lie oo-o, okpála atsitsindji mandjandja na 'ngbé 'ti Ebhe gba omaYuda-a adyudyo lio de Piele, u atsia ayi ani me: «Mɛsuno gba yi-e kakala naae mandjandja na 'ngbé 'ti Ebhe-e di?»<sup>25</sup> Piele agie me: «A mo ade, ani kala makala.» Li Piele ali la lie abhú 'ti-e, Yesu akpo nagama 'ngú ngae. Ani ayi Piele me: «Simo, mo obhundja pi? A kakala mandjandja, i dɛ di-e otakisi gba ongbengbe ongámási na doto da, ne me a ko ongisi gba uo, ne me a ko okpála koko?»<sup>26</sup> Piele agie me: «A kakala ne okpála koko.» Abhomɔ-o, Yesu atsia apa pi ani me: «I dɛ mo-o, ongisi gba ongámási kála naao de, anga uo bhú ngu o.»<sup>27</sup> La-a, ngú napa me bua okpála inde-e asíti de-e, nɛ abhú ekpɔ. Bhike engbe bhú 'ngu. Sungu na kalanɛ inde mo ogbé e, bhulu 'bhɔ ani. Mo obháka oo lí falanga bini. Haha, amba mɛ ha pi uo, ngɔbula ní ne mɛ.»

## 18

*Angbéngbé bhú Nau na abhúlá-a da?*

*(Tsia bhú Mlk. 9:33-37; di ne bhú Luk. 9:46-48.)*

<sup>1</sup> Bhú nedhinga bhomɔ-o, omɔkpata adyudyo lio de Yesu, u atsia ayi ani me: «A nga ngbéngbé bhú Nau na abhúlá-a da?»<sup>2</sup> Yesu a'i mboye ndili bini, ani a'o ani tɛ uo,<sup>3</sup> ani atsia apa me: «Ma apa pi yi na paká me, i dɛ me yi nde lí bua yi de, yi ké liyi ne kuto ngú nakolo maka ongisi na djedjedje de-e, yi lí belegu bhú Nau na abhúlá-a de.»<sup>4</sup> Padhá de, anga gagala 'ngú bhú ndili ade. Kaka-a, kpála bhende i ngakɔ lie ne kuto maka ongisi ndili inde-e, kpála ango-o ngbéngbé bhú Nau na abhúlá-a ngae.»

*Yi ató okpála koko bhú siti 'ngú de*  
*(Tsia bhú Mlk. 9:42-48; di ne bhú Luk. 17:1-2.)*

<sup>5</sup> Yesu atsia apa matá pi omɔkpata gba e me: «Kpála bhende asía nga bha belegu kpála bhende ngakɔ lie ne kuto maka mboye ndili inde-e ka 'lí ma-a, kpála ango-o ngasia bhomɔ-o ma makpe.»<sup>6</sup> Engú bini, li kpála bini to sɔka ongisi bini inde abhuka ma-a bhú siti 'ngú-o, a ndjindji pi ani me u gbite ngingi tangulu ani, amba u bhike ani bhú 'ngbé 'ngu.<sup>7</sup> A ko likabhu pi okpála na doto, anga a ne ongú bhelé inde ngato uo bhú siti 'ngú! A moko, engú na sisiti néke galikpe 'kpí bini de, engú la bini, a ko likabhu pi kpála inde i ngayie ka e ko!

<sup>8</sup> I dɛ me 'kpa mɛ, i dɛ di-e 'dhu mɛ nde ngato mɛ bhú siti 'ngú-o, mɛ de kodho, amba mɛ bhike de mɛ tsutsu. Padhá de, anga a ndjindji pi mɛ nali bhú mukobho na kukulɛ ne ekpa bini, i dɛ di-e edhu bini. Bhobhomɔ-o ane ne bádha me u bhike mɛ ne 'kpa mɛ bhisi, i dɛ di-e ne 'dhu mɛ bhisi hana bhú djua na dɛduma!<sup>9</sup> I dɛ di me lí djila mɛ bini nde ngato mɛ bhú siti 'ngú-o, mɛ de gbe, amba mɛ bhike de mɛ tsutsu. Padhá de, anga a ndjindji pi mɛ nali ne djila mɛ bini bhú mukobho na kukulɛ. Bhobhomɔ-o ane ne bádha me u bhike mɛ ne djila mɛ bhisi hana bhú djua na dɛduma!»

*Gbitaku gba kandelɔ inde angita*

*(Tsia bhú Luk. 15:3-7.)*

<sup>10</sup> Yesu atsia apa matá pi omɔkpata gba e me: «'E-e! Yi aú sɔka okpála inde ngakɔ lio ne kuto maka ongisi inde-e padhá de, anga ma apa pi yi me abhúlá-a, oandjelu gba uo ngalu ndɛ nedhinga hana kala 'Dyi ma. [

11 Padhá de, anga ngama Ndili gba kpála ma ago nani ngú nakobho kpála bhende angita ko.]

12 Yi ngabhundja pi? Li kpála bini dɔ ne okandɔlɔ kámá bini-e, li sɔka uo bini ngita-a, ani 'ó ká obhende ndjikpa odukupabini ne ká odukupabini-e apí 'ta di, ani tsia nú nagili bhende angita-a di?

13 I dɔ la me ani nde au ani au-o, ma apa pi yi na paká me, ani bédhe ne djali bedhe ane djali inde ani nde ne e ngú obhende ndjikpa odukupabini ne ká odukupabini inde i ngita naao de ko. 14 A moko, 'Dyi yi inde abhúlá-a kúnda de me sɔka okpála inde ngakɔ lio ne kuto maka ongisi inde-e ngita belegu de bini.»

*Naleke 'ngú sɔnda o ne ondaise*

15 Yesu apa matá pi omɔkpata gba e me: «Li ndai mɔ mene mɔ sisiti-e, mɔ de nɔ bhaka ani, amba mɔ suno siti 'ngú gba ani-e pi ani me yi nde bhisi ka yi ne ani. Ani dje mɔ-o, amba mo osia ndai mɔ asia. 16 Ani dje mɔ de-e, mɔ de nɔ, mɔ ha kpála bini, i dɔ di-e okpála bhisi, amba «engú angoo lu li 'li okpála bhisi, i dɔ di-e okpála bata†» maka li Bhuku gba Ebhe apa lie ko. 17 Ani dje uo de-e, mɔ de pa engú angoo bhú Piga gba Ebhe. I dɔ la me ani nde ayala nadjɛ belegu okpála na Piga gba Ebhe-e, a ayo me ani kolo pi mɔ maka mɔpagano, la di maka ndɔmbi na mandjandja.

18 Ma apa pi yi na paká me, ndɔ 'he hana inde yi agbíte e pɔla doto-o, a agbíte bhadi lie abhúlá moko. Ndɔ 'he hana la di yi abhúlu e pɔla doto-o, a abhúlu bhadi lie abhúlá moko.»

*Nayo bhú dabili bini*

19 Do Yesu pi omɔkpata gba e de-e: «Ma apa matá pi yi me, i dɔ me

pɔla doto, okpála bhisi bhú ká yi nde adje lio ngú nayo 'he, abana i dɔ bha mangua 'he dho-ie, 'Dyi ma inde abhúlá-a há ehe angoo pi uo. 20 Padhá de, anga bili inde li okpála bhisi, i dɔ di-e okpála bata apo bhúla o lie ne 'li ma-a, ma bhú ká uo oo.»

*Yi mbu li ondaise yi*

21 Abhomɔ-o, Piele adyudyo lie de Yesu, do ani pi ani me: «Ngámá, li ndai ma mene siti 'ngú li pabili gba ma-a, ma de mbu li ani bhútsibhútsi madho? A apise li bhútsibhútsi mananika?» 22 Yesu agie pi ani me: «Ma pa pi mɔ de me a apise li bhútsibhútsi mananika-a de, engú bini, a apise li bhútsibhútsi ndjikpa mananika bhútsibhútsi mananika.

23 A bhadi moko, Naɔ na abhúlá-a, a maka tsingɔ gba 'ngbé ngámá bini inde akúnda nani naleke 'ngú na tia gba e ne okpála na kulu gba e-o. 24 Kalanɔ-o, u ago pi ani ne bhe bini inde adɔ ne tia gba ani-e bhelé na kuo kuo. 25 Li tia dɔ la lie ka ani ngú nagigie de-e, ngámá-a atsia aha líli me u tsindji ani, ne wala ani, ne ongisi gba ani, la di ne ndɔ 'he gba ani-e hana, amba ni sia tia gba ni-e bhúbhú. 26 Abhomɔ-o, kpála na kulu-o ati bhú 'li 'dhu ani, ani atɔ 'ndji e ne kuto, ani atsia akikiliki lie pi ani me: «Dɔ nga mbo ne 'ndjá bua li pabili gba ma, ma agie ndɔ tia gba mɔ-o hana.» 27 Ngámá adje ndjinga ani, ani ambu li ndɔ bopulu gba ani-e hana. Ani atsia a'o ani me ani nɔnɔ.

28 Li kpála na kulu angoo akoto lie, ani akɔ lie ne sɔka kilí e na kulu-o bini. Kpála angoo adɔ ne bopulu gba ani na lí falanga kámá bini má kpíkili! Ani ati li ngulu kpála na bopulu gba e bhomɔ-o má gbu! Ani aholo nafelɔ ngulu ani me ni ngabhɔlɔ ani ne napa pi

† 18:16 18:16 Tsia bhú Det. 19:15.

ani me: «Gie falanga gba ma inde ka mu ko.»

<sup>29</sup> Kilí ani ang-o ati bhú li 'dhu ani, ani aholo nakikiliki lie pi ani me: «Du nga mbo ne 'ndjá bua li pabili gba ma, ma agie pi mu magie.»

<sup>30</sup> Engú bini, bhe koko ayala. La matá pépé-e, ani aha ani, ani anu ne ani me u to ani bhú tikpu akólo bha bini li ani agie bopulu gba e lie-o.

<sup>31</sup> Li obi ani koko au lie mo-o, u adje líkabhu li bua o naali. Kaka-a, u anu akpokpo ndu 'ngú bhomu-o hana maka a akodho 'kpi lie pi ngámá gba o-o.

<sup>32</sup> Abhomu-o, ngámá gba ani-e atsia apa me u 'i ani. Do ngámá-a pi ani de-e: «Mu ne siti kpála na kulu! Ma ambu li ndu bopulu gba mu inde-e hana, anga mo okikiliki limu muma. <sup>33</sup> Ngamu di-e, a ayo igini de me mu dje di ndjinga kilí mu maka ngama makpe ma adje ndjinga mu lie di?» <sup>34</sup> Bua ngámá-a ake naali. Ani aha ani, ani anu ne ani pi okpekpeke obhosi me u mene ani kpekpeke, ngú nakolo bha bini li 'kpi inde ani agie ndu bopulu gba e lie hana ko.

<sup>35</sup> 'Dyi ma inde abhúlá améne bhadi pi yi moko, i du me kpála ne kpála nde mbu li ndai e ne bua e hana de ko.»

## 19

*Yesu asuno pindji nagbo bhusu o bhú kava*

(*Tsia bhú Mlk. 10:1-12.*)

<sup>1</sup> Nedhinga li Yesu andjia nagama ongu bhomu-o lie, u ayie ne omukpata gba e bhú ndu doto na Galilaya. U atsia anu bhú ndu doto na Yudaya inde lingo ngade 'ngu na Djuludani-o. <sup>2</sup> Bhiti okpála akpata ani oo. Abhomu-o, ani atsia akobho okpála na kuo inde adu bhú ká uo-o.

<sup>3</sup> Omufalisai koko adyudyo lio de ani. U atsia ayi ani ngú nale ani me: «Lili gba ní-e aziba pi bhoko uu me ani gie wala e abana i du bha mangua 'ngú dho-ie?» <sup>4</sup> Ani agie me: «Yi tanga nga engú li Bhuku gba Ebhe-e apa e de me nani li lilita-a, Ebhe abho uo ele ne bhoko-o di?» <sup>5</sup> Bhuku ang-o atsia apa matá me: ka 'ngú ang-o, bhoko a'ó ká 'dyi e ne 'hi e, ani tsia dhédhe li wala e. Ndu uo bhisi hana tsia kólo koli kpála bini.† <sup>6</sup> Kaka-a, ma apa pi yi me, uo matá bhisi ade. Engú bini, u akolo koli kpála bini. A ayo de me kpála gbo bhusu 'he inde li Ebhe agbite e de!» <sup>7</sup> Abhomu-o, omufalisai ayi ani me: «Ka ni la li Moidje aha nani líli lie me bhoko ha balua nagbo bhusu e pi wala e nedhinga ani agie ani lie?» <sup>8</sup> Yesu agie me: «Moidje aha nani kpadji pi yi ngú nagie olisi gba yi-e ka kpeke 'ndji gba yi-o. Engú la bini, a li lilita-a, adu nani mo-o de. <sup>9</sup> Ma apa pi yi me: i du me kpála nde agie wala e, a nde de me ele ang-o akunda gala bhoko de-e, i du me kpála ang-o nu ha ele koko-o, kpála ang-o akunda bhomu-o ele koko.»

<sup>10</sup> Omukpata-a apa pi ani me: «I du me líli gba bhoko li pabili gba wala e nde mo-o, tata li naha lio ade.» <sup>11</sup> Ani agie pi uo me: «Ndu okpála hana ke mboli engú bhomu-o de, bha bini obhende li Ebhe aka kpadji pi o tété-o. <sup>12</sup> A ne engú bhelé bhelé inde nga'o me kpála dadu bhú lingbangi. Pi okpála koko-o, u azu uo me angu na ele nde bhú uo ade. Pi okoko, okpála asiti uo ngao. A la di ne okoko i ha olisi de, ngubula na'o lio kpi ngubula Nau na abhúlá . A ayo me kpála inde ati da naké mboli nasuno inde-e, ani ké

† 19:4 19:4 Tsia bhú Dje. 1:27, 5:2. † 19:5 19:5 Tsia bhú Dje. 2:24.

mbolimboli kəkə.»

*Yesu atuko bisagu pí ongisi*

*(Tsia bhú Mlk. 10:13-16; di ne bhú Luk. 18:15-17.)*

<sup>13</sup> Abhomu-o, okpála ago pí Yesu ne ongisi ngubula me aní 'o 'kpa e pí 'ndji uo, amba aní yo Ebhe pí uo. Engú bini, omukpata aholo nayoko okpála ango-o. <sup>14</sup> Yesu atsia apa pí omukpata-a me: «Yi 'o ongisi bhomu, u go bhaka ma, yi ayóko uo de, anga Nau na abhúlá pí okpála bhende lí bua o nde maka ongisi ko.» <sup>15</sup> Aní a'o 'kpa e pí 'ndji uo, pipita-a, aní atsia ayie lí bili bhomu-o.

*Bhulu tia bini ayi 'ngú pindji mukobho na duduma*

*(Tsia bhú Mlk. 10:17-31; di ne bhú Luk. 18:18-30.)*

<sup>16</sup> Abhomu-o, makombi bini adyudyo lie de Yesu. Aní atsia ayi aní me: «Musuno, a ayo me ma mene mangua bádha 'ngú dho ngú nasia mukobho na duduma-a?» <sup>17</sup> Yesu agie pí aní me: «Mú ngayi ma pindji bádha 'ngú ka ní? Koli bádha kpála bha bini. I dú me mú nde akúnda nali bhú mukobho na duduma-a, lila olíli-e malila.» <sup>18</sup> Makombi ango-o ayi Yesu me: «Olíli bhedho?» Yesu agie pí aní me: «Mo obhéle kpála de, mo okúnda ohe, i dú di-e bhoko koko de, mo ozi 'he de, mo opá 'ngú lí kilí mú bhú djila okpála ne eu de. <sup>19</sup> Manga 'dyi mú ne 'hi mú mamanga. Kúnda kilí mú maka mo okúnda limú lie ngamú makpe-o.†» <sup>20</sup> Makombi-e apa pí aní me: «Ndu 'he bhomu-o hana, ma amene. A aneke matá ma ne bhedho?» <sup>21</sup> Yesu apa pí aní me: «I dú me mú nde akúnda nadu ngbingbili-e, nu tsindji ndu 'he inde ka mú-o hana, amba mú ha tia ango-o pí obhulu ndibhili. Abhomu-o, mú tsia sia tia abhúlá. Pipita-a go

kpata ma!» <sup>22</sup> Lí makombi bhomu-o adje 'ngú bhomu-o lie, aní agie lie ne likabhu naali, anga tia adu nani ka aní na mugwe mugwe.

<sup>23</sup> Abhomu-o, Yesu atsia apa pí omukpata gba e me: «Ma apa pí yi na paká me, da nali ka bhulu tia bhú Nau na abhúlá-a kpekpeke. <sup>24</sup> Ma amata apa pí yi ne toto me da nali ka enu maka eya lí gudho musana kpekpeke. La-a, da nali ka bhulu tia bhú Nau gba Ebhe-e ane la matá ne kpéke.» <sup>25</sup> Lí omukpata adje eli bhomu-o lie, u angamba na kuo kuo. U adu apa me: «I dú mo-o, a atí la ibili da nakobho da?» <sup>26</sup> Yesu atsia uo, aní atsia apa pí uo me: «Pí okpála-a, a tí da namene lie de, engú bini, pí Ebhe-e, a tí da namene lie.»

<sup>27</sup> Abhomu-o, Piele atsia ayi aní me: «Musuno, djedje nga. Ngayi-a, ya a'o ká ndu 'he hana ngú nakpata mú. Engú bhe gba ya-a adú lele e pí?» <sup>28</sup> Yesu agie pí omukpata-a me: «Ma apa pí yi na paká me, nedhinga lí doto adjí lie lie na mbia-a, Ndili gba kpála adú pí kiti na asasaua gba e-o. Ngayi obhe akpata ma-a, yi tsia dú di pí okiti na ngámá ndjikpa ne ká bhisi ngú nakodho 'ngú gba opiga ndjikpa ne ká bhisi gba omatsalaele ko. <sup>29</sup> La di-e, kpála ne kpála inde a'o ká oeti gba e, i dú di-e ondaise e na obhosibhosi ne obhe na olisilisi, i dú di-e 'dyi e ne 'hi e, i dú di-e ongisi gba e, i dú di-e edyi gba e ngubula 'li ma-a, aní asia matá koko bhelé. Aní tsia sia di mukobho na duduma. <sup>30</sup> Yi mbila ndjindji me, bhelé na obhende mbia inde-e ne okpála na kalanu-o, akólo okpála na asidi, lí obhende mbia inde asidi-e, tsia kólo okpála na kalanu.»

## 20

† 19:19 19:18-19 Tsia bhú Eki. 20:12-16; ne bhú Det. 5:16-20; di ne bhú Lev. 19:18.



*Gbitaku gba bhulú 'dyi vino ne okpála na kulu gba e*

<sup>1</sup> Abhomu-o, Yesu atsia apa matá me: «Yi gbo nga 'dje yi. Nau na abhulá mana lie ne tsingu gba bhulú 'dyi bini. Bhulú 'dyi ango-o akoto agba e kèkpí má bhé ngubula naha okpála ngú kulu na edyi na vino gba e-o. <sup>2</sup> Aní au uo lie, u adje lio ne uo me ní ahá kuo 'kpa pí uo lí lele kulu na ekpí bini. Aní atsia atima uo ngú nanu amene kulu abhiye na vino gba e-o. <sup>3</sup> Aní akoto matá bhú saa na odukupabini na kèkpí. Aní au okpála inde alulú lí bílí bini bhomu-o mandí kulu. <sup>4</sup> Aní pí uo me: «Ngayi di-e, yi nu abhiye gba ma-o. Kuo 'kpa ma ahá e pí yi-e, adú lí lelele.» <sup>5</sup> Abhomu-o, u atsia agbida oo. Bhulú 'dyi-e akoto matá tulukpe. Pipita-a, aní akoto matá bhú saa na bata pita tulukpe. Ndu nedhinga aní adu akoto lie hana, aní adu abhaka okpála koko alulú lí bílí bini bhomu. U adje lio ne uo, aní atsia apa pí uo me u nu abhiye gba ní ko.

<sup>6</sup> Nakoto matá bhú saa na bhuluvue pita tulukpe-e, aní akoto. Aní abhaka okpála koko alulú oo. Aní atsia ayi uo me: «Yi alulú sí ngbolo 'kpí libhomu mandí kulu ka ní?» <sup>7</sup> Do uo pí aní de-e: «A ko anga kpála bini ha ya bhú kulu de.» Aní pí uo me: «Ngayi di-e, yi nu mene kulu abhiye na vino gba ma-o.»

<sup>8</sup> Lí ekpí akolo lie tagolo-o, bhulú 'dyi-e apa pí kapita gba e me: «'I okpála na kulu-o, amba mu ha kuo 'kpa gba kpála ne kpála pí e, nayie lí obhe ago sídi ngú nabu soso lí obhe ago ígini kalanu-o.» <sup>9</sup> Obhe akpo ígini lita kulu bhú saa na bhuluvue pita tulukpe-e ago. Kpála ne kpála atsia asia kuo 'kpa maka u adje ígini lío ne uo lie-o. <sup>10</sup> Lí obhe ago ígini kalanu-o ago lie, u abhundja naao me o osia

tia bhelé nane obhe ago ígini sídi-o. Engú bini, ngauo di-e, kpála ne kpála asia kuo 'kpa aviti bini ne obhe ago ígini sídi-o. <sup>11</sup> U adu asisia lie, u aholo adi mutokono lí bhulú 'dyi-o. <sup>12</sup> U adu apa me: «Okpála inde-e ago sídi. U amene kulu bha koli saa bini má kpíkili, la-a, mu ngaha uo aviti bini ne ya, ngaya okpála inde andala ne kulu ngbolo 'kpí libhomu bhú ke ku 'la!»

<sup>13</sup> Engú bini, bhulú 'dyi-e agie pí suka uo me: «Olía ma, mu tí da nadi mutokono de. Ma aha tia gba mu-o pí mu maka ní adje ígini líní ne mu lie-o. <sup>14</sup> Ha tia gba mu-o, tatapa. Ma tí da naha pí obhende ago sídi-e bha maka ma aha pí mu lie-o. <sup>15</sup> Mu mbila de me ma tí da namene ne tia gba ma-a maka ma akunda lie dí? Ne me mu ngatsia ma ne ndje djila ka ma amene okpála bhe ago sídi-e lie ndjindji-e!» <sup>16</sup> Yesu atsia abu tata-a me: «Okpála inde asidi-e akólo okpála na akalanu, lí okpála na kalanu-o tsia kólo okpála na asidi.»

*Yesu apa matá bhutsibhutsi na bata engú nakpi ne nazuku ka e*

*(Tsia bhú Mlk. 10:32-34; di ne bhú Luk. 18:31-34.)*

<sup>17</sup> Lí Yesu adu lie nanu bhú Yelusalema-a, aní a'í omukpata gba e de e titi o. Aní atsia apa pí uo me: <sup>18</sup> «Yi djedje nga! Ní adji bhú Yelusalema, bílí inde u apú ma Ndili gba kpála lie pí ongbengbe odimandé di ne omusuno na lílí gba Moidje-o . U akódho 'ngú gba ma-a me ma kpi bha makpi. <sup>19</sup> U apú ma pí okpála inde ne omaYuda ade ngubula me u mu ma. U abhí ma ne fimbo, u tsia gí ma lí kulusi. La-a, ekpí na bata-a, ma tsia zúku.»

*Mayo gba wala Djebedayo (Tsia bhú Mlk. 10:35-45.)*

20 Abhomu-o, wala Djebedayo adyudyo lie de Yesu bhú dabilí bini ne ongisi gba e bhisi na obhosibhosi, Djaki ne uo ne Djaa , inde adu nani omukpata gba Yesu-o. Ani atu 'ndji e ne kuto kala Yesu ngú nayo 'he ka ani. 21 Yesu ayi ani me: «Mo okunda me ma mene pi mu ni?» Ani agie pi Yesu me: «Tsia nga ongisi gba ma bhisi inde. Ha líli me u dalu bhú Nau gba mu-o: bhe bini li pá 'kpa mu na kokpa, bhe koko li pá 'kpa mu na gali.» 22 Do Yesu de-e: «Yi mbila ehe inde yi ngayo e de. Yi ti da nazu likabhu inde ma azú e uu?» U agie me: «Ya ti da nazuzu.» 23 Yesu atsia apa pi uo me: «A moko, likabhu ma azú e, yi azú mazú. La-a, ngú nadu ka yi li pá 'kpa ma na kokpa ne bhe na gali-e, a ko 'ngú ka ma nakodho 'ngú tété de. Obili bhomu-o pi okpála inde li 'Dyi ma aleke pi o ko.»

24 Li omukpata bhe ndjikpa adje 'ngú bhomu-o lie, u ake 'ngú lio pi omukpata bhe bhisi bhomu-o. 25 Abhomu-o, Yesu a'i ndu omukpata hana me u go de ni. Ani atsia apa pi uo me: «Yi mbila ndjindji me ongámási na doto a'o omaha o pi o ma'o, ongbengbe okpála adele omaha o sa 'dhu o. 26 A ayo de me a du bhú ká yi mo-o de. A ayo mangbo me i du me kpála nde akunda nadu 'ngbé kpála bhú ká yi-e, ani de du kpála na kulu gba yi. 27 La di-e, li kpála bini kunda nadu kpála na bini bhú ká yi-e, ani de du bali gba yi-o. 28 A bhadi moko, ngama Ndili gba kpála ma go ngú napa de me okpála mene kulu lio pi ma-a de. Engú bini, ma ago mangbo ngubula namene kulu lima pi okpála, amba ma ha di mukobho gba ma-a maka tia ngú nagbegbe okpála bhelé bhú siti 'ngú gba o-o.»

*Yesu akobho okpála bhisi inde i u 'kpí de*

*(Tsia bhú Mlk. 10:46-52; di ne bhú Luk. 18:35-43.)*

29 Nedhinga li Yesu ne omukpata gba e adu akoto lie bhú gudhu na Djeliko-o, bhiti okpála atsia akpata ani. 30 Abhaka me okpála bhisi inde i u 'kpí de-ende adalu lingo kpadji oo. U adje me Yesu ngakodho 'kpí bhomu-o ngae. Abhomu-o, u aholo nasusula me: «Ngámá, ndili gba Davidi, dje ndjinga ya!» 31 Bhiti okpála bhomu-o adu ambembe bhú 'ndji uo ngubula me u ndjili má bulu! Engú bini, u aholo matá nasusula kpekpeke me: «Ngámá, ndili gba Davidi, dje ndjinga ya!» 32 Abhomu-o, Yesu alu. Ani a'i uo. Ani atsia ayi uo me: «Yi akunda me ma mene pi yi mangua 'ngú dho?» 33 Do uo pi ani de-e: «Ngámá, mene me djila ya u 'kpí.» 34 Yesu adje ndjinga uo, ani abu 'kpa e li djila uo. Ma gala kolo me-e, u aholo nau 'kpí. Abhomu-o, u atsia akpata ani.

## 21

*Yesu ali bhú Yelusalema*  
*(Tsia bhú Mlk. 11:1-11; ne bhú Luk. 19:28-40; di ne bhú Dja. 12:12-19.)*

1 Yesu ne omukpata gba e akolo masikpe de Yelusalema. U adu ibili de kuti na Betefadje, li ngba 'ta na ondula na Olive. Abhomu-o, Yesu atsia atima omukpata bhisi bhú ká omukpata gba e-o. 2 Ani apa pi uo me: «Yi nu bhú kuti inde kala yi aoo. Yi akólo lie oo, yi abháka kolo me u nde agbite punda na ølø bini, la di ne ndili punda bini bhú dabilí bini ne ani. Yi bhulu uo, amba yi go ne uo muma. 3 Li kpála bini yi yi me yi adjí ne uo su-oie, yi de gie me: «Ngámá ne gumu uo.» Abhomu-o, ani 'ó bha kolo me yi nu ne uo

nunú.» <sup>4</sup> Engú bhomú-o améne lie mo-o ngubula me engú inde li polofeta apa nani e, amene lie. Polofeta apa nani me:

<sup>5</sup> «Yi pa pi okpála na Siona me:

«Yi tsitsia nga, 'ngbé ngámá gba yi-e ngago agba yi.

Ani aké lie ne kuto.

Kaka-a, ani adu pí 'ngbú ndili punda.†»

<sup>6</sup> Omukpata-a anu, u atsia amene maka li Yesu apa pi uo lie-o. <sup>7</sup> U ago ne ndili punda ne 'hi e. U aha okoti gba o-o, u abu pí 'ngbú uo. Abhomú-o, Yesu atsia adu pí 'ngbú ndili punda-o. <sup>8</sup> Bhiti okpála na bhíbhiti apa okoti gba o kuto li kpadji. Okoko adu atsolo 'kpá ngulu, u atsia adu napapa li kpadji. <sup>9</sup> Bhiti okpála inde adu adholo kala ani di ne obhende adu nakpata ani-e adu asusula me:

«Odjana\* pi ndili gba Davidi!

A ayo me bisagu du pí kpála inde ngago ne 'li Ngámá-o!

Odjana pi Ebhe inde abhúlá-o!†»

<sup>10</sup> Li Yesu ali lie bhú Yelusalema-a, gudhu-o adimba madimba. Okpála adu ayi me: «A ko da?»

<sup>11</sup> Bhiti okpála atsia adu agie me: «A ko polofeta Yesu, kpála na Nadjaleta bhú ndu doto na Galilaya.»

*Yesu apandja okpála natsindji 'he bhú*

*'ngbé 'ti Ebhe gba omaYuda*

*(Tsia bhú Mlk. 11:15-19; ne bhú Luk. 19:45-48; di ne bhú Dja. 2:13-22.)*

<sup>12</sup> Pipita-a, Yesu ali bhú 'ngbé 'ti Ebhe gba omaYuda-o. Ani apandja ndu okpála hana inde adu natsindji onu di ne odhu inde u adu aha o pi Ebhe, a la di-e obhende adu akakala kilidjo. Ani abala omisa gba okpála

nayipa falanga, di ne odabili gba okpála natsindji opidjo-o kuto.

<sup>13</sup> Abhomú-o, ani atsia apa pi uo me: «U aye bhú Bhuku gba Ebhe-e me, Ebhe apa me, «u a'í eti gba ma-a me a ko eti na mayo.» La ngayi-e, yi adji, a tsia akolo bili gba obhulu 'zi!†»

<sup>14</sup> Abhomú-o, okpála inde i u 'kpí de ne obhende na eze-e adyudyo lio de ani bhú 'ngbé 'ti Ebhe gba omaYuda, ani atsia akobho uo. <sup>15</sup> Li ongbengbe odi-mandø gba Ebhe, di ne omusuno na líli gba Moidje au ongamba 'ngú inde ani amene e lie, la di ne ongisi inde adu asusula bhú 'ngbé 'ti Ebhe gba omaYuda me: «Odjana pi ndili gba Davidi-e», u asia siti bua. <sup>16</sup> Abhomú-o, u atsia ayi Yesu me: «Mú ngadja engú inde li ongisi bhomú ngapa e uu?» Yesu atsia agie pi uo me: «Heni, ma ngadjedje hana. Yi tanga nga engú inde li Davidi apa nani e bhú Bhuku gba Ebhe-e belegu de bini? Davidi apa nani me, Ebhe amene me belegu ongisi na djedjedje ne obhende ngandji 'ka toko ni.†» <sup>17</sup> Pipita-a, ani a'o ká ongbengbe odimandø di ne omusuno na líli gba Moidje-e bhú gudhu oo. Ani atapa bhú kuti na Betania, ani atsia asi oo ko.

*Yesu atu pedje li 'lá figi inde i li líli de*

*(Tsia bhú Mlk. 11:12-14, 20-24.)*

<sup>18</sup> Kèkpí li ekpí aseke lie, li Yesu aholo nagie matá lie lie abhú gudhu-o, ani aholo nadge gamu. <sup>19</sup> Abhomú-o, ani au 'lá figi deno 'hi-kpadji. Ani adyudyo lie dede masikpe, engú bini, ani bhaka 'he bhúbhú belegu de bini, bha bini ndu mbulu kpákpá padhá. Ani atsia apa pi ndula na figi-e me:

† 21:5 21:5 Tsia bhú Djkl. 9:9. \* 21:9 21:9 Odjana: A akunda napa bhú eli gba oebele me «Sangu.» Tsia bhú Ets. 118:25-26. † 21:9 21:9 Tsia bhú Ets. 118:25-26. † 21:13 21:13 Tsia bhú Isa. 56:7; di ne bhú Djlml. 7:11. † 21:16 21:16 Tsia bhú Ets. 8:3.

«Mú lí matá lílí belegu de bini!» Kolo me-e, 'lá figi a'ulú hana má kekele! <sup>20</sup> Lí omukpata au lie mo-o, u angamba naali, u atsia ayi Yesu me: «Lele pí lí 'lá figi-e a'ulú bha lie ma 'lí mú-o?» <sup>21</sup> Do Yesu pí uo me: «Ma apa pí yí na paká me, í dũ me yí nde ne nabhuka, yí dũ ne bua na bhisi bhisi de-e, yí méne bha bini engú inde ma amene e lí kute 'lá figi-e de. Engú bini, yí tí da napa belegu pí eta inde-e me: «Yie oo, amba mú nũ tí bhú ngade 'ngu, í tsia méne lie moko. <sup>22</sup> Í dũ me yí nde ne nabhuka-a, ndũ 'he hana inde yí ayó e bhú mayo-o, yí asía masia.»

*A ngaha angu pí Yesu da?*

*(Tsia bhú Mlk. 11:27-33; di ne bhú Luk. 20:1-8.)*

<sup>23</sup> Yesu akolo lie bhú gudhu-o, ani ali matá bhú 'ngbé 'tí Ebhe gba omaYuda-o. Ani atsia aholo nasuno pí okpála. Abhomu-o, ongbengbe odimandø gba Ebhe, ne obhelesi okpála adyudyo lio de ani. U atsia ayi ani me: «A aha kpadji pí mú ngú namene ongú inde-e da? A aha la di angu ango-o pí mú ngánga da?» <sup>24</sup> Yesu agie pí uo me: «Ngama di-e, ma ayí yí lí kólí engú bini. Í dũ me yí nde agie 'ngú múma tété-e, ma tsia pá di pí yí me ma ngamene ehe inde-e ne mangua angu dho-ie.

<sup>25</sup> Ma ngayi yí me: «A aha nani kpadji pí Djaa ngú nabatisa okpála da? Ne me aha nani kpadji pí ani ne okpála, ne me aha kpadji pí ani ne Ebhe?» U atsia aholo natoto bua o sũnda o me: «Í dũ me ní nde apa me: «A aha kpadji pí ani ne Ebhe-e», ani yí ní me: «Ka ní la yí bhuka nani ani lie de-e?» <sup>26</sup> Í dũ la di me ní nde apa me: «A aha kpadji pí ani ne okpála-a», ní de tsia 'kpí liní ka okpála-a ndjindji, anga ndũ okpála hana dũ nani nau Djaa me a ko polofeta.» <sup>27</sup> Abhomu-o, u

atsia agie pí Yesu me: «Ya mbíla de me aha nani kpadji pí ani da-ie de.» Ngaani di-e, ani atsia apa pí uo me: «Ngama-a, ma pá di pí yí de me aha angu múma ngú namene ongú inde-e da-ie de.»

*Gbitaku pindji ongisi bhisi*

<sup>28</sup> Yesu atsia ayi matá me: «Yí apa nga naayi lí 'ngú inde-e pí? Kpála bini adũ nani ne ongisi gba e bhisi. Ani anũ abhaka bhe na kalanu-o, ani atsia apa pí ani me: «Ndika ma, naki-e, nũ mene kulu abhiye na vino.» <sup>29</sup> Ndili agie me: «Ma nũ de.» Pipita-a, ani adji bua e, ani atsia anũ abhiye-o. <sup>30</sup> 'Dyí uo anũ apa di pí bhe na bhisi-e me ani nũ abhiye na vino-o. Bhobhomu-o agie pí ani me: «Ma adji, 'dyí ma.» La-a, ani tsia nũ de. <sup>31</sup> Bhú ká ongisi bhisi bhomu-o, a amene engú inde lí 'dyí uo adũ akanda e da?» U agie me: «Bhende na kalanu-o.» Yesu atsia apa pí uo me: «Ma apa pí yí na paká me, ondømbi na mandjandja, di ne obambakuya ali pí yí kalanu bhú Nau gba Ebhe-o. <sup>32</sup> Padhá de, anga Djaa ago agba yí ne nasuno pí yí kpadji na ngbili 'ngú, yí tsia bhuka ani de. Engú bini, ondømbi na mandjandja di ne obambakuya atsia abhuka ani. Abana yí au ndũ 'ngú bhomu-o hana lie ne djila yí-e, ngayi-e, yí bhuka ani de.»

*Gbitaku pindji osisiti okpála na kulu*

*(Tsia bhú Mlk. 12:1-12; di ne bhú Luk. 20:9-19.)*

<sup>33</sup> Yesu atsia apa matá me: «Yí dje nga matá gbitaku koko inde. Bhułu bili bini alu nani ngu vino, ani asa ngongo-o hana ne aga. Ani adji edú ngú napi olílí-e bhúbhú, ani atsia ayiki 'ndjá 'tí abhúlá bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o dũ agbó bhusu o ne

uo li nguwa-o. Abhomu-o, ani atsia atapa dhuku. <sup>34</sup> A akolo lie li nedhinga nako lílí-e, ani atima okpála na kulu gba e agba okpála inde ngamene kulu bhú 'dyi vino me u ha nguwa bhe gba ní-e pí ni haha.

<sup>35</sup> Engú bini, okpála namene kulu bhú 'dyi vino azumu bha okpála ango-o hana. Bhe bini-e, u abhi ani má kpu! Bhe koko-o, u abhelo ani, bhe na bata-a, u atutulú ani ne teme. <sup>36</sup> Abhomu-o, bhulu 'dyi-e atima matá okpála na kulu koko bhelé nane obhende na kalanu-o mane. U amene bhadi uo moko. <sup>37</sup> Ali soso-o, ani atima ndili gba e agba okpála ango-o ne nabhundja me: «U amanga ndili gba ma-a mamanga.» <sup>38</sup> Engú bini, li okpála namene kulu bhú 'dyi vino au ndili-e lie, u apa sunda o me: «Kukulú kpála inde atígala la ndju ne edyi-e ngae inde. Yi gogo, ní bhelo ani, amba ní tigala ibili ne edyi-e nganí!» <sup>39</sup> Abhomu-o, u ati pí ani má kii! U aha ani, u agbe ani bhú 'dyi na vino-o, u atsia abhelo ani.

<sup>40</sup> Mbia inde-e, nedhinga li bhulu 'dyi vino agó lie, ani améne ngú okpála na kulu bhomu-o pí?» <sup>41</sup> U agie pí ani me: «Ani abhili omabhobhelo kpála bhomu-o hana, ani djé ndjinga uo de. Pipita-a, ani há 'dyi vino pí okpála koko ngú namene kulu bhúbhú, obhende ahá nguwa pí ani bhú nedhinga u adje lio ne uo li e-o.»

<sup>42</sup> Yesu atsia apa pí uo me yi ngagama 'ngú mugito me yi tanga nga engú inde li Bhuku gba Ebhe-e apa e belegu de bini. Bhuku gba Ebhe-e apa li 'ngú gba Masiya me: «Teme inde li okpála nayiki eti-e au me a ne tata ade-e,

a akolo teme inde abi eti-e libhomu-o ngae.

Ebhe Ngámá amene mo-o ngae.

Bhú djila ní-e, a ko 'ngú na ngangamba!†»

<sup>43-44</sup> Kpála bhende atí pí teme ango-o, ani gúgumu. Kpála bhende la di li teme ango-o atí pí e, teme ango-o bá mbu ani má mbu! Ka yi au teme li Bhuku gba Ebhe-e apa 'ngú e lie padhá-a, ma apa pí yi me, ngayi-e, Ebhe ani 'bhe bhoti na Nau gba e pí yi mani, ani tsia bhulu pí okpála bhende ngamene engú inde ani akunda e-o.

<sup>45</sup> Li ongbengbe odimandø di ne omuFalisai adje gbitaku ango-o lie, u atsia akø mbolimboli me ani de ngagama 'ngú bhomu-o pindji o. <sup>46</sup> U aholo agili kpadji ngú naholo ani, engú bini, u adu ne tsulu ka okpála, anga okpála adu au me a ko polofeta.

## 22

*Gbitaku pindji 'ngbé anokomia na kuva*  
(Tsia bhú Luk. 14:15-24.)

<sup>1</sup> Abhomu-o, Yesu apa matá gbitaku pí okpála ani adu akpo 'ngú pí o-o me: <sup>2</sup> «Yi tsia nga engú inde li Nau na abhúla akpo 'ndji e ne e-o: A maka tsingu gba 'ngbé ngámá bini inde amene anokomia na kuva pí ndili gba e na bhobhoko. Ani atsia a'i okpála bhú anokomia ango-o. <sup>3</sup> Ekpi na anokomia ale lie, ani atima okpála na kulu gba e na'i okpála inde ani a'i o me u go bhú anokomia ango-o. Engú bini, u ziba nago li e'i ango-o de.

<sup>4</sup> Ani atima matá okpála na kulu koko. Ani aha lílí pí uo me u nu pa pí okpála ani a'i o-o me: «Mbia inde-e, ma alu ezu gba ma-a alu. Ma abhili obagala gba ma ne onu na tsikpa abhili, ndundu hana ibili bedhe. Yi go bhú anokomia ango-o gogo!» <sup>5</sup> Engú bini, ngauo-o, u adje bha ne 'dje o. U atsia

agbida bhú onǵú gba o. Bhe bini aholo ne enú abhú 'dyi gba e, koko bhú natsindji mase gba e. <sup>6</sup> Okoko aholo okpála na kulu inde u atima o-o, u amene uo kpekpeke, u atsia abhili uo. <sup>7</sup> Li 'ngbé ngámá-a adje lie, ani abi 'gú naali. Abhomu-o, ani atsia atima osudha gba e me u bhili omabhèbhèlè kpála bhomu, amba u to di djua li gũdhũ gba uo-o.

<sup>8</sup> Pipita-a, ani atsia apa pi okpála na kulu gba e me: «Anokomia na kũva-a bedhe. Engú bini, okpála ma a'i o-o ti matá da nago bhúbhú de. <sup>9</sup> Kaka-a, yi nu li odi kpadji, yi 'i ndũ okpála inde yi abháka o hana, amba u go zũ 'he-o.» <sup>10</sup> Okpála na kulu bhomu-o aze li okpadji. U atsia apo bhúla okpála bhende u adũ abhaka o-o hana, obabadha okpála di ne osisiti okpála. U anũ ne uo bhú 'ti na anokomia-o. Abhomu-o, tina 'ti na anokomia atsia abedhe ne uo bedhe.

<sup>11</sup> Abhomu-o, 'ngbé ngámá-a ali bhú 'ti na anokomia ngubula natsia okpála inde ani a'i o-o. Ani au kpála bini inde i dyi bongo na anokomia de. <sup>12</sup> Ani ayi kpála ango-o me: «Wai, mo oli ei lele pi me mu nde dyi bongo na anokomia di-e?» Kpála ango-o andjili bha má bulu! <sup>13</sup> Abhomu-o, 'ngbé ngámá-a apa pi okpála na kulu-o me: «Yi gbìgbite 'kpa ani ne 'dhũ ani, amba yi bhike ani bhú biti akilidjo. Oo-o, ani adũ aku 'gbá ne nazũ tate e.»

<sup>14</sup> Yesu atsia abu tata-a me: «A moko, Ebhe a'i okpála bhelé, engú la bini, obhende ani alo o-o, uo bhelé ade.»

*OmũFalisai ato Yesu pindji nakala mandjandja gba 'ngbé ngámá Kaisala*

*(Tsia bhú Mlk. 12:13-17; di ne bhú Luk. 20:20-26.)*

<sup>15</sup> Abhomu-o, omũFalisai anũ nadi bula ngubula nagili kpadji ngú nateke Yesu li 'li e. <sup>16</sup> U atsia atima té omũkpata gba o bhú dabili bini ne okpála gba Elode ngubula napa pi Yesu me: «Mũsuno, ya mbila ndjindji me mu ngapa ngbili 'ngú . Mu ngasuno bhadi kpadji gba Ebhe-e ngbingbili. Tsulũ kpála belegũ li mu ade bini, anga mu tsia di engbé gba kpála de. <sup>17</sup> Mu ngabhundja naamũ pi? A ayo me ya kala mandjandja gba 'ngbé ngámá Kaisala ne me ya kala de. Pa nga pi ya.» <sup>18</sup> Engú bini, li Yesu ambila siti kali gba uo-o lie, ani atsia apa pi uo me: «Obhũlũ kali inde-e, ka ni yi ngato ma lie? <sup>19</sup> Yi suno nga falanga inde u akakala mandjandja ne e muma.» U atsia ago pi ani ne lí falanga bini. <sup>20</sup> Yesu atsia ayi uo me: «Kulu kpála, ne balua inde pi lí falanga inde-e, a ko naa da?» <sup>21</sup> U atsia agie pi ani me: «A ko naa Kaisala.» Abhomu-o, ani atsia apa pi uo me: «Yi ha oehe bhende li Kaisala ngayo e pi Kaisala, amba oehe bhende li Ebhe ngayo e, yi ha pi Ebhe.» <sup>22</sup> U adje lie mo-o, u angamba naali. U a'o ká ani, u atsia agbida.

*OSadukai ayi 'ngú pindji nazuku ka okpála*

*(Tsia bhú Mlk. 12:18-27; di ne bhú Luk. 20:27-40.)*

<sup>23</sup> Bha li 'kpí bhomu-o, oSadukai ago abhaka Yesu. (Ngauo-o, u ngapa naao me okpála inde amu-o zũku de.) U atsia ayi Yesu me: <sup>24</sup> «Mũsuno, Moidje apa nani me: ð dũ me bhoko bini kpi me ani nde zu ongisi de-e, ndai ani na bhobhoko-o bhe akè pita ani-e de ha èkè ani ngubula nazu ongisi pi ndai e inde akpi-o.» <sup>25</sup> Gbo nga la 'dje mu. Obhosi mananika adũ nani agba ya. A adũ nani ondaise.

Bhebhele-e aha ɛlɛ, anɪ atsia akpi me anɪ nde zu de. Bhende akɛ pɪta anɪ-e atsia aha ɛkɛ anɪ-o. <sup>26</sup> Bhende na bhisi bhomu-o akpi bhadi moko, anɪ nde zu de. A akɛ li bhende na bata, nakolo makolo li bhende na mananika-o. Ndu uo hana amu me u nde zu de. <sup>27</sup> Pɪta namu ka ndu uo hana-a, ɛlɛ-o atsia akpi di. <sup>28</sup> Li 'kpɪ li okpála inde amu-o azúku lie, bhú ká obhosi mananika bhomu-o, ɛlɛ bhomu-o adú naa da? Padhá de, anga ndu uo hana aha nani anɪ.»

<sup>29</sup> Yesu atsia agie pi uo me: «Yi angita, anga yi kɛ mboli engú li Bhuku gba Ebhe-e ngapa e de. Yi mbɪla di angu gba Ebhe-e de. <sup>30</sup> Padhá de, anga li okpála inde amu-o azúku lie, olisi ne obhosi há lio de. Engú bini, u adú ɪbɪli maka oandjelu abhúla. <sup>31</sup> Pɪndji 'ngú bhende atsia nazuku ka okpála inde amu-o, yi tanga nga eli gba Ebhe-e di? Ebhe apa nani pi yi me: <sup>32</sup> «Ngama-a, ma ne Ebhe inde li onguo ogbi yi Abalahama, Isaka, ne Yakobho ngamene kulu lio pi e ko.» Ebhe-e, a ko Ebhe gba okpála bhende amu-o ade. Engú bini, a ko Ebhe gba okpála inde u ko.»<sup>†</sup> <sup>33</sup> Ndu okpála hana inde adje engú bhomu-o angamba naali li nasuno gba anɪ-o.

*Nasuno pɪndji líli inde ane ne engbé*

*(Tsia bhú Mlk. 12:28-34; di ne bhú Luk. 10:25-28.)*

<sup>34</sup> Abhomu-o, Yesu atsia agbite 'bhɛ oSadukai ne engú anɪ agie e pi uo-o. Li omuFalísai adje lie mo-o, u anu apo bhúla o de anɪ. <sup>35</sup> Suka uo adu musuno na líli gba Moidje . Anɪ adu akunda nato Yesu. Kaka-a, anɪ atsia ayi anɪ me: <sup>36</sup> «Musuno, bhú ká olíli-e, bhende ane ne engbé-e ngae dho?» <sup>37</sup> Yesu atsia agie pi anɪ me: «A ayo me

kunda Ebhe, Ngámá gba mu-o ne bua mu hana, ne mukobho gba mu-o hana, di ne mabhundja gba mu-o hana.»<sup>†</sup> <sup>38</sup> A bhomu-o líli inde ane ne engbé, inde di líli na kalanu-o. <sup>39</sup> Bhende pipita, inde bhadi ngbéngbé maka bhe na kalanu-o ngae inde: «A ayo me kunda kilí mu maka mo okunda limu lie ngamu makpe-o.»<sup>†</sup> <sup>40</sup> Engú li u aye e bhú líli gba Moidje ne bhende li opolofeta aye e hana alu pí olíli bhisi bhomu.»

*Masiya ne Ngámá gba Davidi*

*(Tsia bhú Mlk. 12:35-37; di ne bhú Luk. 20:41-44.)*

<sup>41</sup> OmuFalísai adu nga bha nagama 'ngú ne Yesu. Anɪ atsia ayi uo me: <sup>42</sup> «Yi ngabhundja pɪndji Masiya pi? A ko ndili ka da?» U atsia agie pi anɪ me: «A ko ndili ka Davidi.» <sup>43</sup> Yesu atsia ayi uo me: «I du mo-o, lele pi li Davidi, bhú angu gba Bu Bhobua-nga'i Masiya lie me Ngámá gba ni-e? Padhá de, anga Davidi apa nani me:

<sup>44</sup> «Ebhe Ngámá apa pi Ngámá gba ma-a me:

go du li pá 'kpa ma na kokpa, amba ma mene me mu ha angu obhulu yala gba mu-o.»<sup>†</sup>

<sup>45</sup> I du la me Davidi nde nga'i Masiya me «Ngámá gba ni-e, lele pi li Masiya ti da nadu lie ndili ka anɪ-e?» <sup>46</sup> Abhomu-o, kpála bini tsia du ne eli nagigie pi anɪ li 'ngú anɪ ayi e de. Nayie li 'kpɪ bhomu-o, kpála bini tsia le matá nayi anɪ li 'ngú belegu de bini.

## 23

*Yesu apa me yi améne 'ngú maka omusuno na líli gba Moidje di ne omuFalísai-e de*

*(Tsia bhú Mlk. 12:38-39; di ne bhú Luk. 11:43, 46, 20:45-46.)*

<sup>†</sup> 22:32 22:32 Tsia bhú Eki. 3:6. <sup>†</sup> 22:37 22:37 Tsia bhú Det. 6:5. <sup>†</sup> 22:39 22:39 Tsia bhú Lev. 19:18. <sup>†</sup> 22:44 22:44 Tsia bhú Ets. 110:1.

1 Abhomu-o, Yesu apa pi bhiti okpála di ne omukpata gba e me: 2 «Kulu gba omusuno na líli gba Moidje di ne omuFalisai-e , a ko nambamba ta olíli gba Moidje pi okpála. 3 Kaka-a, yi mene ndu 'ngú hana inde u apa e pi yi-o, amba yi tsia lila di ndjindji. Engú la bini, yi akpáta kulu gba uo-o de, anga engú u ngapa e, u mene maka u ngapapa lie de. 4 U ngagbite titili 'he na titili, u nga'o'o de-ngulu okpála. La-a, ngauo makpe, u ngayala na'o nga bha tété ndjili 'kpa o ngú nateteke okpála li tili 'he inde u a'o e de-ngulu uo-o. 5 Ndu 'ngú gba uo hana, u ngamemene me okpála u o mau. Kaka-a, u ngaye 'li Ebhe ne baba djila balua, u ngagbigbite pidi o ne li 'kpa o. U la di ngadu 'so kandju gba o ndjandjandja ane mane. 6 U ngakunda nadulu bhú dá oanokomia li bili gba ongbengbe okpála, u kunda di nadulu bhú otí nadjé líli gba Moidje li bili inde li okpála adú au o lie mau. 7 U kukunda me u du nayi o bhú odaposo, di ne me okpála du a'i o me «Musuno.»

8 Pi yi-e, yi améne de me okpála du a'i yi me «Musuno-o» de. Padhá de, anga yi bha ne koli Musuno bini, yi la bhadi ndu yi hana ne ondaise . 9 Yi a'í kpála bini pila doto de me «'Dyi yi-e» de, anga koli 'dyi yi bha bini ngae inde abhúlá ko. 10 Yi améne di de me okpála du a'i yi me «Ngámá-a» de, anga koli Ngámá gba yi-e bha bini ne Kilisito . 11 A ayo me kpála inde ane ne engbé bhú ká yi-e du kpála na kulu gba yi ko. 12 Kpála bhende a'ó lie ngae makpe ne abhúlá-a, u akó aní ne akuto. Kpála bhende

a'ó la lie ngae makpe ne akuto-o, u a'é'e aní ne abhúlá.»

*Yesu ambamba ta kali gba omusuno na líli gba Moidje di ne omuFalisai-o*

*(Tsia bhú Mlk. 12:40; di ne bhú Luk. 11:39-52, 20:45-47.)*

13 Yesu apa matá me: «A ko likabhu pi yi, omusuno na líli, di ne omuFalisai. Yi ne obhulu kali! Padhá de, anga yi ngani 'bhè bhoti na Nau gba Ebhe-e pi okpála. La ngayi-e, yi li oo de, yi ka la di kpadji pi obhende akunda nali-e de. [ 14\* ]

15 A ko likabhu pi yi, omusuno na líli di ne omuFalisai. Yi ne obhulu kali! Padhá de, anga yi ngadhólo ne ndu bili hana pila doto ne pi 'ngbé 'ngu ngubula me gandji kpála bini bhuka líli gba Moidje-o. I du la me aní nde abhuka-a, yi ngamene me aní kolo kpála na djua na duduma nane yi bhutsibhutsi bhisi.

16 A ko likabhu pi yi, djila yi adudu. Yi la ngale me yi suno kpadji pi okpála! Yi ngapa me: «I du me kpála nde atá silika ne 'li 'ngbé 'ti Ebhe gba omaYuda-a, engú tété ade. Engú la bini, i du me kpála nde atá silika ne 'li olo na 'ngbé 'ti Ebhe gba omaYuda-a, a ayo me kpála ango-o mene engú inde aní atá silika ngú e-o.» 17 Ngayi-e, yi ne ongingi, djila yi adudu! A ane ne engbé ne bhedho? Ne me a ko olo, ne me a ko 'ngbé 'ti Ebhe inde ngamene me olo-o kolo bubu kala Ebhe-e? 18 Yi ngapa matá me: «I du me kpála nde atá silika ne 'li bili natsulu enu pi Ebhe-e, engú tété ade. Engú la bini, i du me kpála nde atá silika ne 'li enu inde u ngatsulu e pépé-e, a ayo me kpála

\* 23:14 23:14 Lukuluku inde-e, a bhú obhuku koko na didili u aye e bhú eli na giliki ade. [A ko likabhu pi yi, omusuno na líli di ne omuFalisai. Yi ne obhulu kali! Padhá de, anga yi ngabha ndu 'he inde ka ookesi-e hana. Yi la di ngayo Ebhe ngengele bhú djila okpála, amba u u me yi ne obabadha okpála. Kaka-a, u akódho 'ngú gba yi-e kpekepeke naali!] Tsia bhú Mlk. 12:40.



ango-o mene engú inde ani atu silika ngú e-o.»<sup>19</sup> Ngayi-e, djila yi adudú! A ane ne engbé ne bhedho? Ne me a ko enú inde u ngatsulu e pi Ebhe, ne me a ko bili inde ngamene me enú ango-o kolo bubu kala Ebhe-e? Ndundu hana viti bini.

<sup>20</sup> Kaka-a, kpála bhende ngatu silika ne 'li bili natsulu enú-o, ani bhomu-o ngatutu ne 'li bili natsulu enú, la di ne 'li ndú 'he hana inde pépé-o. <sup>21</sup> La di-e, kpála bhende ngatu silika ne 'li 'ngbé 'ti Ebhe, ani bhomu-o ngatutu ne 'li 'ngbé 'ti Ebhe, di ne 'li Ebhe inde ngadu bhúbhú ko. <sup>22</sup> Kpála bhende ngatu la di silika ne 'li kokpí-e, ani bhomu-o ngatutu ne 'li kiti na ngámá gba Ebhe, la di ne 'li Ebhe inde ngadu pépé-o.

<sup>23</sup> A ko likabhu pi yi omusuno na líli di ne omuFalisai. Yi ne obhulu kali! Padhá de, anga yi ngaha belegu bini bhú ká ndjikpa na oulu na babadha sese. La-a, ongbengbe 'ngú inde li líli-e ngasuno e pindji nakodho 'ngú li lelele bhú dabili bini ne bua na ndjinga, a la di-e namene engú inde li Ebhe akanda e, yi ngauu padhá. A la bhomu-o engú inde a ayo me yi de amene e, me yi nde 'ili di 'to yi li okoko de ko. <sup>24</sup> Ngayi-e, djila yi adudú, Yi la ngale me o suno kpadji pi okpála! Yi ngapandja ondjindji bhú 'he nandji mandji gba yi-o. La-a, yi ngabhi enú maka eya libhomu bhú 'bu yi má ngbi!

<sup>25</sup> A ko likabhu pi yi omusuno na líli di ne omuFalisai. Yi ne obhulu kali! Padhá de, anga yi ngavulu kate okópo ne osaani gba yi-e má ngbi, la-a, ohe inde yi nga'o e bhúbhú-o, a ko ohe inde yi asia e li kpadji na ezi bhú dabili bini ne kundú 'he inde bhú yi-o. <sup>26</sup> Ngayi omuFalisai-e, yi u 'kpí de! Yi vulu ngaiza bhú

kópo-o ngubula me kukute kolo di babadha.

<sup>27</sup> A ko likabhu pi yi omusuno na líli di ne omuFalisai. Yi ne obhulu kali! Padhá de, anga yi maka olata inde u apulu embú pí e, inde i ngau lie akilidjo babadha. Engú bini, abhúbhú abedhe ne tsagala biki okpála bhende amu di ne ondu 'he na sisiti hana. <sup>28</sup> A bhadi pi yi moko. Bhú djila okpála-a, yi ngau liyi me yi ne okpála na ngbingbili. La abhú yi-e, yi abedhe ne kali di ne ongú na sisiti bedhe.

<sup>29</sup> A ko likabhu pi yi omusuno na líli di ne omuFalisai. Yi ne obhulu kali! Padhá de, anga yi ngaleke olata opolofeta ndjindji, yi di ngaye obabadha tele li olata okpála na ngbingbili-o. <sup>30</sup> Yi la ngapa me: 'Ya dú nani bhú 'kpí odyi ya u-o, ya de kpötsé 'kpa ya ne uo ngú nabhili opolofeta de.»  
<sup>31</sup> Kaka-a, yi ngakpokpo bhomu-o engú gba yi makpe, me yi ne ongisi gba okpála inde abhili opolofeta-o! <sup>32</sup> Atou! Yi bedhe 'bhé engú li odyi yi akpo nani lita e bebedhe! <sup>33</sup> Yi ne okpulu, yi ne piga ombuma! Yi anéke mangimbo nanu bhú djua na duduma lele pi?

<sup>34</sup> Kaka-a, yi djedje nga: ma ngatima opolofeta ne obhulu imbilangú, la di ne okukulu omusuno na líli pi yi. Yi abhili okoko bhú ká uo, yi gí okoko li kulusi. Yi abhí okoko ne fimbo bhú oeti nadje líli gba yi-o, yi tsia nú ne nato mbolo li okoko bhú gudhu bini ne bini. <sup>35</sup> Yi améne mo-o ngubula me ngute ndú okpála na ngbingbili hana inde yi abhili nani o pála doto libhomu-o tuko pí 'ndji yi. Padhá de, anga yi abhili nani okpála na ngbingbili bhelé, nayie li Abele, nakolo li Djakalia, ndili gba Balasi-o. Yi abhele nani Djakalia bhú mbadhasu na 'ngbé 'ti Ebhe,

sunda bili natsulu enu pi Ebhe ne titina na bubu-o. <sup>36</sup> A moko, ma apa pi yi me ndu 'ngú bhomu-o hana atúko pí 'ndji okpála na naki inde.»

*Yesu aku 'gbá ngú okpála na Yelusalema*

*(Tsia bhú Luk. 13:34-35.)*

<sup>37</sup> Yesu apa matá me: «Ngayi okpála na Yelusalema, ngayi okpála na Yelusalema, ngayi-e, yi ngabhili opolofeta, yi la di ngabhili okpála inde li Ebhe atima o pi yi-e ne teme! A ko bhutsibhutsi madho, ma akunda napo bhúla ongisi gba yi-e lie maka li 'hi 'ngú apopo bhúla ongisi gba e lie sa mbudha e? La-a, yi tsia kunda de! <sup>38</sup> Kaka-a, kuti gba yi-e atigala padhá. <sup>39</sup> Padhá de, anga ma apa pi yi me nayie pi mbia inde-e, yi ú matá ma belegu de bini akólo li 'kpí inde yi apá lie me: «A ayo me Ebhe tuko bisagu pí kpála inde ngago ne 'li aní-o!†»»

## 24

*Yesu apa me u agúgumu 'ngbé 'ti Ebhe gba omaYuda-a kuto*

*(Tsia bhú Mlk. 13:1-2; di ne bhú Luk. 21:5-6.)*

<sup>1</sup> Abhomu-o, Yesu akoto bhú 'ngbé 'ti Ebhe gba omaYuda-o. Li aní aholu ne 'nú lie, omukpata gba aní atsia adyudyo lio de aní ngú napana pi aní maka li 'ngbé 'ti Ebhe gba omaYuda-a ayiki lie lie-o. <sup>2</sup> Yesu atsia apa pi uo me: «Yi ngau ndu 'he bhomu-o hana? Ma apa pi yi na paká me, ekpí bini akólo makolo, u agúgumu 'ngbé 'ti Ebhe-e hana kuto. Teme bini tígala pí kili e de.»

*Engú inde akólo kala sokpí-o*

*(Tsia bhú Mlk. 13:3-13; di ne bhú Luk. 21:7-19.)*

<sup>3</sup> Abhomu-o, Yesu anu adu kuto pí 'ta na ondula na Olive. Omukpata gba aní-e adyudyo lio de aní, u atsia ayi aní me u nde ne uo kpi o kpi me: «Musuno, pa nga pi ya, engú mu de ngapa e bhomu-o améne lie nadho? Ehe inde asúno nago ka mu-o ne ní? Ehe inde asúno la di me sokpí-e akolo ne ní?» <sup>4</sup> Yesu agie pi uo me: «'E-e! Yi lila liyi me kpála bini apite yi de. <sup>5</sup> Padhá de, anga okpála bhelé agó ne 'li ma. U adú abhi 'kpa o pí mbulu o me o ne Masiya , u tsia píte okpála bhelé naali. <sup>6</sup> Yi adjé tolo egú ne ngali 'ngú na egú. 'E-e! Yi adjé tsalu de, anga a ayo me ndu 'ngú bhomu-o hana mene lie. Engú bini, a nga bhomu-o sokpí-e de. <sup>7</sup> Padhá de, anga okpála na kuti bini ahá 'gú pi okpála na kuti koko, li ngámá na kuti bini há 'gú pi ngámá na kuti koko. Adyindi adú li obili ngangá, li adjigidjo dyiki doto li obili ngangá. <sup>8</sup> Ndu 'ngú bhomu-o adú maka likabhu inde adúdu kala nazu ka olo.»

<sup>9</sup> Abhomu-o, ndu okpála hana ayála yi ka 'li ma, u apú yi me u mene yi sisiti. U tsia bhili yi. <sup>10</sup> Li okpála bhelé bhú ká yi 'ó ká nabhuka gba o. U apú ngbángá o sunda o, u tsia yála di lio sunda o. <sup>11</sup> Opolofeta na eu azé bhibhiti naali, u tsia píte di okpála bhelé. <sup>12</sup> Siti 'ngú abé ndu e naali, li mukunda gba okpála bhelé tsia bí zini. <sup>13</sup> La-a, kpála bhende alú kpekpeke bhú nabhuka nakolo makolo ali soso-o, kpála ango-o tsia kókho. <sup>14</sup> U akpókpo Bádha NgaliNau na abhúlá inde-e píla doto libhому, amba ndu opiga hana mbila 'ngú tété ndjindji. Pipita-a, li sokpí-e tsia kólo.»

*Okpála azú likabhu naali kala*

sokpí-o

(*Tsia bhú Mlk. 13:14-23; di ne bhú Luk. 21:20-24.*)

<sup>15</sup> Yesu atsia apa matá pi omukpata gba e me: «Yi aú kpála u a'i e me 'Ngbé Siti bhulu nabhelo kuti», inde li polofeta Danyeale apa nani engú gba e adu bhú tina 'ti na bubu inde bhú 'ngbé 'ti Ebhe gba omaYuda-o. A ayo me kpála inde atánga engú nani li Danyeale aye e bhomu-o kò mbolimboli ndjindji!†  
<sup>16</sup> Abhomu-o, obhende abháka o abhú Yudaya-a, a ayo me u kpe apí oeta. <sup>17</sup> Kpála bhende abháka e kilidjo-o, a ayo de me aní djidji matá lie ngú nanu nabha oehe inde abhú 'ti gba e de. <sup>18</sup> Kpála bhende abháka e abhiye-e, a ayo de me aní gie matá lie asidi ngú naha koti gba e de. <sup>19</sup> A ko la mangua likabhu dho pi olisi inde adú ne ebhi di ne obhende adú a'o 'ka bhú 'bhè ongisi li 'kpí angó-o!

<sup>20</sup> Yi yo Ebhe me ekpí nakpe ka yi-e adú bhú nedhinga na zini di ne li 'kpí naguo gba omaYuda-a de. <sup>21</sup> Padhá de, anga a adú 'ngbé likabhu na ngbéngbé, inde li okpála u nga e de, nayie maka li Ebhe abho nani kokpí ne doto lie, nakolo pi mbia inde. Okpála ú la matá di galikpe ngua likabhu angó-o belegu de bini. <sup>22</sup> Ebhe amene me oekpí angó-o adú ngengele de. I dú me Ebhe gbételè oekpí angó-o de-e, kpála bini de kóbho de. La-a, aní agbételè oekpí angó-o kabula okpála bhende aní alo o-o. <sup>23</sup> Li nedhinga bhomu-o, li kpála bini pa pi yi me: 'Yi tsitsia nga, Masiya si-i', i dú di-e me: 'Ani abhe-e', yi abhúka ani de. <sup>24</sup> Padhá de, anga omasiya na eu di ne opolofeta na eu azé bhelé. U améne ongú na ngbengbengbe

di ongú na ngangamba ngubula napite okpála. Li angu uo kólo makolo-o, u de píte belegu okpála inde li Ebhe alo o ko. <sup>25</sup> Kaka-a, ma apa engú angó-o pi yi kalanu.

<sup>26</sup> A moko, i dú me u nde apa pi yi me: 'Yi tsitsia nga, Masiya abhú mili bili-e', yi anú oo de. U pa di pi yi-e me: 'Yi tsitsia, aní awo lie ki', yi abhúka de. <sup>27</sup> Padhá de, anga maka li ekpí andjendjengene lie nayie andjongu nakolo akati-e, nago ka ma Ndili gba kpála-a adú bhadi moko. Ndu okpála hana au ne djila o. <sup>28</sup> A viti bini maka bili li kuo 'he nde lie me okpála nde mbila de-e, okpála ambila ka odhu inde azuzu kuo apékèbhè bhadi bhúla o lie dede-o.»

*Yesu akpokpo lele nago ka e-o*

(*Tsia bhú Mlk. 13:24-27; di ne bhú Luk. 21:25-28.*)

<sup>29</sup> Yesu atsia apa matá me: «Pita likabhu na oekpí bhomu-o, ma 'li ma me-e,

biti abúku bhúla ela libhomu,  
epe sú matá-a de,

oikupala abála kuto,

li oangu na abhúlá tsia dyáki  
má djigi djigi!†

<sup>30</sup> Abhomu-o, ehe bini inde asúno me ngama Ndili gba kpála ma ngago-o akóto abhúlá. Ndu okpála hana píla doto libhomu adú bhú 'gbá. U tsia ú ma, ngama Ndili gba kpála me ma nde ngago pí ndindi abhúlá, ma nde abedhe ne angu la di ne sangu bedhe. <sup>31</sup> U adjé gili toti na kpekpeke nga. Ngama, Ndili gba kpála-a, ma tsia tíma oandjelu gba ma me u nu po bhúla okpála bhende li Ebhe alo o ne ndu 'dje doto badha hana, nayie li pápa bini, akólo makolo li pápa koko.»

† 24:15 24:15 Tsia bhú Dan. 9:27, 11:31, 12:11. bhú Edj. 32:7; di ne bhú Dj. 2:10.

† 24:29 24:29 Tsia bhú Isa. 13:10, 34:4; ne

*Kpála bini mbíla nedhinga nago ka Ndíli gba kpála-a de*

*(Tsia bhú Mlk. 13:28-31; di ne bhú Luk. 21:29-33.)*

<sup>32</sup> Yesu akpokpo matá gbitaku koko me: «Nago ka ma, Ndíli gba kpála-a, adú maka engú inde asuno lie pí yi lí ndula na figi-o . Yi kè mbolimboli ndjindji. Padhá de, anga nedhinga lí 'ndji 'ndji aholo asú lie, lí okpákpá holo nakè-o, yi mbíla me gbokokpí akolo masikpe. <sup>33</sup> Kaka-a, nedhinga yi aú ndú ongú inde ma akpokpo e pí yi bhomú-o lie hana-a, yi mbíla ndjindji me nago ka ma, Ndíli gba kpála akolo masikpe, me ma bha íbili lí obhè bhoti gba yi-o. <sup>34</sup> Ma apa pí yi na paká me, ndú 'ngú inde ma akpokpo e pí yi píndji nago ka ma, Ndíli gba kpála-a akódho 'kpí me okpála na naki inde-e nde mu nga ndú o hana de. <sup>35</sup> Kokpí ne doto akódho 'kpí makódho, engú bini, 'lí ma kódho 'kpí belegu de bini.

<sup>36</sup> La-a, kpála bini mbíla ekpí di ne nedhinga nago ka ma Ndíli gba kpála-a de, abana bha oandjelu inde abhúlá, u mbíla de, abana bha ma Ndíli-o, ma mbíla de. Kpála bini mbíla de, ambíla bha bini ne 'Dyi ma kpi e kpi. <sup>37</sup> Maka engú inde akódho nani 'kpí bhú nedhinga gba Nua-a, nago ka ma Ndíli gba kpála adú bhadi moko. <sup>38</sup> Padhá de, anga bhú nedhinga bhomú-o, kala me engu-o si na eu eu-o, okpála adú mugíto me engú ade. U adú nazú 'he, u atsia adú di nandji pandi. Obhosi ne olisi adú naha lío, u atsia adú di amba ongísi gba o na olisilisi bhú kava, akolo lí 'kpí inde lí Nua ali lie bhú 'ngbé zabú-o. <sup>39</sup> 'To uo dú 'to 'ngú bini de, akolo lí nedhinga inde lí engu asi lie, a atsia abha ndú uo hana má kpekèbhè! Nago ka ma, Ndíli gba kpála-a adú bhadi moko.

<sup>40</sup> Abhomú-o, i bhaka okpála bhisi abhiye-e, oandjelu gba Ebhe-e ahá bini, u tsia 'ó ká bhe koko-o. <sup>41</sup> I bhaka olisi bhisi ngatu mapunga-a, oandjelu gba Ebhe-e ahá bini, u tsia 'ó ká bhe koko-o. <sup>42</sup> Yi lila liyi ndjindji, anga yi mbíla ekpí inde lí Ngámá gba yi-e agó lie de. <sup>43</sup> A ayo me yi mbíla ndjindji me, i dú me bhulú 'ti-e mbíla nedhinga inde lí bhulú 'zi agó lie sukpe uu-o, ani de dú bha bini lí zaku. Ani de 'ó de me bhulú 'zi gumú eti gba ni-e de. <sup>44</sup> Kaka-a, ngayi di-e, yi dú bedhe, anga nedhinga yi nde lie bhú 'lí 'to-o, a la bhomú-o nedhinga inde lí ngama Ndíli gba kpála ma agó lie-o.»

*Kpála na kulu inde ngbingbili inde di na imbilangu*

*(Tsia bhú Luk. 12:41-48.)*

<sup>45</sup> Yesu atsia apa matá me: «Kpála na kulu inde ngbingbili inde di na imbilangu-o ngae dho? Yi tsitsia nga, a ko ngua kpála na kulu inde lí ngámá gba e a'o e pí 'ndji okpála na eti gba e me ani dú naha ezú pí uo lí nedhinga ayo lie-o. <sup>46</sup> A ko djali pí kpála na kulu bhomú i dú me ngámá gba ani-e nde ago, ani bhaka me ani nde ngamemene mo-o. <sup>47</sup> Ma apa pí yi na paká me, ngámá a'ó ani pí 'ndji ndú 'he gba e hana. <sup>48</sup> Engú bini, i dú me a nde kpála na kulu na sisiti-e, ani pá lí bua e me: «Ha-a, ngámá gba ma nga bha ngabhue.» <sup>49</sup> Abhomú-o, ani hóló nabhi obi e koko na kulu-o, ani hóló nazú 'he, ani hóló nandji pandi ne omulangba. <sup>50</sup> Lí ngámá gba kpála na kulu ango-o go lí 'kpí ani djeke ani lie de, di lí nedhinga inde ani mbíla e de-e, <sup>51</sup> ani 'é ani bhú kulu, ani tsia méne ani kpekpeke maka lí Ebhe améne galikpe obhulú kali lie lí bíli ani abú uo lie-o. Oo-o, u adú

aku 'gbá, u tsia dú di nazụ tate e-o.»

## 25

*Gbitaku pindji otsalisi ndjikpa na k̄va*

<sup>1</sup> Abhomụ-o, Yesu apa matá me: «Ekpí lí ngama Ndílí gba kpála ma agó lie, engú inde akódho 'kpí bhú Nụ na abhúlá adú maka gbitaku inde: a adụ nani otsalisi ndjikpa inde aha otala gba o ngú nanụ nakə lío ne bhoko inde adụ akúnda naha ełe. <sup>2</sup> Bhú ká uo, obhe bhuluvue adụ ongingi, obhe bhuluvue koko adụ obhulú imbilangụ. <sup>3</sup> Otsalisi bhe na ngingi-e aha otala gba o-o, la-a, 'to uo a'ílí lí naha otsupa 'mụ koko dede. <sup>4</sup> Engú bini, obhe na imbilangụ-o aha otala gba o bhú dabilí bini ne otsupa 'mụ koko dede. <sup>5</sup> Lí bhoko-o go lie má gala de-e, ela aholo ndụ uo hana, u atsia atuko ne ela.

<sup>6</sup> Tutu sukpe-e, tolo 'ue akoto: «Bhoko-o ki-e! Yi ze ngú nakə líyi ne uo.» <sup>7</sup> Abhomụ-o, ndụ otsalisi-e hana azukụ. U atsia aholo naleke otala gba o-o. <sup>8</sup> Otsalisi bhe na ngingi-e apa pí obhende na imbilangụ-o me: «Yi ha mbo té emụ gba yi-e pí ya, anga otala gba ya-a ngabulụ.» <sup>9</sup> Obhe na imbilangụ-o agie pí uo me: «A mo-o ade, anga bhe ka ya-a bhelé da nale lí lele ní ne yi ade. Yi nụ bhaka mangbo okpála í ngatsitsindji, amba yi kala pí yi ka uo.» <sup>10</sup> Obhe na ngingi-e anụ nakala emụ-o. Engú bini, nedhinga u adụ anụ lie nakakalaa, bhoko-o akolo. Otsalisi bhuluvue inde adụ bedhe ali ne aní bhú 'tí na anokomiá-o. U atsia adula bhoti-o. <sup>11</sup> A abhue bedi, otsalisi bhe koko akolo. U atsia aholo nasusula me: «Ngámá, ngámá, bhulu bhoti-e pí ya!» <sup>12</sup> Engú bini, bhoko-o agie pí uo me: «Ma apa pí yi na paká me, ma mbila yi de.»»

<sup>13</sup> Yesu atsia abu tata-a me: «Yi lila líyi, anga yi mbila ekpí lí ngama Ndílí gba kpála ma agó lie de, yi mbila la di nedhinga ango-o de.»

*Gbitaku pindji okpála na kulu bata*

*(Tsia bhú Luk. 19:11-27.)*

<sup>14</sup> Yesu apa matá me: «Ekpí lí ngama Ndílí gba kpála ma agó lie, engú inde akódho 'kpí bhú Nụ na abhúlá adú maka gbitaku inde: a adụ nani bhoko bini inde adụ akúnda nanụ dhukụ. Kala nanụ ka aní-e, aní a'í okpála na kulu gba e-o. Aní atsia a'o tia gba e sakpa uo. <sup>15</sup> Aní aha pí bhe bini-e lí falanga kámá bhuluvue. Aní aha pí bhe koko lí falanga kámá bhisi. Aní atsia aha pí bhe koko lí falanga kámá bini. Aní aha pí kpála ne kpála lí lele angu gba e. Pipita-a, aní atsia atapa. <sup>16</sup> Kpála na kulu bhe asia kámá bhuluvue-e, anụ kolo nabe ndụndụ. Aní atsia asia di lí falanga koko pépé kámá bhuluvue. <sup>17</sup> Bhende asia kámá bhisi-e amene bhadi moko. Aní atsia asia di lí falanga koko pépé kámá bhisi. <sup>18</sup> Engú bini, bhende asia kámá bini-e anụ bha naae nadji edú bhú doto. Aní atsia awo tia gba ngámá gba e bhúbhú.

<sup>19</sup> Pipita abhue naali, ngámá na kulu gba okpála bhomụ-o ago. Aní atsia aholo nagama 'ngú ne uo pindji lele maka u amene kulu ne tia gba ni-e lie-o. <sup>20</sup> Bhe asia nako lí falanga kámá bhuluvue adyudyo lie. Aní agbe lí falanga kámá bhuluvue koko-o ne napa me: «Ngámá, mo oha nako mụma lí falanga kámá bhuluvue. A inde-e lí falanga kámá bhuluvue koko inde ma asia e pépé ko.» <sup>21</sup> Do ngámá gba aní pí aní me: «So! Mụ ne bádha kpála na kulu, mụ la di ngbingbili. Mo omene nako ngbili 'ngú bhú ongú inde djedjedje, ma a'ó ibili mụ me mụ dụ atsia 'kpí

lí onǵú na ngbengbengbe. Go kpi djali bhú dabili bini ne ma.»

<sup>22</sup> Kpála na kulu bhende asia nako lí falanga kámá bhisi-e adyudyo di lie. Aní pí ngámá-a me: «Ngámá, mo oha nako muma lí falanga kámá bhisi. A inde-e lí falanga kámá bhisi koko inde ma asia e pépé ko.» <sup>23</sup> Do ngámá gba aní pí aní me: «So! Mú ne bádha kpála na kulu. Mú la di ngbingbili. Mo omene nako ngbili 'ngú bhú onǵú inde djedjedje, ma a'ó ibili mú me mú dú atsia 'kpí lí onǵú na ngbengbengbe. Go kpi djali bhú dabili bini ne ma.»

<sup>24</sup> Lí soso-o, kpála bhende asia nako lí falanga kámá bini-e ago di. Aní pí ngámá-a me: «Ngámá, ma adú nako ambila ndjindji me mú ne kpála na gúgú. Mú ngaha 'zú lí bíli inde mú lu 'zú lí e de. Mú ngazú 'he lí kulu inde lí okpála koko andala lie ngao. <sup>25</sup> Ma adje tsulu mú. Mú atsia anú awo tia gba mú-o bhú doto. A la bhadi íi. Tia gba mú-o kí.» <sup>26</sup> Engú bini, ngámá gba aní agie pí aní me: «Mú ne siti kpála na kulu! Mú di ne bhulú ipio! Ka ní mo odú nako ambila lie ndjindji me ma ngaha 'zú lí bíli inde ma alu 'zú lie de, me ma ngazú 'he lí kulu inde lí okpála koko andala lie ngao, <sup>27</sup> mú tsia 'o nako tia gba ma-a bhú baki de ka ní, amba ma agó lie, ma de bhaka me a nde abe ndú e abe-e?»

<sup>28</sup> Yaka! Yí gbulú lí falanga kámá bini bhomu-o ka aní, amba yí ha pí kpála inde ka e kutu bini ko.» <sup>29</sup> Ngámá bhomu-o apa mo-o, anga kpála inde ka e ne ehe, u ahá matá koko pí aní pépé. Aní tsia dú bhú mundayi. Engú bini, kpála lí ehe nde ka e belegu ade bini-e, u agbulú belegu dhegu bhende í tí da nadu ka aní-o. <sup>30</sup> Ngámá-a atsia abu 'so 'ngú gba siti kpála na kulu bhomu-o ne napa me, u bhike aní bhú bití akilidjo lí bíli

inde lí okpála nde lie bhú 'gbá di ne nazú táte o-o.»

*Yesu akpokpo lele maka ani akódho 'ngú gba okpála lie-o*

<sup>31</sup> Yesu atsia apa matá me: «Ekpí lí ngama Ndili gba kpála ma agó lie bhú sangu gba ma bhú dabili bini ne oandjelu hana-a, ma adú pí kiti na ngámá gba ma na sangu-o. <sup>32</sup> Ndú okpála na píla doto hana apó bhúla o kala ma. Ma tsia gbógbo bhusu uo maka lí mulila agbogbo bhusu okandele lie ne omeme-o. <sup>33</sup> Ma a'ó okandele lí pá 'kpa ma na kokpa, ma tsia ó omeme-e lí pá 'kpa ma na gali.

<sup>34</sup> Abhomu-o, ma tsia pá pí obhende adú lí pá 'kpa ma na kokpa-a me: «Yí gógo, ngayi okpála asia bisagu ka 'Dyí ma-o. Yí go sia ngámá inde lí aní aleke nani e pí yí nayie lí nedhinga aní abho kokpí ne doto lie ko. <sup>35</sup> Padhá de, anga ma adje gumu, yí atsia aha ezú muma. Ma adú adje gumu 'ngu, yí atsia aha engu nandji mandji muma. Ma adú ne gomago, yí atsia asia ma agba yí. <sup>36</sup> Ma adú ndumbu, yí atsia ato bongo lí ma. A adú lí ma ne kuo, yí atsia ateteke ma. Ma adú bhú tikpu, yí atsia ago natsia ma.»

<sup>37</sup> Abhomu-o, obhende amene mukunda gba Ebhe-e tsia yí ma me: «Ngámá, ya au mú ne gumu nadho, ya atsia aha 'zú pí mú-o? Ya au mú ne gumu 'ngu nadho, ya atsia aha engu nandji mandji pí mú-o? <sup>38</sup> Ya au mú me mú nde ne gomago nadho, ya atsia asia mú agba ya-a? Ya au mú ndumbu nadho, ya atsia ato bongo lí mú-o? <sup>39</sup> Ya au mú ne kuo, í dú di-e me mú nde bhú tikpu nadho, ya atsia anú ateteke mú-o?» <sup>40</sup> Ma tsia gie pí uo me: «Ma apa pí yí na paká me, ndú nedhinga hana inde yí amene bádha 'ngú lie pí suka ondaise ma inde lí okpála ngau o

padhá inde-e, yi amene bhomu-o muma.)

<sup>41</sup> Abhomu-o, ma tsia pá di pi obhende adú li pá 'kpa ma na gali-e me: «Yi yie sí yiyie, yi gbida de ma tsutsu, ngayi okpála li Ebhe atá pèdjò lio-o! Yi nù bhú djua na dáduma inde li Ebhe aleke nani e pi djabulu ne omaha e-o!» <sup>42</sup> Padhá de, anga ma adu adje gumu, yi tsia ha 'zu muma de. Ma adu adje gumu 'ngu, yi tsia ha engu nandji mandji muma de. <sup>43</sup> Ma adu ne gomago, yi tsia sia ma agba yi de. Ma adu ndumbu, yi tsia to bongo li ma de. Ma adu ne kuo di ne bhú tikpu, yi tsia go nateteke ma de.»

<sup>44</sup> Abhomu-o, u tsia yí di ma me: «Ngámá, ya au mu nadho me mu nde ne gumu, i du di-e gumu 'ngu-o? Ya au mu nadho me mu nde ne gomago, mu nde ndumbu, i du di-e me mu nde ne kuo, i du di-e me mu nde bhú tikpu-o, ya tsia nu teteke mu di-e?» <sup>45</sup> Ma tsia gie pi uo me: «Ma apa pi yi na paká me, ndu nedhinga hana yi mene bádha 'ngú lie pi saka ondaise ma inde li okpála ngau o padhá inde-e de-e, yi mbila me yi aneke di namemene bhomu-o muma.» <sup>46</sup> Abhomu-o, obhende i mene mukunda gba Ebhe-e de-e, gbida nazu likabhu na dáduma. Engú bini, obhende amene mukunda gba Ebhe-e, tsia gbida naao bhú mukobho na dáduma.»

## 26

*Ongámási gba omaYuda agili kpadji ngú nabhòlo Yesu*

(*Tsia bhú Mlk. 14:1-2; ne bhú Luk. 22:1-2; di ne bhú Dja. 11:45-53.*)

<sup>1</sup> Li Yesu andjia nakpo ongu bhomu-o lie hana-a, ani atsia apa pi omukpata gba e me: <sup>2</sup> «Yi mbila hana me pita 'kpí bhisí-e, adú anokomia na Pasika . Li 'kpí

ango-o, u apú ma Ndili gba kpála ngubula me u gi ma li kulusi.»

<sup>3</sup> Yesu adu akpo 'ngú bhomu-o pi omukpata gba e lie, abhaka me ongbengbe odimandò ne obhelesi okpála gba omaYuda nde apo bhúla o agba bhele kpála gba odimandò , u a'i e me Kaifa.

<sup>4</sup> U atsia aziba lio ngubula naholo Yesu bhú pepe, amba o bhòlo ani.

<sup>5</sup> Engú bini, u adu apa me: «A ayo de me ní holo ani bhú nedhinga na anokomia de, anga li okpála gbe tolo.»

*Òlò bini atuko mungotsi pí 'ndji Yesu*

(*Tsia bhú Mlk. 14:3-9; di ne bhú Dja. 12:1-8.*)

<sup>6</sup> Ekpí bini, Yesu ne omukpata gba e adu bhú kuti na Betania, abhú 'ti gba Simo nani li kába amene e-o. <sup>7</sup> Nedhinga u adu azu 'he lie, òlò bini ago de ani ne gili inde u abho e li alabatele.\* Gili ango-o adu me a nde abedhe ne mungotsi na kpéke mase bedhe. Ani atsia atuko mungotsi ango-o pí 'ndji Yesu. <sup>8</sup> Li omukpata gba ani-e au lie mo-o, u ake 'ngú lio, u atsia apa me: «Ta nasiti mungotsi inde-e padhá me-e ne ní? <sup>9</sup> U ti igini da natsitsindji bhú kpéke mase, u tsia há tia ango-o pi obhulu ndibhili.» <sup>10</sup> Li Yesu ambila engú u adu apa e lie, ani atsia apa pi uo me: «Yi ngato mbolo li òlò inde-e ka ní? Engú

inde ani amene e li pabili gba ma-a, a ko bádha 'ngú. <sup>11</sup> Padhá de, anga obhulu ndibhili-e, yi adú ne uo ndu nedhinga hana. Engú bini, ngama-a, ní dú ne yi ndu 'kpí hana de. <sup>12</sup> Ani atuko mungotsi inde li kute ma, ngubula naleleke ngú ekpí inde u azí ma lie ko.

<sup>13</sup> Ma apa pi yi na paká me, píla doto libhomu, ndu bili hana inde

\* 26:7 26:7 Alabatele: A ko teme na mase naali inde u abhobho oehe maka gili lie ko.

u akpókpo Bádha Ngali gba Ebhe-e lie, u akpókpo di engú inde li ọlọ inde-e amene e ngú nabhundja ani.»

*Yuda adje lie ne ongámási gba omaYuda ngú napu*  
Yesu pi uo

(Tsia bhú Mlk. 14:10-11; di ne bhú Luk. 22:3-6.)

<sup>14</sup> Abhomu-o, suka omukpata ndjikpa ne ká bhisi anu nabhaka ongbengbe odimandọ. A adu 'li mukpata ango-o me Yuda Isikaliete. <sup>15</sup> Ani atsia apa pi uo me: «Yi akunda naha mama ni, amba ma pu Yesu pi yi-e?» Abhomu-o, u adje lio ne uo li mase-o. Ongbengbe odimandọ atanga lí falanga ndjikpa bata,† u atsia aha pi ani. <sup>16</sup> Nayie bhú nedhinga bhomu-o, Yuda adu nagili nedhinga na ndjindji ngubula napu Yesu pi uo me u bhele ani.

*Yesu atima omukpata gba e naleke da anokomia na Pasika*

(Tsia bhú Mlk. 14:12-21; ne bhú Luk. 22:7-14, 21-23; di ne bhú Dja. 13:21-30.)

<sup>17</sup> Li 'kpí na kalanu na anokomia nazu mapa inde li levile nde bhú e ade-e, omukpata gba Yesu ago nayi ani me: «Mo okunda me ya leke dá Pasika pi mu su?» <sup>18</sup> Yesu agie pi uo me: «Yi nu abhú gudhu, agba kpála bini me, amba yi pa pi ani me: «Musuno apa me, nedhinga gba ni-e akolo masikpe. Ngani ne omukpata gba ni-e, o ozú anokomia agba mu.»» <sup>19</sup> Omukpata amene maka Yesu apa lie pi uo-o. Abhomu-o, u atsia anu aleke da anokomia-o.

*Yesu apa me suka omukpata gba ni bini apú ni*

<sup>20</sup> Li akolo lie tagolo-o, Yesu ne omukpata gba e ndjikpa

ne ká bhisi-e aholo nazu 'he. <sup>21</sup> Nedhinga uo adu azu 'he lie, do Yesu de-e: «Ma apa pi yi na paká me, suka yi bini apú ma.»

<sup>22</sup> Omukpata-a asia likabhu naali. Abhomu-o, kpála ne kpála aholo nayi ani me: «Ngámá, a adú bha ndju ma?» <sup>23</sup> Ani agie pi uo me: «Kpála inde ya ngato 'kpa ya ne e bhú saani bini-e, kpála ango-o apú ma ngae. <sup>24</sup> Ngama Ndili gba kpála, ma adji akpí maka u aye 'ngú gba ma lie-o. Engú bini, a ko likabhu pi kpála inde ngapu ma-o! A nani pi kpála ango-o ndjindji me u azú ani de!» <sup>25</sup> Abhomu-o, Yuda, kpála inde apú ani atsia ayi me: «Musuno, a adú bha ndju ma?» Yesu atsia agie pi ani me: «Mo opa ngamu!»

*Yesu agapa mapa ne vino li omukpata gba e*

*ndjikpa ne ká bhisi-o*

(Tsia bhú Mlk. 14:22-26; ne bhú Luk. 22:14-20; di ne bhú 1 Kol. 11:23-25.)

<sup>26</sup> Nedhinga u adu azu 'he lie, Yesu aha mapa-o. Ani agie heni pi Ebhe, ani agumu bhusu bhusu, ani atsia aha pi omukpata gba e ne napa me: «Yi zuzu, a inde-e kute ma.» <sup>27</sup> Pipita-a, ani aha kópo na vino-o, ani agie heni pi Ebhe, ani atsia aha pi uo ne napa me: «Yi ndji ndu yi hana, <sup>28</sup> anga a inde-e ngute ma. A ko ngute inde ngasuno me Ebhe akodho gandja ne okpála-o. Ngute ango-o atuko ngú na'e osisiti 'ngú gba okpála bhelé. <sup>29</sup> Ma apa pi yi me: Nayie pi mbia inde-e, ma ndji matá vino belegu de bini, akólo li 'kpí inde ma andji lie ne toto bhú dabili bini ne yi bhú Nau gba 'Dyi ma-o.» <sup>30</sup> Pipita-a, u ali etsi na anokomia-o. U aze, u atsia agbida apí eta na ondula na Olive.

† 26:15 26:15 Lí falanga ndjikpa bata: A ko nani tia bhelé de, ati di nani da nakala bali bini de. Tsia bhú Eki. 21:32, di ne bhú Djkl. 11:12.



*Yesu apa me Piele apá me ni mbíla ni de*

(*Tsia bhú Mlk. 14:27-31; ne bhú Luk. 22:31-34; di ne bhú Dja. 13:36-38.*)

<sup>31</sup> Abhomu-o, Yesu atsia apa pi omukpata gba e me: «Sukpe na naki inde-e, ndu yi hana a'ó ká ma. Padhá de, anga Ebhe apa bhú Bhuku gba e me:

«Ma abhélø mülila gba okandølo-o,

li okandølo-o tsám-bala ne bili ngangá.†»

<sup>32</sup> Engú bini, ngama-a, ekpi ma azúku lie, ma anú adjeke yi abhú Galilaya.» <sup>33</sup> Piele atsia apa pi ani me: «Abana li ndu okpála hana 'o ká mu-o, ngama-a, ma 'ó ká mu belegu de bini.» <sup>34</sup> Abhomu-o, Yesu atsia agie pi ani me: «Ma apa pi mu na paká me, sukpe na naki inde-e, kala me engu ku 'gbá-a, mo opá bhútsibhútsi bata me ni mbíla ma de.» <sup>35</sup> Piele atsia apa matá pi ani me: «Abana i du bha me a nde ayo me ni kpi bhú dabili bini ne mu-o, ma 'ó ká mu de.» Abhomu-o, ndu omukpata koko hana atsia apa bhadi moko.

*Yesu ayo Ebhe bhú Getesemani*

(*Tsia bhú Mlk. 14:32-42; di ne bhú Luk. 22:39-46.*)

<sup>36</sup> Abhomu-o, Yesu akolo ne omukpata gba e li bili bini inde u a'i e me Getesemani. Ani atsia apa pi uo me: «Yi dudu si nedhinga ma adjí lie nayo Ebhe aoo ko.»

<sup>37</sup> Ani aha Piele ne ongisi bhisi gba Djebedayo-o. Ani anu ne uo bhú dabili bini. Tsulu aholo ani, likabhu atsia abedhe di li bua ani bedhe. <sup>38</sup> Abhomu-o, ani atsia apa pi uo me: «Bua ma abedhe ne likabhu bedhe ka ma adjí akpi lie-o. Yi dudu si, yi du la di ne ma li zuku bhú dabili bini.»

<sup>39</sup> Pipita-a, ani adyudyo mbo lie tsutsu bedi. Ani atutu lipuku e kuto, ani atu bhúla e pí doto, ani

atsia ayo Ebhe me: «'Dyi ma, i du ndjindji-e, mu de dyudyo likabhu inde-e de ma tsutsu! Engú la bini, mo oméne maka ma akunda lie de, mene mangbo maka mo okunda lie ko!» <sup>40</sup> Ani agie lie li bili li omukpata bata adu lie-o. Ani abhaka me u nde atuko ne 'la má dhululu! Do ani pi Piele de-e: «Yi ti igini da nudu li zuku ngabha ne ma ngubula saa bini di? <sup>41</sup> Yi du li zuku, yi yo Ebhe, amba yi alí bhú nale de. Bua kpála bedhe ndu 'kpi hana ngu namene bádha 'ngú, engú bini, kute ani bhúbhuku.»

<sup>42</sup> Matá bhútsibhútsi na bhisi-e, ani adyudyo lie de omukpata bata-a tsutsu. Ani atsia ayo Ebhe me: «'Dyi ma, i du me likabhu inde-e nde ti da naneke ma de-e, a nde ayo bha me a kolo li ma-a, a ayo me engú mo okunda e mene lie ngae!» <sup>43</sup> Abhomu-o, Yesu agie matá lie li bili li omukpata-a adu lie-o. Ani abhaka me u nde tila. Padhá de, anga djila uo adu me a nde ne ela má yikpokpo! <sup>44</sup> Ani a'o ká uo, ani adyudyo matá lie de uo tsutsu. Ani atsia ayo Ebhe bhútsibhútsi na bata ne napa bha oeli bini bhomu-o.

<sup>45</sup> Abhomu-o, ani ago abhaka omukpata gba e bata-o, ani atsia apa pi uo me: «A ndjindji! Yi la nga lala, amba yi guo! La-a, nedhinga akolo, nedhinga inde u apú ma, Ndili gba kpála lie pi osisiti okpála-o. <sup>46</sup> Yi tsitsia nga, kpála inde apú ma akolo. Yi yie bhúlá, ní nu bhaka uo!»

*U aholo Yesu*

(*Tsia bhú Mlk. 14:43-50; ne bhú Luk. 22:47-53; di ne bhú Dja. 18:3-12.*)

<sup>47</sup> Bha li nedhinga li Yesu adu agama 'ngú lie, me-e, Yuda, saka omukpata ndjikpa ne ká bhisi-e akolo. Ani ago nani ne bhiti

† 26:31 26:31 Tsia bhú Djkl. 13:7.

okpála inde adu sa 'kpa o ne ombotia di ne ondula. A atima nani uo ne ongbengbe odimandø di ne obhelesi okpála gba omaYuda. <sup>48</sup> Yuda adje nani lie ne uo kalanu me: «Kpála inde ma akáma e, a ko ani. Yi holo ani!» <sup>49</sup> Me-e, ani adyudyo lie de Yesu, ani atsia ayi ani me: «Musunu, mu oo!» Ani atsia akama ani. <sup>50</sup> Yesu atsia apa pi ani me: «Olia ma, engú inde mo ogo namene e, memene!» Abhomu-o, okpála koko inde ago bhú dabili bini ne Yuda-a, adyudyo lio de Yesu, u abu 'kpa o li ani, u atsia aholo ani.

<sup>51</sup> Kolo me-e, suka okpála inde adu bhú dabili bini ne Yesu-o agbe mbotia gba e, ani asu kpála na kulu gba bhele kpála gba odimandø-o ne nakodho 'dje ani má tse! <sup>52</sup> Yesu atsia apa pi ani me: «Gie mbotia gba mu-o bhú 'ti e. Padhá de, anga ndu okpála hana inde ngagu 'gú ne mbotia-a, amú bhadi li mbotia. <sup>53</sup> Mu mbila de me ma ti igini da nayo ka 'Dyi ma me ani go teteke ma-a di? Ma yo ka ani-e, ani kolo tíma libi oandjelu mama nane ndjikpa ne ká bhisi mane. <sup>54</sup> I du la mo-o, engú inde u aye e bhú Bhuku gba Ebhe-e améne lie lele pi? Padhá de, anga Bhuku gba Ebhe-e apa me, a ayo me engú inde ngamene lie inde-e, amene lie moko.»

<sup>55</sup> Abhomu-o, Yesu atsia apa pi kambi okpála bhomu-o me: «Ndu 'kpi hana ma adu nako nadu bhú 'ngbé 'ti Ebhe gba omaYuda ngu nasuno. La-a, yi holo nako ma de. Ka ni yi ngago lie ngu ma ne ombotia di ne ondula sa 'kpa yi mugito me ma ne siti bhulu 'zi-e? <sup>56</sup> Engú bini, ndu 'ngu bhomu-o hana amene lie ngubula me engú inde li opolofeta aye e amene lie.» Abhomu-o, ndu omukpata hana atsambala de ani má mæ, u atsia agbida!

*U anu ne Yesu kala Libi okpála natsia 'kpi li 'ngú gba omaYuda*

*(Tsia bhú Mlk. 14:53-65; ne bhú Luk. 22:54-55, 63-71; di ne bhú Dja. 18:13-14, 19-24.)*

<sup>57</sup> Abhomu-o, okpála inde u atima nani o ngu naholo Yesu-o anu ne ani kala Kaifa, bhele kpála gba odimandø-o, li bili inde li omusunu na líli gba Moidje ne obhelesi okpála apøkøbhø bhúla o lie-o. <sup>58</sup> Piele atsia adu naae nakpata Yesu mbo tsutsu, nakolo makolo bhú mbadhasu gba bhele kpála gba odimandø-o. Ani ali bhú mbadhasu-o, ani atsia adu kuto bhú ká okpála na kulu ngubula natsia me engú ango-o abú 'ta e lele pi-ie.

<sup>59</sup> Abhomu-o, ongbengbe odimandø bhú dabili bini ne ndu okpála koko na Libi okpála natsia 'kpi li 'ngú gba omaYuda libhomu adu agili kpála inde agó napa 'ngú li Yesu sisiti, abana i du eu, amba o kodho 'ngú gba ani-e me ani kpi bha makpi. <sup>60</sup> Engú bini, belegu li bhiti okpála adu apa 'ngú li Yesu lie ne eu-o, u kpála bini de inde apa engú inde u ti da nabhøle ani ka e. Li soso-o, okpála bhisi adyudyo lio masikpe. <sup>61</sup> U atsia apa me: «Bhoko inde-e apa nako me, ni ti da nabhøle 'ngbé 'ti Ebhe gba omaYuda-o, ni tsia yiki matá ne toto sunda ekpi bata.»

<sup>62</sup> Abhomu-o, 'ngbé dimandø-o ayie bhúlá, ani atsia ayi Yesu me: «Mu gie 'ngú li 'ngú inde li okpála inde-e ngapa e li kute mu-o belegu de bini?» <sup>63</sup> Engú bini, Yesu andjili bha má bulu! Abhomu-o, bhele kpála gba odimandø-o atsia ayi matá ani me: «Ma ngayi mu ne 'li Ebhe inde mu-o me pa nga pi ya: ngamu-o, mu ne Masiya, Ndili gba Ebhe-e?» <sup>64</sup> Yesu agie pi ani me: «Mo opa ngamu. Mbila la me, nayie pi mbia inde-e, yi aú Ndili

gba kpála adu li pápá na kokpa gba Angbamili me ani nde ngago pí ndindi na abhúla.†»

<sup>65</sup> Engú bhomu-o ake li bua bhele kpála gba odimandø-o naali. Abhomu-o, ani asidha bongo li e má tsue! Ani atsia apa me: «Ani asobho Ebhe, anga kpála-kuti ti da nakpo 'ndji e ne Ebhe de! Ní matá ne gamu okpála koko ngú nakpokpo 'ngú gba ani-e ade! Yi adje sobho ani asobho Ebhe ne e ne 'dje yi makpe. <sup>66</sup> Yi abhundja naayi me ní mene ngú ani pi?» U agie me: «A ayo me u bhøø ani mabhøø.» <sup>67</sup> Abhomu-o, u aholo akuku ngusu bhúla ani, u adu asu ani, u atsia adu di abhi bhúla ani. <sup>68</sup> U atsia adu apa pi ani me: «Í du me mu nde bha ndju ne Masiya na paká-a, pa nga pi ya me asu mu da?»

*Piele apa me ni mbila Yesu de*  
(Tsia bhú Mlk. 14:66-72; ne bhú Luk. 22:56-62; di ne bhú Dja. 18:15-18, 25-27.)

<sup>69</sup> Nedhinga u adu ato mbolo li Yesu lie, abhaka me Piele nde adu kilidjo tu mbadhasu gba bhele kpála gba odimandø-o. Kpála bini na kulu na øøø adyudyo lie de ani. Ani atsia apa pi ani me: «Ngamu di-e, mo odu nako bhú dabili bini ne Yesu, kpála na Galilaya-o.» <sup>70</sup> Engú bini, Piele ayala kala ndu okpála hana me: «Ma mbila engú inde mu ngakunda napa e de.» <sup>71</sup> Abhomu-o, Piele adyudyo lie de 'bhø aga-o. Kpála na kulu koko bini na øøø au ani. Ani atsia apa pi okpála inde adu oo me: «Kpála inde-e adu nako bhú dabili bini ne Yesu, kpála na Nadjaleta-o.» <sup>72</sup> Piele ayala matá, ani atsia apa me: «Ne 'li Ebhe, ma mbila kpála inde yi ngapa 'ngú gba e bhomu-o de!»

<sup>73</sup> Pipita kolo me-e, okpála inde adu oo adyudyo lio, u atsia apa pi Piele me: «A ko kukulu 'ngú. Ngamu di-e, mu bha ne suka uo, anga nagama 'ngú gba mu-o ngambamba ta mu ngae.» <sup>74</sup> Abhomu-o, Piele aholo natu siliika ne nasima me: «Ne 'li Ebhe, ma mbila kpála bhomu-o de!» Bha li nedhinga bhomu-o, engu atsia aku 'gbá. <sup>75</sup> Abhomu-o, Piele abhundja eli inde li Yesu apa igini e pi ani me: «Kala me engu ku 'gbá-a, mo opá bhutsibhutsi bata me ni mbila ma de.» Ani akoto kilidjo, ani atsia abhøø kuo e ne egbá má kusu!

## 27

*U anu ne Yesu kala Pilate*  
(Tsia bhú Mlk. 15:1; ne bhú Luk. 23:1-2; di ne bhú Dja. 18:28-32.)

<sup>1</sup> Kèkpí má bhø, ndu ongbengbe odimandø hana di ne obhelesi okpála gba omaYuda adje lio me o méne lele pi me o bhøø Yesu-o. <sup>2</sup> U agbigbite ani, u anu ne ani, u atsia aha ani pi guvelenele Pilate.

*Yuda agi ngulu e*  
(Tsia bhú Kul. 1:18-19.)

<sup>3</sup> Abhomu-o, Yuda, kpála inde apu Yesu-o au lie me u akodho 'ngú gba ani-e me ani kpi bha makpi-e, ani adje likabhu li bua e naali. Ani atsia anu nagie lí falanga ndjikpa bata-a pi ongbengbe odimandø di ne obhelesi okpála. <sup>4</sup> Do ani pi uo de-e: «Ma amene siti 'ngú, anga ma apu kpála inde i tu 'ngú de-e pi yi me u bhøø ani!» Engú bini, u agie pi ani me: «Naaya bhúbhú ne ni? A ko naamu 'ngú!» <sup>5</sup> Abhomu-o, Yuda abala lí falanga kuto bhú 'ngbé 'ti Ebhe gba omaYuda ne nakoto bini. Ani atsia anu nagí

† 26:64 26:64 Tsia bhú Ets. 110:1; di ne bhú Dan. 7:13.

ngulɔ e. <sup>6</sup> Ongbengbe odimandɔ-o aha tia-o. U atsia apa me: «Líli gba ní-e ziba de me ní 'o tia inde- bhú ká tia na 'ngbé 'ti Ebhe gba omaYuda-a de, anga a ko tia inde u asia e li ngute kpála.» <sup>7</sup> Pita u adje lio lie, u atsia akala ne tia bhomu-o edyi gba kpála bini inde apopo lusa ngubula me u du azi ogomago bhúbhú. <sup>8</sup> Kaka-a, u nga 'i 'li edyi ango-o nakolo pi naki me: «Edyi inde u akala e ne tia na ngute kpála.» <sup>9</sup> Abhomu-o, engú nani li polofeta Djelemi apa e atsia amene lie. Aní apa nani me: «U aha lí falanga ndjikpa bata-o.

A bhomu-o mase inde li omafsalaele ato e li ani-o. †  
<sup>10</sup> U atsia akala ne di edyi gba bhulu napo lusa.

A bhomu-o engú inde li Ebhe Ngámá aha nani

líli muma me ma pa e pi uo-o.»

*U akodho 'ngú gba Yesu-o me ani kpi bha makpi*

*(Tsia bhú Mlk. 15:2-5; ne bhú Luk. 23:3-5; di ne bhú Dja. 18:33-38.)*

<sup>11</sup> Nedhinga u akolo ne Yesu lie kala guvelenele Pilatɔ-o, ani ayi ani me: «Ngamu-o, mu ne 'ngbé ngámá gba omaYuda-a?» Yesu agie me: «Mo opa ngamu.» <sup>12</sup> Abhomu-o, ongbengbe odimandɔ di ne obhelesi okpála gba omaYuda adu apa 'ngú li ani sisiti. La-a, ani gie 'ngú tété de. <sup>13</sup> Pilatɔ atsia ayi ani me: «Mu dje engú inde u ngapa e li kute mu bhomu-o di?» <sup>14</sup> Engú bini, Yesu gie engú bini pi ani tété de. Abhomu-o, Pilatɔ atsia angamba naali.

<sup>15</sup> Bhú ndu Pasika hana, guvelenele du nani natse 'kpa li bhulu 'kpú bini, bhende li bhiti okpála adu akunda me ani tse 'kpa lie-o. <sup>16</sup> A abhaka me 'ngbé bhulu 'kpú bini inde adu 'li e me Balabasi

nde bhú tikpa. <sup>17</sup> Pilatɔ atsia ayi bhiti okpála inde apo bhúla o me: «Yi akunda me ma tse 'kpa li da pi yi-e? Ne me ma tse 'kpa li Yesu Balabasi, ne me ma tse 'kpa li Yesu inde u a'i e me Masiya-a?» <sup>18</sup> Pilatɔ yi mo-o padhá de. Aní ayi mo-o, anga ani adu ambila ndjindji me u apu Yesu pi ni anga u adu adje siti bua li ani.

<sup>19</sup> Nedhinga li Pilatɔ adu lie pí kiti nakodho 'ngú-o, wala ani atima kpála bini pi ani ne tobhila me: «Mo olí bhú 'ngú gba ngbili kpála bhomu-o de, anga sukpe na naki inde-e, ma aloto siti loto li 'ngú gba ani-o.»

<sup>20</sup> Ongbengbe odimandɔ, di ne obhelesi okpála gba omaYuda ato bhú 'ndji bhiti okpála me u yo ka Pilatɔ me ani tse 'kpa li Balabasi, amba ani ka kpadji me u bhole Yesu. Okpála atsia amene bhadi moko. <sup>21</sup> Pilatɔ atsia apa pi uo me: «Ma atsé 'kpa li bhulu 'kpú bini pi yi matse. Bhú ká Yesu ne Balabasi-e, yi akunda me ma tse 'kpa li da pi yi-e?» U agie me: «Balabasi!» <sup>22</sup> Pilatɔ ayi uo me: «Ma mene la ngú Yesu inde u a'i e me Masiya pi?» Do uo de-e: «Gi ani li kulusi!» <sup>23</sup> Pilatɔ atsia ayi uo me: «Ani amene la mangua siti 'ngú dho?» Engú bini, u atsia adu asusula matá kpekpeke me: «Gi ani li kulusi!» <sup>24</sup> Lí Pilatɔ au lie me angu ni kolo de-e, di ne me tolo ngakolo kpekpeke-e, ani aha engu, ani atsia avulu 'kpa e kala bhiti okpála ne napa me: «Ngama-a, má bhú ta nakpi gba kpála inde-e ade! A ko naayi 'ngú.» <sup>25</sup> Ndu okpála hana agie me: «A ayo me ngute ani tuko pí 'ndji ya ne ongisi gba ya-o!» <sup>26</sup> Abhomu-o, ani atse 'kpa li Balabasi pi uo. Aní aha líli me u bhi Yesu ne fimbo. Aní atsia aha ani pi uo me u gi ani li kulusi.

† 27:9 27:9 Tsia bhú Djkl. 11:12-13.

*Osudha amu Yesu*  
(*Tsia bhú Mlk. 15:16-20; di ne bhú Dja. 19:2-3.*)

<sup>27</sup> Abhomu-o, osudha gba guvelenele anu ne Yesu bhú mbadhasu gba o denngo 'ti gba guvelenele-o. Ndu osudha hana atsia apo bhúla o de ani. <sup>28</sup> U agbe bongo li ani, u atsia ato koti na mbembe li ani mugito me a ko ngamá. <sup>29</sup> U agala 'he na kilikili li kute ya ndula na eti, u atsia ato bhú 'ndji ani. U ato mbamba sa 'kpa ani na kokpa, u atsia atutu lipuku o kuto kala ani. U adu amu ani ne napa me: «'Ngbé ngamá gba omaYuda, mu oo!» <sup>30</sup> U adu aku ngusu li ani, u aha mbamba-a, u atsia adu asu 'ndji ani ne di. <sup>31</sup> U andjia namu ani lie, u agbe koti u de ato e li ani-o, u atsia ato matá bongo gba ani-e li ani. Pipita-a, u atsia anu ne ani ngu nagi ani li kulusi.

*Osudha agi Yesu li kulusi*  
(*Tsia bhú Mlk. 15:21-32; ne bhú Luk. 23:26-43; di ne bhú Dja. 19:17-27.*)

<sup>32</sup> Osudha akoto ne Yesu bhú gudhu-o. U adu akoto lie, u aké lio ne kpála bini na kuti na Silene, adu 'li ani me Simo. Osudha aholo ani ne kpeke me ani bi kulusi gba Yesu-o. <sup>33</sup> Li u akolo lie li bili inde u a'i e me Gologota-a, inde akunda napa me «Bili na pelege 'ndji-e», <sup>34</sup> osudha aha vino inde u amata e ne 'he na susu-o pi ani. Ani ale lie, ani tsia kunda nandjindji de.

<sup>35</sup> Osudha-a agi Yesu li kulusi. Pita u agi ani lie li kulusi-e, u agu gbanda ngu obongo gba ani-o. U atsia agbogbo bhusu o tété.† <sup>36</sup> Pipita-a, u atsia adulu kuto oo ngu nalila ani. <sup>37</sup> U a'o nani abhúla pi 'ndji ani balua inde asuno ta nagi ani li kulusi-o. U aye nani balua ango-o me: «A INDE-E YESU, 'NGBÉ NGÁMÁ GBA OMA YUDA-O.» <sup>38</sup> U atsia agi osisiti obhulu

'zi bhisi li okulusi de ani: bini li kulusi gba e li pá 'kpa ani na kokpa, koko li kulusi gba e li pá 'kpa ani na gali.

<sup>39</sup> Okpála inde adu akodho 'kpi-e, adu asobho Yesu ne nako 'ndji o. <sup>40</sup> U adu apa pi ani me: «Ngamu, bhulu nagugamu 'ngbé 'ti Ebhe gba omaYuda ne nayiyiki bhú 'kpi bata-a, kobho limu ngamu makpe! I du me mu nde ne ndili gba Ebhe-e, ké li kulusi-e kuto.»

<sup>41</sup> Ongbengbe odimandé, omusuno na líli gba Moidje bhú dabili bini ne obhelesi okpála, adu bhadi amu ani moko. U adu apa me: <sup>42</sup> «Ani akobho okpála koko. Ka ni ani ti da nakobho lie lie ngae makpe di-e, ngaani inde 'ngbé ngámá gba omafalaale-e? Ani ké nga kuto li kulusi mbia inde, amba ya bhuka ani! <sup>43</sup> Ani a'o nabhuka gba e bhú Ebhe. A ayo me Ebhe kobho ani mbia inde, i du me Ebhe nde akunda ani na paká-o, anga ani apa me ni ne Ndili gba Ebhe!» <sup>44</sup> Abana osisiti obhulu 'zi inde u agi o li kulusi lingo Yesu-o, u adu bhadi asobho ani moko.

*Yesu andala 'kpa li bua e*  
(*Tsia bhú Mlk. 15:33-41; ne bhú Luk. 23:44-49; di ne bhú Dja. 19:28-30.*)

<sup>45</sup> Abhomu-o, nayie tulukpe akolo bhú saa na bata pita tulukpe-e, biti agba pála doto lib-homu. <sup>46</sup> Bhú saa na bata pita tulukpe-e, Yesu asula kpekpeke me: «Eli, Eli, lema sabakatani?» A akunda napa me: «Ebhe gba ma, Ebhe gba ma, mo o'o ka ma ka ni?»† <sup>47</sup> Bini bini bhú ká okpála inde adu oo adje ani lie, u atsia adu apa me: «Ani nga'i Eliya!» <sup>48</sup> Ma 'li ma-e, suka osudha-a agu holo. Ani anu aha epondje, ani ato bhú kpongadha pandi. Ani atsia ato li 'ndji mbamba, ani aha

pi Yesu me ani ndjindji. <sup>49</sup> Engú bini, okoko apa pi ani me: «Djed-jeke, ní u nga ne me Eliya ngago nakobho ani!»

<sup>50</sup> Yesu atsia asula matá kpekpeke, ani atsia andala 'kpa li bua e. <sup>51</sup> Me-e, 'ngbé 'kpá bongo inde adu abuku 'bhø tina 'ti na bubu bhú 'ngbé 'ti Ebhe gba omaYuda-a asidha bhusu e bhisi má tsue nayie abhúlá, akolo akuto. Doto adiyiki, ongbengbe teme atsia aupa. <sup>52</sup> Abhomu-o, olata-a ada bhusu o, bhiti omabhuka inde amu nani-e atsia azuku. <sup>53</sup> U aze bhú olata gba o-o. Pita li Yesu azuku lie, u atsia agbida bhú Yelusalema, gudhu na bubu-o. Okpála bhelé atsia au uo.

<sup>54</sup> Ngámá gba osudha na Loma bhú dabili ne osudha gba e inde adu alila Yesu nedhinga ani adu lie li kulusi-e au engú inde akodho 'kpí ne nadyiki ka doto-o. Abhomu-o, u adje tsulu naali. U atsia apa me: «Kpála inde-e bha ndju nako ne Ndili gba Ebhe na paká!» <sup>55</sup> Olisi bhelé adu li bili bhomu-o. U adu atsia 'ngú bhomu-o mbo tsutsu. Olisi ango-o ayie nani ne Yesu bhú Galilaya, nakolo makolo bhú Yelusalema ngú nateteke ani. <sup>56</sup> Bhú ká uo, a adu nani Malia, kpála na gudhu na Magadala, Malia 'hi Djaki ne Djodjefu, a la di-e 'hi ongisí gba Djebedayo-o.

### *Djodjefu azi Yesu*

(Tsia bhú Mlk. 15:42-47; ne bhú Luk. 23:50-56; di ne bhú Dja. 19:38-42.)

<sup>57</sup> A akolo lie tagolo-o, bhulu tia bini ago. A adu kpála na gudhu na Alimatayo. A adu 'li ani me Djodjefu. Kpála ango-o du di nani mukpata gba Yesu. <sup>58</sup> Ani anu abhaka guvelenele Pilatø, ani atsia ayo kuo Yesu ka ani. Pilatø atsia aha líli me u ha pi ani haha. <sup>59</sup> Abhomu-o, Djodjefu aha kuo Yesu, ani agagala ne daladeli na

mbia inde ani akala e bhú kpéke mase. <sup>60</sup> Ani anu ato bhú lata na mbia inde ani aleke nani e pi e makpe bhú teme-o. Pipita-a, ani awawala 'ngbé teme bini li bhøbhø ngú nanini, ani atsia at-apa. <sup>61</sup> Nedhinga bhomu-o, Malia, kpála na gudhu na Magadala ne Malia bhe koko adulu kuto bhúla lata-o.

### *U abu osudha ngú nalila lata Yesu*

<sup>62</sup> Li ekpí aseke lie, a akunda napa me bhú ekpí naguo gba omaYuda-a, ongbengbe odimandø di ne omuFalisaí anu bhú dabili bini agba Pilatø. <sup>63</sup> U atsia apa pi ani me: «Ngámá, 'ndji ya ago mbia inde-e li engú li bhulu eu bhomu-o apa nako e nedhinga ani adu lie u-o me pita 'kpí bata ni zuku-o. <sup>64</sup> Kaka-a, a ayo me ha líli me u lila lata ani nakolo bhú 'kpí na bata. Padhá de, anga i du mo-o de, omakpata gba ani-e ti da nago nazi kuo ani. U tsia pá pi okpála me ani azuku. Li okpála dje la ibili mo-o, eu bhende-e né la ibili da bhende ani apa nako e kalanu-o mane.» <sup>65</sup> Pilatø atsia apa pi uo me: «Yi ha osudha-a haha. Yi nu ne uo, amba u lila lata-a maka yi au lie ndjindji-o.» <sup>66</sup> U atsia anu naleke lele nalila lata-o. U ayele bhøbhø ne teme, u atsia a'o osudha ngú nalilila.

## 28

*Yesu azuku*  
(Tsia bhú Mlk. 16:1-10; ne bhú Luk. 24:1-12; di ne bhú Dja. 20:1-10.)

<sup>1</sup> Pita ekpí naguo gba omaYuda-a, bhú 'kpí yinga kèkpí má bhø-o, Malia, kpála na gudhu na Magadala ne Malia koko-o, agbida ngú natsia lata-o. <sup>2</sup> Me-e, doto adiyiki ne adjigidjo na ngbéngbé, anga andjelu bini gba Ngámá-a ayie abhúlá, ani ago awawala teme inde adu li 'bhø lata-o, ani

atsia adu pépé. <sup>3</sup> Kute ani adu asu má ngbí ngbí ngbí! La di-e, bongo gba ani-e avu má tuu! <sup>4</sup> Li osudha inde adu alila lata-a au lie mo-o, u aholo naguku ka tsulu má kpi kpi kpi, u atsia abala kuto mugito me a ko okpála inde amu.

<sup>5</sup> Engú bini, andjelu-o apa pi olisi-e me: «Yi akpé-e de, anga ma ambila me yi ngagili Yesu inde u agi nako e li kulusi-o. <sup>6</sup> Ani sii ade. Ani azuku maka ani apa nako lie-o. Yi go tsia bili inde u aseke nako ani lie-o. <sup>7</sup> Yi nu pa kolo pi omakpata gba ani-e má gala me, ani azuku. Ani adji kala yi bhú Galilaya bhomu. Yi aú ani oo. A bhomu-o ngali ma de ago napa e pi yi-o.» <sup>8</sup> Abhomu-o, olisi-e ayie bha kolo bhú lata-a má gala me u nde abedhe ne tsulu di ne djali bedhe. U anu ne holo, u atsia anu ngu napa ngali ango-o pi omakpata gba Yesu-o. <sup>9</sup> Ma 'li ma me-e, Yesu ago aké lie ne olisi ango-o. Ani atsia ayi uo me: «Yi oo!» Abhomu-o, u adyudyo lio de ani, u atuko kuto bhú li 'dhu ani, u atsia adhögé ani. <sup>10</sup> Pipita-a, Yesu atsia apa pi uo me: «Yi akpé-e de. Yi nu pa pi ondaise ma me u nu abhú Galilaya, u aú ma oo ko.»

*Ongámási gba omaYuda ato kali me u bubuku engú nazuku gba Yesu-o*

<sup>11</sup> Li olisi-e adu nga bha lie li kpadji-e, okpála koko bhú ká osudha inde adu nalila lata-a anu abhú gudhu. U atsia akpokpo ndu 'ngú hana inde akodho 'kpi abhú lata-a pi ongbengbe odimandé gba Ebhe-o. <sup>12</sup> Abhomu-o, ongbengbe odimandé apo bhúla o ne obhelesi okpála gba omaYuda-o, u atsia adje lio me o méne pi-ic. Pita nadje lie ka uo-o, u aha tia bhelé pi osudha-a me u apá kukulu 'ngú inde akodho 'kpi-e de. <sup>13</sup> U atsia apa pi uo me: «I du me kpála bini nde ayi yi-e, yi

de pa me: «Nedhinga ya adu lie tila-a, omakpata gba ani-e ago, u atsia azi kuo ani li ya.» <sup>14</sup> La di-e, i du me guvelenele nde adje-e, ya ambila lele ya akpókpo pi ani lie ngaya, amba yi asia mangimbo de.» <sup>15</sup> Osudha abha tia-o, u atsia amene bha maka u apa lie pi uo-o. Abhomu-o, ngali ango-o ayangba bha sunda omaYuda moko nakolo pi naki.

*Eli na soso gba Yesu pi omakpata gba e-o*

*(Tsia bhú Mlk. 16:14-18; ne bhú Luk. 24:36-49; ne bhú Dja. 20:19-23; di ne bhú Kul. 1:6-8.)*

<sup>16</sup> Abhomu-o, omakpata ndjikpa ne ká bini-e anu bhú Galilaya, pí eta inde li Yesu apana nani e pi uo me ni aké lini ne uo pí e-o. <sup>17</sup> U akolo lie oo, Yesu akoto li uo. U au ani lie, u atuko kuto bhú li 'dhu ani, u atsia adhögé ani. Engú bini, okoko bhú ká uo adu ne bua na bhisi bhisi. <sup>18</sup> Abhomu-o, Yesu adyudyo lie de uo, ani atsia apa pi uo me: «Ebhe aha ndu angu na abhúlá ne bhe na píla doto hana muma. <sup>19</sup> Kaka-a, yi nu bhú ndu opiga hana. Yi mene me u kolo omakpata gba ma. Yi batisa uo ne 'li 'Dyi ní, ne 'li Ndili, la di ne 'li Bu Bhobua. <sup>20</sup> Yi suno pi uo me u lila ndu líli inde ma aha e pi yi-e hana. Yi mbila la me ngama-a, ní ne yi bhú dabili bini ndu 'kpi hana akólo bha bini makolo ali sokpi.»

**Bádha Ngali  
gba Yesu Kilisito maka  
li  
Maloko  
aye lie ko  
Eli na kalanu**

Bádha Ngali maka li Maloko aye lie-e, akpo lita e ne naziba me Bádha Ngali ango-o a ko na Yesu Kilisito , Ndili gba Ebhe. Aní asuno Yesu maka kpála na kulu di na angu. Angu gba aní ngau lie bhú nasuno gba aní, ne bhú angu gba aní pi si siti bua di ne bhú nambu li osisiti 'ngú gba okpála. Yesu ngakpokpo 'ngú gba e makpe maka Ndili gba kpála inde ago ngú naha mukobho gba e ngubula nagbegbe okpála bhú sisiti 'ngú gba o-o.

Maloko akpokpo 'ngú gba Yesu-o mbámá, aní agama 'ngú naali píndji kulu li Yesu amene e ane bhende li Yesu akpokpo e di ne bhende aní asuno e-o. La-a, li omukpata gba Yesu adu la lie abhue ne aní bhú dabili bini-e, u atsia ambila aní ndjindji. Engú bini, obhulu yala gba aní adu matá akolo pi aní ne siti bua naali.

Olukuluku (9-20) inde u a aye e sunda oehe bhisi me-e, ngau lie me aye ne kpála koko. Maloko ye ngae de.

**Ongbengbe ongú inde bhú bhuku inde-e ngae inde:**

Lita Bádha Ngali-o 1:1-13

Kulu li Yesu amene e bhú ká okpála abhú Galilaya 1:14 - 9:50

Dhuku gba Yesu nayie bhú Galilaya ngú nanu abhú Yelusalema 10:1-52

Oekpí nasoso gba Yesu abhú Yelusalema 11:1 - 15:47

Nazuku gba Yesu 16:1-8

Nakoto ka Yesu li okpála, ne na'u ka aní abhú 16:9-20

*Djaa bhulu nabatisa okpála aleke kpadji pi Ngámá Yesu (Tsia bhú Mat. 3:1-12; ne bhú Luk. 3:1-18; di ne bhú Dja. 1:19-28.)*

<sup>1</sup> A inde-e lita Bádha Ngali gba Yesu Kilisito , Ndili gba Ebhe-o. <sup>2</sup> Maka li polofeta Isaya aye lie bhú bhuku gba e me:

«Ebhe apa me: Djedje nga! Ma atíma bhulu titima gba ma a pi mu kalanu ngubula naleke kpadji pi mu.

<sup>3</sup> Kpála ango-o ngatotobhila abhú mili bili me:  
«Yi leke kpadji pi Ngámá!

Yi lili odjedje kpadji pi aní má ngbuu ngbuu!†»

<sup>4</sup> Kaka-a, Djaa bhulu nabatisa okpála akoto nani abhú mili bili. Aní adu a'i okpála me u go sia batisimo ngú nasuno me u adjí bua o adjí, amba Ebhe 'e siti 'ngú gba uo-o. <sup>5</sup> Abhomu-o, ndu okpála hana na ndu doto na Yudaya, di ne ndu okpála hana na gudhu na Yelusalema adu ago abhaka aní. U adu ambamba ta osisiti 'ngú gba o-o kala ndu okpála hana. Djaa atsia adu abatisa uo bhú ngade 'ngu na Djuludani. <sup>6</sup> Djaa adu adyi bongo inde u adu e li su enu u a'i e me «samo.» Aní adu agbite ludu e ne ekrú na kó 'nu. Aní adu azu omakindolo di ne nadha 'mu eú. <sup>7</sup> Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekrú na maleke gba aní-o. <sup>8</sup> Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

† 1:3 1:2-3 Tsia bhú Mal. 3:1; di ne bhú Isa. 40:3.



*Djaa abatisa Yesu*

*(Tsia bhú Mat. 3:13; di ne bhú Luk. 3:21-22.)*

<sup>9</sup> Bhú okpí bhomu-o, Yesu ayie bhú Nadjaleta, gũdhu bini na ndu doto na Galilaya, Djaa atsia abatisa ani bhú ngade 'ngu na Djuludani. <sup>10</sup> Nedhinga li Yesu adu akoto lie bhú 'ngu-o, ani au kokpí ngada bhusu e. Ani atsia au di Bu Bhobua ngaké pí e maka bebhe. <sup>11</sup> Abhomu-o, eli bini akoto abhúlá, atsia apa me: «Mú ne Ndili gba ma inde ma kũnda e naali, má ne kpúkpú na bua ma.»

*Satana ale Yesu*

*(Tsia bhú Mat. 4:11; di ne bhú Luk. 4:1-13.)*

<sup>12</sup> Pipita kolo me-e, Bu Bhobua atsia aamba bhúla Yesu abhú mili bili. <sup>13</sup> Ani adu oo ngubula ekpí ndjikpa badha me Satana nde ngale ani. Yesu adu nadu li bili li onu na bili adudu li e-o. Oandjelu atsia adu nateteke ani.

*Yesu a'i omukpata na gigena*

*(Tsia bhú Mat. 4:12-22; di ne bhú Luk. 4:14-15, 5:1-11.)*

<sup>14</sup> Ekpí bini, pita li Elode Atipasi aholo Djaa lie, ani atsia ato ani bhú tikpu-o, Yesu anu bhú ndu doto na Galilaya. Ani adu akpokpo Bádha Ngali gba Ebhe\* pí okpála. Ani adu apa me: <sup>15</sup> «Nedhinga nani li Ebhe a'o e akolo. Nau gba ani-e akolo di masikpe. Yi dji bua yi, yi bhuka Bádha Ngali gba Ebhe-o.»

<sup>16</sup> Li ani adu akpangba ngo 'kpe na Galilaya lie, ani au Simo ne ndai e Andili me u nde ngabhike nado bhúbhú. Padhá de, anga u du nani obhulu nagbe sungu. <sup>17</sup> Yesu atsia apa pí uo me: «Yi kpata ma, ma adjí ibili yi obhulu nagili okpála pí Ebhe.» <sup>18</sup> Kolo me-e, u a'o ka onado gba o-o, u atsia akpata ani.

<sup>19</sup> Pipita-a, Yesu adyudyo mbo lie ne kalanu masudha, ani au ongisi gba Djebedayo: Djaki ne ndai e Djaa . U adu me u nde bhú zabu gba o, u nde ngaleke onado gba o-o. <sup>20</sup> Abhomu-o, ani a'i uo. Má gala kolo me-e, u a'o ka 'dyi o, Djebedayo bhú zabu bhú dabili bini ne okpála na kulu-o. U atsia akpata ani.

*Yesu akobho kpála bini inde li siti bua adu nadu bhú e*  
*(Tsia bhú Luk. 4:31-37.)*

<sup>21</sup> Abhomu-o, Yesu ne omukpata gba e akolo bhú kuti na Kapalanauma. A akolo lie bhú 'kpí nago gba omaYuda-a , Yesu ali bhú 'ti nadje líli gba Moidje , ani atsia aholo nasuno. <sup>22</sup> Okpála inde adu nadje ani-e, adu nangamba naali li nasuno gba ani-o. Padhá de, anga ani du asuno maka omusuno na líli gba Moidje de. Engú bini, ani adu asuno ne angu. <sup>23</sup> A abhaka me bhú 'ti nadje líli oo, kpála bini inde li siti bua adu bhú e nde oo. Abhomu-o, kpála angu-o asula me: <sup>24</sup> «Yesu, kpála na Nadjaleta, mo okũnda namene ngú ya pí? Mo ogo ngú nandjia angu ya? Ma mbila hana me má ne da-ie. Mú ne Kpála na Bubu inde li Ebhe atima e ko!»

<sup>25</sup> Engú bini, Yesu ambe bhú 'ndji siti bua angu-o me: «Gbite 'bhe má, aamba má koto la di bhú kpála angu-o makoto!»

<sup>26</sup> Abhomu-o, siti bua adyiki kpála bhomu-o má djigi djigi! Ani atu 'ue, ani atsia akoto bhú ani. <sup>27</sup> Ndu okpála hana angamba naali. Kaka-a, u aholo nayi lio sũnda o me: «A inde-e mangua 'ngú dho? Nasuno na mbia inde-e abedhe ne angu! Kpála inde-e ngaha belegu líli pí osisiti bua, u la bhadi ngamemene!» <sup>28</sup> Abhomu-o, ngali gba Yesu-o ayangba bha

\* 1:14 1:14 Bhú obhuku koko-o mo obháka me u nde aye me «Bádha Ngali Nau gba Ebhe .»  
Tsia bhú Mlk. 6:17.

kolo bhú ndu doto na Galilaya libhomu.

*Yesu akobho okpála bhelé na kuo*  
(*Tsia bhú Mat. 8:14-17; di ne bhú Luk. 4:38-41.*)

<sup>29</sup> Yesu akoto lie bhú 'ti nadje líli-e me-e, u atsia anu ne Djaki di ne Djaá bhú 'ti gba Simo ne Andili.

<sup>30</sup> A abhaka me 'hi wala Simo nde asi kuto, ka anga adu li ani ne kuo, kute ani adu kpákpá. Abhomu-o, u atsia apa kolo engú gba ani-e pi Yesu. <sup>31</sup> Ani dyudyo lie de ani. Ani aha 'kpa ani, ani a'e ani bhúlá. Kuo ayie li ani, ani atsia aholo nalá 'zu pi uo.

<sup>32</sup> A akolo lie tagolo pita nati ka ela-a, okpála aholo nago ne obhulu kuo di ne obhende adu ne osisiti bua bhú o pi Yesu.

<sup>33</sup> Okpála na gudhu libhomu adu apo bhúla o li 'bhé bhoti-o.

<sup>34</sup> Abhomu-o, Yesu akobho okpála bhelé inde adu ne okuo ngangá. Ani atsia apandja di obua na sisiti bhelé inde adu nadu bhú okpála-o. Ani ha la di nedhinga pi osisiti bua ang-o ngú nagama 'ngú belegu de bini. Padhá de, anga a adu me u nde ngambila ani hana.

*Yesu akpokpo Ngali gba Ebhe-e bhú Galilaya*

(*Tsia bhú Luk. 4:42-44.*)

<sup>35</sup> Bhú sikikpi-e, me biti nde ani nga bha má gbu-o, Yesu ayie bhúlá, ani akoto. Ani atsia atapa abhú mili bili. Oo, ani aholo nayo Ebhe. <sup>36</sup> Abhomu-o, Simo ne okpála bhende u adu ne o-o, aholo nagili ani. <sup>37</sup> U au ani lie, do uo pi ani me: «Ndu okpála hana ngagili mu.»

<sup>38</sup> Abhomu-o, Yesu atsia apa pi uo me: «Ní nu li obili koko, bhú okuti na ngongo, amba ma kpokpo di Ngali gba Ebhe-e oo. Padhá de, anga a bhomu-o engú inde ma ago ngú e ko.» <sup>39</sup> Abhomu-o, Yesu adholo nani bhú ndu doto na Galilaya

libhomu. Ani atsia adu akpokpo Ngali gba Ebhe-e bhú oti nadje líli na kuti gba uo-o. Ani adu di napandja osisiti bua inde adu nadu bhú okpála-o.

*Yesu akobho bhulu kába bini*  
(*Tsia bhú Mat. 8:1-4; di ne bhú Luk. 5:12-16.*)

<sup>40</sup> Bhú oekpi bhomu-o, bhulu kába bini adyudyo lie de Yesu. Ani atutu lipuku e kuto kala ani, ani atsia akikiliki lie pi ani me: «Í du me mu nde akunda-a, mu ti da nakobho ma.»

<sup>41</sup> Yesu adje ndjinga ani, ani a'o 'kpa e li kute ani. Ani atsia apa pi bhulu kába ang-o me: «Ako, ma akunda. Kokobho!»

<sup>42</sup> Ma 'li ma me-e, kába agulu li ani hana má da! Ani atsia akobho. <sup>43</sup> Kolo me-e, Yesu agie ani sidi ne nagbele 'dje ani kpekpeke. <sup>44</sup> Ani atsia apa pi ani me: «Djedje! Mo osú 'kpá li 'ngú inde-e de kpála bini belegu de má kpo! Engú bini, nu suno limu pi dimandé gba Ebhe, amba mu ha makiso gba mu-o maka li Moidje aye nani lie-o. Bbobhomu-o asuno pi okpála me mo okobho.»

<sup>45</sup> La-a, li kpála ang-o ayie lie oo, ani aholo bha ne kpokpo 'ngú bhomu-o pi ndu okpála hana li ndu bili hana inde ani adu apu li e-o. Kaka-a, Yesu ti matá nani da nasuno lie mbámbá bhú gudhu de. Engú bini, ani adu bha ibili nadu ne alingo gudhu, bhú omili bili. Okpála adu ayie ne ndu bili hana, u atsia adu ago nabhaka ani.

## 2

*Yesu akobho dukuto*  
(*Tsia bhú Mat. 9:1-8; di ne bhú Luk. 5:17-26.*)

<sup>1</sup> Pita 'kpi masudha-a, Yesu agie lie bhú Kapitalanauma. Okpála atsia adje me ani akuti. <sup>2</sup> Abhomu-o, kambi okpála ago apo bhúla o oo. Kaka-a, bili na padhá tsia du

de, belegu de ali 'bhø bhoti. Ani atsia adu akpokpo eli gba Ebhe-e pi uo. <sup>3</sup> Bhú nedhinga bhomu-o, obhosi badha ago pi ani ne dukuto bini me u nde abi ani mabi. <sup>4</sup> Engú bini, li okpála adu la lie bhelé-e, u tsia ti nani da nakolo ne ani li Yesu de. Abhomu-o, u atsia a'u ne ani api 'ngbu 'ti. U adu gudho li 'ngbu 'ti-e li lele bili inde Yesu adu lie-o. U atsia akø dukuto-o pi kalagba gba e tété. <sup>5</sup> Li Yesu au nabhuka gba uo lie, ani atsia apa pi dukuto-o me: «Ndika ma, osisiti 'ngú gba mu-o a'e lie a'e.»

<sup>6</sup> Omusuno na líli koko gba Moidje adu me u nde adulu kuto oo. U atsia adu nabhundja li bua o me: <sup>7</sup> «Kpála inde-e ngagama 'ngú mo-o ka ni? Ani ngasobho Ebhe. A ti da na'e siti 'ngú gba kpála da, bha bini Ebhe kpi e kpi di?» <sup>8</sup> Yesu atsia ambila bha kolo me u ngabhundja li bua o mo-o. Abhomu-o, ani atsia apa pi uo me: «Yi ngabhundja li bua yi mo-o ka ni?» <sup>9</sup> A ane ne bhuku ne bhedho: ne napa pi dukuto-o me «Osisiti 'ngú gba mu-o a'e lie a'e», ne napa me «Yie bhúlá, ha kalagba gba mu-o, amba mu dhuku?» <sup>10</sup> Engú bini, ma adji asuno pi yi me «Ndili gba kpála ne angu na'e osisiti 'ngú gba okpála na pála doto.» Abhomu-o, ani atsia apa pi dukuto-o me: <sup>11</sup> «Ma apa pi mu me yie bhúlá, ha kalagba gba mu-o, amba mu gie limu agba mu!» <sup>12</sup> Kolo me-e, bhoko angoo ayie bhúlá, ani aha kalagba gba e-o, ani akoto bhú ká djila ndu okpála hana, ani atsia atapa. Ndu okpála hana adu angamba. U adu adhøgø Ebhe. U atsia adu apa me: «Ya u nga ngua engú inde-e belegu de bini!»

*Yesu a'i Levi*

*(Tsia bhú Mat. 9:9-13; di ne bhú Luk. 5:27-32.)*

<sup>13</sup> Pipita-a, Yesu anu matá lingo ekpe na Galilaya. Bhiti okpála

adu ago abhaka ani, ani atsia adu asuno pi uo. <sup>14</sup> Ani adu akodho 'kpí lie, ani au Levi, ndili gba Alafayo me ani nde adu bhú 'ti inde u adu akala mandjandja bhú e-o. Yesu apa pi ani me: «Kpata ma.» Levi ayie bhúlá, ani atsia akpata ani. <sup>15</sup> Pipita-a, Yesu atsia anu nazu 'he bhú 'ti gba ani. Ondombi na mandjandja di ne okpála namene siti 'ngú bhelé adulu de Yesu ne omukpata gba e-o. Padhá de, anga ongua okpála bhomu-o bhelé adu akpata ani. <sup>16</sup> Li omusuno na líli inde adu bhú ká omuFalisai au lie me Yesu ngazu 'he ne ongua okpála bhomu-o, u atsia ayi omukpata gba ani-e me: «Ani ngazu 'he bhú dabili bini ne ondombi na mandjandja di ne okpála namene siti 'ngú ngú ni?» <sup>17</sup> Yesu adje uo napa engú bhomu-o lie, ani atsia apa pi uo me: «Okpála inde ne kuo ade-e ne gumu matia ade. Engú bini, okpála na kuo mangbo ne gumu ani ngao. Ma go ngú na'i okpála bhende apa me o ngbingbili-e de. Engú bini, ma ago mangbo ngú na'i obhende ngau lio me o ne osisiti okpála ko.»

*Yesu akpo 'ngú pindji natse 'zu ngú nayo Ebhe*

*(Tsia bhú Mat. 9:14-17; di ne bhú Luk. 5:33-39.)*

<sup>18</sup> Ekpi bini, omukpata gba Djaa bhulu nabatisa okpála di ne omuFalisai adu atse 'zu ngú nayo Ebhe. Abhomu-o, okpála ago ayi Yesu me: «Ka ní li omukpata gba mu-o tsetse ezu lie ngú nayo Ebhe de-e, obhende gba Djaa bhulu nabatisa okpála di ne obhende gba omuFalisai-e nde la ngatsetse-e?» <sup>19</sup> Yesu agie pi uo me: «Yi abhundja naayi me okpála inde ago bhú da anokomia na kava ti da natse nazu 'he me 'ko øø-o nde bhú dabili bini ne uo? 'Kpi

bini de! Nedhinga inde li 'ko òlè-o nde nga bha lie bhú dabili bini ne uo-o, u ti da natse nazú 'he de. <sup>20</sup> Engú bini, ekpí akólo makolo nedhinga inde li u a'é 'ko òlè-o lie bhú ká uo-o, ekpí ango-o, u tsia tsé nazú 'he. <sup>21</sup> Kpála bini ti da naleke bongo na didili ne pála bongo na mbia de. I dũ mo-o de-e, pála bongo bhe na mbia sídha té bhe na didili-o, li eka ango-o kólo ngebéngbé ane bhe na kalanu-o mane. <sup>22</sup> La di-e, kpála bini túko pandi na mbia bhú odidili dhudhu na kó 'nú de. I dũ mo-o de-e, pandi-e úpa bhũsũ odhudhu-o. Aní tsia néke pandi-e ne odhudhu-o hana. Engú bini, pandi na mbia ayo bha ne odhúdhú na mbia.»

*Yesu ne Ngámá pí 'ndji ekpí naguo gba omaYuda*

*(Tsia bhú Mat. 12:1-8; di ne bhú Luk. 6:1-5.)*

<sup>23</sup> Ekpí bini naguo gba omaYuda-a, Yesu ne omakpata gba e adũ akodho 'kpí bhú ngu 'zũ inde u a'i e me ngano. Omakpata gba ani-e aholo akodho 'ndji 'ndji, u atsia adũ nazuzũ. <sup>24</sup> OmũFalisai apa pí Yesu me: «Tsia nga engú u ngamene e li 'kpí naguo-o. Líli gba ní-e ziba namene kulu bhú 'kpí naguo de.» <sup>25</sup> Aní atsia gie pí uo me: «Yi tanga nga engú inde li Davidi amene nani e di? Ekpí bini, ngaani ne okpála inde adũ adhuku bhú dabili bini ne ani-e adje gumũ. <sup>26</sup> Abhomũ-o, ani ali bhú 'ti Ebhe, ani atsia azu mapa inde u a'o e pí Ebhe-o (a adũ me Abiatali nde ne bhele kpála gba odimandè li nedhinga bhomũ-o ngae). La-a, líli gba ní aziba me odimandè zuzũ bha ngao kpi o kpi. Engú bini, Davidi azũ, ani atsia aha di pí okpála inde adũ adhuku bhú dabili bini ne ani-o.» <sup>27</sup> Yesu atsia apa matá pí uo me:

«U a'o ekpí naguo pí kpála-kuti. Engú la bini, u bho kpála-kuti pí ekpí naguo de. <sup>28</sup> Kaka-a, Ndili gba kpála di ne Ngámá pí 'ndji ekpí naguo.»

### 3

*Yesu akobho bhoko bini li 'kpí naguo gba omaYuda*

*(Tsia bhú Mat. 12:9-14; di ne bhú Luk. 6:6-11.)*

<sup>1</sup> Ekpí koko, Yesu ali matá bhú 'ti nadje líli gba Moidje-o. Bhú 'ti oo, kpála bini inde li 'kpa e andia adũ oo. <sup>2</sup> OmũFalisai adũ akunda na'o 'ngú pí Yesu. Kaka-a, u aholo atsia ani ne kpéke djila, atigala ani kóbho kpála inde adũ me 'kpa e nde andia-a li 'kpí naguo. <sup>3</sup> Abhomũ-o, Yesu atsia apa pí kpála ango-o me: «Yie bhúlá, amba mũ lu si bhú ká djila ndũ okpála hana.» <sup>4</sup> Pipita-a, Yesu atsia ayi okpála inde adũ oo me: «Li 'kpí naguo gba omaYuda-a, líli gba ní-e aziba bhedho: U mene bádha 'ngú ne me u mene siti 'ngú? U kobho kpála ne me u bhòlè kpála?» Engú bini, u tsia dũ ne engú na gigie de! <sup>5</sup> Aní aholo atsia ndũ uo hana bini ne bini na gúgú. Bua ani ake, ka kpéke 'ndji gba uo-o. Abhomũ-o, ani atsia apa pí kpála li 'kpa e andia me: «Gbele 'kpa mũ.» Kpála ango-o agbele 'kpa e, 'kpa ani atsia akolo matá ndjindji. <sup>6</sup> Li omũFalisai aze lie oo, u atsia apo kolo bhúla o ne omaha Elode.\* U atsia adje lio me ogili kpadji nabhòlè Yesu.

*Kambi okpála akpata Yesu*

<sup>7</sup> Pipita-a, Yesu ne omakpata gba e agbida lingo ekpè na Galilaya. Kambi okpála atsia akpata ani. Okpála ango-o ayie nani bhú ndu doto na Galilaya ne Yudeya, <sup>8</sup> bhú gudhũ na Yelusalema,

\* 3:6 3:6 Okpála gba Elode: A ko okpála inde adũ bhú dabili bini ne Elode. Tsia bhú Mat 22:16.

bhú ndu doto na Idumé, bhú ndu doto inde ayi 'ngu na Djuludani, bhú odoto na Tile ne Sidona. Kambi okpála ang-o adje nani ngali na ongu lí Yesu adu amene e lie, u atsia ago abhaka ani. <sup>9</sup> Yesu atsia aha líli pí omukpata gba e me u 'o zabu pí ní bini masikpe, amba i du me okpála bhomu-o nde asulu ní má wakaka-a, ní de 'u bhúbhú. <sup>10</sup> Padhá de, anga ani akobho nani okpála bhelé. Kaka-a, okpála na kuo adu agbene lio me o bu 'kpa o lí ani amba o kobho. <sup>11</sup> Lí okpála inde lí osisiti bua adu ato mbolo lí o adu au aní lie, u adu ago atuko ne 'ue bhú lí 'dhu ani me: «Mu ne Ndili gba Ebhe.» <sup>12</sup> Engú bini, Yesu adu apa pí uo na gúgú me u ambamba ta ní pí okpála koko de.

*Yesu alo obhulu titima ndjikpa ne ká bhisi*

*(Tsia bhú Mat. 10:1-4; di ne bhú Luk. 6:12-16.)*

<sup>13</sup> Pipita-a, Yesu a'u apí 'ta. Ani atsia a'i obhende ani adu akunda o-o. U atsia ago abhaka ani. <sup>14</sup> Abhomu-o, bhú ká okpála ang-o, ani alo okpála ndjikpa ne ká bhisi. Ani agisila 'li uo me obhulu titima . Ani a'o uo ngubula me ni du adu ne uo bhú dabili bini, la di ngubula me ni tima uo ngu nakpokpo Ngali gba Ebhe-o. <sup>15</sup> Ani aha di pí uo angu ngu napandja osisiti bua bhú okpála. <sup>16</sup> A inde e obhe ndjikpa ne ká bhisi inde ani alo nani o-o: Simo (inde lí Yesu agisila nani 'li e me «Piele»), <sup>17</sup> Djaki ne ndai e Dja (ongisi gba Djebedayo inde lí Yesu aha nani 'ili koko pí o me «Boaneledjesi»), a akunda napa me «ongisi gba mugbálá»), <sup>18</sup> a la di-e, Andili, Filipo, Batelemi, Matié, Tuma, Djaki (ndala Alafayo), Tade, Simo (kpála nakunda doto gba e naali), <sup>19</sup> di ne Yuda Isikaliote, kpála inde apú Yesu-o.

*Okpála na piga gba Yesu abhundja me ani ati pele*

<sup>20</sup> Abhomu-o, Yesu agie matá lie lí bilí ani adu naru lí e-o, bhiti okpála atsia ago apo matá bhúla o de ani. Kaka-a, Yesu ne omukpata gba e sia belegu nedhinga ngu naru 'he de. <sup>21</sup> Lí okpála na piga gba ani adje ngali ang-o lie, u aké kpadji ngu nanu aholo ani. Padhá de, anga u adu apa me: «Yesu akolo bhulu pele!»

*Yesu agie 'ngú pí omusuno na líli gba Moidje*

*(Tsia bhú Mat. 12:22-32; di ne bhú Luk. 11:14-23, 12:10.)*

<sup>22</sup> Abhomu-o, omusuno na líli gba Moidje inde ayie nani bhú Yelusalema adu apa me: «A bhú kpála bhomu-o ne Beledjebula!» U adu di apa matá me: «A ngaha angu nato holo bhú 'dhu osisiti bua pí ani ne ngámá gba osisiti bua.» <sup>23</sup> Abhomu-o, Yesu atsia a'i omusuno bhomu-o. Ani atsia apa pí uo bhú gbitaku me: «Lele pí Satana ti da nato holo lie bhú 'dhu Satana-a? <sup>24</sup> I du me okpála gba ngámá bini nde ngagu gbele sunda o, kuti ang-o lu-u de. <sup>25</sup> I du me okpála na piga bini nde ngagu gbele sunda o, piga ang-o lu-u de. <sup>26</sup> I du me Satana nde ngagu lie ngae makpe, nau gba ani-e gbógbo bhusu e. Ani ti da nabhue de, lí 'ngú gba ani-e ndjia.

<sup>27</sup> Kpála ti da nali bhú 'ti gba kpéke bhoko bini de, ani tsia bhá ndu 'he gba ani-e me ani nde gbigbite ngaiza kpéke bhoko bhomu-o kalanu de-e de. Engú bini, ani de agbigbite ani agbigbite-e, ani tsia bhá ndu 'he gba ani-o. <sup>28</sup> Ma apa pí yi na paká me, u tí da nambu lí osisiti 'ngú gba okpála di ne osobho inde u ngasobho Ebhe ne e hana. <sup>29</sup> Engú la bini, lí kpála sobho Bu Bhobua-a , Ebhe 'é siti 'ngú gba kpála ang-o de. Padhá de, anga ani amene bhomu-o siti

'ngú na dūduma. <sup>30</sup> Yesu adu apa nani pi uo mo-o, anga u adu apa me: «A bhú ani ne siti bua.»»

*'Hi Yesu ne ondaise Yesu ngao dho*

*(Tsia bhú Mat. 12:46-50; di ne bhú Luk. 8:19-21.)*

<sup>31</sup> Pipita-a, 'hi Yesu ne ondaise ani akolo li bili ani adu asuno li e-o. U alulu akilidjo, u atsia atima kpála bini ngú na'i ani. <sup>32</sup> Kambi okpála adulu nani de ani. U atsia apa pi ani me: «Tsia nga, 'hi mu di ne ondaise mu alulu akilidjo, u ngagili mu.» <sup>33</sup> Ani atsia gie pi uo me: «'Hi ma ne ondaise ma ngao dho?» <sup>34</sup> Abhomu-o, ani atsia bhiti okpála asa dengo ani ngbalina-o. Ani atsia apa me: «Yi tsitsia nga, 'hi ma ne ondaise ma ngao inde! <sup>35</sup> Ndu kpála hana inde ngamene engú li Ebhe akunda e, kpála ang-o, a ko ndai ma na bhobhoko, a ko ndai ma na øele, a ko la di 'hi ma.»

#### 4

*Gbitaku gba bhulu nalu nguwa*  
*(Tsia bhú Mat. 13:1-9; di ne bhú Luk. 8:4-8.)*

<sup>1</sup> Li Yesu akolo lie lingo ekpe na Galilaya-a, ani aholo matá nasuno. Abhomu-o, bhiti okpála na bhighbiti ago apo bhúla o de ani. Kaka-a, ani atsia a'u bhú zabu bini, ani anu adu bhúbhú apí 'ngu. Bhiti okpála-a atsia adu naao apigo dengo 'ngu-o. <sup>2</sup> Yesu atsia adu asuno ongu pi uo bhelé bhú ogbitaku. Ani adu apa bhú nasuno gba e me: <sup>3</sup> «Yi djedje nga! Ekpi bini, kpála bini anu abhiye gba e ngú nalu 'zu. <sup>4</sup> Nedhinga ani adu alulu lie, tété abala lingo kpadji. Odhu ago, u atsia azu hana má kpøkøbhø!

<sup>5</sup> Koko atsia abala li bili na teme, doto du li bili ang-o bhelé de. Kaka-a, a atsia akø má gala, anga

doto du sasa bhelé de. <sup>6</sup> Engú bini, li ela akolo lie kpekpeke-e, ezu ang-o atsia atsulu ka ndibhili sisie-o. Abhomu-o, a atsia a'ulu. <sup>7</sup> Té koko abala li bili na oeti, oeti atsia abhele, a anguvo ezu-o. Kaka-a, a atsia li lílí de. <sup>8</sup> Lí nguwa koko atsia abala li bili na dohbo, a akø, a abhele a atsia ali lílí. Lí nguwa bini ali lílí ndjikpa bata. Koko ali lílí ndjikpa madhia. Koko ali lílí kámá bini.» <sup>9</sup> Yesu atsia abu tata me: «† du me a nde li kpála ne djedje ngú nadje 'kpí-e, ani de dje!»

*Yesu ngakpo 'ngú bhú ogbitaku ká ní?*

*(Tsia bhú Mat. 13:10-17; di ne bhú Luk. 8:9-10.)*

<sup>10</sup> Pipita-a, li Yesu atigala bha lie ne omukpata ndjikpa ne ká bhisi di ne okpála inde adu nadu de ani titi o-o, u aholo nayi ani pindji ogbitaku-o. <sup>11</sup> Ani atsia agie pi uo me: «Ngayi-e, Nau gba Ebhe ambamba ta e pi yi ambamba. La-a, pi okpála bhende kilidjo-o, ma bha ngapapa pi uo bhú ogbitaku. <sup>12</sup> A ko ngubula me engú inde bhú Bhuku gba Ebhe-e mene lie. Engú inde me:

«Abana u du atsia 'kpí-e, u ú 'kpí de,

abana u du adje 'kpí-e, u kó mbolimboli de.

Kaka-a, u dji bua o de,

Ebhe 'é di siti 'ngú gba uo-o de.†»

*Yesu ambamba ta gbitaku gba bhulu nalu nguwa*

*(Tsia bhú Mat. 13:18-23; di ne bhú Luk. 8:11-15.)*

<sup>13</sup> Pipita-a, Yesu atsia apa pi uo me: «Yi kø mboli gbitaku bhomu-o de! La mbia inde-e, yi akø mboli ndu ogbitaku koko hana lele pi?

<sup>14</sup> Bhulu nalu nguwa inde ma de apa 'ngú e ngalu eli gba Ebhe . <sup>15</sup> Okpála koko maka ngo 'hi

kpádjì lí bìlì ìndè lí elì gba Ebhe-e alu lie lí e-o. Nedhinga u adje eli-e lie, kolo ma 'li ma me-e, Satana gó, anì tsia 'é elì ìndè alu lie bhú uo-o. <sup>16</sup> Okpála koko ngasia eli-e bhú doto na ká teme. Nedhinga u ngadje eli-e lie, a bhúe de u ngasisia ne djali hana. <sup>17</sup> Engú bini, u 'o de me eli bhomu-o sí kúti e alì bua o-o de. U nga'o 'to o tété bha mbo ngú nedhinga bedi. Kaka-a, nedhinga lí okpekpeke da 'ngú ngago lie, ì dũ di-e mbolo ka 'li Ebhe-e, u nga'o ká nabhuka gba o kolo má gala! <sup>18</sup> Matá-a, okoko ngasia eli-e bhú ká oeti. A bhomu-o, obhende ì dì me ziba elì ìndè u ngadje e-o. <sup>19</sup> Engú bini, u ngabhundja naali pìndjì ongú na doto ìndè. Tiatia ngapipite uo. La di-e, ndũ ogumũ 'ngú ngangá ngalì bhú uo, ì tsia ngúvo eli-o. Kaka-a, eli-e zú nguwa de. <sup>20</sup> Ngú nabu tata-a, okoko ngasia eli-e bhú doto na dobho. U ngadje eli-o, u ngasisia, u la di ngalì lílì. Bhú okoko-o, lílì bini ngalì lílì ndjikpa bata, bhú okoko ndjikpa madhia, bhú okoko kámá bini.»

*Yesu akpokpo gbitaku na eke  
(Tsia bhú Luk. 8:16-18.)*

<sup>21</sup> Pipita-a, Yesu atsia apa pí uo me: «U dhedhedhe eke ngubula na'o'o asa luša ì dũ di-e asa mako uu? U dhedhedhe mangbo ngubula na'o'o pí misa. <sup>22</sup> Padhá de, anga ehe bini ade ìndè adádu bhú pepe, ìndè ì kóto bhú mbasu de-e ade. La di-e, ndũ 'he hana ìndè awo lie mawo ìndè lí kpála u e de-e ade. <sup>23</sup> Ì dũ me a ndè lí kpála ne djedje ngú nadjè 'kpí-e, anì de dje!»

<sup>24</sup> Yesu atsia apa pí uo me: «Yi 'o 'to yi lí 'ngú ma ngapa e ndjindjì, anga yi dje ndjindjì-e, yi kó bhadi mboli engú bhelé. <sup>25</sup> Padhá de, anga kpála ìndè ngaké mboli engú ndjindjì-e, Ebhe ambámba bhadi ta engú bhelé pí anì. Engú

bini, kpála ìndè ì kò mboli engú ndjindjì de-e, u a'é belegu mboye bhende ka anì-o.»

*Nau gba Ebhe-e maka ni?*

<sup>26</sup> Yesu atsia apa matá pí uo me: «Yi tsia nga ehe ìndè lí Nau gba Ebhe-e nde maka e ko. A maka kpála ìndè adjì abhiye ngú nalu nguwa. <sup>27</sup> Ngbikpì ne sukpe, abana anì dũ bha tila, ne me anì dũ lí zuku, lí nguwa dũ bha me a nde ngaze, a nde la di ngabhele. Anì mbila la de me a ngamene lie lele pí-ie de. <sup>28</sup> Doto ne titi e ngaké ngaiza musana. Pipita-a, ì bí 'bhi. Lí soso-o, ì bá lílì ìndè ato na paká paká. <sup>29</sup> Lí lílì mbe-e, kpála alu-o tsia kodho anga a ko nedhinga na'e nguwa abhiye.»

<sup>30</sup> Yesu atsia apa matá me: «Ní tí da nakpo 'ndjì Nau gba Ebhe-e ne ní, ne me ní tí da nasuno lí mangua gbitaku dho? <sup>31</sup> A maka lí 'lá u a'ì e me mutadi. Lí u lu anì bhú doto-o, a ko lí nguwa bhe na yeye ane mane bhú ká olì nguwa hana na píla doto. <sup>32</sup> Engú bini, nedhinga u alu anì lie, a ngabhele, ì tsia kólo ngbéngbé ane ondula koko hana. Lí oyáyá-a kólo ngbéngbéngbé da napa me odhu tí da nayiki otì gba o bhú bhiti kpákpá-o.»

<sup>33</sup> Abhomu-o, Yesu adũ asuno bhú ogbitaku bhelé maka obhende bhomu. Anì adũ akpokpo 'li Ebhe pí uo lí lele bhende lí okpála adũ adje anì-e, tí da naké mbolimboli lie ko. <sup>34</sup> Anì dũ nani agama 'ngú pí uo padhá de mandì gbitaku. Engú bini, nedhinga anì adũ nadũ lie ne omukpata gba e titi o, anì atsia adũ ambamba tata-a pí uo hana.

*Yesu ayoko kpéke anvi pí 'ngu  
(Tsia bhú Mat. 8:23-27; di ne bhú Luk. 8:22-25.)*

<sup>35</sup> Bha tagolo bhú ekpí bhomu-o, Yesu atsia apa pí omukpata gba e me: «Ní gulu 'ngu ayi

'ngu.» <sup>36</sup> Abhomu-o, u a'o ká bhiti okpála-o, u anu ne Yesu bhú zabu ani adu bhú e-o. Ozabu koko adu di bhú dabili bini ne uo. <sup>37</sup> Kolo me-e, kpéke anvi na gipi aholo ape. Ongbo 'ngu-o adu atuko bhú zabu masakpe de me zabu-o bedhe ne engu. <sup>38</sup> La ngaani, Yesu-o, ani adu me ani nde ala atabhu zabu-o. Ani a'o 'ndji e pí kuse. Omukpata gba ani anu azuku ani ne napa pí ani me: «Musunu, ní adji amú. A zì 'ngú bhú djila mu di?» <sup>39</sup> Ani azuku lie, ani ambe bhú 'ndji anvi-o. Ani atsia apa pí ngbo 'ngu-o me: «Gba 'bhè mu! Ndjili má bulu!» Anvi a'o nape, engu atsia akolo guguo má bi! <sup>40</sup> Yesu atsia apa pí omukpata gba e me: «Yi ne tsulu mo-o ka ni? Nabhuka nga bhú yi adi?» <sup>41</sup> Engú bini, u adu adje tsulu naali. U atsia adu apa sunda o me: «Ae mangua kpála dho i ngadje belegu e ne anvi di ne engu-o?»

## 5

*Yesu akobho kpála bini inde li siti bua adu nadu bhú e*  
(*Tsia bhú Mat. 8:28-34; di ne bhú Luk. 8:26-39.*)

<sup>1</sup> Pipita-a, Yesu ne omukpata gba e akolo ayi 'ngu, bhú ndu doto gba okpála na Gelasa. <sup>2</sup> Li Yesu akoto lie bhú zabu-o, kolo me-e, kpála bini akoto li bili na olata, ani atsia ago abhaka ani. Kpála angu-o, siti bua adu nadu bhú ani. <sup>3</sup> Kpála angu-o adu nadu bhú ká olata. Kpála bini ti nani da nagbite ani de, belegu de ne gbíndjili. <sup>4</sup> Padhá de, anga bhutsibhutsi, u adu agbite 'dhu ani di ne 'kpa ani ne ogbíndjili. Engú bini, ani adu akokodho ogbíndjili bhomu-o má dhu dhu dhu! Kpála bini ko nani angu e pí ani de. <sup>5</sup> Ndu 'kpí hana sukpe ne ngbikpi ani adu bha nasusula bhú ká olata di ne bhú ká oeta. Ani atsia

adu natsotsolo eka li kute e ngae makpe ne oteme.

<sup>6</sup> Ani au Yesu lie me ani nde nga bha tsutsu-o, ani ago ne holo, ani atutu lipuku e kuto kala ani.

<sup>7</sup> Ani atsia asula kpekpeke me: «Yesu, Ndili gba Ebhe Apí 'Kpí, mo okunda namene ngú ma pí? Ma akikiliki lima pí mu! Ne 'li Ebhe, mo otó mbolo li ma de.»

<sup>8</sup> (Ani asula mo-o, anga Yesu apa nani pí siti bua angu-o me ani koto bhú kpála bhomu-o makoto!)

<sup>9</sup> Abhomu-o, Yesu ayi ani me: «A 'li ma pí?» Ani agie pí ani me: «A 'li ma me Bhelé, anga ya bhíbhiti.»

<sup>10</sup> Abhomu-o, osisiti bua-a akikiliki lio pí Yesu naali me ani agbe o bhú ndu doto bhomu-o de.

<sup>11</sup> A abhaka me 'ngbé piga opame nde ngazu 'he li pabu 'ta oo.

<sup>12</sup> Osisiti bua atsia akikiliki lio pí Yesu me: «Tima ya bhú ká opame inde, amba ya li bhú uo.»

<sup>13</sup> Abhomu-o, Yesu atsia aziba pí uo. U aze bhú kpála angu-o, u atsia ali bhú opame-o. Piga opame bhomu-o libhomu akè eta ne holo, u anu atuko bhú ekpe-o, u atsia amu ndu o hana. U adu masakpe de kutu bhisi.

<sup>14</sup> Abhomu-o, omulila gba opame atsi naao ne holo. U anu akpokpo 'ngú angu-o pí okpála abhú gudhu ne bhú okuti na ngongo. Okpála atsia ago ngú nau engú inde akodho 'kpí-o. <sup>15</sup> U ago de Yesu, u au kpála inde li bhiti osisiti bua adu nadu bhú e-o: ani adu me ani nde adu kuto, ani nde ato bongo li e, ani nde ngabundja 'ngú ndjindji. Abhomu-o, u atsia adje tsulu naali. <sup>16</sup> Okpála bhende au engú angu-o, atsia akpokpo engú inde akolo li kpála bhomu-o, di ne li opame-e pí uo.

<sup>17</sup> Abhomu-o, u atsia aholo nakikiliki lio pí Yesu me ani yie bhú ndu doto gba o yiyie. <sup>18</sup> Li Yesu adu a'u lie bhú zabu-o, kpála li siti bua adu igini bhú e, adu



akikiliki lie pi ani me ni du bha ibili ne ani bhú dabili bini. <sup>19</sup> Yesu tsia ziba pi ani mo-o de. Engú bini, ani apa pi ani me: «Gie limu agba mu, bhú ká okpála na piga gba mu-o, amba mu kpokpo ndu 'ngú hana li Ngámá amene e pi mu-o maka ani adje ndjinga mu lie pi uo.» <sup>20</sup> Abhomu-o, kpála ango-o atapa. Ani atsia aholo nakpokpo ndu 'ngú hana li Yesu amene e pi ani-e bhú ndu doto na Ogudhu Ndjikpa. Okpála inde adu adje ani-e, ndu uo hana adu angamba naali.

*Yesu akobho ndili na eole gba Yailo di ne eole bini*

*(Tsia bhú Mat. 9:18-26; di ne bhú Luk. 8:40-56.)*

<sup>21</sup> Li Yesu agie matá lie lie ayi ekpe-o, kambi okpála abedhe de ani bedhe lingo ekpe-o. <sup>22</sup> Abhomu-o, suka ongámási na eti nadje líli gba Moidje ago. A du li ani me Yailo. Ani au Yesu lie, ani ati bhú li 'dhu ani. <sup>23</sup> Ani atsia akikiliki lie pi ani ne kekele ne napa me: «Ndili na eole gba ma-a masikpe de nakpi. Gogo, nu 'o 'kpa mu pí 'ndji ani ngubula me ani kobho, amba ani akpí-i de.» <sup>24</sup> Abhomu-o, Yesu anu ne ani bhú dabili bini. Bhiti okpála na bhíbhiti naali adu akpata ani. U aholo nasulu ani.

<sup>25</sup> Abhomu-o, eole bini inde asi ne kuo naze ka ngute kalanga ndjikpa ne ká bhisi-e adu oo. <sup>26</sup> Bhiti omutia inde atia nani ani-e, aha nani likabhu pi ani naali. Padhá de, anga ani andjia nani tia nganda e hana má kpekebhe, ani kobho de! Engú bini, kuo gba ani-e adu mangbo nakolo sisiti naali. <sup>27</sup> Ani adje ngali gba Yesu-o lie, abhomu-o, ani ago bhú ká bhiti okpála ne akele ani, ani atsia abu 'kpa e li bongo gba ani-o. <sup>28</sup> Padhá de, anga ani adu apa li bua e me: «Í du me ma nde abu nga bha bini 'kpa ma li bongo gba ani-e, ma

kóbho.» <sup>29</sup> Abhomu-o, kolo ma 'li ma me-e, ngute-e akodho má ká! Ani atsia ambila bhú e me Yesu akobho ni ne kuo gba ni-e akobho.

<sup>30</sup> Bha li nedhinga bhomu-o, Yesu ambila bhú e makpe me angu nakobho kpála akoto bhú ni. Abhomu-o, ani atsia tsia 'kpí ne lingo e hana, ani atsia ayi me: «A abu 'kpa e li bongo gba ma-a da?» <sup>31</sup> Abhomu-o, omukpata gba ani-e agie pi ani me: «Mu ngau hana me bhiti okpála asulu mu má wakaka! Lele pi mu ti da nayi lie me: «Abu 'kpa e li ma da-ie?»» <sup>32</sup> Engú bini, Yesu adu bha natsitsia 'kpí lingo e ngú nau kpála inde amene engú bhomu-o. <sup>33</sup> Eole ango-o adu adje tsulu, ani aholo naguku. Padhá de, anga ani ambila nani engú inde akolo li ani-e ndjindji. Ani ago ati bhú li 'dhu Yesu, ani atsia apa ndu 'ngú hana na kukulu pi ani. <sup>34</sup> Abhomu-o, Yesu atsia apa pi ani me: «Ndi eole-e, nabhuka gba mu-o akobho mu akobho, nu ne guo 'ngú. Mo okobho ne kuo gba mu-o akobho.»

<sup>35</sup> Yesu ndjia nga nagama 'ngú de, okpála inde ayie agba Yailo akolo. U atsia apa pi ani me: «Ndili gba mu-o akpi. Mo ondála matá Musuno de.» <sup>36</sup> Engú bini, Yesu 'o 'to e li 'ngú u adu apa e de. Ani apa bha pi Yailo me: «Mo odjé tsulu de, du bha ne nabhuka.» <sup>37</sup> Yesu tsia ziba pi kpála koko nanu ne o de. U anu bha bhú dabili bini ne Piele ne Djaki, a la di-e Djaa ndai Djaki-o. <sup>38</sup> U akolo akuti gba Yailo. Yesu au me okpála má dja dja dja! U adu aku 'gbá naali, u atsia adu di atu 'ue. <sup>39</sup> Abhomu-o, ani ali abhú 'ti, ani atsia apa pi uo me: «Yi má dja dja dja di ne naku 'gbá naali me-e ka ni? Ndili-e kpi de, engú bini, ani tila.» <sup>40</sup> Abhomu-o, u aholo amu ani.

Engú bini, ngaani-e, ani apandja ndu okpála hana kilidjo. Ani aha bha bini 'dyi ndili-e ne 'hi ndilio, la di ne omukpata gba e bata-o. Abhomu-o, u atsia ali ne uo abhú tina 'ti inde li ndili-e adu bhú e-o. <sup>41</sup> Ani aha 'kpa ndili-o, ani atsia apa pi ani me: «Talita kumi!» (Tata-a me: «Ndi elø-e, ma apa pi mu me yie bhúlá!») <sup>42</sup> Ndi elø ango-o (inde adu nani ne kalanga ndjikpa ne ká bhisi ayie kolo bhúlá má gala! Ani atsia aholo nadhuku). Bhú nedhinga bhomu-o, bhú 'bhø okpála akpina má di! <sup>43</sup> Abhomu-o, Yesu agbele 'dje uo kpekpeke me u apa engú ango-o pi kpála belegu de bini. Pipita-a, ani atsia apa pi uo me u ha ezu pi ani.

## 6

*Okpála na Nadjaleta ayala Yesu (Tsia bhú Mat. 13:53-58; di ne bhú Luk. 4:16-30.)*

<sup>1</sup> Yesu ayie li bili bhomu-o, ani atsia gie lie bhú Nadjaleta, kuti inde ani abhele bhú e-o. Omukpata gba ani-e atsia anu di bhú dabili bini ne ani. <sup>2</sup> A akolo lie bhú 'kpi naguo gba omaYuda-a , ani aholo nasuno bhú 'ti nadje líli gba Moidje-o . Abhomu-o, bhiti okpála inde adu nadje ani-e, adu angamba naali. U adu apa me: «A asuno ongu inde-e pi ani da? Ani ayie ne imbilangu di ne angu namene ongua ongamba 'ngú inde-e su? <sup>3</sup> A inde-e kpála nagolo ndula-a di? A ko ndili gba Malia di? A ko ndai Djaki ne Djodje, ne Djude, la di ne Simo-o di? Ondaise ani na olisilisi la bhadi bhú dabili bini ne ni sii adi?» Kaka-a, u atsia ayala nabhuka ani.

<sup>4</sup> Abhomu-o, Yesu atsia apa pi uo me: «U mamanga polofeta ne ndu bili hana. La-a, u mamanga ani de-e bha bhú kuti inde u azu ani bhú e-o, ne bhú ká omaha

ani, ne la di bhú ká okpála na bhú 'bu 'ti gba ani-o.» <sup>5</sup> Ka ndi nabhuka gba uo-o, ani ti nani da namene ongamba 'ngú oo bhelé de. Ani akobho bha obhulu kuo bedi me ani nde nga'o 'kpa e pi uo. <sup>6</sup> Abhomu-o, ani atsia adu angamba naali ka ndi nabhuka gba uo-o.

*Yesu atima omukpata gba e ndjikpa ne ká bhisi bhú kulu*

*(Tsia bhú Mat. 10:5-15; di ne bhú Luk. 9:1-6.)*

Pipita-a, Yesu adholo bhú ndu okuti na ngongo hana me ani nde ngasuno pi okpála. <sup>7</sup> Abhomu-o, ani a'i omukpata ndjikpa ne ká bhisi gba e-e ngú natima uo bhisi bhisi. Kala natima uo-o, ani aha angu pi uo ngú napandja osisiti bua bhú okpála. <sup>8</sup> Ani atsia aha líli inde-e pi uo me: «Yi ahá ehe bini ngú enú-o de, yi ha bha ndula bini. Yi abí ezu de, yi ahá gonia de, yi ató falanga li yi bhú 'ti bongo de. <sup>9</sup> Yi dyi maleke bhú 'dhu yi, engú bini, yi adyí bongo na mbulu bhisi de. <sup>10</sup> Nedhinga yi li lie bhú gudhu bini-e, yi de du bha nasi gba koli kpála bini akólo li 'kpi yi akóto bhú gudhu ango-o lie ko.

<sup>11</sup> I du me okpála na kuti bini nde sia yi de-e, i du la di me u nde dje yi de-e, yi de yie oo, amba yi pulu ndju doto na kuti bhomu-o li 'dhu yi hana. Bhobhomu-o asúno ngae me yi abala uo ne ndu 'ngú gba o hana abala.» <sup>12</sup> Abhomu-o, omukpata ndjikpa ne ká bhisi-e agbida. U atsia adu akpokpo ngali gba Ebhe-e pi okpála ne napa pi uo me a ayo me u dji bua o. <sup>13</sup> U adu apandja osisiti bua bhelé bhú okpála. U atsia adu akobho okpála na kuo bhelé ne napulu 'mu pi 'ndji uo.

*Elode Atipasi aha líli me u bhøle Djaa bhulũ nabatisa okpála*  
(*Tsia bhú Mat. 14:1-12; di ne bhú Luk. 9:7-9.*)

<sup>14</sup> Abhomũ-o, 'ngbé ngámá Elode Atipasi adje engú gba Yesu-o, anga 'li ani ayangba nani ne ndũ bili hana. Okpála adũ apa me: «Djaa bhulũ nabatisa okpála azuku! Kaka-a, a bhú ani ne angu namene ongamba 'ngú.»  
<sup>15</sup> Okpála koko adũ apa naao me: «A ko polofeta Eliya.» Do okoko me: «A ko polofeta koko maka sũka obhende na kalanũ-o.»  
<sup>16</sup> Li Elode adje engú gba Yesu lie-e, ani atsia apa me: «A ko Djaa bhulũ nabatisa okpála! Ma ha nani líli ngama makpe me u kodho ngulũ ani. La-a, ani azuku bhomũ-o ngae!»

<sup>17</sup> A na paká me Elode atima nani osudha me u nũ holo Djaa bhulũ nabatisa okpála, amba u to ani bhú tikpũ ngubula Elodiade. Elodiade nani ne øle gba ndai ani Filipino. Engú bini, Elode atsia aha nani ani maka øle ka e.  
<sup>18</sup> Abhomũ-o, Djaa adũ apa pi Elode me: «Líli ziba pi mũ ngú naha øle gba ndai mũ-o de.»  
<sup>19</sup> Kaka-a, Elodiade adũ nayala Djaa, ani atsia adũ akũnda me u bhøle ani. Engú bini, ani ti nani da naha líli de me u bhøle ani mandĩ napa me Elode ziba.  
<sup>20</sup> La pi Elode, ani ambila nani lie me Djaa ne kpála na ngbingbili di na bubu-o, ani adũ namanga ani naali, ani atsia adũ di nalila ani. Nedhinga li Elode adũ adje 'li Djaa lie, mabhundja gba Elode adũ angbingi naali. Engú bini, ani adũ ne djali naali ngú nadje ani.

<sup>21</sup> Abhomũ-o, li ekpí u azu Elode akolo lie, a adũ ekpí na babadha pi Elodiade. Elode amene anokomia pi olubasa gba e, pi ongámási na sudha, di ne pi ongámási na ndu doto na Galilaya

hana.  
<sup>22</sup> Ndili øle gba Elodiade angu-o ago. Ani atsia ali bhú 'ti na anokomia-o. Ani adho ebi, a atsia anga li Elode di ne okpála inde ani a'i o bhú anokomia-o. Abhomũ-o, Elode atsia apa pi ndili øle angu-o me: «Yo 'he inde mũ nde ne gumũ e ka ma, amba ma ha pi mũ.»  
<sup>23</sup> Ani atsia atu silika pi ani me: «Ehe inde mo oyó e ka ma-a, ma há bha pi mũ e, abana i dũ bha nagbo bhũsũ nau gba ma ko.»  
<sup>24</sup> Abhomũ-o, ndili angu-o akoto, ani anũ ayi 'hi e me: «Mo okũnda me ma yo ka ngámá ni?» 'Hi ani atsia agie pi ani me: «Yo 'ndji Djaa bhulũ nabatisa okpála ko.»

<sup>25</sup> Ani agie lie ne holo agba ngámá. Ani atsia apa pi ani me: «Ma akũnda me ha mũma mbia inde-e, bhú tsakpa saani, 'ndji Djaa bhulũ nabatisa okpála!»  
<sup>26</sup> Abhomũ-o, Elode asia likabhu li bua e naali. Engú bini, ani ti nani da nayayala de ka silika inde ani atu e kala okpála inde ani a'i o bhú anokomia-o.  
<sup>27</sup> Abhomũ-o, Elode atima kolo sũka omũlila gba e me ani nũ, amba ani go ne 'ndji Djaa bhulũ nabatisa okpála-o. Mũlila angu-o anũ, ani atsia akodho ngulũ Djaa bhulũ nabatisa okpála bhú tikpũ-o má tse!  
<sup>28</sup> Pipita-a, ani aha 'ndji Djaa-a, ani ago ne di bhú tsakpa saani, ani aha pi ndili øle angu-o. Abhomũ-o, ndili øle angu-o atsia anũ aha pi 'hi e.  
<sup>29</sup> Li omũkpata gba Djaa adje engú angu-o lie, u ago aha kuo ani, u atsia azi.

*Yesu aha ezũ pi obhosi kutu bhuluvue*  
(*Tsia bhú Mat. 14:13-21; ne bhú Luk. 9:10-17; di ne bhú Dja. 6:1-14.*)

<sup>30</sup> Pita nagie lie ka obhulũ titima ndjikpa ne ká bhisi-e bhú kulu-o, u apo bhũla o de Yesu. U atsia akpokpo ndũ 'ngú inde u amene e di ne bhende u asuno e hana pi ani.  
<sup>31</sup> Do ani pi uo me: «Yi

gógo, ní nù lí bìlí índé lí kpála nde lie ade, amba yi guo nga mbo masudha.» Padhá de, anga okpála índé adù nago, dí ne obhende adù agie lío-o, u adù bhíbhítí naali. Kaka-a, Yesu ne omùkpata gba e sia belegù nedhínga ngù nazù 'he de. <sup>32</sup> Abhomù-o, u a'ù'ù bhù zabù-o, u atsia atapa bha ngao kpi o kpi lí bìlí lí kpála nde lí e ade ko. <sup>33</sup> Engù bini, okpála bhelé au maka u adù anù lie hana. U atsia ambíla me a ko uo. Abhomù-o, okpála ayie ne ndù ogùdhù bhelé, u agu holo ne 'dhù o, u atsia akolo lí bìlí angò-o pí Yesu ne omùkpata gba e kalanù. <sup>34</sup> Lí Yesu akoto lie bhù zabù-o, aní au bhítí okpála-o. Aní adje ndjìnga uo, anga u adù maka okandelø índé lí mulíla nde ka o ade ko. Abhomù-o, aní atsia aholo nasuno engù bhelé pí uo.

<sup>35</sup> A akolo lie masíkpe de nabi ka ekpí-e, omùkpata gba aní-e adyudyo lío de aní. U atsia apa pí aní me: «Ekpí-e ngabi, a la dí-e mílí bìlí. <sup>36</sup> Ha kpadjí pí okpála índé, amba u nù kala ezù nazù mazù pí o lí ongangba dí ne bhù okùtí na ngongo sí.» <sup>37</sup> Engù bini, Yesu agie pí uo me: «Yi ha ezù pí uo ngayí makpe!» Abhomù-o, u atsia ayí aní me: «Ya ayie ne bhítí tíá ngù nakala ezù nazù mazù pí bhítí okpála índé e su?» <sup>38</sup> Abhomù-o, aní ayí uo me: «Mapa ka yi madho? Yi nù tsítsíá!» U atsia lie, u atsia apa me: «A ka ya ne mapa bhuluvue, la dí ne sungu bhisi.»

<sup>39</sup> Abhomù-o, Yesu atsia aha lílí pí uo me: «Yi pa pí ndù okpála hana me u popo bhúla o, amba u dólù kuto pí ulu-o.» <sup>40</sup> U apopo bhúla o, u adúlù kuto: okoko kámá kámá, okoko ndjìkpa bhuluvue ndjìkpa bhuluvue. <sup>41</sup> Abhomù-o, Yesu aha mapa bhuluvue ne sungu bhisi-o. Aní atsia 'kpí ne abhúlá, aní atsia agie

heni pí Ebhe ngánga. Pípíta-a, aní atsia agugumù mapa angò-o, aní aha pí omùkpata gba e-o, amba u gapa lí okpála. Aní atsia agapa dí sungu bhisi-e pí ndù okpála hana. <sup>42</sup> Ndù uo hana azù 'he, u atsia a'u'u má kpe-e kpe-e! <sup>43</sup> Pípíta-a, omùkpata alo dú mapa ne sungu índé atígala-o, a atsia abebedhe okílí ndjìkpa ne ká bhisi. <sup>44</sup> Bhù ká obhende azù 'he angò-o, obhosi naní kutu bhuluvue. (Mandí natanga olísi ne ongísi.)

*Yesu adholo pí 'ngu*

*(Tsia bhù Mat. 14:22-33; dí ne bhù Dja. 6:15-21.)*

<sup>45</sup> Pípíta kolo me-e, Yesu apa pí omùkpata gba e me: «Yi 'ù'ù bhù zabù. Yi kodho 'kpí muma kalanù ayí 'ngu lí pápá na gùdhù na Betesáida lí nedhínga ma nde nga lie naha kpadjí pí okpála ko.» <sup>46</sup> Píta nagbo bhúsù e ne uo-o, aní anù a'ù apí 'ta ngù nayo Ebhe. <sup>47</sup> Lí ekpí abi lie, omùkpata adù ne zabù atù 'ngu, Yesu atsia atígala apí 'go kpi e kpi. <sup>48</sup> Aní au me omùkpata gba ní-e ale nadjele zabù píma anga anví adù amene uo kpekpeke. Abhomù-o, akolo lie bhù 'gbá 'ngù na bini-e, aní aholo nadholo pí 'ngu, aní atsia akolo masíkpe de uo. Aní dí me ne uo mane. <sup>49</sup> Engù bini ngauo-o, u au aní lie ngádhòlo pí 'ngu-o, u abhundja naao me a ko ígbadyíbhè. Kaka-a, u aholo natù 'ue. <sup>50</sup> Padhá de, anga u adù au aní ndù o hana. Kaka-a, u atsia abedhe ne tsúlù na kuo kuo. La-a, aní atsia apa bha kolo pí uo me: «Yi sia kpéke bua! A ko ma, yi adjé tsúlù de!»

<sup>51</sup> Abhomù-o, aní a'ù nganda uo bhù zabù-o, anví-e a'o nape. U atsia adù ne nangamba na kuo kuo. <sup>52</sup> Padhá de, anga ngamba 'ngù índé aní amene e lí mapa-a, u

mbila nga nani de ka ndi nabhuka gba o-o.

*Yesu akobho kpála na kuo bhú ndu doto na Genedjaleta*

*(Tsia bhú Mat. 14:34-36.)*

<sup>53</sup> Pita u agulu ekpø na Galilaya lie, u atsia akolo bhú ndu doto na Genedjaleta. Abhomu-o, u atsia agbite zabu lingo 'kpø-o. <sup>54</sup> U aze lie bhú zabu-o me-e, okpála ambila bha kolo me Yesu ngae inde. <sup>55</sup> Abhomu-o, okpála adji ndu doto ango-o libhomu ne holo. U aholo nabi obhulu kuo pi okalagba, ne nanu ne uo li bili inde u adu adje lie me Yesu li e-o. <sup>56</sup> Ndu bili hana inde li ani adu anu li e, li ongangba, bhú ogudhu, i du di-e bhú okuti, okpála adu nabu obhulu kuo bhú odaposo. Obhulu kuo ango-o adu akikiliki lio pi ani me ani ha kpadji me o bu nga bha 'kpa o li 'so bongo li ani-o. A na paká me ndu okpála hana inde adu nabu 'kpa o li ani-e, adu nakobho.

## 7

*Ongú inde ngayie li bua kpála nga'o kpála sisiti kala Ebhe ngae*

*(Tsia bhú Mat. 15:1-9.)*

<sup>1</sup> Abhomu-o, omuFalisai di ne omusuno koko na líli gba Moidje inde ayie nani bhú Yelusalema-a, ago apo bhúla o de Yesu. <sup>2</sup> U au me okoko bhú ká omukpata gba Yesu-o ngazu 'he mandí navulu 'kpa o kalanu. Kaka-a, omuFalisai adu abhundja me omukpata bhomu-o bubu kala Ebhe ade. <sup>3</sup> (Padhá de, anga omuFalisai ne ndu omaYuda hana ngalila odasundu gba onguo ogbi o-o. Kaka-a, kala nazu 'he-e, u vuvulu ngaiza 'kpa o i lí mali. <sup>4</sup> I du me u nde kolo bhú daposo-o, u vuvulu 'kpa o ndu 'kpi hana kala nazu 'he. U ngalila di olíli koko u asia e ka onguo

ogbi o naali maka: navulu okópo, obhende maka zulubho di ne obhende maka zikio.) <sup>5</sup> Abhomu-o, omuFalisai di ne omusuno na líli-e ayi Yesu me: «Omukpata gba mu-o ngakpata 'ngú maka li dasundu gba onguo ogbi ní apa lie ade. U ngazu 'he me u nde vulu 'kpa o de. U ngamene la mo-o ka ní?» <sup>6</sup> Yesu agie pi uo me: «Polofeta Isaya pa nani tala li 'ngú gba yi-e me, yi ne obhulu kali. Aní aye nani bhú bhuku gba e me:

«Okpála inde-e ngamanga ma bha ne 'bhø o padhá.

La-a, bua uo de ma tsutsu.

<sup>7</sup> Nadhøgø gba uo zi bhú djila ma de.

Padhá de, anga ongu inde u ngasuno e

a ko bha bhende i ngayie ka okpála.†

<sup>8</sup> Yi nga'o ká olíli gba Ebhe-e ngú nazi 'ndji yi bhú olíli gba onguo ogbi yi.»

<sup>9</sup> Aní atsia apa matá pi uo me: «Yi nga'o olíli gba Ebhe-e li ngongo ngubula nalila odasundu gba onguo ogbi yi-o. <sup>10</sup> Padhá de, anga Moidje apa nani me: «Manga 'dyi mu ne 'hi mu mamanga.» Aní atsia apa matá di me: «Kpála bhende i sobho 'dyi e, i du di-e 'hi e, a ayo me u bhøø aní mabhøø.»†

<sup>11</sup> Engú bini, ngayi-e, yi ngasuno pi okpála me, kpála bini tí da napa pi 'dyi e, i du di-e 'hi e me: «Mbu lí ma, anga ehe inde ayo igini me ma ha e pi mu-o, a ko makiso inde ma adji naha e pi Ebhe.» <sup>12</sup> Ngayi omuFalisai-e, yi ngaziba bhomu-o pi okpála me u améne 'he pi odyi o di ne pi ohi o belegu de bini. <sup>13</sup> Kaka-a, yi bhomu-o ngalila odasundu gba onguo ogbi yi-e ane eli gba Ebhe-e mane. Yi la di ngamene ndu ngua ongu bhomu-o bhelé.»

† 7:7 7:6-7 Tsia bhú Isa. 29:13. † 7:10 7:10 Tsia bhú Eki. 20:12; ne bhú Det. 5:16; ne bhú Eki. 21:17; di ne bhú Lev. 20:9.

14 Pipita-a, Yesu a'i matá bhiti okpála-o. Abhomu-o, ani atsia apa pi uo me: «Yi dje ma ndu yi hana, amba yi kɛ la di mboli engú inde: 15 Ehe bini ade inde yi zu e, i 'ó yi sisiti-o. La-a, engú inde ngakoto li bua yi-e, maka oeli di ne okulu-o, a bhomu-o ongu inde nga'o yi sisiti-o.» [ 16 \*]

17 Li Yesu ayie lie bhú ká bhiti okpála bhomu-o, ani atsia ali abhú 'ti-e, omukpata gba ani atsia ayi ani li ta gbitaku bhomu-o. 18 Abhomu-o, Yesu atsia apa pi uo me: «Ngayi di-e, yi mbila 'ngú inde-e di? Yi mbila de me ndu 'he hana li kpála ngazu e ti da na'o ani siti kpála de-e di? 19 Padhá de, anga ezú ang-o ngali li bhobua ani ade. Engú bini, a ngali bhú 'bu ani. Pipita-a, i tsia kóto.» (Yesu adu apa bhomu-o me ndu 'zu hana ndjindji ngú nazuzu.) 20 Abhomu-o, Yesu atsia abu tata-a me: «Engú inde ayie li bua kpála, a bhomu-o bhende i nga'o kpála sisiti-o. 21 Padhá de, anga osisiti 'ngú inde ngayie li bhobua kpála ngae inde: omabhundja na sisiti, zabhe, ezi, nabhili okpála, 22 nakúnda olisi, i du di-e obhosi gba okpála koko, kúndu tia, gumu namene osisiti 'ngú, kali, bambakuya, gumu 'he gba okpála koko, osobho, 'ngbé 'ndji di ne pulu 'ngú. 23 Ndu osisiti 'ngú bhomu-o hana ngakoto li bhobua kpála, i tsia 'ó kpála ang-o sisiti bhú djila Ebhe.»

*Gandji ɔlɔ bini abhuka Yesu  
(Tsia bhú Mat. 15:21-28.)*

24 Pipita-a, Yesu ayie oo, ani atsia atapa bhú doto inde lingo gudhu na Tile. Ani ali bhú 'ti bini, ani tsia kúnda de me u mbila de me ni oo de. Engú bini, ngali nago ka ani-e adje lie ne ndu bili hana.

25-26 Ma 'li ma me-e, gandji ɔlɔ bini adje 'ngú gba Yesu-o. ɔlɔ ang-o du nani maYuda de. Du ani ayie nani bhú ndu doto na Fenisia, bhú doto na Silia. Ndili gba ani na ɔlɔ adu me siti bua nde bhú ani. Abhomu-o, ɔlɔ bhomu-o ago ati bhú li 'dhu Yesu, ani atsia ayo ka Yesu me ani gbe siti bua bhú ndili ɔlɔ gba ni-o. 27 Yesu atsia apa pi ani me: «'O nga ongisi me u zu 'he gba o, amba u 'u'u. Padhá de, anga a ndjindji ade me u ha mapa gba ongisi ngú nabhibhike pi ongisi bulu-o de.» 28 ɔlɔ ang-o atsia agie pi Yesu me: «Ngámá, belegu ongisi búlu ngazu okulu 'zu bhende i ngabala asa misa-o.» 29 Yesu apa pi ani me: «Bha bini ka 'li mu bhomu-o, nunu, siti bua akoto bhú ndili gba mu na ɔlɔ-o akoto.» 30 Abhomu-o, ɔlɔ ang-o agie lie agba e, ani atsia abhaka ndili-e me ani nde asi pi mako me siti bua nde akoto bhú ani akoto.

*Yesu akobho bhoko inde i bhú 'ngú de, i dje di 'kpí de*

31 Pipita-a, Yesu ayie bhú ndu doto na gudhu na Tile. Ani apu bhú Sidona. Ani anu li pápá na ekpɔ na Galilaya, ani atsia akolo bhú ndu doto na Ogudhu Ndjikpa. 32 U atsia ago pi ani ne bhoko bini inde i dje 'kpí de. Bhoko ang-o da nagama 'ngú ka ani adu kpekpeke. U atsia akilikili lio pi Yesu me ani 'o 'kpa e pi bhoko ang-o, amba ani kobho.

33 Abhomu-o, Yesu atsia aha ani, ani anu ne ani li ngongo masudha de bhiti okpála-o. Ani atsia 'o likpa e bhú 'dje ani. Ani aku ngusu li likpa e, ani atsia 'o pí 'mi bhoko ang-o ko. 34 Pipita-a, Yesu atsia 'kpí ne abhú, ani awo má fe, ani atsia apa pi bhoko ang-o me: «Efata!» (A akúnda napa me: «A ayo me bhulu limu!») 35 Ma

\* 7:16 7:16 Lukuluku inde-e, a bhú obhuku koko na didili u aye e bhú eli na giliki ade. [La bhú okoko-o, u aye me: «Kpála inde ne djedje ngú nadje 'kpí-e, ani de dje.»]

'li ma me-e, 'dje ani abhulu lie, 'mi ani ayaka, ani aholo agama 'ngú ndjindji. <sup>36</sup> Yesu atsia aha líli pí okpála me u avé 'ngú ango-o pí kpála belegu de bini. Engú bini, ani adu ayoko uo lie, engú ango-o tsia dje yoko de. <sup>37</sup> U adu angamba na kuo kuo. Kaka-a, u atsia adu apa me: «Ani ngamene ndu 'ngú hana ndjindji. Ani ngaha pí obhende i dje 'kpí de-e nadje 'kpí. Ani ngaha pí obhende i bhú 'ngú de-e nabhu 'ngú.»

## 8

*Yesu aha 'zu pí okpála kutu badha*

*(Tsia bhú Mat. 15:32-39.)*

<sup>1</sup> Bhú oekpí bhomu-o, bhiti okpála apo matá bhúla o de Yesu. Abhomu-o, li ehe nazu mazú dū la lie ka uo de-e, Yesu atsia a'i omukpata gba e, ani atsia apa pí uo me: <sup>2</sup> «Ma ngadje ndjinga bhiti okpála inde, anga akolo mbia inde-e 'kpí bata u bha ngadu de ma si, ehe nazú mazú la matá di ka uo ade. <sup>3</sup> I dū me ma nde agie uo agba o ne gumu mo-o, angu uo ndjia li kpadji, anga a di bhú ká uo ne okpála bhende ayie tsutsutsu.» <sup>4</sup> Omukpata gba ani agie pí ani me: «Ní aú ezú bhú mili bíli sí-e ngubula nazuzú ka uo su?» <sup>5</sup> Abhomu-o, Yesu atsia ayi uo me: «A ka yi ne mapa madho?» U agie me: «Mananika.»

<sup>6</sup> Abhomu-o, ani apa pí bhiti okpála me u dūlu kuto. Ani aha mapa mananika-o, ani agie heni pí Ebhe. Ani agugumu mapa-o, ani atsia aha pí omukpata gba e me u gapa lí okpála. U atsia agapa lí uo. <sup>7</sup> U adu di nani ne djedje osungu. Ani agie di heni pí Ebhe ngú osungu-o, ani atsia apa me u gapa di osungu-o lí uo. <sup>8</sup> Okpála azú 'he, u a'u'u. Pipita-a, omukpata apo bhúla dúdú inde atigala, atsia abebedhe okíli

mananika. <sup>9</sup> Okpála inde adu oo, u adu masikpe de kutu badha. Pipita-a, Yesu atsia aha kpadji pí uo. <sup>10</sup> Kolo má gala me-e, ani a'u ne omukpata gba e bhú zabu, u atsia atapa bhú ndu doto na Dalamanuta.

*Omufalaisi ayo ngamba 'ngú bini ka Yesu*

*(Tsia bhú Mat. 16:1-4.)*

<sup>11</sup> Abhomu-o, omufalaisi ago, u aholo namene kpekebhe ne Yesu. U adu akunda nale ani. Kaka-a, u ayo ka ani me ani mene nga bha pí o ngamba 'ngú bini inde asúno me Ebhe atima ani ngae. <sup>12</sup> Lí Yesu adje lie mo-o, ani atsia apa me: «Okpála na naki inde-e ngayo ngamba 'ngú ngubula ní? Ma apa pí yi na paká me, ma méne ngamba 'ngú bini pí uo de!» <sup>13</sup> Ani a'o ka uo oo, ani a'u matá bhú zabu, ani atsia akodho 'kpí ayi 'ngu.

*Yi lila liyi ka levile gba omufalaisi di ne bhe gba Elode malila*

*(Tsia bhú Mat. 16:5-12.)*

<sup>14</sup> Lí omukpata a'u lie bhú zabu-o, u a'ili 'to o lí naha mapa. Kokoli adu bha ka uo bini bhú zabu-o. <sup>15</sup> Abhomu-o, Yesu atsia agbele dje uo me: «'E-e! Yi lila liyi ka levile gba omufalaisi di ne bhende gba Elode malila.» <sup>16</sup> Omukpata aholo namene kpekebhe sunda o me: «Ani ngapa mo-o, anga ní go ne mapa de.»

<sup>17</sup> Lí Yesu ambila engú inde u adu apa e sunda o lie, ani atsia ayi uo me: «Yi ngamene kpekebhe sunda yi lí 'ngú na mapa lí 'to yi a'ili lí e ka ní? Yi ké nga mbolimboli dí? Yi mbila la dí dí? Yi ne nabhuka adí? <sup>18</sup> Alí yi ne djidjila, yi ngau 'kpí adí ka ní? Alí yi ne djedje, yi ngadje 'kpí adí ka ní? 'To yi a'ili lí ndu ongamba 'ngú inde ma amene e hana? <sup>19</sup> Nedhinga

ma akũ nako obhosi kutu bhuluvue lie ne mapa bhuluvue, dudu inde atigala-a, yi abebedhe nako okĩli ne di madho?» U agie pi ani me: «Ndjikpa ne ká bhisi.»<sup>20</sup> Abhomũ-o, Yesu atsia ayi matá uo me: «La di-e, mapa mananika inde ma akũ nako okpála kutu badha ne e, dudu inde atigala-a, yi abebedhe nako okĩli ne di madho?» U agie me: «Mananika.»<sup>21</sup> Abhomũ-o, Yesu atsia apa pi uo me: «Yi kə nga mbolimboli sii di?»

*Yesu akobho kpála bini inde i u 'kpí de*

<sup>22</sup> Pipita-a, Yesu ne omũkpata gba e akolo bhú gũdhũ na Betsaida. Oo, okpála ago ne kpála bini inde i u 'kpí de-e pi Yesu. U atsia akikiliki lio pi ani me, ani 'o 'kpa e li ani amba ani kobho.<sup>23</sup> Yesu aholo 'kpa kpála inde i u 'kpí de-o. Ani agbe ani bhú gũdhũ-o. Ani aku ngusũ e bhú djila ani, ani abu 'kpa e li ani, ani atsia ayi ani me: «Mũ ngau mbo-o 'he uu?»<sup>24</sup> Kpála ango-o atsia 'kpí li ngo e, ani atsia apa me: «Ma ngau okpála, u mana ndula inde ngadhũku.»<sup>25</sup> Pipita-a, Yesu abu matá 'kpa e li djila ani. Kpála ango-o atsia 'kpí má sũũ, ani atsia adũ au 'kpí ndjindji. Ani atsia akobho.<sup>26</sup> Abhomũ-o, Yesu agie ani agba e, ani atsia apa pi ani me: «Mo onú abhú gũdhũ de.»

*Piele apa me Yesu ne Kilisito*

*(Tsia bhú Mat. 16:13-20; di ne bhú Luk. 9:18-21.)*

<sup>27</sup> Pipita-a, Yesu ne omũkpata gba e anũ bhú okuti inde li ngo gũdhũ na Sedjale gba Filipino-o. Li kpadji-e, ani ayi uo me: «Okpála ngapa li ma me ma ne da?»<sup>28</sup> U agie pi ani me: «Okoko ngapa me mũ ne Djaa bhũlu nabatisa okpála, okoko me mũ ne Eliya, okoko matá me mũ ne sũka opolofeta .»<sup>29</sup> Yesu atsia

ayi uo me: «A la yi-e, yi ngapa naayi me ma ne da?» Piele atsia agie pi ani me: «Mũ ne Kilisito .»<sup>30</sup> Abhomũ-o, Yesu atsia aha líli pi uo kpekpeke me u apá 'ngú gba ni-e pi kpála bini de.

*Yesu akpo 'ngú pindji nakpi ne nazuku ka e*

*(Tsia bhú Mat. 16:21-28; di ne bhú Luk. 9:22-27.)*

<sup>31</sup> Pipita-a, Yesu aholo nasuno pi omũkpata gba e me: «A ayo me ngama Ndili gba kpála-a, ma dje likabhu naali. Obhelesi okpála, ongbengbe odimandə gba Ebhe di ne omũsuno na líli gba Moidje ayála ma. U tsia bhólə ma. La-a, pita ekpí bata-a, ma tsia zúku.»<sup>32</sup> Ani dũ apa 'ngú ango-o lie ne tsulũ de-e, Piele atsia agbele ani li ngongo. Do ani pi Yesu de-e: «Mo opá mo-o de.»<sup>33</sup> Engú bini, Yesu adji lie, ani atsia omũkpata gba e-o, ani ambe bhú 'ndji Piele me: «Yie de ma mayie, ngamũ Satana ! Padhá de, anga mabhundja gba mũ-o, a ko bhende gba Ebhe-e de. Engú bini, a ko bhende gba okpála.»

*A ayo namene ni ngú nakpata Yesu-o?*

<sup>34</sup> Pipita-a, Yesu apo bhúla bhiti okpála di ne omũkpata gba e de e. Ani atsia apa pi uo me: «I dũ me kpála nde akũnda nakpata ma-a, a ayo me ani 'o nabhundja engú gba e makpe, ani bi la di kulusi gba e, amba ani kpata ma.<sup>35</sup> Padhá de, anga kpála bhende ngalila mukobho gba e pi e makpe, akpí makpi. La-a, kpála bhende ngaha mukobho gba e libhomu ngubula ma di ne ngubula Bádha Ngali gba Ebhe-e, ani akóbho mukobho.<sup>36</sup> I dũ me kpála nde asia ndũ tia na doto hana, tata-a pi ani ne ni i dũ me ani nde akpi na dudũma-a?»<sup>37</sup> Ehe bini ade inde li kpála-kuti ti da na'o e bhú da mukobho gba



e. <sup>38</sup> I dɛ me kpála bini nde adje nɛmɛ li ma di ne li oeli gba ma kala obhɛlɛ namene sísiti 'ngú na naki inde-e, inde i bhuka di Ebhe ne bua o bini de-e, ngama Ndili gba kpála ma adjé bhadi nɛmɛ li ani nedhinga ma agó lie bhú sangu gba 'Dyi ma bhú dabili bini ne oandjelu na bububu ko.»

## 9

<sup>1</sup> Yesu atsia apa matá pi uo me: «Ma apa pi yi na paká me, okpála koko bhú ká obhende si-e, mú padhá de, u aú ngaiza Nau gba Ebhe-e me, a nde ngago ne angu kalanɛ.»

*Kɛte Yesu ayipa ka sangu gba Ebhe*

*(Tsia bhú Mat. 17:1-13; di ne bhú Luk. 9:28-36.)*

<sup>2</sup> Pita ekpí madhia, Yesu aha Piele ne Djaki, di ne Djaa , ani anɛ ne uo titi o apí 'ndjá 'ta. Bha si me-e, ani adji lie kala uo kpi, <sup>3</sup> bongo gba ani avu má tuu! Píla doto libhomu-o, kpála bini ti da navɛlɛ bongo, i tsia vú mo-o de.

<sup>4</sup> Kolo me-e, Eliya ne Moidje aze li uo, u atsia aholo agama 'ngú ne Yesu. <sup>5</sup> Piele atsia apa pi Yesu me: «Mɛsuno, a ndjindji maka ní nde lie si. Ziba pi ya me ya yiki otí ngbangbali bata: bini pi mɛ, bini pi Moidje, bini pi Eliya.»

<sup>6</sup> Engú bini, Piele dɛ ambála de me ni apa pi-ie de, anga ngaani makpe ne omɛkpata bhisi inde adɛ bhú dabili ne ani-e, adɛ me u nde abedhe ne tsɛlɛ na kuo kuo.

<sup>7</sup> Abhomɛ-o, ndindi ago abuku uo má kagbu! Eli atsia akoto bhú ndindi angoo me: «Kpála inde-e, a ko Ndili gba ma inde ma akunda e naali-o. Yi dje ani!» <sup>8</sup> Ma gala kolo me-e, li omɛkpata atsia 'kpí lie lingo o-o, u pi matá kpála bini de, bha Yesu kpi e kpi bhú dabili bini ne uo.

*Omɛkpata ayi 'ngú pindji polofeta Eliya*

<sup>9</sup> Li Yesu ne omɛkpata gba e adɛ akɛ eta-a lie, ani atsia apa pi uo me: «Yi apá engú yi au e inde-e pi kpála belegu de bini, akólo li nedhinga inde ngama Ndili gba kpála ma azúku lie bhú ká okpála inde amu ko.» <sup>10</sup> Abhomɛ-o, u awo eli bhomɛ-o li bua o, u atsia adɛ ayi lio sɛnda o pépé me: «Nazuku bhú ká okpála inde amu-o, ani akunda igini napa bhomɛ-o pi?»

<sup>11</sup> Pípita-a, u ayi Yesu me: «Ka ni li omɛsuno na líli gba Moidje ngapa lie me kala nago ka Masiyaa , a ayo me Eliya go ngaiza kalanɛ-o?» <sup>12</sup> Yesu atsia agie pi uo me: «A na paká me Eliya ngago ngaiza kalanɛ, naleke ndɛ 'ngú hana. Engú bini, ka ni u aye nani lie bhú Bhuku gba Ebhe-e me, Ndili gba kpála adjé líkabhu naali, la di-e li okpála tsia yála ani-e? <sup>13</sup> La-a, ma apa pi yi me, Eliya ago nani ago, okpála atsia ato mbolo li ani má gbekpe maka u a aye lie bhú Bhuku gba Ebhe ko.»

*Yesu akobho ndili na bhobhoko li siti bua adɛ nadɛ bhú e*

*(Tsia bhú Mat. 17:14-21; di ne bhú Luk. 9:37-43a.)*

<sup>14</sup> Li Yesu ne omɛkpata bata akɛ eta-a lie, u anɛ abhaka omɛkpata koko-o. A abhaka me bhiti okpála nde asa uo ngbalina. La di-e, omɛsuno na líli nde ngamene kpekebhe ne omɛkpata angoo.

<sup>15</sup> Li bhiti okpála-a au Yesu lie, ndɛ uo hana angamba, u atsia agu holo ngú nago ayi ani. <sup>16</sup> Yesu ayi omɛkpata gba e me: «Yi ngamene kpekebhe ne uo pindji ni?»

<sup>17</sup> Kpála bini bhú ká bhiti okpála bhomɛ-o, atsia agie pi ani me: «Mɛsuno, ma ago ne ndili gba ma-a pi mɛ me kobho ani, anga a bhú ani ne siti bua inde ngagbite

'bhø anì me anì agáma 'ngú de. <sup>18</sup> Ndũ nedhinga hana lì siti bua ango-o agbugbulũ anì lie, a ngagu 'ì anì kuto, lì efu holo naze bhú 'bhø anì, anì holo nazũ tate e, kute anì kpekpeke má kì kì kì! Ma ayo ka omũkpata gba mũ-o me u gbe siti bua ango-o, engú bini, u ale pima.»

<sup>19</sup> Yesu atsia apa pì uo me: «Ngayi okpála na naki-e, nabhuka bhú yi ade! Ma adú matá ne yi ngubula nedhinga madho? Ma akíbila matá yi ngubula nedhinga madho? Yi go ne ndilì-e muma ei.» <sup>20</sup> Abhomũ-o, u ago ne anì pì Yesu. Lì ndilì-e au Yesu lie, siti bua adyiki anì má djigi djigi, anì agũ 'ì anì kuto! Ndilì-e aholo nawawala kuto me efu nde ngaze bhú 'bhø anì. <sup>21</sup> Yesu atsia ayi 'dyi ndilì-e me: «Kuo inde-e amene anì me-e ngubula kalanga madho?» Anì agie me: «Nayie bhú ndilì lì anì. <sup>22</sup> La di-e, siti bua ango-o ngagu 'ì anì bhú djua di ne bhú 'ngu bhũtsibhũtsi ngú nabhø anì. Engú bini, ì dũ me mũ nde tì da namene 'he-e, mũ de dje mbo ndjinga ya, teteke ya!»

<sup>23</sup> Yesu agie pì anì me: «Mũ ngapa me: «ƒ dũ me mũ nde tì da namene 'he.» La-a, ndũ 'ngú hana tì da namene lie pì kpála inde ngabhuka ko.» <sup>24</sup> Má gala kolo me-e, 'dyi ndilì-e asula me: «Ma abhuka. La-a, go teteke ma, amba nabhuka gba ma-a kolo kpekpeke!» <sup>25</sup> Lì Yesu au bhiti okpála ngago ne holo lì pápá gba o lie, anì atsia ambe bhú 'ndji siti bua me: «Ngamũ siti bua inde ngagbite 'bhø ndilì inde-e ne nanini 'dje anì, ma aha líli pì mũ me: «Koto bhú ndilì inde, la di-e, mo ogie matá limũ bhú anì belegu de bini!»» <sup>26</sup> Abhomũ-o, siti bua atũ 'ue, anì adyiki ndilì-e má djigi djigi, pipita-a, anì atsia akoto bhú anì! Ndilì na bhobhoko ango-

o, akolo maka kpála inde akpi. Okpála bhelé adũ apa me: «Anì akpi.» <sup>27</sup> Engú bini, Yesu aholo 'kpa anì, anì a'e anì bhúlá, ndilì-e atsia alũ malũ.

<sup>28</sup> Pipita-a, Yesu ne omũkpata gba e agie lio lì bili u adũ nadũ lì e-o. Nedhinga u adũ lie ne uo titi o-o, u atsia ayi anì me: «Ka nì ya tì igini lie da nagbe siti bua bhomũ-o bhú ndilì inde-e lie de-e?» <sup>29</sup> Yesu atsia agie pì uo me: «U tì da nagbe ngua bua bhomũ-o bha bini ne mayo.»

*Yesu akpo matá 'ngú pindji nakpi ne nazuku ka e*

*(Tsia bhú Mat. 17:22-23; di ne bhú Luk. 9:43b-45.)*

<sup>30</sup> Lì Yesu ne omũkpata gba e ayie lie oo, u agulu ndu doto na Galilaya. Yesu dũ akũnda de me okpála mbila bili inde nì adũ lì e de, <sup>31</sup> anga anì adũ asuno pì omũkpata gba e-o. Anì adũ apa pì uo me: «U apú ngbángá Ndilì gba kpála pì okpála, lì okpála ango-o tsia bhéle anì. La-a, pita 'kpí bata-a, anì tsia zũku.» <sup>32</sup> Engú bini, omũkpata dũ ambila nani ta engú bhomũ-o de. U adũ la di ne tsulũ ngú nayi anì.

*A ngbéngbé da?*

*(Tsia bhú Mat. 18:1-5; di ne bhú Luk. 9:46-48.)*

<sup>33</sup> Abhomũ-o, Yesu ne omũkpata gba e anũ bhú gũdhũ na Kapalanauma. Pipita-a, u alì lie bhú 'tì bini me-e, Yesu atsia ayi omũkpata gba e me: «Yi de igini ngamene kpekebhe sũnda yi lì kpadji-e pindji mangua 'ngú dho?» <sup>34</sup> Engú bini, u andjili má bulu, anga lì kpadji-e, u amene kpekebhe sũnda o me a ngbéngbé bhú ká o da-ie. <sup>35</sup> Abhomũ-o, Yesu adũ kuto. Anì apo bhúla omũkpata ndjikpa ne ká bhisi-e de e masakpe. Anì atsia apa pì uo me: «ƒ dũ me kpála bini nde akũnda nadũ kpála na kalanũ-o, a ayo me

ani du pita ndu okpála hana, ani du di bali gba ndu okpála koko hana.»

<sup>36</sup> Pipita-a, ani aha mboye ndili, ani a'o ani bhú ká uo, ani abi ani sa 'kpa e, ani atsia apa pi uo me: <sup>37</sup> «Kpála inde ngasia mboye ndili maka bhende-e ka 'li ma-a, ani ngasia bhomu-o ma makpe. La di-e, kpála inde ngasia ma-a, ani sia bha bini ma kpi ma kpi de, engú bini, ani ngasia di bhomu-o 'Dyi ma inde atima ma ko.»

*Kpála inde i gu ní de-e, a ko naaní kpála*

*(Tsia bhú Luk. 9:49-50.)*

<sup>38</sup> Abhomu-o, Djaa apa pi Yesu me: «Musunu, ya au kpála bini ngapandja osisiti bua ne 'li mu. Ya atsia ayoko ani, anga a ko suka ní de.» <sup>39</sup> Engú bini, Yesu agie pi uo me: «Yi ayóko ani de, anga kpála inde amene ngamba 'ngú ne 'li ma-a, ti da napa kolo siti 'ngú li ma pipita-a de. <sup>40</sup> Padhá de, anga kpála inde i gu ní de-e, a ko naaní kpála. <sup>41</sup> Ma apa pi yi na paká me, kpála inde ngaha kópo na engu pi yi bini kabula me yi ne okpála gba Kilisito-o , ani asia makalá gba e masia.»

*Ongú inde ngato kpála bhú siti 'ngú-o*

*(Tsia bhú Mat. 18:6-9; di ne bhú Luk. 17:1-2.)*

<sup>42</sup> Yesu atsia apa matá pi omukpata gba e me: «Kpála inde ngato suka odjedje ongisi inde ngabhuka ma inde-e bhú siti 'ngú-o, a pi ani ndjindji me u gi ngingi tangulu ani, amba u bhike ani bhú 'ngbé 'ngu. <sup>43</sup> I du me 'kpa mu nde ngato mu bhú siti 'ngú ngae-e, mu de kodho. A ndjindji pi mu nali bhú mukobho na duduma ne

koli 'kpa mu bini, ane mane nanu ka mu bhú djua na duduma ne duduma ne 'kpa mu bhisi hana. [ <sup>44</sup> \*]

<sup>45</sup> I du di me 'dhu mu nde ngato mu bhú siti 'ngú ngae-e, mu de kodho. A ndjindji pi mu nali bhú mukobho na duduma ne koli 'dhu mu bini, ane mane me u bhike mu bhú djua na duduma ne duduma ne 'dhu mu bhisi hana. [ <sup>46</sup> †]

<sup>47</sup> I du me li djila mu nde ngato mu bhú siti 'ngú ngae-e, mu de gbe. A ndjindji pi mu nali bhú Nau gba Ebhe-e ne koli li djila mu bini, ane mane me u bhike mu bhú djua na duduma ne duduma ne djila mu bhisi hana. <sup>48</sup> Oo, «okokó maka bangili inde ngazu kute kpála mumu de, djua bubulu la di-i de.†» <sup>49</sup> Padhá de, anga Ebhe alé nabhuka gba ndu okpála hana bhú djua, amba a kolo kpekpeke.

<sup>50</sup> Ngutu ne bádha 'he. Engú bini, i du me a nde abolo, u ti da nagie matá kpokpo bhúbhú ne ni? Nabhuka gba yi du maka ngutu inde i bolo de, yi du la di ne guo 'ngú sunda yi.»

## 10

*Nasuno pindji nagbo bhusu o ne elo*

*(Tsia bhú Mat. 19:1-12; di ne bhú Luk. 16:18.)*

<sup>1</sup> Li Yesu ayie lie oo, ani anu bhú ndu doto na Yudaya, ayi 'ngu na Djuludani. Bhiti okpála ago matá de ani. Ani aholo nasuno pi uo maka ani amemene lie-o. <sup>2</sup> Abhomu-o, omuFalisai koko adyudyo lio de Yesu, ngu naholo ani li 'li e. Kaka-a, u atsia ayi ani me: «Lili gba ní-e aziba uu me bhoko gbo bhusu e ne elo gba e?» <sup>3</sup> Yesu atsia agie pi uo me:

\* **9:44** 9:44 Lukuluku inde-e, a bhú obhuku koko na didili u aye e bhú eli na giliki ade. [Oo, okokó maka bangili inde ngazu kute kpála mumu de, djua bubulu la di-i de.] † **9:46** 9:46 Lukuluku inde-e, a bhú obhuku koko na didili u aye e bhú eli na giliki ade. [Oo, okokó maka bangili inde ngazu kute kpála mumu de, djua bubulu la di-i de.] † **9:48** 9:48 Tsia bhú Isa. 66:24.

«Moidje aha nani pi yi li 'ngú bhomú-o mangua líli dho?» <sup>4</sup> U atsia apa me: «Moidje aha nani pi bhoko kpadji me ani ye balua ngú nagbo bhusu o ne wala e, amba ani gie ani agba o.»

<sup>5</sup> Engú bini, Yesu agie pi uo me: «Moidje aye nani líli bhomú-o pi yi ka kpéke 'ndji gba yi-o. <sup>6</sup> La li lilita-a, nedhinga li Ebhe abho ndu 'he lie hana-a «ani abho uo bhoko ne ɔlɔ.†» <sup>7</sup> «Kaka-a, bhoko a'fili ka 'dyi e ne 'hi e, ani tsia dhédhe li wala e, <sup>8</sup> ndu uo bhisi hana kólo koli kpála bini.†» Abhomú-o, uo matá okpála bhisi ade. Engú bini, u akolo koli kpála bini. <sup>9</sup> Kaka-a, a ayo de me kpála-kuti gbo bhusu uo de, anga Ebhe akpɔtse uo ngae.»

<sup>10</sup> Li Yesu ne omukpata gba e agie lio lie li bili u adu nadu li e, u atsia ayi ani li 'ngú ango-o. <sup>11</sup> Yesu apa pi uo me: «Ɔ du me bhoko bini nde a'e wala e ngú naha ɔlɔ koko-o, ani a'o bhomú-o ká wala e na kalanu-o ngú nakunda ɔlɔ koko. <sup>12</sup> Ɔ du la di me ɔlɔ nde atse 'ko e ngú naha bhoko koko-o, ani a'o bhomú-o ká 'ko e ngú nakunda bhoko koko.»

*Yesu atuko bisagu pí 'ndji ongisi (Tsia bhú Mat. 19:13-15; di ne bhú Luk. 18:15-17.)*

<sup>13</sup> Abhomú-o, okpála adu ago ne ongisi gba o me Yesu 'o 'kpa e pí uo, ne natuko bisagu pí uo. Engú bini, omukpata ake 'ngú lio pi okpála ango-o. <sup>14</sup> Yesu au lie mo-o, bua ani ake, ani atsia apa pi omukpata gba e me: «Yi 'o ongisi me, u go li pabili ma nde li e-o, yi ayoko uo de. Padhá de, anga Nau gba Ebhe-e, a pi obhende maka uo ko. <sup>15</sup> Ma apa pi yi na paká me, kpála bhende nabhuka gba e nde maka bhe gba ndili ade-e, kpála ango-o ti da

nali bhú Nau gba Ebhe-e belegu de bini.» <sup>16</sup> Abhomú-o, Yesu adu abi ongisi bhomú-o, ani atsia adu atuko bisagu pí uo me ani nde nga'o 'kpa e pí uo.

*Bhulu tia bini ayi 'ngú pindji mukobho na duduma (Tsia bhú Mat. 19:16-30; di ne bhú Luk. 18:18-30.)*

<sup>17</sup> Li Yesu adu a'e ne enu lie, bhoko bini ago ne holo nabhaka ani, ani akikita lipaku e kuto kala ani. Ani atsia ayi ani me: «Musunu na babadha, a ayo me ma mene pi ngú nasia mukobho na duduma-a?» <sup>18</sup> Yesu atsia apa pi ani me: «Ka ni mu nga'i ma lie me bádha kpála-a? Bádha kpála belegu ade bini, bha bini Ebhe kpi e kpi. <sup>19</sup> La-a, mu mbila olíli-e ndjindji: «Mo obhéle kpála de, mo osí ne ɔlɔ, i du di-e bhoko gba kpála koko de, mo ozí 'he de, mo opá 'ngú li kilí mu bhú djila okpála ne eu de, mo ozí kpála bhú nyali de, manga 'dyi mu ne 'hi mu mamanga.†»

<sup>20</sup> Bhoko ango-o apa pi ani me: «Musunu, nayie bhú ndili li ma-a, ma amene ndu olíli bhomú-o hana.» <sup>21</sup> Yesu atsia ani ne mukunda hana. Ani atsia apa pi ani me: «Mo oneke bha koli 'he bini. Nunu, tsindji ndu 'he inde mu nde ne e hana, amba mu ha tiatia pi obhulu ndibhili, mo osia tia abhulá. Pipita-a, go kpata ma.» <sup>22</sup> Engú bini, nedhinga li bhoko ango-o adje lie mo-o, ani atu 'ndji e ne kuto, ani atsia agie lie ne babuma naali, anga tia adu nani ka ani bhelé.

<sup>23</sup> Abhomú-o, Yesu atsia omukpata gba e inde adu me u nde asa ani ngbalina-o. Ani apa pi uo me: «A ko kpéke da 'ngú pi obhulu tia ngú nali bhú Nau gba Ebhe-o!» <sup>24</sup> Abhomú-o, omukpata

† 10:6 10:6 Tsia bhú Dje. 1:27, 5:2. † 10:8 10:7-8 Tsia bhú Dje. 2:24. † 10:19 10:19 Tsia bhú Eki. 20:12-16; di ne bhú Det. 5:16-20.

atsia angamba ka eli ango-o. La-  
a, Yesu apa matá pí uo me: «Odi  
ma, a ko kpéke da 'ngú ngú nali  
bhú Nau gba Ebhe-o!»<sup>25</sup> Da nali ka  
samo\* li gudho musana kpekpeke.  
A la matá kpekpeke naali pí bhulu  
tia nali bhú Nau gba Ebhe-o.»  
<sup>26</sup> Omukpata angamba matá bha  
naali, u atsia adu apa sunda o me:  
«Í du mo-o, a ti da nakobho da?»  
<sup>27</sup> Yesu atsia uo má sũũ, ani atsia  
apa pí uo me: «Pí okpála-a, a ko  
kpéke da 'ngú. Engú bini, pí Ebhe-  
e, a ko kpéke da 'ngú de, anga ani  
ti da namene ndũ 'ngú hana.»

<sup>28</sup> Abhomu-o, Piele apa pí ani  
me: «Djedje nga, ya a'o ndũ 'he  
hana ngú nakpata mu.»<sup>29</sup> Yesu  
atsia apa pí ani me: «Ma apa pí  
yi na paká me, kpála inde a'o ka  
eti gba e, inde a'o ka ondaise e  
na obhosibhosi, i du di-e obhende  
na olisilisi, inde a'o ka 'hi e, i du  
di-e 'dyi e, i du di-e ongisi gba e,  
i du di-e edyi gba e ngubula ma,  
la di ne ngubula Bádha Ngali-e  
,<sup>30</sup> kpála ango-o asía mbia inde-  
e bhutsibhutsi kámá bini: oeti,  
ondaise na obhosibhosi ne ob-  
hende na olisilisi, oehi, ongisi, la  
di ne oedyi bhú dabili bini ne  
olikabhu. Ani tsia sía di bhú  
nedhinga inde ngago-o, mukobho  
na daduma.<sup>31</sup> Engú bini, bhelé  
na okpála inde u ngau o maka  
okpála na akalanu mbia inde-e,  
akólo okpála na asidi, li obhende u  
ngau o maka okpála na asidi mbia  
inde-e kólo okpála na akalanu.»

*Yesu akpo 'ngú bhutsibhutsi na  
bata pindji nakpi ne nazuku ka e  
(Tsia bhú Mat. 20:17-19; di ne  
bhú Luk. 18:31-34.)*

<sup>32</sup> Li Yesu ne omukpata gba e  
a'e ibili ne enú lie ngú nanu  
bhú Yelusalema-a, ani akò pí  
uo kalanu. Omukpata-a adu  
angamba. Obhende adu akpata

uo-o, adu ne tsulu, Yesu aha matá  
omukpata gba e ndjikpa ne ká  
bhisi titi o, ngú nagama 'ngú pí  
uo. Ani atsia aholo akpokpo 'ngú  
pí uo pindji ongú inde akólo li  
ani-o.<sup>33</sup> Ani apa pí uo me: «Yi  
dje nga 'ngú inde. Ní adji bhú  
Yelusalema. Oo, u apú ngbángá  
Ndili gba kpála pí ongbengbe odi-  
mande gba Ebhe ne omusuno na  
líli-o . U akódho 'ngú gba ani me  
ani kpi bha makpi. Pipita-a, u tsia  
pú ani pí omupagano.<sup>34</sup> U ató  
pádha li ani, u akú ngusu li ani,  
u abhí ani ne fimbo, u tsia bhéle  
ani. Engú bini, pita 'kpí bata-a, ani  
tsia zúku.»

*Mayo gba Djaki ngauo ne Djaa  
(Tsia bhú Mat. 20:20-28.)*

<sup>35</sup> Pipita-a, Djaki ngauo ne Djaa  
, ongisi gba Djebedayo, adyudyo  
lio de Yesu. U atsia apa pí ani  
me: «Musuno, ya ngakunda me  
mene pí ya engú inde ya adji ayo  
e ka mu-o.»<sup>36</sup> Yesu atsia ayi uo  
me: «Yi akunda me ma mene pí  
yi ni?»<sup>37</sup> U agie pí ani me: «Ziba  
pí ya nadulu bhú Nau gba mu na  
sangu-o , bini li pá 'kpa mu na  
kokpa, koko li pá 'kpa mu na gali.»  
<sup>38</sup> Engú bini, Yesu atsia apa pí uo  
me: «Yi mbila ehe inde yi ngayo e  
de. Yi ti da nandji kópo na likabhu  
inde ma andjé e uu? Yi ti da nasia  
batisimo na likabhu inde ma asía  
e uu?»<sup>39</sup> U atsia agie pí ani me:  
«Ya ti da namene.» Do Yesu pí  
uo me: «A moko, yi andjé kópo na  
likabhu inde ma andjé e-o, yi sía di  
batisimo na likabhu inde ma asía  
e-o.<sup>40</sup> Engú bini, ma ti da napa  
ngama de me a adulu li pá 'kpa ma  
na kokpa ne me a adulu li pá 'kpa  
ma na gali da-ie de. Obili ango-o, a  
pí obhende li Ebhe aleke pí o ko.»  
<sup>41</sup> Li omukpata ndjikpa bhe  
koko adje engú li Djaki ne Djaa  
ayo e lie, u atsia ake 'ngú lio pí

\* **10:25** 10:25 Enu inde li Yesu abhu lie si-e a ko samo. Li pápá gba uo oo enu inde adu nani  
ngbhéngbé ne samo.

uo. <sup>42</sup> Abhomu-o, Yesu a'i uo de e, ani atsia apa pi uo me: «Yi mbila hana me ongamási na doto inde ngau pí omaha o ne kpéke. La di-e, ongbengbe okpála ngaha okpekpeke líli pi omaha o. <sup>43</sup> Engú bini, a ayo de me adu akodho 'kpí sunda yi mo-o de. I du me kpála bini nde akunda nadu 'ngbé kpála bhú ká yi-e, a ayo me ani du kpála na kulu gba yi-o. <sup>44</sup> I du me kpála bini bhú ká yi nde akunda nadu kpála na kalanu-o, a ayo me ani du bali gba ndu okpála koko hana. <sup>45</sup> Padhá de, anga ngama Ndili gba kpála ma go nani de me okpála du amene kulu lio pi ma-a de. Engú bini, ma ago mangbo ngú namene kulu lima pi okpála, di ne ngubula nagbegbe okpála bhelé bhú bali ne lá ma makpe.»

*Yesu akobho Balatimé, kpála i u 'kpí de*

*(Tsia bhú Mat. 20:29-34; di ne bhú Luk. 18:35-43.)*

<sup>46</sup> Pipita-a, Yesu akolo bhú gudhu na Djeliko. Li Yesu ne omukpata gba e, la di ne bhiti okpála adu akoto lie oo, u abhaka kpála bini i u 'kpí de me ani nde adu dengo 'hi kpadji. A adu 'li ani me Balatimé, a adu ndala Timaya. Ani adu me ani nde ngayoyo 'he. <sup>47</sup> Nedhinga ani adje lie me a ko Yesu, kpála na Nadjaleta-a, ani aholo asusula me: «Yesu, Ndili gba Davidi, dje nga mbo ndjinga ma!» <sup>48</sup> Bhiti okpála adu ambe-mbe bhú 'ndji ani me: «Gbite 'bhø ma!» Engú bini, ani aholo la matá asusula kpekpeke me: «Ndili gba Davidi, dje nga mbo ndjinga ma!»

<sup>49</sup> Abhomu-o, li Yesu adje lie, ani alu, ani atsia apa me: «Yi 'i ani ei.» U atsia a'i kpála i u 'kpí de ne napa pi ani me: «Atou! Yie bhúlá. Ani nga'i ma.» <sup>50</sup> Abhomu-o, ani abala 'kpa li koti gba e-o, ani a'ulu

má ngudha, ani atsia ago abhaka Yesu. <sup>51</sup> Abhomu-o, Yesu atsia ayi ani me: «Mo okunda me ma mene pi mu ni?» Kpála i u 'kpí de-e agie pi ani me: «Musuno, ma akunda me ma u matá 'kpí.» <sup>52</sup> Yesu atsia agie pi ani me: «Nunu, nabhuka gba mu-o akobho mu akobho.» Má gala kolo me-e, ani aholo au 'kpí, ani atsia adu akpata Yesu li kpadji-o.

## 11

*Yesu ali bhú Yelusalema  
(Tsia bhú Mat. 20:29-34; di ne bhú Luk. 18:35-43.)*

<sup>1</sup> Li u akolo lie de Yelusalema-a, masikpe de okuti na Betefadje ne Betania-a, u akolo pí eta na ondula na Olive. Yesu atima omukpata bhisi bhú ká omukpata gba e akalanu. <sup>2</sup> Ani atsia apa pi uo me: «Yi nu bhú kuti inde kala yi aoo. Yi akólo lie oo me-e, yi abháka me u nde agbite ndili punda\* inde li kpála bini dhuku nga pí e de. Yi bhulu ani, amba yi go ne ani. <sup>3</sup> I du la me kpála bini nde ayi yi me: «Yi ngabhulu ani ngú ni?» Yi de gie pi ani me: «Ngámá ne gumu ani. Engú bini, ani agie bha ani si mbia inde.»

<sup>4</sup> Abhomu-o, u anu, u atsia abhaka ndili punda me u nde agbite ani akilidjo, de 'bhø bhoti bini li 'hi kpadji. U atsia abhulu ani. <sup>5</sup> U adu abhulu ani lie, okpála koko bhú ká obhende adu oo, ayi uo me: «Yi ngamene bhomu-o ni? Yi ngabhulu ndili punda bhomu-o ngú ni?» <sup>6</sup> Omukpata agie pi uo maka li Yesu apa lie pi uo-o. Okpála ango-o atsia a'o uo me u nunu. <sup>7</sup> Abhomu-o, omukpata-a atsia ago ne ndili punda-a pi Yesu, u apa obongo gba o pí 'ngbu ani. Abhomu-o, Yesu atsia adu pépé. <sup>8</sup> Okpála bhelé apa obongo gba o

\* 11:2 11:2 Enu inde si-e a ko piga 'nu maka punda, uo la ndundundu u bibi di okpála.

li kpadji, okoko apa okpálá inde u akodho e bhú bili-o. <sup>9</sup> Okpála bhende adu adhuku kala Yesu ne obhende adu akpata ani-e, adu asusula me:  
«Ebhe heni!

A ayo me Ebhe tuko bisagu pí kpála inde ngago ne 'li Ngámá ko! †

<sup>10</sup> A ayo me Ebhe tuko bisagu pí nau inde ngago, nau gba ogbi ní Davidi ko!

Ebhe Apí 'Kpí heni!»

<sup>11</sup> Abhomu-o, Yesu anu bhú gudhu na Yelusalema, ani atsia ali bhú 'ngbé 'ti Ebhe gba omaYuda-o. Pita natsia 'kpí ka ani lingo e hana, ani atsia anu ne omukpata gba e ndjikpa ne ká bhisi bhú Betania, anga adu me ekpí nde ngabi.

*Yesu atu pɔdʒo li ndula na figi  
(Tsia bhú Mat. 21:18-19.)*

<sup>12</sup> Pita ekpí bhomu-o, u adu akoto lie bhú Betania-a, Yesu aholo nadje gumu. <sup>13</sup> Ani au ndula na figi inde adu bhú e ne kpákpá-a de e tsutsu. Ani atsia anu ngú natsia 'kpí bhú ndula angoo atigala ni u líli bhúbhú. Engú bini, ani akolo lie dede-e, ani au bha bhiti kpákpá-o. Padhá de, anga adu nedhinga nali kaka de. <sup>14</sup> Abhomu-o, Yesu atsia atu pɔdʒo li ndula na figi-e ne napa me: «Mu lí matá líli inde li kpála ti da nazu e belegu de bini!» Omukpata gba ani adje 'ngú angoo hana.

*Yesu atsambala obhulu natsindji 'he bhú 'ngbé 'ti Ebhe gba omaYuda*

*(Tsia bhú Mat. 21:12-17; ne bhú Luk. 19:45-48; di ne bhú Dja. 2:13-22.)*

<sup>15</sup> Abhomu-o, u atsia agie matá lio bhú Yelusalema. Li Yesu ali lie bhú 'ngbé 'ti Ebhe gba omaYuda-a, ani aholo natsambala okpála inde adu atsindji 'he, ne

obhende adu akala 'he oo-o. Ani atumba omisa gba okpála inde adu ayipa falanga, di ne okiti gba obhende adu atsindji obebhe-o kuto. <sup>16</sup> Yesu 'o nani kpála bini akodho 'kpí ne ehe bini na mase bhú 'ngbé 'ti Ebhe de. <sup>17</sup> Pipita-a, ani aholo asuno, ne napa pí uo me: «U aye bhú Bhuku gba Ebhe-e me, Ebhe apa me: «U a'í eti gba ma-a me eti nayo Ebhe pí ndu opiga hana.» Engú bini, ngayi-e, yi adji, a atsia akolo bili gba obhulu 'zi!†» <sup>18</sup> Ongbengbe odimandø di ne omusuno na líli adje engú inde li Yesu amene e-o. U atsia aholo agili kpadji ngú nabhele ani. Engú bini, u adu akpe ani, anga ndu okpála hana adu angamba li nasuno gba ani-e mangamba. <sup>19</sup> Akolo lie tagolo-o, Yesu ne omukpata gba e akoto bhú gudhu-o.

*Yesu asuno pindji nadu ne nabhuka na kpekpeke*

*(Tsia bhú Mat. 21:20-22.)*

<sup>20</sup> Kèkpí má bhø-o, Yesu ne omukpata gba e a'e ne enu. U akolo lie li bili li Yesu atu pɔdʒo lie li ndula na figi-e, omukpata gba ani au me ndula angoo a'ulu hana, akolo makolo bha bini li osisie. <sup>21</sup> Abhomu-o, Piele abhundja engú inde li Yesu apa lili e li figi-o, ani atsia apa pí Yesu me: «Musuno, tsitsia nga, ndula na figi inde mo otu pɔdʒo lie a'ulu hana!» <sup>22</sup> Yesu atsia apa pí omukpata gba e me: «Yi du ne nabhuka bhú Ebhe! <sup>23</sup> I du me yi nde apa pí eta inde-e me: «Yie sii, amba mu nu gu 'i mu bhú 'ngbé 'ngu-o, Ebhe méne pí yi, i du me yi nde ne bua na bhisi bhisi ade ko. Engú bini, a ayo la me yi bhuka me Ebhe améne mamene.» <sup>24</sup> Kaka-a, ma apa pí yi me: ndu ehe hana yi ayó e bhú mayo-o, yi bhuka me

yi asia ehe angu asia. Abhomu-o, ehe angu tsia méne lie pi yi. <sup>25</sup> Engú bini, nedhinga yi nde lie ngayo Ebhe-e, i du me yi nde ne engú pi kpála-a, yi de mbu ngaiza li ani, amba 'Dyi yi inde abhúlá-a 'e di osisiti 'ngú gba yi o. [ <sup>26</sup> † ]»

*A ngaha angu pi Yesu da?*

*(Tsia bhú Mat. 21:23-27; di ne bhú Luk. 20:1-8.)*

<sup>27</sup> Yesu ne omukpata gba e agie lio bhú Yelusalema. Li Yesu adu adholo lie bhú 'ngbé 'ti Ebhe gba omaYuda-a, ongbengbe odimandé gba Ebhe, ne omusuno na líli, di ne obhelesi okpála ago de ani. <sup>28</sup> U atsia ayi ani me: «A aha kpadji pi mu ngú namene ongu inde-e da? A aha la di angu pi mu ngú namemene da?» <sup>29</sup> Yesu atsia agie pi uo me: «Ma adjí ayi yi li koli engú bini, i du me yi nde agie engú muma tété-e, ma atsia pá pi yi me ma ngamemene ne mangua angu dho-ie. <sup>30</sup> Aha kpadji pi Djaa ngú nabatisa okpála da? Ne me a ko Ebhe, ne me a ko okpála? Yi gie engú muma tété.»

<sup>31</sup> U aholo amene kpekebhe sunda o me: «I du me ni nde apa me, aha kpadji pi Djaa ne Ebhe-e, ani yi ní me, i du mo-o, ka ni ní bhuka la nani Djaa lie de-e? <sup>32</sup> Engú bini, ní ti da nale napa me: «Aha kpadji pi Djaa ne okpála-a?» (U apa nani mo-o anga u adu adje tsulu ka bhiti okpála-o. Padhá de, anga ndu okpála hana adu abhundja me Djaa ne polofeta na kukulu.) <sup>33</sup> Abhomu-o, u agie pi Yesu me: «Ya mbila de.» Yesu atsia agie pi uo me: «A ndjindji, ngama di-e, ma apa pi yi de me a aha angu muma ngú namene ehe inde-e da-ie de.»

## 12

*Gbitaku pindji osisiti okpála namene kulu bhú 'dyi vino*

*(Tsia bhú Mat. 21:33-46; di ne bhú Luk. 20:9-19.)*

<sup>1</sup> Abhomu-o, Yesu aholo nakpokpo 'ngú pi uo bhú ogbitaku me: «Kpála bini alu nani ngu vino, ani asa ngongo-o hana ne aga. Ani adjí edú ngú napi olíli-e bhúbhú, ani atsia ayiki 'ndjá 'ti abhúlá bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Abhomu-o, ani atsia atapa dhuku.»

<sup>2</sup> Nedhinga li nguwa abhele lie, ani atima kpála bini na kulu agba okpála angoo me u ha nguwa bhe gba ni-e pi ni haha. <sup>3</sup> Okpála namene kulu bhú ngu vino aholo kpála angoo, u abhi ani má kpú! U atsia agie ani ne mbulu 'kpa e padhá. <sup>4</sup> Bhulu 'dyi-e atima matá kpála na kulu koko bini, bhobhomu-o di-e, u abhi ani li 'ndji e, u atsia asosobho ani. <sup>5</sup> Bhulu 'dyi-e atima matá kpála koko bini, u abhele bha ibili bhobhomu-o mabhelo. Pipita-a, bhelé na okpála koko-o, u abhi uo. Okoko-o, u abhi uo.

<sup>6</sup> A atigala nani ibili ka bhulu edyi-e bha ne koli kpála bini ani ti da natima e, bha ndili na bhobhoko gba ani bini na 'kpú bua ani-o. Ali soso hana-a, ani aha ani, ani atsia atima ani agba uo oo-o. Do ani de-e: «U amanga ndili gba ma-a mamanga.» <sup>7</sup> Engú bini, okpála angoo apa sunda o me: «Yi tsia nga la ndju kpála inde atigala galikpe ne edyi-o. Yi gogo! Ní bhelo ani, amba edyi-e kolo ibili pi ní.» <sup>8</sup> U aholo ani, u abhele ani, u atsia abhike kuo

† 11:26 11:26 Lukuluku inde-e, a bhú obhuku koko na didili u aye e bhú eli na giliki ade. [Engú bini, i du me yi nde mbu li okpála koko de-e, 'Dyi yi inde abhúlá-a 'é di osisiti 'ngú inde yi amene e de.]



ani alingo 'dyi.»<sup>9</sup> Abhomu-o, Yesu atsia ayi me: «Mbia inde-e, bhulu 'dyi-e amene pi? Ani agó, ani bhili okpála namene kulu bhú 'dyi-e hana. Pipita-a, ani há edyi-e, ani tsia pí pi okpála koko.<sup>10</sup> Yi atanga bha ndju Bhuku gba Ebhe-e uu? Li bili inde u aye lie me:

«Teme inde li okpála nayiki eti-e abhike e,  
akolo teme inde abi eti-e lib-homu.

<sup>11</sup> Ebhe Ngámá amene engú bhomu-o ngae.

Bhú djila ní-e, a ko engú na ngbéngbé!†»

<sup>12</sup> Li Yesu apa lie mo-o, obhulu yala gba ani-e atsia adu agili naholo ani. Padhá de, anga u adu ambila ndjindji me ani apa gbitaku bhomu-o pi o. Engú la bini, u adu adje tsulu ka bhiti okpála. Abhomu-o, u a'o ká ani, u atsia agbida.

*Engú pindji nakala mandjandja gba 'ngbé ngámá Kaisala*

*(Tsia bhú Mat. 22:15-22; di ne bhú Luk. 20:20-26.)*

<sup>13</sup> Abhomu-o, u atima té omuFalisai di ne okpála gba Elode me u nu agba Yesu, u gama 'ngú ne ani, amba u holo ani li 'li e.<sup>14</sup> U ago, u atsia apa pi ani me: «Musunu, ya ngambila ndjindji me mu ngapa kukulu 'ngú. Mu ne tsulu kpála belegu ade bini. Mu tsia di engbé gba kpála bini de. Engú bini, mu ngasuno engú gba Ebhe-e pi okpála bhú kukulu 'ngú. Lili aziba pi? U kala mandjandja gba Kaisala, 'ngbé ngámá na doto na Loma, ne me u akála de. A ayo me ya kala, ne me ya akála de?»<sup>15</sup> Yesu ambila kalí gba uo lie, abhomu-o, ani atsia ayi uo me: «Yi ngale ma ngubula ní? Yi go nga muma ne lí falanga bini, ma tsia!»<sup>16</sup> U ago ne lí falanga bini

pi ani. Ani atsia ayi uo me: «Kulu kpála di ne balua inde pépé inde-e, a ko naa da?» U agie pi ani me: «A ko naa Kaisala.»<sup>17</sup> Abhomu-o, Yesu atsia apa pi uo me: «Yi ha ehe bhende gba Kaisala-a pi Kaisala, amba yi ha la di bhende gba Ebhe-e pi Ebhe.» U atsia adu nangamba li ani naali.

*Engú pindji nazuku ka okpála (Tsia bhú Mat. 22:23-33; di ne bhú Luk. 20:27-40.)*

<sup>18</sup> Abhomu-o, oSadukai ago de Yesu. (Ngauo-o, u ziba nani naao de me okpála inde amu-o azúku mazuku-o de.) U atsia ayi Yesu me: <sup>19</sup> «Musunu, Moidje aye nani líli pi ní me: «† du me kpála bini nde akpi, ani 'o ká wala e me u nde zu ne ani de-e, a ayo me ndai ani ha oké ang-o, amba ani zu ndili pi ndai e inde akpi ko.»<sup>20</sup> La-a, a adu nani obhosi mananika bhú piga bini. Bhende na kalanu-o aha elø, ani akpi padhá me ani nde zu de.<sup>21</sup> Bhende na bhisi aha elø ang-o, ani akpi padhá me ani nde zu de. A akolo bhadi li kate bhende na bata moko.<sup>22</sup> Ndu obhosi bhomu-o mananika hana amu me u nde zu de. Pita ndu uo hana-a, elø-o atsia akpi di.<sup>23</sup> Li 'kpí li okpála inde amu-o azúku lie, elø ang-o adu naa da? Padhá de, anga ndu uo mananika hana aha nani ani!»

<sup>24</sup> Abhomu-o, Yesu atsia agie pi uo me: «Yi angita, anga yi mbila Bhuku gba Ebhe-e de, yi mbila la di angu gba Ebhe-e de.<sup>25</sup> Padhá de, anga li okpála inde amu-o azúku lie, u há lio de. Engú bini, u adu ibili maka oandjelu abhulá.<sup>26</sup> Li 'ngú bhende atsia nazuku ka okpála-a, yi tanga nga bhuku gba Moidje, li bili inde ani akpo 'ngú lie pindji tsá 'pó inde adu atsi-e di? Li bili bhomu-o, u aye me Ebhe apa pi ani me: «Ma ne Ebhe gba Abalahama, Ebhe gba Isaka, Ebhe

† 12:11 12:10-11 Tsia bhú Ets. 118:22-23.

gba Yakobho.»<sup>27</sup> Ebhe ne Ebhe gba okpála inde amu-o ade. Engú bini, aní mangbo ne Ebhe gba okpála inde ɔ́ ko. Yi angita bha ndjɔ́ na paká paká.»

*Líli inde ane ne engbé*

*(Tsia bhú Mat. 22:34-40; di ne bhú Luk. 10:25-28.)*

<sup>28</sup> Mɔ́suno bini na líli gba Moidje adje uo nedhinga u adu amene kpekebhe lie-o. Aní atsia au di maka lí Yesu agie 'ngú lie pí oSadukai ndjindji-o. Abhomu-o, aní adyudyo lie, aní atsia ayi Yesu me: «Líli inde ane ne engbé-e ngae dho?»<sup>29</sup> Yesu agie pí aní me: «Líli na bini inde ane ne engbé-e ngae inde: †salaele, djedje nga! Ebhe, Ngámá gba ní-e bha ne koli Ngámá kpi e kpi. <sup>30</sup> A ayo me kunda Ebhe, Ngámá gba mu-o ne bua mu hana, ne mukobho gba mu-o hana, ne mabhundja gba mu-o hana, la di ne angu gba mu-o hana.»<sup>†</sup> <sup>31</sup> Bhende na bhisi-e ngae inde: †A ayo me kunda kilí mu maka mo okunda limu lie makpe ko.† Líli bini ade inde ane obhobhomu-o ne engbé.»

<sup>32</sup> Abhomu-o, mɔ́suno na líli-e apa pí aní me: †A ndjindji naali, Mɔ́suno! Mo opa paká. Aní bha ne koli Ngámá ngae kpi e kpi, Ngámá koko ade, bha bini aní. <sup>33</sup> La di-e, a ayo me kpála kunda aní ne bua e hana, ne imbilangu gba e hana, ne angu gba e hana, amba aní kunda la di kilí e maka aní akunda lie lie makpe ko. Bhobhomu-o ndjindji ane natsulu oenu pí Ebhe di ne obhe u ahaha e pí aní ko.» <sup>34</sup> Líli Yesu au lie me aní agie 'ngú ne imbilangu-o, aní atsia apa pí aní me: †Mu de Nau gba Ebhe-e tsutsu ade.» Pipita-a, kpála bini le matá nayi Yesu belegu de bini.

*Masiya ne ngámá gba Davidi*

*(Tsia bhú Mat. 22:41-46; di ne bhú Luk. 20:41-44.)*

<sup>35</sup> Líli Yesu adu asuno lie pí okpála bhú 'ngbé 'ti Ebhe gba omaYuda-a, aní atsia adu ayi me: †Lele pí líli omɔ́suno na líli gba Moidje tí da napa lie me Masiya ne ndíli gba Davidi-e? <sup>36</sup> Padhá de, anga ngaani Davidi makpe-e bhú nateteke gba Bu Bhobua apa nani me:

†Ebhe Ngámá apa pí ngámá gba ma-a me:

Du lí pá 'kpa ma na kokpa, akolo lí nedhinga inde ma a'ó obhulu yala gba mu-o lie

sa 'dhu mu ko.»<sup>†</sup>

<sup>37</sup> Davidi ngae makpe nga'i Masiya me †Ngámá.» Lele pí aní nde la lie ne ndíli gba Davidi-e?» Bhiti okpála na bhibhiti adu nadjé aní ne djali naali.

*Yi lila liyi ka omɔ́suno na líli gba Moidje malila*

*(Tsia bhú Mat. 23:1-36; di ne bhú Luk. 20:45-47.)*

<sup>38</sup> Yesu adu apa pí okpála bhú nasuno gba e me: †Yi lila liyi ka omɔ́suno na líli gba Moidje malila. Padhá de, anga ngauo-o, u kunda bha nadhuku ne ondjangja yambu, di ne me u du nayi o maka ongámási líli obíli inde líli okpála apɔ́pɔ́kɔ́bhe bhúla o líli e-o. <sup>39</sup> U kunda bha nadulu pí odabíli na akalanu bhú oeti nadjé líli gba Moidje , di ne pí odabíli na akalanu bhú da oanokomia. <sup>40</sup> U ngabha oehe gba oekesi na olisilisi. U ngayo Ebhe ngengele ngubula me okpála u o. Kaka-a, u asía mangimbo ane bhende gba okpála koko mane.»

*Makiso gba oko bini na oelɔ*

*(Tsia bhú Luk. 21:1-4.)*

<sup>41</sup> Yesu adu líli bíli líli sanduku na makiso na 'ngbé 'ti Ebhe-e adu

† 12:30 12:30 Tsia bhú Det. 6:4-5. † 12:31 12:31 Tsia bhú Lev. 19:18. † 12:36 12:36 Tsia bhú Ets. 110:1.

nadụ li e, ne li pápá na abhúbhúla. Yesu adụ atsia maka li okpála adụ na'o makiso lie bhúbhú-o. Kambì obhulú tia adụ na'o tia bhelé. <sup>42</sup> Engú bini, òkò bini na òelò, bhulú ndìbhìli ago. Anì aha bha naae djedje lí falanga bhisi padhá má kpíkìli! <sup>43</sup> Abhomu-o, Yesu a'i omukpata gba e-o. Anì atsia apa pí uo me: «Ma apa pí yì na paká me, òkò na òelò inde naae ne bhulú ndìbhìli inde-e, aha makiso ane ndù okpála inde a'o makiso bhú sanduku inde-e hana. <sup>44</sup> Padhá de, anga ndù okoko hana, u aha tia bhende u nde ne gumu e ade ko. Engú bini, ngaani, bhú ndìbhìli gba e, anì aha ndù bhende adù ka e, inde anì adù akobho li e hana-o.»

## 13

*Yesu apa me 'ngbé 'ti Ebhe gba omaYuda atúko kuto*  
(Tsia bhú Mat. 24:1-2; di ne bhú Luk. 21:5-6.)

<sup>1</sup> Nedhinga li Yesu adù akoto lie bhú 'ngbé 'ti Ebhe gba omaYuda-a, sùka omukpata gba anì bini atsia apa pí anì me: «Musuno, tsitsia nga! Ae mangua babadha ka oteme dho! Ae mangua babadha ka oeti dho!» <sup>2</sup> Yesu atsia agie pí anì me: «Mo ou ongbengbe 'ti inde ayiki lie inde-e au? Oteme bhomu-o, susùka bini tígala pí kilì e de. Ndùndù hana atúko kuto.»

*Engú inde akólo kala sokpí-o*  
(Tsia bhú Mat. 24:3-14; di ne bhú Luk. 21:7-19.)

<sup>3</sup> Lí Yesu adù lie pí eta na ondula na Olive bhúla 'ngbé 'ti Ebhe gba omaYuda-a, Piele, Djaki, Djaa ne Andìli adù ne anì títì o. U atsia ayi anì me: <sup>4</sup> «Pa nga pí ya me engú ango-o akólo nadho? Ehe inde asúno la di me ndù 'ngú hana adji andjia adú ní?»

<sup>5</sup> Abhomu-o, Yesu aholo napa pí uo me: «'E-e! Kpála bini apite yì de! <sup>6</sup> Okpála bhelé agó amene

engú ne 'li ma ne napa me: «Ma ne Masiya !» U tsia píte okpála bhelé. <sup>7</sup> Nedhinga yì adjé ngali na oegú di ne dhukudhuku na oegú lie, yì adjé tsulú de, anga a ayo me oengú ango-o kolo. Engú bini, adú nga bhomu-o sokpí-e de. <sup>8</sup> Padhá de, anga okpála na kuti bini atí 'gú li okpála na kuti koko. Ngámá na kuti bini atí 'gú li ngámá na kuti koko. Oadjigidjo na ngbengbengbe adyíkì doto li obili ngangá. Ehe nazú mazú dú ka okpála belegu de bini. A adú maka li bhú 'bu òlò azuzú lie kala nazu ka e-o.

<sup>9</sup> 'E-e! Yì lila liyì malila. Padhá de, anga okpála agbé yì bhú ngbanga kala ongámási, di ne abhú oeti nadje líli gba Moidje . U abhí yì, u apándja yì kala okpála natsia 'kpí li ndu doto di ne kala ongbengbe ongámási ngubula ma, amba yì kpokpo 'ngú gba ma kala uo. <sup>10</sup> Padhá de, anga a ayo ngaiza me u kpokpo Bádha Ngali pí ndù opiga hana. <sup>11</sup> Lí nedhinga u anú ne yì lie kala ongámási ngú nakodho 'ngú gba yì-e, bua yì agúkú de me ní apá pí-ie de. Engú bini, engú inde akóto bhú 'bhò yì li nedhinga bhomu-o, yì de pa bha e. Padhá de, anga engú yì apá e yíe ka yì de. Engú bini, ayíe ka Bu Bhobua .

<sup>12</sup> Kpála apú ndai e na bhobhoko me u bhòlò anì. 'Dyi ndìli améne bhadi moko li pabìli gba ndìli gba e. Lí ongisì kólo obhulú yala gba odyi o, u tsia pí uo me u bhìli uo. <sup>13</sup> Ndù okpála hana ayála yì kabula 'ngú gba ma. Engú bini, kpála bhende alú kpekpeke akólo lí soso-o, akóbho ngae.»

*Likabhu na ngbéngbé inde akólo kala sokpí-o*

(Tsia bhú Mat. 24:15-28; di ne bhú Luk. 21:20-24.)

14 «Yi aú kpála inde u a'i e me <Siti bhulu nabhelo kuti-e†> adu li bili inde i ti de me ani du lie de-o. (A ayo me kpála atanga bhuku inde-e, ke mbolimboli ndjindji!) Abhomu-o, obhende adú abhú Yudaya-a, a ayo me u kpe apí oeta. 15 Kpála inde adú apí 'ngbu 'ti-e, a ayo de me ani ke ngu nanu abhú 'ti gba e naha 'he bini-e de. 16 Kpála bhende adú abhiye-e, a ayo de me ani gie lie naha bongo gba e de. 17 Li 'kpí ang-o, a adú likabhu na ngbéngbé pi olisi na 'bhi di ne obhende li ongisi adu andji 'ka o-o! 18 Yi yo Ebhe ngubula me engú ang-o akólo li nedhinga na zini de.

19 Padhá de, anga oekpí ang-o adú oekpí na likabhu u u nga ngua e de, nayie maka li Ebhe abho doto lie nakolo pi mbia inde. La di-e, u ú matá ngungua de. 20 † dú me Ngámá gbótelo oekpí ang-o de-e, kpála bini de tí da nadu bhú mukobho de. Engú bini, ani agbótelo oekpí ang-o ka okpála bhende ani alo o ko. 21 † du me kpála bini nde apa pi yi me: <Yi tsitsia, Masiya sii!>, i du di-e me: <Yi tsitsia, ani abhe!>, yi aziba kpála ang-o de. 22 Padhá de, anga omasiya na eu di ne opolofeta na eu agó mago. U améne ongu na ngangamba di ne okiaka 'ngú ngú napite okpála. Li angu uo kolo-o, u apite belegu okpála li Ebhe alo o-o. 23 La-a, ngayie, yi tsia 'kpí liyi ndjindji, anga ma agbele 'dje yi li ndu 'ngú hana kalanu.»

*Nago gba Ndili gba kpála*

(Tsia bhú Mat. 24:29-31; di ne bhú Luk. 21:25-28.)

24 «Engú bini, li oekpí ang-o, pita likabhu bhomu-o, li ela kólo biti,  
epe sú matá-a de,

25 oikupala ahólo nabala kuto, oangu inde abhúlá adyiki má djigi djigi!†

26 Abhomu-o, u ú Ndili gba kpála nago bhú ndindi, ne ndu angu di ne ndu sangu gba e hana.† 27 Ani atíma oandjelu li odje bili badha hana ngu napo bhúla obhende ani alo o-o, abana u du bha su-oie.»

*Gbitaku pindji ndula na figi*

(Tsia bhú Mat. 24:32-35; di ne bhú Luk. 21:29-33.)

28 «Yi ke mboli nasuno inde li ndula na figi asuno e-o. † du me yi nde au me oyáyá angbongbølo-o, di me okpákpa-a nde akø-o, yi de mbila me gbokokpi ibili masikpe. 29 A bhadi moko. Ngayi di-e, nedhinga yi aú engú bhomu-o ngakolo lie, yi mbila me nago gba Ndili gba kpála akolo masikpe. Ani li obhøbhoti gba yi-o. 30 Ma apa pi yi na paká me, nedhinga na engú ang-o akólo makolo, me ndu okpála inde-e nde ndjia nga ndu o hana de. 31 Ekpí ne doto andjia mandjia. Engú bini, oeli gba ma-a adú duduma ne duduma.»

*Yi lila liyi*

(Tsia bhú Mat. 24:36-44.)

32 «Engú bini, ekpí di ne nedhinga li ongu bhomu-o akólo lie, kpála bini mbila de, belegu de oandjelu abhúlá, belegu de Ndili-o. Ambila bha ne 'Dyi ma kpi e kpi. 33 'E-e! Yi alá-a de, anga yi mbila nedhinga li engú ang-o agó lie de! 34 A adú maka kpála bini inde adji enú: ani a'o ká eti gba e pi obhulu kulu gba e me u du atsia 'kpí tété. Ani aha kulu namene mamene pi kpála bini ne bini. Ani aha líli pi mulila me ani alá-a de. 35 Kaka-a, yi alá-a de, anga yi mbila nedhinga li bhulu

† 13:14 13:14 Tsia bhú Dan. 9:27, 11:31, 12:11. † 13:25 13:24-25 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10, 3:4. † 13:26 13:26 Tsia bhú Dan. 7:13.

eti-e agie lie lie de! Nedhinga koko adú tagolo, koko adú tutu sukpe, koko adú bhú 'gbá 'ngú na bini, koko adú kékpi. <sup>36</sup> Ani koto la di-e má gbilikiti-e, a ayo de me ani bhaka yi tila-a de! <sup>37</sup> Engú inde ma ngapa e pi yi-e, ma ngapapa pi ndu okpála hana me: «Yi alá-a de!»

## 14

*Ongámási gba omaYuda agili nabhøle Yesu*  
(*Tsia bhú Mat. 26:1-5; ne bhú Luk. 22:1-2; di ne bhú Dja. 11:45-53.*)

<sup>1</sup> A adu nani 'kpí bhisi kala anokomia na Pasika, ne kala anokomia nazu mapa inde li levile nde bhú e ade-o. Ongbengbe odimandø di ne omusuno na líli gba Moidje adu agili me o hólo Yesu bhú pepe lele pi, amba o bhøle ani-e. <sup>2</sup> U adu apa me: «A ayo de me ní holo ani bhú nedhinga na anokomia de, anga ní mene mo-o, li okpála gbé tolo.»

*Ølø bini atuko mungotsi pí 'ndji Yesu*

<sup>3</sup> Yesu adu bhú kuti na Betania bhú 'ti gba Simo, bhulu kába-o. Nedhinga u adu lie nazu 'he-e, ølø bini ago ne gili inde u amene e li alabatele.\* A adu bhúbhú ne tiki mungotsi na nalade.† A adu la di bhú kpéke mase. Ani agumu gili na alabatele-o, ani atsia atuko mungotsi angoo pí 'ndji Yesu. <sup>4</sup> Okpála koko a adu apa sunda o ne ke bua me: «Mungotsi inde-e ngasiti lie me-e ka ni? <sup>5</sup> U ti nako da natsitsindji ngú lí denalio ane kámá bata mane. U tsia há tia angoo pi obhulu ndibhili!» U atsia adu ake 'ngú lio pi ølø angoo.

<sup>6</sup> Engú bini, Yesu apa me: «Yi 'o ani. Yi ngato mbolo li ani ngú ni?»

Ani amene muma bhomu-o bádha 'ngú. <sup>7</sup> Padhá de, anga ngayi-e, yi ngadu ne obhulu ndibhili ndu 'kpí hana de yi. Nedhinga yi kunda lie, yi ti da namene bádha 'ngú pi uo. Engú bini, ngama-a, ní ne yi ndu 'kpí hana ade. <sup>8</sup> Bhende ani ati nako da namene e, ani amene: ani apulu mungotsi li kute ma kalanu ngú nazi ma ko. <sup>9</sup> Ma apa pi yi na paká me, ndu bili hana inde u akpokpo Bádha Ngali lie píla doto libhomu-o, u akpókpo di engú ani amene e, li okpála du di abhundja ani.»

*Yuda Isikaliote agili kpadji napu Yesu*

(*Tsia bhú Mat. 26:6-13; di ne bhú Luk. 12:1-8.*)

<sup>10</sup> Abhomu-o, Yuda Isikaliote, saka omukpata ndjikpa ne ká bhisi-e anu agba ongbengbe odimandø ngú napu Yesu pi uo. <sup>11</sup> U adje engú bhomu-o lie, u akpi ndjili naali. U atsia apa me o há pi ani tia. Abhomu-o, Yuda atsia adu agili bádha nedhinga ngubula napu Yesu pi uo.

*Omukpata gba Yesu anu naleke da anokomia na Pasika*

(*Tsia bhú Mat. 26:17-25; ne bhú Luk. 22:7-14; di ne bhú Dja. 13:21-30.*)

<sup>12</sup> Ekpí na bini na anokomia nazu mapa inde li levile nde bhú e ade-e, ekpí u adu abhøle kandøle lie ngubula Pasika-a, omukpata gba Yesu ayi ani me: «Mo okunda me ya nu leke da nazu Pasika pi mu su?» <sup>13</sup> Abhomu-o, ani atima omukpata bhisi bhú ká omukpata gba e-o. Ani atsia apa pi uo me: «Yi nu bhú gudhu, yi aké liyi ne bhoko bini inde abi lusa 'ngu, yi kpata ani. <sup>14</sup> Bili inde ani alí li e-e, yi de pa pi bhubhulu-o me: «Musuno apa me: tina 'ti inde

\* **14:3** 14:3 Alabatele: A ko teme na mase naali inde u abhobho oehe maka gili li e ko. † **14:3** 14:3 Nalade: A ko mungotsi inde u amemene e li 'kpá ulu. Tsia bhú Mat. 26:7.

mo oleke e muma ne omukpata gba ma ngu nazu Pasika tete-e ngae dho?»<sup>15</sup> Abhomu-o, ani asuno tina 'ti inde abhala-a pi yi. A ngbengbe, u aleke ndjindji, ndu 'he hana bhuhbu bedhe. A bhomu-o bili inde yi alake da anokomia pi ni li e ko.»

<sup>16</sup> Omukpata-a agbida. U anu abhu gudhu. U atsia abhaka ndu 'ngu hana maka li Yesu apa pi uo lie ko. Abhomu-o, u atsia ala ezu na Pasika-o.

*Yesu apa me suka omukpata bini apu ni*

<sup>17</sup> A akolo lie tagolo-o, Yesu ne omukpata gba e ndjikpa ne ka bhisi-e akolo.<sup>18</sup> Nedhinga u adulu lie pi misa me u nde ngazu 'he-e, Yesu atsia apa me: «Ma apa pi yi na paká me, suka yi bini, inde ngazu 'he ne ma-a, apu ma.»<sup>19</sup> Omukpata-a abedhe ne babuma li bua o bedhe. U atsia aholo nayi ani bini ne bini me: «A adu ma?»<sup>20</sup> Ani apa pi uo me: «A ko suka yi omukpata ndjikpa ne ka bhisi-o, bhende i ngato 'kpa e ne ma bhú saani-o.»<sup>21</sup> Ndili gba kpala akpi bha na paká maka u aye lie bhú Bhuku gba Ebhe li 'ngu gba ani-o. Engu bini, a ko likabhu pi kpala inde apu Ndili gba kpala-o. A belegu nako pi kpala angoo ndjindji me u azu ani de!»

*Yesu aha mapa ne vino pi obhulu titima gba e-o*

*(Tsia bhú Mat. 26:26-30; ne bhú Luk. 22:14-20; di ne bhú 1 Kol. 11:23-25.)*

<sup>22</sup> Nedhinga u adu azu 'he lie, Yesu aha mapa-o. Pipita-a, ani agie heni pi Ebhe. Ani atsia agumu bhusu bhusu, ani atsia aha pi uo. Do ani de-e: «Yi haha, a inde-e kute ma.»<sup>23</sup> Pipita-a, ani aha kopo-o, pita ani agie heni lie

pi Ebhe-e, ani atsia aha pi uo. U atsia andji ndu o hana.<sup>24</sup> Ani atsia apa pi uo me: «A inde-e ngute ma, ngute na gandja inde atuko lie pi bhiti okpala-o.»<sup>25</sup> Ma apa pi yi na paká me, ma andji matá galikpe li ndula na vino belegu de bini, akolo li 'kpi inde ma andji matá lie ne toto bhú Nau gba Ebhe-o.»

<sup>26</sup> Pita u ali 'tsi† lie, u aze ngu nanu pi 'ta na ondula na Olive.

*Yesu apa me Piele ayala ni*  
*(Tsia bhú Mat. 26:31-35; ne bhú Luk. 22:31-34; di ne bhú Dja. 13:36-38.)*

<sup>27</sup> Abhomu-o, Yesu apa pi uo me: «Ndu yi hana, yi a'ó ka ma, anga u aye bhú Bhuku gba Ebhe-e me:

«Ma asu mulila gba okandelo-o, li ongisi kandelo-o gbongbolo ne bili nganga.†»

<sup>28</sup> Engu bini, ma azuku lie, ma anu adjeke yi abhu Galilaya.»<sup>29</sup> Piele atsia apa pi ani me: «Belegu li ndu okpala hana 'o ka mu-o, ngama de!»<sup>30</sup> Yesu atsia apa pi ani me: «Ma apa pi mu na paká me, ngamu-o, sukpe na naki inde-e, kala me engu ku 'gbá bhutsibhutsi bhisi-e, mo opa bhutsibhutsi bata me ni mbila ma de.»<sup>31</sup> Engu bini, Piele atsia apa matá ne kekele me: «Abana i yo bha me ma kpi bhú dabili bini ne mu-o, ma atsé mu de!» Abhomu-o, ndu uo hana atsia apa bhadi moko.

*Yesu ayo Ebhe bhú Getesemani*  
*(Tsia bhú Mat. 26:36-46; di ne bhú Luk. 22:39-46.)*

<sup>32</sup> Pipita-a, Yesu ne omukpata gba e akolo li bili inde u a'i e me Getesemani. Ani atsia apa pi uo me: «Yi dula kuto si, nedhinga inde ma adu lie nayo Ebhe ko.»

† 14:26 14:26 Etsi: Etsi inde si-e, a ko bhende bhú bhuku na Etsi gba omaYuda ko. OmaYuda du nani alili li 'so anokomia na Pasika. Tsia bhú Mat. 26:30. † 14:27 14:27 Tsia bhú Djkl. 13:7.

<sup>33</sup> Aní anu bhú dabili bini ne Piele, Djaki ne Djaa . Abhomu-o, tsulu aholo aní, aní aholo azu likabhu li bua e. <sup>34</sup> Aní atsia apa pi uo me: «Bua ma abedhe ne likabhu bedhe ka ma adjí akpi lie-o. Yi tigala si, yi alá-a de!»

<sup>35</sup> Pipita-a, aní anu mbo tsutsu bedi. Aní atsia agu 'i e bhú doto. Aní atsia adu ayo Ebhe ngubula e me i du me a nde alé male-e, nedhinga bhomu-o de kodho 'kpi de ni tsutsu. <sup>36</sup> Aní adu apa me: «Aba, 'Dyi ma, kpeke da 'ngú pi mu ade. 'E kópo na likabhu<sup>§</sup> inde-e de ma ma'e! Engú bini, mo oméne maka ma akunda lie de, mene mangbo maka mo okunda lie ko!»

<sup>37</sup> Yesu agie lie, aní abhaka omukpata gba e bata me u nde tila. Do aní pi Piele de-e: «Simo, mu ngala-a? Mu sia angu ngú nadu ndila belegu de ngubula saa bini? <sup>38</sup> Yi alá-a de, yi yo Ebhe, amba yi alí bhú nale de. Bua kpála dudu bedhe ne angu, engú bini, kute aní bhubhuku.»

<sup>39</sup> Pipita-a, Yesu atuto matá lie mbo tsutsu masudha. Aní atsia ayo Ebhe ne oeli bini bhomu. <sup>40</sup> Abhomu-o, aní ago matá, aní abhaka uo tila, anga djila uo adu me a nde ali tili ne ela má yikpokpo! U tsia du nambila de me o opá pi aní pi-ie de. <sup>41</sup> Bhutsibhutsi na bata, aní ago. Aní apa pi uo me: «Yi nga bha ngala di ne nago? A andjia, nedhinga akolo. Yi tsitsia nga, u apú Ndili gba kpála mbia inde-e pi obhulu siti 'ngú. <sup>42</sup> Yi yie bhulá, ní nanu! Yi tsitsia nga, kpála inde i ngapu ma-a, akolo!»

*U aholo Yesu*

*(Tsia bhú Mat. 26:47-56; ne bhú Luk. 22:47-53; di ne bhú Dja. 18:3-12.)*

<sup>43</sup> Bha li nedhinga li Yesu adu ngabha lie agama 'ngú-o, Yuda,

suka obhulu titima ndjikpa ne ká bhisi-e, akoto li uo bhú dabili bini ne okpála inde adu sa 'kpa o ne tia 'gú: ombotia ne ondula. U ago me a nde atima uo ne ongbengbe odimandø, ne omusuno na líli gba Moidje di ne obhelesi okpála.

<sup>44</sup> Yuda, kpála inde apú Yesu-o, adje lie ne uo me: «Kpála inde ma anvú pabhø e, a ko aní! Yi holo aní, amba yi nu ne aní ne nalila aní ndjindji.» <sup>45</sup> Nedhinga li aní akolo lie, aní atuto lie de Yesu. Aní atsia apa pi aní me: «Labi!» Aní atsia anvú pabhø aní. <sup>46</sup> Okpála bhe koko abu 'kpa o li aní, u atsia aholo aní.

<sup>47</sup> Suka okpála inde adu oo agbe mbotia gba e-o. Aní asu kpála na kulu gba bhele kpála gba odimandø-o , aní atsia akodho 'dje aní má tse! <sup>48</sup> Abhomu-o, Yesu atsia apa pi uo me: «Yi ago ngú ma ne ombotia di ne ondula mugito me ma ne bhulu 'zi! <sup>49</sup> Ma du nako ndu 'kpi hana bhú ká yi bhú 'ngbé 'ti Ebhe gba omaYuda ngú nasuno, yi tsia holo ma de. Engú bini, a ko ngubula me engú inde u aye e bhú Bhuku-o mene lie.» <sup>50</sup> Abhomu-o, ndu omukpata hana a'o ká aní. U atsia akpekre. <sup>51</sup> Makombi bini adu akpata Yesu me aní nde abuku kute e bha ne mbulu daladeli. U aholo aní. <sup>52</sup> Engú bini, ngaani-e, aní abala 'kpa li daladeli-o, aní atsia ayiki lie ne holo ndumbu.

*U anu ne Yesu kala Libi okpála natsia 'kpi li 'ngú gba omaYuda*

*(Tsia bhú Mat. 26:57-68; ne bhú Luk. 22:54-55, 63-71; di ne bhú Dja. 18:13-14, 19-24.)*

<sup>53</sup> Abhomu-o, u anu ne Yesu kala bhele kpála gba odimandø-o. U atsia apo bhula o ndu o hana: ongbengbe odimandø, obhelesi okpála di ne omusuno na líli gba Moidje. <sup>54</sup> Piele adu akpata

§ 14:36 14:36 Kópo na likabhu: Bhú eli na giliki-e, u aye bha me kópo.

Yesu mbo tsutsu. Aní atsia akolo bhú mbadhasu gba bhele kpála gba odimandø-o. Aní adu kuto, aní atsia adu atu djua bhú dabili bini ne omulila.

<sup>55</sup> La-a, ongbengbe odimandø bhú dabili bini ne Libi okpála natsia 'kpí li 'ngú gba omaYuda adu naao agili kpála inde agó apa 'ngú li kute Yesu sisiti, amba o kodho 'ngú gba ani-e me ani kpi. Engú bini, u u de. <sup>56</sup> Okpála bhelé adu apa 'ngú li Yesu ne eu. Engú bini, ongu u adu apa e, a go li kpadji bini de. <sup>57</sup> Okpála bini bini adu ayie bhúlá ne napa 'ngú li ani ne eu me: <sup>58</sup> «Ya adje ani me ani nde ngapa me: «Ngama-a, ma abhéle 'ti Ebhe inde li okpála amene e inde. Pita 'kpí bata, ma tsia yiki koko inde li 'kpa kpála mene e de.» <sup>59</sup> Engú bini, abana u adu apa lie mo-o, u du adje lio bhú nakpokpo 'ngú angoo de.

<sup>60</sup> Abhomu-o, bhele kpála gba odimandø-o ayie bhúlá bhú ká okpála-o. Aní atsia ayi Yesu me: «Mu gie 'ngú li kute engú u ngakpokpo e li mu-o di?» <sup>61</sup> Engú bini, ngaani-e, ani andjili bha má bulu, ani gie engú bini de! Bhele kpála gba odimandø-o atsia ayi matá ani me: «Mu ne Masiya , Ndili gba Ebhe inde li okpála ngadhøe e?» <sup>62</sup> Yesu agie me: «A moko, ma ne ani. Yi au Ndili gba kpála adu li pápá na kokpa gba Angbamili me ani nde ngago ne ndindi na abhúlá.†»

<sup>63</sup> Abhomu-o, bhele kpála gba odimandø-o asidha bongo gba e. Aní atsia apa me: «Ní matá ne gumu okpála koko ngú nakpokpo 'ngú gba ni-e ade! <sup>64</sup> Yi adje maka ani asobho Ebhe lie adje. Yi apa tété pi?» Abhomu-o, ndu uo hana akodho 'ngú gba ani-e me ani ati ne nakpi. <sup>65</sup> Bini bini bhú ká uo

aholo aku ngusu li ani. U atsia adu di abuku bhúla ani, asu ani ne napa pi ani me: «Pa pi ya me asu mu da!» Omulila-a aha ani, u atsia aholo di nasu ani.

*Piele apa me ni mbila Yesu de (Tsia bhú Mat. 26:69-75; ne bhú Luk. 22:56-62; di ne bhú Dja. 18:15-18, 25-27.)*

<sup>66</sup> Nedhinga li Piele adu nga bha lie tu mbadhasu-o, suka okpála na kulu bini na øelø gba bhele kpála gba odimandø ago. <sup>67</sup> Aní au Piele lie ngatu djua-a, ani atsia ani má suu! Aní atsia apa pi ani me: «Ngamu di-e, mo odu nako bhú dabili bini ne Yesu, kpála na Nadjaleta-o!» <sup>68</sup> Engú bini, Piele ayaya. Aní atsia apa me: «Ma mbila de. Ma kø di mboli engú mu ngakunda napa e de.» Abhomu-o, ani akoto kilidjo bhú mbaladja. [Pipita-a, engu atsia aku 'gbá.]

<sup>69</sup> Engú bini, kpála na kulu na øelø angoo au ani. Aní atsia apa matá bhú djila okpála inde adu oo me: «Kpála inde aoo, a ko di suka uo!» <sup>70</sup> La-a, Piele ayaya matá. Pita nedhinga masudha, okpála inde adulu oo apa matá pi Piele me: «A ko paká, mu ne suka uo, anga ngamu di-e mu ne kpála na Galilaya.» <sup>71</sup> Engú bini ngaani-e, ani aholo natu silika ne nasima me: «Ma mbila kpála inde yi ngapa 'ngú gba e muma bhomu-o de!» <sup>72</sup> Má gala kolo me-e, engu atsia aku 'gbá bhutsibhutsi na bhisi. Abhomu-o, Piele abhundja engú inde li Yesu apa igini e pi ani me: «Kala me engu ku 'gbá bhutsibhutsi bhisi-e, mo opá bhutsibhutsi bata me ni mbila ma de.» Aní atsia akoto ne holo ne naku 'gbá.

## 15

*U anu ne Yesu kala Pilato (Tsia bhú Mat. 27:1-2, 11-14; ne*

† 14:62 14:62 Tsia bhú Ets. 110:1; di ne bhú Dan. 7:13.



*bhú Luk. 23:1-5; di ne bhú Dja. 18:28-38.)*

<sup>1</sup> Kòkpí má bhè, ongbengbe odimandè gba Ebhe-e apo bhúla o bhú bula. U adu bhú dabili bini ne obhelesi okpála, ne omusuno na líli gba Moidje, la di ne Libi okpála natsia 'kpí li 'ngú gba omaYuda libhomu. U agbite Yesu ne ekpu, u anu ne ani, u atsia aha ani pi Pilatè. <sup>2</sup> Pilatè ayi ani me: «Mù ne 'ngbé ngámá gba omaYuda?» Yesu agie pi ani me: «Mù ngapapa ngamù.» <sup>3</sup> Ongbengbe odimandè adu apa osisiti 'ngú bhelé li kute ani. <sup>4</sup> Abhomu-o, Pilatè atsia ayi matá ani me: «Ndu 'ngú inde u ngapa e li kute mu inde-e, mu gie 'ngú tété bini di?» <sup>5</sup> Engú bini, Yesu gie 'ngú tété belegu de bini. Kaka-a, Pilatè angamba naali.

*U akodho 'ngú gba Yesu me ani kpi bha makpi*

*(Tsia bhú Mat. 27:15-26; ne bhú Luk. 23:13-25; di ne bhú Dja. 18:39 – 19:16.)*

<sup>6</sup> Bhú ndu anokomia na Pasika hana, a ayo me Pilatè tse 'kpa li kpála bini inde u aholo e bhú tikpu-o pi omaYuda. A ayo me a adu bhende li okpála ayó me Pilatè tse 'kpa li e ko. <sup>7</sup> A abhaka me kpála bini inde u a'i e me Balabasi nde bhú tikpu. A adu me u nde aholo ani bhú dabili bini ne okpála na kpekpeke 'ndji me u nde abhèlè kpála bini bhú nedhinga u agbe kpéke 'ndji lie-o. <sup>8</sup> Abhomu-o, bhiti okpála anu abhaka Pilatè, u atsia aholo nayo me Pilatè mene pi o maka ani amemene lie gòmè gòmè-o.

<sup>9</sup> Pilatè agie pi uo me: «Yi akunda me ma tse 'kpa li 'ngbé ngámá gba omaYuda pi yi?» <sup>10</sup> Padhá de, anga ani adu ambila ndjindji me ongbengbe odimandè apu Yesu, anga okpála adu ne mukunda naali pi Yesu.

<sup>11</sup> Abhomu-o, ongbengbe odimandè atsia ato bhú okpála bhelé me u yo me Pilatè tse mangbo 'kpa li Balabasi. <sup>12</sup> Pilatè atsia ayi bha matá uo me: «A ayo la me ma mene ngú kpála bhende yi nga'i e me 'ngbé ngámá gba omaYuda-a pi?» <sup>13</sup> Okpála bhomu-o atsia agie ne nasusula me: «Gi ani li kulusi!» <sup>14</sup> Pilatè atsia adu ayi uo me: «Ani amene la mangua siti 'ngú dho?» U asusula matá kpekpeke naali ne na'e'e 'li o ne abhúla me: «Gi ani li kulusi!» <sup>15</sup> Abhomu-o, Pilatè atse 'kpa li Balabasi pi uo, amba ni atsógbolo bua uo de. Ani aha líli me u bhi Yesu ne fimbo, pipita-a, ani atsia aha ani pi uo me u gi ani li kulusi gigi.

*Osudha amu Yesu*

*(Tsia bhú Mat. 27:27-31; di ne bhú Dja. 19:2-3.)*

<sup>16</sup> Abhomu-o, osudha aha Yesu, u atsia anu ne ani tu mbadhasu gba Pilatè. U a'i ndu osudha koko hana. <sup>17</sup> U ato bongo na zumbe zumbe li kute ani, u atsia agala ehe na eti má kilili, u aha-a, a ato bhú 'ndji ani. <sup>18</sup> U atsia aholo nayi ani me: «'Ngbé ngámá gba omaYuda, atou!» <sup>19</sup> U adu abhi 'ndji ani ne mbamba, u atsia adu aku ngusu li kute ani. U atutu lipuku o kuto, u atsia adu ati kala ani. <sup>20</sup> Pita u amu ani lie má tsiki tsiki-e, u agbe bongo na zumbe zumbe-e li kute ani, u atsia agie obongo gba ani-e pi ani. Pipita-a, u atsia agbe ani kilidjo ngubula nagi ani li kulusi.

*U agi Yesu li kulusi*

*(Tsia bhú Mat. 27:32-44; ne bhú Luk. 23:26-43; di ne bhú Dja. 19:17-27.)*

<sup>21</sup> Abhomu-o, osudha aholo kpála bini ne kpéke me ani bi kulusi gba Yesu-o. A adu 'li kpála anga-o me Simo, a adu 'dyi Alekidjandele ngauo ne Lufusi. A adu kpála na gudhu na Silene. U

aholo ani me ani nde ngakodho 'kpí oo nedhinga ani adu agie lie lie abhiye-o. <sup>22</sup> U anu ne Yesu li bili inde u a'i e me Gologota, (a akunda napa me «bili na pelege 'ndji»). <sup>23</sup> U adu akunda naha vino inde u akpõtse e ne mila pi ani. Engú bini, Yesu ndji de.

<sup>24</sup> U agi ani li kulusi. U agbogbo bhusu o li obongo gba ani-e me u nde agu ngaiza tété gbanda ngú nambila bhende a ayo me kpála bini ne bini sia e ko. <sup>25</sup> U agi Yesu li kulusi bhú saa na odukpabini kala tulukpe. <sup>26</sup> Balua inde u aye e ngú nasuno ta mangimbo gba ani-e aye nani lie me: «NGBÉ NGÁMÁ GBA OMA YUDA.» <sup>27</sup> U atsia agi la di bhú dabili bini ne ani-e, obhulu 'zi bhisi inde adu agbulu 'he gba okpála ne kpéke. Bini adu li kulusi gba e li pá 'kpa ani na kokpa. Koko atsia adu li kulusi gba e li pá 'kpa ani na gali. [ <sup>28</sup> Abhomu-o, eli gba Ebhe inde aye lie bhú Bhuku gba ani-e me: «U ato 'li ani bhú ká okpála na sisiti-e†», atsia amene lie.]

<sup>29</sup> Okpála inde adu akodho 'kpí oo adu asosobho ani. U adu ako 'ndji o, u atsia adu apa me: «He-e! Ngamu, kpála inde abhóló 'ngbé 'ti Ebhe gba oma Yuda, i tsia yiki sunda 'kpí bata-a, <sup>30</sup> kobho limu ngamu makpe, amba mu yie li kulusi-e kó kuto.»

<sup>31</sup> Ongbengbe odimandø gba Ebhe di ne omusuno na lili gba Moidje adu bhadi namu ani moko. U adu apa sunda o me: «Ani akobho okpála koko, ani ti da nakobho lie ngae makpe di! <sup>32</sup> Mbia inde-e, a ayo me Masiya, 'ngbé ngámá gba oma salaele yie li kulusi, ya u, amba ya bhuka.» Obhende u agi o ne li okulusi gba

o dengo ani-e adu bhadi namu ani moko.

*Yesu akpi*

(*Tsia bhú Mat. 27:45-56; ne bhú Luk. 23:44-49; di ne bhú Dja. 19:28-30.*)

<sup>33</sup> Tulukpe-e, bitu akø pí doto lib-homu, nakolo pi saa na bata pita tulukpe. <sup>34</sup> Abhomu-o, bhú saa na bata-a, Yesu asula kpekpeke me: «Eloi, Eloi, lama sabakatani?» (A akunda napa me, «Ebhe gba ma, Ebhe gba ma, mo o'o ká ma ka ni?»)<sup>†</sup> <sup>35</sup> Bini bini bhú ká okpála inde adu oo adje ani lie, u atsia apa me: «Yi djedje, ani nga'i Eliya!» <sup>36</sup> Saka kpála bini agu holo. Ani anu azi epondje bhú kpongadha pandi. Ani agbite li kute mbamba. Ani atsia aha pi ani me ani ndji ne napa pi obi e me: «Ayó nga! Ní tsia nga ne me Eliya agó ngú nakø ani li kulusi-e kuto.» <sup>37</sup> Engú bini, Yesu asula kpekpeke. Ani atsia akpi.

<sup>38</sup> Abhomu-o, lido\* inde adu agbo bhusu 'ngbé 'ti Ebhe-e asidha bhusu e bhisi má tsue nayie abhúlá, akolo akuto! <sup>39</sup> Ngámá gba osudha kámá bini inde adu bhúla ani au lele maka ani akpi lie, ani atsia apa me: «Kpála inde-e bha ndju nako ne ndili gba Ebhe kukulu!»

<sup>40</sup> Olisi bini bini adu di oo. U adu atsia 'ngú bhomu-o mbo tsutsu. Bhú ká uo-o, a adu nani Malia, kpála na gudhu na Magadala, Malia, 'hi Djodje ngauo ne Djaki bhe na makombi makombi-o, a la di-e Salome. <sup>41</sup> Nedhinga li Yesu adu lie bhú Galilaya-a, olisi bhomu-o adu adhuku bhú dabili bini ne ani. U atsia adu di ateteke ani. Olisi koko bhelé inde ayie nani ne ani bhú Yelusalema adu di oo.

† 15:28 15:28 Tsia bhú Isa. 53:12. † 15:34 15:34 Tsia bhú Ets. 22:2. \* 15:38 15:38 'Ngbé 'kpá bongo inde si-e, adu nani agbo bhusu tina 'ti na bubu-o, ne bhende na bubu naali bhú 'ngbé 'ti Ebhe gba oma Yuda ko. Tsia bhú Eki. 26:31-33, ne bhú Luk. 23:45, di ne bhú Ebe. 6:19.

*Djodjefu azi Yesu*

(*Tsia bhú Mat. 27:57-61; ne bhú Luk. 23:50-56; di ne bhú Dja. 19:38-42.*)

<sup>42</sup> A adu ibili tagolo. A abhaka la lie me a nde ekpí naleke lio ngú anokomia-a, a akunda napa me ekpí kala ekpí naguo gba omaYuda-a , <sup>43</sup> saka okpála na Libi okpála natsia 'kpí li 'ngú gba omaYuda ago. A adu 'li ani me Djodjefu , kpála na gudhu na Alimatayo. A adu kpála nakpe makpe. Ani adu di adjeke Nau gba Ebhe-o . Ani atsia asia kpéke bua ngú nali agba Pilatø ngú nanu ayo kuo Yesu. <sup>44</sup> Pilatø angamba naali nadje me Yesu akpí kolo akpi-o. Abhomu-o, ani a'i ngámá gba osudha-o. Ani atsia ayi ani me ani akpi igini bhutode i-e. <sup>45</sup> Pita nagie 'ngú tété ka ngámá gba osudha-a, Pilatø aziba pi Djodjefu naha kuo Yesu. <sup>46</sup> Abhomu-o, Djodjefu akala daladeli inde u amene e li lene. Ani akø kuo Yesu li kulusi-e kuto. Ani atsia agagala ne daladeli bhomu. Ani anu a'o bhú lata inde adu me u nde adji e bhú teme-o. Ani awawala 'ngbé teme li bhøbhø. <sup>47</sup> Malia, kpála na gudhu na Magadala ngauo ne Malia, 'hi Djodje adu atsia bili u a'o ani li e-o.

**16***Yesu azuku*

(*Tsia bhú Mat. 28:1-8; ne bhú Luk. 24:1-12; di ne bhú Dja. 20:1-20.*)

<sup>1</sup> Li ekpí naguo gba omaYuda akodho 'kpí lie, Malia , kpála na gudhu na Magadala, ne Malia , 'hi Djaki, bhú dabili bini ne Salome, akala emu inde bhú e ne mungotsi ngú nanu apulu kute kuo Yesu ne di. <sup>2</sup> Abhomu-o, bhú 'kpí yinga køkpi má bhø-o, nedhinga li ela adu akoto lie, u anu abhú lata.

<sup>3</sup> U adu apa sunda o me: «A atumba teme inde li 'bhø lata-a pi ní da?» <sup>4</sup> Engú bini, u atsia 'kpí lie me-e, u au me teme bhomu-o atumba lie atumba. Abana a adu lie ngbéngbé.

<sup>5</sup> U ali lie bhú lata-a, u au makombi bini ato 'ndjá yambu na bubu me ani nde adu li pápá na kokpa. U atsia adje tsulu naali. <sup>6</sup> Engú bini, makombi bhomu-o apa pi uo me: «Yi adjé tsulu de. Yi ngagili Yesu, kpála na Nadjaleta, inde u agi nako e li kulusi-o. Ani azuku. Ani sii ade. Yi tsia nga bili nako u a'o ani li e-o. <sup>7</sup> Yi nu pa mangbo pi omukpata gba ani di ne Piele me: «Ani akodho 'kpí pi yi bhú Galilaya kalanu. Yi aú ani oo maka ani apa nako pi yi lie ko.» <sup>8</sup> Abhomu-o, u aze bhú lata-a ne holo kilidjo, anga mabhundja gba uo angingi, kute uo atsia adu aguku. U tsia pa pi kpála de, anga u adu ne tsulu.

*Yesu akoto li Malia, kpála na gudhu na Magadala*

(*Tsia bhú Mat. 28:9-10; di ne bhú Dja. 20:11-18.*)

[ <sup>9</sup> Li Yesu azuku lie bhú 'kpí yinga køkpi-e, ani akoto ngaiza li Malia, kpála na gudhu na Magadala, inde ani apandja nani osisiti bua mananika bhú e-o.\* <sup>10</sup> Malia anu napapa pi okpála inde adu nani bhú dabili bini ne Yesu-o. U adu ne likabhu, u atsia adu di aku 'gbá. <sup>11</sup> Engú bini, li okpála bhomu-o adje lie me ani nu, di ne me Malia au ani-e, u bhuka ani de.

*Yesu akoto li omukpata bhisi*  
(*Tsia bhú Luk. 24:13-35.*)

<sup>12</sup> Pipita-a, Yesu asuno matá lie maka kpála koko pi omukpata bhisi inde adu li kpadji ngú nanu akuti-o. <sup>13</sup> Abhomu-o, obhobhomu-o ago apa pi okoko-o. Engú bini, okoko bhuka uo de.

\* **16:9** 16:9 Ongú nayie si akólo bhú 16:20, a bhú obhuku koko na didili-e ade.

*Yesu asuno lie pi omukpata ndjikpa ne ká bini*

*(Tsia bhú Mat. 28:16-20; ne bhú Luk. 24:36-49; ne bhú Dja. 20:19-23; di ne bhú Kul. 1:6-8.)*

<sup>14</sup> Li soso-o, Yesu atsia asuno lie pi obhulú titima gba e ndjikpa ne ká bini-e me u nde ngazu 'he. Abhomu-o, ani atsia agbele 'dje uo ka ndi nabhuka di ne kpéke 'ndji gba uo-o. Padhá de, anga u bhuka nani okpála inde au ani me ani nde azuku-o de. <sup>15</sup> Abhomu-o, ani atsia apa pi uo me: «Yi nu pila doto libhomu nakpokpo Bádha Ngali pi ndu okpála hana. <sup>16</sup> Kpála inde abhúka-a, inde asía la di batisimo-o, ani kóbho. Kpála bhende i bhúka de-e, asía mangimbo. <sup>17</sup> A inde-e ongú inde adhúku bhú dabilí bini ne obhende abhúka-o: u apándja osisiti bua bhú okpála ne 'li ma, u agáma 'ngú bhú odikongu na mbia. <sup>18</sup> U ahólo okpulú ne 'kpa o. I du di me u nde andji elá na bhelè kpála-a, a améne 'he bini ngú uo de. U a'ó 'kpa o pí 'ndji okpála na kuo, li okpála na kuo ango-o kóbho.»

<sup>19</sup> Pita napa ongú bhomu-o pi uo-o, Ebhe aha Ngámá Yesu abhúlá. Ani atsia adu kuto li pá 'kpa Ebhe na kokpa. <sup>20</sup> Abhomu-o, omukpata-a atsia anu naao nakpokpo Bádha Ngali ne ndu bili hana. Ngámá adu ateteke uo bhú okulu bhomu-o hana. Ongamba 'ngú inde u adu amene e adu di asuno me nasuno inde u ngasuno e-e, a ko 'ngú na paká.]

**Bádha Ngali  
gba Yesu Kilisito maka  
li  
Luka  
aye lie ko  
Eli na kalanu**

Bádha Ngali gba Yesu Kilisito maka li Luka aye lie ngasuno Yesu maka Mukobho inde li Ebhe apa nani me ni aha e pi piga gba omaɗsalaele la di ne pi ndu opiga na pɔla doto hana. Luka ngakpokpo me Bu Bhobua gba Ngámá-a a'i nani Yesu ngubula nakpokpo Bádha Ngali pi obhulu ndibhili (4:18). La, Bádha Ngali angoo abedhe ne ndjinga bhú e pi okpála inde bhú o ne omulopoloo gba o hana. Engú na ndjili abhú bhuku gba Luka ngbéngbé ane la mane bhú oalo na kalanu inde ngakpokpo 'ngú nago gba Yesu. Engú na djali angoo ane matá mane bhú 'so 'kpí nedhinga na'ú ka Yesu abhúalá. A ko bha Luka bini inde akpokpo 'ngú bhú bhuku na Kulu gba obhulu titima gba Yesu pindji nabhele a la di-e nayangba ka nabhuka bhú Kilisito pita na'ú ka Yesu abhúalá-o.

Bhú Bádha Ngali inde-e, u ngagama 'ngú naali pindji mayo, ne pindji Bu Bhobua, ne pindji kulu gba olisi bhú kulu gba Yesu, di ne lele maka li Ebhe ngambu li sisiti 'ngú gba okpála lie-o.

**Ongbengbe ngú inde bhú bhuku inde-e ngú inde:**

Eli na kalanu 1:1-4

Nazu lie ne nadu bhú ndili lie gba Djaa bhulu nabatisa okpála di ne Yesu 1:5 – 2:52

Kulu gba Djaa bhulu nabatisa okpála 3:1-20

Batisimo di ne nale inde li Djabulu ale Yesu ne e-o 3:21 – 4:13

Kulu inde li Yesu amene e bhú ká okpála bhú Galilaya 4:14 – 9:50

Dhuku gba Yesu nayie bhú Galilaya ngú nanu abhú Yelusalema 9:51 – 19:27

Oekpi nasoso gba Yesu abhú Yelusalema 19:28 – 23:56

Nazuku gba Yesu, ne nakoto ka ani li okpála, a la di-e na'ú ka ani abhúalá-o 24:1-53

*Lita 'ngú-o*

<sup>1</sup> Ndai ma na mukunda Tiofile, Okpála bhelé ale naye todú na ongú inde akodho 'kpí bhú ká ya-o. <sup>2</sup> U aye ongú angoo-o maka li okpála inde au nayie li lilita-a, akpokpo pi ya lie ko. A ko okpála inde adu nakpokpo eli gba Ebhe-o. <sup>3</sup> Kaka-a, ngama di-e, pita nagili 'ngú tété má bhotobhoto nayie li dudu-o, ma au ndjindji me, ma kpokpo kúku pi mu li lelele, bhele kpála Tiofile, maka li ongú angoo-o akodho 'kpí lie ko. <sup>4</sup> Ma kpokpo kúku pi mu, amba mu mbila kukulu 'ngú na ongú inde u asuno e pi mu ko.

*Andjelu apa me u azú Djaa bhulu nabatisa okpála*

<sup>5</sup> Bhú nedhinga li Elode adu lie 'ngbé ngámá na ndu doto na Yudaya-a, dimandø bini gba Ebhe-e adu oo. A adu 'li ani me Djakalia, ani adu bhú libi odimandø gba Abia. A adu 'li wala ani me Alidjabheti, ani adu bhú piga gba 'ngbé dimandø Alona. <sup>6</sup> Ndu uo bhisi hana adu bhú djila Ebhe ngbingbili. U atsia adu amene ndu lili gba Ngámá Ebhe-e hana. <sup>7</sup> Engú bini, ndili du ka uo de, anga Alidjabheti adu ne izude. La di-e, u adu ndu o bhisi hana me u nde agbegbe.

<sup>8</sup> Ekpi bini, Djakalia adu amene kulu na dimandø gba e kala Ebhe, anga adu ekpi na libi gba uo-o

ngú namemene. <sup>9</sup> Maka li odi-mandə adu amemene lie, Djakalia atsia asia ngasa ngú nanu natsulu mungotsi pi Ebhe abhú 'ngbé 'ti gba Ngámá Ebhe, bhú titina na bubu-o. <sup>10</sup> Nedhinga ani adu at-sutsulu lie, ndu okpála hana adu ayo Ebhe akilidjo.

<sup>11</sup> Abhomu-o, kolo má gala me-e, andjelu gba Ngámá Ebhe-e akoto li ani. Ani alu de bili natsulu mungotsi-e ne li pápá na kokpa. <sup>12</sup> Li Djakalia au ani lie me-e, tsulu aholo amene ani, mabhundja gba ani-e atsia angbingi. <sup>13</sup> Engú bini, andjelu-o apa pi ani me: «Djakalia, mo odjé tsulu de, anga Ebhe adje nayo gba mu-o adje. Wala mu Alidjabheti azú pi mu ndili na bhobhoko. Mo ogísila 'li ani me Djaa . <sup>14</sup> Mo odú ne djali naali, li okpála bhelé tsia kpí di djali ka nazu ani-o. <sup>15</sup> Ani adú 'ngbé kpála bhú djila Ebhe. Ani ndjí vino de, ani ndjí di pandi na kpekpeke de. Ani abédhe ne Bu Bhobua me ani nde nga bha bhú 'bu 'hi e. <sup>16</sup> Ani agié ongisi na Isalaele bhelé li pápá gba Ebhe, Ngámá gba o-o. <sup>17</sup> Ani adú amene kulu kala Ebhe bhú dabili bini ne bua di ne angu maka Polofeta Eliya. Ani aléke engú sunda odyi ongisi ne ongisi gba o-o. Ani adjí mabhundja gba okpála na kpekpeke 'ndjí, u tsia kólo ngbing-bili,† ngubula naleke okpála inde bedhe pi Ebhe Ngámá.»

<sup>18</sup> Abhomu-o, Djakalia ayi andjelu-o me: «Ma ambila la lele pi me a ko kukulu 'ngú-o? Padhá de, anga ma agbe, wala ma akolo la di ne kalanga bhelé.» <sup>19</sup> Andjelu-o atsia agie pi ani me: «Ngama-a, ma ne Gabriele, ndu 'kpí hana ma dudu de Ebhe. Ani atima ma me ma go kpokpo bádha

ngali inde-e pi mu. <sup>20</sup> Engú bini, li mu bhuka engú ma apa e pi mu-o lie de-e, kaka-a, 'bhə mu ani, mu tí da nagama 'ngú belegu de bini akólo li 'kpí li ongu ango-o améne lie lie ko. Engú inde améne lie na paká li nedhinga li Ebhe a'o e-o.»

<sup>21</sup> Li nedhinga bhomu-o, okpála adu adjeke Djakalia, u adu angamba ka ani adu abhue lie bhú 'ti Ebhe oo naali-o. <sup>22</sup> Ani akoto lie, ani ale nagama 'ngú pi uo pima. Abhomu-o, u atsia ambila me oo, ani au engú na ngangamba gba Ebhe-e au. Ani adu asuno 'ngú pi uo ne 'kpa e, ani ti da nagagama ne 'bhə e de.

<sup>23</sup> Li nedhinga na kulu gba ani andjia lie, ani atsia agie lie agba e. <sup>24</sup> Pita nedhinga bhomu-o, wala ani Alidjabheti atsia abi 'bhi. Ani awo nga bha lie ngubula epe bhuluvue libhomu. Ani adu apa me: <sup>25</sup> «Tsia nga engú inde li Ngámá Ebhe amene e muma-o. Ani abhundja ma. Mbia inde-e, ani a'e ehe inde nako adu aha numu muma bhú ká djila okpála a'e.»

*Andjelu akpo 'ngú pindji nazu Yesu*

<sup>26</sup> Li ebhi gba Alidjabheti akolo lie ne epe madhia-a, Ebhe atima andjelu Gabriele bhú kuti bini na ndu doto na Galilaya, inde 'li e me Nadjaleta.\* <sup>27</sup> Ani atima ani gba tsangba bini inde adu adjeke naha lie ne bhoko bini. A adu 'li bhoko ango-o me Djodjefu , ani adu bhú piga gba 'ngbé ngámá Davidi. Tsangba ango-o, a adu 'li ani me Malia . <sup>28</sup> Andjelu-o ali agba ani, ani atsia ayi ani me: «Mu oo! Ngamu inde asia bádha bhú 'bu gba Ebhe-e , Ngámá Ebhe bhú dabili bini ne mu.» <sup>29</sup> Malia angamba ka eli bhomu-o naali. Ani adu ayi bua e me: «Ta nayi

† 1:17 1:17 Tsia bhú Mal. 3:23-24. \* 1:26 1:26 Nadjaleta: Nayie bhú Yelusalema akólo bhú Nadjaleta-a, a ko kilometele kámá bini. Tsia bhú Luk. 1:19.

inde-e pi?» <sup>30</sup> Abhomu-o, andjelu-o atsia apa pi ani me: «Malia, mo odjé tsulu de, anga mo osia bádha bhú 'bu gba Ebhe-e asia. <sup>31</sup> Tsia nga, mo obí 'bhi, mu zú ndili na bhobhoko, mu tsia gísila 'li ani me Yesu. <sup>32</sup> Ani adú 'ngbé kpála, u tsia dú a'i ani me, Ndili gba Apí 'Kpí. Ebhe Ngámá a'ó me ani u maka ogbi e Davidi. <sup>33</sup> Ani aú dudu ma ne dudu ma pí piga gba omafalaale. Na u gba ani-e ndjia de.»

<sup>34</sup> Malia atsia ayi andjelu-o me: «Engú ang-o améne lie lele pi? Padhá de, anga ma kunda nga naama bhoko de!» <sup>35</sup> Andjelu-o agie pi ani me: «Bu Bhobua agó pí mu, li angu gba Ebhe Apí 'Kpí búku mu maka kulu zini. Kaka-a, ndili inde mo ozú e adú bubu, u atsia du a'í ani me, Ndili gba Ebhe. <sup>36</sup> Tsia nga okala mu Alidjabheti di ne ebhi. Ani azú ndili na bhobhoko, abana ani nde lie ne kalanga bhelé. Kpála nako u adu a'i e me izude-o. Mbia inde-e, ebhi gba ani-e ibili ne epe madhia, <sup>37</sup> anga kpéde da 'ngú pi Ebhe belegu ade bini.» <sup>38</sup> Abhomu-o, Malia atsia apa me: «Ma ne bali gba Ngámá. A ayo me ndu 'ngú mo opa e hana, a mene lie mu ma moko.» Pipita-a, andjelu-o atsia atapa.

### *Malia anu natsia Alidjabheti*

<sup>39</sup> Bha bhú oekpí bhomu-o, Malia ayie, ani anu má gala bhú kuti bini na ndu doto na ndu ká eta na Yudaya. <sup>40</sup> Ani akolo lie oo, ani ali bhú 'ti gba Djakalia, ani atsia ayi Alidjabheti. <sup>41</sup> Li Alidjabheti adje maka li Malia ayi ani lie me-e, ndili-e atsia atili bhú 'bu ani. Abhomu-o, Alidjabheti atsia abedhe ne Bu Bhobua. <sup>42</sup> Ani atsia asula kpekpeke me: «Ebhe aha bisagu pi mu ane ndu olisi hana, bisagu gba ani-e di pí ndili inde mo ozú e-o! <sup>43</sup> Ma ne da me

'hi Ngámá gba ma-a go tsia ma-a? <sup>44</sup> Tsia nga, li nedhinga inde ma adje maka mo oyi ma lie me-e, ndili inde bhú 'bu ma-a atili ne djali hana. <sup>45</sup> A ko djali pi mu, ngamu e lo inde abhuka! Padhá de, anga engú inde li Ebhe apa e pi mu-o, améne lie mamene.»

### *Etsi gba Malia*

<sup>46</sup> Abhomu-o Malia atsia atoko Ebhe me:

«Bua ma ngadhogo Ngámá,  
<sup>47</sup> bua ma abedhe ne djali pi  
Ebhe Mukobho gba ma-o,

<sup>48</sup> anga ani abhundja ma, bali gba e-e ko.

A moko, nayie pi mbia inde-e,  
ndu opiga hana adú a'i ma me,  
ma ne e lo inde asia bisagu ka  
Ebhe,

<sup>49</sup> anga Ebhe na Angu amene ongú  
na ngbengbengbe mu ma.

A ko Ebhe na bubu,  
<sup>50</sup> ndjinga gba ani-e ngadu  
dudu ma ne dudu ma pi  
okpála inde ngakpe ani ko.

<sup>51</sup> Ani amene ngbengbe 'ngú ne  
angu gba e-o.

Ani atsambala okpála na  
'ngbé bua.

Ani atsia amene me mabhundja  
gba uo-o kolo padhá.

<sup>52</sup> Ani ake ongbengbe ongámási  
ne kuto,

ani atsia a'e'e okpála na  
padhá ne abhúlá.

<sup>53</sup> Ani aha ehe bhelé pi obhende  
adu ne gumu-o,

ani atsia agie obhulu tia ne  
'kpa o padhá.

<sup>54</sup> Ani ateteke omafalaale,  
obalise gba e-o.

Ani 'ili 'to e de li nasuno  
bádha 'ngú gba e ndu 'kpí  
hana,

<sup>55</sup> maka nani ani apa lie pi onguo  
ogbi ní Abalahama  
ne opiga gba e-o.»

56 Malia asi ne Alidjabheti masikpe de epe bata. Pipita-a, ani atsia agie lie agba e.

*Alidjabheti azu Djaa*

57 Li nedhinga nazu ka Alidjabheti akolo lie, ani atsia azu ndili na bhobhoko. 58 Li okpála inde asili kuti denko ani-e, di ne obhe na piga gba ani-e adje lie me, Ebhe adje bha ndju ndjinga ani-e, u atsia adu akpi djali bhú dabili bini ne ani.

59 Pita poso bini-e, u ago ngú nato ndili-e bhú gandja. U adu akunda nagisila 'li 'dyi ani Djakalia. 60 Abhomu-o, 'hi ani atsia apa me: «A mo-o ade, adú 'li ani me Djaa.» 61 U atsia apa pi ani me: «Bhú piga gba mu-o, kpála bini inde ne 'ili bhomu-o ade.» 62 Abhomu-o, u atsia amene 'kpa o pi 'dyi ani ngú nayi ani me ani akunda me u gisila 'li ndili-e pi. 63 Djakalia amene 'kpa e pi uo me u go pi ní ne pála ndula, ani atsia aye pépé me: «A 'li ani me Djaa.» Ndu uo hana atsia angamba naali. 64 Bha li nedhinga bhomu-o, 'bhé ani abhulu, ani aholo nagama 'ngú, di ne nadhögö Ebhe. 65 Abhomu-o, ndu okpála hana inde asili kuti lingo uo-o, aholo adje tsulu. Ngali na engú ang-o atsia aya bhú ndu doto na ndu ká eta na Yudaya libhomu. 66 Ndu okpála hana inde adu adjedje-e, adu abhundja pépé, u atsia adu apa me: «Mbo! Ndili ang-o, adú-e maka da?» Angu gba Ebhe-e adu bha ndju bhú dabili bini ne ani.

*Djakalia akpokpo ngbengbe 'ngú gba Ebhe*

67 Djakalia, 'dyi ndili-e, abedhe ne Bu Bhobua. Abhomu-o, ani atsia aholo nakpokpo 'ngú maka polofeta me:

68 «A ayo me, u dhögö Ebhe,  
Ngámá gba omafsalaele-o,

anga ani abhundja okpála gba e,  
ani atsia agbegbe uo bhú bali.

69 Ani atima kpála na angu bini  
bhú piga gba Davidi, bali gba  
e, ngú nakobho ya.

70 A bhomu-o engú inde ani apa  
nani e didili bhú 'li obubu  
opolofeta gba e-o.

71 Ani apa nani me, ni akóbho ní  
sa 'kpa ndu obhulu yala gba  
ní-e hana,  
di ne obhende ngakunda  
amene ní sisiti-o.

72 Ani adje ndjinga onguo ogbi ní,  
ani atsia abhundja di gandja  
na bubu gba e-o.

73 Silika nani inde ani atu e pi ogbi  
ní Abalahama-a,  
ani améne pi ní mamene.

74 Pita nakobho ní sa 'kpa obhulu  
yala ngubula me ní améne  
kulu pi ní ne tsulu de,

75 amba ní dhögö ni ne bua ní  
hana.  
Ní du di bhú djila ni ngbing-  
bili  
ndu 'kpí hana bhú mukobho  
gba ní-o.

76 Pi mu-o, ndika ma, u adú a'i mu  
me, polofeta gba Apí 'Kpí,  
anga mo onú kalanu  
ngú naleke kpadji gba Ebhe-o.

77 Mo osúno pi okpála gba ani-  
e me, ani a'é siti 'ngú inde  
bhú uo-o ma'e,  
ani tsia kóbho di uo.

78 A ko anga Ebhe gba ní-e abedhe  
ne ndjinga bedhe,  
kaka-a, ani atima zi 'kpí pí ní  
maka zi 'ndji 'la na kèkpí.

79 Ani asúno lie pi obhende bhú  
biti di ne obhende ne tsulu  
kuo,  
ngubula me ní dhuku li kpadji  
na guo 'ngú.»

80 Ndili-e adu abhele, ani atsia  
adu asia kpéke bua. Ani adu  
nadu bhú omili bili akolo li 'kpí  
inde ani asuno lie lie mbámá pi  
omafsalaele ko.



## 2

*Malia azu Yesu  
(Tsia bhú Mat. 1:18-25.)*

<sup>1</sup> Li nedhinga bhomu-o, Agosite, 'ngbé ngámá na Loma, aha líli me u ye 'li okpála hana inde píla doto gba ni-o. <sup>2</sup> Gina naye 'li okpála ango-o amene lie me Kiliniusi nde ne 'ngbé ngámá na Silia. <sup>3</sup> Ndu okpála hana adu anu me u ye 'li o. Abhomu-o, kpála ne kpála atsia anu bhú kuti u azu ani bhú e ko.

<sup>4</sup> Djodjefu ayie bhú kuti na Nad-jaleta, bhú ndu doto na Galilaya, ngú nanu bhú ndu doto na Yuda, bhú kuti inde u a'i e me Beteleme. A ko bíli inde u azu 'ngbé ngámá Davidi lie-o, anga ngaani makpe, ani du nani bhú piga gba Davidi ko. <sup>5</sup> Ani anu oo me u ye 'li ni, bhú dabili bini ne Malia, olo inde ani adu adjeke naha e ko. Olo ango-o adu ne ebhi. <sup>6</sup> U adu lie abhú Beteleme-e, ekpí nazu ka ani atsia akolo. <sup>7</sup> Ani azu ndili na bhobhoko, gina ndili gba e ko. Ani agagala ani ne bongo, ani atsia aseke ani bhú ehe nazu 'he gba onu, anga dabili du pi uo bhú 'ti gba ogomago-o de.

*Andjelu akpokpo bádha ngali pi omulila gba okandole*

<sup>8</sup> Bha bhú ndu doto bhomu-o, omulila gba okandole adu asili abhú 'gu ngú nalila onu gba o-o. <sup>9</sup> Andjelu gba Ebhe-e akoto li uo. Sangu gba Ebhe-e asa uo ngbalina maka zi 'kpí. Abhomu-o, u atsia adje tsulu naali. <sup>10</sup> Engú bini, andjelu-o apa pi uo me: «Yi adjé tsulu de, anga ma ago akpokpo pi yi bádha ngali inde ahá djali naali pi ndu okpála hana. <sup>11</sup> Naki bhú kuti gba Davidi-e, u azu Mukobho pi yi. A ko Kilisito, Ngámá. <sup>12</sup> Yi tsia 'he inde yi ambila ani ka e ko: yi abháka ndje ndili u agagala e ne bongo, u atsia aseke e bhú ehe

nazu 'he gba onu.» <sup>13</sup> Kolo má gala me-e, bhiti oandjelu ayie abhúlá, u ago abhaka andjelu bhomu, u atsia adu adhögé Ebhe me:

<sup>14</sup> «Sangu pi Ebhe inde abhúlá, guo 'ngú gba ani-e du píla doto pi okpála inde ani akunda o ko!»

*Omulila anu abhú Beteleme*

<sup>15</sup> Li oandjelu-o agie lio lie abhúlá-a, omulila atsia apa sunda o me: «Ní nu kolo nga bha abhú Beteleme, amba ní u engú inde akolo oo, engú inde li Ebhe Ngámá asuno e pi ní ko.» <sup>16</sup> U anu bhú holo, u abhaka Malia, Djodjefu ne mboye ndili-e me u nde aseke ani bhú ehe nazu 'he gba onu. <sup>17</sup> U au ani lie, u atsia akpokpo 'ngú inde li andjelu apa e pi uo pindji mboye ndili bhomu-o. <sup>18</sup> Ndu okpála hana inde adje engú li omulila adu apa e-e, angamba naali. <sup>19</sup> La-a, pi Malia, ani adu alila ndu 'ngú bhomu-o hana li bua e ndjindji. Ani atsia adu abhundja pépé. <sup>20</sup> Pipita-a, omulila aholo nagie lio. U adu aha sangu pi Ebhe, u atsia adu di adhögé ani ngubula ndu 'ngú inde u adje e ne bhende u au e hana, anga ndundu hana akodho 'kpí maka li andjelu-o akpokpo pi uo lie ko.

*U anu ne Yesu bhú 'ngbé 'ti Ebhe gba omaYuda*

<sup>21</sup> Bhú ekpí na madjina pita nazu ani-e, li nedhinga nato ani bhú gandja akolo lie, u atsia agisila 'li ani me Yesu. A bhomu-o 'li inde li andjelu asuno e kala me 'hi ani bi 'bhi ani-o.

<sup>22</sup> Li nedhinga navulu lie pita nazu ka Malia akolo lie, maka li líli gba Moidje apa lie, u atsia anu ne ndili-e bhú Yelusalema ngú na'o ani sa 'kpa Ngámá. <sup>23</sup> Padhá de, anga u aye bhú líli gba Ngámá-a me: «Ndu ongisi na obhosibhosi

na gígina hana, u a'ó uo kpí pí Ngámá.†»<sup>24</sup> U atsia aha di makiso maka lí líli gba Ngámá-a apa lie me: «A ayo naha bəbhə bhisi. I du mo-o de-e, mụ de ha ongisi bəbhə bhisi.»\*

*Simeona agie heni pí Ebhe ngú Yesu*

<sup>25</sup> Bhú nedhinga bhomụ-o, kpála bini adu nani bhú Yelusalema, a adu 'li ani me Simeo. A ko nani kpála na ngbingbili, ani adu amanga Ebhe. Ani adu adjeke nedhinga lí Ebhe a'é líkabhu gba omafalaele lie ko. Bu Bhobua adu bhú dabili bini ne ani.<sup>26</sup> Abhomụ-o, Bu Bhobua atsia apa nani pí ani me, kala nakpi ka ani-e, ani aú ngaiza Masiya inde lí Ngámá atima e-o.<sup>27</sup> Nedhinga lí okpála inde azu Yesu ago ne ani lie ngú namene maka lí líli apa lie lí 'ngú gba ani-e, Bu Bhobua ato bhúla Simeo abhú 'ngbé 'ti Ebhe gba omaYuda.<sup>28</sup> Abhú 'ti Ebhe oo, ani aha ndili-o, ani abi ani sa 'kpa e, ani atsia agie heni pí Ebhe me:

<sup>29</sup> «Ngámá, mbia inde-e, maka mo opa lie,

mụ ti da na'o ma, bali gba mụ-o, me ma nụ ne guo 'ngú,

<sup>30</sup> anga ma au mukobho gba mụ-o ne djila ma au.

<sup>31</sup> Mukobho inde mo otima e kala ndu okpála hana-o.

<sup>32</sup> Ani adu eke pí omupagano.

Ani tsia dú sangu gba omafalaele, okpála gba mụ-o.»

<sup>33</sup> 'Dyi Yesu ne 'hi Yesu angamba naali ka engú inde u adu apa e lí ani-o.

<sup>34</sup> Simeo ayo me Ebhe tuko bisagu pí uo, ani atsia apa pí Malia, 'hi Yesu me: «Ebhe abhu ndili inde-e ngubula me okpála bhelé bhú ká omafalaele lí bhú mangimbo, amba Ebhe 'e'e matá

okoko bhúla. Ani adu ehe inde lí Ebhe ngasuno e, lí okpála bhelé tsia yála ani.<sup>35</sup> Kaka-a, ani agbé mabhundja inde awo lie lí bua okpála bhelé-e bhú mbasu. La-a, pí mụ makpe-e, líkabhu adu bua mụ maka ngise má pụu!»

*Ana, polofeta na əələ*

<sup>36</sup> Polofeta bini na əələ adu di nani oo. A adu 'li ani me Ana, ndili gba Fanuele bhú piga gba Asela. Ani adu me ani nde agbe má dyuku! U amene nani ne bhoko gba e inde u aha lio ne e bhú ndili-e kalanga mananika.<sup>37</sup> Pita nakpi ka 'ko ani-e, ani atsia ato əkə. Lí nedhinga bhomụ-o, ani adu ibili ne kalanga ndjikpa madjina ne ká badha. Ani du ayie bhú 'ngbé 'ti Ebhe gba omaYuda-a de. Ani adu amene kulu lie pí Ebhe sukpe ne ngbikpi. Ani adu atse ezụ ngú nayo Ebhe.<sup>38</sup> Bha lí nedhinga bhomụ-o, ngaani di-e, ani ago, ani atsia aholo adhəgə Ebhe. Ani aholo akpokpo 'ngú pindji ndili-e pí ndu okpála hana inde adu adjeke me Ebhe gbegbe okpála na Yelusalema bhú líkabhu gba o ko.

*U agie lio bhú Nadjaleta*

<sup>39</sup> Lí 'dyi Yesu ne 'hi Yesu andjia namene ndu 'ngú hana inde lí líli gba Ngámá apa e lie, u atsia agie lio bhú ndu doto na Galilaya, bhú kuti gba o na Nadjaleta-o.<sup>40</sup> Ndili-e adu abhele, ani atsia adu abi angu. Imbilangu gba ani-e atsia adu di abhulu lie. Bádha bhú 'bu gba Ebhe-e atsia adu di bhú dabili bini ne ani.

*Yesu bhú 'ngbé 'ti Ebhe gba omaYuda*

<sup>41</sup> Ndu kalanga hana, okpála inde azu ani-e adu anú bhú Yelusalema ngú namene anokomia na Pasika .<sup>42</sup> Lí ani

\* **2:24** 2:22-24 Bhú líli gba omaYuda-a, i du nani me ələ nde azu-o, a ayo me ani nụ ngaiza bhú 'ngbé 'ti Ebhe gba omaYuda, ani vula lie, amba ani kolo bubu kala Ebhe. Tsia bhú Lev. 12:8.

akolo lie ne kalanga ndjikpa ne ká bhisí-e, u atsia anu ne aní bhú dabilí bini maka u amemene lie ko. <sup>43</sup> Li anokomia andjia lie, u aholo agie lio. Engú bini, ndilí-e Yesu atigala naae bhú Yelusalema me 'dyi aní ne 'hi aní nde mbila de. <sup>44</sup> U adu abhundja lie me aní bhú dabilí bini ne obi o na kpadji-e, u atsia adhuku ekpi bini libhomu. Pipita-a, u aholo nagili aní bhú ká opiga gba o di ne bhú ká obi o-o. <sup>45</sup> U u la aní lie de-e, u atsia agie lio bhú Yelusalema ngu nagili aní.

<sup>46</sup> Bhú 'kpi na bata-a, u abhaka aní bhú 'ngbé 'ti Ebhe gba omaYuda me aní nde adu bhú ká omusunu. Aní adu adje uo di ne nayiyi uo. <sup>47</sup> Ndu okpála inde adu adje aní-e hana, adu angamba naali ka imbilangu inde aní adu agie engú ne e ko. <sup>48</sup> Li okpála inde azu aní au aní lie, u angamba naali. 'Hi aní atsia ayi aní me: «Ndika ma, mo omene ya mo-o ka ni? Tsia nga ya ne 'dyi mu-o, ya adu igini agili mu me bua ya nde alu bha ndju abhúlá má gba!» <sup>49</sup> Engú bini, aní agie pi uo me: «Yi de ngagili ma ngu ni? Yi mbila igini de me, a ayo me ma du bhú 'ti gba 'dyi ma-a di?» <sup>50</sup> Engú bini, u mbila nani ta 'ngú inde aní adu apa e pi uo-o de.

<sup>51</sup> Pipita-a, aní atsia agie lie ne uo bhú Nadjaleta. Aní adu amene líli gba uo-o. 'Hi aní adu alila ndu 'ngú bhomu-o hana li bua e ndjindji. Aní atsia adu abhundja pépé. <sup>52</sup> Yesu adu abhele, imbilangu gba aní-e adu di abhulu lie. Engú inde aní adu amene e bhú bádha bhú 'bu gba Ebhe-e, a adu anga li Ebhe, di ne li okpála naali.

### 3

*Kulu gba Djaa bhulu nabatisa*

† 3:6 3:4-6 Tsia bhú Isa. 40:3-5.

*okpála*

(Tsia bhú Mat. 3:1-12; ne bhú Mlk. 1:1-8; di ne bhú Dja. 1:19-28.)

<sup>1-2</sup> Pipita-a, Tibeles akolo 'ngbé ngámá na Loma . Bhú kalanga na ndjikpa ne ká bhuluvue bhú nau gba aní-e, Djaa ndilí gba Djakalia, inde adu nani adu abhú 'gu-o, asia eli gba Ebhe . Nedhinga angoo, Pose Pilato adu alila ndu doto na Yudaya. Elode adu ngámá na ndu doto na Galilaya. Ndaí aní Filipino atsia adu ngámá na ndu doto na Itule ne Talakonite. Lisaniási atsia adu nae ngámá na Abilene. Bhú nedhinga bhomu-o, Ana ne uo ne Kaifa atsia adu obhelesi okpála gba odimandé gba Ebhe . <sup>3</sup> Abhomu-o, Djaa aholo adhuku bhú 'gu lingo ngade 'ngu na Djuludani, aní atsia adu atotobhila me: «Yi dji bua yi, yi sia batisimo, amba Ebhe 'e siti 'ngú gba yi ko.» <sup>4</sup> Maka li polofeta Isaya, aye lie bhú bhuku gba e me: «A ko kpála bini inde ngatotobhila abhú 'gu me:

Yi leke kpadji pi Ngámá,  
yi li okpadji pi aní ngbingbili!

<sup>5</sup> Ndu tsutsukudhu bili sunda ongba 'ta hana abédhe lie. Ndu oeta na ngbengbengbe ne obhe na djedjedje hana adjí lie,

i kólo má gbata gbata!  
Ndu kpadji na gagala hana akólo ngbingbili.

Okpadji na sisiti akólo babadha.

<sup>6</sup> Li ndu okpála hana tsia ú maka li Ebhe ngakobho okpála lie ko!†»

<sup>7</sup> Abhomu-o, okpála bhelé adu ago abhaka Djaa ngubula nasia batisimo. Aní atsia adu ayi uo me: «Ngayi opiga kpulu inde-e! A asuno pi yi da me yi kpe mangimbo gba Ebhe inde ngago-o? <sup>8</sup> I du mo-o, yi mene engú

inde asúno me yi adji bua yi kukulú! Yi adú abhundja bha li bua yi de me, Abalahama ne ogbi yi. Padhá de, anga ma apa pi yi na paká me, teme yi ngau e inde-e, Ebhe tí da nadjidji, i tsia kólo odi Abalahama! <sup>9</sup> Maka ma ngapapa lie inde-e, u a'o ngbakpa bhú li ndula-a ngú nadede a'o. Ndú ndula hana inde i li líli na babadha de-e, u adé, u tsia bhíke bhú djua.»

<sup>10</sup> Abhomu-o, okpála ang-o at-sia adu ayi ani me: «Í du mo-o, a ayo me ya mene pi?» <sup>11</sup> Ani atsia adu agie pi uo me: «Kpála bhende li bongo na mbulu nde ka e bhisi-e, a ayo me ani ha bini pi kpála bhende li bongo na mbulu nde ka e ade ko. Kpála bhende li ezú nde ka e-e, a ayo me ani ha di mbo pi kpála bhende li ezú nde ka e ade ko.» <sup>12</sup> Ondombi na mandjandja ago di ngú nasia batisimo, u atsia ayi ani me: «Músuno, a ayo me ya mene pi?» <sup>13</sup> Ani atsia agie pi uo me: «Yi ayó tia ane bhende li líli azíba e de.» <sup>14</sup> Osudha atsia ayi di ani me: «A la ya-a, a ayo me ya mene naaya pi?» Ani atsia agie pi uo me: «Yi agbúlu tia ka kpála bini ne kpéke, di ne eu de. Engú bini, yi mbila bha tia na kulu gba yi ko.»

<sup>15</sup> Maka li okpála adu adjeke nago ka Masiya lie, u atsia adu ayi lío li bua o pindji Djaa me: «A ko ndi-e Masiya inde li Ebhe atima e di?» <sup>16</sup> Djaa atsia agie pi ndu uo hana me: «Ngama-a, ma ngabatisa naama yi ne engu. Engú bini, a ngago pita ma ne kpála. Kpála ang-o ane ma ne angu. Ma belegu ne tetele kpála ade ngubula me ma bhulu ekpú na maloké gba ani-o.\* Ani abátisa

yi ne Bu Bhobua di ne djua. <sup>17</sup> Ani aholo kakpa gba e sa 'kpa e ngú nape nguwa gba e-o. Ani apó bhúla nguwa na babadha gba e bhú ngbokopi, engú la bini, ani tsia bú fufukudha-a bhú djua inde li kpála bini tí da nabulu e de.»

<sup>18</sup> Djaa aha nani líli koko bhelé pi okpála. Bhúbhú-o, ani atsia adu akpokpo Bádha Ngali gba Ebhe-e pi uo. <sup>19</sup> Ngámá Elode aha nani Elodiade, eó gba ndai e-o.† Ani amene nani matá di osisiti 'ngú koko bhelé. Kaka-a, Djaa atsia ambe bhú 'ndji ani. <sup>20</sup> Abhomu-o, Elode amene matá siti 'ngú koko pépé, ani aha Djaa, ani atsia abhike ani bhú tikpu.

#### *Djaa abatisa Yesu*

*(Tsia bhú Mat. 3:13-17; di ne bhú Mlk. 1:9-11.)*

<sup>21</sup> Kala me Djaa li bhú tikpu-o, ani abatisa ngaiza ndu okpála hana. Abhomu-o, Yesu atsia asia di batisimo. Nedhinga li Yesu adu akpokpo 'ngú ne Ebhe lie, kokpi abhulu lie, <sup>22</sup> u au Bu Bhobua ngaké pí ani maka bebhe. U atsia adje eli ayie abhúla apa me: «Mú ne ndili gba ma na mukunda. Djali li bua ma ngú má naali.»

#### *Onguo ogbi Yesu*

*(Tsia bhú Mat. 1:1-17.)*

<sup>23</sup> Yesu akpo nani lita kulu gba e me ani nde ne kalanga masikpe de ndjikpa bata. Okpála adu abhundja naao me, a ko ndili gba Djodjefu .

Djodjefu ndili gba Eli,

<sup>24</sup> Eli ndili gba Matati,

Matati ndili gba Levi,

Levi ndili gba Maleki,

Maleki ndili gba Djanai,

Djanai ndili gba Djodjefu ,

<sup>25</sup> Djodjefu ndili gba Matatiasi,

\* **3:16** 3:16 Nani agba omaYuda-a, kulu nagbe maloké bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá. † **3:19** 3:19 Filipino ne ndai Elode nani inde abhele Djaa bhulu nabatisa okpála ko. A adu nani me Filipino nde kpi nga de. Tsia bhú Lev. 20:21.

Matatiasi ndili gba Amosi,  
 Amosi ndili gba Nauma,  
 Nauma ndili gba Eseli,  
 Eseli ndili gba Nagai,  
<sup>26</sup> Nagai ndili gba Mata,  
 Mata ndili gba Matatiasi,  
 Matatiasi ndili gba Semeini,  
 Semeini ndili gba D joseke,  
 D joseke ndili gba Djoda,  
<sup>27</sup> Djoda ndili gba Yoanana,  
 Yoanana ndili gba Lesa,  
 Lesa ndili gba Djelubabela,  
 Djelubabela ndili gba Salatiele,  
 Salatiele ndili gba Neli,  
<sup>28</sup> Neli ndili gba Maleki,  
 Maleki ndili gba Adi,  
 Adi ndili gba Kosama,  
 Kosama ndili gba Elemadama,  
 Elemadama ndili gba Ele,  
<sup>29</sup> Ele ndili gba Yesu,  
 Yesu ndili gba Eliedjele,  
 Eliedjele ndili gba Djolime,  
 Djolime ndili gba Matati,  
 Matati ndili gba Levi,  
<sup>30</sup> Levi ndili gba Simeo,  
 Simeona ndili gba Yuda,  
 Yuda ndili gba Djodjefu ,  
 Djodjefu ndili gba Djonama,  
 Djonama ndili gba Eliakime,  
<sup>31</sup> Eliakime ndili gba Melea,  
 Melea ndili gba Mena,  
 Mena ndili gba Matata,  
 Matata ndili gba Natana,  
 Natana ndili gba Davidi,  
<sup>32</sup> Davidi ndili gba Yese,  
 Yese ndili gba Obede,  
 Obede ndili gba Boadja,  
 Boadja ndili gba Salamona,  
 Salamona ndili gba Nasone,  
<sup>33</sup> Nasona ndili gba Aminadaba,  
 Aminadaba ndili gba Adimina,  
 Adimina ndili gba Aluni,  
 Aluni ndili gba Edjelone,  
 Edjelone ndili gba Peledje,  
 Peledje ndili gba Yuda,  
<sup>34</sup> Yuda ndili gba Yakobho,  
 Yakobho ndili gba Isaka,  
 Isaka ndili gba Abalahama,  
 Abalahama ndili gba Tela,

Tela ndili gba Naola,  
<sup>35</sup> Naola ndili gba Seluga,  
 Seluga ndili gba Lagau,  
 Lagau ndili gba Pelege,  
 Pelege ndili gba Ebele,  
 Ebele ndili gba Sela,  
<sup>36</sup> Sela ndili gba Kainame,  
 Kainame ndili gba Alepakasada,  
 Alepakasada ndili gba Seme,  
 Seme ndili gba Nua,  
 Nua ndili gba Lemeke,  
<sup>37</sup> Lemeke ndili gba Ma-  
 tusalema,  
 Matusalema ndili gba Enoka,  
 Enoka ndili gba Yelede,  
 Yelede ndili gba Malalele,  
 Malalele ndili gba Kenana,  
<sup>38</sup> Kenana ndili gba Enosa,  
 Enosa ndili gba Sete,  
 Sete ndili gba Adamu ,  
 Adamu ndili gba Ebhe.

#### 4

*Djabulu ale Yesu*

*(Tsia bhú Mat. 4:1-11; di ne bhú  
 Mlk. 1:12-13.)*

<sup>1</sup> Pita li Yesu abedhe lie ne Bu Bhobua-a , ani ayie lingo 'ngu na Djuludani, Bu Bhobua atsia amba bhúla ani abhú mili bili. <sup>2</sup> Oo, Djabulu ale ani ngubula ekpí ndjikpa badha. Bhú oekpí bhomu-o, ani zu 'he de. Pipita-a, gumu aholo amene ani. <sup>3</sup> Abhomu-o, Djabulu atsia apa pi ani me: «Í dũ me mu nde ne Ndili gba Ebhe-e, pa pi teme inde-e me a dji lie, amba a kolo ezũ.» <sup>4</sup> Yesu agie pi ani me: «Eli gba Ebhe-e apa me: «Kpála kóbho bha bini ka ezũ de.†»»

<sup>5</sup> Djabulu aha ani, anũ ne ani apí 'ta. Ani asuno ndũ ondende na doto pi ani hana, bhú nedhinga bedi bhomu. <sup>6-7</sup> Ani atsia apa pi ani me: «Ebhe aha ndũ angu, ne otia na ondende bhomu-o hana muma. Ma ti da nahaha pi kpála inde ma akũda nahaha pi e. Í dũ me mu nde akikita lipuku mu

† 4:4 4:4 Tsia bhú Det. 8:3.

kuto kala ma-a, ma ahá ndu angu ne otia na ondende bhomu-o hana pi mu.»<sup>8</sup> Yesu atsia agie pi ani me: «Eli gba Ebhe-e apa me:

«Dhogø Ebhe Ngámá gba mu, amba mu toko bha bini ani kpi e kpi.†»

<sup>9</sup> Pipita-a, Djabulu aha ani, anu ne ani abhu Yelusalema. Ani a'o ani api tulundji 'ngbé 'ti Ebhe gba omaYuda, ani atsia apa pi ani me: «† du me mu nde bha ndju ne Ndili gba Ebhe-e, 'ulu, mu kø kuto,

<sup>10</sup> anga eli gba Ebhe-e apa me: «Ebhe ahá líli pi oandjelu gba e me, u lila mu. †»

<sup>11</sup> La di matá:

«U abí mu sa 'kpa o, amba mo otú 'dhu mu li teme de.†»

<sup>12</sup> Yesu atsia agie pi ani me: «Eli gba Ebhe-e apa la di me: «Mo olé Ebhe Ngámá gba mu-o de.†»

<sup>13</sup> Pita li Djabulu andjia nale Yesu lie ne ndu kpadji hana-a, ani atsia a'o ka ani ngú nadjeke nedhinga koko.

*Yesu agie lie bhú Galilaya*

*(Tsia bhú Mat. 4:12-17; di ne bhú Mlk. 1:14-15.)*

<sup>14</sup> Abhomu-o, Yesu atsia agie lie bhú ndu doto na Galilaya, bhú angu gba Bu Bhobua. Ndu okpála hana aholo nakpokpo 'ngú gba ani-e bhú ndu doto bhomu-o lib-homu.<sup>15</sup> Ani adu asuno bhú oeti gba uo nadje líli gba Moidje-o. Ndu okpála hana atsia adu adhøø ani.

*Yesu anu bhú Nadjaleta*

*(Tsia bhú Mat. 13:53-58; di ne bhú Mlk. 6:1-6.)*

<sup>16</sup> Pipita-a, ani atsia anu bhú Nadjaleta, kuti inde ani abhele bhú e-o. Li 'kpi naguo gba omaYuda-a, ani ali bhú 'ti nadje líli gba Moidje maka ani adu amemene lie ko. Ani ayie bhúlá

ngú natanga eli gba Ebhe-e pi okpála.<sup>17</sup> Abhomu-o, u atsia aha bhuku gba polofeta Isaya pi ani. Ani abhulu bhuku-o, ani atsia agili bili u aye lie me:

<sup>18</sup> «Bua gba Ngámá-a bhú dabili bini ne ma.

Ani abhu ma ngú nanu nakpokpo Bádha Ngali pi obhulu ndibhili.

Ani atima ma ngú natobhila pi obalise me, u azé bhú bali gba o-o maze,

pi okpála i u 'kpi de-e me, u au matá 'kpi mau.

Ani atima ma di ngú napandja obhende bhú mbolo sa 'kpa obhende ngato mbolo li uo-o.

<sup>19</sup> Ngama-a, ma akpokpo pi okpála me nedhinga inde li Ebhe adjé ndjinga uo lie akolo.†»

<sup>20</sup> Pita li Yesu andjia natatanga lie, ani agagala bhuku-o, ani atsia agie pi kpála na kulu-o. Abhomu-o, ani aha lie adu kuto. Ndu okpála inde adu bhú 'ti oo hana abanga djila o li ani.<sup>21</sup> Ani atsia aholo napa pi uo me: «Engú inde yi adje e bhú Bhuku gba Ebhe-e li bili bhomu-o, amene lie naki amene.»<sup>22</sup> Ndu okpála hana adu angamba li Yesu naali. U atsia adu aziba eli na bádha bhú 'bu inde ani adu akpokpo e-o. Abhomu-o, u atsia adu apa me: «A inde-e ndili gba Djodjefa-o di?»

<sup>23</sup> Abhomu-o, ani atsia apa pi uo me: «Ma ambila na paká me yi apá muma gbitaku inde me: «Mutia, kobho limu ne titi mu.» Yi tsia pá di muma me: «Ya adje ndu 'ngú inde mo omene e bhú Kapalanauma-a hana. Mene nga la di ngua 'ngú ango-o bhú kuti mo obhele bhú e ko.»<sup>24</sup> Ani atsia apa matá pipita-a me: «A moko, ma apa pi yi me, a ko kukulu

† 4:8 4:8 Tsia bhú Det. 6:13. † 4:10 4:10 Tsia bhú Ets. 91:11. † 4:11 4:11 Tsia bhú Ets.

91:12. † 4:12 4:12 Tsia bhú Det. 6:16. † 4:19 4:18-19 Tsia bhú Isa. 61:1-2.

'ngú, okpála ziziba polofeta bhú kúti gba e belegu de bini.

<sup>25</sup> Ma apa pí yi na paká me, oekesi na olisilisi adu nani bhelé bhú ká omafalaale li nedhinga gba polofeta Eliya. Li nedhinga bhomu-o, ebha dhi nani-i de ngubula kalanga bata ne epe madhia. Kaka-a, adyindi na ngebéngbé atsia ali bhú doto ango-o libhому. <sup>26</sup> Engú bini, Ebhe tima nani Eliya ngú nateteke suka oekesi bhomu-o bini de. Ani atima bha bini ani gba oké bini na gandji kúti na Salepeta bhú ndu doto na Sidona. <sup>27</sup> Matá-a, okpála na kába adu di nani bhelé bhú ká omafalaale li nedhinga gba polofeta Elisa. Engú bini, Ebhe kobho nani suka uo de, bha bini Namana, gandji kpála na Silia.»

<sup>28</sup> Li ndu okpála hana inde adu bhú 'ti oo adje 'ngú bhomu-o lie, u ake 'ngú lio naali. <sup>29</sup> U ayie bhúlá, u agbe ani bhú 'ti bhomu-o, u agbele ani apí 'ta inde u ayiki gudhu gba o pí e-o. U amene nani mo-o ngú nandjimba ani akuto. <sup>30</sup> Engú bini, ani akodho bha 'kpí bhú ká uo oo, ani atsia atapa.

*Yesu akobho kpála li siti bua adu ato mbolo lie*  
(Tsia bhú Mlk. 1:21-28.)

<sup>31</sup> Abhому-o, Yesu anu bhú Kapalanauma, kúti bini na ndu doto na Galilaya. Ani atsia adu asuno pí okpála bhú 'kpí nagu gba omaYuda-o. <sup>32</sup> U adu nangamba li ngua nasuno gba ani-o, anga ani adu nasuno ne angu gba Ebhe. <sup>33</sup> Bhú 'ti nadje líli gba Moidje oo, kpála bini li siti bua adu nato mbolo lie, aholo asusula kpekpeke me: <sup>34</sup> «Aa! Yesu, kpála na Nadjaleta, mo okunda namene ngú ya pí? Mo ogo ngú nabhili ya? Ma mbila mu hana, mu ne kpála na bubu inde li Ebhe atima e ko!» <sup>35</sup> Yesu atsia ambe bhú 'ndji ani me: «Gbite 'bhe mu, amba mu

koto la di bhú kpála bhomu!» Siti bua-a agú 'i kpála ango-o kuto má gbwe, bhú ká djila ndu okpála inde adu oo hana. Ani akoto bhú ani, engú bini ani mene ani sisiti de. <sup>36</sup> Ndu okpála hana angamba, u atsia adu ayi lio sunda o me: «A inde-e mangua eli dho? Ani ngaha líli ne kpéke, di ne angu pí osisiti bua, uo ngaze bhú okpála!» <sup>37</sup> Okpála atsia adu apa 'ngú gba Yesu-o bhú ndu okúti bhomu-o hana.

*Yesu akobho okpála bhelé na kuo*

(Tsia bhú Mat. 8:14-17; di ne bhú Mlk. 1:29-34.)

<sup>38</sup> Li Yesu ayie lie bhú 'ti nadje líli gba Moidje-e, ani atsia anu ali bhú 'ti gba Simo. A abhaka me a nde li 'hi wala Simo ne kpéke bandji. Abhому-o, u atsia ayo ka Yesu me ani kobho ani. <sup>39</sup> Ani ago alu pí ani, ani ambe bhú 'ndji bandji-o. Abhому-o, bandji-e atsia ayie li ani. Ani ayie bhúlá kolo má gala, ani atsia aholo nalu 'zu pí uo.

<sup>40</sup> Li ela ati lie, ndu okpála hana inde adu ne okpála na kuo ngangá agba o-o, abha uo, u atsia ago ne uo pí Yesu. Ani a'o 'kpa e pí 'ndji uo bini ne bini, u atsia akobho ndu o hana. <sup>41</sup> Osisiti bua aze di bhú okpála na kuo bhelé. Osisiti bua ango-o atsia adu asusula me: «Mu ne Ndili gba Ebhe!» Engú bini, Yesu adu ambe bhú 'ndji uo. Ani atsia adu di agbite kpadji pí uo me u agama 'ngú de, anga u adu ambila hana me a ko Masiya inde li Ebhe atima e ko.

*Yesu akpokpo Bádha Ngali bhú ndu doto na Yudaya*

(Tsia bhú Mlk. 1:35-39.)

<sup>42</sup> Li ekpí aseke lie, ani akoto bhú kúti bhomu, ani atsia atapa bhú mili bíli. Bhití okpála aholo nagili ani. U au ani lie, u aholo akikiliki lio pí ani me: «Mo o'ó

ká ya de, ní tigala ne yi si-i.»  
 43 Engú bini, Yesu apa pi uo me:  
 «A ayo me ma anu di nakpokpo  
 Bádha Ngali Naú gba Ebhe-e bhú  
 okutí koko, anga Ebhe atima ma  
 ngánga.» 44 Abhomu-o, aní atsia  
 adu akpokpo Bádha Ngali bhú otí  
 nadje líli gba Moidje na ndu doto  
 na Yúdaya-o.

## 5

*Yesu a'i omukpata na gigena*

*(Tsia bhú Mat. 4:18-22; di ne  
 bhú Mlk. 1:16-20.)*

1 A akolo ekpí bini, Yesu adu  
 lingo ekpè na Genedjaleta.\* Bhati  
 okpála asulu de aní má wakaka  
 ngú nadje 'li Ebhe. 2 Aní au zabu  
 bhisi lingo 'ngu me obhuhulu-o  
 nde aze, u nde ngavulu onado gba  
 o na sungu-o. 3 Yesu atsia a'u bhú  
 susuka bini, bhende gba Simo-o.  
 Do aní pi Simo me: «Yie lingo 'gè-  
 o, amba mu dyudyo limu mbo ne  
 abhú 'ngu.» Yesu atsia adu bhú  
 zabu-o kuto. Aní aholo nasuno  
 pi bhiti okpála bhomu-o. 4 Aní  
 andjia nagama 'ngú lie, aní atsia  
 apa pi Simo me: «Dyudyo zabu-o  
 apí tsiba, amba ngayi ne obi mu-  
 o, yi bala onado gba yi-e bhú 'ngu  
 ngú naholo osungu-o.»

5 Simo agie pi aní me: «Musuno,  
 ya amene kulu sukpe inde-e lib-  
 homu, ya holo belegu sungu de  
 bini. Engú la bini, ka 'li mu-  
 o, ya abhike onado-o bhú 'ngu  
 mabhike.» 6 U abala onado lie bhú  
 'ngu-o, u atsia aholo osungu bhelé.  
 Kaka-a, onado gba uo-o aholo nat-  
 sotsolo. 7 Abhomu-o, u amene  
 'kpa o pi obi o inde adu bhú zabu  
 koko ngú na'i uo me, u go ha mbo  
 'kpa o pi o. Obhobhomu-o ago, u  
 abebedhe ozabu bhisi-e ne osungu  
 bedhebedhe. Kaka-a, ozabu atsia  
 aholo nalinda bhú 'ngu.

8 Li Simo Piele au lie mo-o, aní  
 ati bhú li 'dhu Yesu, aní atsia apa  
 me: «Ngámá, gbe limu de ma  
 ne sidi, anga ma ne siti kpála!»

9 Aní apa mo-o, anga ngauo ne obi  
 e, u angamba nani naali ka bhiti  
 osungu inde u aholo e ko. 10 Djaki  
 ne Djaa , ongisi gba Djebedayo  
 inde adu amene bhú dabili bini  
 ne Simo-o, angamba bhadi moko.  
 Engú bini, Yesu apa pi Simo me:  
 «Mo odjé tsulu de, anga nayie pi  
 mbia inde-e, mu dú matá agili  
 osungu de, engú bini, mo odú ibili  
 agili okpála pi Ebhe.» 11 Abhomu-  
 o, u agbele ozabu gba o apí 'gè. U  
 a'o ka ndu 'he gba o hana, u atsia  
 anu bhú dabili bini ne Yesu.

*Yesu akobho kpála na kába*

*(Tsia bhú Mat. 8:1-4; di ne bhú  
 Mlk. 1:40-45.)*

12 A akolo ekpí bini, Yesu adu  
 bhú kuti bini na ndu doto na  
 Galilaya, kpála bini inde li kába  
 atsotsolo kute e hana-a, akoto. Li  
 aní au Yesu lie, aní ago ati kala  
 aní, aní atú bhúla e ne kuto,  
 aní atsia alopola lie pi aní me:  
 «Ngámá, i da me mu nde akunda-  
 a, mu ti da nakobho ma.» 13 Yesu  
 aha 'kpa e a'o li aní. Aní at-  
 sia apa me: «Ma akunda moko,  
 kokobho!» Abhomu-o, kába agulu  
 bha kolo li kute kpála ango-o hana  
 maka ndjombe. 14 Yesu atsia aha  
 líli pi aní me: «Mo opá belegu  
 engú inde-e pi kpála bini de. Engú  
 bini, nu suno bha limu pi di-  
 mandè gba Ebhe maka li kute  
 mu nde lie ko. Pipita-a, amba  
 mu ha makiso maka li líli gba  
 Moidje apa lie, ngubula napana pi  
 ndu okpála hana me mo okobho.»  
 15 Abana mo-o, engú gba Yesu adu  
 bha ayangba ne kalanu. Okpála  
 bhelé adu ago apo bhúla o de aní  
 ngú nadje aní, ne di me aní kobho  
 o ne okuo gba o-o. 16 Engú la bini,

\* 5:1 5:1 Genedjaleta: A ko 'ili koko na ekpè na Galilaya. Tsia bhú Mlk. 6:53.



ani adu anu bhú omili bili. Oo, ani atsia adu akpokpo 'ngú ne Ebhe.

*Yesu akobho dukuto*

*(Tsia bhú Mat. 9:1-8; di ne bhú Mlk. 2:1-12.)*

<sup>17</sup> Ekpí bini, Yesu adu asuno pi okpála. Omufalisai koko ne omusuno na líli gba Moidje inde ayie nani bhú ndu okuti hana na ndu doto na Galilaya ne Yuda, di ne bhú 'ngbé gudhu na Yelusalema adulu de ani. Ne angu gba Ebhe-e, ani atsia adu akobho okpála na kuo. <sup>18</sup> Li nedhinga bhomu-o, okpála koko ago ne dukuto bini me u nde abi ani pí kalagba. U adu nagili kpadji ngú nato ani abhú 'ti, amba u 'o ani kala Yesu. <sup>19</sup> Engú bini, u ale nali ne ani abhú 'ti pima ka li okpála adu lie bhelé-o. Abhomu-o, u atsia a'u ne ani apí 'ngbu 'ti. U adu gudho li 'ngbu 'ti-e má vuu! U atsia akò ani ne ekpú tété ne kalagba gba e hana bhú ká okpála kala Yesu. <sup>20</sup> Li Yesu ambila lie me okpála bhomu-o abhuka ni na paká-a, ani atsia apa pi kpála na kuo-o me: «Olia ma, ma a'e osisiti 'ngú gba mu-o a'e.»

<sup>21</sup> Li omusuno na líli di ne omufalisai adje 'ngú bhomu-o lie, u atsia aholo nabhundja me: «Kpála inde ngasobho Ebhe me-e, a ko nga nae da? A ti da na'e siti 'ngú gba okpála da, bha bini Ebhe ngae kpi e kpi di?» <sup>22</sup> Yesu ambila mabhundja gba uo lie, ani apa pi uo me: «Yi ngabhundja li bua yi mo-o ka ni? <sup>23</sup> Ne napa me, 'Ma a'e osisiti 'ngú gba mu a'e', ne napa me, 'Yie bhúlá, amba mu dhuku-o' a ane ne bhuku ne bhedho? <sup>24</sup> Engú bini, ma akunda me yi mbila me ngama, Ndili gba kpála-a, ma ne angu píla doto ngú na'e siti 'ngú.» Abhomu-o, Yesu atsia apa pi dukuto-o me: «Ma apa pi mu me yie bhúlá, ha dabili

gba mu-o, amba mu gie limu agba mu!» <sup>25</sup> Kolo má gala me-e, kpála bhomu ayie bhúlá bhú ká djila ndu okpála hana, ani aha dabili inde ani de asi pí e, ani atsia agie lie agba e me ani nde ngadhogo Ebhe. <sup>26</sup> Ndu okpála hana adu angamba naali. U abedhe ne tsulu bedhe, u adu adhogo Ebhe, u atsia adu apa me: «Ya au naki ongú na ngangamba!»

*Yesu a'i Levi*

*(Tsia bhú Mat. 9:9-13; di ne bhú Mlk. 2:13-17.)*

<sup>27</sup> Pipita-a, Yesu akoto kilidjo, ani atsia au ndombi bini na mandjandja, adu 'li ani me Levi,† ani nde adu kuto bhú bilo gba e-o. Yesu apa pi ani me: «Kpata ma.» <sup>28</sup> Levi ayie bhúlá, ani a'o ka ndu 'he hana, ani atsia akpata Yesu.

<sup>29</sup> Pipita-a, Levi atsia amene 'ngbé anokomia pi Yesu abhú 'ti gba e. Ondombi na mandjandja bhelé di ne okpála koko adu nazu 'he ne uo bhú dabili bini. <sup>30</sup> Omufalisai di ne omusuno na líli gba o adu nadi mutokono, u atsia ayi omukpata gba Yesu-o me: «Ka ni yi ngazu 'he ne nandji vino lie bhú dabili bini ne ondombi na mandjandja di ne okpála na sisiti-e?» <sup>31</sup> Yesu atsia agie pi uo me: «Okpála bhende li kuo nde li o ade-e, u ne gumu mutia ade. Engú bini, obhende inde li o ne kuo ne gumu mutia ngao. <sup>32</sup> Ma go ngú na'i okpála bhende ngbingbili-e de. Engú bini, ma ago ngú na'i obhende na sisiti-o, ngubula me u dji bua o.»

*Yesu akpo 'ngú pindji natse ezu ngú nayo Ebhe*

*(Tsia bhú Mat. 9:14-17; di ne bhú Mlk. 2:18-22.)*

<sup>33</sup> Okpála bhomu-o apa pi ani me: «Omukpata gba Djaa di ne obhende gba omufalisai ngatse ezu piko ngú nayo Ebhe. Engú

† 5:27 5:27 Levi: A ko 'ili koko gba Matié.

bini, obhende gba mu-o la bha naao ngazu 'he ne nandji vino.»<sup>34</sup> Yesu agie pi uo me: «Yi ahundja naayi me yi ti da naholo omaha 'ko ele ne kpeke ngu natse ezu me 'ko ele-o nde nga bha bhú dabili bini ne uo? <sup>35</sup> Nedhinga koko akólo makolo, nedhinga inde li okpála adhépe 'ko ele-o lie bhú ká uo-o. Li oekpi angoo, u tsia tsé la 'zu.»

<sup>36</sup> Yesu atsia aha di gbitaku inde-e pi uo me: «Kpála bini tí da nasidha bongo na mbia, ani tsia há pápála-a ngu nadudu li bongo na didili de. Ani mene mo-o, li bongo na didili-e sídha, la di-e, pála bongo na mbia lé ne bhe na didili-e de. <sup>37</sup> Kpála bini tí da na'o vino na mbia bhú odidili dhudhu na ko 'nu de. Ani mene mo-o, li vino na mbia bí 'fu, i úpa odidili dhudhu-o. Pandi-e túko, li odhudhu-o tsia siti di. <sup>38</sup> Engú bini, a ayo na'o vino na mbia bhadi bhú odhudhu na mbia!† <sup>39</sup> I du me kpála bini nde andji pandi na didili andji-e, ani kúnda matá pandi na mbia de, anga ani pá me: «Pandi na didili-e ane ne bádha.»»

## 6

*Yesu aziba me ni ne ngámá pí 'ndji ekpí naguo gba omaYuda*

*(Tsia bhú Mat. 12:1-8; di ne bhú Mlk. 2:23-28.)*

<sup>1</sup> Ekpí bini naguo gba omaYuda-a, Yesu ne omukpata gba e adu akodho 'kpí bhú ngu 'zu inde u a'i e me ngano. Omukpata gba ani-e aholo akodho 'ndji 'ndji, atutuluba sa-tikpa o, u atsia adu nazuzu.\*  
<sup>2</sup> Omufalísai koko ayi uo me: «Yi ngamene bhomu-o ni? Líli gba ní-e ziba namene kulu bhú 'kpí naguo de.»  
<sup>3</sup> Yesu atsia agie pi

uo me: «Yi atanga ndjindji bhú Bhuku gba Ebhe-e, engú nani li Davidi amene e? Ekpí bini, ngaani ne omaha e, u adu lie ne gumu-o, <sup>4</sup> ani ali nani bhú 'ti Ebhe. Ani aha mapa inde u a'o e ngu nadhogo Ebhe-e, ani azu. Ani atsia aha di pi omaha e, abana li líli gba ní-e apa lie me azú bha mapa angoo ne odimandoo.»  
<sup>5</sup> Yesu atsia apa matá pi uo me: «Yi mbila me ngama, Ndili gba kpála-a, ma ne ngámá pí 'ndji ekpí naguo.»

*Yesu akobho kpála li 'kpa e adu ne eze*

*(Tsia bhú Mat. 12:9-14; di ne bhú Mlk. 3:1-6.)*

<sup>6</sup> A adu nani ekpí naguo koko bini, Yesu ali bhú 'ti nadje líli gba Moidje-o. Ani akolo lie oo, ani atsia aholo nasuno. Bhú ká okpála-a, bhoko bini adu oo, adu li 'kpa ani na kokpa-a ne eze.  
<sup>7</sup> Omusuno na líli gba Moidje di ne omufalísai adu agili kpadji ngu napu ngbángá Yesu me, ani ngamene siti 'ngú. Kaka-a, u aholo atsia ani ne kpeke djila atigala ani kobho kpála li 'kpí naguo.

<sup>8</sup> Engú bini, li Yesu ambila lie me ali bua uo oo, u ngabundja mo-o, ani atsia apa pi kpála li eze adu li 'kpa e me: «Yie bhúlá, amba mu lu si bhú ká djila ndu okpála hana.» Kpála angoo ayie bhúlá, ani atsia alu kala ndu okpála inde adu bhú 'ti oo hana.  
<sup>9</sup> Pipita-a, Yesu atsia apa pi uo me: «Ma ne engú bini ngu nayi yi tété: Li 'kpí naguo, líli gba ní-e aziba pi? U mene bádha 'ngú, ne me u mene siti 'ngú? U kobho kpála, ne me u akóbo ani de?»  
<sup>10</sup> Ani atsia ndu uo hana bini ne bini. Abhomu-o, ani atsia apa pi kpála na eze e me: «Gbele 'kpa mu.» Kpála

† **5:38** 5:38 Yesu akunda napa bhomu-o me, u ti da na'o nasuno gba ni na mbia pí bhe gba omufalísai-e de. \* **6:1** 6:1 Agba omaYuda-a, i du me kpála nde ngakodho ngano-o, amba ani ngamene bhomu-o kulu. La-a, líli gba uo-o ziba namene kulu bhú 'kpí naguo-o de. Tsia bhú Det. 23:26, di ne bhú Lev. 23:5-14.

ango-o agbele 'kpa e, 'kpa ani atsia akolo ndjindji. <sup>11</sup> Engú bini, okpála ango-o abi 'gú naali, u atsia aholo nayi lio sunda o me: «Ní ti da namene ngú Yesu mangua 'ngú dho?»

*Yesu alo obhulu titima ndjikpa ne ká bhisi*  
(Tsia bhú Mat. 10:1-4; di ne bhú Mlk. 3:13-19.)

<sup>12</sup> Bhú oekpí bhomu-o, sukpe bini, Yesu a'u apí 'ta ngú nakpokpo 'ngú ne Ebhe. Sukpe libhomu aní asi nakpokpo 'ngú ne Ebhe. <sup>13</sup> Li ekpí aseke lie, ani a'i omakpata gba e-o, ani atsia alo okoko bhú ká uo ndjikpa ne ká bhisi inde ani agisila nani 'li o me obhulu titima gba Yesu . <sup>14</sup> A adu nani Simo (inde li Yesu agisila 'li e me Piele) ne ndai e Andili, Djaki ne Djaa , Filipino ne Batelemi, <sup>15</sup> Matié ne Tuma, Djaki ndili gba Alafayo ne Simo (inde u a'i e me kpála inde akunda doto gba e), <sup>16</sup> Djude ndili gba Djaki ne Yuda Iskaliote, inde apú Yesu pi obhulu yala-o.

*Yesu asuno pi bhiti okpála*  
(Tsia bhú Mat. 4:23-25.)

<sup>17</sup> Aní aké ne uo, aní atsia alu asabu 'ta li bili li omakpata gba ani koko bhelé adu lie ko. Okpála bhelé na ndu doto na Yudaya libhomu, na Yelusalema ne ogudhu na ngo 'ngbé 'ngu, gadhu na Tile ne Sidona adu di oo. <sup>18</sup> Okpála ango-o ago nani ngú nadjé Yesu, amba aní kobho di obhende adu ne okuo-o. Aní atsia akobho di okpála inde li osisiti bua adu ato mbolo li o ko. <sup>19</sup> Ndu okpála hana adu nagili nabu 'kpa o li kute ani, anga ndu uo hana adu akobho ka angu inde adu bhú ani-o.

*Yesu akpo 'ngú pindji djali ne likabhu*  
(Tsia bhú Mat. 5:1-12.)

<sup>20</sup> Yesu atsia omakpata gba e-o, ani atsia apa pi uo me:

«A ko djali pi yi, ngayi obhulu ndibhili,  
anga Ebhe ne ngámá gba yi-e ngae!

<sup>21</sup> A ko djali pi yi, ngayi obhende ngadje gumu mbia inde,  
anga yi azú 'he, yi tsia 'ú 'u!  
A ko djali pi yi, ngayi obhende ngaku 'gba mbia inde,  
anga yi amú 'zo!

<sup>22</sup> A ko djali pi yi, i du me okpála nde ngayala yi, u nde ngagbe yi bhú ká o, u nde ngasobho yi, u nde ngapa 'ngú gba yi-e sisiti kabula ma, Ndili gba kpála. <sup>23</sup> Li nedhinga ango kolo, yi de kpi djali, amba yi dho di ebi, anga makalá na ngbéngbé ngadjeke yi abhúlá. Ogbi uo adu nani amene bhadi opolofeta sisiti moko.

<sup>24</sup> Engú bini, a ko likabhu pi yi obhulu tia,  
anga yi asia makalá gba yi-e asia!

<sup>25</sup> A ko likabhu pi yi, ngayi obhulu ká 'zú mbia inde,  
anga yi adú adjé gumu!

A ko likabhu pi yi, ngayi obhende ngamu 'zo mbia inde,  
anga yi adú bhú talia, yi tsia dú naku 'gbá!

<sup>26</sup> A ko likabhu pi yi, i du me ndu okpála hana nde ngapa 'ngú gba yi-e ndjindji, anga ogbi uo adu apa bhadi nani babadha 'ngú moko li opolofeta na eu ko!»

*Yi kunda obhulu yala gba yi-o*  
(Tsia bhú Mat. 5:38-48, 7:12a.)

<sup>27</sup> «Engú bini, ma apa la pi yi me, ngayi obhende ngadje ma-a, yi kunda obhulu yala gba yi-o. Yi mene bádha 'ngú pi obhende ngayala yi ko. <sup>28</sup> Yi yo me bisagu gba Ebhe-e go pí okpála bhende ngatu pedje li yi, amba yi yo Ebhe pi obhende ngamene yi sisiti ko. <sup>29</sup> Li kpála bini sa pála mu li pápá bini-e, mu de dji di pápá koko pi

ani, amba ani sɔ.† Li kpála bini gbɔlɔ koti gba mɔ-o, mɔ de 'o di ani amba ani ha bongo na mbulu mɔ-o. <sup>30</sup> Li kpála yo 'he ka mɔ-o, mɔ de ha pi ani. † dɔ me kpála bini nde agbɔlɔ 'he ka mɔ-o, mo oyó matá ka ani de. <sup>31</sup> Yi mene pi okpála koko bhadi maka bhende yi akunda me u mene e pi yi ko.

<sup>32</sup> † dɔ me yi nde ngakunda bha bini okpála bhende ngakunda yi-e, yi abhúndja de me yi asía makalá kaka-a de, anga okpála na sisiti-e, u ngakunda bhadi okpála bhende ngakunda o ko! <sup>33</sup> † dɔ me yi nde ngamene bha bini bádha 'ngú pi okpála bhende i ngamemene pi yi-e, yi abhúndja de me yi asía makalá kaka-a de, anga okpála na sisiti-e bhadi ngamemene moko! <sup>34</sup> † dɔ me yi nde ngaha bha bini 'he pi okpála inde yi abhúndja me u ti da di nagigie pi yi li 'kpí koko-o, yi abhúndja de me yi asía makalá kaka-a de. Abana okpála na sisiti, u ngaha di 'he pi obi o okpála na sisiti ngabula me, u gie dí pi o li 'kpí koko!

<sup>35</sup> Engú bini, yi kunda obhɔlɔ yala gba yi-o. Yi mene bádha 'ngú pi uo. Yi ha 'he pi uo me yi nde bhundja de me u agie pi yi magie de. Yi asía 'ngbé makalá. Yi mene mo-o, yi tsia dú ongisi gba Ebhe Apí 'Kpí, anga ngaani-e, ani babadha pi okpála inde i gie heni pi ani de. Ani di babadha pi okpála na sisiti. <sup>36</sup> Yi bedhe ne ndjinga pi okpála maka li 'dyi yi Ebhe abedhe di ne di lie pi okpála ko.»

*Yi akódho 'ngú gba okpála koko de*

*(Tsia bhú Mat. 7:1-5.)*

<sup>37</sup> «Yi akódho 'ngú gba okpála koko de, amba Ebhe akódho di 'ngú gba yi-e de. Yi a'ó engú

pi okpála koko de, amba Ebhe a'ó di engú pi yi de. Yi mbu li siti 'ngú gba okpála koko, amba Ebhe mbu di li siti 'ngú gba yi ko. <sup>38</sup> Yi ha 'he pi okpála koko, amba Ebhe ha di 'he pi yi. Ani abédhe kili gba yi-e ne nguwa bedhe má kpambi, i hóló nabala kuto. A moko, Ebhe ahá bhadi pi yi maka lele yi ngahaha pi okpála koko lie ko.»

<sup>39</sup> Yesu atsia apa matá pi uo gbitaku bini me: «Kpála i u 'kpí de-e ti da naholo 'kpa kilí e inde i u 'kpí de ngú nasuno kpadji pi ani uu? A mo-o ade! † dɔ mo-o, li ndu uo bhisi hana bála bhú 'dú. <sup>40</sup> Mɔkpata bini ne mɔsuno gba e ne imbilangu de. Engú la bini, ndu mɔkpata hana inde u asuno 'he pi e ndjindji-e, ani kólo maka mɔsuno gba e-o. <sup>41</sup> Ka ni mɔ ngau mboye kɔ mɔsoli inde bhú djila ndai mɔ-o lie, mɔ tsia u la ndula inde bhú djila mɔ-o de? <sup>42</sup> Lele pi mɔ ti da napa lie pi ndai mɔ me: «Ndaí ma, 'o ma, ma gbe mboye kɔ mɔsoli inde bhú djila mɔ bhomɔ», ngamɔ-o, mɔ nde u ngala belegu de ndula inde bhú djila mɔ-o? Bhɔlɔ kali, gbe ngaiza ndula inde bhú djila mɔ-o. Pipita-a, mɔ tsia u la 'kpí ndjindji ngú nagbe mboye kɔ mɔsoli inde bhú djila ndai mɔ ko.»

*Ndula ne lí e*

*(Tsia bhú Mat. 7:16-20, 12:33-35.)*

<sup>43</sup> «Ndula na babadha lili lílɔ na sisiti de. La di-e, ndula na sisiti lílɔ lílɔ na babadha de. <sup>44</sup> U mbila ndula li lí e. U koko manga li ndula na eti de. La di-e, u koko malibhombi li kobe de. <sup>45</sup> Kpála na babadha-a, ka bádha 'ngú inde li bua ani-e, ani méne bhadi engú na babadha. La di-e, kpála na sisiti-e, ka siti 'ngú inde li bua ani-e, ani méne bhadi engú na

† 6:29 6:29 Agba omaYuda-a, nasu kpála li pabhɔ e-e, a ko sobho na ngbéngbé.

sisiti. Engú inde ngakoto bhú 'bhe kpála-a, a ko engú inde ngayie ali bua ani ko.»

*Oeti bhisi*

*(Tsia bhú Mat. 7:24-27.)*

<sup>46</sup> «La ka ni yi nga'i ma lie ndu 'kpí hana me: «Ngámá, Ngámá?» Yi la ngamene engú inde ma ngapa e pi yi me yi mene e ade. <sup>47</sup> Kpála bini inde agó abháka ma, adjé 'li ma, ani tsia méne maka ma apa lie, ma akunda napana pi yi me ani maka da. <sup>48</sup> Ani maka kpála inde aholo nayiki eti. Ani adji edú tsutsu, ani atsia a'o 'dhu 'dhu-o pí teme. Li engu asi lie, a ago atú lie li kute eti-o, eti ang-o tsia dyiki de, anga a alu kpekpeke. <sup>49</sup> Engú bini, kpála bhende adje 'li ma, ani tsia mene maka ma apa lie de-e, ani maka kpála inde ayiki eti gba e pí doto. 'Dhu 'dhu tété ade. Li engu asi lie, a ago atú lie li kute eti-o. Eti-e atuko bha kolo má gala, a atsia agugumu hana má kpekèbhe!»

## 7

*Yesu akobho kpála na kulu gba ngámá bini gba osudha*

*(Tsia bhú Mat. 8:5-13.)*

<sup>1</sup> Pita ani andjia napa ndu ongú bhomu-o lie hana pi okpála-a, ani atsia atapa bhú kuti na Kapalanauma. <sup>2</sup> Oo, abhú Kapalanauma-a, ngámá bini gba osudha na Loma,\* adu ne bali gba e bini inde ani adu akunda e naali. A adu li bali ang-o ne kuo masikpe de me ani kodho bua e. <sup>3</sup> Li ani adje 'ngú gba Yesu-o lie, ani atsia atima obhelesi okpála koko gba omaYuda agba Yesu. U anu napa pi ani me, ani go kobho bali gba ngámá ang-o. <sup>4</sup> Li obhelesi okpála bhomu-o akolo de

Yesu lie, u atsia aholo nakikiliki lio pi ani me: «Mu ti da namene ehe inde ani ayo e pi ani, i da me mu nde akunda-o, anga ani ndjindji. <sup>5</sup> Ani kunda di omaha ní naali. Ani ayiki eti nadje líli gba Moidje pi ní ngae.»

<sup>6</sup> Abhomu-o, Yesu atsia aholo 'nú ne uo. Ani akolo lie de kuti-e masikpe-e, ngámá gba osudha-a atsia atima obi e me u pa pi ani me: «Ngámá, mo ondála limu de. Ma ne kpála na padhá. A ayo ka mu nali bhú 'ti gba ma-a de.† <sup>7</sup> Kaka-a, ma u igini lima ndjindji de me ma go kolo li mu ngama-a de. Engú bini, pa bha koli eli bini, amba bali gba ma-a kobho. <sup>8</sup> Ma ngapa mo-o, anga ma sa líli gba ongámási. Ma la di ngaha líli pi osudha. Ma pa pi bhe bini-e me: «Nunu!» Ani nú. Ma pa pi bhe koko-o me: «Gogo!» Ani gó. Ma pa pi bali gba ma-a me: «Mene 'he inde!» Ani méne.»

<sup>9</sup> Li Yesu adje engú inde li ngámá bhomu-o apa e lie, ani angamba naali. Ani adji lie, ani atsia apa pi bhiti okpála inde adu akpata ani-e me: «Ma apa pi yi me, ma bhaka nga ngua kpála inde abhuka ma me-e de, belegu de bhú ká omaIsalaele!» <sup>10</sup> Li okpála na titima agie lio lie agba ngámá-a, u abhaka me kuo nde ayie li bali gba ngámá ang-o ayie.

*Yesu azuku ndili na bhobhoko gba øke bini na øøle*

<sup>11</sup> Pita li Yesu akobho bali gba ngámá bhomu-o lie, ani atsia atapa bhú gudhu na Naine. Omukpata gba ani ne okpála bhelé anu bhú dabili bini ne ani. <sup>12</sup> Ani akolo li 'bhe bhoti na gudhu-o lie, a abhaka me u nde adji ne ngbangba makombi bini ngú nazizi. A ko nani koli ndili na bhobhoko bini gba øke bini

\* 7:2 7:2 Ngámá gba osudha na Loma: Ngámá bini gba osudha na Loma: Ngámá ang-o nani ne ngámá pí 'ndji osudha kámá bini. A adu nani maYuda de. † 7:6 7:6 Li maYuda bini li bhú 'ti gba kpála inde ne maYuda ade-e, li maYuda ang-o kólo sisiti kala Ebhe.

na     . Okp  la bhel   na g  dhu bhom  -o adu bh   dabili bini ne   le ango-o.

<sup>13</sup> Abhom  -o, Ng  m   Yesu au ani. Li ani au ani lie, ani adje ndjinga ani naali. Ani atsia apa pi ani me: «'O naku 'gb  !» <sup>14</sup> Pipita-a, ani adyudyo lie, ani a'o 'kpa e li ngbangba-o. Abhom  -o, okp  la inde abi kuo atsia alu. Yesu atsia apa pi makombi bhom  -o me: «Ma apa pi mu me, yie bh  l  !» <sup>15</sup> Kp  la inde adu igini me ani nde akpi-e, ani ayie bh  l  , ani adu ma  . Ani atsia aholo nagama 'ng  . Abhom  -o, Yesu atsia aha ani pi 'hi e. <sup>16</sup> Ndu okp  la hana adje tsulu. U adu adh  g   Ebhe, u atsia adu apa me: «'Ngb   polofeta akoto bh   k   n  ! Ebhe ago nateteke okp  la gba e-o!» <sup>17</sup> Ngali na eng   li Yesu amene e atsia agbolo bh   ndu doto na Yudaya libhomu di ne bh   okuti na ngongo-o hana.

*Djaa bh  lu nabatisa okp  la atima okp  la agba Yesu*

*(Tsia bh   Mat. 11:2-19.)*

<sup>18</sup> Li omukpata gba Djaa agie lio lie, u atsia akpokpo ndu ongamba 'ng   inde li Yesu amene e hana pi Djaa. Abhom  -o, ani a'i okp  la bhisi bh   k   uo. <sup>19</sup> Ani atsia atima uo ng   nayi Yesu me: «Ne me mu ne Masiya inde ngago, ne me ayo me ya adjeke kp  la koko?» <sup>20</sup> Li okp  la bhom  -o akolo lie de ani-e, u atsia apa pi ani me: «Djaa bh  lu nabatisa okp  la atima ya me ya go yi mu me: «Ne me mu ne Masiya inde ngago, ne me ayo me ya djeke kp  la koko?»»

<sup>21</sup> Bha li nedhinga bhom  -o, Yesu akobho okp  la bhel   na kuo. Ani akobho obhende adu ne okuo ngang  . Ani akobho di obhende adu ne osisiti bua bh   o-o. Ani atsia abhulu di djila okp  la bhel   inde i u 'kp   de-e bh   b  dha bh  

'bu gba e-o. <sup>22</sup> Pipita-a, ani atsia agie pi okp  la li Djaa atima o-o me: «Yi nu kpokpo pi Djaa eng   inde yi au e, di ne bhende yi adje e ko. Okp  la i u 'kp   de-e ngau 'kp  . Obhende ne eze li 'dhu o-o, u ngadhuku ndjindji. Okp  la na k  ba ngakobho. Obhende i dje 'kp   de-e ngadje 'kp  . Obhende amu-o ngazuku. Ma ngakpokpo B  dha Ngali pi obh  lu ndibhili. <sup>23</sup> A ko djali pi kp  la inde i bh  ka ma ne bua na bhisi bhisi de ko!»

*Yesu akpokpo 'ng   gba Djaa bh  lu nabatisa okp  la*

<sup>24</sup> Bhiti okp  la adu oo. Pita li obh  lu titima gba Djaa agbida lie, Yesu atsia aholo akpokpo 'ng   gba Djaa pi uo me: «Yi anu igini natsia abh   'gu-o ni? Yi anu igini natsia kp  la inde maka mbamba inde ngadyiki ka anvi-e? A mo-o ade. <sup>25</sup> I du mo-o de-e, yi anu la igini natsia ni? Kp  la inde adyi babadha bongo-o? A mo-o ade, anga obhende ngadyi babadha bongo-o, inde di ne k  tia ka o-o ngadu abh   'ti gba ong  m  si. <sup>26</sup> Yi anu nga la igini natsia ni? Polofeta? A moko, ma apa pi yi me, yi au bhende ane belegu polofeta mane. <sup>27</sup> Padh   de, anga a ko kp  la inde li eli gba Ebhe-e apa 'ng   gba e me:

«Ebhe apa me, ma ngatima bh  lu titima gba ma-a

pi mu kalanu

ng   naleke kpadji pi mu.†»

<sup>28</sup> Ma apa pi yi me, Djaa ngb  ngb   ane ndu okp  la hana. Eng   bini, kp  la inde ane ne mboye bh   Nau gba Ebhe-e , ani ane ani ne engb  .»

<sup>29</sup> Ndu okp  la hana, belegu ondombi na mandjandja adu adje Yesu. Abhom  -o, u ambila nani ngbili 'ng   gba Ebhe-e lie, Djaa atsia abatisa uo. <sup>30</sup> Eng   bini,

† 7:27 7:27 Tsia bh   Mal. 3:1.

omɔFalisai ne omɔsuno na líli gba Moidje ayala nani me Djaa batisa o. U amene lie mo-o, u ayala engú inde li Ebhe adu akúnda e pí uo-o.

<sup>31</sup> Do Yesu matá me: «Ma tí da nasuno okpála na naki si lí da? Uo maka da? <sup>32</sup> Uo maka ongisi inde adulu bhú daposo. Okoko ngasúsula pí obi o me:

«Ya abhi ngbabi na ebi pí yi, engú bini, yi tsia dho 'bí de!

Ya ali etsi na da kuo pí yi, engú bini, yi ku 'gbá de!»

<sup>33</sup> Padhá de, anga Djaa bhulu nabatisa okpála ago, aní zu 'he maka okpála koko de, aní ndji di vino de, do yi me: «A bhú aní ne siti bua!» <sup>34</sup> Ngama, Ndili gba kpála, ma ago, ma ngazu 'he maka okpála koko, ma ngandji vino, do yi me: «Yi tsia nga kpála inde ngabhundja bha bini nazú 'he di ne nandji vino! Aní ngakúnda ondombi na mandjandja, a ko la di olia okpála na sisiti!» <sup>35</sup> Engú bini, ndu okpála hana inde abhuka imbilangu gba Ebhe-e, u ambila me imbilangu ango-o ngbingbili.»

*Yesu azu 'he abhú 'ti gba Simo muFalisai*

<sup>36</sup> A adu nani muFalisai bini, aní a'i Yesu ngú nazú 'he bhú dabili bini ne e. Yesu ali bhú 'ti gba muFalisai-o. Oo, aní atsia aholo nazú 'he-o. <sup>37</sup> Òlò bini na sisiti adu bhú gudhu bhomu-o. Aní adje lie me Yesu ngazu 'he abhú 'ti gba muFalisai bhomu-o, aní ago ne gili bini inde u abho e lí teme inde u a'i e me alabatele.† Gili ango-o abedhe nani ne mungotsi bedhe. <sup>38</sup> Aní akolo lie, aní atsia akita bhú lí 'dhu Yesu lí pápá ne akele aní. Aní aholo naku 'gbá, ngula adu atuko lí 'dhu Yesu. Abhomu-o, aní aholo nakukuo ne sundjo

e. Aní akama 'dhu aní, aní atsia aha mungotsi-e, aní atuko tété. <sup>39</sup> Lí muFalisai inde a'i Yesu au lie mo-o, aní atsia apa lí bua e me: «Kpála inde-e, a ko bha ndju polofeta de kukulu! Padhá de, anga òlò inde ngabu 'kpa e lí aní bhomu-o, a ko siti òlò. Aní mbila la-a de!»

<sup>40</sup> Abhomu-o, Yesu atsia apa pí muFalisai-e me: «Simo, ma mbo ne engú bedi napapa pí mu.» Simo atsia agie me: «Mɔsuno, papa.» <sup>41</sup> Yesu atsia apa me: «Kpála bini aha nani bopulu pí okpála bhisi. Aní aha pí kpála bhe bini-e lí falanga kámá bhuluvue. Aní atsia aha pí kpála bhe koko-o lí falanga ndjikpa bhuluvue. <sup>42</sup> Lí tia du la lie ka okpála ango-o ngú nagigie de-e, abhomu-o, aní atsia ambu lí bopulu gba ndu uo bhisi hana. Bhú ká okpála bhisi bhomu-o, akúnda aní ané mane ne bhedho?» <sup>43</sup> Simo atsia agie me: «Ma abhundja me a ko kpála bhende u ambu lí bopulu gba e adu bhelé naali ko.» Do Yesu pí aní me: «Mo opa ndjindji.»

<sup>44</sup> Pipita-a, aní adji lie ne lí pápá gba òlò-o, aní atsia apa pí Simo me: «Mo ou engú lí òlò inde-e amene e au? Ma ali lie bhú 'tí gba mu-o, mu ha engu muma ngú navulu 'dhu ma de.‡ Engú bini, ngaani-e, aní avulu 'dhu ma ne ngula na djila e. Aní atsia akuo ne sundjo e. <sup>45</sup> Mu kama ma de. Engú bini, ngaani-e, nayie maka ma ali iginí lie sí-e, akolo pí mbia inde-e, aní 'o nakama 'dhu ma de. <sup>46</sup> Mu tuko emu pí 'ndji ma de. Engú bini, ngaani-e, aní atuko mungotsi lí 'dhu ma.

<sup>47</sup> Kaka-a, ma apa pí mu me, mukúnda na ngéngbé inde aní asuno e, apana me u a'e bhiti siti 'ngú gba aní-e a'e. Engú bini,

† 7:37 7:37 Alabatele: A ko teme na mase naali inde u abhobho oehe maka gili lie ko. § 7:44 7:44 Simo ha nani engu pí Yesu ngú navulu 'dhu e de, anga Simo adu au lie me ní ngéngbé pí Yesu ngaani. Tsia bhú Dje. 18:4, 19:2.

kpála inde u a'e siti 'ngú gba e me a nde yeye-e, ani pána bhadi mukunda na yeye.»<sup>48</sup> Abhomu-o, ani atsia apa pi òlò bhomu-o me: «Ma a'e osisiti 'ngú gba mu-o a'e.»<sup>49</sup> Okpála inde adu azu 'he bhú dabilì bini ne ani aholo nabhundja me: «A inde-e mangua kpála dho? Ani nga 'e belegu siti 'ngú!»<sup>50</sup> Abhomu-o, Yesu atsia apa pi òlò-o me: «Ebhe akobho mu, anga mo obhuka ma. Nu ne guo 'ngú.»

## 8

*Omukpata ndjikpa ne ká bhisi ne olisi koko akpata Yesu*

<sup>1</sup> Pipita-a, Yesu adu adholo bhú ndu ogudhu di ne bhú ndu okuti hana. Ani adu akpokpo Bádha NgaliNau gba Ebhe-e ne ndu bilì hana. Omukpata ndjikpa ne ká bhisi-e adu bhú dabilì bini ne ani.<sup>2</sup> Olisi koko nani li Yesu apandja osisiti bua bhú o, ne obhe ani akobho o ne okuo-o, a adu di bhú dabilì bini ne ani. A du nani: Malia (u a'i e me kpála na gudhu na Magadala) nani li Yesu apandja osisiti bua bhú e mananika-o;<sup>3</sup> Djaani, wala Kudja, ngámá na kulu gba 'ngbé ngámá Elode; Sudjana ne olisi koko bhelé. Ndu olisi bhomu-o hana adu aha tia gba o ngú nateteke Yesu ne omukpata gba e ne di.

*Gbitaku gba kpála nalu nguwa (Tsia bhú Mat. 13:1-9; di ne bhú Mlk. 4:1-9.)*

<sup>4</sup> Okpála adu nayie bhú gudhu bini ne bini, u adu ago abhaka Yesu. Li okpála bhelé adu apokobho bhúla o lie de ani-e, ani atsia apa gbitaku inde-e me:<sup>5</sup> «Kpála bini anu ngú nabala nguwa abhú 'dyi gba e. Ani adu ababala lie, té nguwa koko atsia abala li kpadji. Okpála adedele ne 'dhu o, odhu atsia ago, u azu

bhobhomu-o hana.<sup>6</sup> Koko abala li bilì na teme. Li ezu-o aze lie, atsia a'ulu anga engu du bhú doto sasa de.<sup>7</sup> Koko atsia abala li bilì na eti, A akò lie, ezu-o akò ne eti-e bhú dabilì bini. Eti-e atsia agaga ezu-o. Kaka-a, ezu-o bhele ndjindji de.<sup>8</sup> Engú bini, koko atsia abala naae bhú doto na babadha. Ezu-o akò, a atsia ali lílì. Nguwa bini ne bini ali lílì kámá bini.» Yesu atsia apa matá me: «Yi dje ndjindji, i du me a nde li yi ne 'dje 'dje ngú nadje 'kpí ko!»

*Ka ni li Yesu adu akpo 'ngú lie bhú ogbitaku-o?*

*(Tsia bhú Mat. 13:10-17; di ne bhú Mlk. 4:10-12.)*

<sup>9</sup> Omukpata gba Yesu ayi ani me: «Ta gbitaku bhomu-o pi?»

<sup>10</sup> Ani atsia agie pi uo me: «Ngayi-e, yi ambila naayi engú inde awo nani lie kalanu pindji Nau gba Ebhe-e ambila. Engú bini pi okpála koko-o, ma akpo engú bhomu-o bhú ogbitaku maka li Bhuku gba Ebhe apa lie me:

«U ti da natsia 'kpí,

engú la bini, u ú 'kpí de.

U ti da nadje 'kpí,

engú la bini, u mbila tata-a de.†»

*Yesu akpo ta gbitaku gba kpála nalu nguwa-o*

*(Tsia bhú Mat. 13:18-23; di ne bhú Mlk. 4:13-20.)*

<sup>11</sup> «Ta gbitaku bhomu-o me, nguwa-a, a ko eli gba Ebhe-o .

<sup>12</sup> Nguwa bhende abala li kpadji-e, a ko okpála bhende ngadje eli gba Ebhe-o. Engú bini, li Djabulu gó, ani tsia dhépe eli ango-o li bua uo, ngú nagbite kpadji pi uo me u abhúka de, amba Ebhe akóbho uo de.<sup>13</sup> Nguwa bhende abala li bilì na teme-e, a ko okpála bhende ngadje eli gba Ebhe-e, u tsia sía ne djali hana. Engú bini, eli ango-o

† 8:10 8:10 Tsia bhú fsa. 6:9.



lí li bua uo de. U bha ngabhuka ngubula nedhinga bedi. Li nale kolo-o, u 'ó ká nabhuka gba o-o. <sup>14</sup> Nguwa bhende abala li bíli na oeti-e, a ko okpála bhende ngadje eli gba Ebhe-o. Engú bini, u ne gumu ndu 'he na doto ngangá. U ne gumu tia na doto ne odjali na mukobho na doto. Gumu tia na doto ne odjali na mukobho na doto ango-o ngagaga Eli-o. Kaka-a, eli bhomu-o lí lílí nabhele mabhele de. <sup>15</sup> Nguwa bhende abala bhú doto na babadha-a, a ko okpála bhende ngadje eli gba Ebhe ne bua na babadha, u tsia zíba. U líla ndjindji, u tsia lí lílí ka kekele gba o ko.»

*Gbitaku na eke*  
(*Tsia bhú Mlk. 4:21-25.*)

<sup>16</sup> «Í dā me kpála bini nde adhedhe eke-e, aní búku ne lusa de. Aní tó di asa polo de. Engú bini, aní 'ó pí 'he ngubula me okpála inde ngali bhú 'ti-e, u u 'kpí tété ndjindji. <sup>17</sup> A moko, ndu 'he hana inde awo lie mawo-o, akóto bhú mbasu. Ndu 'he inde na pepe hana akóto li zi 'kpí, li okpála tsia mbíla. <sup>18</sup> Kaka-a, 'e-e! Yi líla liyi bhú nadje eli-o, anga kpála li ehe nde ka e, u ahá matá koko pí aní pépé. Engú bini, kpála inde li ehe nde ka e ade-e, u adhépe belegu mboye 'he bhende aní ngabhundja me a ka ni ko.»

*'Hi Yesu ne ondaise Yesu*  
(*Tsia bhú Mat. 12:46-50; di ne bhú Mlk. 3:31-35.*)

<sup>19</sup> 'Hi Yesu ne ondaise Yesu ago ngú natsia aní. Engú bini, u ale nakolo li aní pima ka bhiti okpála-o. <sup>20</sup> Abhomu-o, u atsia apa pí Yesu me: «'Hi ma ne ondaise mu akilidjo, u ngakunda nau mu.» <sup>21</sup> Engú bini, Yesu atsia apa pí ndu uo hana me: «'Hi ma ne ondaise ma-a, a ko okpála inde ngadje eli gba Ebhe ne namemene ko.»

*Yesu ayoko kpéke anvi pí 'ngu*  
(*Tsia bhú Mat. 8:23-27; di ne bhú Mlk. 4:35-41.*)

<sup>22</sup> Ekpí bini pipita-a, Yesu ne omukpata gba e a'u bhú zabu bini. Aní atsia apa pí uo me: «Ní gulu ekpø-o ai 'ngu.» Abhomu-o, u atsia atapa. <sup>23</sup> Nedhinga u adu agulu 'ngu-o lie, Yesu atsia ati ne ela. Kpéke anvi na gipi aholo nape pí ekpø-o. Engu aholo nabedhe bhú zabu-o, kuo atsia akolo de uo masikpe. <sup>24</sup> Omukpata adyudyo lío de Yesu masikpe, u atsia azaku aní me: «Musuno, Musuno, ní adji amú!» Yesu azaku, aní atsia ambe bhú 'ndji anvi di ne wowo 'ngu-o. Abhomu-o, anvi-e a'o nape, engu-o atsia akolo guguo. <sup>25</sup> Do aní pí uo me: «Nabhuka gba yi-e su?» Engú bini, u adu adje tsulu, u atsia adu angamba naali. Abhomu-o, u adu apa sunda o me: «A e mangua kpála dho inde ngaha belegu líli pí anvi ne engu, uo ngamemene!»

*Yesu akobho kpála bini li osisiti bua adu ato mbolo li e*  
(*Tsia bhú Mat. 8:28-34; di ne bhú Mlk. 5:1-20.*)

<sup>26</sup> Abhomu-o, u akolo bhú ndu doto gba okpála na Gelasa, ayi ekpø bhúla ndu doto na Galilaya. <sup>27</sup> Nedhinga li Yesu adu akoto bhú zabu-o lie, kpála bini na kuti bhomu-o ago ngú nabhaka aní. Kpála ango-o, osisiti bua adu bhú aní. Ekpí bhelé, aní dū adyi bongo de, aní dū asi bhú 'ti de. La-a, aní adu bha bini adu bhú ká olata. <sup>28-29</sup> Siti bua-a adu agbulu aní piko. Abhomu-o, u atsia adu agbite 'kpa aní ne 'dhu aní ne ekpú di ne gbíndjili ngú nalila aní. Engú bini, kpála ango-o adu atsotsolo gbíndjili di ne ekpø-o má dhu dhu dhu! Siti bua atsia adu amba bhúla aní ne abhú míli bíli. Lí kpála ango-o au Yesu lie me-e, aní aholo natu 'ue. Abhomu-o, aní ati bhú li 'dhu Yesu, aní atsia

asula kpekpeke me: «Yesu, Ndili gba Ebhe na Apí 'Kpí, mo okunda namene ngú ma pí? Ma ayo ka mu me, mo oméne ma sísiti de!» Aní apa nani mo-o, anga Yesu adu aha líli pí siti bua ang-o me aní koto bhú kpála bhomu-o makoto.

<sup>30</sup> Yesu atsia ayi kpála ang-o me: «A 'li mu pí?» Aní agie me: «A 'li ma me <Bhelé. >» Aní apa mo-o anga osísiti bua bhelé alí nani bhú aní. <sup>31</sup> Osísiti bua ang-o atsia adu akikiliki lío pí Yesu me: «Mo ombá ya bhú tsu 'dú bhe má ngbongobho-o de!» <sup>32</sup> A abhaka me 'ngbé piga opame bini nde ngagíli 'zú gba o pí 'ta oo. Osísiti bua-a atsia apa pí Yesu me: «Ha kpadjí pí ya, ya lí bhú opame bhomu-o.» Aní atsia azíba pí uo.\* <sup>33</sup> Abhomu-o, osísiti bua aze bhú kpála ang-o, u atsia amba lío bhú opame-o. Piga opame bhomu-o libhomu ayie ne holo apí 'ta, u anu alilinda bhú ekpè-o, u atsia amu.

<sup>34</sup> Lí omulíla gba opame au engú inde akodho 'kpí-e lie, u atsi ne holo, u atsia anu nakpokpo ngali ang-o abhú gudhu ne abhú okúti. <sup>35</sup> Okpála aze ngú nau engú inde akodho 'kpí-o. U akolo de Yesu lie, u abhaka me kpála inde lí osísiti bua aze bhú e nde adu kuto bhú lí 'dhu Yesu. Aní adu me aní nde adyí bongo, aní nde ngabhundja 'ngú hana ndjindji. Abhomu-o, tsulu atsia aholo uo. <sup>36</sup> Okpála inde au ndu 'ngú bhomu-o hana atsia akpokpo pí uo maka lí Yesu akobho kpála ang-o lie ko.

<sup>37</sup> Abhomu-o, ndu okpála hana na ndu doto bhomu-o atsia apa pí Yesu me aní yie bhú kúti gba o mayie, anga u adu adje tsulu naali. Yesu a'u bhú zabu-o ngú na'e ne enú. <sup>38</sup> Kpála inde lí osísiti

bua aze bhú e aholo nalopolo lie pí Yesu me: «Yesu, i dú me mu nde akunda-a, mo o'ó ka ma de, ní nu ne mu.» Engú bini, Yesu agie aní sidi, aní atsia apa pí aní me: <sup>39</sup> «Gie limu agba mu, amba mu kpokpo ndu 'ngú inde lí Ebhe amene e pí mu-o hana.» Abhomu-o, kpála ang-o atsia atapa ne kpokpo ndu 'ngú lí Yesu amene e pí aní-e hana bhú gudhu libhomu.

*Yesu akobho øle bini, aní atsia azuku di ndili na øøle gba Yailo*

*(Tsia bhú Mat. 9:18-26; di ne bhú Mlk. 5:21-43.)*

<sup>40</sup> Nedhinga lí Yesu agie lie lie alí pála ekpè koko-o, okpála bhelé asia aní ndjindji, anga ndu uo hana adu adjeke aní. <sup>41</sup> Lí nedhinga bhomu-o, kpála bini akolo. A adu 'li aní me Yailo. Aní adu nani ngámá na eti nadje líli gba Moidje na bili bhomu-o. Aní atí bhú lí 'dhu Yesu, aní atsia akikiliki lie pí aní me aní nu agba ní, <sup>42</sup> anga ndili gba aní na øøle adu masíkpe de nakpi. Koli ndili bhomu-o bha nani ka aní bini, aní adu ne kalanga ndjikpa ne ká bhisi. Lí kpadjí-e, bhiti okpála asulu Yesu má wakaka!

<sup>43</sup> A abhaka me øle bini nde oo. Øle ang-o, ngute adu atuko lí aní bhú sùnda kalanga ndjikpa ne ká bhisi. [Aní andjia nani tia lie hana pí omatia], engú bini, kpála bini tí nani da nakobho aní de. <sup>44</sup> Aní ago ne akele Yesu, aní atsia abu 'kpa e lí bongo 'ta aní-o.† Ngute-e a'o bha kolo natuko lí aní maka ndjombe. <sup>45</sup> Abhomu-o, Yesu atsia ayí me: «A abu 'kpa e lí ma da?» Ndu uo hana agie me: «A ko naae ya de!» Piele atsia apa pí Yesu me: «Musuno, bhiti okpála inde asa mu ngbalina inde-e, ngasulu mu ngao.» <sup>46</sup> Engú bini, Yesu atsia

\* **8:32** 8:32 Engú inde amene lie si-e, a dú nani bhú kúti gba omaYuda de, anga omaYuda ngau opame sísiti. Tsia bhú Lev. 11:7, ne bhú Det. 14:8, di ne bhú Mlk. 5:11. † **8:44** 8:44 Bhú líli gba omaYuda-a, lí øle dú ne kuo gba olisi-e, aní bu 'kpa e lí bhoko-o, lí bhoko ang-o kólo sísiti kala Ebhe. Tsia bhú Lev. 15:25-33.

apa me: «Kpála bini abu 'kpa e li ma, anga ma ambila me té angu gba ma-a akoto.»

<sup>47</sup> Өlө ango-o au me Yesu ambila engú inde ni amene e ambila. Abhomu-o, ani ago ne nagaku, ani tsia ati bhú li 'dhu Yesu. Ani atsia akpokpo pi Yesu kala ndu okpála hana ta 'ngú inde ani abu 'kpa e li ani lie, di ne maka ani akobho bha lie maka ndjombe-o. <sup>48</sup> Yesu pi ani me: «Ndi өlө-e, mo okobho, anga mo obhuka ma kukulu. Nu ne guo 'ngú .»

<sup>49</sup> Nedhinga li Yesu adu apa lie mo-o, kpála bini ayie agba ngámá Yailo, ani ago apa pi ani me: «Ndili gba mu-o andjili. Mo ondála matá musuno de.» <sup>50</sup> Engú bini, li Yesu adje ani lie, ani atsia apa pi Yailo me: «Mo odjé tsulu de, du bha ne nabhuka, ndili gba mu-o akóbho makobho.»

<sup>51</sup> Li Yesu akolo lie agba ngámá Yailo, ani ziba de me kpála bini li nganda ni abhú 'ti-e de, bha bini Piele, Dja ne Djaki, a la bhadi-e 'dyi ndili-e ne 'hi ndili-o. <sup>52</sup> Ndu okpála inde adu oo hana, adu atu 'ue ne naku 'gbá ngú ndili ango-o. Abhomu-o, Yesu atsia apa pi uo me: «Yi 'o naku 'gbá! Ndili-e kpi de, engú bini, ani tila.» <sup>53</sup> La-a, u aholo namu ani anga u adu ambila ndjindji me ndili-e akpi. <sup>54</sup> Abhomu-o, Yesu aholo 'kpa ani, ani atsia asula kpekpeke me: «Ndika ma, yie bhúlá!» <sup>55</sup> Ndili-e azuku, ani ayie bhúlá kolo má gala! Yesu atsia aha líli pi uo me, u ha ezú pi ani. <sup>56</sup> Okpála inde azu ani angamba naali. Engú bini, Yesu agbele 'dje uo kpekpeke me u apa belegu engú inde akodho 'kpi-e pi kpála bini de.

## 9

*Yesu atima obhulu titima ndjikpa ne ká bhisi gba e-o*

*(Tsia bhú Mat. 10:5-15; di ne bhú Mlk. 6:7-13.)*

<sup>1</sup> Ekpí bini, Yesu apo bhúla omukpata ndjikpa ne ká bhisi gba e-o. Ani aha angu pi uo me u pandja ndu osisiti bua hana bhú okpála, amba u kobho di okpála na kuo. <sup>2</sup> Pipita-a, ani atsia atima uo me u nu ne kpokpo ngali Nau gba Ebhe , amba u kobho di okpála na kuo. <sup>3</sup> Ani pi uo me: «Nanu ka yi-e, yi abhá oehe de. Yi ahá ndula de. Yi ahá ehe ngú nabi 'he bhúbhú de. Yi ahá ezú de. Yi ahá falanga de. Kpála bini bhú ká yi ahá bongo na mbulu bhisi de. <sup>4</sup> Ndu eti hana u asia yi bhú e-e, yi du bha oo, akólo li nedhinga inde yi ayie lie bhú eti ango-o. <sup>5</sup> Ndu eti hana u sía yi bhú e de-e, yi de koto bhúbhú, amba yi pulu doto na kuti gba uo inde adhedhe li 'dhu yi-o. Bhothomu-o asúno pi uo me u amene siti 'ngú.»\* <sup>6</sup> Obhulu titima gba Yesu agbida, u apu bhú ndu okati hana. U akpokpo Bádha Ngali gba Ebhe-e pi okpála. U atsia akobho di okpála na kuo ne ndu bili hana.

*Mabhundja gba Elode adholo ngangá*

*(Tsia bhú Mat. 14:1-12; di ne bhú Mlk. 6:14-29.)*

<sup>7</sup> Elode , ngámá na ndu doto na Galilaya, adje ndu 'ngú li Yesu ne omukpata gba e adu amene e hana. Abhomu-o, mabhundja gba ani-e atsia aholo adholo ngangá, anga okpála koko adu apa me: «Djaa bhulu nabatisa okpála azuku!» <sup>8</sup> Okoko adu apa me: «Polofeta Eliya akoto bhomu-o ngae.» Okoko atsia adu apa matá

\* 9:5 9:5 Okuti gba omaYuda inde i ziba nani Bádha Ngali gba Ebhe-e de-e, u du nani au uo maka omaYuda de, ne odoto gba o-o hana. Tsia bhú Mlk. 6:11.

me: «Suka opolofeta na kalanu-o, azuku bhomu-o ngae.» <sup>9</sup> Engú bini, Elode atsia apa naae me: «Ma aha nani líli-e ngama me u kodho ngulu Djaa . Kpála bhende ma ngadje okpála apa 'ngú gba e me-e, a ko matá naae da?» Abhomu-o, ani atsia adu agili me ni u Yesu.

*Yesu aha 'zu pi bhiti okpála*

*(Tsia bhú Mat. 14:13-21; ne bhú Mlk. 6:30-44; di ne bhú Dja. 6:1-14.)*

<sup>10</sup> Li obhulu titima agie lio lie de Yesu-o, u atsia akpokpo ndu 'ngú inde u amene e hana pi ani. Pipita-a, ani abha uo, ani atsia atapa ne uo de okpála tsutsu li pápá na gudhu na Betsaida. <sup>11</sup> Engú bini, li bhiti okpála bhomu-o ambila lie me u agbida oo, u atsia akpata ani. Abhomu-o, Yesu asia uo, ani atsia akpokpo 'ngú pindji Nau gba Ebhe-e pi uo. Ani atsia akobho di okpála inde adu ne kuo ko.

<sup>12</sup> Li ekpí aholo lie nabi-e, obhulu titima ndjikpa ne ká bhisi-e adyudyo lio de Yesu, u atsia apa pi ani me: «Ha kpadji pi okpála, amba u gbida nagili dabili nasi tété, di ne ehe nazu mazú bhú odjedje kuti masakpe si, anga ní ei bhú mili bili.» <sup>13</sup> Do Yesu pi uo me: «Yi ha 'zu pi uo ngayi.» U atsia agie me: «A bha ka ya si ne mapa bhuluvue di ne sungu bhisi. Ne me mo okunda me ya nu nakala ezú pi ndu okpála inde-e hana ngaya?» <sup>14</sup> (Obhosi adu nani oo masakpe de kutu bhuluvue.) Yesu atsia apa pi omukpata gba e me: «Yi pa pi uo me u popo bhúla o okpála ndjikpa bhuluvue, ndjikpa bhuluvue, amba u dulu kuto.»

<sup>15</sup> Omukpata-a amene maka ani apa pi uo lie ko. U atsia apa pi ndu okpála hana me u dulu kuto.

<sup>16</sup> Abhomu-o, Yesu aha mapa bhuluvue ne sungu bhisi-o, ani atsia 'kpí ne bhúlá, ani atsia agie heni pi Ebhe ngubula ezú bhomu-o. Pipita-a, ani agumu mapa ne sungu-o, ani aha pi omukpata ngú nagagapa li okpála. <sup>17</sup> Ndu uo hana azú 'he, u a'u'u má kpú kpú kpú! Dudu atigala-a, obhulu titima alo, a atsia abebedhe okili ndjikpa ne ká bhisi.

*Piele apa me Yesu ne Masiya*

*(Tsia bhú Mat. 16:13-19; di ne bhú Mlk. 8:27-29.)*

<sup>18</sup> A akolo ekpí bini, Yesu adu akpokpo 'ngú ne Ebhe kpi e kpi me, omukpata gba ani-e nde de ani. Ani atsia ayi uo me: «Okpála ngapa me ma ne da?» <sup>19</sup> U agie me: «Okpála koko ngapa me, mu ne Djaa bhulu nabatisa okpála. Okoko me, mu ne polofeta Eliya. Okoko matá me, suka opolofeta na kalanu-o azuku.» <sup>20</sup> Ani atsia ayi matá uo me: «A la yi-e, yi ngapa naayi me ma ne da?» Do Piele me: «Mu ne Masiya inde li Ebhe atima e ko.»

*Yesu akpo 'ngú pindji nakpi ne nazuku ka e*

*(Tsia bhú Mat. 16:20-28; di ne bhú Mlk. 8:30, 9:1.)*

<sup>21</sup> Engú bini, ani agbele 'dje uo kpekpeke, ani atsia aha líli me u apá belegu engú bhomu-o pi kpála bini de. <sup>22</sup> Abhomu-o, ani atsia apa matá pi uo me: «A ayo me ngama, Ndili gba kpála-a, ma dje likabhu naali. Obhelesi okpála, ongbengbe odimandø di ne omusuno na líli gba Moidje ayála ma. U abhélo ma, engú bini, ekpí na bata-a, ma tsia zuku.»

<sup>23</sup> Pipita-a, ani apa pi ndu okpála hana inde adu oo me: «Ɔ du me kpála nde akunda nakpata ma-a, a ayo me ani 'o nabhundja 'ngú gba e makpe. Ekpí bini ne bini hana, a ayo me ani bi

kulusi gba e-o, amba ani kpata ma. <sup>24</sup> Padhá de, anga i dũ me kpála nde akũnda nalila mukobho gba e, ani kpí. La-a, i dũ me kpála nde akũnda nakpi ngubula ma-a, ani tsia kóbho. <sup>25</sup> I dũ me kpála nde asia ndũ 'he na doto hana, engú la bini, ngaani makpe ani ngíta-a, ani tsia kpi-e, a la pi ani babadha bhúbhú ne ni? <sup>26</sup> I dũ me kpála bini nde adje nũmu li 'ngú gba ma-a, di ne bhe ma ngapa e-e, ngama Ndili gba kpála, ma adjé bhadi nũmu li 'ngú gba ani. A adú moko li nedhinga ma agó lie bhú nau na asasaua gba ma, ne bhe gba 'Dyi ma, di ne bhe gba oandjelu na bububu-o. <sup>27</sup> Ma apa pi yi na paká me, okpála koko bhú ká obhende inde si-e, mú padhá de, u aú ngaiza Nau gba Ebhe-e kalanũ.»

*Zi Ebhe asa Yesu ngbalina*

*(Tsia bhú Mat. 17:1-8; di ne bhú Mlk. 9:2-8.)*

<sup>28</sup> Masikpe de ekpí madjina pita ani apa 'ngú bhomũ-o lie, Yesu aha Piele, ne Djaa di ne Djaki, ani atsia a'ũ ne uo apí 'ta ngú nakpokpo 'ngú ne Ebhe. <sup>29</sup> Ani adũ akpokpo 'ngú ne Ebhe lie, bhúla ani ayipa lie, bongo gba ani avu má tuu! <sup>30</sup> Kolo me-e, okpála bhisi aze, u atsia aholo nagama 'ngú ne ani. A adũ nani Moidje ne Eliya. <sup>31</sup> Zi Ebhe asa uo ngbalina. U atsia adũ akpokpo 'ngú ne Yesu maka ani adji nandjia kulu gba e lie ne nakpi ka e abhú Yelusalema ko. <sup>32</sup> Piele ne obi e adũ ne ela má yikpokpo! U agbungbua lio lie, u au Yesu ne okpála bhisi me zi Ebhe nde asa uo ngbalina. <sup>33</sup> Li okpála bhisi bhomũ-o adũ ayie lie de Yesu-o, Piele atsia apa pi ani me: «Mũsuno, ya si ndjindji. A ayo me ya yiki 'ti ngbangbali bata, bini pi mũ, bini pi Moidje, bini pi Eliya.» (Engú bini, ani dũ ambila ta 'ngú inde ani adũ apa e de.)

<sup>34</sup> Nedhinga ani adũ apa 'ngú bhomũ-o lie, ndindi atsia ago abuku uo. Li ndindi adũ abuku uo lie, omũkpata atsia aholo nadje tsulũ naali. <sup>35</sup> Bhú ndindi-e, eli bini akoto, atsia apa me: «Kpála inde-e, a ko Ndili gba ma inde ma abhũ e ko. Yi dje ani!» <sup>36</sup> Pita li eli bhomũ-o andjia lie, u au bha ibili Yesu kpi e kpi. Nani li nedhinga bhomũ-o, omũkpata andjili bha má bulu! U tsia pa nga nani engú ango-o pi kpála bini de.

*Yesu akobho ndili na bhobhoko bini li siti bua adũ ato mbolo lie*  
*(Tsia bhú Mat. 17:14-18; di ne bhú Mlk. 9:14-27.)*

<sup>37</sup> Li ekpí aseke lie, Yesu ne omũkpata bata-a akó eta-o. Okpála bhelé atsia ago ngú nakó lio ne Yesu. <sup>38</sup> Bhú ká okpála bhomũ-o, kpála bini aholo nasũsula me: «Mũsuno, kikiliako, dje nga bha-a mbo ndjinga ndili gba ma na bhobhoko-o. Koli ani bha ka ma bini! <sup>39</sup> Siti bua ngagbulũ ani piko. A ngaha pi ani natũ 'ue. A ngadyiki ani kpekpeke má djigi djigi! Li efu holo naze bhú 'bhe ani. Bua ango-o le bha nakoto bhú ani pima. Li angu ani ndjia má ngba! <sup>40</sup> Ma akikiliki lima pi omũkpata gba mũ-o me u gbe bua ango-o bhú ani, engú bini, u ale pima.»

<sup>41</sup> Do Yesu de-e: «Ngayi okpála na naki-e, yi ne nabhuka ade, yi ngamene siti 'ngú. Ma adũ matá ne yi bhú dabili bini ngubula ekpí madho? Ma akíbila matá yi ngubula ekpí madho?» Pipita-a, Yesu apa pi kpála ango-o me: «Go ne ndili gba mũ ei.»

<sup>42</sup> Li ndili-e adũ ago lie, bua ango-o adyiki ani má djigi djigi! Ani atsia agũ 'i ani kuto má gbwe! Abhomũ-o, Yesu ambe bhú 'ndji siti bua ango-o. Ani akobho ndili-o, ani atsia aha ani pi 'dyi e. <sup>43</sup> Ndũ okpála hana adũ angamba.

U atsia aziba me Ebhe ne angu naali.

*Yesu akpo matá engú pindji nakpi gba e ko*

*(Tsia bhú Mat. 17:22-23; di ne bhú Mlk. 9:30-32.)*

Li ndu okpála hana adu angamba lie li ndu 'ngú li Yesu adu amene e, ani atsia apa pi omukpata gba e me: <sup>44</sup> «Yi dje engú ma adji apa e pi yi inde-e ndjindji. U apú ma, Ndili gba kpála-a, pi okpála na doto.» <sup>45</sup> Engú bini, omukpata gba ani-e mbila nani ta 'ngú bhomu-o de. Ebhe awo nani tata-a pi uo mawo. U atsia adu adje tsulu ngú nayi ani tété.

*A ngbéngbé da?*

*(Tsia bhú Mat. 18:1-5; di ne bhú Mlk. 9:33-37.)*

<sup>46</sup> Abhomu-o, omukpata aholo amene kpekebhø sunda o ngú nambila me, a ti da nadu ngbéngbé bhú ká o da. <sup>47</sup> Engú bini, li Yesu ambila engú inde u adu abhundja e li bua o-o lie, abhomu-o, ani aha mboye ndili bini, ani a'o ani de e. <sup>48</sup> Ani atsia apa pi uo me: «Kpála inde asia mboye ndili inde-e ka 'li ma-a, ani asia bhomu-o ma. Kpála inde asia ma-a, ani asia la di bhomu-o kpála inde atima ma ko. Padhá de, anga kpála inde ane ne mboye bhú ká yi hana-a, ani ane ne engbé ngae.»

*Kpála inde i yala yi de-e, a ko naayi kpála*

*(Tsia bhú Mlk. 9:38-40.)*

<sup>49</sup> Abhomu-o, Djaa adyudyo lie de ani, ani atsia apa pi ani me: «Məsuno, ya au kpála bini ngapandja osisiti bua bhú okpála ne 'li mu. Ya di me yoko ani, anga a ko mukpata gba mu-o maka ya

de.» <sup>50</sup> Engú bini, Yesu agie pi ani me: «Yi ayoko ani de, anga kpála inde i yala yi de-e, a ko naayi kpála.»

*Okpála na kuti bini na ndu doto na Samalia ayala nasia Yesu*

<sup>51</sup> Li nedhinga nagie lie ka Yesu abhúlá-a akolo lie masikpe-e, ani atsia aholo kpadji na Yelusalema ne kpéke bua hana. <sup>52</sup> Ani atima obhulu titima kalanu bhú kuti bini na ndu doto na Samalia, ngú naleke ndu 'ngú hana pi ani ndjindji. <sup>53</sup> Engú bini, ani adu la anu lie ne abhú Yelusalema-a, okpála na kuti bhomu-o atsia ayala nasia ani. <sup>54</sup> Omukpata Djaki ne Djaa au lie mo-o, u atsia apa pi Yesu me: «Ngámá, mo okunda me ya ha líli me mugbálá yie abhúlá, amba a go bhili uo?» <sup>55</sup> Engú bini, Yesu adji bhúla e ne li pápá gba uo, ani atsia ambe bhú 'ndji uo.† <sup>56</sup> Abhomu-o, u atsia agbida bhú kuti koko.

*Okpála bhende akunda nakpata Yesu*

*(Tsia bhú Mat. 8:19-22.)*

<sup>57</sup> U adu lie li kpadji-e, kpála bini apa pi Yesu me: «Ma akpáta mu li ndu bili mo onú lie hana.» <sup>58</sup> Yesu atsia apa pi ani me: «A ka onekpø di ne odhu ne dabili gba o ngú nasi tété. Engú bini, dabili ngú nago ka ma, Ndili gba kpála tété ade.» <sup>59</sup> Ani apa matá pi kpála koko me: «Kpata ma.» Engú bini, kpála ango-o apa pi ani me: «Ngámá, 'o nga ma, amba ma nú zi ngaiza 'dyi ma.»‡ <sup>60</sup> Yesu agie pi ani me: «'O okpála bhende amu-o, u zi okuo gba o-o, amba ngamu-o, mu nu naamu ne kpokpo ngali Nau gba Ebhe ko.» <sup>61</sup> Kpála koko apa matá pi ani me: «Ngámá, ma

† 9:55 9:55 U aye bhú obhuku koko-o me: «Yi mbila ngua bua inde i ngagama 'ngú bhú yi-e de. Padhá de, anga ngama, Ndili gba kpála-a, ma go ngú nabhili okpála de, ma ago mangbo ngú nakobho uo.» Tsia bhú Luk. 19:10. ‡ 9:59 9:59 A adu me 'dyi ani nde kpi nga nani-i de. Tsia bhú Eki. 20:12.

akpáta m̀ ma makpata. Engú la bini, 'o ngaiza ma, amba ma ǹ bhana lima p̀i opiga gba ma ko.»<sup>62</sup> Yesu agie p̀i aní me: «Li kpála bini holo namene kulu ne kóngo-o, p̀ipita aní tsia 'kpí ne sidi-e, kpála ango-o ti ne Nau gba Ebhe-e de.»

## 10

*Yesu atima om̀kpata ndjikpa mananika ne ká bhisi*

<sup>1</sup> P̀ipita-a, Ngámá Yesu alo om̀kpata koko ndjikpa mananika ne ká bhisi.\* Aní atsia atima uo bhisi bhisi kalaǹ bhú nd̀u ogudh̀u ne nd̀u bilí hana inde a ayo nako lie me, aní ǹu bha ngae makpe ko. <sup>2</sup> Aní atsia apa p̀i uo me: «Nguwa abhú 'dyi bhelé. Engú bini, okpála namene kulu ango-o bhelé ade. Yi yo ka bhul̀u edyi-e me aní tima okpála na kulu bhelé bhú edyi gba e ko. <sup>3</sup> Ma atima yi maka okandələ bhú ká osia. Yi ǹǹu! <sup>4</sup> Yi ahá falanga de. Yi ahá ehe nabi 'he bhúbhú de. Yi ahá malokə de. Yi adú ne lul̀u li kpadji-e ngú nayiyi okpála de.

<sup>5</sup> Yi li bhú 'ti bini-e, yi de pa ngaiza me: «Guo 'ngú gba Ebhe-e d̀u bhú 'ti inde.» <sup>6</sup> Li kpála inde akunda guo 'ngú d̀u bhú 'ti ango-o, li guo 'ngú gba yi-e dú bhú dabili bini ne aní. I d̀u mo-o de-e, nayi na guo 'ngú gba yi-e gíe lie p̀i yi. <sup>7</sup> Yi d̀u bhú 'ti ango-o. I d̀u me u nde aha ehe naz̀u maz̀u di ne bhe nandji mandji p̀i yi-e, yi de z̀u, amba yi ndji. Padhá de, anga a ayo me kpála na kulu sia makalá na kulu gba e ko. Yi adú asi bhú 'ti ngangá de.

<sup>8</sup> I d̀u me yi nde ali bhú gudh̀u bini-e, li okpála na gudh̀u ango-o sia yi-e, yi de z̀u 'he inde u ahá e p̀i yi ko. <sup>9</sup> Yi kobho obhul̀u kuo inde bhú gudh̀u ango-o, amba yi

pa p̀i nd̀u okpála hana me: «Nau gba Ebhe-e akolo de yi masikpe.»

<sup>10</sup> Engú bini, i d̀u la me yi nde ali bhú gudh̀u bini-e, u sia yi de-e, yi de ze ali kpadji, amba yi pa me: <sup>11</sup> «Ya ngapulú beleg̀u doto na gudh̀u gba yi inde adhedhe li 'dh̀u ya, ngú nasuno p̀i yi me yi amene siti 'ngú. Yi mbíla la ndjindji me, Nau gba Ebhe-e akolo de yi masikpe.» <sup>12</sup> Ma apa p̀i yi me li 'kpí li Ebhe akódho 'ngú gba okpála lie, okpála na gudh̀u ango-o adjé likabhu naali ané okpála na Sodom̀u† mane.»

*Ok̀ti inde ayala nabhuka Yesu (Tsia bhú Mat. 11:20-24.)*

<sup>13</sup> «'E-e! A ko likabhu p̀i yi okpála na gudh̀u na Koladjina! A ko likabhu p̀i yi okpála na gudh̀u na Betesaida! Padhá de, anga i d̀u me ongamba 'ngú inde amene lie agba yi-e, i méne lie bhú ogudh̀u na Tile ne Sidona-a, okpála na ogudh̀u ango-o de adyi nani pili didili, u tsia túko 'mbi bhú 'ndji o ngú napana me u adji bua o adji. <sup>14</sup> Kaka-a, li 'kpí li Ebhe akódho 'ngú gba okpála lie, likabhu gba yi-e ané bhende gba okpála na Tile ne Sidona mane. <sup>15</sup> Ne yi di, okpála na Kapalanauma-a, yi abhundja naayi me u a'é'e yi abhulá-a? A mo-o ade. U abála yi bhú djua na d̀uduma.»

<sup>16</sup> Do aní matá p̀i om̀kpata gba e me: «Li kpála bini dje yi-e, amba aní adje bhom̀u-o ma. Li kpála bini yala nasia yi-e, amba aní ayala bhom̀u-o nasia ma. Engú bini, li kpála bini yala nasia ma-a, amba aní ayala bhom̀u-o nasia kpála inde atima ma ko.»

*Om̀kpata ndjikpa mananika ne ká bhisi-e agie lio*

\* **10:1** 10:1 U aye bhú obhuku koko-o me: «Ndjikpa mananika.» † **10:12** 10:12 Sodom̀u: A ko gudh̀u inde li Ebhe atsulu nani e ka siti 'ngú gba okpála ango-o. Tsia bhú Dje. 19:24-28.

17 Omukpata ndjikpa mananika ne ká bhisi-e agie lio me u nde abedhe ne djali bedhe. U atsia apa me: «Ngámá, osisiti bua ngamanga belegu ya ngao nedhinga ya ngaha líli pi uo lie ne 'li mu ko!» 18 Yesu atsia apa pi uo me: «Ma au Satana ayie abhúlá akò kuto maka mugbálá. 19 Yi djedje nga, ma aha angu pi yi ngú nadele okpulu ne oapekebhe ne 'dhu yi di ne nandjia ndu angu gba bhulu yala gba yi-e hana. Ehe bini tí da namene yi sisiti de. 20 Engú bini, yi akpí djali ka li osisiti bua ngamanga yi lie de. Yi kpi mangbo djali ka li Ebhe aye 'li yi lie abhúlá ko.»

*Yesu akpi djali*

(Tsia bhú Mat. 11:25-27, 13:16-17.)

21 Bha li nedhinga angoo makpe-e, Yesu abedhe nani ne djali bedhe ka Bu Bhobua . Ani atsia apa me: «Ma agie heni pi mu, 'Dyi ma, Ngámá na abhúlá ne Ngámá na doto. Padhá de, anga engú inde mo opana e pi obhende imbilangu de-e, mo owo pi okpála na imbilangu di ne obhende amene balua má too! A moko, 'Dyi ma, anga mo okunda bha nani moko.

22 'Dyi ma, mo oha ndu 'he hana muma. Kpála bini mbila de me ngama, Ndili-e, ma ne da-ie, bha bini ngamu, 'Dyi ma. Kpála bini mbila la di de me ngamu, 'Dyi ma-a, mu ne da-ie, bha bini ngama, Ndili gba mu-o, la di ne okpála bhende li ngama, Ndili-e, ma akunda napana mu pi o ko.»

23 Pipita-a, ani adjí bhúla e li pápá gba omukpata gba e-o, ani atsia apa pi uo kpi o kpi me: «A ko djali pi yi, ngayi okpála i ngau engú inde yi ngau e ko! 24 Padhá

de, anga ma apa pi yi me opolofeta di ne ongbengbe ongámási bhelé akunda nani nau engú yi ngau e inde, engú bini u u de. U akunda nani nadje engú yi ngadje e inde, engú bini u dje de.»

*Kpála bini na ndu doto na Samalia inde amene bádha 'ngú*

25 Abhomu-o, musuno bini na líli gba Moidje ayie bhúlá. Ani atsia ayi Yesu ngú nale ani me: «Musuno, a ayo me ma mene pi ngubula me ma sia mukobho na duduma?» 26 Yesu agie pi ani me: «U aye bhú líli gba ní-e pi? Mo otatanga lie, mu djedje bhúbhú pi?» 27 Kpála angoo atsia agie pi ani me: «A ayo me kunda Ebhe, Ngámá gba mu-o, ne bua mu hana, ne mukobho gba mu-o hana, ne angu gba mu-o hana, ne mabhundja gba mu-o hana», amba «Mu kunda la di kilí mu, maka mo okunda limu lie makpe ko.»†

28 Do Yesu pi ani me: «Mo ogie ndjindji. Mene moko, amba mu sia mukobho na duduma.»

29 Engú bini, musuno na líli-e angoo adu akunda nasuno me engú inde ni ayi e, a ngbingbili. Abhomu-o, ani atsia ayi Yesu me: «Kilí ma-a, a ko da?»

30 Do Yesu pi ani me: «Kpála bini ayie nani bhú Yelusalema, ani adu akò ne abhú Djeliko. Li kpadji-e, ani ati bhú 'kpa obhulu 'zi inde adu agbulu 'he gba okpála ne kpéke. U abha obongo gba ani-o. U abhi ani má kpú! U abha lio-o, u agbida. U atsia a'o ka ani masikpe de nakpi. 31 Dimandé bini adu apu li kpadji angoo. Ani au kpála angoo lie me-e, ani abuma bha ani li pála kpadji koko, ani atsia atapa. 32 Kpála bini na piga gba Levi† akolo di li bili li kpála angoo adu lie-o. Ani au

† 10:27 10:27 Tsia bhú Det. 6:5; di ne bhú Lev. 19:18. ‡ 10:32 10:32 Piga gba Levi: A ko okpála inde a adu nani ateteke odimando li kulu bhú 'ngbé 'ti Ebhe gba omaYuda-o.



ani lie, ani abuma bha ani li pála kpadji koko, ani atsia atapa.

<sup>33</sup> Engú bini, kpála bini na ndu doto na Samalia inde adu naae bhú dhuku li kpadji bhomu-o, akolo de ani. Ani au ani lie, ani adje ndjinga ani naali. <sup>34</sup> Ani adyudyo lie de ani masikpe. Ani aha emu di ne vino,<sup>§</sup> ani atuko li djila oeka gba ani-o, ani atsia agbite ne papala bongo. Ani aha ani, ani a'o ani pí 'ngbu punda gba e-o. Ani anu ne ani bhú 'ti gba ogomago. Oo, ani atsia alila ani ndjindji. <sup>35</sup> Li ekpí aseke lie, ani agbe lí falanga bhisi, ani aha pi bhulu eti-o. Ani atsia apa pi ani me: «Lila kpála inde-e ndjindji. I du me mu nde apu tia koko pi ani pí bhende-e, ma agie pi mu ngama, nedhinga ma apú matá lie sii ko.»

<sup>36</sup> Yesu atsia ayi musuno bhomu-o me: «Mo obhundja naamu pi? Bhú ká okpála bata bhomu-o, a ko kpála bhedho adu nani kilí kpála inde ati bhú 'kpa obhulu 'zi bhomu-o?» <sup>37</sup> Musuno na líli-e agie me: «A ko bhende adje ndjinga ani-o.» Yesu atsia apa pi ani me: «Nunu, amba mu mene bhadi moko.»

*Yesu anu natsia Malata ne Malia*

<sup>38</sup> Li Yesu ne omukpata gba e adu lie li kpadji-e, ani ali bhú kuti bini. Oo, olø bini adu 'li ani me Malata, ani atsia asia Yesu agba e. <sup>39</sup> Malata adu ne ndai e na ølø bini, adu 'li ani me Malia . Malia adu naae kuto bhú li 'dhu Yesu, ani atsia adu adje engú inde li Yesu adu apa e ko. <sup>40</sup> Bua Malata adu abhúlá ka bhiti kulu-o. Ani ago de Yesu, ani atsia apa pi ani me: «Ngámá, li ndai ma a'o ka ma lie namene ndu kulu hana kpi ma kpi me-e, mu bhundja 'ngú tété bini di? Pa ngala pi ani me, ani go ha mbo 'kpa e muma.» <sup>41</sup> Ngámá

agie pi ani me: «Malata, Malata, mu nga'o bua mu abhúlá, mu la di ngatutu limu ngubula ongú bhelé. <sup>42</sup> La-a, a ndjindji ne koli 'he bini. Malia aha naae ehe inde ane ne bádha, inde li kpála bini dhépe e ka ani de.»

## 11

*Yesu asuno nakpokpo 'ngú ne Ebhe pi omukpata gba e-o*

*(Tsia bhú Mat. 6:9-13.)*

<sup>1</sup> A adu ekpí bini, Yesu adu akpokpo 'ngú ne Ebhe li bili bini. Ani andjia lie, saka omukpata gba ani-e atsia apa pi ani me: «Ngámá, suno nakpokpo 'ngú ne Ebhe pi ya, maka li Djaa asuno di lie pi omukpata gba e ko.»

<sup>2</sup> Yesu atsia apa pi uo me: «Yi du akpokpo 'ngú ne Ebhe-e, yi de pa me:

«Dyi ya,

a ayo me, okpála mbila me, mu ne Ebhe na bubu;

a ayo me, mu go u Ngámá pía doto.

<sup>3</sup> Ha ezu gba ya na ekpí bini ne bini-e pi ya.

<sup>4</sup> Mbu li osisiti 'ngú gba ya ko.

A moko, ngaya makpe, ya ngambu di li osisiti 'ngú li okpála amene e li pabili gba ya ko.

Mo o'ó de me nale ha angu ya-a de.»

<sup>5</sup> Yesu atsia apa matá pi uo me: «I du me saka yi bini nde ne kilí e, ani nu bhaka ani agba e tutu sukpe ngú napa pi ani me: «Wai, ha mbo mapa muma bata. <sup>6</sup> Kilí ma bini inde bhú dholo ago li ma oo, ehe la ka ma ngú nahaha pi ani ade.» <sup>7</sup> I du me bhende abhú 'ti-e nde agie pi ani me: «Mo ondála ma de! Ma ani bhoti-e ani. Ngaya ne ongisi gba ma-a, ya asili kuto asili. Ma ti da nayie bhúlá ngú naha mapa pi mu de.» <sup>8</sup> Ma apa

pi yi na paká me, abana ani yie bhúlá ngú nahaha pi ani kabula mukunda gba o-o de-e, engú bini, ani ayie bhúlá ngú naha ndu 'he hana inde ani nde ne gumu e pi ani ka ani ngandala ani lie ko.

<sup>9</sup> Ngama-a, ma atsia apa pi yi me, yi yo 'he inde yi nde ne gumu e-o, amba Ebhe ha pi yi. Yi gili 'he inde yi nde ne gumu e-o, amba yi u. Yi bhi bhoti-o, amba Ebhe 'u pi yi. <sup>10</sup> Padhá de, anga ndu okpála hana inde ngayo 'he ani nde ne gumu e, ani ngasisia. Kpála bhende ngagili 'he inde ani nde ne gumu e, ani ngauu. Ebhe nga'u bhoti pi kpála bhende ngabhibhi-o. <sup>11</sup> Bhú ká yi odyi ongisi-e, a ti da naha kpulu pi ndili gba e da, i du me ndili-e nde ayo ka ani sungu-o? <sup>12</sup> I du me ani nde ayo ka ani pala 'ngu-o, ani tsia há pi ani apekebhe-e? <sup>13</sup> Belegu ngayi okpála na sisiti-e, yi ngaha babadha 'he pi ongisi gba yi-o. A ane la mane ne bádha pi 'Dyi yi inde abhúlá-a me ani ha Bu Bhobua pi obhende ngayoyo ka ani ko!»

*Yesu agbe siti bua inde adu ani 'bhe kpála-o*

*(Tsia bhú Mat. 12:22-30; di ne bhú Mlk. 3:22-27.)*

<sup>14</sup> Yesu adu agbe siti bua inde adu ani 'bhe kpála bhú bhoko bini. Li siti bua ango-o akoto lie, kpála ango-o aholo agama 'ngú. Abhomu-o, bhiti okpála inde adu oo angamba naali. <sup>15</sup> Okpála koko bhú ká uo atsia apa me: «Ngámá gba osisiti bua inde 'li e me Beledjebula ngaha angu pi ani ngae, ngú napandja osisiti bua ne di!»

<sup>16</sup> Okoko adu agili nale ani. Abhomu-o, u atsia apa pi ani me, ani mene ngamba 'ngú ngú napanana me, angu gba ani-e ngayie

abhúlá. <sup>17</sup> Engú bini, Yesu ambila mabhundja gba uo-o lie, ani atsia apa pi uo me: «I du me okpála gba ngámá bini nde ngagu gbele sunda o, nau angu-o lu-u de. Li ndu eti hana túko. <sup>18</sup> I du me omaha Satana nde ngagu gbele sunda o-o, nau gba ani-e ti da nalu lele pi? Padhá de, anga yi ngapa me, ma ngapandja osisiti bua ne angu gba Beledjebula. <sup>19</sup> I du me ma nde ngapandja osisiti bua ne angu gba Beledjebula-a, okpála gba yi-e ngapandja uo ne angu gba da? Kaka-a, okpála gba yi-e akódho 'ngú gba yi-e ngao! <sup>20</sup> La-a, i du me ma nde ngapandja osisiti bua ne angu gba Ebhe na paká-a, apa bhomu-o me, Nau gba Ebhe-e akolo li yi akolo.

<sup>21</sup> Li kpála bini na angu inde li tia 'gú nde ka e ndjindji, du alila eti gba e-e, ehe bini dúla tia gba ani-e de. <sup>22</sup> Engú la bini, i du me kpála bini inde ane ani ne angu-o go, ani há egú pi ani, ani tsia há angu ani. Ani bhá ndu tia 'gú inde ani adu a'o bua e lie hana. Ani tsia gápa ndu 'he inde ani abha e ka ani-e hana.

<sup>23</sup> Kpála bhende pi ma ade-e, a ko yala ma. Kpála bhende i ha 'kpa e muma ngú napo bhúla okpála de-e, ani ngatsambala uo matsambala.»

*Siti bua ti da matá nagie lie*

*(Tsia bhú Mat. 12:43-45.)*

<sup>24</sup> «Li siti bua koto bhú kpála bini-e, ani nú ne djakadha abhú omili bili† ngú nagili bili nago ka e tété. I du me ani nde u de-e, ani pá li bua e me: «Ma agie lima bhú 'ti gba ma inde ma akoto nako bhú e-o.» <sup>25</sup> Ani gie lie oo, ani bháka me u apo bhú 'ti-o, u aleke ndjindji. <sup>26</sup> Abhomu-o, ani nú, ani bhá osisiti bua koko

\* **11:11** 11:11 U aye bhú obhuku koko-o me: «Teme i du me u nde ayo ka ani mapa.» † **11:24** 11:24 Mili bili: A ko bili inde li engu nde lie ade, li kpála ti da di nasi kuti lie de.

mananika inde ane ani ne siti. U gie lio bhú dabili bini, u lí bhú 'tí-o, u tsia dúlú. Pí-pita-a, mukobho gba kpála ango-o, kólo la matá sisiti naali ane bhende na kalanu-o mane.»

*Djali na kukulu*

<sup>27</sup> Nedhinga ani adu apa 'ngú bhomu-o lie, elee bini atsia asula pi ani bhú ká okpála me: «A ko djali pi elee inde azu mu-o, inde di mo ondji 'ka e-o!» <sup>28</sup> Engú bini, Yesu agie me: «A ko djali mangbo pi okpála inde ngadje eli gba Ebhe di ne nalilila ko!»

*Yesu ayala namene ngamba 'ngú pi okpála*

*(Tsia bhú Mat. 12:38-42.)*

<sup>29</sup> Li bhiti okpála ago apo bhála o lie de Yesu-o, ani atsia aholo apa me: «Okpála na naki inde-e sisiti. U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende gba polofeta Djonasi. <sup>30</sup> Padhá de, anga maka li Ebhe aha nani Djonasi lie ngú napana ngamba 'ngú pi okpála na Ninive-e, Ebhe ahá bhadi ma, Ndili gba kpáala-a, ngú napana ngamba 'ngú pi okpála na naki moko. <sup>31</sup> Ngámá na elee inde adu atsia 'kpí li ndu doto na Saba ayie nani tsutsu ngú nago nadje oeli na imbilangú gba 'ngbé ngámá Salomo. Li Ebhe akódho 'ngú gba okpála lie, ngámá na elee ango-o alú kala okpála na naki, ani tsia a'ó 'ngú pí uo. Kaka-a, kpála bini si, ani ane Salomo mane! <sup>32</sup> Okpála na Ninive adji nani bua o li nedhinga u adje ngali gba Ebhe inde li Djonasi adu akpokpo e lie-o. Li Ebhe akódho 'ngú gba okpála lie, okpála na Ninive alú kala okpála na naki, u tsia a'ó 'ngú pí uo. Kaka-a, kpála bini si, ani ane Djonasi mane!»

*Nadu li zi 'kpí*

*(Tsia bhú Mat. 5:15, 6:22-23.)*

<sup>33</sup> «I du me kpála bini nde adhedhe eke-e, ani tó asa lusa de. Engú bini, ani 'ó pí 'he amba okpála inde ngali bhú 'tí-e, u u 'kpí tété ndjindji. <sup>34</sup> Djila mu ne zi 'kpí na kute mu. Li djila mu du ndjindji-e, ndu kute mu hana dú bhú zi 'kpí. Engú bini, li djila mu du sisiti-e, ndu kute mu hana dú bhú biti. <sup>35</sup> Tsia ndjindji me zi 'kpí inde bhú mu-o, adú biti de. <sup>36</sup> I du me ndu kute mu hana nde li zi 'kpí-e, yá mu bini nde bhú biti ade-e, kute mu libhomu dú li zi 'kpí, maka li zi 'ke ngaziga mu lie má ngilili ko!»

*Yesu ambamba ta osisiti 'ngú gba omuFalisai di ne bhende gba omusuno na líli gba Moidje-o*

*(Tsia bhú Mat. 23:1-36; di ne bhú Mlk. 12:38-40.)*

<sup>37</sup> Li Yesu andjia nagama 'ngú lie, muFalisai bini atsia a'i ani agba e ngú nazú 'he. Ani ali abhú 'tí gba muFalisai-o, ani atsia aholo nazú 'he-o. <sup>38</sup> MuFalisai ango-o angamba naali, anga ani au me Yesu vulu lie kala nazú 'he-e de.† <sup>39</sup> Abhomu-o, Ngámá Yesu apa pi ani me: «Ngayi omuFalisai-e, yi ngavulu kute pápá di ne kute saani. Engú la bini, ngayi-e, yi abedhe ne 'ngbé bua di ne siti bua bhú yi bedhe. <sup>40</sup> Imbilangú bhú yi ade! Ebhe inde abho kute-e, ani bho di bua ngae di? <sup>41</sup> Kaka-a, yi ha mangbo pi obhulu ndibhili ehe bhende bhú opápá di ne bhú osani gba yi ko. Yi mene mo-o, li ndu 'he hana kólo pi yi babadha.

<sup>42</sup> La-a, a ko likabhu pi yi, omuFalisai! Padhá de, anga yi ngaha bini bhú ká ndjikpa na oulu na sese ne ndu djedje ulu na abhú 'dyi-e hana pi Ebhe. La-a, yi mene engú na ngbingbili pi

† **11:38** 11:38 OmuFalisai adu nani navulu lio kala nazú 'he ngabula nasuno me o naao ne obabadha okpála kala Ebhe.

okpála de. Yi kúnda la di Ebhe de. A la bhomu-o engú inde ayo me yi mene ngaiza e me, yi nde 'ili 'to yi li naha bini bhú ká ndjikpa na oehé gba yi-e pí Ebhe de ko. <sup>43</sup> A ko likabhu pí yi, omuFalisai! Padhá de, anga yi kúnda bha nadulú pí dabili na akalanu bhú oti nadje líli gba Moidje . Yi kúnda la di me okpála du ne yiyi yi maka ongámási lí ohi-kpadji. <sup>44</sup> A ko likabhu pí yi! Padhá de, anga yi maka olata inde u 'o 'he pí e ngú nasusuno de, lí okpála ngadhuku pí e me u nde mbíla de!»

<sup>45</sup> Suka omusuno na líli-e apa pí aní me: «Musuno, mo opa lie mo-o, mo osobho di bhomu-o ya.» <sup>46</sup> Yesu atsia agie me: «A ko di likabhu pí yi, omusuno na líli! Padhá de, anga yi ngamene mugito me yi nga'o titili 'he lí 'ngbu okpála. Engú la bini, ngayi makpe-e, yi 'o belegu likpa yi bini tété ngú nateteke uo de. <sup>47</sup> A ko likabhu pí yi! Padhá de, anga yi ngaleke olata opolofeta, inde lí ogbi yi abhili nani o-o! <sup>48</sup> Yi ngapana bhomu-o me, yi aziba engú inde lí ogbi yi amene nani e ko. Padhá de, anga ngauo-o, u abhili opolofeta, ngayi-e, yi la ngaleke olata uo! <sup>49</sup> Kaka-a, Ebhe ne imbilangu gba e, apa lí 'ngú gba yi-e me: «Ma atima opolofeta di ne obhulu titima pí uo. U abhili okoko bhú ká uo, u tsia méne okoko sisiti.»

<sup>50</sup> Nayie maka lí Ebhe abho nani doto lie, okpála atuko ngute opolofeta bhelé. Kaka-a, okpála na nakí abí mangimbo ang-o ngao. <sup>51</sup> Kalanu-o, u abhelo Abele. Alí soso-o, u abhelo Djakalia bhú mbadhasu na 'ngbé 'ti Ebhe gba omaYuda, sánda bíli natsulu enu pí Ebhe ne titina na bubu-o. Ma apa pí yi na paká me, okpála

na nakí abí mangimbo na ngute okpála bhomu-o hana ngao!

<sup>52</sup> A ko likabhu pí yi, omusuno na líli! Padhá de, anga yi aní bhoti na imbilangu-o. La ngayi makpe-e, yi lí de. Yi atsia aní la di bhoti ang-o pí obhende akúnda nali-o.»

<sup>53</sup> Lí Yesu ayie lie lí bíli bhomu-o, omusuno na líli ne omuFalisai aholo napadha aní. U atsia aholo ayiyi aní lí ongú bhelé bhelé. <sup>54</sup> Padhá de, anga u adu agili ngabo aní lí 'li e.

## 12

*Yi du apa 'ngú mbámhá, yi adú ne tsulu de  
(Tsia bhú Mat. 10:26-27.)*

<sup>1</sup> Nedhinga bhomu-o, bhiti okpála apo bhúla o de Yesu. U adu bhíbhiti naali, kaka-a, u adu adedele 'dhu obi o. Abhomu-o, Yesu atsia aholo napa ngaiza pí omukpata gba e me: «'E-e! Yi lila liyi ka levile gba omuFalisai-e uu! Padhá de, anga u ngali bhú ndu ongú hana ne kali gba o-o maka lí levile\* ngali bhú mapa lie hana ko. <sup>2</sup> Ndu 'ngú inde awo lie mawo-o hana, akóto bhú mbasu. Ndu 'ngú inde na pepe hana, ndu okpála hana ambíla. <sup>3</sup> Kaka-a, ndu 'ngú inde yi apá e sukpe-e hana, okpála adjé ne ngbikpi. Ndu 'ngú inde yi apá e bhú tapele abhú 'ti-e hana, okpála asúsula ne di bhú mbasu.»

*Kpála inde a ayo me yi kpe e ko  
(Tsia bhú Mat. 10:28-31.)*

<sup>4</sup> «Ma apa pí yi, ngayi ondaise ma me: yi akpé okpála bhende ngabhelo kute-e de, inde pípita-a, i ti da matá namene 'he bini de ko. <sup>5</sup> Ma asúno pí yi kpála inde a ayo me yi kpe e ko. Yí kpe Ebhe inde ka e ne angu ngú nabhili okpála. Pípita-a, aní ti da nabu uo bhú

\* 12:1 12:1 Lí bíli inde-e, levile ngasuno ehe na sisiti.

djua na duduama. A moko, ma apa pi yi me: yi kpe mangbo ani!

<sup>6</sup> U tsitsindji odjedje odhu bhuvue ngubula senge bhisi di? La-a, Ebhe 'ili 'to e li saka uo bini de. <sup>7</sup> Ebhe mbila belegu alo na sundjo yi-e hana. Yi adje tsulu de, bhú djila Ebhe-e, yi ane bhiti odjedje 'dhu bhomu-o mane!»

*Okpála ayála Yesu-o, Yesu ayála di uo*

*(Tsia bhú Mat. 10:32-33, 12:32.)*

<sup>8</sup> «Ma apa pi yi me: kpála inde apa li ma bhú ká djila okpála me ni ne naama kpála-a, ngama, Ndili gba kpála-a, ma apa bhadi li ani bhú ká djila oandjelu gba Ebhe-e me, a ko naama kpála. <sup>9</sup> Engú bini, kpála inde apa li ma bhú ká djila okpála me ni mbila ma de-e, ngama, Ndili gba kpála, ma apa bhadi li ani bhú ká djila oandjelu gba Ebhe-e me, ma ambila ani de.

<sup>10</sup> I du me kpála bini nde apa siti 'ngú li kute ma, Ndili gba kpála-a, li Ebhe mbú li ani. I du la me kpála bini nde asobho Bu Bhobua-a, Ebhe mbú li ani de.

<sup>11</sup> Nedhinga u anú lie ne yi bhú oti nadge líli gba Moidje, di ne kala ongámási inde ngatsia 'kpí li doto me u kodho 'ngú gba yi-e, yi adje tsulu de me yi akóbho li mangua kpadji dho-ie de, di ne me yi apa pi-ie de. <sup>12</sup> Padhá de, anga li nedhinga bhomu-o, Bu Bhobua asúno pi yi ngae engú inde a ayo me yi pa e-o.»

*Mukobho gba kpála ane tia*

<sup>13</sup> Abhomu-o, kpála bini bhú ká okpála apa pi Yesu me: «Musunu, pa pi ndai ma me ani ha naama tia na libhondi 'dyi ya-a muma haha.» <sup>14</sup> Yesu agie pi ani me: «Wai, a'o ma kpála nakodho 'ngú di ne nagbogbo bhusu otia gba yi-e da?» <sup>15</sup> Ani atsia apa pi ndu uo hana me: «'E-e! Yi lila liyi ka gumu tia na doto uu, anga belegu

li tia du bha ka kpála bhelé-e, mukobho gba ani-e dú bhúbhú de.»

<sup>16</sup> Abhomu-o, ani atsia akpokpo gbitaku inde-e pi uo me: «Kpála bini na tia adu nani ne odyi bhelé inde aha nguwa pi ani naali.

<sup>17</sup> Ani adu ayi li bua e me: «Ma améne si pi? Dabili ka ma ngú nalila nguwa gba ma-a tété hana ade.» <sup>18</sup> Pipita-a, ani me: «Ma ambila engú inde ma améne e ambila! Ma apándjala ongbokopi gba ma-o, ma ayiki ibili obhe na ngbengbengbe. Ma bú nguwa ne otia gba ma-a hana bhúbhú.

<sup>19</sup> Abhomu-o, ma tsia pá li bua ma me, tia ka ma bhelé ngubula bhiti kalanga. Ma guo ngala mbo guguo. Ma zu babadha 'zu, ma ndji pandi, amba ma kpi djali.» <sup>20</sup> Engú bini, Ebhe pi ani me: «Mu ne ngingi! Sukpe na naki-e, mu ngakpi. Ndu 'he inde mo opo bhúla e hana-a atigala pi da?»

<sup>21</sup> Yesu apa matá me: «A bhadi moko pi kpála inde ngapo bhúla tia pi e makpe, me ani nde gili nadu bhulu tia li pápá gba Ebhe de ko.»

*Yi ha liyi pi Ebhe*

*(Tsia bhú Mat. 6:25-34.)*

<sup>22</sup> Pipita-a, Yesu atsia apa pi omukpata gba e me: «Kaka-a, ma apa pi yi me: yi akina liyi ngubula ezú inde yi nde ne gumu e ngú mukobho gba yi-e de. Yi akina di liyi ngubula obongo inde yi nde ne gumu e ngú kute yi-e de. <sup>23</sup> Padhá de, anga mukobho gba yi-e ane ezú. La di-e, kute yi ane bongo. <sup>24</sup> Yi tsia nga odhu, u lulu 'dyi de. U popo bhúla nguwa de. Dabili ngú naleke 'zu ka uo tété ade. Ngbokopi ka uo ade. La-a, Ebhe ngaku uo! Mukobho gba yi-e, ane bhe gba odhu-o tsutsu naali!

<sup>25</sup> A ko da bhú ká yi-e, inde ka nakina lie, i ti da nadyudyo ekpi

na mukobho gba e nga bha mbo ne ekpí bini-e? <sup>26</sup> I ðu me yi nde ti da namene belegu de mboye ehe bhomu-o, yi la ngakina liyi ngú ongú koko ka ni? <sup>27</sup> Yi tsia nga ofelele abhiye. U memene kulu de. U ðu bongo de. Ma apa la pi yi me, belegu 'ngbé ngámá Salomo bhú ndu ká tia gba e hana-a, ani sia bongo bini ane ne bádha maka susuka de. <sup>28</sup> I ðu me Ebhe nde ngadyi bongo li ulu inde naki abhiye, mambi u tsia bhike e bhú djua-a, ani ti da nadyi bongo li yi ane mane di? Ngayi okpála inde li nabhuka gba yi-e nde yeye!

<sup>29</sup> Kaka-a, yi a'ó bua yi abhúlá ngú nagili ezú inde yi azú e, ne ehe bhende yi andjí e de. <sup>30</sup> Omupagano, okpála na doto inde-e, u ngagili ehe bhomu-o ndu 'kpí hana ngao. Engú bini, 'Dyi yi Ebhe mbila hana me yi ne gugumu. <sup>31</sup> Yi gili nga mangbo namene ongú inde li Nau gba Ebhe-e akunda e ko. Yi mene mo-o, li Ebhe tsia há di ndu 'he koko pi yi hana pépé.»

*Yi wo tia gba yi-e abhúlá*

*(Tsia bhú Mat. 6:19-21.)*

<sup>32</sup> «Ngayi okpála gba ma, inde bhelé ade-e, yi adjé tsulu de. Padhá de, anga 'Dyi yi Ebhe au ndjindji me yi ðu ongámási bhú Nau gba ani-e, maka ngaani 'Dyi yi, ni nde lie ne Ngámá ko. <sup>33</sup> Yi tsindji ohe gba yi-o, amba yi ha tiatia, yi ha pi obhulu ndibhili. Yi bho pi yi otí bongo inde i kádha de. Yi wo tia gba yi-e abhúlá, li bili i síti lie de. Obhulu 'zi ti da nakolo tété de. Okokó ti la di da nazuzu de. <sup>34</sup> Padhá de, anga bili inde li tia gba yi-e nde lie, bua yi bhadi oo ko.»

*Okpála na kulu inde i ngalila*

<sup>35</sup> «Yi ðu bedhe ngubula kulu maka kpála inde adyi bongo na kulu, ani atsia adhedhe eke gba e madhedhe. <sup>36</sup> Yi ðu bedhe maka

okpála inde i ngadjeke ngámá gba o me, ani nde atapa bhú anokomia na kuva. U ngadjeke me u 'u bhoti-e pi ani má gala, li nedhinga inde ani agó nabhibhi lie ko. <sup>37</sup> A ko djali pi okpála na kulu inde li ngámá gba o akólo lie, ani bháka me u nde la de ko! Ma apa pi yi na paká me, ani dyi bongo na kulu gba e-o, ani 'í uo ngubula nazú 'he. Ani tsia há ezú-o pi uo. <sup>38</sup> A ko djali pi uo, i ðu me ani nde abhaka me u nde la de ko, belegu ani go tutu sukpe, belegu ani go bhú sikikpi! <sup>39</sup> Yi mbila ndjindji me, i dú me bhulu eti mbila nedhinga inde li bhulu 'zi agó lie mambila-a, ani de 'ó de me ani li abhú 'ti gba ni-e de. <sup>40</sup> Ngayi di-e, yi ðu bedhe. Padhá de, anga yi mbila nedhinga li ngama, Ndili gba kpála-a, ma agó lie de.»

*Kpála na kulu na ngbingbili di ne kpála na kulu na sisiti*

*(Tsia bhú Mat. 24:45-51.)*

<sup>41</sup> Abhomu-o, Piele atsia ayi ani me: «Ngámá, mo opa gbitaku inde-e bha bini pi ya kpi ya kpi? Ne me, mo opa pi ndu okpála hana.» <sup>42</sup> Ngámá agie pi ani me: «Kpála na kulu na ngbingbili ne imbilangu-o, a ko bhedho? A ko kpála bhende li ngámá gba e a'o e ngú nalila eti gba e-o, di ne nagapa ezú pi okpála koko na kulu, i ðu me nedhinga ango-o nde akolo-o. <sup>43</sup> A ko djali pi kpála na kulu ango-o, i ðu me ngámá gba ani-e nde agie lie agba e, ani tsia bhaka me ani nde ngamene kulu gba e ko! <sup>44</sup> Ma apa pi yi na paká me, ngámá bhomu-o 'ó ani pí 'ndji ndu 'he gba e hana. <sup>45</sup> Engú bini, i ðu me kpála na kulu ango-o nde apa li bua e me: «Ha-a! Ngámá gba ma-a gó má gala de.» Ani hólo nabhi obi e na obhosibhosi di ne obhe na olisilisi-o. Ani hólo nazú 'he, nandji pandi ne nalangba ne di.

46 Ngámá gba ani-e gíe lie li ekpí ani djeke ani lie de, li nedhinga inde ani mbila e de. Ngámá gba ani-e 'é ani bhú kulu, ani tsia 'ó ani bhú ká okpála na sisiti.†

47 † ðu me kpála na kulu nde ambila engú li ngámá gba e akunda e, engú bini ani tsia leke lie ngú namemene maka li ngámá ango-o akunda lie de-e, kaka-a, u bhí ani naali. 48 La-a, i ðu me kpála na kulu nde mbila 'ngú li ngámá gba e ngakunda e de-e, ani mene engú inde a ayo me u bhí ani ka e, u bhí ani naali de. Padhá de, anga kpála bhende u aha 'he pi e bhelé-e, u ayó bhadi 'he ka ani bhelé. Kpála bhende u a'o 'he sa 'kpa e bhelé-e, u ayó matá ehe ka ani pépé ane mane.»

*Yesu ago ngú nagbogbo bhusu okpála*

*(Tsia bhú Mat. 10:34-36.)*

49 «Ma ago ngú nabhike djua pála doto. Ma akunda me adu atsi matsi! 50 A ayo me ma sia batisimo na likabhu. La-a, likabhu li bua ma naali akólo li 'kpí inde ma asia lie ko! 51 Yi abhundja naayi me ma ago ngú na'o guo 'ngú pála doto? Ma apa pi yi me, a mo-o ade. Ma ago mangbo ngú nagbogbo bhusu okpála. 52 Nayie pi mbia inde-e, piga bini na okpála bhuluvue agbó bhusu e, bata ayála bhisi, li bhisi yála bata.

53 'Dyi ndili ayála ndili na bhobhoko gba e-o,

li ndili-e yála 'dyi e.

'Hi ndili ayála ndili na øeøe gba e-o,

li ndili-e yála 'hi e.

Ogbi na øeøe ayála øe gba ndalae,

li øeøe gba ndili-e yála ogbi e.

†

*Yi mbila engú inde ngakodho 'kpí mbia inde-e ko*

*(Tsia bhú Mat. 16:2-3.)*

54 Yesu apa matá pi okpála me: «Yi u me ebha ngago ne kati, yi kolo pá me: «Ebha inde-e adhi madhi.» † tsia méne la bhadi lie moko. 55 Yi dje anvi me a nde ngayie li pápá na yoyoko, yi pá me: «Ekpí-e akpá naali.» † tsia méne la bhadi lie moko. 56 Ngayi obhulu kali inde-e! Yi mbila engú inde ngakodho 'kpí abhúla ne bhende pála doto-o hana. La ka ni, yi kunda nambila engú inde ngakodho 'kpí li nedhinga inde-e lie de-e?»

*Yi dje liyi ne kpála inde yi nde ne e bhú 'ngú ko*

*(Tsia bhú Mat. 5:25-26.)*

57 «Ka ni, ngayi makpe, yi mbila nakodho 'ngú na nghingbili inde ayo namene e lie de-e? 58 † ðu me yi nde bhú 'ngú ne kilí mu-o, ani ðu anú ne mu bhú djila okpála nakodho 'ngú-o, mu de mene ne kpéke me yi dje liyi ne ani li kpadji. Mu ngakpe bhomu-o me, ani anú ne mu pi kpála nakodho 'ngú-o de. Li kpála nakodho 'ngú-o há mu pi osudha de. Li osudha-a tsia bhike mu bhú tikpu de. 59 Ma apa pi mu me, mu kóto bha oo me, mu nde agie ndu bopulu gba mu-o hana má kpøkøbhø!»

## 13

*Ebhe nga'i okpála me u dji bua o*

1 Abhomu-o li nedhinga ango-o, okpála koko ago akpokpo pi Yesu me: «Pilato abhili okpála koko na Galilaya me u nde ngatsulu enu pi Ebhe.» 2 Ani agie pi uo me: «Yi abhundja naayi me, i ðu me Pilato nde abhili uo mo-o, a akunda napa me u adu sisiti ane ndu okpála koko na Galilaya

† 12:46 12:46 U aye bhú obhuku koko-o me: «U kókodho bhusu ani má mbi mbi mbi!»

† 12:53 12:53 Tsia bhú Mik. 7:6.

hana? <sup>3</sup> Ma apa pi yi me, a mo-o ade. Engú bini, i du me yi nde dji bua yi de-e, ndu yi hana, yi amú bhadi maka uo. <sup>4</sup> Yi bhundja okpála ndjikpa ne ká madjina nani li 'ndjá 'ti na Silue abhili o-o. Yi abhundja naayi me u adu nani sisiti ane ndu okpála koko na Yelusalema hana? <sup>5</sup> Ma apa pi yi me, a mo-o ade. Engú bini, i du me yi nde dji bua yi de-e, ndu yi hana, yi amú bhadi maka uo.»

*Ndula na figi inde i li lílí de*

<sup>6</sup> Pipita-a, Yesu atsia apa gbitaku inde-e pi uo me: «Kpála bini alu nani ndula na figi bhú edyi gba e na vino. Ekpí bini, ani ago nagili lílí bhúbhú. La-a, ani u belegu de bini. <sup>7</sup> Abhomu-o, ani atsia apa pi kpála na kulu gba e me: «Tsitsia nga, a ko mbia inde-e kalanga bata, ma ngago agili lílí bhú ndula inde. La-a, ma u belegu de bini. Dede! A ngangí bilí padhá ka ni?» <sup>8</sup> Engú bini, kpála na kulu-o agie pi ani me: «Ngámá, 'o nga matá ndula ango-o li kalanga inde, amba ma dji doto bhú lili ngbalina, ma tuko doto na eká bhúbhú. <sup>9</sup> Koko bhú kalanga na sidi-e, i lí lílí. I du la me a nde li lílí de-e, mu tsia dé.»»

*Yesu akobho olo bini na kuo bhú 'kpí naguo gba omaYuda*

<sup>10</sup> Li 'kpí bini naguo gba omaYuda-a, Yesu adu asuno bhú 'ti nadje lílí gba Moidje-o. <sup>11</sup> A abhaka me olo bini na kuo nde oo. Sunda kalanga ndjikpa ne ká madjina, siti bua adu bhú ani. Siti bua ango-o atsia adu anu 'ngbu ani. Kaka-a, ani ale nani nali lie pima. <sup>12</sup> Li Yesu au olo ango-o lie, ani a'i ani. Ani atsia apa pi ani me: «Hi ma, kuo gba mu-o ayie.» <sup>13</sup> Ani abu 'kpa e pi ani, kolo má gala me-e, ani ali lie má ngbu! Ani atsia aholo nadhogo Ebhe.

<sup>14</sup> Engú bini, ngámá na eti nadje lílí-e ake 'ngú lie naali, ka li Yesu akobho kpála lie bhú 'kpí naguo-o. Do ani pi okpála inde adu oo me: «A ne 'kpí madhia ngú namene kulu. Yi go li okpí bhomu-o, ngabula me u kobho yi ne okuo gba yi ko. Engú bini, yi agó bhú 'kpí naguo de!» <sup>15</sup> Abhomu-o, Ngámá Yesu atsia agie pi ani me: «Yi ne obhulu kali! Li 'kpí naguo-o, yi bhuhulu bagala di ne punda gba yi-e bhú 'ti o, ngú nanu ne uo me u ndji 'ngu di?» <sup>16</sup> Olo inde-e, ani bhú piga gba Abalahama. Satana agbite ani kalanga ndjikpa ne ká madjina. A ayo de me u bhulu ani li 'kpí naguo di?» <sup>17</sup> Li Yesu agie pi uo lie mo-o, ndu obhulu yala gba ani-e hana atsia asia namu. Engú bini, ndu okpála hana adu akpi djali ka ndu obabadha kulu hana inde ani adu amene e ko.

*Gbitaku pindji lí ndula u a'i e me mutadi*

*(Tsia bhú Mat. 13:31-32; di ne bhú Mlk. 4:30-32.)*

<sup>18</sup> Abhomu-o, Yesu atsia apa me: «Nau gba Ebhe-e, a maka ni? Ma ti da napapana li ni? <sup>19</sup> A maka lí ndula na mutadi. Kpála bini aha, ani alu bhú 'dyi gba e-o. A akò, a akolo 'ngbé ndula. Odhu atsia ayiki 'ti o bhú oyáyá ko.»

*Gbitaku pindji levile*

*(Tsia bhú Mat. 13:33.)*

<sup>20</sup> Do Yesu matá me: «Ma ti da napana Nau gba Ebhe-e li ni? <sup>21</sup> A maka levile inde li olo bini aha e. Ani atsia akpedhelo ne bhiti faline akólo li nedhinga li faline hana afúka lie ko.»

*Yi li li bhoti na yeye*

*(Tsia bhú Mat. 7:13-14, 21-23.)*

<sup>22</sup> Yesu aholo 'nú bhú Yelusalema. Li ani adu anu lie oo, ani adu apu bhú ogudhu ne bhú okuti me ani nde ngasuno Bádha Ngali pi okpála. <sup>23</sup> Kpála bini ayi



ani me: «Ngámá, Ebhe akóbho bha okpála masudha?» Abhomu-o, Yesu atsia agie pi uo me: <sup>24</sup> «Yi mene ne kpéke me yi li li bhoti na yeye-o. Padhá de, anga ma apa pi yi me, okpála bhelé aglí me ni li, engú la bini u alé pima.

<sup>25</sup> A maka me li nedhinga li bhulu 'ti-e ayie bhúlá lie, ani ní bhoti-o. Pipita-a, yi dúlu akilidjo. Yi hólo nabhi bhoti-e me yi nde ngapa me: «Ngámá, 'u bhoti-e pi ya.» Ani tsia gie pi yi me: «Ma mbila bili li yi ayie lie de!» <sup>26</sup> Abhomu-o, yi tsia pá pi ani me: «Ní azu nani 'he, ní andji di pandi ne yi bhú dabili bini. Mo otsia asuno li okpadji gba ya-o.» <sup>27</sup> Ani tsia gie pi yi me: «Ma mbila bili li yi ayie lie de. Ngayi osisiti okpála, yi yie de ma oo ko!» <sup>28</sup> Nedhinga yi aú Abalahama, Isaka, Yakobho di ne ndu opolofeta hana lie bhú Nau gba Ebhe-e, li Ebhe tsia bála la naae yi akilidjo! Oo, yi adú aku 'gbá di ne nazu tate yi. <sup>29</sup> Okpála ayie ne 'dje doto badha hana, u tsia gó bhú anokomia bhú Nau gba Ebhe ko. <sup>30</sup> Abhomu-o, okpála koko inde asidi mbia inde-e, u akólo akalanu. Li obhe koko inde akalanu mbia inde-e, u tsia kólo asidi.»

*Yesu li kpadji na Yelusalema  
(Tsia bhú Mat. 23:37-39.)*

<sup>31</sup> Li nedhinga ango-o, omuFalisai koko ago apa pi Yesu me: «Yie si mayie, anga ngámá Elode ngakunda nabhèle mu.» <sup>32</sup> Yesu atsia agie pi uo me: «Yi nu pa pi bhulu kali maka nekpe bhomu-o me: «Ma ngapandja osisiti bua bhú okpála. Ma di ngakobho okpála na kuo naki di ne mambi. Ma tsia ndjia kulu gba ma-a bhú 'kpí na bata.» <sup>33</sup> Engú bini, a ayo me ma kpata kpadji

gba ma-a, naki, mambi di ne ekpi na bata. Padhá de, anga a ayo de me, okpála bhèle polofeta li bili koko de, bha bini abhú Yelusalema.

<sup>34</sup> Aa! Ngayi, okpála na Yelusalema-a, yi ngabhili opolofeta! Yi la di ngabhili ne teme okpála inde li Ebhe atima o agba yi-o! A ko bhutsibhutsi madho ma akunda napo bhúla yi maka li 'hi 'ngu apopo bhúla ongisi gba e lie sa mbudha e-o. La-a, yi tsia kunda de! <sup>35</sup> Mbia inde-e, kuti gba yi-e atigala padhá. Ma apa pi yi me, yi ú matá ma belegu de bini akólo li nedhinga inde yi apa lie me: «A ayo me Ebhe tuko bisagu pi kpála inde ngago ne 'li ani ko!†»

## 14

*Yesu akobho kpála na kuo li 'kpí naguo gba omaYuda*

<sup>1</sup> A akolo ekpi bini, ekpi naguo gba omaYuda-a , Yesu anu nazu 'he agba saka ongámasi gba omuFalisai-o . Okpála inde adu oo adu atsia Yesu ne kpéke djila.

<sup>2</sup> Abhomu-o, kpála bini inde li kate e asisika ne engu adu kala ani. <sup>3</sup> Yesu ayi omusuno na líli gba Moidje ne omuFalisai-e me: «Líli gba ní aziba nakobho kpála li 'kpí naguo? Ne me a ziba de.»

<sup>4</sup> Engú bini, u andjili bha má bulu! Abhomu-o, Yesu aha 'kpa bhulu kuo-o, ani akobho ani. Ani atsia apa pi ani me ani gie lie agba e. <sup>5</sup> Pipita-a, ani pi uo me: «Belegu li 'kpí naguo-o, li saka ongisi gba yi na bhosibhosi-e,\* i du di-e saka bagala gba yi-e ti bhú 'dú 'ngu-o, yi kolo gbé ani má gala! A mo-o adi?» <sup>6</sup> U mbila engú bini inde u agie e tété-e de.

*Yi ke liyi ne kuto*

† 13:35 13:35 Tsia bhú Dlm. 22:5; di ne bhú Ets. 118:5. \* 14:5 14:5 Ongisi na obhosibhosi: Bhú obhuku koko-o u aye me «punda.»

7 Yesu au me okpála inde u a'i o-o ngadulú pí odabíli na akalanu. Abhomu-o, aní atsia apa gbitaku inde-e pí ndu uo hana me: 8 «Li kpála bini 'i mu bhú anokomia na kava-a, mo onú adu pí dabíli na akalanu de. Padhá de, anga mu mbila de me, u a'i kpála koko inde ane mu mane e-e de. 9 I du mo-o, li kpála inde a'i ndu yi bhisi hana gó pa pí mu me: 'O ka dabíli bhomu-o pí aní.» Abhomu-o, mu nú ne namu hana, mu tsia dú asidi. 10 Engú bini, li kpála bini 'i mu bhú anokomia-a, mu de nu du pí dabíli na asidi, amba li kpála inde a'i mu agó lie, aní de pa pí mu me: «Ndai ma, dyudyo limu ne akalanu.» Li ndu okpála bhende yi ngazu 'he ne o-o hana, tsia ú mu me, mu ne 'ngbé kpála. 11 Padhá de, anga i du me kpála nde nga'o lie ne abhúlá-a, li Ebhe kó aní ne kuto. I du la me kpála nde nga'o lie ne kuto-o, li Ebhe 'é'e aní ne abhúlá.»

*A ayo na'i da bhú anokomia gba mu-o?*

12 Pipita-a, Yesu apa pí kpála inde a'i aní-e me: «Li mu 'i okpála ngú nazú 'he tulukpe, i du di-e tagolo-o, mo o'í obi mu de. Mo o'í ondaise mu de. Mo o'í okpála na piga gba mu-o de. Mo o'í la di okpála na tia inde asili kuti lingo mu-o de. Padhá de, anga ngauo-o, u 'i di mu li 'kpí koko, u tsia gie ehe inde mo omene e pí uo-o pí mu. 13 Engú bini, li mu 'i okpála bhú anokomia-a, 'i obhulu ndibhili. 'I okpála na eze. 'I obhende ne eze li 'dhu o-o di ne obhende i u 'kpí de ko. 14 Mu mene mo-o, mu dú ne djali, anga u ti da nagie 'he bini pí mu de. Ebhe agie pí mu li 'kpí li okpála na ngbingbili-e azúku lie ko.»

*Gbitaku pindji 'ngbé anokomia (Tsia bhú Mat. 22:1-10.)*

15 U adje 'ngú bhomu-o lie, suka okpála inde adu azu 'he bhú dabíli bini ne Yesu-o atsia apa pí aní me: «A ko djali pí kpála inde azú anokomia bhú Nau gba Ebhe-o!» 16 Do Yesu pí aní me: «Kpála bini amene 'ngbé anokomia. Aní atsia a'i okpála bhelé ngánga. 17 A akolo lie li nedhinga nazú 'he-e, aní atsia atima kpála na kulu gba e ngú napa pí okpála inde aní a'i o-o me: «Ezu-o abhu, yi gógo.» 18 Kpála ne kpála aholo ayo ka aní me aní mbu li ni. Bhe na kalanu-o apa pí aní me: «Ma akala edyi, a ayo me ma nu natsitsia. Ma ayo ka mu me mbu li ma.» 19 Koko apa pí aní me: «Ma akala obagala ndjikpa ngubula kulu na edyi. Ma adji nale uo. Ma ayo ka mu me mbu li ma.» 20 Koko atsia apa matá me: «Ma aha ele mbia inde. Kaka-a, ma ti dá nanu-u de.»

21 Kpála na kulu-o agie lie agba ngámá gba e-o. Aní atsia akpokpo 'ngú bhomu-o pí aní. Abhomu-o, ngámá-a aholo ake 'ngú lie. Aní atsia apa pí kpála na kulu gba e me: «Nu má gala bhú odaposo, di ne li okpadji. 'I obhulu ndibhili. 'I okpála na eze. 'I obhende i u 'kpí de, di ne obhende ne eze li 'dhu o-o.» 22 Pita nedhinga masudha-a, kpála na kulu ago, aní atsia apa me: «Ngámá, ma amene líli gba mu-o amene. Engú bini, dabíli nga bha uu.» 23 Abhomu-o, ngámá atsia apa pí kpála na kulu gba e me: «Nu li okpadji 'dyi, lingo oaga na edyi, mba okpála ne kpéke, amba eti gba ma-a bedhe bedhe. 24 Padhá de, anga ma apa pí yi me, okpála inde ma a'i o kalanu-o, suka uo bini zú anokomia gba ma-a de!»

*Yi 'o ka ndu 'he hana ngú nakpata Yesu*

*(Tsia bhú Mat. 10:37-38.)*

25 Ekpi koko-o, li okpála bhelé adu adhuku lie bhú dabíli bini ne

Yesu-o, aní adji bhúla e lí pápá gba uo-o, aní atsia apa pí uo me: <sup>26</sup> «Kpála inde akunda akpata ma-a, a ayo me aní yala 'dýi e ne 'hi e. Aní yala wala e ne ongisi gba e-o. Aní yala ondaise e na obhosibhosi, di ne obhende na olisilisi, amba aní yala belegu mukobho gba e makpe ko. Í dũ mo-o de-e, aní tí da nadũ mukpata gba ma-a de. <sup>27</sup> Kpála inde í kunda nabi kulusi gba e de-e, inde í kpata ma de-e, aní tí da nadũ mukpata gba ma-a de.

<sup>28</sup> Í dũ me sũka yí nde akunda nayiki 'ngbé 'ti-e, aní dú ngaiza kuto. Aní tsia hólo nabhundja ngú nambila me tia ka ní bhelé ngú nandjia kulu ango-o. <sup>29</sup> Í dũ mo-o de-e, aní 'o 'dhũ 'ti-e, pípita aní tsia ndjia eti-e de-e, ndũ okpála hana inde aú-o, u hólo namũ aní. <sup>30</sup> U tsia dú apa me: 'Yí tsia nga kpála inde, aní akpo nako lita nayiki eti. Engú bini, aní ndjia de!» <sup>31</sup> A bhadi moko, í dũ me 'ngbé ngámá bini nde akunda nagu 'gú ne 'ngbé ngámá koko, aní dú ngaiza kuto. Aní holo nabhundja ngú nambila me, ne okpála kutu ndjikpa-a, ní tí da nagu 'gú ne 'ngbé ngámá inde ka e ne okpála kutu ndjikpa bhisi-o. <sup>32</sup> Í dũ mo-o de-e, aní tíma obhulũ titima pí 'ngbé ngámá ango-o nedhinga aní nde nga bha lie tsutsu-o. Aní tsia yí aní me: 'A ayo namene pí ngubula me egú adũ-ũ de-e?» <sup>33</sup> Abhomũ-o, Yesu atsia apa matá me: «Sũka yí bini tí da nadũ mukpata gba ma-a de, í dũ me aní nde 'o ka ndũ 'he gba e hana de ko.»

*Ngũtu inde akolo padhá*

(*Tsia bhú Mat. 5:13; di ne bhú Mlk. 9:50.*)

<sup>34</sup> «Ngũtu ne bádha 'he. Engú bini, í dũ me kpokpo nde andjia

bhúbhú andjia, u tí da nagie matá kpokpo bhúbhú ne ní? <sup>35</sup> A belegu ndjindji ade ngú doto di ne ngú nalu 'zũ. U bála bha ibili akilidjo. Kpála inde ne 'dje 'dje ngú nadje 'kpí-e, aní djedje!»

## 15

*Gbitaku gba kandøle inde angita, u atsia au matá e*

(*Tsia bhú Mat. 18:12-14.*)

<sup>1</sup> Ekpí bini, ondømbi na mandjandja di ne okpála na sisiti ago ndũ o hana de Yesu ngú nadje aní. <sup>2</sup> OmũFalisai ne omũsuno na líli gba Moidje adũ adi aní. U adũ apa me: «Kpála inde-e ngasia okpála na sisiti. Aní la di ngazũ 'he ne u bhú dabili bini!»

<sup>3</sup> Abhomũ-o, Yesu atsia apa gbitaku inde-e pí uo me: <sup>4</sup> «Kpála bini bhú ká yí ne okandøle kámá bini. Lí sũka uo bini ngita-a, aní mene pí? A na paká me, aní 'ó ká obhende ndjikpa odukpabini ne ká odukpabini-e lí bili nazũ 'he ka o-o. Aní tsia nú nagili bhende angita-a, akólo lí nedhinga inde aní aú aní lie-e ko. <sup>5</sup> Lí aní au aní lie, aní bédhe ne djali bedhe. Aní há kandøle-o, aní 'ó aní pí de-ngulũ e. <sup>6</sup> Aní gíe lie agba e. Pípita-a, aní 'í obi e ne okpála inde asili kuti de aní-o. Aní tsia pá pí uo me: 'Yí kpi djali bhú dabili bini ne ma, anga ma au kandøle gba ma inde angita nako au!» <sup>7</sup> Yesu atsia apa matá me: «Djali adũ bhadi moko abhúlá ngubula kpála bini na sisiti inde adji bua e. Djali ango-o ané bhende u nde ne e ngubula okpála na ngbingbili ndjikpa odukpabini ne ká odukpabini, inde ngabhundja me o ne gumũ nadji bua o ade ko.»

*Gbitaku píndji lí falanga inde angita, u atsia au matá e*

\* **15:8** 15:8 Agba omaYuda-a, lí falanga bini (denaliusi) nani ne makalá pí kpála na kulu ngubula ekpí bini.

<sup>8</sup> «Matá di-e, i du me ølø bini nde ne lí falanga\* ndjikpa, li súsuka bini ngíta-a, ani méne pi? A na paká me, ani dhédhe eke. Ani pó bili abhú 'ti. Ani gíli má bhotobhoto, akólo li nedhinga inde ani aú lie-e ko! <sup>9</sup> Li ani au lie, ani 'í obi e di ne okpála inde asili kuti de ani-o. Ani tsia pá pi uo me: «Yi kpi djali bhú dabili bini ne ma, anga ma au lí falanga inde angíta nako ka ma-a au!» <sup>10</sup> Yesu atsia apa matá me: «Oandjelu gba Ebhe-e akpí bhadi djali moko ngubula koli kpála na sisiti bini inde adji bua e ko.»

*Gbitaku gba ndili inde angíta, u atsia au matá e*

<sup>11</sup> Yesu atsia apa matá me: «Bhoko bini adu nani ne ongisi na obhosibhosi bhisi. <sup>12</sup> Bhende na ndimindimi-e apa pi 'dyi e me: «'Dyi ma, ha naama tia na libhondi-e muma haha.» Abhomu-o, 'dyi uo atsia agapa tia gba e li uo. <sup>13</sup> Pita 'kpí bedi, ndili na ndimindimi-e abha tia gba e, ani atapa ne di bhú kuti bini tsutsu. Oo, ani andjia tia gba e hana má kpøkøbho li ndu 'ngú na padhá!

<sup>14</sup> Li ani andjia tia gba e lie hana-a, adyindi na ngbéngbé atsia ali bhú ndu doto ang-o. Abhomu-o, ani aholo adje gumu. <sup>15</sup> Ani anu ali bhú kulu pi suka kpála na ndu doto bhomu-o. Kpála ang-o aha ani, ani atsia atima ani abhú 'dyi gba e me ani du nalila opame. <sup>16</sup> Ani adu akunda nazu ezu gba opame-o. La-a, kpála bini ha nani ehe nazu mazú pi ani de.

<sup>17</sup> Abhomu-o, ani aholo abhundja. Pipita-a, ani atsia apa li bua e me: «Ndu okpála na kulu gba 'dyi ma-a hana, ezú ka uo bhibhiti naali. Ngama la ei-e, ma ngakpi ne gumu!» <sup>18</sup> Ma agie lima agba 'dyi ma, ma tsia pá pi ani me: 'Dyi ma, ma amene siti 'ngú kala

Ebhe di ne li pápá gba mu. <sup>19</sup> A ayo matá na'i ma me ndili ka mu de. Ha bha ibili ma maka suka okpála na kulu gba mu ko.»

<sup>20</sup> Ani atsia aholo agie lie agba 'dyi e. Li nedhinga inde ani adu nga bha lie de kuti-e tsutsu-o, 'dyi ani au ani. Ani au ani lie, ani adje ndjinga ani naali. Ani anu ne holo, ani ati li ngulu ani, ani atsia akama ani li kute e. <sup>21</sup> Abhomu-o, ndili-e atsia apa pi ani me: «'Dyi ma, ma amene siti 'ngú kala Ebhe di ne li pápá gba mu. A ayo matá na'i ma me ndili ka mu de.» <sup>22</sup> U akolo lie akuti-e, do 'dyi ani pi okpála na kulu gba e me: «Yaka! Yi go ne yambu bhende ane ne bádha, yi dyi li ani. Yi to kati bhú 'kpa ani, amba yi to maløke bhú 'dhu ani. <sup>23</sup> Pipita-a, yi nu bhølo folo bagala na tsikpa-o. Ní zu 'he, amba ní kpi djali. <sup>24</sup> Padhá de, anga ndili gba ma inde adu nako mugito me ani akpi-e, ani agie matá lie bhú mukobho. Ani adu nako me ani nde angíta, ma atsia au matá ani.» Abhomu-o, u atsia aholo nakpi djali.

<sup>25</sup> Li nedhinga bhomu-o, ndili bhende na gigena adu abhiye. Nedhinga ani adu agie lie lie akuti-e, ani akolo lie de eti-e masikpe-e, ani adje tolo 'tsi ne ebi. <sup>26</sup> Ani a'i suka okpála na kulu-o. Ani atsia ayi ani li engú inde adu akodho 'kpí-o. <sup>27</sup> Kpála na kulu ang-o agie pi ani me: «Ndai mu agie lie agie. 'Dyi mu atsia abhølo folo bagala na tsikpa-o, anga ani au me, ani agie lie ne kute na angu.» <sup>28</sup> Abhomu-o, ndili na gigena-a aholo nake 'ngú lie. Ani ayala nali abhú 'ti-o. 'Dyi ani akoto, ani atsia alopole lie pi ani me ani lili. <sup>29</sup> Engú bini, ndili-e agie pi 'dyi e me: «Djedje nga, a ko kalanga bhelé ma ngamene kulu pi mu maka bali. Ma ndjo suka líli gba mu-o 'kpí bini de. Mu ha

nga la belegu ndili meeme muma bini de me, ya mene anokomia ne obi ma-a ne di. <sup>30</sup> Li ndili gba mu inde andjia tia gba mu-o hana ne olisi na zabhe-e ago lie, mo otsia abhele folo bagala na tsikpa-a pi ani!»

<sup>31</sup> 'Dyi ani atsia apa pi ani me: «Ndika ma, ndu 'kpi hana, ni ne mu bhú dabili bini. Ndu 'he inde gba ma-a hana, a ko naamu. <sup>32</sup> Engu bini, a ayo bha igini me ni mene anokomia amba ni kpi djali. Padhá de, anga ndai mu inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani!»»

## 16

### *Kpála na kulu na kali*

<sup>1</sup> Pipita-a, Yesu atsia apa matá pi omukpata gba e me: «Bhulu tia bini adu ne kpála na kulu gba e. Kpála ang-o adu atsia 'kpi li ohe gba ani-o. Okpála koko ago apa pi ani me, kpála na kulu ang-o ngapuru tia gba ani-o. <sup>2</sup> Abhomu-o, ani a'i kpála na kulu-o. Ani atsia apa pi ani me: «Ma ngadje pindji mu e mangua 'ngú dho? Suno obhuku na ndu tia gba ma-a hana muma, anga mu ti da matá natsia 'kpi li ohe gba ma-a de.» <sup>3</sup> Abhomu-o, kpála na kulu ang-o aholo ayi bua e me: «Ma améne si pi? Padhá de, anga ngámá gba ma adji a'é ma bhú kulu. Angu ka ma ngú nade edyi ade. A la di li ma ne numu ngú nadu ne yoyo 'he. <sup>4</sup> Aa! Ma ambila engú inde ma améne e ambila, ngubula me okpála sia ma ndjindji li nedhinga u a'é ma lie bhú kulu ko!»

<sup>5</sup> Abhomu-o, ani a'i okpála bini ne bini inde adu ne bopulu gba ngámá gba ani-o. Ani ayi bhende na kalanu-o me: «Bopulu gba ngámá gba ma-a ka mu madho?» <sup>6</sup> Ani agie pi ani me: «Ngbongole

na emu kámá bini.» Kpála na kulu-o pi ani me: «Ha 'kpa balua na bopulu gba mu-o. Du kuto má gala, amba mu dji me ndjikpa bhuluvue.» <sup>7</sup> Pipita-a, ani ayi koko me: «A la mu-o, bopulu gba mu-o madho?» Ani agie me: «Kili mapunga kámá bini.» Kpála na kulu-o pi ani me: «Ha 'kpa balua na bopulu gba mu-o, amba mu dji me ndjikpa madjina.» <sup>8</sup> Ngámá gba kpála na kulu na kali ang-o adhege ani, anga ani amene ehe maka kpála inde ngau 'kpi tsutsu. Okpála na doto inde-e ne imbilangu na kali gba o-o, u ambila namene ehe sunda o ane ongisi gba Ebhe.

<sup>9</sup> Ngama-a, ma apa pi yi me, yi gili nadu bhú makpolia ne obi yi ne tia na kali na doto inde, amba li tia neke ka yi-e, u de sia yi bhú kuti na duduma. <sup>10</sup> Kpála bhende ngbingbili bhú ohe na djedjedje-e, ani bhadi ngbingbili bhú ohe na ngbengbengbe. Kpála bhende ngbingbili bhú ohe na djedjedje-e ade, ani di ngbingbili bhú ohe na ngbengbengbe ade. <sup>11</sup> I du me yi nde mene ndjindji ne tia na kali na doto inde-e de-e, Ebhe ti da naha kukulu tia pi yi de. <sup>12</sup> I du me yi nde mene ehe ngbingbili ne tia gba kpála koko de-e, a há tia gba yi-e pi yi da?

<sup>13</sup> Kpála bini ti da namene kulu pi ongámási bhisi de. Ani yála bini, ani tsia kúnda koko. Ani méne kulu pi koko ndjindji, ani tsia ú koko bhú djila e padhá. Yi ti da namene kulu pi Ebhe bhú dabili bini ne namene pi tia de.»

*Yesu asuno pindji 'ngú ngangá (Tsia bhú Mat. 11:12-13, 5:31-32; di ne bhú Mlk. 10:11-12.)*

<sup>14</sup> Omufalisaí adje ndu 'ngú bhomu-o hana. Abhomu-o, u atsia adu amu Yesu, anga u adu nani akunda tia naali. <sup>15</sup> Yesu atsia apa pi uo me: «Yi ngamene ehe

bhú djila okpála mụgito me yi ngingbili. Engú bini, Ebhe mbila bua yi hana, anga ehe li okpála ngau e bhú djila o ngebéngbé-e, Ebhe ngau bhú djila e padhá.

<sup>16</sup> Nakolo li nedhinga gba Djaá bhulú nabatisa okpála-a, u akpokpo 'li Ebhe pi okpála bhú líli gba Moidje di ne bhú obhuku gba opolofeta . Nayie li nedhinga bhomú-o, u akpokpo Bádha NgaliNau gba Ebhe-e pi okpála. Kpála ne kpála ngagili ne kpéke me ni li bhú kuti na mụndeyi-o . <sup>17</sup> A ko mboye 'ngú masudha me ekpí di ne doto kodho 'kpí. A ko la kpéke da 'ngú me okpála 'e mboye kú eli bini bhú ká líli gba Moidje-o.

<sup>18</sup> Li bhoko bini 'e wala e bhú kúva-a, aní ha elé koko-o, aní akunda bhomú-o elé gba kpála koko. Li bhoko bini ha elé inde li 'ko e a'e e bhú kúva-a, aní akunda di bhomú-o elé gba kpála koko.»

*Gbitaku gba bhulú tia ne bhulú ndibhili*

<sup>19</sup> «A adu nani bhulú tia bini. Aní adu adyi babadha bongo na tia naali. Ndu 'kpí hana, aní adu nadu ndjindji. Aní atsia adu di nazu 'he ndjindji. <sup>20</sup> Bhulú ndibhili bini adu di nani oo. A adu 'li aní me Ladjalo. Eka atsotolo nani kute aní hana. Aní adu asi kuto li bhoti gba bhulú tia-o. <sup>21</sup> Aní adu akunda nazu okulu 'zu inde adu abala sa dabili nazu 'he gba bhulú tia-o. La di-e, obulu adu ago adhapa oeka gba aní-o. <sup>22</sup> Bhulú ndibhili-e akpi. Oandjelu aha aní, u atsia anu a'o aní ade Abalahama. Bhulú tia akpi di, u atsia azi aní.

<sup>23</sup> Oo, li bili gba okpála inde amu-o, aní adu adje likabhu naali. Aní atsia 'kpí ne abhúlá, aní au Abalahama tsutsu ne Ladjalo de e. <sup>24</sup> Abhomú-o, aní aholo natobhila me: 'Dyi ma Abalahama, dje nga bha mbo ndjinga

ma! Tima Ladjalo me aní to ndjilikpa e bhú 'ngu, amba aní go ne di tũn pí 'mi ma, anga ma ngadje likabhu bhú djua inde-e naali.» <sup>25</sup> Abalahama agie pi aní me: «Ndika ma, bhundja me mo osia nani tia bhelé li nedhinga mo odu lie bhú mukobho píla doto-o. La-a, Ladjalo atsia asia nani naae likabhu naali. Mbía inde-e, aní ngasia bádha 'ngú, mu la naamu ngasia likabhu. <sup>26</sup> Matá-a, a sũnda ní ne tsú 'dú, ngubula me li kpála kũnda nayie gba ya ei akodho 'kpí ne agba yi oo, aní de le pima! Li kpála kũnda nayie gba yi oo akodho 'kpí ne agba ya ei-e, aní de le di pima!»

<sup>27</sup> Do bhulú tia me: 'Dyi ma, kikiliako, ma ayo nga bha-a ka mu me, tima Ladjalo agba 'dyi ma, <sup>28</sup> anga ondaise ma na obhosibhosi bhuluvue oo. A ayo me, aní nu nagbele 'dje uo, amba ngauo di-e, u agó li bili na likabhu inde-e de.» <sup>29</sup> Abalahama agie me: «U mbila líli gba Moidje di ne obhuku gba opolofeta-a hana. A ayo me u dje uo.» <sup>30</sup> Bhulú tia atsia apa me: 'Dyi ma Abalahama, a mo-o ade. Engú bini, i du me suka okpála inde amu-o nde azuku-o, aní nu pa pi uo-o, u dji bua o.» <sup>31</sup> Abalahama pi aní me: «I du me u nde dje engú inde bhú líli gba Moidje di ne bhú obhuku gba opolofeta de-e, belegu i du me suka okpála inde amu-o nde azuku-o, u djé di aní de.»

## 17

*Yi mbu li siti 'ngú gba okpála koko*

(Tsia bhú Mat. 18:6-7, 21-22; di ne bhú Mlk. 9:42.)

<sup>1</sup> Pipita-a, Yesu apa pi omukpata gba e me: «Engú inde ngato okpála bhú siti 'ngú-o néke de. Engú la bini, a ko likabhu pi kpála inde i ngato engú ango-o

ko! <sup>2</sup> I dũ me kpála bini nde ngato ongisi bhú siti 'ngú-o, a pi ani ndjindji me u gbite ngingi tangulu ani, amba u bhike ani bhú 'ngbé 'ngu. Bhothomu-o pi ani ndjindji naali ane me suka okpála na bhũbhũku-o ti ka ani bhú siti 'ngú. <sup>3</sup> 'E-e! Yi lila liyi ndjindji!

I dũ me ndai mũ nde amene siti 'ngú-o, mũ de suno pi ani. I dũ me ani nde apa me ni amene sisiti-e, mũ de mbu li ani. <sup>4</sup> I dũ me ani nde amene mũ sisiti bhũtsibhũtsi mananika li 'kpí bini-e, ani go bhũtsibhũtsi mananika hana, ani pa pi mũ me: 'Ma amene mũ sisiti, mbu li ma.' Mũ de mbu li ani.»

### *Nabhuka na kpekpeke*

<sup>5</sup> Obhulu titima apa pi Ngámá Yesu me: «Mene me nabhuka gba ya-a kolo matá kpekpeke.»

<sup>6</sup> Abhomu-o, Ngámá Yesu atsia agie me: «I dũ me nabhuka gba yi-e dũ maka lí ndula na mutadi-e, yi de tí da napa pi ndula inde-e me: 'Yie si, amba mũ nũ lu limũ abhú 'ngbé 'ngu.» I tsia méne bhadi moko.»

### *Kulu inde a ayo me kpála na kulu mene e ko*

<sup>7</sup> «Li kpála bini bhú ká yi dũ ne kpála na kulu gba e bini-e, i dũ me kpála na kulu ang-o nde ngamene kulu abhiye, ani dũ di-e ngalila onu-o, ani gie lie akuti-e, ani tsia pá pi kpála na kulu ago-o me: 'Go má gala ngú nazũ 'he?»

<sup>8</sup> A mo-o ade. Ani pá mangbo pi ani me: «Lũ ezũ, mũ yipa bongoo ngú naha ezũ-o mũma akólo li nedhinga ma andjia nazũ 'he lie di ne nandji 'he bhende nandji mandji lie ko. Pipita-a, mũ tsia zũ 'he amba mũ ndji di 'he bhe gba mũ-o.» <sup>9</sup> Ani tí da nagie heni pi kpála na kulu-o, anga ani amene líli gba ani-e uu? Belegu de bini.

<sup>10</sup> A bhadi pi yi moko. Nedhinga yi amene ndũ 'ngú inde u apa e pi yi e lie hana-a, yi de pa me: 'Ya

bha naaya ne okpála na kulu. Ya amene bha kulu inde a ayo igini me ya mene e ko.»

### *Yesu akobho okpála na kába ndjikpa*

<sup>11</sup> Li Yesu adũ anũ lie abhú Yelusalema-a, ani apũ sũnda ndu doto na Samalia ne bhe na Galilaya. <sup>12</sup> Ani ali lie bhú kuti bini me-e, obhosi na kába ndjikpa ago akø lio ne ani. U alulu mbo de ani tsutsu. <sup>13</sup> U atsia aholo atobhila me: «Ngámá Yesu, dje nga bha-a mbo ndjinga ya!»

<sup>14</sup> Yesu au uo lie, ani atsia apa pi uo me: «Yi nũ suno liyi pi odi-mandø gba Ebhe-o .» Nedhinga u adũ anũ lie, u atsia akobho.

<sup>15</sup> Li suka uo bini au lie me ni akobho-o, ani atsia agie lie sidi me ani nde ngadhøgø Ebhe ne angu hana. <sup>16</sup> Ani atĩ bhú li 'dhũ Yesu. Ani atũ bhúla e ne kuto. Ani atsia agie heni pi Yesu.

Bhoko ang-o adũ nani kpála na Samalia. <sup>17</sup> Abhomu-o, Yesu atsia ayi me: «Ndũ okpála ndjikpa hana akobho adi? Obhende odukpabini-e la su?»

<sup>18</sup> Kpála bini bhundja nago nagie heni pi Ebhe de, bha bini kpála inde naae ne maYuda ade inde-e?» <sup>19</sup> Pipita-a, Yesu atsia apa pi ani me: «Yie bhúlá, nũnũ. Mo okobho, anga mo obhuka ma.»

### *Nedhinga li Ebhe agó nau lie píla doto*

(*Tsia bhú Mat. 24:23-28, 37-41.*)

<sup>20</sup> OmũFalisi ayi Yesu me: «Nau gba Ebhe-e agó nadho?» Ani atsia agie pi uo me: «Nau gba Ebhe-e gó ngua bhende de me okpála nde ngauu mau-o de. <sup>21</sup> U pá de me: 'Yi tsitsia, a sii!' ne me 'A aoo!' padhá de, anga yi mbila me Nau gba Ebhe-e bhú ka yi.»

<sup>22</sup> Pipita-a, ani atsia apa pi omũkpata-a me: «Nedhinga koko akólo makolo. Yi akúnda me yi u nga bha mbo ma, Ndili gba kpála,

'kpí bini. Engú bini, yi ú la ma de. <sup>23</sup> U apa pí yi me: «Ani aoo!» di ne me: «Ani sii!» engú bini, yi agú holo oo de. <sup>24</sup> Ekpí li ngama, Ndili gba kpála, ma agó lie, a adú maka mughálá, li zì e ngayie li 'dje kokpí, li pápá bini akólo li pápá koko. <sup>25</sup> Engú bini, a ayo me ma dje ngaiza likabhú naali, amba okpála na naki yala di ma.

<sup>26</sup> Maka engú inde akodho 'kpí nani bhú 'kpí Nua-a, akódho bhadi 'kpí moko li 'kpí inde li ngama, Ndili gba kpála, ma agó lie ko. <sup>27</sup> Padhá de, anga bhú 'kpí Nua, okpála adu azu 'he. U adu andji pandi. Obhosi ne olisi adu aha lio akolo li 'kpí li Nua ali bhú zabu lie ko. Ebha adhi, engu asi pála doto libhomu, a atsia abhili ndu uo hana. <sup>28</sup> A adú maka bhú 'kpí gba Loto. Okpála adu azu 'he. U adu andji pandi. U adu akala 'he di ne natsindji 'he. U adu alu 'zu. U adu ayiki 'ti. <sup>29</sup> Engú bini, ekpí li Loto akoto bhú Sodomu lie, djua di ne itimeli ayie abhúla, abala pí uo maka ebha, atsia abhili ndu uo hana. <sup>30</sup> A akódho bhadi 'kpí moko li 'kpí li ngama, Ndili gba kpála-a, ma súno angu gba ma-a lie pí okpála ko.

<sup>31</sup> Li 'kpí angoo, kpála bhende abháka e apí 'ngbu 'ti-e, a ayo de me ani li abhú 'ti ngú nabha ohe gba e de. A bhadi moko, kpála bhende abháka e abhú 'dyi-e, a ayo de me ani gie lie akuti-e de. <sup>32</sup> Yi bhundja engú inde amene nani wala Loto-o.\* <sup>33</sup> Kpála bhende agili nalila mukobho gba e, ani kpí. Kpála bhende la abhíke mukobho gba e, ani tsia kóbho. <sup>34</sup> Ma apa pí yi me, sukpe angoo, okpála bhisi adú pí mako bini, u ahá bini, u tsia 'ó ká koko. <sup>35</sup> Olisi bhisi adú atu mapunga bhú dabili

bini, u ahá bini, u tsia 'ó ká koko. [ <sup>36</sup> Obhosi bhisi adú amene kulu bhú edyi bini, u ahá bini, u tsia 'ó ká koko.»] <sup>37</sup> Omukpata ayi ani me: «Ngámá, engú angoo akódho 'kpí ne su?» Ani atsia agie pí uo me: «Bili li kuo kpála adú lie, oagbagba apékabhé bhadi bhúla o oo ko.»

## 18

*Gbitaku gba siti kpála nakodho 'ngú ne oké bini na eelè*

<sup>1</sup> Pipita-a, Yesu apa gbitaku bini pí omukpata gba e ngú nasuno pí uo me, a ayo me u du nayo Ebhe ndu nedhinga hana, u andála de. <sup>2</sup> Ani pí uo me: «Kpála nakodho 'ngú bini adu nani bhú gudhu bini. Ani du akpe Ebhe de. Ani atsia adu di au okpála bhú djila e padhá. <sup>3</sup> Bhú gudhu angoo, oké na eelè bini adu di oo. Ani adu ago apa pí ani me: «Leke engú sunda ya ne kpála inde ya nde ne e bhú 'ngú ko.» <sup>4</sup> Ekpí bhelé, kpála nakodho 'ngú angoo adu ayayala. Pipita-a, ani atsia apa li bua e me: «Ma ngakpe Ebhe ade. Ma la di ngau okpála bhú djila ma padhá. <sup>5</sup> Engú bini, oké inde ngandala ma naali. A ayo me ma leke engú gba ani-o, anga i du mo-o de-e, ani du bha ago naba 'ndji ma.»

<sup>6</sup> Ngámá Yesu atsia apa matá me: «Yi dje engú inde li siti bhulu nakodho 'ngú bhomu-o apa e ndjindji! <sup>7</sup> Ebhe méne bádha 'ngú pí okpála inde ani alo oo di? I du me u nde ngaku 'gba pí ani sukpe ne ngbikpi-e? Ani djéke ngengele ngú nateteke uo? <sup>8</sup> Ma apa pí yi me, ani aléke 'ngú gba uo-o má gala! La-a, li nedhinga li ngama, Ndili gba kpála, ma agó lie, ma abháka me okpála nde abhuka Ebhe pála doto uu?»

\* 17:32 17:32 Wala Loto akolo nani teme na ngutu anga ani agumu nani líli gba Ebhe. Tsia bhú Dje. 19:26.



*Gbitaku gba muFalisai , ne ndombi na mandjandja*

<sup>9</sup> Okpála koko adu au lio me o naao ngbingbili. U atsia adu au ndu okpála koko hana bhú djila o padhá. Abhomu-o, Yesu atsia apa gbitaku inde-e li 'ngú gba uo-o me: <sup>10</sup> «Ekpí bini, okpála bhisí anu bhú 'ngbé 'ti Ebhe gba omaYuda ngú nayo Ebhe. Bhe bini adu muFalisai , bhe koko adu ndombi na mandjandja. <sup>11</sup> MuFalisai-e ayie bhúlá, ani atsia ayo Ebhe a li bua e me: «Oo, Ebhe! Ma ngagie heni pi mu, anga ma maka okpála koko ade. U ngazi 'he. U ngamene sisiti 'ngú. U ngakunda olisi, i du di-e obhosi gba okpála koko. Ma di ngagie heni pi mu, anga ma maka ndombi na mandjandja inde-e ade. <sup>12</sup> Ma tsetse ezu 'kpí bhisí sunda poso bini ngú nayo mu. Ma haha bini bhú ká ndjikpa pí ndu 'he ma ngasia e hana.»

<sup>13</sup> Ndombi na mandjandja alu naae mbo tsutsu, ani akpe belegu natsia 'kpí ne abhúlá. Engú bini, ani atá bhúla e ne kuto, ani abu 'kpa e pí 'ka e, ani atsia apa me: «Oo, Ebhe! Dje nga bha-a mbo ndjinga ma, ma naama ne siti kpála.» <sup>14</sup> Do Yesu matá me: «Ma apa pi yi me, ndombi na mandjandja ang-o agie nani lie agba e me, Ebhe nde adje nayo gba ani-e adje. Engú bini, Ebhe dje bhende gba muFalisai-e de. Padhá de, anga kpála bhende nga'o lie ne bhúlá-a, li Ebhe kó ani ne kuto. La-a, kpála bhende nga'o lie ne kuto-o, li Ebhe 'é'e ani ne bhúlá.»

*Yesu asia ongisi na ndjendje*

<sup>15</sup> Okpála adu ago di pi ani ne ongisi na ndjendje ngubula me ani 'o 'kpa e pí 'ndji uo. Li omukpata au lie mo-o, u aholo nayoko uo. <sup>16</sup> Engú bini, Yesu a'i uo, ani atsia apa me: «Yi 'o ongisi

na djedjedje me u go bhaka ma! Yi ani kpadji pi uo de, anga Nau gba Ebhe-e , a pi okpála inde maka uo ko. <sup>17</sup> Ma apa pi yi na paká me, kpála inde i sia Nau gba Ebhe-e maka mboye ndili de-e, ani ti ne Nau gba Ebhe-e de.»

*Bhulu tia ne uo ne Yesu  
(Tsia bhú Mat. 19:16-30; di ne bhú Mlk. 10:17-31.)*

<sup>18</sup> Abhomu-o, ngámá bini gba omaYuda ayi Yesu me: «Musuno, ngamu bádha kpála, a ayo me ma amene pi ngubula nasia mukobho na duduma?» <sup>19</sup> Yesu atsia agie pi ani me: «Mu nga'i ma me bádha kpála ka ni? Kpála bini babadha ade. Ebhe bha babadha ngae kpi e kpi. <sup>20</sup> Mu mbila olili-e ndjindji: «Mo okúnda elo, i du di-e bhoko gba kpála koko de. Mo obhéle kpála de. Mo ozí 'he de. Mo opá eu li kilí mu de. Manga 'dyi mu ne 'hi mu mamanga.†» <sup>21</sup> Ngámá ang-o atsia apa me: «Nayie bhú ndili li ma-a, ma amene ndu 'ngú bhomu-o hana.» <sup>22</sup> Pita li Yesu adje engú bhomu-o lie, ani atsia apa pi ani me: «Mo oneke matá koli ehe bini. Nunu, tsindji ndu 'he gba mu-o hana, amba mu gapa tiatia pi obhulu ndibhili. Mo osia tia abhúlá. Pipita-a, mu go kpata ma.» <sup>23</sup> Ani adje lie mo-o, ani asia likabhu naali, anga tia adu nani ka ani bhelé naali.

<sup>24</sup> Li Yesu au lie me ani asia likabhu mo-o, ani atsia apa me: «A bha ndju kpekpeke pi obhulu tia ngú nali bhú Nau gba Ebhe-o! <sup>25</sup> A kpekpeke pi eya ngubula nali li gudho masana. A la matá kpekpeke ane pi bhulu tia ngubula nali bhú Nau gba Ebhe ko.»

<sup>26</sup> Abhomu-o, okpála inde adje engú inde ani apa e atsia ayi me: «† du mo-o, a ti da nakobho da?»

† 18:20 18:20 Tsia bhú Eki. 20:12-16; di ne bhú Det. 5:16-20.

27 Yesu agie me: «Engú bhende i ti ne okpála de-e, a ati bha ne Ebhe.»

28 Abhomu-o, Piele atsia apa me: «Tsitsia nga, ya a'o ká ndu 'he gba ya-a hana ngú nakpata mu.» 29 Do Yesu pi uo me: «Ma apa pi yi na paká me, i du me kpála bini nde a'o ká eti gba e, ani 'o ká wala e, ani 'o ká ondaise e, ani 'o ká okpála inde azu e, ani 'o ká ongisi gba e ngubula Nau gba Ebhe-e, 30 ani sia 'he bhelé naali kuto ei. Pipita-a, bhú nedhinga inde ngago-o, ani tsia sia di mukobho na duduma.»

*Yesu akpo 'ngú bhutsibhutsi na bata pindji nakpi di ne nazuku ka e*

*(Tsia bhú Mat. 20:17-19; di ne bhú Mlk. 10:32-34.)*

31 Pipita-a, Yesu aha okpála na titima ndjikpa ne ká bhisi-e, ani anu ne uo li ngongo, ani atsia apa pi uo me: «Yi djedje, ní adji mbia inde-e abhú Yelusalema. Oo, ndu 'ngú hana inde li opolofeta aye e pindji ma, Ndili gba kpáala-a, adji amene lie. 32 Padhá de, anga u apú ma pi omupagano. Li okpála angoo mu ma, u sóbho ma, u tsia kú di ngusu li kute ma. 33 U abhi ma ne fimbo. Pipita-a, u tsia bhéle ma. La-a, bhú 'kpí na bata-a, ma tsia zúku.» 34 Engú bini, omukpata mbila nani ta 'ngú angoo de, anga a awo nani lie pi uo mawo. U tsia du ambila ta 'ngú li Yesu adu apa e de.

*Yesu akobho kpála bini inde i u 'kpí de*

*(Tsia bhú Mat. 20:29-34; di ne bhú Mlk. 10:46-52.)*

35 Li Yesu akolo lie masikpe de Djeliko-o, kpála bini inde i u 'kpí de-e adu kuto dengeo 'hi-kpadji. Ani adu ayo 'he. 36 Ani adje tolo okpála akodho 'kpí lie, ani atsia ayi me: «A ko ni?» 37 Okpála atsia agie pi ani me: «Yesu, kpála na

kuti na Nadjaleta ngakodho 'kpí bhomu-o ngae.» 38 Abhomu-o, ani atsia asula me: «Yesu, Ndili gba Davidi, dje nga bha-a mbo ndjinga ma!» 39 Okpála inde adu akalanu-o aholo ambembe bhú 'ndji ani me: «Gbite 'bhe mu.» Engú bini, ani aholo asusula matá kpekpeke me: «Ndili gba Davidi, dje nga bha-a mbo ndjinga ma!» 40 Yesu alu, ani atsia aha líli me u go ne ani pi ni. Ani akolo lie de ani-e, Yesu atsia ayi ani me: 41 «Mo okunda me ma mene pi mu ni?» Ani agie me: «Ngámá, bhulu djila ma, amba ma u matá 'kpí.» 42 Yesu apa pi ani me: «U matá 'kpí uu! Mo okobho anga mo obhuka ma.» 43 Kolo má gala me-e, ani aholo matá nau 'kpí. Ani atsia adu akpata Yesu me ani nde ngadhogo Ebhe. Ndu okpála hana inde au engú angoo, aholo di nadhogo Ebhe.

## 19

*Yesu ali bhú 'ti gba Djakayo*

1 Pita li Yesu ali lie bhú Djeliko, ani atsia adu agulu gudhu-o. 2 A abhaka me kpála bini nde oo, a adu 'li ani me Djakayo. A adu nani ngámá gba ondombi na mandjandja. Tia adu ka ani bhelé. 3 Ani adu agili nau me Yesu ngae dho. Engú bini, li okpála adu la lie bhelé-e, ani ale nau ani pima anga ani adu nani ndundu. 4 Abhomu-o, ani ayiki lie ne holo ne akalanu. Ani atsia a'u bhú ndula bini dengeo 'hi-kpadji ngubula me ni u Yesu nedhinga inde ani apú lie oo ko.

5 Li Yesu akolo lie li bili bhomu-o, ani a'e djila e ne abhúla, ani atsia ani. Ani atsia apa pi ani me: «Djakayo, ko kuto má gala, anga a ayo me ma si naki bhú 'ti gba mu-o.» 6 Abhomu-o, Djakayo aké kuto bhú holo. Ani atsia asia Yesu ne djali hana. 7 Ndu okpála hana au lie mo-o, u aholo adi mutokono. U

atsia adu apa me: «Lele pi li kpála inde-e atapa lie nasi agba kpála na sisiti-e!»<sup>8</sup> Djakayo ayie bhálá, do ani pi Yesu me: «Ngámá, djedje nga. Ma agbó bhúsú tia gba ma-a bhisi. Ma ahá bhe bini-e pi obhulú ndibhili. I du me ma nde aha tia gba kpála bini ne kali-e, ma agié pi ani bhútsibhútsi badha.»<sup>9</sup> Abhomu-o, Yesu atsia apa pi ani me: «Naki-e, Ebhe akobho mu. Ngamu di-e, mu bhú piga gba Abalahama-o.»<sup>10</sup> Padhá de, anga ngama, Ndili gba kpála-a, ma ago nagili di ne nakobho okpála inde angita ko.»

*Gbitaku gba okpála na kulu ndjikpa*

*(Tsia bhú Mat. 25:14-30.)*

<sup>11</sup> Yesu akoló de Yelusalema masikpe. Okpála inde adu adje ani-e adu abhundja naao me, Nau gba Ebhe-e asúno lie pi okpála mbia inde.<sup>12</sup> Kaka-a, ani atsia apa gbitaku bini pi uo me: «Kpála bini na piga gba ngámá bini anu nani bhú doto bini tsutsu ngubula me u to palata na ngámá tangulu ni, amba pipita-a, ni gie lini.»<sup>13</sup> Kala me ani nu-o, ani a'i okpála na kulu gba e ndjikpa-o. Ani agapa lí falanga\* bini bini li ndu uo hana. Ani atsia apa pi uo me: «Yi mene kulu ne falanga inde, akólo li nedhinga inde ma agié lima lie ko.»<sup>14</sup> Okpála na doto gba ani-e adu ayala ani. U atima okpála nganda ani ngú napa me: «Ya kunda de me kpála bhomu-o u ngámá pí 'ndji ya-a de.»

<sup>15</sup> La-a, u ato palata na ngámá tangulu ani. Ani atsia agie lie bhú doto gba e-o. Abhomu-o, ani a'i okpála na kulu inde ani agapa nako falanga lio ngubula nambila bhende u asia e pépé-o.<sup>16</sup> Abhomu-o bhe na kalanu-o ago.

Ani atsia apa me: «Ngámá, ma asia lí falanga ndjikpa pí bhende nako mo oha e muma ko.»<sup>17</sup> Abhomu-o, ngámá-a apa pi ani me: «A ndjindji. Mu ne bádha kpála na kulu, anga mo omene ndjindji bhú mboye ehe bedi. Ma a'ó ibili mu ngámá pí 'ndji ogudhu ndjikpa.»<sup>18</sup> Bhe na bhisi-e ago, ani atsia apa me: «Ngámá, ma asia lí falanga bhuluvue pí bhende nako mo oha e muma ko.»<sup>19</sup> Abhomu-o, ngámá-a apa di pi ani me: «Ngamu di-e, ma a'ó mu ngámá pí 'ndji ogudhu bhuluvue.»

<sup>20</sup> Pipita-a, koko ago, do ani de-e: «Ngámá, lí falanga gba mu-o ii. Ma awo nako bhú bongo.»<sup>21</sup> Mu 'o li ma tsulu, anga mu ne kpála inde ngamene 'ngú na kpekpeke. Mu ngaha ehe bhende mu 'o e ngamu de. Mu ngaha 'zu inde mu lu e ngamu de.»<sup>22</sup> Ngámá-a apa pi ani me: «Mu ne siti kpála na kulu. 'Li mu makpe agbíte mu ngae. Mo ombila nako hana me, ma ne kpála inde ngamene 'ngú na kpekpeke. Ma ngaha ehe inde ma a'ó e ngama de. Ma ngaha ezú inde ma alu e ngama de.»<sup>23</sup> Ka ni mu 'o nako tia gba ma-a lie bhú baki de-e? Maka ma ago-o, ma de asia koko pépé.»

<sup>24</sup> Pipita-a, ani apa pi okpála inde adu oo me: «Yi dhepe tia inde ka ani bhomu, amba yi ha pi bhende ne di ndjikpa ko.»<sup>25</sup> U atsia apa pi ani me: «Ngámá, a ka ani ndjikpa!»<sup>26</sup> Ani agie me: «Ma apa pi yi me, kpála bhende li ehe nde ka e, u ahá ehe pi ani bhelé. Engú bini kpála bhende li ehe nde ka e ade-e, u adhépe belegu mboye ehe inde ka ani ko.»<sup>27</sup> La-a, pi obhulu yala gba ma inde i kunda nako de me ma au ngámá pí 'ndji o-o, yi go ne uo ei, amba yi bhili uo kala ma sii.»

\* **19:13** 19:13 Agba omaYuda-a, lí falanga bini (olo) nani ne makalá pi kpála na kulu ngubula epe bata.

*Yesu ali bhú Yelusalema*  
(*Tsia bhú Mat. 21:1-11; ne bhú*  
*Mlk. 11:1-11; di ne bhú Dja. 12:12-*  
*19.*)

<sup>28</sup> Pita li Yesu akpo 'ngú bhomu-o lie, ani atsia akodho 'kpí ne akalanu ngú nanu bhú Yelusalema. <sup>29</sup> Ani akolo lie sunda kuti na Betefadje ne Betania-a,† lingo 'ta na ondula na Olive, ani atsia atima omukpata bhisi. <sup>30</sup> Ani pi uo me: «Yi nu bhú kuti inde kala yi aoo. Yi akólo lie oo, yi abháka me u nde agbite ndili punda oo. Kpála bini dhuku nga pi ani de. Yi bhulu ani amba yi go ne ani ei. <sup>31</sup> † du me kpála bini nde ayi yi me: «Yi ngabhulu ani ngú ní?» Yi de pa pi ani me: «Ngámá ne gumu ani.» <sup>32</sup> Omukpata bhisi anu, u atsia abhaka ndu 'ngú hana maka li Yesu apa pi uo lie ko. <sup>33</sup> U adu abhulu enu-o lie, obhubhulu-o ayi uo me: «Yi ngabhulu enu bhomu-o ngú ní?» <sup>34</sup> U agie me: «Ngámá ne gumu ani.»

<sup>35</sup> Pipita-a, u ago ne ndili 'nu-o pi Yesu. U apa okoti gba o pí 'ngbu enu-o. U atsia ateteke Yesu ngú na'u pí 'ngbu ani.‡ <sup>36</sup> Ani adu anu lie, okpála adu apa okoti gba o li kpadji. <sup>37</sup> Ani akolo de Yelusalema masikpe li ngba 'ta na ondula na Olive. Ndu omukpata hana abedhe ne djali bedhe. U atsia aholo nadhogø Ebhe kpekpeke ngú ndu ongamba 'ngú hana inde u au e ko. <sup>38</sup> U adu apa me:

«A ayo me Ebhe tuko bisagu pí  
'ngbé ngámá inde ani atima e  
ko!  
Guo 'ngú abhúlá,  
amba sangu du di pi Ebhe Apí  
'Kpí!†»

<sup>39</sup> Omufalísai koko inde adu bhú ká okpála bhomu-o, apa pi Yesu me: «Musuno, yoko omukpata gba mu-o mayoko.» <sup>40</sup> Yesu atsia agie me: «Ma apa pi yi me, i du me u nde agbite 'bhø o-o, li oteme holo natu 'ue!»

*Yesu aku 'gbá ngú okpála na Yelusalema*

<sup>41</sup> Li Yesu akolo lie masikpe de Yelusalema-a, ani au gudhu-o lie, ani atsia aholo aku 'gbá ngú okpála ango-o. <sup>42</sup> Ani adu apa me: «Aa! Ngayi okpála na Yelusalema-a, i dú me yi mbíla li 'kpí na naki inde-e, guo 'ngú inde u ago pi yi ne e uu-o! La-a, a ko likabhu pi yi anga mbia inde-e, awo lie pi yi mawo. <sup>43</sup> Padhá de, anga oekpí koko akólo pi yi makolo, li 'kpí ango-o, obhulu yala gba yi-e, asá aga dengo yi ngbalina. U búka yi, u tsia há 'gú pi yi ne ndu pápá hana. <sup>44</sup> U agugumu gudhu-o. U tsia bhili ndu okpála inde bhúbhú-o hana. Agba yi-e, teme bini tígala pí kilí e de, anga yi mbíla nani ekpí inde li Ebhe ago natsia yi lie de!»

*Yesu ali bhú 'ngbé 'ti Ebhe gba omaYuda*

(*Tsia bhú Mat. 21:12-17; ne bhú*  
*Mlk. 11:15-19; di ne bhú Dja. 2:13-*  
*22.*)

<sup>45</sup> Pipita-a, Yesu ali bhú 'ngbé 'ti Ebhe gba omaYuda-o. Ani atsia aholo natsambala okpála inde adu atsindji 'he oo-o. § <sup>46</sup> Ani apa pi uo me: «U aye bhú Bhuku gba Ebhe-e me, Ebhe apa me: «Etí gba ma-a, a adu etí nayo ma.» Engú bini, ngayi-e, yi adji, atsia akolo bili gba obhulu 'zi!†»

† 19:29 19:29 Nayie bhú Yelusalema akólo bhú Betefadje ne Betania, a ko kilometele bata.

‡ 19:35 19:35 Na'u ka Yesu pí 'ngbu punda-a, asuno nani bhomu-o guo 'ngú di ne nakø lie ka ani ne kuto. Tsia bhú Djkl. 9:9. † 19:38 19:38 Tsia bhú Ets. 118:26. § 19:45 19:45 U adu nani atsindji onu di ne odhu bhú 'ngbé 'ti Ebhe gba omaYuda ngubula me okpála, inde adu ne gugumu ngú nahaha pi Ebhe-e, kala. † 19:46 19:46 Tsia bhú Isa. 56:7; di ne bhú Djlm. 7:11.

<sup>47</sup> Yesu adu asuno ndu 'kpí hana bhú 'ngbé 'ti Ebhe gba omaYuda. Ongbengbe odimandè , omusuno na líli gba Moidje di ne obhelesi okpála adu agili kpadji ngú nabhelè ani. <sup>48</sup> Engú bini, u tsia sia kpadji ngú namemene de, anga ndu okpála hana adu adje ani ne gugumu naali.

## 20

*A ngaha angu pi Yesu da?*

*(Tsia bhú Mat. 21:23-27; di ne bhú Mlk. 11:27-33.)*

<sup>1</sup> A akolo ekpí bini, Yesu adu asuno pi okpála bhú 'ngbé 'ti Ebhe gba omaYuda. Ani atsia adu di nakpokpo Bádha Ngali pi uo. Ongbengbe odimandè gba Ebhe , omusuno na líli gba Moidje di ne obhelesi okpála ago. <sup>2</sup> U atsia ayi ani me: «Pa nga pi ya, aha kpadji pi mu ngú namene ongú inde-e da? A aha la di angu angoo pi mu ngánga da?» <sup>3</sup> Abhomu-o, Yesu atsia agie pi uo me: «Ngama di-e, ma ayi yi li 'ngú bini. Yi pa nga muma, <sup>4</sup> a ha kpadji pi Djaa ngú nabatisa okpála da? Ne me a ko Ebhe, ne me a ko okpála?»

<sup>5</sup> U aholo namene kpekebhe sunda o. U atsia adu apa me: «Í du me ní nde agie me: <A aha kpadji pi ani ne Ebhe>, ani yí ní me: <Í du mo-o, ka ní yi bhuka la nani engú inde ani adu apa e lie de-e?>» <sup>6</sup> Í du di me ní nde apa me: <A ha kpadji pi ani ne okpála-a>, li ndu okpála hana bhili ní ne teme, anga u ambila ndjindji me Djaa nani ne polofeta .» <sup>7</sup> Abhomu-o, u atsia agie me: «Ya mbila kpála inde aha kpadji pi ani-e de.» <sup>8</sup> Do Yesu pi uo me: «Í du mo-o, ngama di-e, ma pá pi yi de me aha kpadji muma da ngú namene ehe inde.»

*Gbitaku pindji okpála na kulu inde abhelè ndili gba ngámá gba o-o*

*(Tsia bhú Mat. 21:33-46; di ne bhú Mlk. 12:1-12.)*

<sup>9</sup> Pipita-a, Yesu aholo nakpokpo gbitaku inde-e pi okpála me: «Kpála bini alu nani ngu vino.\* U adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Ani atsia atapa dhuku ngubula 'kpí bhelé.

<sup>10</sup> A akolo li nedhinga nako líli o. Abhomu-o, ani atima kpála na kulu bini agba okpála angoo me u ha nguwa bhe gba ni-e pi ni haha. Engú bini, okpála angoo abhi kpála na kulu bhomu-o má kpú! U atsia agie ani ne mbulu 'kpa e padhá. <sup>11</sup> Bbulu 'dyi-e atima matá kpála na kulu koko bini. U abhi di ani, u asosobho ani, u atsia agie ani ne mbulu 'kpa e padhá. <sup>12</sup> Ani atima matá kpála na bata. Bhobhomu-o, u atsotsolo kute ani ne eka. U atsia agbe ani bhú 'dyi-o.

<sup>13</sup> Abhomu-o, bbulu 'dyi atsia apa me: <Ma améne si pi? Ma atíma nga ibili ndili gba ma na mukunda-o. Nedhinga koko-o, u tí da namanga ani.> <sup>14</sup> Engú bini, li okpála angoo au ndili-e lie me-e, u atsia apa sunda o me: <Yi tsia nga la ndju kpála inde atígala galikpe ne edyi-o. Ní bhelè ani, amba edyi-e kolo ibili naani.> <sup>15</sup> Abhomu-o, u agbe ani bhú 'dyi-o, u abhelè ani.» Yesu atsia ayi me: «Mbia inde-e, bbulu 'dyi-e améne ngú uo pi? <sup>16</sup> Ani agó, ani bhili okpála na kulu angoo. Ani tsia há edyi-e pi okpála na kulu koko.» Li okpála adje engú bhomu-o lie, u atsia apa me: «A ayo de me, bhobhomu-o mene lie de!»

\* **20:9** 20:9 Bhú bhuku gba polofeta Isaya-a, vino ngasuno piga gba omatsalaele. Tsia bhú Isa. 5:1-7.

17 Yesu atsia uo, aní atsia apa me: «Engú inde u aye e bhú Bhuku gba Ebhe-e me:

«Teme inde li okpála nayiki eti-e abhike e,

akolo teme inde abi eti-e lib-homu.†»

A akúnda napa pi? 18 I dú me kpála nde ati pí teme ango-o, aní gúgumú. I dú la di me teme ango-o nde ati pí kpála-a, i tú nú aní.»

*Engú pindji nakala mandjandja (Tsia bhú Mat. 22:15-22; di ne bhú Mlk. 12:13-17.)*

19 Bha li nedhinga bhomu-o, omusuno na líli gba Moidje di ne ongbengbe odimandø gba Ebhe-e, agili nani naholo Yesu, anga u ambila me aní apa gbitaku bhomu-o li 'ngú gba o-o. Engú bini, u adu adje tsulu ka okpála. 20 Abhomu-o, u aholo akenge Yesu. U atsia atima obhulu kali inde adu amene ehe mugito me uo ngbingbili. Okpála ango-o adu agili naholo aní li 'li e ngubula me o pu aní pi Pilate, ngámá na ndu doto ango-o. 21 U ayi aní me: «Musuno, ya ambila me mu ngagama 'ngú ndjindji, mu la di ngasuno 'ngú ngbingbili. Mu tsia engbé gba kpála de. Mu ngasuno kpadji gba Ebhe-e pi okpála ngbingbili. 22 Pa nga pi ya, a ayo me ya kala mandjandja gba Kaisala , 'ngbé ngámá na doto na Loma-a , ne me ya kala de?»

23 Li Yesu ambila ekú gba uo-o lie, aní atsia apa pi uo me: 24 «Yi suno nga lí falanga muma bini. A pépé ne kulu da, la di ne 'li da?» U agie me: «A ko kulu Kaisala, 'ngbé ngámá na doto na Loma, di ne 'li aní.» 25 Abhomu-o, Yesu atsia apa pi uo me: «I dú mo-o, yi ha ehe bhende gba Kaisala, 'ngbé ngámá na doto na Loma-a pi e, amba yi ha la di bhende gba Ebhe-e pi

Ebhe.» 26 U u siti 'ngú bhú engú inde aní adu apa e kala okpála-a de. Engú bini, u angamba naali ka eli inde aní agie e ko. Kaka-a, u andjili bha má bulu!

*Nazuku ka okpála inde amu*

*(Tsia bhú Mat. 22:23-33; di ne bhú Mlk. 12:18-27.)*

27 Abhomu-o, oSadukai koko ago de Yesu. OSadukai ziba nani naao de me okpála inde amu-o, azúku mazuku-o de. U ayi aní me: 28 «Musuno, Moidje aye nani líli pi ní me: «Li kpála kpi 'o ká wala e me aní nde zu de-e, a ayo me ndai aní de ha ølø ango-o, amba aní zu ongisi pi ndai e inde akpi ko.» 29 La-a, adu nani obhosi mananika bhú piga bini. Bhende na kalanu-o aha ølø, aní akpi padhá me aní nde zu de. 30 Bhende na bhisi-e aha økø ango-o. Aní atsia akpi. 31 Pipita-a, bhende na bata-o. A adu bhadi moko pi ndu uo mananika hana, u amu me u nde zu de. 32 Ali soso-o, ølø ango-o atsia akpi di. 33 Ya ngayi mu me: Li 'kpi li okpála inde amu-o azúku lie, ølø ango-o adú naa da? Padhá de, anga ndu uo mananika hana aha nani aní!»

34 Abhomu-o, Yesu atsia agie pi uo me: «Okpála na naki inde-e ngaha lio. 35 Engú bini, okpála bhende amu-o, li Ebhe au me u ti da nazuku ngú nasia mukobho bhú nedhinga inde ngago-o, u há lio de. 36 U tí da matá namu-u de, anga u akolo ibili maka oandjelu . A ko ongisi gba Ebhe, anga u azuku. 37 Moidje asuno pi ní mbámbá me okpála inde amu-o azúku mazuku. Aní aye bhú bhuku gba e li bili inde aní akpo 'ngú lie pindji tsa 'po inde adu atsi-e me, Ebhe apa me: «Ma ne Ebhe inde li Abalahama ngadhøø e, Ebhe inde li Isaka ngadhøø e, Ebhe inde li Jakobho ngadhøø e

† 20:17 20:17 Tsia bhú Ets. 118:22.

ko.†) 38 Ebhe ne Ebhe gba okpála bhende amu-o ade. Engú bini, a ko Ebhe gba okpála bhende bhú mukobho, maka li Abalahama, Isaka ne Yakobho nde pi ani lie bhú mukobho ko.»

39 Abhomu-o, omusuno na líli koko atsia agie pi ani me: «Musuno, mo opa ndjindji.» 40 Kaka-a, u yi matá ani li 'ngú bini de.

*Masiya ne Ngámá gba Davidi*

(Tsia bhú Mat. 22:41-46; di ne bhú Mlk. 12:35-37.)

41 Abhomu-o, Yesu apa matá pi uo me: «Lele pi li okpála ti da napa lie me Masiya ne ndili na piga gba Davidi-e? 42 Padhá de, anga ngaani Davidi makpe-e, ani apa bhú bhuku na oetsi gba omaYuda me: «Ebhe Ngámá apa pi Ngámá gba ma-a me:

Du kuto li pá 'kpa ma na kokpa,

43 akólo li nedhinga inde ma a'ó obhulu yala gba mu-o lie

dabili na sa-tidhu ma ko.» †

44 † da me Davidi nde nga'i Masiya me Ngámá gba ni-e, lele pi li Masiya ti da nadu lie ndili na piga gba Davidi-e?»

*Yi améne maka omusuno na líli de*

(Tsia bhú Mat. 23:1-36; di ne bhú Mlk. 12:38-40.)

45 Ani apa pi omukpata kala ndu okpála hana inde adu adje ani-e me: 46 «'E-e! Yi lila liyi ka omusuno na líli gba Moidje-e uu! U kunda bha nadhuku ne ondjandja yambu. U kunda bha me okpála du ne yiyi o maka ongámási li bili li okpála apopokobho bhúla o lie ko. U kunda bha nadulu pi odabili na akalanu bhú oeti nadje líli, di ne odabili na akalanu bhú da

anokomia. 47 U ngandjia angu oekesi na olisilisi ne nabha ohe gba uo. U ngayo Ebhe ngengele ngu nasuno mugito me a ko obabadha okpála. Kaka-a, u asia likabhu naali!»

## 21

*Makiso gba oko bini na oeloe*  
(Tsia bhú Mlk. 12:41-44.)

1 Ekpi bini, Yesu adu bhú 'ngbé 'ti Ebhe gba omaYuda. Ani atsia 'kpi, ani au me obhulu tia ngabhike tia gba o-o bhú sanduku na makiso na 'Ngbe 'ti Ebhe-e ngu nahaha pi Ebhe. 2 Ani atsia au di oko bini na oeloe bhulu ndibhili me ani nde ngabhike senge bhisi. 3 Abhomu-o, ani atsia apa me: «Ma apa pi yi na paká me, olo na ndibhili li 'ko e akpi inde-e, aha makiso ane ndu okpála koko hana. 4 Padhá de, anga ndu okoko hana, u aha tia bhende u nde ne gumu e ade ko. Engú bini, ngaani-e, abana ani nde lie bhú ndibhili-e, ani aha ndu bhende ani adu akobho lie hana.»

*Yesu apa me: «U agugumu 'ngbé 'ti Ebhe gba omaYuda-o»*

(Tsia bhú Mat. 24:1-2; di ne bhú Mlk. 13:1-3.)

5 Pipita-a, okpála koko aholo akpokpo 'ngu pindji 'ngbé 'ti Ebhe gba omaYuda-o. U adu apa me: «A bha ndju babadha naali ne obabadha teme ango-o, di ne ohe na mase naali inde u aha e pi Ebhe-o.» Engú bini, Yesu atsia apa me: 6 «Ndu 'he inde yi ngau e inde-e, ekpi koko akólo makolo, teme bini tígala pi kilí e de. U agugumu eti-e hana kuto.»

*Likabhu inde akólo kala sokpi-o*  
(Tsia bhú Mat. 24:3-14; di ne bhú Mlk. 13:3-13.)

† 20:37 20:37 Abalahama, Isaka ne Yakobho ngadhogo Ebhe anga pi Ebhe-e, belegu u amu lie li kate o, uo bhú mukobho li bua o. Tsia bhú Eki. 3:6. † 20:43 20:42-43 Tsia bhú Ets. 110:1.

7 Abhomu-o, u atsia ayi ani me: «Musuno, engú inde mu ngakpokpo 'ngú pindji e bhomu-o, akólo nadho? Ehe inde asúno nedhinga nago ka engú ango-o, a adú ni?»<sup>8</sup> Yesu agie me: «Yi lila liyi uu! Kpála bini apíte yi de. Padhá de, anga okpála bhelé agó ne 'li ma, u tsia pá me: «Ma ne Masiya !» U tsia pá di me: «Nedhinga nago ka Masiya akolo!» Engú bini, yi akpáta uo de.<sup>9</sup> I du me yi nde adje okpála ngakpo 'ngú na oegú di ne ongú na okpekepeke 'ndji-e, yi adjé tsulu de. Padhá de, anga a ayo ngaiza me oengú ango-o kolo kalanu. La-a, sokpi-e du nga kolo má gala mo-o de.»<sup>10</sup> Pipita-a, ani matá pi uo me: «Okpála na kuti bini ahá 'gú pi okpála na kuti koko. Li ngámá na kuti bini há 'gú pi ngámá na kuti koko.»<sup>11</sup> Doto adyíki ne adjigidjo na ngbéngbé. Adyíndi di ne osisiti kuo natagba matagba alí bhú obili ngangá. Yi aú ongamba 'ngú di ne ongú na tsulu tsulu abhúlá.

<sup>12</sup> Engú bini, kala me ndu 'ngú bhomu-o hana kolo-o, u ahólo yi. U améne yi sisiti. U anú ne yi me u kodho 'ngú gba yi-e bhú 'ti nadje líli gba Moidje . U tsia bhíke yi bhú tikpu. U asungula yi pi ong-bengbe ongámási di ne obhende ngatsia 'kpi li kuti-e kabula 'li ma.<sup>13</sup> Bhobhomu-o ahá kpadji pi yi ngubula me, yi kpokpo 'ngú gba ma-a pi uo.<sup>14</sup> Yi 'o li bua yi me, yi gíli engú inde yi apá e li nedhinga nakodho 'ngú gba yi-e kalanu de.<sup>15</sup> Padhá de, anga ma ahá eli di ne imbilangu pi yi ngama makpe, ngubula nagbite 'bhe ndu obhulu yala gba yi-e hana.<sup>16</sup> Odyi yi ne ohi yi, ondaise yi ne okpála na piga gba yi di ne obi yi apú belegu yi ngao. U abhili okpála koko bhú ka yi.<sup>17</sup> Ndu okpála hana ayála yi

kabula 'li ma.<sup>18</sup> Engú bini, 'kpa sundjo yi ngíta belegu de bini.<sup>19</sup> I du me yi nde ala kpekepeke akólo li soso-o, yi sía makobho na duduma.»

*Engú inde akólo li Yelusalema (Tsia bhú Mat. 24:15-21; di ne bhú Mlk. 13:14-19.)*

<sup>20</sup> «Nedhinga yi aú lie me osudha asa Yelusalema ngbalina-a, yi de mbila me, nakpi kaka-a akolo masakpe.<sup>21</sup> Abhomu-o, okpála bhende a abháka o bhú ndu doto na Yudaya-a, a ayo me u kpe ne apí 'ta. Obhende adú bhú Yelusalema-a, a ayo me u ze bhúbhú maze. Obhende adú asangba gudhu-o, a ayo matá de me u li abhú gudhu-o de.<sup>22</sup> Padhá de, anga adú ekpi nakodho 'ngú gba Ebhe ngubula me ndu 'ngú hana inde u aye e bhú Bhuku gba Ebhe-e , amene lie.<sup>23</sup> Li 'kpi ango-o, adú likabhu na ngbéngbé pi olisi na ebhi di ne obhende li ongisi adú andji 'ka o-o. Padhá de, anga okpála na doto adjé likabhu naali, li mangimbo gba Ebhe-e súno lie pi uo.<sup>24</sup> U abhili okoko ne ombotia. U tsia mbá okoko bhú bali ne ndu bili hana. Omupagano adédele Yelusalema ne 'dhu o akólo bha bini li nedhinga gba uo andjia lie ko.»

*Nakolo ka sokpi (Tsia bhú Mat. 24:29-31; di ne bhú Mlk. 13:24-27.)*

<sup>25</sup> «U aú oengú na ngangamba bhúla ela, bhúla epe di ne bhúla oikupala. Píla doto-o, bua okpála hana adú ati má ngbi ngbi ngbi ne tsulu ka tolo, di ne ka li 'ngbé 'ngu adú adimba lie ko!<sup>26</sup> Okpála amú ne tsulu ka nabhundja engú inde akólo píla doto libhomu-o, anga ndu 'he na abhúlá hana adyíki má djigi djigi!<sup>27</sup> Pipita-a, u tsia ú ma ngama, Ndili gba kpála, me ma nde ngago bhú ndindi ne angu



di ne asasaua gba ma-a hana.†  
 28 Nedhinga li ongu' ango-o aholo amene lie lie, yi de lu kpekpeke, amba yi 'e 'ndji yi ne abhula, anga ekpi li Ebhe akobho yi lie akolo masikpe.»

*Gbitaku pindji ndula na figi*

(*Tsia bhú Mat. 24:32-35; di ne bhú Mlk. 13:28-31.*)

29 Pipita-a, Yesu atsia apa gbitaku inde-e pi uo me: «Yi tsia nga ndula na figi di ne ondula koko hana. 30 Yi u me 'kpá 'kpá aholo nakè-o, yi mbila me gboko 'kpí akolo masikpe. 31 A bhadi moko, nedhinga yi aú ongu' bhomu-o lie ngakolo-o, yi de mbila me Nau gba Ebhe-e akolo masikpe. 32 Ma apa pi yi na paká me, ndu 'ngú bhomu-o hana akólo me okpála na naki inde-e nde mu nga ndu o hana de. 33 Ekpi ne doto akódho 'kpí makódho. Engú bini, 'li ma kódho 'kpí belegu de bini.»

*Yi lila liyi malila*

34 «'E-e! Yi lila liyi uu! Yi adu abhundja bha engú na anokomia, ne engú nalangba ne pandi di ne ongangá 'ngú na doto inde-e de. I du mo-o, li ekpi li ngama, Ndili gba kpála, ma agó lie, i kólo li yi bhú gbilikiti, 35 maka ekú ahoholo onu lie ko. Padhá de, anga ahólo okpála pála doto libhomu. 36 Yi alá-a de. Yi du nayo Ebhe ndu nedhinga hana, ngubula me yi sia angu ngú nakpe ndu 'ngú inde akólo hana, amba yi koto ngú nalu kala ma, Ndili gba kpála-o.»

37 Ne ngbikpi-e, Yesu adu asuno bhú 'ngbé 'ti Ebhe gba omaYuda-o. Tagolo, ani atsia adu anu asi api 'ta na ondula na Olive. 38 Ndu okpála hana adu ago bhú sikikpi bhú 'ngbé 'ti Ebhe ngú nadje ani.

## 22

*Ongámási gba omaYuda agili nabhølo Yesu*

(*Tsia bhú Mat. 26:1-5; ne bhú Mlk. 14:1-2; di ne bhú Dja. 11:45-53.*)

1 Ekpi na anokomia na Pasika, ekpi ayo di lie me u zu mapa inde li levile nde bhú e ade-e, akolo masikpe. 2 Ongbengbe odimandè gba Ebhe di ne omusuno na líli gba Moidje adu agili kpadji ngu nabhølo Yesu. Engú la bini, u adu adje tsulu ka okpála.

3 Pipita-a, Satana ali li bua Yuda inde u a'i e me Isikaliote, saka obhulu titima ndjikpa ne ká bhisi gba Yesu-o. 4 Abhomu-o, ani anu nadje lie ne ongbengbe odimandè gba Ebhe di ne ongámási gba okpála nalila 'ngbé 'ti Ebhe gba omaYuda. Ani anu nakpokpo ne uo maka ani apú Yesu lie pi uo ko. 5 U akpi djali naali, u atsia adje lio sunda o me o há pi ani falanga. 6 Yuda aziba. Ani atsia aholo agili nedhinga na ndjindji ngu napu Yesu pi uo me, okpála nde de uo ade.

*Yesu atima okpála me, u nu po bhála ezu na anokomia*

(*Tsia bhú Mat. 26:14-16; ne bhú Mlk. 14:12-21; di ne bhú Dja. 13:21-30.*)

7 Ekpi na anokomia nazu mapa inde li levile nde bhú e ade-e akolo. A adu di ekpi inde ayo lie me u bhølo folo kandølo ngubula anokomia na Pasika-o. 8 Yesu atima Piele ne Dja. Ani pi uo me: «Yi nu leke ndu 'ngú hana pi ní ngú anokomia-o.» 9 U atsia ayi ani me: «Mo okunda me ya nu leke su?» 10 Ani agie pi uo me: «Yi djedje, yi ali lie bhú Yelusalema-a, yi atú liyi ne bhoko bini me ani nde abi lusa 'ngu pi 'ndji e. Yi kpata ani bhú eti inde ani ali

bhú e-o. <sup>11</sup> Yi yi bħulũ eti ango-o me: «Mũsuno ngayi mũ me, tina 'ti inde ma azũ anokomia ne omũkpata gba ma-a bhũ e ngae dho?» <sup>12</sup> Anĩ asũno 'ngbé tina 'ti bhe na abhũlũ-a pi yi bini. Ndu 'he hana bhũbhũ. Yi leke ehe na anokomia bhũbhũ.» <sup>13</sup> U agbida, u abhaka ndũ 'ngũ hana maka li Yesu apa lie ko. Abhomũ-o, u atsia aleke ezũ na anokomia-o.

*Yesu aha mapa ne vino pi obhulũ titima*

*(Tsia bhũ Mat. 26:26-30; ne bhũ Mlk. 14:22-26; di ne bhũ 1 Kol. 11:23-25.)*

<sup>14</sup> Li nedhinga ango-o akolo lie, Yesu ne obhulũ titima gba e atsia adulũ kuto ngũ nazũ 'he-o. <sup>15</sup> Anĩ apa pi uo me: «Ma adũ nako ne gumũ naali me ní zũ anokomia inde-e ne yi bhũ dabili bini kala me ma dje likabhu ko! <sup>16</sup> Padhá de, anga ma apa pi yi me, ma zũ matá-a de, akólo li nedhinga inde li tata-a asũno lie lie bhũ Nau gba Ebhe ko.» <sup>17</sup> Abhomũ-o, anĩ aha kópo na vino-o, anĩ agie heni pi Ebhe. Anĩ atsia apa me: «Yi haha, amba yi ndji ndũ yi hana. <sup>18</sup> Ma apa pi yi me, ma ndji matá-a de akólo li nedhinga inde li Nau gba Ebhe-e agó lie ko.» <sup>19</sup> Pipita-a, anĩ aha mapa-o, anĩ agie heni pi Ebhe. Anĩ agumũ bhũsũ bhũsũ, anĩ aha pi uo. Anĩ atsia apa me: «A inde-e kute ma [inde aha lie pi yi-o. Yi dũ amemene moko, ngubula nabhundja ma.» <sup>20</sup> Pita u andjia nazũ 'he bhomũ-o lie, anĩ aha di kópo na vino-o pi uo, anĩ atsia apa me: «Vino inde-e, a ko gandja na mbia li Ebhe akodho e ne yi ne ngute ma inde atuko pi yi-o.]

<sup>21</sup> Engũ bini yi tsisia, kpála inde apũ ma-a, anĩ ngazũ 'he ne ma bhũ dabili bini si! <sup>22</sup> Padhá de, anga a ayo me ngama, Ndili gba kpála-a, ma kpi maka li Ebhe apa lie ko. Engũ la bini, a ko likabhu

naali pi kpála inde apũ ma ko!» <sup>23</sup> Abhomũ-o, u atsia aholo ayi lio sũnda o me, a ko kpála bhedho bhũ ka o inde i tí da namene 'ngũ bhomũ-o.

*Ane ne engbé da?*

<sup>24</sup> Pipita-a, omũkpata aholo amene kpekebhe sũnda o ngũ nambila me ane ne engbé bhũ ká o da. <sup>25</sup> Yesu atsia apa pi uo me: «Ongbengbe ongámási gba omũpagano-o ngaha líli pi okpála gba o-o. Obhende ngatsia 'kpĩ li doto-o kũnda me u 'i o me «Obabadha okpála.» <sup>26</sup> Pi yi-e, yi améne mo-o de. Engũ bini, a ayo me kpála inde ane ne engbé bhũ ká yi-e dũ maka mboye ndili, amba kpála inde ngatsia 'kpĩ li okpála koko-o, dũ naae maka kpála na kulu gba uo-o. <sup>27</sup> Padhá de, anga ane ne engbé da, ne me a ko kpála inde ngazũ 'he? Ne me a ko kpála inde ngamene kulu kulu-o. A ko kpála inde ngazũ 'he-e di? La-a, ma bhũ ká yi maka kpála na kulu gba okpála koko.

<sup>28</sup> Ngayi obhulũ titima gba ma-a, ní adũ ne yi ndũ 'kpĩ hana bhũ nedhinga inde ma adũ adje likabhu gba ma-a lie ko. <sup>29</sup> Kaka-a, ma ahá Nau pi yi maka li 'Dyi ma aha di mũma lie ko. <sup>30</sup> Abhomũ-o, yi azũ 'he, yi tsia ndji di vino ne ma bhũ dabili bini, i dũ me ma nde ali bhũ Nau gba ma-o. Yi adũlũ di pí odabili na ngámá ngũ nakodho 'ngũ gba opiga ndjikpa ne ká bhisi gba omãsalaele ko.»

*Yesu apa pi Piele me: «Mo oyála ma»*

*(Tsia bhũ Mat. 26:31-35; ne bhũ Mlk. 14:27-31; di ne bhũ Dja. 13:36-38.)*

<sup>31</sup> Pipita-a, Ngámá Yesu atsia apa me: «Simo, Simo, djedje nga! Ebhe aha kpadji pi Satana me anĩ pe yi maka u apepe mapũnga lie ko. <sup>32</sup> Engũ bini, ngama-a, ma ayo

Ebhe ngú mụ, amba mo o'ó ká nabhuka gba mụ-o de. Mo odjí matá bua mụ lie, mụ de ha di angu pi ondaise mụ uu.»<sup>33</sup> Piele apa pi ani me: «Ngámá, ma bedhe me, abana i dū nanu bhú tikpu di ne nakpi-e, ní nú ne mụ bhú dabili bini.»<sup>34</sup> Yesu agie pi ani me: «Piele, ma apa pi mụ me, sukpe na nakí inde-e, kala me engu ku 'gbá-a, mo opá bhutsibhutsi bata me ni mbila ma de.»

*Yesu apa pi omukpata gba e me, u leke lio ngubula egú*

<sup>35</sup> Pipita-a, ani atsia ayi uo me: «Nedhinga nako ma atima yi lie mandí tia-a, mandí gonia ne malokè-o, ehe bini aneke nako ka yi uu?» U agie me: «Ehe bini neke ka ya de.»<sup>36</sup> Do ani pi uo me: «Mbia inde-e, kpála bhende li tia ne gonia nde ka e-e, a ayo me ani haha. Kpála bhende li mbotia nde ka e ade-e, a ayo me ani tsindji koti gba e-o, amba ani kala mbotia ne di.<sup>37</sup> Padhá de, anga ma apa pi yi me, engú inde u aye e bhú Bhuku gba Ebhe-e me, 'U ato ani bhú ká okpála na sisiti-e», a ayo me amene lie li kate ma. A moko, engú inde atsia ma-a, a adji amene lie.†»<sup>38</sup> Omukpata atsia apa me: «Ngámá, a ka ya si ne ombotia bhisi.» Ani atsia agie pi uo me: «Ale.»

*Yesu anu nayo Ebhe pí eta na ondula na Olive*

*(Tsia bhú Mat. 26:36-46; di ne bhú Mlk. 14:32-42.)*

<sup>39</sup> Pipita-a, Yesu akoto. Ani anu apí eta na ondula na Olive\* maka ani adu amemene lie ko. Omukpata gba ani atsia akpata di ani.<sup>40</sup> U akolo lie oo, ani atsia apa pi uo me: «Yi yo Ebhe, amba yi alí bhú nale de.»<sup>41</sup> Ani ayie de uo, ani adyudyo mbo lie tsutsu masudha. Ani akikita lipaku e kuto,

ani atsia ayo Ebhe me:<sup>42</sup> «'Dyi ma, i dū me mụ nde akunda-a, mụ de 'e likabhu inde-e de ma tsutsu. La-a, mo oméne maka ma akunda lie de, mene mangbo maka mo okunda lie ko.» [ <sup>43</sup> Abhomu-o, andjelu bini ayie abhúlá, ani akoto li ani, ani atsia aha angu pi ani.<sup>44</sup> Ani abedhe lie ne likabhu-o, ani atsia aholo matá nayo Ebhe kpekpeke naali. Ngufu na kute ani akolo maka ngute, a atsia adu ayi kuto má ta ta ta!]

<sup>45</sup> Pita li ani a'o nayo Ebhe lie, ani ayie bhúlá, ani agie lie ade omukpata. Ani abhaka me u nde atuko ne ela ka likabhu.<sup>46</sup> Ani atsia apa pi uo me: «Yi atuko ne ela ka ni? Yi yie bhúlá, amba yi yo Ebhe, ngubula me yi alí bhú nale de.»

*U aholo Yesu*

*(Tsia bhú Mat. 26:47-56; ne bhú Mlk. 14:43-50; di ne bhú Dja. 18:3-11.)*

<sup>47</sup> Li nedhinga li Yesu adu apa 'ngú bhomu-o lie, Yuda saka obhulu titima ndjikpa ne ká bhisi-e ago ne bhiti okpála. Ani adyudyo lie de Yesu masikpe ngubula me ni nvu pabhè ani.<sup>48</sup> Abhomu-o, Yesu atsia apa pi ani me: «Mụ nganvu pabhè ma, Ndili gba kpála, ngubula napu ma-a?»

<sup>49</sup> Li omukpata gba Yesu-o au engú inde adji akódho 'kpí-e lie, u atsia ayi Yesu me: «Ngámá, a la ya gu ne uo ne mbotia?»<sup>50</sup> Saka uo asu kpála na kulu gba bhele kpála gba odimandè gba Ebhe-o. Ani atsia akodho kpadje ani li pápá na kokpa-a má tse!<sup>51</sup> Engú bini, Yesu atsia apa me: «Yi 'o'o, a apise moko.» Ani aha kpadje kpála ango-o, ani a'o 'kpa e tété, ani atsia akobho ani.

<sup>52</sup> Pipita-a, Yesu atsia apa pi ong-bengbe odimandè ne ongámási gba omulila na 'ngbé 'ti Ebhe gba

† 22:37 22:37 Tsia bhú Isa. 52:12. \* 22:39

22:39 Eta na ondula na Olive-e asangba gudhu na Yelusalem.

omaYuda, di ne obhelesi okpála inde ago ngú naholo ani-e me: «Ka ni yi ago ngú ma lie ne ombotia, di ne ondula mugito me yi ago ngú naholo bhulu 'zi-e? <sup>53</sup> Ni adu nako ne yi ndu 'kpí hana bhú dabili bini bhú 'ngbé 'ti Ebhe gba omaYuda. La-a, yi holo ma de. Engú bini, nedhinga gba yi-e akolo, nedhinga gba ngámá na biti-o.»

*Piele apa me ni mbila Yesu de*  
(Tsia bhú Mat. 26:57-58, 69-75; ne bhú Mlk. 14:53-54, 66-72; di ne bhú Dja. 18:12-18, 25-27.)

<sup>54</sup> Abhomu-o, u aholo Yesu, u anu ato ani bhú 'ti gba bhele kpála gba odimandø gba Ebhe-o. Piele adu akpata uo mbo tsutsu. <sup>55</sup> A abhaka me u nde akpo djua tu mbadhasu, okpála adulu dede. Piele atsia ago adu bhú ká uo. <sup>56</sup> Kpála na kulu bini na øleø au ani li zi djua me ani nde adu kuto. Ani atsia Piele ne kpéke djila, ani me: «Kpála inde-e du di nako ne ani bhú dabili bini!» <sup>57</sup> Engú bini, Piele ayala, do ani de-e: «Ma ambila ani de, øleø-e.» <sup>58</sup> Pita nedhinga bedi-e, bhoko bini au ani, ani atsia apa me: «Ngamu di-e, mu ne suka okpála gba Yesu-o!» Engú bini, Piele atsia agie me: «Bhoko-e, ma ne suka uo ade.»

<sup>59</sup> Pipita abhue mbo ngengele. Bhoko koko atsia azi kekele tété me: «A ko kakulu 'ngú, kpála inde-e du nako ne Yesu bhú dabili bini, anga a ko di kpála na Galilaya.» <sup>60</sup> Engú bini, Piele agie pi bhoko ango-o me: «Bhoko-e, ma mbila 'ngú inde mu ngapa e de.» Bha li nedhinga inde ani adu apapa lie, engu atsia aku 'gbá. <sup>61</sup> Ngámá Yesu adjí bhúla e, ani atsia bhúla Piele. Abhomu-o, Piele atsia abhundja engú inde li ngámá Yesu apa igini e pi ani-o me: «Sukpe na naki inde-e,

kala me engu ku 'gbá-a, mo opá bhutsibhutsi bata me ni mbila ma de.» <sup>62</sup> Piele akoto kilidjo, ani abhele kuo e ne egbá má kusu!

*U asobho Yesu, u atsia abhi di ani*  
(Tsia bhú Mat. 26:67-68; di ne bhú Mlk. 14:65.)

<sup>63-64</sup> Okpála inde adu alila Yesu-o aholo amu ani. U agbite djila ani. U aholo abhi ani. U atsia adu ayi ani me: «Aa! Ngamu, polofeta-a, pa nga pi ya me asu mu da!» <sup>65</sup> U asosobho ani. U atsia apa di ongu koko pi ani bhele bhú osobho inde u adu asosobho ani ne e ko.

*Odimandø akodho 'ngú gba Yesu*

(Tsia bhú Mat. 26:59-66; ne bhú Mlk. 14:55-64; di ne bhú Dja. 18:19-24.)

<sup>66</sup> Li ekpi aseke lie, obhelesi okpála gba omaYuda apøkøbhø bhúla o bhú dabili bini ne ong-bengbe odimandø gba Ebhe, di ne omusuno na líli gba Moidje-o. U atsia agbe ani kala Libi okpála natsia 'kpí li 'ngú gba omaYuda-o. <sup>67</sup> U ayi ani me: «I du me mu nde ne Masiya-a, mu de pa pi ya.» Abhomu-o, ani agie pi uo me: «I du me ma nde apa pi yi-e, yi bhúka de. <sup>68</sup> I du la di me ma nde ayi yi li 'ngú-o, yi gíe 'ngú muma tété de. <sup>69</sup> Nayie pi mbia inde-e, ngama, Ndili gba kpála-a, ma adu li pápá na kokpa gba Ebhe na angu-o.†» <sup>70</sup> Abhomu-o, ndu uo hana atsia ayi me: «Bhobhomu-o apa me mu ne Ndili gba Ebhe?» Ani agie pi uo me: «A maka yi apa lie ko.» <sup>71</sup> Abhomu-o, u atsia apa me: «Ní matá ne gamu okpála koko inde i ti da napa engú ango-o pi ní ade, anga ní adje bha nganí makpe bhú 'li ani adje!»

† 22:69 22:69 Tsia bhú Ets. 110:1.

## 23

*U anu ne Yesu kala Pilatø*  
(*Tsia bhú Mat. 27:1-2, 11-14; ne bhú Mlk. 15:1-5; di ne bhú Dja. 18:28-38.*)

<sup>1</sup> Pipita-a, ndu okpála hana inde adu bhú dá bula-a ayie bhúlá, u atsia anu ne Yesu kala Pilatø, ngámá na Loma . <sup>2</sup> Oo, u aholo apa li Yesu me: «Ya abhaka kpála inde-e me aní nde ngaha kpéke 'ndji pi okpála gba ya-o. Aní nde ngayoko uo me u akala mandjandja gba Kaisala , 'ngbé ngámá na Loma-a de. Aní atsia adu apa di me ni ne Masiya , akúnda napa me 'ngbé ngámá.»

<sup>3</sup> Pilatø ayi aní me: «Ngamu-o, mu ne 'ngbé ngámá gba omaYuda?» Yesu agie pi aní me: «Mo opa ngamu.» <sup>4</sup> Abhomu-o, Pilatø atsia apa pi ongbengbe odimandø di ne bhiti okpála bhomu-o me: «Ma u engú bini inde a ayo me u holo kpála inde-e ngú e de.» <sup>5</sup> Engú bini, u azi bha kekele tété me: «Bhú nasuno gba ani-e, aní ngaha kpéke 'ndji pi okpála me u améne líli gba ngámá-a de. Aní amene bhú doto gba omaYuda libhomu. Aní akpo bhú ndu doto na Galilaya. Mbia inde-e, aní akolo ibili ne di ei.»

*U anu ne Yesu kala ngámá Elode*

<sup>6</sup> Li Pilatø adje lie mo-o, aní atsia ayi me: «Kpála inde-e, a ko kpála na Galilaya?» <sup>7</sup> U agie pi aní me: «A moko, a ko kpála na Galilaya.» Abhomu-o, li Pilatø adje lie me Yesu ayie bhú ndu doto li ngámá Elode adu alila e-e, aní atsia atima aní pi aní. Padhá de, anga bhú ekpí ango-o, Elode adu di bhú Yelusalema oo. <sup>8</sup> Elode akpi djali naali li aní au Yesu lie. Padhá de, anga nayie nani didili naali, aní adu akúnda me ni u Yesu ka engú gba aní inde aní adu adje e-o.

Aní atsia adu akúnda nau aní me aní nde ngamene ngamba 'ngú. <sup>9</sup> Aní ayiyi Yesu li ongú bhelé. Engú bini, Yesu gie 'ngú pi aní tété belegu de bini. <sup>10</sup> Ongbengbe odimandø di ne omusuno na líli gba Moidje adu oo. U adu apa 'ngú li kute aní sisiti naali. <sup>11</sup> Elode ne osudha gba e amu aní, u atsia asosobho di aní. Pipita-a, u adyi bádha bongo li aní, u atsia agie aní pi Pilatø. <sup>12</sup> Kalanu-o, Elode ne Pilatø du nadje lio de. Nayie li 'kpí ango-o, u atsia akolo bhú makpolia.

*U akodho 'ngú gba Yesu me aní kpi bha makpi*

(*Tsia bhú Mat. 27:15-26; ne bhú Mlk. 15:6-15; di ne bhú Dja. 18:39 - 19:16.*)

<sup>13</sup> Abhomu-o, Pilatø apo bhúla ongbengbe odimandø, ongamási gba omaYuda di ne okpála. <sup>14</sup> Aní atsia apa pi uo me: «Yi ago ne kpála inde-e muma me aní ngaha kpéke 'ndji pi okpála. La-a, ma ayi aní li 'ngú ango-o kala yi si, ma u aní ne siti 'ngú belegu de bini bhú ká ndu 'ngú hana inde yi apa e li aní-o. <sup>15</sup> Elode u di siti 'ngú ka aní de anga aní agie aní pi ní ei. A moko me kpála inde-e mene siti 'ngú belegu de bini inde u ti da nabhøø aní ka e ko. <sup>16</sup> Kaka-a, ma abhi aní ne fimbo, ma atsia tsé 'kpa li aní.» [ <sup>17</sup> Bhú ndu anokomia na Pasika hana, a ayo me Pilatø tse 'kpa li kpála inde u aholo e bhú tikpu-o pi uo bini.]

<sup>18</sup> Engú bini, ndu uo hana aholo asusula bhú dabili bini me: «Bhøø kpála bhomu-o mabhøø, amba mu tse 'kpa li Balaba pi ya!» <sup>19</sup> (U aholo nani Balaba bhú tikpu anga aní agbe nani kpéke 'ndji abhú Yelusalema, aní atsia abhøø di kpála.) <sup>20</sup> Pilatø adu akúnda natse 'kpa li Yesu. Kaka-a, aní atsia ayi matá uo li 'ngú ango-o ko. <sup>21</sup> Engú bini, u aholo bha nasusula

me: «Gi ani li kulusi! Gi ani li kulusi!»<sup>22</sup> Bhutsibhutsi na bata-a, ani apa pi uo me: «Ani amene la mangua siti 'ngú dho? Ma u engú inde ani amene e, u ti da nabhøø ani ka e de. Ma abhí bha ani ne fimbo, ma tsia tsé 'kpa li ani.»

<sup>23</sup> Engú bini, u azi bha kekele tété kpekpeke me, a ayo me u gi Yesu li kulusi. U adu bha a'é'e 'li o ne bhúla, akolo li nedhinga li 'li uo aha angu Pilato lie ko. <sup>24</sup> Abhomu-o, Pilato atsia aziba namene maka u adu akukunda lie ko. <sup>25</sup> Ani atsia atse 'kpa li kpála inde u adu ayo e-o, kpála inde u aholo e bhú tikpu-o. Padhá de, anga ani agbe kpéke 'ndji, ani atsia abhøø di kpála. Engú bini, ani atsia aha Yesu pi uo me u mene ne ani maka u adu akukunda lie ko.

*U anu ne Yesu ngú nabhøø ani*  
(*Tsia bhú Mat. 27:32-44; ne bhú Mlk. 15:21-32; di ne bhú Dja. 19:17-27.*)

<sup>26</sup> Li osudha adu anu ne Yesu lie, u akø lio ne Simo, kpála na ndu doto na Silene, me ani nde ayie abhiye. U aholo ani, u atsia a'o kulusi gba Yesu-o li 'ngbu ani me, ani bibi amba ani kpata Yesu ne di.

<sup>27</sup> Okpála bhelé adu akpata Yesu. Bhú ká uo-o, adu di ne olisi inde adu aku 'gbá ne nalopolo lio ngú ani-o. <sup>28</sup> Yesu adjí bhúla e ne apí uo, ani atsia apa pi uo me: «Ngayi, olisi na Yelusalema-a, yi akú 'gbá ngú ma de! Engú bini, yi ku mangbo egbá ngú yi ne ongisi gba yi ko. <sup>29</sup> Padhá de, anga oekpi koko akólo makolo, oekpi inde u apá lie me: «A ko djali pi olisi inde i zu de, inde i bi 'bhí de, di ne obhende li ongisi ndji 'ka o de-o!»

<sup>30</sup> Li nedhinga bhomu-o, okpála ahólo napa pi ongbengbe 'ta me: «Yi buku ya!» U tsia pá pi odjedje 'ta me: «Yi wo ya!»<sup>†</sup> <sup>31</sup> Padhá de,

anga i du me okpála nde amene ndula bhe na yiyi-e mo-o, u méne la ibili naae ndula bhe na keke-e pi?»\*

<sup>32</sup> Li nedhinga bhomu-o, u anu di ne obhosi bhisi koko inde amene sisiti 'ngú naali me u bhili uo bhú dabili bini ne Yesu.

*U agi Yesu li kulusi*

(*Tsia bhú Mat. 27:45-56; ne bhú Mlk. 15:33-41; di ne bhú Dja. 19:28-30.*)

<sup>33</sup> U akolo li bili inde u a'i e me «Pelegendji.» U atsia agi Yesu li kulusi di ne okpála na sisiti bhisi-o, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali. <sup>34</sup> [Abhomu-o, Yesu atsia apa me: «'Dyi ma, mbu li siti 'ngú gba uo, anga u mbila engú inde u ngamene e de.»]

Osudha agu gbanda ngú nagapa obongo gba ani-e li o. <sup>35</sup> Okpála adu oo, u adu atsia engú inde adu akodho 'kpi-o. Ongámási gba omaYuda adu amu ani. U atsia adu apa me: «Ani akobho okpála koko. A ayo me ani kobho di lie ne titi e, i du me ani nde ne Masiya inde li Ebhe abhu e ko!» <sup>36</sup> Osudha amu di ani. U adyudyo lio masikpe, u aha kpongadha pandi pi ani, u atsia apa me: <sup>37</sup> «I du me mu nde bha ndju ne 'ngbé ngámá gba omaYuda-a, mu de kobho limu ne titi mu!» <sup>38</sup> Pí 'ndji ani-e, u aye me: «A INDE-E 'NGBÉ NGÁMÁ GBA OMAYUDA-O.»

<sup>39</sup> Suka okpála na sisiti inde u agi o li kulusi adu asobho ani me: «Mu ne Masiya adi? Kobho limu ne titi mu, amba mu kobho di ya!» <sup>40</sup> Engú bini, bhe koko ambe bhú 'ndji ani, do ani de-e: «Mu kpe Ebhe di, ngamu inde ngasia bhadi likabhu maka ani-e? <sup>41</sup> Pi ní-e, a li likabhu gba ní-e ne tata, anga ní ngasia bhomu-o mbini kulu gba

† 23:30 23:30 Tsia bhú Oz. 10:8. \* 23:31 23:31 Ndula bhe na yiyi-e, a ko Yesu. Ndula bhe na keke-e, a ko okpála.

ní ko. La-a, ngaani-e, ani mene naae siti 'ngú belegu de bini.»  
 42 Pipita-a, ani atsia apa pi Yesu me: «Bhundja ma uu, li nedhinga inde mo ogó lie ngú nau ngámá gba mu ko.»  
 43 Yesu agie pi ani me: «Ma apa pi mu na paká me, naki-e, ní adú ne mu bhú dabili bini bhú kuti na mundeysi ko.»

### *Yesu akpi*

44 A akolo masikpe de tulukpe, ela a'o nasu. Biti aha pila doto libhomu akolo li saa na bata pita tulukpe.  
 45 'Ngbé 'kpá bongo inde adu agbo bhusu 'ngbé 'ti Ebhe gba omaYuda asidha bhusu e tutu má tsue!  
 46 Abhomu-o, Yesu atsia asula kpekpeke me: «'Dyi ma, ma nga'o bua ma sa 'kpa mu.» Pita ani apa engú bhomu-o lie, ani atsia andala 'kpa li bua e.  
 47 Li ngámá gba osudha na Loma au engú inde akodho 'kpí-e lie, ani atsia adu adhogo Ebhe me: «A ko paká me kpála inde-e bha ndju nako ne kpála na ngbingbili!»  
 48 Ndu okpála hana inde ago apo bhúla o ngú natsia engú ango-o, au engú inde akodho 'kpí-o. U atsia adu agie lio agba o me u nde abubu 'kpa o pí 'ka o ka likabhu.  
 49 Ndu obi Yesu hana di ne olisi inde adhuku ne ani bhú dabili bini nayie bhú Galilaya-a, alulu mbo tsutsu. U adu natsia engú inde adu akodho 'kpí ko.

### *U azi Yesu*

(Tsia bhú Mat. 27:57-61; ne bhú Mlk. 15:42-47; di ne bhú Dja. 19:38-42.)

50-51 Kpála bini adu nani oo. A adu 'li ani me Djodjefa, kpála na Alimaté, suka gudhu gba omaYuda. A ko nani kpála na babadha inde adu di ngbingbili. Ani adu nani nadjeko nago ka Nau gba Ebhe pila doto. A ko nani suka Libi okpála natsia 'kpí li ongu gba omaYuda-o. Engú bini, ani

du aziba engú inde li Libi okpála natsia 'kpí li ongu gba omaYuda adu abhundja e di ne namene e li Yesu-o de.  
 52 Ani anu abhaka Pilate, ani atsia ayo kuo Yesu ka ani. Pilate aziba.  
 53 Pipita-a, ani atsia a'e kuo ani li kulusi-o. Ani agagala ne bongo. Ani atsia ato bhú lata inde u adji e bhú teme, lata inde u zi nga kpála bhú e kalanu de.  
 54 A adu nani 'kpí kulu bhuluvue, masikpe de ekpí naguo

55 Olisi inde ayie nani ne Yesu bhú Galilaya-a, anu bhú dabili bini ne Djodjefa. U atsia lata-o, u au maka u a'o kuo Yesu lie bhúbhú-o.  
 56 Pipita-a, u agie lio agba o. U atsia aleke emu, di ne mungotsi ngubula me sidi-e, u nu pulu kute kuo-o ne di. Li 'kpí naguo-o, u atsia aguo maka li lili apa lie ko.

## 24

### *Yesu azuku*

(Tsia bhú Mat. 28:1-10; ne bhú Mlk. 16:1-8; di ne bhú Dja. 20:1-10.)

1 Bhú 'kpí yinga kəkpí má bhé-o, olisi aha mungotsi inde u agili e-o, u atsia agbida abhú lata.  
 2 U abhaka me teme nde awawala li 'bhe lata-a awawala.  
 3 U ali lie, u bhaka kuo Ngámá Yesu de.  
 4 Nedhinga u adu akiaka lie ka 'ngú ango-o, kolo me-e okpála bhisi aze li uo. Okpála ango-o adyidiyi bubu bongo má tuu tuu!  
 5 U adu la lie ne tsulu naali-e, u atutu bhúla o ne kuto. Okpála ango-o atsia apa pi uo me: «Yi ngagili kpála inde uu-o bhú ká okpála inde amu-o ka ni?»  
 6 Ani sii ade. Engú bini, ani azuku. Yi bhundja engú nako ani apa e pi yi li nedhinga inde ani adu nga bha lie bhú Galilaya me:  
 7 «A ayo me u pu ma, Ndili gba kpála, pi okpála na sisiti. U gi ma li kulusi, amba bhú 'kpí na bata-a, ma tsia zuku.»

<sup>8</sup> Abhomu-o, u atsia abhundja 'li ani-o.

<sup>9</sup> U ayie bhú lata-o. U atsia anu nakpokpo ndu 'ngú bhomu-o hana pi obhulu titima ndjikpa ne ká bini, di ne ndu obhende adu ne uo bhú dabili bini-e hana. <sup>10</sup> Olisi ango-o, adu nani Malia, kpála na gudhu na Magadala, Djaani ne Malia, 'hi Djaki. Ngauo ne olisi koko inde adu bhú dabili bini ne uo akpokpo pi obhulu titima gba Yesu-o. <sup>11</sup> Engú bini, obhulu titima abhundja naao me, engú inde li olisi akpokpo e-e, a ko engú na ngingi. Kaka-a, u tsia bhuka de. <sup>12</sup> Engú bini, Piele ayie bhúlá, ani anu ne holo abhú lata. Ani akolo lie oo, ani akita ne kuto, ani atsia 'kpi, ani au bha bongo inde u agagala kuo ne e ko. Pipita-a, ani agie lie agba e me ani nde ngangamba naali ka engú inde akodho 'kpi ko.

*Yesu akoto li omakpata bhisi li kpadji na Emausi  
(Tsia bhú Mlk. 16:12-13.)*

<sup>13</sup> Bha li 'kpi ango-o, omakpata bhisi adu anu bhú kuti bini inde u a'i e me Emausi. Kutu ango-o adu de Yelusalema tsutsu, masikpe de kilometele ndjikpa ne ká bini. <sup>14</sup> U adu akpokpo 'ngú sunda o pindji ndu 'ngú hana inde akodho 'kpi-o. <sup>15</sup> Nedhinga uo adu akpokpo 'ngú di ne namene kpekebhe lie sunda o-o, ngaani Yesu makpe, ani adyudyo lie de uo masikpe. Ani atsia aholo 'nú ne uo bhú dabili bini. <sup>16</sup> U adu au ani, engú bini, ehe bini adu amene me u ambila ani de. <sup>17</sup> Ani ayi uo me: «A ko mangua 'ngú dho yi adji ne kpokpo e sunda yi me-e?» Abhomu-o, u alu, u atsia abedhe ne likabhu bedhe.

<sup>18</sup> Suka uo bini inde adu 'li e me Keleopasi apa pi ani me: «Bhú ká ogomago na Yelusalema libhomu-o, engú inde akodho 'kpi sunda okpi inde-e, mu mbila bha de

ngamu kpi mu kpi?» <sup>19</sup> Ani ayi uo me: «Mangua 'ngú dho?» U atsia agie pi ani me: «Engú inde akolo li Yesu, kpála na Nadjaleta! A ko nako polofeta kaku. Ongú inde ani amene e ne bhende ani asuno e, ani amene ndundu hana ne angu. Ani atsia asuno ongú ango-o kala Ebhe di ne kala ndu okpála hana. <sup>20</sup> La-a, ongbengbe odimandø gba Ebhe di ne ongámasi gba ní-e, apu ani me u bhøøe ani. U atsia agi ani li kulusi.

<sup>21</sup> La-a, ya adu nako ne 'to ya naaya me, a ko kpála inde agbége Isalaele bhú bali-o. Engú bini, a ane naki ekpi bata maka li oengú ango-o akodho 'kpi lie ko. <sup>22</sup> La matá di-e, ya angamba ka olisi koko bhú ka ya naali. U anu igini bhú sikikpi abhú lata. <sup>23</sup> Engú bini, u u kuo ani de. U agie lio, u apa pi ya me oandjelu aze lio. Oandjelu atsia apa pi o me ani uu. <sup>24</sup> Pipita-a, okpála koko bhú ká ya anu abhú lata, u atsia abhaka ndu 'ngú hana maka li olisi akpokpo lie ko. Engú bini, ngaani makpe-e, u u ani de.»

<sup>25</sup> Abhomu-o, Yesu atsia apa pi uo me: «Yi ne ongingi! Ka ni yi ngabhuka lie má gala ade ndu 'ngú hana inde li opolofeta-a apa e! <sup>26</sup> A ayo nako de me Kilisito dje likabhu kala me ani li bhú nau na asasaua gba e di?» <sup>27</sup> Pipita-a, ani aholo nakpokpo ndu 'ngú hana inde u apa e pindji ani bhú obhuku gba Ebhe-e pi uo. Ani akpokpo nayie bhú obhuku gba Moidje akólo bhú obhuku gba ndu opolofeta-a hana.

<sup>28</sup> U akolo lie de kuti inde u adu anu bhú e masikpe-e, Yesu amene mugito me ni adji tsutsu. <sup>29</sup> Engú bini, u atsia apa pi ani me: «Ní si ne yi si, anga ekpi asegele, biti la di ngago.» Ani atsia ali ngú nasi bhú dabili bini ne uo oo ko. <sup>30</sup> Nedhinga ani adu



azu 'he lie bhú dabili bini ne uo-o, ani aha mapa, ani agie heni pi Ebhe. Pipita-a, ani agumú mapa-o, ani atsia aha pi uo. <sup>31</sup> Abhomú-o, djila uo abhulu, u atsia ambila ani. Engú bini, ani angita bha kolo bhú djila uo má pele! <sup>32</sup> U atsia aholo nayi lio sunda o me: «Li nedhinga inde ani adu akpokpo 'ngú di ne nasuno ta eli gba Ebhe lie pi ní li kpadji-e, bua ní bedhe igini bhú ní ne djali bedhe di?»

<sup>33</sup> Bha li nedhinga bhomu-o, u ayie bhúlá kolo má gala, u atsia agie lio abhú Yelusalema. Oo, u abhaka me obhulu titima ndjikpa ne ká bini-e nde apo bhúla o ne obi o-o bhú dabili bini. <sup>34</sup> U atsia apa pi obhe bhisi bhomu-o me: «Ngámá azuku na kukulú! Simo au ani!» <sup>35</sup> Pipita-a, omukpata bhe bhisi-e atsia akpokpo 'ngú inde akodho 'kpí li kpadji-e pi uo, di ne maka u ambila Yesu lie li nedhinga ani agumú mapa lie ko.

*Yesu asuno lie pi omukpata gba e-o*

*(Tsia bhú Mat. 28:16-20; ne bhú Mlk. 16:14-18; ne bhú Dja. 20:19-23; di ne bhú Kul. 1:6-8.)*

<sup>36</sup> Li nedhinga u adu nga bha lie nakpokpo 'ngú ango-o, Yesu atsia alu bhú ká uo. Do ani pi uo me: «Guo 'ngú du bhú dabili bini ne yi!» <sup>37</sup> U adje tsulu naali, u atsia aholo aguku, anga u adu abhundja me o ou igbadyibhe. <sup>38</sup> Engú bini, Yesu atsia apa pi uo me: «Yi ngadje tsulu ka ní? Yi ne bua na bhisi bhisi ka ní? <sup>39</sup> Yi tsia nga 'kpa ma di ne 'dhu ma, a ko bha ma makpe. Yi tana nga kate ma, amba yi u, anga mbilika ne biki li igbadyibhe ade maka yi ngau ma lie ne di ko.» <sup>40</sup> Ani apa engú bhomu-o lie, ani atsia asuno 'kpa e di ne 'dhu e pi uo. <sup>41</sup> Li djali di ne nangamba aha angu uo lie naali-e, u tsia bhuka ngaiza de. Ani atsia ayi uo me: «Mbo 'he

nazu mazú ka yi si uu?» <sup>42</sup> U atsia aha ndu sungu inde u azi e mazi-e pi ani. <sup>43</sup> Ani aha, ani atsia azu li djila uo oo.

<sup>44</sup> Pipita-a, ani pi uo me: «Ma apa nako pi yi ndjindji nedhinga ní adu nga bha lie bhú dabili bini-e me, a ayo me ndu 'ngú hana inde u aye e pindji ma bhú líli gba Moidje , bhú obhuku gba opolofeta di ne bhú bhuku na oetsi gba ní-e, amene lie.» <sup>45</sup> Pipita-a, ani atsia abhulu imbilangu gba uo ngubula me u mbila ta engú inde u aye e bhú obhuku gba Ebhe ko. <sup>46</sup> Ani atsia apa pi uo me: «Maka u aye lie bhú obhuku gba Ebhe-e me, a ayo me Kilisito dje likabhu, amba ani tsia zuku bhú 'kpí na bata. <sup>47</sup> A ayo me okpála kpokpo 'ngú gba ani-e pi ndu okpála hana píla doto libhому. U akpokpo nayie bhú Yelusalema me okpála dji bua o, amba Ebhe 'e siti 'ngú gba uo ko. <sup>48</sup> Yi au engú inde akodho 'kpí-e ne djila yi makpe. <sup>49</sup> Ngama-a, ma atíma pi yi bhende li 'Dyi ma apa me ní atíma e-o. Kaka-a, yi du bha bhú gudhu si akólo li 'kpí inde li Ebhe atíma angu pi yi lie ko.»

*Ebhe aha Yesu abhúlá*  
*(Tsia bhú Mlk. 16:19-20; di ne bhú Kul. 1:9-11.)*

<sup>50</sup> Pipita-a, Yesu anu ne omukpata gba e masikpe de kuti na Betania. U akolo lie oo, ani a'e 'kpa e, ani atsia atuko bisagu pí uo. <sup>51</sup> Li nedhinga ani adu atuko bisagu pí uo lie, ani ayie bhú ká uo. Ebhe atsia aha ani abhúlá. <sup>52</sup> Ngauo-o, u adhogè ani. Pipita-a, u atsia agie lio abhú Yelusalema me u nde abedhe ne djali bedhe. <sup>53</sup> Ndu 'kpí hana, u adu nadu bhú 'ngbé 'ti Ebhe gba omaYuda ngú nadhogè Ebhe.

**Bádha Ngali  
gba Yesu Kilisito maka  
li  
Djaa  
aye lie ko  
Eli na kalanu**

Bádha Ngali gba Yesu Kilisito maka li Djaa aye lie ngasuno Yesu maka Eli na duduama gba Ebhe. Eli akolo maka kpála-kuti atsia adu bhú ká ní (1:14). Maka li bhuku ngae makpe ngapapa lie, Bádha Ngali inde aye nani li e ngubula me okpála inde ngatatanga bhuka me Yesu ne Mukobho inde li Ebhe abhu nani e, inde di Ndili gba Ebhe, ngubula me ka nabhuka bhú ani-e, u sia mukobho na duduama (20:31).

U aye engú gba eɓe na zabhe sunda oehe bhisi me anga bhú obhuku na didili koko-o, u ye engú ang-o de, okoko atsia aye li obili koko (8:1-11).

Djaa ngagama 'ngú naali pindji mukobho na duduama inde li Ebhe aha e padhá bhú Yesu. A ngakpo lita e naki inde i tsia gó pi obhende ngaziba Yesu maka kpadji, maka kakulu 'ngú, la di maka mukobho. Engú na ngbéngbé inde bhú Bádha Ngali gba Djaa, a ko ngubula nasuno engú inde bhú mukobho gba kpála ngubula ekpi bini ne bini, ngubula nasuno lele kakulu 'ngú na Bu Bhobua : maka engu, maka mapa, maka zi 'kpi, maka mulila gba okandele ne okandele gba e, la di maka vino ne li e.

**Ongbengbe ongú inde bhú bhuku inde-e ngae inde:**

Eli na kalanu 1:1-18

Djaa bhulu nabatisa okpála, ne omakpata gba Yesu na kalanu 1:19-51

Kulu gba Yesu bhú ká okpála 2:1 - 12:50

Oekpi nasoso gba Yesu abhu Yelusalema 13:1 - 19:42

Nazuku gba Yesu, ne nakoto ka Ngamá li okpála 20:1-31

Eli nasoso: ani akoto mata li okpála abhu Galilaya 21:1-25

*Eli inde zi 'kpi di ne mukobho*

1 Nayie li lilita-a, Eli\* adu nani uu. Eli ang-o adu nani bhú dabili bini ne Ebhe.

La di-e, Eli ang-o a adu Ebhe.

2 Nayie li lilita-a, Eli ang-o adu nani bhú dabili bini ne Ebhe.

3 Ebhe atsia abho ndu 'he hana ne Eli ang-o.

Ehe bini inde amene lie mandani ade.

4 Mukobho akoto bhú Eli ang-o.

Mukobho ang-o atsia adu zi 'kpi pi okpála.

5 Zi 'kpi ngaziga bili bhú biti.

Engú la bini, biti ha angu zi 'kpi ang-o de.

6 Ebhe atima kpála bini. A adu 'li kpála ang-o me Djaa .

7 Ani ago maka kpála nakpokpo 'ngú. Ani atsia akpokpo 'ngú mbámhá pindji zi 'kpi-o, amba ndu okpála hana bhuka ka ani.†

8 Ngaani makpe-e, ani du nani zi 'kpi de. Engú bini, ani ago nani ngú nakpokpo 'ngú pindji zi 'kpi-o. 9 Zi 'kpi ang-o, a ko nani zi 'kpi na kakulu. A ago pila doto, a ngaziga ndu okpála hana.

10 Eli-e adu nani pila doto. Ebhe atsia abho ndu 'he hana ne di. La-a, okpála na pila doto tsia mbila ani de. 11 Eli-e ago nani bhú ká omaha e. Engú bini, omaha ani tsia sia ani de. 12 La-a, okpála koko asia ani, u atsia abhuka di

\* 1:1 1:1 Eli: Eli-e, a ko Yesu (tsia lukuluku 14). inde-e, a ko Djaa bhulu nabatisa okpála-o.

† 1:7 1:7 Okpála bhuka zi 'kpi ka ani: Ani

ani. Abhomu-o, ani atsia aha angu pi uo me u kolo ongisi gba Ebhe. <sup>13</sup> U kolo ongisi gba Ebhe li kpadji bhende maka u azuzu okpála na doto lie de. A ko la di ka gumu gba bhoko bini de. Engú bini, ayie ka Ebhe.

<sup>14</sup> Eli-e adjii lie, atsia akolo kpála. Ani adu nani bhú ká ní. Ní au sangu gba ani, sangu inde ani asia e ka 'Dyi e-o. A ko sangu gba koli Ndili bini, inde abedhe ne bádha bua di ne ngbili 'ngú .

<sup>15</sup> Djaa † akpokpo 'ngú pindji ani mbámhá. Ani atsia asula me: «Engú nani ma apa e me: 'Kpála inde ngago pita ma-a, ani ane ma mane. Padhá de, anga nani me ma nde nga ade-e, ani adu bha naae uu.» Ma apa nani engú angoo pindji ani.» <sup>16</sup> Abhomu-o, bhú bádha bua gba ani inde bedhe-e, ndu ní hana ní atsia asia bádha bua pi bádha bua koko. <sup>17</sup> Padhá de, anga ní asia líli sa 'kpa Moidje . La-a, bádha bua di ne ngbili 'ngú-o, ní asia ka Yesu Kilisito . <sup>18</sup> Kpála bini u Ebhe belegu de bini. La-a, koli Ndili bini inde di Ebhe, inde ngadu de 'Dyi e-e, asuno ani pi ní ngae.

*Djaa bhulu nabatisa okpála akpokpo 'ngú gba Masiya*

*(Tsia bhú Mat. 3:1-12; ne bhú Mlk. 1:1-8; di ne bhú Luk. 3:1-18.)*

<sup>19</sup> A inde-e engú li Djaa akpokpo e, nedhinga li ongámási gba omaYuda na Yelusalema atima odimande di ne okpála na piga gba Levi lie agba ani-o. U atima uo ngú nayi ani me: «Mu ne da?»

<sup>20</sup> Ani yala nagie engú tété de. Ani apa mbámhá me: «Ngama-a, ma ne Masiya ade.» <sup>21</sup> U atsia ayi ani me: «Mu la ne da? Mu ne Eliya?» Djaa agie me: «Ma ne ani ade.» U ayi ani me: «Mu ne polofeta inde ya ngadjেকে e?» Ani agie me:

«Ma ne polofeta ade.» <sup>22</sup> Abhomu-o, u atsia apa pi ani me: «Mu la naamu ne da? Padhá de, anga a ayo me ya gie engú tété pi okpála inde atima ya ko. Ngamu makpe-e, mu ngapa li 'ngú gba mu-o pi?»

<sup>23</sup> Djaa agie me:

«Ma ne kpála inde ngatotobhila bhú 'gu me,  
'Yi leke kpadji ngbingbili pi Ngámá.»

(A bhomu-o engú inde li polofeta Isaya apa nani e-o).†

<sup>24</sup> Okpála inde u atima o agba Djaa, a adu nani omuFalisai . <sup>25</sup> U ayi ani me: «Mu ne Masiya ade. Mu ne Eliya ade. Mu ne polofeta inde ya ngadjেকে e ade. Mu la ngabatisa okpála ngú ní?» <sup>26</sup> Djaa agie pi uo me: «Ngama-a, ma ngabatisa okpála ne engu. La-a, kpála bini bhú ká yi, inde yi mbila e de. <sup>27</sup> Ani ngago pita ma. Ma belegu ne tetele kpála ade ngubula me ma bhulu ekrú na maleke gba ani-o.»

<sup>28</sup> Engú bhomu-o akodho 'kpí bhú kuti na Betania, ayi 'ngu na Djuludani li bili inde li Djaa adu abatisa okpála li e-o.

*Yesu ne Ndili Kandole gba Ebhe*

<sup>29</sup> Li ekrú aseke lie, Djaa au Yesu me ani nde ngago li pápá inde ani adu li e-o. Ani atsia apa me: «Yi tsia nga Ndili Kandole gba Ebhe-o. Ani nga'e siti 'ngú pila doto ngae.

<sup>30</sup> Engú inde ma akpokpo e, ma akpokpo pindji ani, engú inde me: «Kpála bini ngago pita ma. La-a, ani ane ma mane. Padhá de, anga ani adu nani muma kalanu.»

<sup>31</sup> Ma du ambila ani de. Engú bini, ma ago nabatisa okpála ne engu, ngubula me Ebhe suno ani pi omafsalaele.» <sup>32</sup> Djaa akpokpo matá engú gba ani-e me: «Ma

† 1:15 1:15 Djaa: A ko Djaa bhende Bhulu nabatisa okpála-o. † 1:23 1:23 Tsia bhú Isa.

40:3. § 1:32 1:32 Bua: I du me u nde aye ne 'dhu balua na ngbéngbé-e (madjisikile), amba a ko Bu Bhobua.

au Buaŝ gba Ebhe-e ngayie ne abhúlá, maka bəbhə, atsia adu pí aní. <sup>33</sup> Ma dɛ ambila aní de. Engú bini, Ebhe inde atima ma ngú nabatisa okpála ne enguo, apa mɛma me: «Mo ou Bua gba Ebhe-e ngakə, i tsia dú pí kpála bini. A bhomɛ-o kpála inde abátisa okpála ne Bu Bhobua ko.» <sup>34</sup> Ngama-a, ma au, ma atsia akpokpo la di 'ngú mbámbá me kpála inde-e, a ko Ndili gba Ebhe!»

*Yesu a'i omukpata na gigena*

<sup>35</sup> Li ekpí aseke lie, Djaa adu ago matá oo bhú dabilí bini ne omukpata gba e bhisi. <sup>36</sup> Nedhinga aní au Yesu lie ngakodho 'kpí-e, aní atsia apa me: «Yi tsia nga Ndili Kandele gba Ebhe-o.» <sup>37</sup> Li omukpata gba aní bhisi-e adje aní lie ngapa 'ngú bhomɛ-o, u atsia akpata Yesu. <sup>38</sup> Yesu adji lie. Aní au me u adu akpata ni, aní atsia ayi uo me: «Yi ngagili ni?» U agie pí aní me: «Labi, mɛ ngadu su?» (Labi akunda napa me Mɛsuno.) <sup>39</sup> Yesu agie pí uo me: «Yi gógo amba yi u.» (A adu nani masakpe de saa na badha pita tulukpe.) U anɛ, u atsia au bilí inde aní adu nadu lí e ko. Li 'kpí ango-o, u atsia adulu ne uo bhú dabilí bini.

<sup>40</sup> Andili, ndai Simo Piele, nani ne suka omukpata bhisi inde adje engú li Djaa apa e-e, atsia akpata Yesu-o. <sup>41</sup> Andili abhaka ngaiza kalanɛ hana-a ndai e makpe Simo. Aní atsia apa pí aní me: «Ya au Masiya au.» (A akunda napa me Kilisito.) <sup>42</sup> Aní anɛ ne Simo agba Yesu. Yesu atsia aní, aní atsia apa me: «Ngamɛ-o, mɛ ne Simo, ndili gba Djaa . U adú a'i mɛ me Sefasi.» ('Hi ango-o akunda napa me Piele.)

*Yesu a'i Filipino*

<sup>43</sup> Li ekpí aseke lie, Yesu akunda nanɛ bhú ndu doto na Galilaya.

Aní abhaka Filipino, aní atsia apa pí aní me: «Kpata ma.» <sup>44</sup> (Filipo nani ne kpála na gudɛ na Betesaida, gudɛ inde li Andili ngauo ne Piele ayie bhú e-o.) <sup>45</sup> Pipita-a, Filipino abhaka Natanaele. Aní apa pí aní me: «Ya au kpála inde li Moidje aye nani engú gba e bhú bhuku na líli-o, li opolofeta akpokpo di nani engú gba e-o. A ko Yesu, ndili gba Djodjefɛ , kpála na gudɛ na Nadjaleta.» <sup>46</sup> Natanaele ayi aní me: «Ehe na ndjindji ti da nayie bhú kuti na Nadjaleta uu?» Filipino agie pí aní me: «Gogo, amba mɛ u.»

<sup>47</sup> Li Yesu au Natanaele lie ngago li pápá gba e, aní atsia apa lí 'ngú gba aní-e me: «Yi tsia nga kukulu mafsalaele inde. Pulu 'ngú bhú aní belegu ade bini.» <sup>48</sup> Natanaele ayi aní me: «Mo ombila ma lele pí?» Yesu agie pí aní me: «Ma au mɛ nedhinga mo odu lie sa ndula na figi , kala me Filipino 'i mɛ-o.» <sup>49</sup> Abhomɛ-o, Natanaele atsia apa pí aní me: «Labi, ngamɛ-o, mɛ ne Ndili gba Ebhe! Mɛ ne 'ngbé Ngámá gba omafsalaele!» <sup>50</sup> Yesu apa pí aní me: «Mo obhuka, anga ma apa pí mɛ me ma au mɛ sa ndula na figi? Mo ou ongú na ngbengbenge ane bhobhomɛ-o mane!» <sup>51</sup> Yesu atsia apa matá me: «Ma apa pí yi na paká me yi aú kokpí me a nde abhulu lie, oandjelu gba Ebhe-e nde nga'u, u nde di ngakə pí 'ndji ma, Ndili gba kpála!»

## 2

*Anokomia na kɛva bhú kuti na Kana*

<sup>1</sup> Abhomɛ-o, pita 'kpí bhisi-e, anokomia na kɛva adu bhú Kana, kuti bini na ndu doto na Galilaya. 'Hi Yesu adu oo. <sup>2</sup> U atsia a'i di Yesu ne omukpata gba e bhú anokomia ango-o. <sup>3</sup> Li vino andjia lie, 'hi Yesu atsia apa pí aní me:

«Vino matá ka uo ade.» <sup>4</sup> Engú bini, Yesu agie pi ani me: «'Hi ma, a ka ní ne mu ne ni? Nedhinga gba ma-a kolo nga de.» <sup>5</sup> Abhomu-o, 'hi ani atsia apa pi okpála na kulu-o me: «Yi mene ndu 'ngú hana inde ani apá e pi yi ko.»

<sup>6</sup> Ngbengbe madakpa inde u abho e li teme-e, adu oo madhia. OmaYuda vuvulu lio bhúbhú ngubula nakolo bubu kala Ebhe. Omadakpa ango-o bini ne bini ti da naha litele kámá bini. <sup>7</sup> Yesu apa pi okpála na kulu-o me: «Yi bebedhe omadakpa bhomu-o ne engu.» Okpála na kulu-o abebedhe omadakpa ne engu bedhe bedhe. <sup>8</sup> Abhomu-o, Yesu atsia apa pi uo me: «Mbia inde-e, yi sese, amba yi nu ha pi ngámá na anokomia-o.» U amene bhadi moko. <sup>9</sup> Li ngámá na anokomia ale engu-o lie, ani au me akolo vino. Ani du ambila bili inde ayie li e de. (La-a, okpála na kulu inde asene engu-o, adu ambimbila ngao.) Abhomu-o, ani a'i 'ko olo-o. <sup>10</sup> Ani apa pi ani me: «Ndu okpála hana haha ngaiza kalanu vino na babadha. I du la me u nde andji vino bhelé andji-e, u tsia há bhende babadha ade ko. La-a, ngamu-o, mo owo vino bhende na babadha-a akolo li nedhinga inde!»

<sup>11</sup> Abhomu-o gina ongu na ngangamba\* inde li Yesu amene e-o. Ani amene bhú Kana, kuti bini na ndu doto na Galilaya. Ani asuno sangu gba e-o, omukpata gba ani-e atsia abhuka ani. <sup>12</sup> Pipita-a, ani anu bhú gudhu na Kapalanauma bhú dabili bini ne 'hi e, ne ondaise e, di ne omukpata gba e-o. U mene la oo ekpi bhelé

de.

*Yesu atsambala okpála natsindji 'he bhú 'ngbé 'ti Ebhe gba omaYuda*

*(Tsia bhú Mat. 21:12-13; ne bhú Mlk. 11:15-17; di ne bhú Luk. 19:45-46.)*

<sup>13</sup> Anokomia na Pasika gba omaYuda akolo masikpe. Abhomu-o, Yesu atsia anu bhú gudhu na Yelusalema. <sup>14</sup> Oo, ani ali bhú 'ngbé 'ti Ebhe gba omaYuda-o. Ani abhaka me okpála ngatsindji obagala, ne okandole, di ne obobhe. Ani atsia abhaka di me okpála nayipa falanga nde adulu.† <sup>15</sup> Abhomu-o, Yesu amene fimbo li kute ekpu. Ani apandja ndu uo hana bhú 'ngbé 'ti Ebhe gba omaYuda-a kilidjo, bhú dabili bini ne okandole, di ne obagala gba o-o. Ani agu 'i dabili gba okpála nayipa falanga kuto. Ani atsia abala di falanga gba uo-o. <sup>16</sup> Ani atsia apa pi okpála inde adu natsindji obobhe-o me: «Yi 'e ehe inde-e si ma'e! Yi adji eti gba 'Dyi ma-a eti natsindji 'he de!» <sup>17</sup> Omukpata gba ani-e atsia abhundja engú inde u aye e bhú Bhuku gba Ebhe-e me: «Mukunda inde ma nde ne e ngubula eti gba mu-o, atsulu ma maka djua!†»

<sup>18</sup> Abhomu-o, omaYuda ayi ani me: «Mo oméne pi ya mangua ngamba 'ngú dho inde asuno me, mu ne angu namene mo-o?» <sup>19</sup> Yesu agie pi uo me: «Yi bhele 'ngbé 'ti Ebhe gba omaYuda inde, sunda 'kpi bata-a, ma tsia yiki matá.» <sup>20</sup> OmaYuda ayi ani me: «A ayo nani kalanga ndjikpa badha ne ká madhia, ngú nayiki 'ngbé 'ti Ebhe gba omaYuda inde! La

\* **2:11** 2:11 Ongú na ngangamba: Bhú Bádha Ngali gba Yesu Kilisito maka li Djaa aye lie, mo obháka ongamba 'ngú mananika inde asuno okulu gba Yesu-o. Bhú obhuku koko u aye me «Okulu», bhú okoko u aye me «Ehe inde ngasuno ehe koko, i da di-e engú koko» (sinye). Tsia bhú Dja. 4:43-54, 5:1-16, 6:1-21. † **2:14** 2:14 OmaYuda inde adu ayie bhú okuti koko adu ngaiza nayipa falanga gba o-o. Pipita-a, u tsia ti la da nakala enu ngú nahaha pi Ebhe di ne nadi epo na 'ngbé 'ti Ebhe gba omaYuda-o. † **2:17** 2:17 Tsia bhú Ets. 69:10.

ngamũ-o, mũ tsia yíki sũnda 'kpí bata?»

<sup>21</sup> Engú bini, 'ngbé 'ti Ebhe inde li Yesu adũ apa 'ngú e, adũ kute ani. <sup>22</sup> Kaka-a, li Yesu azuku lie, omũkpata gba ani-e atsia abhundja engú nani ani apa e-o. Abhomũ-o, u atsia abhuka engú inde u aye e bhú Bhuku gba Ebhe, di ne bhende nani li Yesu apa e ko.

*Yesu mbila bua ndũ okpála hana*

<sup>23</sup> Li Yesu adũ lie bhú gudhũ na Yelusalema ngũbula anokomia na Pasika-a, okpála bhelé au ongú na ngangamba inde ani adũ amene e-o. Abhomũ-o, u atsia abhuka ani. <sup>24</sup> Engú bini, ngaani makpe, ani ziba uo de. Padhá de, anga ani adũ ambila ndũ uo hana ndjindji. <sup>25</sup> Ani ne gumũ nayi kpála bini li 'ngú pindji kpálakuti ade. Padhá de, anga ngaani makpe, ani adũ ambila engú inde bhú kpála ndjindji.

### 3

*Yesu ngauo ne Nikodemũ*

<sup>1</sup> Kpála bini adũ nani bhú ká omũFalisai . A adũ 'li ani me Nikodemũ. Ani adũ nani suka ongámási gba omaYuda . <sup>2</sup> Ani anũ abhaka Yesu sukpe, ani atsia apa pi ani me: «Mũsuno, ya ambila me Ebhe atima mũ ngae, ngú nasuno 'ngú pi ya. Padhá de, anga kpála bini ti da namene ongamba 'ngú , maka mũ ngamemene lie inde-e de, i dũ me Ebhe nde bhú dabili bini ne ani ade ko.» <sup>3</sup> Yesu agie pi ani me: «Ma apa pi mũ na paká me, kpála bini ti da nau Nau gba Ebhe-e de, i dũ me u nde zu ani ne toto de ko.» <sup>4</sup> Nikodemũ ayi ani me: «Lele pi, u ti da nazu gbé kpála lie ne toto-o? Ani ti da nagie lie bhú 'bu 'hi e, li 'hi ani tsia zú ani ne toto?»

<sup>5</sup> Yesu agie pi ani me: «Ma apa pi mũ na paká me, kpála bini ti da nali bhú Nau gba Ebhe-e de, i dũ me ani nde sia nazu li kpadji na engu di ne li kpadji na Bua de ko. <sup>6</sup> Bhende azu lie bhú kute-e, a ko kute. Bhende azu lie bhú Bhobua-a , a ko bua. <sup>7</sup> Mo ongamba de ka ma apa lie pi mũ me: «A ayo me u zu ndũ yi hana ne toto.» <sup>8</sup> Anvi ngape li pápá akunda nape li e. Mũ ngadje gigili. Engú bini, mũ mbila bili li anvi ango-o ayie li e de. Mũ mbila la di pápá adji li e de. A bhadi moko pi ndũ obhende hana asia nazu li kpadji na Bua.»

<sup>9</sup> Abhomũ-o, Nikodemũ ayi Yesu me: «Engú ango-o ti da namene lie lele pi?» <sup>10</sup> Yesu atsia agie pi ani me: «Ngamũ-o, mũ ne suka ongbengbe omũsuno na Isalaele. Engú la bini, mũ mbila engú ango-o de! <sup>11</sup> Ma apa pi mũ na paká me: ya ngapa engú inde ya ambila e. Ya la di ngakpokpo 'ngú pindji bhende ya au e ne djila ya. Engú la bini, yi bhuka engú inde ya akpokpo e pi yi-e de. <sup>12</sup> Ma ngakpokpo 'ngú pi yi pindji 'ngú na píla doto. Engú bini, yi bhuka de. I dũ la me, ma nde akpokpo 'ngú pi yi pindji 'ngú na abhúlá-a, yi tsia bhúka? <sup>13</sup> Padhá de, anga kpála bini ade inde akolo nga abhúlá, bha bini ngama, Ndili gba kpála inde ayie oo-o!

<sup>14</sup> Maka li Moidje a'e'e nani kulu kpulũ lie li ndula abhú 'gũ-o, a ayo bhadi me ngama, Ndili gba kpála-a, u 'e'e bhadi ma moko.\* <sup>15</sup> U 'e'e ma, amba kpála ne kpála inde abhuka ma-a, ani sia mukobho na dũdũma. <sup>16</sup> Padhá de, anga Ebhe akũnda okpála na píla doto naali. Kaka-a, ani atima koli Ndili gba e bini-e ngũbula me kpála ne kpála inde abhuka ani-e, ani akpí-i de. Engú bini, ani sia mukobho

\* **3:14** 3:14 Yesu ngapa bhomũ-o engú nakpi ka e li kulusi di ne nagie lie ka e agba Ebhe.

na duduṃa. <sup>17</sup> La-a, Ebhe tima nani Ndili gba e ngú nakodho 'ngú gba okpála na p̄la doto de. Engú bini, ani atima ani ngubula me, okpála na p̄la doto kobho ka ani. <sup>18</sup> Kpála ne kpála inde abhuka ani-e, mangimbo pí ani ade. Engú la bini, kpála inde i bhuka de-e, u a'o mangimbo pí ani bhutode. Padhá de, anga ani bhuka koli Ndili bini gba Ebhe-e de.

<sup>19</sup> Ta mangimbo ango-o me: zi 'kpí ago p̄la doto, engú la bini, okpála na p̄la doto akunda mangbo biti ane zi 'kpí, ka siti 'ngú inde u ngamene e-o. <sup>20</sup> Ndu kpála hana inde ngamene siti 'ngú-o, yala zi 'kpí mayala. Ani gó di li bili li zi 'kpí nde li e de. Padhá de, anga ani ngakpe me osisiti 'ngú gba ni-e akoto mbámbá li zi 'kpí de. <sup>21</sup> Engú la bini, ndu kpála hana inde ngamene ngbili 'ngú, ngago li bili li zi 'kpí nde li e-o. Ani ngamene mo-o ngubula me u u mbámbá me okulu ni ngamene e, a amene lie maka li Ebhe aziba lie ko.»

### *Yesu ngauo ne Djaa*

<sup>22</sup> Pita 'ngú ango-o, Yesu ngauo ne omukpata gba e anu bhú ndu doto na Yudaya. Oo, ani adu ne uo ngubula mbo nedhinga bedi. Ani atsia adu abatisa okpála. <sup>23</sup> Djaa atsia adu di nabatisa okpála bhú 'ngu na Enona, de bili na Salime, anga engu adu li bili ango-o naali. Okpála adu ago abhaka ani, ani atsia adu abatisa uo. <sup>24</sup> (Li nedhinga bhomu-o, a abhaka me u nde bhike nga Djaa bhú tikpu de.)

<sup>25</sup> Abhomu-o, bhú ká omukpata gba Djaa, okoko aholo nabi bhayiki ne maYuda bini, pindji 'ngú navalu lie ngú nakolo ka e bubu, maka li líli apa lie-o. <sup>26</sup> U anu abhaka Djaa, u atsia apa pí ani me: «Musuno, kpála

nako yi adu ne e ayi 'ngu na Djaluḁani-e, di mo okpokpo 'ngú gba e-e, tsia nga mbia inde-e, ani ngabatisa okpála. Okpála bhelé nganu abhaka ani.»

<sup>27</sup> Djaa agie pí uo me: «Kpála bini ti da nasia 'he belegu de bini, i du me Ebhe nde ha pí ani ngae de ko. <sup>28</sup> Ngayi makpe, yi ti da napapa li ma ngayi me, ma apa nako me: «Ngama-a, ma ne Masiya ade. Engú la bini, ma ne kpála inde u atima e pí ani kalanu.» <sup>29</sup> Bhuḁu eḁ-o, a ko 'ko eḁ-o. Oḁia bhoko-o alu de ani, ani ngadje ani. Ani ngakpi djali naali ka ani ngadje 'li 'ko eḁ-o lie-o. A ko di djali gba ma-o, djali ango-o mbia inde-e libhomu. <sup>30</sup> A ayo me u 'e'e ani ne abhúálá, amba ngama-a, ma kḁ naama ne kuto.»

### *Kpála inde ayie abhúálá-a ane ndu okpála hana*

<sup>31</sup> «Kpála inde ayie abhúálá ane ndu okpála hana. Kpála inde ayie p̄la doto-o, a ko kpála na p̄la doto. Ani ngakpokpo 'ngú na p̄la doto. Kpála inde ayie abhúálá-a ane ndu okpála hana. <sup>32</sup> Ani ngakpokpo 'ngú pindji engú inde ani au e, di ne bhende ani adje e-o. La-a, kpála bini ziba engú inde ani ngakpokpo e de. <sup>33</sup> Kpála inde aziba engú inde ani ngakpokpo e abhuka me Ebhe ngapa kukulu 'ngú. <sup>34</sup> Kpála inde li Ebhe atima e, ngakpokpo eli gba Ebhe. Padhá de, anga Ebhe abedhe ani ne Bua gba e bedhe. <sup>35</sup> 'Dyi Ndili-e, akunda Ndili na bhobhoko gba e-o. Ani a'o ndu 'he hana sa 'kpa ani. <sup>36</sup> Kpála inde abhuka Ndili-e, asia mukobho na duduṃa. La-a, kpála inde i bhuka Ndili-e de-e, sia mukobho ango-o de. Engú bini, ke 'ngú gba Ebhe-e adú pí ani.»

## 4

*Yesu ngauo ne ɛlɛ bini na ndu doto na Samalia*

<sup>1-3</sup> Abhomu-o, omuFalisai adje me okpála bhelé ngakpata Yesu, di ne me ani ngabatisa okpála bhelé ane Djaa . (A na paká me Yesu du nani naae nabatisa okpála de. Omukpata gba ani-e adu mangbo nabatisa okpála ngao.) Li Yesu adje lie mo-o, ani ayie bhú ndu doto na Yudaya, ani atsia agie lie bhú ndu doto na Galilaya, <sup>4</sup> ngú nanu oo. Padhá de, anga a ayo me ani pu bhú ndu doto na Samalia.

<sup>5</sup> Ani akolo bhú gudhu bini na Samalia. A adu 'li gudhu ango-o me Sikale, dengo ndu doto inde nani li Yakobho aha e pi ndili gba e Djodjefu-o . <sup>6</sup> Li dabili ango-o, kpongu gba Yakobho adu oo. Li Yesu andala lie ka dhuku-o, ani atsia adu dengo kpongu ango-o kuto. A adu masakpe de tulukpe.

<sup>7</sup> Ɖlɛ bini na Samalia ago ngú nase 'ngu. Abhomu-o, Yesu atsia apa pi ani me: «Ha mbo engu nandji mandji mu ma.» <sup>8</sup> (A abhaka me omukpata gba ani-e nde agbida bhú gudhu, ngú nakala ezu nazu mazu.) <sup>9</sup> Abhomu-o, ɛlɛ-o apa pi Yesu me: «Mu ne maYuda. Ngama-a, ma ne kpála na Samalia. Lele pi mu ti da nayo engu nandji mandji lie ka ma?» (Padhá de, anga omaYuda djedje lio ne omuSamalia de.)

<sup>10</sup> Yesu agie pi ani me: «I dú me mu mbila makalá gba Ebhe-e uo, i dú la di me mu mbila kpála inde apa pi mu me: «Ha mbo engu nandji mandji mu ma uo», mu de ayo mangbo engu ka ani ngamu. Ani de ahá engu na mukobho pi mu.» <sup>11</sup> Ɖlɛ ango-o agie pi ani me: «Ngámá, ehe ngú nase engu-o ne di ka mu ade. 'Du 'ngu-o la di tsutsu. Mo oyie ne engu na mukobho-o su? <sup>12</sup> Ogbi ya Yakobho aha kpongu

inde-e pi ya ngae. Ngaani makpe, ani andji engu inde-e bhú dabili bini ne ongisi di ne onu gba e-o. Mo obhondja naamu me mu ngbéngbé ane ani?»

<sup>13</sup> Yesu agie pi ani me: «Kpála inde andji engu inde-e, ani adjé matá gumu 'ngu madje. <sup>14</sup> Engú bini, kpála inde andji engu inde ma ahá e pi ani-e, ani djé matá gumu 'ngu belegu de bini. La-a, engu inde ma ahá e pi ani-e, akólo bhú ani kpongu na mukobho na duduma.» <sup>15</sup> Ɖlɛ ango-o apa pi ani me: «Ngámá, ha mbo engu ango-o mu ma, amba ma adjé matá gumu 'ngu de. Ma agó la di matá nase engu inde-e de.»

<sup>16</sup> Yesu apa pi ani me: «Nu 'i 'ko mu, amba mu gie matá limu ei.» <sup>17</sup> Ani agie pi Yesu me: «Bhoko ka ma ade.» Yesu atsia apa pi ani me: «Mo opa ndjindji me bhoko ka mu ade ko. <sup>18</sup> Padhá de, anga mo odu nako ne obhosi bhuluvue. Bhoko bhende yi nde ne e mbia inde-e, a ko la di 'ko mu de. Mo opa kukulu 'ngú.»

<sup>19</sup> Abhomu-o, ɛlɛ ango-o apa pi Yesu me: «Ngámá, ma au me mu ne polofeta . <sup>20</sup> Onguo ogbi ya, okpála na ndu doto na Samalia-a, adhogè Ebhe pi eta inde. Engú bini, ngayi omaYuda-a, yi ngapa me gudhu na Yelusalema ne bili inde a ayo lie me u dhogè Ebhe-o.»

<sup>21</sup> Yesu atsia agie pi ani me: «Ɖlɛ-e, bhuka 'li ma. Nedhinga ngago, nedhinga inde yi dhogè 'Dyi ní lie pi eta inde-e de. Yi dhogè la di ani lie bhú gudhu na Yelusalema de. <sup>22</sup> Ngayi okpála na ndu doto na Samalia-a, yi ngadhogè Ebhe inde yi mbila e de. Engú bini, ngaya-a, ya ngadhogè Ebhe inde ya ambila e. Padhá de, anga mukobho ago ne li pápá gba omaYuda. <sup>23</sup> Engú bini, nedhinga ngago, nedhinga ango-o belegu



akolo, nedhinga inde li okukulu okpála nadhøge 'Dyi ní adhøge ani lie bhú Bu Bhobua , di ne bhú kukulu 'ngú-o. Padhá de, anga a bhomu-o okukulu okpála nadhøge 'Dyi ní inde ani nde ne gumu o-o. <sup>24</sup> Ebhe ne Bua. Kaka-a, a ayo me okpála inde ngadhøge ani-e, dhøge ani bhú Bua di ne bhú kukulu 'ngú.» <sup>25</sup> Ølø-o apa pi Yesu me: «Ma ambila me Masiya ('ili ango-o akunda napa me Kilisito) agó mago. Li ani agó lie-e, ani tsia bhúlu ndu 'ngú hana pi ya mbámbá.» <sup>26</sup> Yesu agie pi ani me: «Ngama kpála inde ngakpokpo 'ngú pi mu mbia inde-e, ma ne ani.»

<sup>27</sup> Li nedhinga bhomu-o, omukpata gba Yesu-o agie lio. U angamba naali ngú nau ani me ani nde ngagama 'ngú ne ølø. Engú bini, saka uo bini yi ani de me: «Mu ngagili ni?» di ne me: «Mu ngagama 'ngú ne ani ngú ni?»

<sup>28</sup> Abhomu-o, ølø ango-o a'o ká lusa 'ngu gba e-o. Ani agie lie abhú gudhu. Ani atsia apa pi okpála me: <sup>29</sup> «Yi gógo, yi u kpála inde akpokpo ndu 'ngú hana inde ma amene e muma. A ko ndi Masiya di?» <sup>30</sup> Abhomu-o, u aze bhú gudhu-o, u atsia agbida nabhaka Yesu.

<sup>31</sup> Bhú nedhinga bhomu-o, omukpata gba Yesu-o adu atu ani me ani zu 'he. U adu apa pi ani me: «Musuno, zu nga mbo 'he!»

<sup>32</sup> Engú bini, ani agie pi uo me: «A ka ma ne ehe nazu mazú inde yi mbila 'ngú li e de.» <sup>33</sup> Abhomu-o, omukpata-a ayi lio sunda o me: «Kpála bini ago ndi pi ani ne ehe nazú mazú adi?»

<sup>34</sup> Yesu apa pi uo me: «Ezu gba ma-a, a ko namene gumu gba kpála inde atima ma-o, di ne nandjia kulu inde ani aha e muma-o. <sup>35</sup> Ngayi-e, yi papa me: «A atigala matá epe badha

ngubula na'e nguwa abhiye.» La ngama-a, ma apa pi yi me, yi tsia nga oedyi-e ndjindji. Padhá de, anga nguwa abhele, a akolo bedhe ngubula na'e'e abhiye! <sup>36</sup> Kpála inde ngagbe nguwa abhiye-e ngasia makalá gba e-o. Ani ngapo bhúla nguwa-a ngubula mukobho na duduma. Kaka-a, kpála nalu nguwa, ne kpála inde nga'e'e abhiye-e, ngakpi djali bhú dabili bini. <sup>37</sup> Padhá de, anga a ko kukulu 'ngú, engú inde u apa e bhú gbitaku me: «Kpála koko ngalu nguwa-o, li kpála koko tsia 'é abhiye.» <sup>38</sup> Ngama-a, ma atima yi na'e nguwa bhiye inde yi ndala bhú e de. Okpála koko andala bhúbhú, yi la ngasia bádha 'ngú li kulu gba uo-o.»

<sup>39</sup> Abhomu-o, okpála bhelé na gudhu na Samalia bhomu-o abhuka Yesu ka eli inde li ølø-o akpokpo e me: «Ani akpokpo ndu 'ngú hana inde ma amene e muma.» <sup>40</sup> Kaka-a, li okpála na gudhu na Samalia akolo lie de Yesu-o, u ayo ka ani me ani du mbo gba o oo. Abhomu-o, Yesu atsia amene oo ekpi bhisi. <sup>41</sup> Okpála bhelé naali abhuka matá ka eli inde li Yesu apa e-o. <sup>42</sup> U atsia apa pi ølø-o me: «Mbia inde-e, ya bhuka bha bini ka engú mo okpokpo e de. Engú bini, ya abhuka anga ngaya makpe-e, ya adje ani. Ya atsia ambila na paká me a ko Mukobho gba okpála na píla doto.»

*Yesu akobho ndili na bhobhoko gba 'ngbé kpála bini*

<sup>43</sup> Pita 'kpi bhisi li Yesu amene e oo, ani ayie oo, ani atsia anu bhú ndu doto na Galilaya. <sup>44</sup> Ngaani makpe-e, ani apa nani me: «Polofeta inde u amanga e bhú doto gba e belegu ade bini.» <sup>45</sup> Li ani akolo lie bhú ndu doto na Galilaya-a, okpála inde oo asia ani ndjindji. Padhá de, anga u au

ndu 'ngú hana inde li ani amene e li nedhinga na anokomia bhú gũdhu na Yelusalema-o, anga u adu di oo.

<sup>46</sup> Pipita-a, Yesu agie lie bhú kuti na Kana, bhú ndu doto na Galilaya. A bhomu-o bili inde ani adji nani engu li e, atsia akolo vino-o. 'Ngbé kpála bini na Lita adu oo. Adu li ndili gba ani na bhobhoko-o ne kuo, bhú kuti na Kapalanauma. <sup>47</sup> Li kpála angoo adje lie me Yesu ayie bhú ndu doto na Yudaya, ani akolo bhú ndu doto na Galilaya-a, ani anu abhaka ani. Ani atsia akikiliki lie pi ani me ani nu bhú kuti na Kapalanauma, amba ani kobho ndili gba ni na bhobhoko-o. Padhá de, anga ndili angoo adu masakpe de nakpi.

<sup>48</sup> Abhomu-o, Yesu atsia apa pi ani me: «I du me yi nde u ongamba 'ngú, di ne okiaka 'ngú de-e, a na paká me yi ti da nabhubhuka del!» <sup>49</sup> 'Ngbé kpála na Lita-a apa pi ani me: «Ngámá, kala me ndili-e kodho bua e, gogo.» <sup>50</sup> Yesu apa pi ani me: «Gie limu agba ma, ndili gba mu-o akobho!» Kpála angoo abhuka engú inde li Yesu apa e pi ani-o. Ani atsia atapa. <sup>51</sup> Nedhinga ani adu anu lie-e, okpála na kulu gba ani-e ago aké lio ne ani li kpadji. U apa pi ani me: «Ndili gba mu-o akobho!» <sup>52</sup> Ani atsia ayi uo li nedhinga li ndili-e akolo lie ndjindji-o. U apa pi ani me: «Bandji-e ayie li ani lili bhú saa na bini, pita tulukpe.» <sup>53</sup> Abhomu-o, 'dyi ndili-e atsia ambila me, a ko saa inde li Yesu apa pi ani lie me: «Ndili gba mu-o akobho-o.» Nayie li nedhinga bhomu-o, ngaani makpe-e, ani abhuka, di ne piga gba e libhomu.

<sup>54</sup> A bhomu-o ngamba 'ngú na bhisi li Yesu amene e, pita ani ayie lie bhú ndu doto na Yudaya,

ani atsia agie lie bhú ndu doto na Galilaya ko.

## 5

*Yesu akobho kpála inde agugumu kuto*

<sup>1</sup> Pita ongu akodho 'kpi-e, anokomia bini gba omaYuda ati. Abhomu-o, Yesu atsia anu bhú gũdhu na Yelusalema. <sup>2</sup> Bhú gũdhu oo, de bhoti inde u a'i e me bhoti gba Okandelo-o, 'dú 'ngu bini navulu kute adu oo. A adu 'li 'li bhú eli na Ebele me Betedjata. Djedje 'he maka 'ti ngbangbali adu dede bhuluvue. <sup>3</sup> Obhulu kuo bhelé adu me u nde asili kuto sasa. A adu nani okpála inde i u 'kpi de, ne okpála inde ne eze li 'dhu o, di ne okpála na bhuku kute. [U adu adjeke me engu-o dimba. <sup>4</sup> Padhá de, anga li onedhinga koko-o, andjelu bini gba Ngámá-a adu aké bhú 'ngu-o, engu-o atsia adu adimba. Kpála na kuo inde adu aké bhúbhú kalanu-o, adu nakobho. Belegu li kuo du bha nani pi-ie.]

<sup>5</sup> Bhoko bini adu oo, ani asi nani ne kuo kalanga ndjikpa bata ne ká madjina. <sup>6</sup> Li Yesu au ani lie asi kuto-o, ani ambila di lie me ani asi ne kuo 'kpi bhelé-e, ani atsia ayi ani me: «Mo okunda nakobho?» <sup>7</sup> Kpála na kuo angoo agie pi ani me: «Ngámá, kpála ka ma ade ngubula me ani kó ma bhú 'ngu-o, li nedhinga inde i ngadimba lie-o. Ma le me ma nu me-e, li kpála koko kodho 'kpi kala ma.» <sup>8</sup> Yesu apa pi ani me: «Yie bhúlá, ha tsala gba mu-o, nunu.» <sup>9</sup> Kolo má gala me-e, kpála na kuo-o akobho. Ani aha tsala gba e-o, ani atsia aholo nadhuku.

La-a, adu nani li 'kpi naguo gba omaYuda-o. <sup>10</sup> Abhomu-o, omaYuda apa pi kpála inde akobho-o me: «A ko 'kpi naguo. A ayo de me mu bi tsala gba mu-o de.» <sup>11</sup> Ani agie pi uo me: «Kpála

inde akobho ma-a, apa muma me: «Ha tsala gba mu-o, nunu.»<sup>12</sup> U ayi ani me: «A mo kpála bhedho inde apa pi mu me: «Ha tsala gba mu-o nunu?»»<sup>13</sup> Engú bini, kpála inde akobho-o mbila de me a ko da. Padhá de, anga adu me Yesu nde angita bhú ká okpála inde adu li bili ang-o angita.

<sup>14</sup> Pipita-a, Yesu abhaka ani bhú 'ngbé 'ti Ebhe gba omaYuda-o. Yesu apa pi ani me: «Tsitsia nga, mo okobho. Mo oméne matá siti 'ngú de, amba engú inde ane ne siti-e, akólo li kute mu de.»<sup>15</sup> Kpála ang-o anu napa pi omaYuda me Yesu akobho ni ngae. <sup>16</sup> Kaka-a, omaYuda aholo nadje siti bua pindji Yesu. Padhá de, anga ani amene nani engú ang-o bhú 'kpí naguo. <sup>17</sup> Engú bini, Yesu agie pi uo me: «Maka li 'Dyi ma ngamene kulu lie nakolo pi mbia inde-e, Ngama di-e, ma ngamemene moko.»<sup>18</sup> Kaka-a, omaYuda adu agili matá ne kekele ngú nabhelo ani. Padhá de, anga ani gumu bha bini líli na 'kpí naguo de, engú bini, ani adu apa lie me Ebhe ne 'Dyi ni-e, ani adu ale lie bhomu-o li Ebhe.

*Ebhe aha ndu 'ngú gba e hana pi Ndili gba e-o*

<sup>19</sup> Abhomu-o, Yesu apa matá pi uo me: «A moko, ma apa pi yi na paká me ngama Ndili-e, ma ti da namene 'he bini bhú ngu ma de, bha bini bhende ma au me 'Dyi ma ngamene e-o. Padhá de, anga ehe inde li 'Dyi ma ngamene e, ngama Ndili-e, ma ngamemene bhadi moko. <sup>20</sup> 'Dyi ma kunda ma, Ndili gba e-o. Ani ngasuno ndu 'ngú hana inde ngaani makpe ani ngamene e muma, Ndili gba e-o. Ani asuno muma, Ndili gba e, okulu na ngbengbenge inde ane obhende-e mane. Yi tsia ngamba tété. <sup>21</sup> Padhá de, anga maka li 'Dyi ma ngazuku

okpála inde amu-o lie, ani la di ngaha mukobho pi uo-o, ngama, Ndili gba ani-e, ma ngaha bhadi mukobho moko pi kpála inde ma akunda nahaha pi e ko. <sup>22</sup> 'Dyi ma kodho 'ngú gba kpála bini de. Engú bini, ani aha nakodho 'ngú hana muma, Ndili gba e, <sup>23</sup> ngubula me ndu okpála hana du namanga ma, Ndili gba ani, maka u ngamanga ani 'Dyi ma lie ko. Kpála inde i manga ma, Ndili-e de-e, ani manga di 'Dyi ma inde atima ma-a de.

<sup>24</sup> A moko, ma apa pi yi na paká me kpála inde adje 'li ma-a, inde abhuka la di kpála inde atima ma-a, kpála ang-o asia mukobho na duduma. U 'ó mangimbo pi kpála ang-o de. Engú bini, ani ayie bhú kuo, ani atsia akodho 'kpí bhú mukobho. <sup>25</sup> A moko, ma apa pi yi na paká me nedhinga ngago, mbia inde-e, nedhinga ang-o belegu akolo, nedhinga li okpála inde amu-o, adjé 'li Ndili gba kpála-a lie-o. Abhomu-o, okpála inde adjé-e, u tsia kóbho.

<sup>26</sup> Padhá de, anga maka li 'Dyi ma nde lie ne angu ngubula naha mukobho-o, ani aha bhadi angu muma, Ndili gba e moko ngubula me ma du naha mukobho. <sup>27</sup> Ani atsia aha la di angu muma, Ndili gba e, ngú nakodho 'ngú gba okpála, anga ma ne Ndili gba kpála. <sup>28</sup> Yi angamba tété de. Padhá de, anga nedhinga ngago. Bhú nedhinga ang-o, ndu okpála hana inde bhú lata-a, adjé 'li Ndili gba kpála-o. <sup>29</sup> Abhomu-o, u tsia zé. Okpála bhende amene bádha 'ngú-o, azúku ngubula nasia mukobho. Engú bini, okpála bhende amene siti 'ngú-o, azúku ngubula nasia mangimbo.»

*Yesu bha bini ngamene gumu gba 'Dyi e*

<sup>30</sup> Ngama-a, ma ti da namene 'he bini bhú ngu ma de. Ma ngakodho 'ngú maka li kpála atima ma-a ngapapa muma lie ko. Kaka-a, nakodho 'ngú gba ma-a ngbing-bili. Padhá de, anga ma gili namene gumu gba ma-a de. Engú bini, ma ngagili mangbo namene gumu gba kpála inde atima ma ko. <sup>31</sup> I dú me ma du akpokpo 'ngú inde a atsia ma-a, engú angoo de dú kukulu 'ngú de. <sup>32</sup> Engú bini, kpála koko ngakpokpo 'ngú gba ma-a ngae. Ma ambila me engú gba ma inde ani ngakpokpo e, a ko kukulu 'ngú. <sup>33</sup> Ngayi-e, yi atima okpála agba Djaa, ani atsia akpokpo kukulu 'ngú. <sup>34</sup> Ngama-a, ma ne gumu kpála ngu nakpokpo 'ngú gba ma-a ade. La-a, ma ngapapa mo-o ngubula me yi sia makobho.

<sup>35</sup> Djaa nani maka eke inde u adhedhe e, inde ngatsi matsi. Ngayi-e, yi atsia akunda nani nakpi djali ngubula mbo nedhinga bedi li zi 'ke gba ani-o. <sup>36</sup> Engú bini, engú gba ma inde u ngakpokpo e, ane bhende gba Djaa mane. A ko bhende na kulu inde li 'Dyi ma apa me ma mene e-o. A moko, kulu inde ma ngamene e ngasuno me 'Dyi ma atima ma ngae. <sup>37</sup> 'Dyi ma inde atima ma-a, akpokpo di engú gba ma-a ngae. La-a, yi dje nga 'li ani belegu de bini, yi u nga la di ani de. <sup>38</sup> Eli gba ani-e ngadu bhú yi ade. Padhá de, anga yi ayala nabhuka kpála inde ani atima e-o. <sup>39</sup> Yi ngadjipi 'ngú pindji Bhuku gba Ebhe-e ndjindji, anga yi ngabhundja me yi asia mukobho na duduma bhúbhú. A la bhomu-o Bhuku inde ngakpokpo 'ngú gba ma-o! <sup>40</sup> Abana mo-o, yi kunda nago abhaka ma ngu nasia mukobho angoo de.

<sup>41</sup> «Ma gili de me okpála dhego ma-a de. <sup>42</sup> Engú bini, ma mbila

yi ndjindji. Ma ambila me yi ne mukunda pi Ebhe ade. <sup>43</sup> 'Dyi ma atima ma ngae. La-a, yi sia ma de. I du la me kpála koko nde ago bhú ngu e, yi tsia sia ani! <sup>44</sup> Yi ngatoko liyi sunda yi. Yi gili de me Ebhe toko bha yi ngae de. Lele pi yi ti da nabhuka ma lie? <sup>45</sup> Yi abhúndja de me ma a'ó yi bhú mangimbo kala 'Dyi ma ngama-a de. Kpála bhende a'ó yi bhú mangimbo-o, a ko Moidje inde yi a'o 'to yi 'to e ko. <sup>46</sup> I dú me yi bhúka Moidje kukulu-o, yi de abhúka di ma mabhuka. Padhá de, anga Moidje aye nani engú gba ma-o. <sup>47</sup> Engú bini, i du me yi nde bhuka engú inde ani aye e de-e, yi abhúka la 'li ma lele pi?»

## 6

*Yesu aha ezu pi obhosi kutu bhuluvue*

*(Tsia bhú Mat. 14:13-21; ne bhú Mlk. 6:30-44; di ne bhú Luk. 9:10-17.)*

<sup>1</sup> Pipita-a, Yesu akodho 'kpí li pápá koko na ekpe na Galilaya, inde u a'i di-e me ekpe na Tibeli-ade. <sup>2</sup> Bhiti okpála na bhibhiti adu akpata ani. Padhá de, anga u adu au ongamba 'ngú inde ani adu amene e li nakobho okpála na kuo-o. <sup>3</sup> Yesu atsia a'u apí 'ta. Oo, u atsia adulu ne omukpata gba e kuto. <sup>4</sup> A adu me anokomia na Pasika gba omaYuda nde akolo masikpe.

<sup>5</sup> Abhomu-o, Yesu atsia 'kpí, ani au bhiti okpála na bhibhiti ngago abhaka ani. Ani atsia ayi Filipino me: «Ní ti da nakala mapa su ngubula me okpála inde-e hana zu-o?» <sup>6</sup> (Yesu adu apa mo-o ngubula nale Filipino. Padhá de, anga ngaani Yesu-o, ani adu ambila engú inde ani améne e ndjindji.) <sup>7</sup> Filipino atsia agie pi ani me: «Abana ya kala mapa ne lí denalio kámá bhisi-e, alé de

me kpála ne kpála sia mbo-o de.»  
 8 Suka omukpata gba ani koko-o, Andili ndai Simo Piele, apa pi ani me: 9 «Ndili na bhobhoko bini si-i, a ka ani ne mapa na olodje\* bhuluvue di ne sungu bhisi. A la bhomu-o ni pi bhiti okpála inde-e?»

10 Do Yesu de-e: «Yi pa pi okpála me u dulú kuto.» (Ulu adu li bili ango-o naali.) Okpála atsia adulu kuto. Obhosi adu masikpe de kutu bhuluvue. 11 Abhomu-o, Yesu aha mapa-o. Ani atsia agie heni pi Ebhe. Ani atsia agapa li okpála inde adu oo-o. Ani aha bhadi sungu-o pi uo moko li lele maka u adu akukunda lie ko. 12 Li okpála a'u'u lie, Yesu atsia apa pi omukpata gba e me: «Yi po bhúla dudu inde atigala-o, ngubula me asiti de.» 13 Dú mapa na olodje bhuluvue inde atigala-a, u apo bhúbhúla. A atsia abebedhe okili ndjikpa ne ká bhisi.

14 Li okpála au ngamba 'ngú inde li Yesu amene e lie, u atsia apa me: «A inde-e bha ndju polofeta inde a ayo me ani go pála doto-o!» 15 Yesu ambila me u ngakunda nago aholo ni ne kpéke me ni du ngámá. Abhomu-o, ani ayie, ani atsia anu matá kpi e kpi apí 'ta.

*Yesu adhuku pí 'ngu*

(*Tsia bhú Mat. 14:22-33; di ne bhú Mlk. 6:45-52.*)

16 A akolo lie tagolo-o, omukpata gba Yesu akó alingo ekpø-o. 17 U a'u bhú zabu bini u atsia aholo nagugulu, anu li pápá na Kapalanauma. La-a, ekpí abi li uo padhá me Yesu nde kolo nga li uo de. 18 Anvi adu ape kpekpeke. Kaka-a, engu-o aholo nadimba. 19 A abhaka me omukpata-a nde adhuku ne zabu-o masikpe de kilometele madhia. Li nedhinga bhomu-o, u au Yesu me ani nde

ngadhuku pí 'ngu. Ani akolo de zabu-o. Abhomu-o, u aholo nadje tsulu. 20 Engú bini, Yesu apa pi uo me: «A ko ma, yi adjé tsulu de!» 21 U adu akunda me o ha ani, amba o bi ani bhú zabu-o. La-a, zabu akolo bha kolo lingo 'gø li bili u adu anu lie-o.

*Bhiti okpála agili Yesu*

22 Li ekpí aseke lie, bhiti okpála inde atigala ayi 'ngu-o au bha koli zabu bini. La-a, u adu ambila ndjindji me Yesu 'u bhú zabu bhú dabili bini ne omukpata gba e de. Omukpata-a anu kpi o kpi. 23 Li nedhinga bhomu-o, ozabu koko ayie bhú gudhu na Tibeliade, atsia akolo de bili li okpála azu mapa li e pita li Ngámá agie heni lie pi Ebhe-o. 24 Li bhiti okpála bhomu-o au lie me Yesu ne omukpata gba e oo ade-e, u a'u'u bhú ozabu-o, u atsia agbida bhú Kapalanauma ngú nagili Yesu.

*Yesu ne mapa na mukobho*

25 U anu abhaka Yesu ayi 'ngu. Abhomu-o, u ayi ani me: «Musunu, mo okolo ei nadho?» 26 Yesu agie pi uo me: «Heni, ma apa pi yi na paká me, yi ngagili ma ka ongamba 'ngú inde yi au e ade. Yi ngagili mangbo ma ka mapa inde yi azu e, yi atsia a'u'u ne e má kpú kpú-o! 27 La-a, yi améne kulu ngubula ezú inde ngazi mazi-e de. Engú bini, yi mene mangbo ngubula ezú inde ngabhue, di ne bhende ngaha mukobho na duduma ko. Ngama, Ndili gba kpála-a, ma ahá ezú ango-o pi yi ngama. Padhá de, anga Ebhe 'Dyi ma a'o kasé na angu gba e li kute ma.»

28 Abhomu-o, u atsia ayi ani me: «A ayo me ya mene pi ngú namene kulu maka li Ebhe akunda lie?» 29 Do Yesu pi uo

\* 6:9 6:9 Mapa na olodje: A ko nani mapa na bhuku mase. Okpála na ndibhili ti nani da nakakala ndjindji.

me: «Kulu gba Ebhe-e, a ko me yi bhuka kpála inde ani atima e ko.»

<sup>30</sup> Abhomu-o, u atsia ayi ani me: «Mo oméne mangua ngamba 'ngú dho me ya u, amba ya bhuka mu-o? Kulu gba mu-o ne ni? <sup>31</sup> Li onguo ogbi ya adu lie abhú 'gu-o, u azu mana maka u aye nani lie bhú Bhuku gba Ebhe-e me: «Ani aha mapa inde ayie abhúlá-a pi uo ngú nazuzu.†» <sup>32</sup> Abhomu-o, Yesu agie pi uo me: «A moko, ma apa pi yi na paká me, Moidje ha mapa na abhúlá-a pi yi ngae de. Engú bini, 'Dyi ma ngaha mapa na kukulu na abhúlá-a pi yi ngae. <sup>33</sup> Padhá de, anga mapa inde li Ebhe ngaha e, a ko bhende ngayie abhúlá, inde ngaha la di mukobho pi okpála na doto-o.» <sup>34</sup> Abhomu-o, u atsia apa pi Yesu me: «Ngámá, ha pi ya ndu 'kpi hana mapa bhomu!»

<sup>35</sup> Yesu agie pi uo me: «Ma ne mapa na mukobho. Kpála bhende ago abhaka ma-a, gumu 'zu méne ani belegu de bini. Kpála bhende abhuka la di ma-a, gumu 'ngu méne ani belegu de bini. <sup>36</sup> Engú bini, ma apa 'ngú inde-e pi yi apa. Yi au ma. La-a, yi bhuka de. <sup>37</sup> Ndu kpála hana inde li 'Dyi ma ngaha e muma-a, agó li pabili gba ma. La di-e, ndu kpála hana inde agó li pabili gba ma-a, ma bhike ani de. <sup>38</sup> Padhá de, anga ma ayie abhúlá, ma ago ngú namene engú inde li kpála inde atima ma-a akunda e ko. Engú bini, ma go ngú namene naama 'ngú de. <sup>39</sup> Engú inde li kpála inde atima ma akunda e-e, a ngae inde: ndu okpála inde ani aha o muma hana, a ayo de me suka uo bini ngita-a de. Engú bini, a ayo me, ali sokpi-e, ma zuku ndu uo hana. <sup>40</sup> Padhá de, anga 'Dyi ma akunda me, ndu okpála hana inde au ma

Ndili-e, inde abhuka la di ma-a, sia mukobho na duduma, amba ma zuku uo ali sokpi.»

<sup>41</sup> Abhomu-o, omaYuda aholo namene bhayiki li kute ani. Padhá de, anga ani apa nani me: «Ma ne mapa inde ayie abhúlá.» <sup>42</sup> U atsia apa me: «A inde-e Yesu, ndili gba Djodjefu-o di? Ya mbila 'dyi ani ne 'hi ani hana. Lele pi ani apa lie me ni ayie abhúlá?» <sup>43</sup> Yesu agie pi uo me: «Yi 'o namene bhayiki sunda yi. <sup>44</sup> Kpála ti da nago abhaka ma de, i du me 'Dyi ma inde atima ma-a nde holo 'kpa ani ngae de ko. Ngama la di-e, ma azuku ani li sokpi. <sup>45</sup> Opolofeta aye engú inde-e me: «Ebhe asuno 'ngú pi ndu okpála hana.† Kpála ne kpála inde adje 'li 'Dyi ma, inde asia la di nasuno gba ani-e, ago nabhaka ma. <sup>46</sup> Bhobhomu apa me, kpála bini u Ebhe de. Bha bini ma, kpála inde ayie agba Ebhe-e, ma au bha 'Dyi ma ngama. <sup>47</sup> A moko, ma apa pi yi na paká me, kpála inde abhuka-a, asia mukobho na duduma.

<sup>48</sup> Ngama-a, ma ne mapa na mukobho. <sup>49</sup> Onguo ogbi yi azu nani mana abhú 'gu. La-a, u atsia amu. <sup>50</sup> Engú bini, mapa bhende ayie abhúlá-a, a ko bhende li kpála zu e, ani kpi de ko. <sup>51</sup> Ma ne mapa inde uu, inde ayie abhúlá ko. I du me kpála nde azu mapa ango-o, ani du bhú mukobho na duduma. Mapa inde ma ahá e, a ko kute ma. Ma ngahaha me okpála na doto sia mukobho.»

<sup>52</sup> Li omaYuda adje 'ngú bhomu-o lie, u aholo amene kpekebho sunda o kpekpeke. U adu apa me: «Lele pi kpála inde-e ti da naha kute e lie pi ní me ní zu-o?» <sup>53</sup> Abhomu-o, Yesu apa pi uo me: «A moko, ma apa pi yi na paká me: i du me yi nde zu kute ma,

Ndili gba kpála de-e, i du la di me yi nde ndji ngute ma de-e, yi dú bhú mukobho de. <sup>54</sup> Kpála inde ngazú kute ma, inde la di ngandji ngute ma-a, ani bhú mukobho na duduma. Ngama-a, ma azúku la di ani ali sokpí. <sup>55</sup> Padhá de, anga kute ma-a, a ko ezú na kukulú. Ngute ma la di-e, a ko ehe nandji mandji na kukulú. <sup>56</sup> Kpála inde ngazú kute ma, inde la di ngandji ngute ma-a, ani ngadu bhú ma. Ma la di ngadu bhú ani.

<sup>57</sup> 'Dyi ma inde atima ma-a, ani uu. Ma la di ngadu bhú mukobho ka ani. A bhadi moko, kpála inde azú ma-a, ani adú bhú mukobho ka ma. <sup>58</sup> A bhomu-o mapa inde ayie abhálá ko. A maka bhende li onguo ogbi yi azú e, u atsia amu-o ade. Engú bini, kpála inde azú mapa inde-e, adú bhú mukobho na duduma.» <sup>59</sup> Yesu akpokpo ndu 'ngú bhomu-o li nedhinga inde ani adu asuno lie bhú 'ti nadje líli gba Moidje bhú Kapalanauma-o.

*Eli inde ngaha mukobho na duduma*

<sup>60</sup> Pita u adje engú inde li Yesu apa e lie, bhelé na omukpata gba ani-e atsia apa me: «Eli inde-e, a kpekpeke! A ti da naziziba da?» <sup>61</sup> Engú bini, Yesu ambila me omukpata gba ni-e ngamene kpekebho pindji 'ngú ango-o. Kaka-a, ani apa pi uo me: «Engú ango-o ngamene yi sisiti?» <sup>62</sup> A la yi u me ngama, Ndili gba kpála-a, ma nde nga'u li bili inde ma adudu nani lie kalanu-o? <sup>63</sup> Bua gba Ebhe-e ngaha mukobho ngae. Kpála-kuti ti da namene 'he bini de. Oeli inde ma apa e pi yi bhomu-o, a ko Bua inde ngaha mukobho. <sup>64</sup> Engú bini, okoko bhú ká yi bhuka de.» A na paká me Yesu ambila nani nayie li lilita me obhende i bhuka ni de-e ngao dho. Ani atsia ambila la di me apú ni

da-ie. <sup>65</sup> Ani atsia apa matá me: «Kaka-a, ma apa nako pi yi me: «Kpála bini ti da nago gba ma de, i du me 'Dyi ma nde ha kpadji pi ani ngae de ko.»»

<sup>66</sup> Nayie li nedhinga bhomu-o, bhelé na omukpata gba ani-e a'o ká ani. U kpata matá ani de. <sup>67</sup> Abhomu-o, Yesu atsia ayi obhende ndjikpa ne ká bhisi-e me: «Ngayi di-e, yi akunda nagbida?» <sup>68</sup> Simo Piele agie pi ani me: «Ngámá, ya ti da nanu gba da? A ka mu ne oeli inde ngaha mukobho na duduma. <sup>69</sup> Ngaya-a, ya abhuka. Ya atsia ambila la di me mu ne Kpála na bubu inde li Ebhe atima e ko.» <sup>70</sup> Yesu agie pi uo me: «Ngayi okpála ndjikpa ne ká bhisi-e, ma lo nako yi ngama di? La-a, suka yi bini ne djabulu!» <sup>71</sup> Ani adu apa 'ngú bhomu-o li Yuda, ndili gba Simo Isikaliote. Padhá de, anga belegu ani adu lie suka omukpata ndjikpa ne ká bhisi-e, adu kpála inde apú Yesu-o ngae.

## 7

*Ondaise Yesu bhuka ani de*

<sup>1</sup> Pipita-a, Yesu aholo nadholo bhú ndu doto na Galilaya. Ani du akunda nadholo bhú ndu doto na Yudaya de, anga omaYuda adu akunda nabhelo ani oo. <sup>2</sup> A adu me, anokomia na oti ngbangbali gba omaYuda nde akolo masikpe. <sup>3</sup> Abhomu-o, ondaise Yesu atsia apa pi ani me: «Yie si yiyie. Nu bhú ndu doto na Yudaya, ngubula me omukpata gba mu-o, ngauo di-e, u u ngamba 'ngú inde mu ngamene e ko. <sup>4</sup> Padhá de, anga kpála inde akunda me okpála u ngamba 'ngú inde ni ngamene e mau-o, ani méne bhú pepe de. I nde lie me mu nde ngamene ngua ngamba 'ngú bhomu-o, mene kala ndu okpála hana!» <sup>5</sup> Padhá de,

anga ondaise ani-e, ngauo makpe-e, u bhuka nani ani de.

<sup>6</sup> Abhomu-o, Yesu atsia apa pi uo me: «Nedhinga gba ma-a kolo nga de. Engú bini, pi yi-e, nedhinga ndu 'kpí hana ndjindji. <sup>7</sup> Okpála na doto ti da nayala yi de. La muma-a, u ngayala ma. Padhá de, anga ma ngapa me kulu gba uo-o ndjindji ade. <sup>8</sup> Yi nu bhú anokomia-a nunu. Ngama-a, ma nú-u de. Padhá de, anga nedhinga gba ma-a kolo nga de.» <sup>9</sup> Pita ani apa lie mo-o, ani atsia atigala bhú ndu doto na Galilaya.

*Yesu asuno pi okpála bhú 'ngbé 'ti Ebhe gba omaYuda*

<sup>10</sup> Li ondaise Yesu agbida lie bhú anokomia-a, ani atsia anu di oo. La-a, ani suno lie mbámbá de. Ani adu me ani nde awo lie mawo. <sup>11</sup> Abhomu-o, omaYuda adu agili ani bhú nedhinga na anokomia-o. U adu ayi me: «Ani su?» <sup>12</sup> U adu amene kpekebhe naali li 'ngú gba ani-e bhú ká okpála. Okoko adu apa me: «A ko bádha kpála.» Okoko adu apa me: «A mo-o ade, ani ngapite okpála.» <sup>13</sup> Engú bini, u du apa engú ango-o mbámbá de. Padhá de, anga u adu akpe omaYuda.

<sup>14</sup> Nedhinga li anokomia akolo lie tutu-o, Yesu anu bhú 'ngbé 'ti Ebhe gba omaYuda, ani atsia aholo nasuno pi okpála. <sup>15</sup> Abhomu-o, omaYuda angamba naali. U atsia adu ayi lio me: «Kpála inde-e mene balua de. Ani ambila la 'he me-e lele pi?»

<sup>16</sup> Yesu agie pi uo me: «Nasuno gba ma-a ngayie ka ma ade. Engú bini, a ngayie ka Kpála inde atima ma ko. <sup>17</sup> I du me kpála nde akunda namene engú inde li Ebhe akunda e-e, ani ti da nambila me, ne me ayie ka Ebhe, ne me ma ngakpokpo 'ngú gba ma makpe. <sup>18</sup> Kpála bhende ngakpokpo 'ngú gba e makpe-e, ani ngagili me

okpála dhogè ni. Engú bini, kpála bhende ngagili me u dhogè kpála bhende atima ni-e, ani ngapa 'ngú na kukulu. Ani pa la di eu de. <sup>19</sup> Moidje aha nani líli pi yi ngae. A mo-o adi? La-a, kpála bini bhú ká yi ngamene líli ango-o ade. Yi la ngagili nabhele ma ngubula ni?»

<sup>20</sup> Okpála agie pi ani me: «A bhú mu ne siti bua ! A ngagili nabhele mu da?» <sup>21</sup> Yesu agie pi uo me: «Ma amene bha koli ngamba 'ngú bini má kpikili, ndu yi hana yi atsia aholo nangamba! <sup>22</sup> Moidje aha nani líli pi yi me, yi du nato ongisi na bhosibhosi-e bhú gandja. Engú bini, líli ango-o yie ka Moidje de. A ayie ka onguo ogbi yi. Kaka-a, yi ngaziba nato kpála bhú gandja belegu bhú 'kpí naguo gba omaYuda . <sup>23</sup> Yi ngato kpála bhú gandja bhú 'kpí naguo ngú nakpe me yi agumu líli gba Moidje-e de. Ngama-a, ma akobho kpála-kuti libhomu bhú 'kpí naguo. Yi la ngake 'ngú liyi muma tété ngú ni? <sup>24</sup> Yi akódho 'ngú maka yi ngauu lie de. Engú bini, yi kodho 'ngú ngbingbili!»

*Yesu ne Masiya ?*

<sup>25</sup> Abhomu-o, okpála koko na gudhu na Yelusalema adu apa me: «A oo kpála inde u ngagili nabhele e di? <sup>26</sup> Yi tsitsia nga, ani ngagama 'ngú mbámbá bhú ká okpála. La-a, u pa 'ngú pi ani belegu de bini! Ongámási gba ní-e ambila bha ndju si ndjindji me Masiya ngae inde-e? <sup>27</sup> Padhá de, anga bili li kpála inde-e ayie li e, ya mbila hana. Engú bini, nedhinga inde li Masiya agó lie, kpála bini mbila bili inde ani ayie li e de.»

<sup>28</sup> Li nedhinga bhomu-o, Yesu adu asuno bhú 'ngbé 'ti Ebhe gba omaYuda. Abhomu-o, ani atsia asula me: «Yi mbila bha ndju ma ndjindji? Yi mbila la di bili inde ma ayie li e hana? Padhá de,



anga ngama-a, ma go bhú angu gba ma makpe-e de. Engú bini, kpála inde atima ma-a, a ko kpála na ngbingbili . Kpála ang-o, yi mbila ani de. <sup>29</sup> Ngama-a, ma mbila ani ndjindji. Padhá de, anga ma ayie agba ani. Ani atima la di ma ngae.»

<sup>30</sup> Abhomu-o, u adu agili me, o holo ani. La-a, kpála bini bu 'kpa e li kute ani de. Padhá de, anga nedhinga gba ani-e le nga nani-i de. <sup>31</sup> La-a, okpála bhelé bhú ká bhiti okpála bhomu-o abhuka ani. U adu apa me: «Nedhinga li Masiya agó lie, ani améne ongamba 'ngú ané obhende li kpála inde-e amene e?»

*U atima okpála ngú naholo Yesu*

<sup>32</sup> Omufalaisai adje engú inde li okpála adu apa e bhú tupele li 'ngú gba Yesu-o. Abhomu-o, ongbengbe odimandé di ne omufalaisai atima omulila na 'ngbé 'ti Ebhe gba omaYuda ngú naholo ani. <sup>33</sup> Yesu atsia apa me: «Ma adú nga matá ne yi ngubula nedhinga bedi. Pipita-a, ma tsia tápa agba kpála inde atima ma ko. <sup>34</sup> Yi agili ma, engú bini, yi ú la ma de. Padhá de, anga yi ti da nanu li bili inde ma adji li e de.» <sup>35</sup> Abhomu-o, omaYuda atsia ayi lio sunda o me: «Ani anú li bili bhedho inde ní ti da nau ani lie de-e? Ani anú nabhaka omaYuda bhende atsambala bhú ká oGiliki-e? Ani anú asuno pi oGiliki? <sup>36</sup> Oeli inde ani apa e me: «Yi agili ma, engú bini, yi ú la ma de, anga yi ti da nanu li bili inde ma adji li e de.» A akunda napa pi?»

*Engu na mukobho*

<sup>37</sup> Ekpí na soso na anokomia-a, a adu ekpí na ngbéngbé. Li 'kpí ang-o, Yesu alu malu, ani asula me: «I da me kpála nde ne gumu 'ngu-o, a ayo me, ani go bhaka ma,

amba ani ndji! <sup>38</sup> Kpála bhende ngabhuka ma-a, maka li Bhuku gba Ebhe-e apa lie me: «Engu adú aze li bua ani. Engu ang-o, a ko engu na mukobho.» <sup>39</sup> (Yesu adu apa 'ngú bhomu-o li Bua gba Ebhe inde li okpála inde abhuka ani asia e-o. Li nedhinga bhomu-o, Bua gba Ebhe-e go nga nani-i de. Padhá de, anga Yesu nde sia nga nani sangu gba e de.)

*OmaYuda koko abhuka me Yesu ne Masiya*

<sup>40</sup> Okpála adje oeli inde li Yesu apa e-o. Okpála koko bhú ká uo atsia apa me: «Kpála inde-e bha ndju ne polofeta inde ya ngadjeke ekukulú!» <sup>41</sup> Okoko atsia apa me: «A ko Masiya!» Engú bini, okpála koko atsia apa matá me: «Masiya ti da nayie bhú ndu doto na Galilaya? <sup>42</sup> Padhá de, anga Bhuku gba Ebhe-e apa me, Masiya adú saka okpála na piga gba Davidi. Ani ayie la di bhú Beteleme, kuti inde li Davidi abhele bhú e ko.» <sup>43</sup> Abhomu-o, okpála atsia aghogbo bhusu o li 'ngú gba ani-o. <sup>44</sup> Okoko bhú ká uo adu akunda me, o holo ani. Engú bini, kpála bini bu 'kpa e li ani de.

*Ongámási gba omaYuda ayala nabhuka Yesu*

<sup>45</sup> Abhomu-o, omulila na 'ngbé 'ti Ebhe gba omaYuda-a agie lio agba ongbengbe odimandé, di ne omufalaisai-o. U atsia ayi omulila-a me: «Yi go ne Yesu de ngubula ní?» <sup>46</sup> Omulila-a agie me: «Kpála inde agama 'ngú maka kpála bhomu-o belegu ade bini!» <sup>47</sup> Abhomu-o, omufalaisai atsia agie pi uo me: «Ngayi di-e, yi a'o di me ani pite yi? <sup>48</sup> Bhú ká ongámási, i du di-e bhú ká omufalaisai-e, kpála bini abhuka ani uu? <sup>49</sup> Engú bini, bhiti okpála bhende abhuka ani bhomu-o, u

mbila líli gba Moidje de. Ebhe abála uo mabala.»

<sup>50</sup> Nikodemu-o, a ko suka omuFalisai. Aní anu la di nani kalanu abhaka Yesu-o ngae. Aní apa pi uo me: <sup>51</sup> «Líli gba ní-e ziba naholo kpála padhá de. A ayo ngaiza me ní dje aní, amba ní mbila la di engú inde aní amene e ko.» <sup>52</sup> U agie pi aní me: «Ngamu di-e, mu ne kpála na ndu doto na Galilaya? Tanga nga oBhuku gba Ebhe-e ndjindji. Mu ú de me, polofeta bini ayie bhú ndu doto na Galilaya de.»

[ <sup>53</sup> Pipíta-a, kpála ne kpála atsia agie lie agba e.\*

## 8

### *Olø na zabhe*

<sup>1</sup> Abhomu-o, Yesu anu apí 'ta na ondula na Olive. <sup>2</sup> Lí ekpí aseke lie, bhú sikikpi-e, aní agie lie bhú 'ngbé 'ti Ebhe gba omaYuda. Ndu okpála hana adyudyo lio de aní masikpe. Yesu adu kuto, aní atsia aholo nasuno pi uo. <sup>3</sup> Abhomu-o, omusuno na líli gba Moidje, di ne omuFalisai ago ne olø bini. U akoto lí olø ang-o bha lí nedhinga u adu akunda lío lie ne bhoko koko. U aha aní, u atsia a'o aní kala ndu okpála hana. <sup>4</sup> Do uo pi Yesu me: «Musuno, u akoto lí olø inde-e bha lí nedhinga u adu akunda lío lie ne bhoko koko. <sup>5</sup> Moidje aye nani pi ya bhú líli-e me, a ayo nabhili ongua olisi bhomu-o ne teme. Ngamu-o, mo opa naamu tété pi?»

<sup>6</sup> U adu apa engú bhomu-o ngú na'o ekú ngú aní. Padhá de, anga u adu agilí nau engú inde u a'ó e pí ani-o. Engú bini, Yesu akita ne kuto, aní aholo naye 'he kuto bhú doto ne líkpa e. <sup>7</sup> La-a, u azi bha kekele lí nayí aní. Abhomu-o, aní ayie bhúlá, aní atsia apa pi uo me: «A ayo me kpála inde

bhú ká yi, i mene nga naae siti 'ngú bini de-e, aní talu aní ne teme na kalanu-o ngae.» <sup>8</sup> Pipíta-a, Yesu akita matá ne kuto, aní atsia aholo bha naye ehe kuto bhú doto. <sup>9</sup> Lí u adje oeli bhomu-o lie, ndu uo hana atsia aholo ayie bini ne bini. Akpo nayie ne obhelesi okpála. Yesu atigala bha ngae kpi e kpi. Olø ang-o atsia adu la bhadi lí bilí inde u a'o aní lí e bhomu. <sup>10</sup> Abhomu-o, Yesu ayie matá bhúlá, aní ayi olø ang-o me: «Okpála ang-o su? Kpála bini kodho 'ngú gba mu-o sisiti di?» <sup>11</sup> Olø ang-o agie me: «Musuno, ma u kpála bini de.» Do Yesu pi aní me: «Ngama di-e, ma kódho 'ngú gba mu-o sisiti de. Mu ti da natapa. La-a, nayie pi mbia inde-e, mo oméne matá siti 'ngú belegu de bini.»]

*Yesu ne zi 'ke pi okpála na píla doto*

<sup>12</sup> Abhomu-o, Yesu apa matá pi bhiti okpála-a me: «Ngama-a, ma ne zi 'ke pi okpála na píla doto. Kpála inde ngakpata ma-a, aní dhúku bhú biti de. Engú bini, a adú ka aní ne zi 'ke na mukobho.» <sup>13</sup> Abhomu-o, omuFalisai atsia apa pi aní me: «Mu ngakpokpo bhomu-o naamu 'ngú makpe! Engú inde mu ngakpokpo e bhomu-o, tata tété ade!»

<sup>14</sup> Yesu agie pi uo me: «A na paká moko me ma ngakpokpo 'ngú gba ma makpe. La-a, engú inde ma ngakpokpo e, a ko kukulu 'ngú. Padhá de, anga ma mbila bilí inde ma ayie lí e, di ne bilí inde ma adji lí e ndjindji. Engú bini, ngayi-e, yi mbila bilí inde ma ayie lí e de. Yi mbila la di bilí inde ma adji lí e de. <sup>15</sup> Yi ngakodho 'ngú maka okpála. Ngama-a, ma kodho 'ngú gba kpála bini de.

\* **7:53** 7:53 Ongú nayie si akólo bhú 8:11, a bhú obhuku koko na didili-e ade.

16 I dɔ la me, ma nde akodho 'ngú-o, nakodho 'ngú gba ma-a dú ngbingbili. Padhá de, anga ma kpi ma kpi ade, engú bini, 'Dyi ma inde atima ma-a, ya ne aní bhú dabili bini.

17 U aye bhú líli gba yi makpe-me: «I dɔ me okpála bhisi nde akpokpo 'ngú-o, engú ango-o dú ngbingbili.» 18 Ma ngakpokpo naama 'ngú makpe. 'Dyi ma inde atima ma-a, ngakpokpo la di engú gba ma ko.»

19 Abhomu-o, u ayi aní me: «'Dyi ma su?» Yesu agie pi uo me: «Yi mbíla ma de. Yi mbíla la di 'Dyi ma de. Yi mbíla ma uu-o, yi de ambíla di 'Dyi ma ambíla.» 20 Yesu apa 'ngú bhomu-o li nedhinga aní adu asuno lie bhú 'ngbé 'ti Ebhe gba omaYuda, li bíli li osanduku inde u adu a'o tia bhú e adu li e-o. Kpála bini tsia bu nani 'kpa e li aní de, anga nedhinga gba aní-e kolo nga nani-i de.

*Yesu akpo 'ngú pindji bíli inde aní ayie li e-o*

21 Abhomu-o, Yesu atsia apa matá pi uo me: «Ma adjí. Yi aglí ma. La-a, yi amú bhú siti 'ngú gba yi-o. Yi tí da nanu li bíli inde ma adjí li e de.» 22 OmaYuda atsia ayi lío sunda o me: «Aní abhólé lie ne títi e? Kaka-a, aní apa me bíli inde ní adjí li e, ní tí da nakolo tété dí?» 23 Yesu agie pi uo me: «Ngayie, yi ayie kuto sí. Engú la bini, ngama-a, ma ayie abhúlá. Ngayie, yi ne okpála na píla doto. Engú la bini, ngama-a, ma ne kpála na píla doto ade. 24 Kaka-a, ma apa ígini pi yi me, yi amú bhú siti 'ngú gba yi ko. Padhá de, anga i dɔ me yi nde bhuka de me Ma uu-o\* de-e, yi amú bhú siti 'ngú gba yi ko.» 25 Abhomu-o, u ayi aní me: «Ngamú-o, ma ne da?» Yesu

agie pi uo me: «A ko bha engú inde ma apa e pi yi, nayie li lilita-o. 26 Ma ne engú bhelé napapa, di ne nakokodho li 'ngú gba yi ko. Engú bini, ma ngapa pi okpála engú inde ma adje e ka kpála inde atima ma ko. Ngaani-e, aní ngapa ngbili 'ngú.»

27 U mbíla de me aní ngapa pi o bhomu-o engú gba 'Dyi e de. 28 Abhomu-o, Yesu atsia apa pi uo me: «Nedhinga yi a'é'e ma, Ndíli gba kpála lie ne abhúlá-a, yi tsia mbíla me ngama-a, ma uu. Yi mbíla la di me, ma mene ehe bini bhú angu gba ma makpe de. Engú bini, ma ngapa bha bini engú inde li 'Dyi ma asuno e muma ko. 29 Ya ne kpála inde atima ma-a bhú dabili bini. Aní 'o ká ma kpi ma kpi de. Padhá de, anga ma ngamene ndu 'kpí hana engú inde i nganga li aní manga ko.» 30 Abhomu-o, okpála bhelé inde adje Yesu ngapa 'ngú bhomu-o, atsia abhuka aní.

*Okpála bhende ne obalise na siti 'ngú*

31 Abhomu-o, Yesu atsia apa pi omaYuda inde abhuka nani aní-e me: «I dɔ me yi nde alila eli inde ma ngapa e pi yi-e ndjindji-e, yi dú omakpata gba ma-a na kúkulu. 32 Yi mbíla la di ngbili 'ngú. Li ngbili 'ngú-o tsia gbégbe yi bhú bali.»

33 U agie pi aní me: «Ya ne odi Abalahama. Ya dɔ nga bali pi kpála belegu de bini. Lele pi ma tí da napa lie pi ya me, ya azé bhú bali maze-e?» 34 Yesu agie pi uo me: «A moko, ma apa pi yi na paká me: ndu kpála hana inde ngamene siti 'ngú-o, a ko bali ka siti 'ngú. 35 Bali ngadu bhú píga ndu 'kpí hana ade. Engú bini, ndíli na bhobhoko ngadu

\* 8:24 8:24 Ma uu: A bhomu-o 'ili gba Ebhe inde aní asuno e pi Moidje nedhinga aní atima aní lie bhú Edjipeto. Tsia bhú Eki. 3:14.

ndu 'kpí hana bhú piga. <sup>36</sup> Kaka-a, i du me Ndili-e nde agbegbe yi bhú bali-e, yi tsia zé bhú bali kukulú. <sup>37</sup> Ma mbila hana me, yi ne odi Abalahama. Engú la bini, yi ngagili nabhele ma. Padhá de, anga yi ngayala 'li ma. <sup>38</sup> Ngama-a, ma ngakpokpo engú inde li 'Dyi ma asuno e muma ko. La ngayi-e, yi ngamene engú inde li 'dyi yi apa e pi yi ko.»

<sup>39</sup> Abhomu-o, u atsia agie pi ani me: «'Dyi ya-a, a ko Abalahama.» Do Yesu pi uo me: «Í dú me yi dú ne odi Abalahama-a, yi de méne 'ngú maka Abalahama. <sup>40</sup> Engú bini, mbia inde-e, yi ngakunda nabhele ma, abana ma apa kukulú 'ngú inde ma adje e ka Ebhe lie pi yi-o. Abalahama mene la nani mo-o de. <sup>41</sup> Engú bini, ngayi-e, yi ngamene bhadi ngua kulu inde li 'dyi yi ngamene e-o.» U atsia agie pi ani me: «Ya ne ongisi na ngongo ade. Koli 'dyi ya bha bini, Ebhe.»

<sup>42</sup> Yesu apa pi uo me: «Li Ebhe dú bha ndju ne 'Dyi yi-e, yi de akunda ma. Padhá de, anga ma ayie agba Ebhe. Ma la di si bhú ngu ani. Ma go bhú ngu ma de. Engú bini, ani atima ma ngae. <sup>43</sup> Yi mbila engú inde ma ngapa e pi yi-e de ka ni? A ko anga, yi ti da naje eli inde ma ngapa e pi yi-e de. <sup>44</sup> 'Dyi yi ne Djabulu. Yi la di ngamene 'ngú inde li 'dyi yi akunda e-o. A ko bhulu nabhele kpála nayie li lilita. Ani lu bhú kukulú 'ngú belegu de bini. Padhá de, anga kukulú 'ngú bhú ani ade. Nedhinga inde ani ngapa eu lie, ani ngapa 'ngú gba e makpe. Padhá de, anga a ko kpála na eu. A ko la di 'dyi eu. <sup>45</sup> Engú bini, ngama-a, ma ngapa kukulú 'ngú. Yi ngabhuka ma ade kaka. <sup>46</sup> A ko kpála bhedho bhú ká yi-e, i ti da nasuno siti 'ngú inde ma

amene e? Í du me ma nde ngapa kukulú 'ngú-o, ka ni yi bhuka la ma lie de-e? <sup>47</sup> Kpála gba Ebhe-e ngadje 'li Ebhe. Engú bini, yi ne okpála gba Ebhe ade. Kaka-a, yi ngadjedje ade.»

*Yesu akpo 'ngú pindji Abalahama*

<sup>48</sup> OmaYuda agie pi Yesu me: «Ya apa kukulú 'ngú de me mu ne kpála na Samalia, a la di bhú mu ne siti bua?» <sup>49</sup> Yesu agie pi uo me: «Siti bua bhú ma ade. Engú bini, ma ngadhogo 'Dyi ma. La-a, ngayi-e, yi ngayala nadhogo ma. <sup>50</sup> Ngama-a, ma gili de me okpála dhogo ma-a de. 'Dyi ma ngagigili muma ngae. Ani la di ngakodho 'ngú-o ngae. <sup>51</sup> A moko, ma apa pi yi na paká me: kpála inde alila eli inde ma ngapa e, ani kpí daduma de.»

<sup>52</sup> OmaYuda atsia apa pi ani me: «Mbia inde-e, ya ambila la kukulú me abhú mu ne siti bua! Abalahama akpi. Opolofeta di amu. La ngamu-o, mu ngapa me: «Kpála inde ngalila eli inde ma ngapa e, ani kpí daduma de.» <sup>53</sup> 'Dyi ya Abalahama akpi. Mu ngabhundja me ni ngebégbé ane ani? Opolofeta di amu. Mu la ngau nga naamu limu me ni ne da?»

<sup>54</sup> Yesu agie pi uo me: «Í du me, ma du adhogo lima ngama makpe-e, nadhogo gba ma-a de padhá. 'Dyi ma ngadhogo ma ngae, a ko kpála inde yi nga'i e me: «A ko Ebhe gba ya-o» <sup>55</sup> me yi nde mbila la ani de ko. Engú bini ngama-a, ma mbila ani hana. Í dú me ma pá me ma mbila ani de-e, ma de ne kpála na eu maka yi. Engú bini, ma mbila ani hana. Ma la di ngalila eli inde ani ngapa e-o. <sup>56</sup> 'Dyi yi Abalahama akpi nani djali naali. Padhá de, anga ani adu abhundja me ni au ekpi nago gba ma-o. Ani au, ani atsia akpi

djali.» <sup>57</sup> Abhomu-o, omaYuda atsia apa pi ani me: «Ngamu-o, ma kolo nga ne kalanga ndjikpa bhuluvue de. Mu la ngapa me, ni au Abalahama!» <sup>58</sup> Yesu agie pi uo me: «A moko, ma apa pi yi na paká me kala me u zu Abalahama, «Ma uu.»» <sup>59</sup> Abhomu-o, u abha teme ngubula natutulú ani ne di. Engú bini, Yesu awo lie, ani atsia akoto bhú 'ngbé 'ti Ebhe gba omaYuda-o.

## 9

*Yesu akobho kpála inde u azu e me ani nde u 'kpí de*

<sup>1</sup> Li Yesu adu akodho 'kpí lie li kpadji-e, ani au kpála bini inde u azu e me ani nde u 'kpí de. <sup>2</sup> Omukpata gba ani ayi ani me: «Musunu, u azu kpála inde-e me ani nde u 'kpí de ka ni? A ko ka siti 'ngú gba ani makpe, ne me a ko ka siti 'ngú gba okpála inde azu ani?»

<sup>3</sup> Yesu agie me: «A ko ka siti 'ngú gba ani-e de. A ko la di ka siti 'ngú gba okpála inde azu ani-e de. Engú bini, u azu ani mo-o ngubula me okpála u ngamba 'ngú inde li Ebhe ngamene e bhú ani. <sup>4</sup> A ayo me ní mene kulu gba kpála inde atima ma-a nedhinga li ekpí nde nga lie ne ngbikpi-o. Padhá de, anga biti ngago, kpála bini ti da namene kulu de. <sup>5</sup> Nedhinga ma nde nga lie píla doto-o, ma ne zi 'ke pi okpála na píla doto.» <sup>6</sup> Pita ani apa lie mo-o, ani aku ngusu bhú doto. Ani akpedhøle doto ne di. Ani aha ngbødhe angoo, apulu pí kó djila kpála inde i u 'kpí de ko. <sup>7</sup> Abhomu-o, Yesu atsia apa pi ani me: «Nu vulu bhúla mu bhú 'dú 'ngu navulu kute na Siloe.\*» ('li bhomu-o

akunda napa me «U atima ani.») Ani anu, ani atsia avulu bhúla e. Ani agie lie me ani nde ngau 'kpí ndjindji!

<sup>8</sup> Okpála bhende asili kuti lingo ani, di ne obhende au ani kalanu me ani nde ne yoyo 'he-e, a adu ayi me: «A inde-e kpála adu nako adu kuto ngú nayo 'he-e di?»

<sup>9</sup> Okoko adu apa me: «A ko ani.» Do okpála koko me: «A ko ani de. Engú bini, ani mana ani.» La-a, kpála angoo adu apa me: «A ko bha-a ma.» <sup>10</sup> Abhomu-o, u ayi ani me: «Djila mu abhulu lie lele pi?» <sup>11</sup> Ani atsia agie me: «Kpála inde u a'i e me Yesu-o, amene ngbødhe, ani apulu pí kó djila ma. Ani atsia apa muma me: «Nu vulu bhúla mu bhú Siloe.» Ma anu oo. Pita ma avulu lima lie, ma aholo nau 'kpí!» <sup>12</sup> U ayi ani me: «Kpála angoo su?» Ani agie me: «Ma mbila de.»

*Omufalissai ayiyi kpála inde li djila e akobho-o*

<sup>13</sup> Abhomu-o, u ago ne kpála inde adu kalanu me ani nde u 'kpí de-e pi omufalissai. <sup>14</sup> Yesu amene nani ngbødhe, ani atsia abhulu djila ani ne di me a nde la ekpí naguo gba omaYuda. <sup>15</sup> Abhomu-o, omufalissai ayi di ani me djila ani aholo au 'kpí lele pi. Ani agie pi uo me: «Ani apulu ko djila ma ne ngbødhe. Ma avulu lima, ma atsia aholo au 'kpí.» <sup>16</sup> Omufalissai koko atsia adu apa me: «Kpála amene engú inde-e, ani yie agba Ebhe de. Padhá de, anga ani ngalila líli na ekpí naguo ade.» Engú bini, okoko atsia adu apa naao me: «Kpála na sisiti ti da namene ngua ongamba 'ngú me-e lele pi?» U atsia agbogbo bhusu o.†

\* 9:7 9:7 'Dú 'ngu navulu kute na Siloe nani abhú aga na Yelusalema. † 9:16 9:16 Si-e, omufalissai au me li Yesu akobho kpála lie bhú 'kpí naguo, ani amene bhomu-o kulu. La-a, líli gba Moidje ziba nani namene kulu bhú 'kpí naguo de.

17 Abhomu-o, omuFalisai ayi matá kpála inde li djila e abhulu-o me: «A la mu-o, mo opa naamu li 'ngú gba kpála inde abhulu djila mu-o pi?» Aní agie me: «A ko polofeta .»

18 Engú bini, ongámási gba omaYuda kunda nani nabhuka de me, aní adu me aní nde u 'kpí de, aní atsia aholo au 'kpí-e de. Kaka-a, u atsia a'i okpála inde azu anio. 19 U ayi uo me: «Kpála inde-e, a ko ndili gba yi na paká? A na paká me yi azu aní me aní nde u 'kpí di? Aní la ngau 'kpí mbia inde-e lele pi?» 20 Okpála inde azu aní-e agie me: «Ya ambila me a ko ndili gba ya. Ya azu aní me aní nde u 'kpí de. 21 Engú la bini, maka aní ngau 'kpí lie mbia inde-e, ya mbila naaya de. Ya mbila la di de me abhulu djila aní da-ie de. Yi yi aní, aní abhele, aní ti da nakpokpo 'ngú gba e ngae makpe!» 22 Okpála inde azu aní-e apa nani mo-o, anga u adu akpe omaYuda. Padhá de, anga omaYuda adje nani lio me, i du me kpála nde aziba me Yesu ne Masiya , u de gbe aní bhú 'ti nadge líli gba Moidje-e magbe. 23 Kaka-a, okpála inde azu aní-e apa nani me: «Aní abhele, aní ti da nakpokpo 'ngú gba e ngae makpe. Yi yi aní!»

24 Abhomu-o, omuFalisai a'i matá kpála inde adu nako me aní nde u 'kpí de-o. U atsia apa pi aní me: «Dhөгө Ebhe bhú napa kukulu 'ngú. Ya ambila me kpála inde akobho mu bhomu-o, a ko siti kpála.» 25 Kpála ango-o atsia agie me: «I du siti kpála, i du siti kpála de, ma mbila naama de. La-a, ma ambila koli 'ngú bini: ma du nako au 'kpí de, engú bini, mbia inde-e, ma ngau 'kpí.»

26 Abhomu-o, u ayi matá aní me: «Aní amene ngú mu pi? Aní abhulu djila mu lele pi?» 27 Aní

agie pi uo me: «Ma apa igini pi yi apa. Engú bini, yi dje ma de. Yi akunda matá nadjedje ne toto-o? Atigala yi ngakunda me yi kolo di omukpata gba aní.» 28 U asosobho aní. U atsia apa pi aní me: «Mu mangbo ne mukpata gba kpála bhomu-o ngamu! Ngaya-a, ya naaya ne omukpata gba Moidje . 29 Ya ambila me Ebhe akpokpo 'ngú pi Moidje. Engú bini, ngaani-e, ya mbila de me aní ayie naae su-oie de!»

30 Kpála ango-o agie pi uo me: «A ko 'ngú na ngangamba. Yi mbila bili inde aní ayie li e de. La-a, aní abhulu djila ma! 31 Ní mbila hana me Ebhe djedje okpála na sisiti de. Engú bini, aní djedje ndu kpála hana inde ngamanga aní, inde di ngamene engú aní akunda e-o. 32 Nani akpo lie, kpála bini dje nga de me u ngapa me kpála bini abhulu djila kpála inde u azu e me aní nde u 'kpí de-e de. 33 I dú me kpála inde-e yie agba Ebhe de-e, aní de tí da namene 'he bini de.» 34 Abhomu-o, u agie pi aní me: «Ngamu-o, 'lá mu libhomu bhú siti 'ngú nayie maka nani u azu mu lie. Mu la ngakunda nasuno 'ngú pi ya?» U atsia agbe aní bhú 'ti nadge líli-e kilidjo.

#### *Okpála i u 'kpí kukulu de*

35 Yesu adje me omuFalisai agbe kpála inde li djila e akobho-o kilidjo. Yesu anu abhaka aní, aní atsia ayi aní me: «Mo obhuka Ndili gba kpála-a abhuka?» 36 Aní agie pi aní me: «Musuno, kpála ango-o, a ko da, amba ma bhuka aní-e?» 37 Yesu agie pi aní me: «Mo ou aní au. Aní ngagama 'ngú ne mu mbia inde-e ngae.» 38 Do kpála ango-o me: «Ngámá, ma abhuka.» Aní atsia atutu lipaku e kuto kala Yesu.

39 Abhomu-o, Yesu atsia apa pi aní me: «Ma ago pila doto ngú

nakodho 'ngú. Ma ago ngubula me okpála bhende i u 'kpí de-e, u u 'kpí, amba okpála bhende ngau 'kpí-e, 'o nau 'kpí.»

<sup>40</sup> Omufalisai inde adu de ani oo, adje oeli bhomu-o. U atsia ayi ani me: «Ngaya di-e, ya u 'kpí di?»  
<sup>41</sup> Yesu agie pi uo me: «Yi dú ne okpála bhende i u 'kpí de-e, yi de bhú siti 'ngú ade. Engú bini, maka yi apa lie me: «Ya ngau 'kpí-e», yi nga bha ne okpála na sisiti.»

## 10

*Yesu ne mulila na babadha gba okandele*

<sup>1</sup> Yesu apa me: «A moko, ma apa pi yi na paká me: kpála inde i li bhú aga gba okandele li bhebhe-o de-e, engú bini, inde nga'u li pabu aga li papá koko-o, kpála ango-o ne bhulu 'zi. Ani la di ne bhulu nagbulu 'he gba okpála ne kpéke.  
<sup>2</sup> Kpála inde ali la naae li bhebhe-o, a ko mulila gba okandele-o.  
<sup>3</sup> Mulila na 'bhø aga-a nga'u'u pi ani. Okandele-o ngadje la di 'li ani. Ani nga'i okandele gba e bini ne bini li 'li e. Ani la di ngapandja uo kilidjo. <sup>4</sup> Li ani apandja uo hana lie kilidjo-o, ani ké kala uo, u tsia holo nakpata ani. Padhá de, anga u mbila 'li ani hana. <sup>5</sup> Engú bini, kpála bhende u mbila e de-e, u kpáta ani de. U kpé de ani tsutsu. Padhá de, anga u mbila 'li ani de.»

<sup>6</sup> Yesu akpokpo gbitaku bhomu-o pi okpála inde adu adje ani-o. La-a, u mbila nani ta engú inde ani adu apa e pi uo-o de.

<sup>7</sup> Abhomu-o, Yesu atsia apa matá me: «A moko, ma apa pi yi na paká me: ma ne 'bhø aga gba okandele-o. <sup>8</sup> Ndu okpála hana inde ago muma kalanu-o, a ko obhulu 'zi. A ko la di obhulu nagbulu 'he gba okpála ne kpéke. Engú bini, okandele-o dje uo de. <sup>9</sup> Ngama-a, ma

ne 'bhø bhoti. Kpála inde alí li pá bili gba ma-a, ani kóbho. Ani tí da nali, ani kóto, ani tsia sia di ehe nazu mazu. <sup>10</sup> Bhulu 'zi ago bha naae ngubula nazi 'he. Ani ago ngubula nabhebhele mabhøle. Ani ago ngubula nasisiti masiti. La ngama-a, ma ago ngubula me okandele sia mukobho, u sia mukobho ango-o bhelé.

<sup>11</sup> Ma ne bádha mulila gba okandele. Mulila na babadha gba okandele-o bedhe ngú naha mukobho gba e pi okandele gba e-o. <sup>12</sup> Kpála inde ngamene kulu bha bini ngubula tia-a, a ko kakulu mulila gba okandele-o de. A ko okandele ka ani de. Li ani u me sia ngago-o, ani há holo, ani 'ó ká uo. Abhomu-o, li sia-a tí pí uo, ani tsia tsámala uo. <sup>13</sup> Padhá de, anga ani ngamene bha naae kulu ngubula tia. Ani la di ne ndjinga uo ade. <sup>14-15</sup> Ngama-a, ma ne mulila na babadha gba okandele. Maka li 'Dyi ma ambila ma lie, ma atsia ambila di ani-e, ma ambila okandele gba ma-o, okandele gba ma-a atsia ambila di ma. Ma la di bedhe ngú naha mukobho gba ma-a pi okandele gba ma-o. <sup>16</sup> A ka ma ne okandele koko inde bhú aga inde-e ade. A ayo me ma go di ne uo. U adjé 'li ma. U akólo koli piga okandele bini, u tsia dú ne koli mulila bini.

<sup>17</sup> 'Dyi ma ngakunda ma, anga ma bedhe ngú naha mukobho gba ma-a, amba pipita-a, ma sia matá. <sup>18</sup> Kpála bini ha mukobho gba ma-a ne kpéke de. Engú bini, ma ngahaha bha ngama. Ma ne angu ngú nahaha, ma la di ne angu ngú nasisia. Ma asia líli bhomu-o ka 'Dyi ma.»

<sup>19</sup> OmaYuda atsia agbogbo matá bhusu o ka oeli bhomu-o. <sup>20</sup> Bhelé bhú ká uo adu apa me: «A abhú ani ne siti bua ! A ko la di bhulu pele! Yi ngadje ani ka ni?»  
<sup>21</sup> Okoko adu apa me: «Kpála inde

bhú e ne siti bua-a ti da napa 'ngú mo-o de. Siti bua ti da nabhulu djila okpála inde i u 'kpi de-e uu?»

### *OmaYuda ayala Yesu*

<sup>22</sup> Abhomu-o, bhú gudhu na Yelusalema-a, bhú nedhinga na zini-e, u amene anokomia Naleke 'ngbé 'ti Ebhe gba omaYuda-o .  
<sup>23</sup> Bhú 'ngbé 'ti Ebhe-e , Yesu adu adhuku sa ngba 'ti gba Salomo-o. <sup>24</sup> Abhomu-o, omaYuda asa lio denngo ani ngbalina. U atsia apa pi ani me: «Bua ya adu bha ka mu me a nde alu abhúla má gba me-e ngubula ekpi madho? f du me mu nde ne Masiya-a , mu de pa pi ya mbamba.» <sup>25</sup> Yesu agie pi uo me: «Ma apa pi yi apa. Engú bini, yi ziba ma de. Ongamba 'ngú inde ma ngamene e ne 'li 'Dyi ma-a, a ngakpokpo 'ngú gba ma-o. <sup>26</sup> Engú bini, yi bhuka de anga yi ne okandole gba ma-a ade. <sup>27</sup> Okandole gba ma-a ngadje 'li ma. Ma ambila uo, u la di ngakpata ma. <sup>28</sup> Ma ngaha makobho na duduma pi uo. U mú duduma de. Kpála bini tí la di da nagbulu uo ka ma de. <sup>29</sup> 'Dyi ma inde aha uo mama-a, ani ngbéngbé ane ndu 'ngú hana. Kpála bini tí la di da nagbulu 'he bini ka 'Dyi ma de. <sup>30</sup> Ngaya ne 'Dyi ma-a, koli ya bha bini.»

<sup>31</sup> Abhomu-o, omaYuda abha matá teme ngú natutulú ani ne di. <sup>32</sup> Yesu agie pi uo me: «Obabadha 'ngú bhelé inde ma asuno e pi yi-e, ayie ka 'Dyi ma. A ko ngubula obabadha 'ngú bhedho yi ngakunda nabhelo ma lie ne teme?» <sup>33</sup> OmaYuda agie pi ani me: «A ko de me ya ngakunda nabhelo mu ne teme ka badha 'ngú-o de. Engú bini, a ko anga mu ngasobho Ebhe. Ngamu inde bha ne kpála-kuti-e, mu nga'o limu maka Ebhe.»

<sup>34</sup> Yesu agie pi uo me: «U aye bhú líli gba yi-e me, ngama-a, ma apa me: «Yi ne oebhe.†» <sup>35</sup> Ya ambila me, u ti da nabulu engú inde li Bhuku gba Ebhe-e apa e de. Okpála inde li eli gba Ebhe-e akolo nani gba o-o, u a'i uo me oebhe. <sup>36</sup> Engú bini ngama-a, Ebhe abhu ma, ani atsia atima ma pála doto. Lele pi yi ngapa la lie me ma ngasobho Ebhe, anga ma ngapa me ma ne Ndili gba Ebhe-e? <sup>37</sup> f du me ma nde ngamene ngamba 'ngú gba 'Dyi ma ade-e, yi abhúka ma de. <sup>38</sup> f du la me ma nde ngamene ngamba 'ngú gba 'Dyi ma-a, abana yi bhuka ma de-e, yi de bhuka ngabha mbo ongamba 'ngú angoo. Yi bhuka ongamba 'ngú angoo ngubula nambila ndjindji me 'Dyi ma ngakobho bhú ma, ma la di ngakobho bhú ani.» <sup>39</sup> Abhomu-o, u agili matá naholo ani. Engú bini, ani atsia akobho sa 'kpa uo.

<sup>40</sup> Yesu atsia agie matá lie ayi 'ngu na Djuludani, li bili inde li Djaa adu nani abatisa okpála li e kalanu-o. Ani atsia adu oo. <sup>41</sup> Okpála bhelé ago nabhaka ani. U adu apa me: «Djaa mene ngamba 'ngú belegu de bini. Engú bini, ndu 'ngú hana inde ani apa nani e pindji kpála inde-e, a ko kukulu 'ngú.» <sup>42</sup> Oo, okpála bhelé abhuka ani.

## 11

### *Ladjalo akpi*

<sup>1</sup> Kpála bini inde adu 'li e me Ladjalo, asi kuo. Ani adu nadu bhú Betania, kuti li Malia ne ndai e Malata adu nadu bhú e-o. <sup>2</sup> Malia ne ole inde atuko nani mangotsi li 'dhu Ngamá, ani atsia akuo ne sundjo e-o. Ladjalo inde adu ne kuo-o, nani ne ndai ani. <sup>3</sup> Ondaise ani na olisilisi bhisí bhomu-o, atima kpála ngu napa pi Yesu me: «Ngamá, ali kpála mo

† 10:34 10:34 Tsia bhú Ets. 82:6.



okukunda e ne kuo.» <sup>4</sup> Li Yesu adje engú bhomú-o lie, ani atsia apa me: «Kuo bhomú-o ngubula nabhele ani mabhele ade. Engú bini, a ngubula naha sangu pi Ebhe. A ko la di ngubula me ngama, Ndili gba Ebhe-e, ma sia sangu bhúbhú.»

<sup>5</sup> Yesu adu ne mukunda pi Malata, ne ndai e na eole, di ne Ladjalo naali. <sup>6</sup> La-a, ani adje lie me ali Ladjalo ne kuo-o, ani amene matá 'kpí bhisí li bili abhaka me ani nde li e-o. <sup>7</sup> Pipita-a, ani apa pi omukpata gba e me: «Ní gie matá liní bhú ndu doto na Yudaya.» <sup>8</sup> Omukpata-a apa pi ani me: «Musunu, a mene nga 'kpí bhelé de, omaYuda adu nako agili nabhele mu ne teme oo. Mo odji matá bha oo?» <sup>9</sup> Yesu agie pi uo me: «Ngbikpi ne saa ndjikpa ne ká bhisí. A mo-o adi? I du me kpála nde ngadhuku ne ngbikpi-e, ani dó 'dhu e de. Padhá de, anga ani ngau zi 'kpí na doto inde-e ndjindji. <sup>10</sup> Engú bini, i du la me kpála nde ngadhuku sukpe-e, ani dó 'dhu e. Padhá de, anga ani li zi 'kpí ade.»

<sup>11</sup> Pita li Yesu apa 'ngú bhomú-o lie, ani atsia apa pi uo me: «Ladjalo, olia ní-e, ani ala. Engú bini, ma adji, amba na zuku ani.» <sup>12</sup> Abhomú-o, omukpata gba ani-e atsia apa pi ani me: «Ngámá, i du me ani nde tila-a, ani dú bhú mukobho.» <sup>13</sup> A na paká me Yesu adu apa me Ladjalo akpi. Engú bini, omukpata-a adu abhundja naao me ani akpo 'ngú pindji ela inde li okpála alala e-o. <sup>14</sup> Abhomú-o, Yesu atsia apa pi uo mbámbá me: «Ladjalo akpi. <sup>15</sup> Ma ne djali pi yi anga ma du nako oo de, amba yi bhuka ma. Engú bini, ní nu nabhaka ani!» <sup>16</sup> Abhomú-o, Tuma (inde u agisila 'li e me Bhuko-o), apa pi omukpata koko me: «Ngani-e, ní

nu di oo, ngubula me ní mu ne Musuno bhú dabili bini.»

*Malata anu naké lie ne Yesu*

<sup>17</sup> Li Yesu akolo lie, ani abhaka me u azi Ladjalo azi, a nde ane nga 'kpí badha. <sup>18</sup> Kutí na Betania du nani de gudhu na Yelusalema masikpe de kilometele bata. <sup>19</sup> A abhaka me omaYuda bhelé nde ago oo ngú nateteke Malata ne Malia ka li ndai uo na bhobhoko-o akpi lie ko.

<sup>20</sup> Li Malata adje lie me Yesu akolo de kuti masikpe-e, ani anu aké lie ne ani li kpadji. Engú bini, Malia adu naae akuti. <sup>21</sup> Abhomú-o, Malata atsia apa pi Yesu me: «Ngámá, mu dú nako si-e, ndai ma de kpi de. <sup>22</sup> Engú bini, ma ambila me belegu mbia inde-e, Ebhe ti da naha ndu 'he hana inde mo oyó e ka ani-e pi mu.» <sup>23</sup> Yesu apa pi ani me: «Ndai mu azúku mazuku.» <sup>24</sup> Malata agie pi ani me: «Ma ambila me ani azúku li 'kpí li okpála inde amu-o, azúku lie li sokpi-o.»

<sup>25</sup> Yesu apa pi ani me: «Kpála nazuku okpála-a, a ko ma. Kpála naha la di mukobho pi okpála-a, a ko ma. Kpála inde abhuka ma-a, abana ani kpi, ani kóbho. <sup>26</sup> La di-e, kpála ne kpála inde bhú mukobho, inde abhuka la di ma-a, ani kpi duduma de. Mo obhuka mo-o?» <sup>27</sup> Malata agie me: «A moko, Ngámá, ma abhuka me mu ne Masiya, Ndili gba Ebhe. Kpála inde a ayo me ani go pfa doto ko.»

*Malia anu di naké lie ne Yesu*

<sup>28</sup> Pita ani apa 'ngú bhomú-o lie, Malata anu a'i ndai e Malia. Do ani pi ani bhú tupele me: «Musunu aoo. Ani nga'i mu.» <sup>29</sup> Li Malia adje lie mo-o, ani ayie kolo bhúlá má kia! Ani atsia anu abhaka Yesu. <sup>30</sup> A adu me Yesu nde kolo nga bhú kuti na Betania de. Engú bini, ani adu ngabha li bili inde li Malata anu aké lie ne ani li e ko. <sup>31</sup> Li omaYuda

inde adu abhú 'ti ngú nateteke Malia au lie me aní ayie bhúlá ne nakoto kilidjo bhú holo-o, u atsia akpata aní. Padhá de, anga u adu abhundja naao me aní adji aku 'gba apí lata.

<sup>32</sup> Malia akolo li bili li Yesu adu li e-o. Aní au Yesu lie, aní ati bhú li 'dhu aní. Aní atsia apa pi aní me: «Ngámá, mu dú nako si-e, ndai ma de kpi de.» <sup>33</sup> Yesu au me aní ngaku 'gba di ne okpála inde ago ne aní bhú dabili bini-o. Aní asia likabhu naali li bua e. Mabhundja gba aní-e atsia angbingi di. <sup>34</sup> Abhomu-o, aní atsia ayi uo me: «Yi azi aní su?» U agie pi aní me: «Ngámá, gogo, amba mu u.» <sup>35</sup> Yesu aku 'gba. <sup>36</sup> Abhomu-o, omaYuda atsia apa me: «Yi u maka aní akunda nako aní lie ko!» <sup>37</sup> Engú bini, okpála koko bhú ká uo atsia apa me: «Ngaani inde abhulu nako djila kpála inde i u kpi de-e, aní ti da nako namene de me Ladjalo akpi de-e di?»

#### *Yesu azuku Ladjalo*

<sup>38</sup> Abhomu-o, Yesu asia matá likabhu naali li bua e. Aní anu abhú lata. A adu nani lata inde u adji e bhú teme. U aní nani bhobho ne teme na ngbéngbé. <sup>39</sup> Abhomu-o, Yesu atsia apa me: «Yi 'e teme-o.» Malata, ndai kpála inde akpi-e, apa pi aní me: «Ngámá, se aní aholo napu aholo. Padhá de, anga aní amene nga sató 'kpi badha.» <sup>40</sup> Yesu agie pi aní me: «Ma pa igini pi mu de me, i du me mu nde abhuka ma-a, mu ú sangu gba Ebhe-e di?» <sup>41</sup> Abhomu-o, u a'e teme-o. Yesu atsia 'kpi ne bhúlá, aní atsia apa me: «'Dyi ma, ma ngagie heni pi mu, anga mo odje ma. <sup>42</sup> Ma ambila ndjindji me mu ngadje ma ndu 'kpi hana. Ma ngapapa mo-o ka okpála inde asa lio dengo ma inde, amba u bhuka me, mo oti ma ngamu.» <sup>43</sup> Aní apa 'ngú

bhomu-o lie, aní asula kpekpeke me: «Ladjalo, koto ei!» <sup>44</sup> Ladjalo akoto. Aní akoto me 'dhu aní, di ne 'kpa aní nde agbighite lie ne opapala bongo . Bhúla aní nde agbite la di lie ne bongo. Yesu atsia apa pi uo me: «Yi bhulu aní, amba yi 'o aní, aní tapa.»

#### *Ongámási gba omaYuda adje lio ngú nabhøle Yesu*

(*Tsia bhú Mat. 26:1-5; ne bhú Mlk. 14:1-2; di ne bhú Luk. 22:1-2.*)

<sup>45</sup> Abhomu-o, omaYuda bhelé bhú ká okpála inde ago gba Malia au engú inde li Yesu amene e-o. U atsia abhuka Yesu. <sup>46</sup> Engú bini, okoko bhú ká uo anu abhaka omuFalisai . U akpokpo 'ngú inde li Yesu amene e pi uo. <sup>47</sup> Abhomu-o, ongbengbe odimandø gba Ebhe , di ne omuFalisai apo bhúla o bhú 'ngbé bula. U atsia apa me: «Kpála inde-e ngamene ongamba 'ngú bhelé. Ní améne si pi? <sup>48</sup> I du me ní nde a'o me aní du bha anu ne di ne kalanu me-e, ndu okpála hana bhúka aní. Pipita-a, okpála na gudhu na Loma kólo ne angu. U bhøle 'ngbé 'ti Ebhe gba ní-o. U tsia bhøle la di kuti gba ní-o!»

<sup>49</sup> Kpála bini adu bhú ká uo. A adu 'li aní me Kaifa. Aní adu bhele kpála gba odimandø bhú kalanga bhomu-o ngae. Aní apa pi uo me: «Ngayi-e, yi mbila 'ngú de! <sup>50</sup> Yi mbila de me a pi yi ndjindji me kpála bini kpi pi ndu okpála hana, amba kuti libhomu akpi de-e di?» <sup>51</sup> La-a, aní du apa 'ngú bhomu-o bhú ngu e de. Engú bini, a adu la lie me aní nde ne bhele kpála gba odimandø bhú kalanga bhomu-o ngae-e, aní atsia apa 'ngú maka polofeta me: «A ayo me Yesu kpi ngubula kuti gba omaYuda-o. <sup>52</sup> Aní kpi bha bini ngubula omaYuda de. Engú bini, aní kpi ngubula me ni po bhúla

ongisi gba Ebhe inde atsambala ne bili ngangá-a bhú piga bini.»

<sup>53</sup> Nayie li 'kpí bhomu-o, ongámási gba omaYuda atsia adje lio me o bhөлө Yesu. <sup>54</sup> Kaka-a, Yesu da matá adholo mbámhá bhú ká omaYuda de. Aní atapa bhú gudhu na Efalaimе, bhú ndu doto inde de egu-o. Abhomu-o, aní atsia adu ne omukpata gba e oo.

<sup>55</sup> Pasika gba omaYuda akolo masikpe. Kaka-a, okpála bhelé na kuti ango-o atsia anu bhú gudhu na Yelusalema ngubula me o vulu lio, amba o da pi Ebhe bubu kala anokomia-o. <sup>56</sup> Abhomu-o, u adu agili Yesu. U alulu bhú 'ngbé 'ti Ebhe gba omaYuda-o. U atsia adu ayi lio sunda o me: «Yi abhundja pi? Aní agó bha ndju bhú anokomia inde-e mago? Ne me, aní gó-o de?» <sup>57</sup> Ongbengbe odimandə gba Ebhe, di ne omuFalisai aha nani líli me: «Ɛ da me kpála nde ambila bili inde li Yesu nde lie-e, aní de pa, amba u nu holo ani.»

## 12

*Malía atuko mungotsi li 'dhu Yesu*

*(Tsia bhú Mat. 26:6-13; di ne bhú Mlk. 14:3-9.)*

<sup>1</sup> Abhomu-o, ekpí madhia kala Pasika-a, Yesu anu bhú kuti na Betania. A bhomu-o bili inde li Ladjalo, kpála inde li Yesu azuku e adu nadu li e-o. <sup>2</sup> Oo, u aha ezu pi aní, Malata atsia adu a'o'o kala ani. Ladjalo atsia adu di bhú ká okpála inde adu azu 'he bhú dabili bini ne Yesu-o. <sup>3</sup> Abhomu-o, Malia aha gili bini inde li mungotsi na mase naali adu bhú e-o. U amene nani mungotsi ango-o bha li ndula inde 'li e me nalade.\* Aní aha, aní atuko li 'dhu Yesu. Aní akuo 'dhu aní ne sundjo e. Bádha se

mungotsi ango-o atsia aha eti-e libhomu.

<sup>4</sup> Engú bini, Yuda Isikaliote, saka omukpata gba Yesu, kpála inde apú aní pi obhulu yala-a, atsia apa me: <sup>5</sup> «A ayo igini de me u tsindji mungotsi inde-e li lí denalio kámá bata, amba u ha falanga ango-o pi obhulu ndibhili-e di?» <sup>6</sup> La-a, a ko de me aní apa mo-o, anga aní adu ne ndjinga obhulu ndibhili-e de. Engú bini, a ko anga aní adu bhulu 'zi. Padhá de, anga aní adu la alila gba tia lie ngae-e, aní adu azi tété. <sup>7</sup> Engú bini, Yesu atsia apa me: «'O elə bhomu! Padhá de, anga engú inde aní amene e, a ngubula ekpí inde u azí ma lie bhú lata ko. <sup>8</sup> Padhá de, anga yi adu bhú dabili bini ne obhulu ndibhili ndu 'kpí hana. Engú la bini, ngama-a, ní dú ne yi ndu 'kpí hana de.»

*Ongbengbe odimandə adje lio ngú nabhөлө Ladjalo*

<sup>9</sup> Abhomu-o, bhiti omaYuda adje me Yesu abhú kuti na Betania, u atsia anu oo. U nu oo bha bini ngubula Yesu de, engú bini, u anu di me o u Ladjalo inde li Yesu azuku e-o. <sup>10</sup> Abhomu-o, ongbengbe odimandə gba Ebhe-e atsia adje lio me o bhөлө di Ladjalo. <sup>11</sup> Padhá de, anga omaYuda bhelé adu a'o ká uo, u atsia adu abhuka Yesu ka engú gba Ladjalo-o.

*Yesu alí bhú gudhu na Yelusalema*

*(Tsia bhú Mat. 21:1-11; ne bhú Mlk. 11:1-11; di ne bhú Luk. 19:28-40.)*

<sup>12</sup> Ekpí bhe pipita-a, bhiti okpála na bhibhiti inde ago bhú anokomia na Pasika adje me Yesu adji bhú gudhu na Yelusalema. <sup>13</sup> Abhomu-o, u abha 'kpá ngulu, u aze ngú nanu nakə lio ne aní. U atsia adu asusula me:

\* **12:3** 12:3 Nalade: A ko mungotsi inde u amemene e li 'kpá ulu. Tsia bhú Mat. 26:7.

«Sangu pi Ebhe!

A ayo me Ebhe Ngámá tuko bisagu  
pí kpála inde ngago ne 'li  
ani-o!

A ayo me Ebhe tuko bisagu  
pí 'ngbé Ngámá gba  
omafsalaele-o!†»

<sup>14</sup> Yesu au ndili punda, ani atsia  
a'ũ pí 'ngbu ani maka li Bhuku  
apa lie me:

<sup>15</sup> «Gudhu na Siona, mo odjé tsulu  
de!

Tsitsia, 'ngbé Ngámá gba m-  
o ngago,

ani adu pí 'ngbu ndili punda  
na øøø.†»

<sup>16</sup> Li nedhinga bhomu-o,  
omukpata gba ani-e mbila nga  
nani ta engú ang-o de. La li  
nedhinga inde li Yesu asia sangu  
gba e lie, u atsia abhundja me  
u aye nani ongu bhomu-o bhú  
Bhuku gba Ebhe-e pindji ani. U  
atsia amene pi ani.

<sup>17</sup> Abhomu-o, bhiti okpála inde  
adu nani bhú dabili bini ne ani  
li nedhinga inde ani a'i Ladjalo  
lie me ani koto bhú lata-a, ani  
atsia azuku di ani-e, adu akpokpo  
'ngú inde u au e-o. <sup>18</sup> Kaka-a,  
bhiti okpála ang-o abhaka ani.  
Padhá de, anga u adje nani me  
ani amene ngamba 'ngú bhomu-  
o. <sup>19</sup> Abhomu-o, omuFalisai atsia  
apa sunda o me: «Yi au, ní ti da  
namene 'he bini de. Ndu okpála  
hana agbida nganda ani!»

### *OGiliki koko agili Yesu*

<sup>20</sup> OGiliki koko adu bhú ká  
okpála inde ago bhú gudhu na  
Yelusalema ngu nadhøø Ebhe  
bhú anokomia-o. <sup>21</sup> U adyudyo lio  
de Filipino, kpála na gudhu na Bete-  
saida, bhú ndu doto na Galilaya.  
U atsia apa pi ani me: «Musuno,  
ya akunda nau Yesu.» <sup>22</sup> Filipino  
anu apa pi Andili. Pipita-a, ndu uo  
bhisi hana atsia anu apa pi Yesu.

<sup>23</sup> Yesu agie pi uo me: «Mbia inde-  
e, a ko nedhinga inde a ayo lie me  
Ndili gba kpála sia sangu gba e-o.

<sup>24</sup> A moko, ma apa pi yi na paká  
me: i du me li ngano bini nde ati  
bhú doto, i kpi de-e, i tígala bha  
ngae kpi e kpi. Engú bini, i du  
la me a nde akpi-e, i li lílí bhelé.

<sup>25</sup> Kpála inde akunda mukobho  
gba e, ani kpi. Engú bini, li kpála  
bini kunda Ebhe ane mukobho  
gba e píla doto inde-e, mukobho  
ango-o líla lie, li kpála ang-o tsia  
sia di mukobho na duduma. <sup>26</sup> †  
du me kpála nde akunda namene  
kulu lie muma-a, a ayo me kpála  
ango-o kpata ma. La di-e, bili inde  
ma adú li e, kpála na kulu gba ma-  
a adú bhadi oo. 'Dyi ma adhøø  
kpála inde ngamene kulu muma  
ko.»

*Yesu akpo 'ngú pindji nakpi ka  
e*

<sup>27</sup> «Mbia inde-e, bua ma ngadje  
likabhu. Ma apa la pi? Ma pá  
de me, 'Dyi ma, kobho ma li  
nedhinga inde-e de.» Padhá de,  
anga ma ago ngubula nedhinga  
ango-o. <sup>28</sup> 'Dyi ma-e, dhøø 'li  
mu!» Abhomu-o eli ayie abhúlá,  
atsia apa me: «Ma adhøø ani  
adhøø. Ma adhøø la matá ani  
madhøø.» <sup>29</sup> Abhomu-o, bhiti  
okpála inde adu oo, inde adje la di  
eli ang-o, adu apa me: «Mugbálá  
asula bhomu-o ngae!» Okoko at-  
sia adu apa me: «Andjelu bini  
agama 'ngú pi ani ngae.»

<sup>30</sup> La-a, Yesu apa pi uo me: «Eli  
bhomu-o pa lie ka 'ngú ka ma de.  
Engú bini, a apa lie ka 'ngú ka  
yi. <sup>31</sup> Mbia inde-e, u akódho 'ngú  
gba okpála na píla doto. Mbia  
inde-e, u ató holo bhú 'dhu ngámá  
na doto inde. <sup>32</sup> La ngama-a,  
li nedhinga inde u a'é'e ma lie  
abhúlá-a, ma agbéle ndu okpála  
hana li pápá gba ma.» <sup>33</sup> Yesu adu

apa 'ngú bhomu-o ngú nasuno lele maka ani akpí lie-o.

<sup>34</sup> Abhomu-o, bhiti okpála-a atsia agie pi ani me: «Ya adje bhú bhuku na líli me Masiya adú dáduma ne dáduma. Lele pi mu ngapa lie me u a'é'e Ndili gba kpála abhúlá? Ndili gba kpála ango-o ne da?» <sup>35</sup> Abhomu-o, Yesu atsia agie pi uo me: «Zi 'ke nga matá bhú ká yi ngubula nedhinga bedi. Yi dhuku bhú nedhinga inde yi nde nga lie ne zi 'ke, ngú nakpe me biti ahólo yi bhú gbilikiti de. Padhá de, anga kpála inde ngadhuku bhú biti-e mbila bili inde ani adji li e de. <sup>36</sup> Nedhinga yi nde lie ne zi 'ke-e, yi bhuka zi 'ke ango-o, amba yi kolo ongisi na zi 'ke.» Pita li Yesu apa engú bhomu-o lie, ani atapa, ani atsia anu awo lie de uo tsutsu.

#### *OmaYuda bhuka Yesu de*

<sup>37</sup> Abana li Yesu amene ongamba 'ngú lie bhelé-e, omaYuda du abhuka ani de. <sup>38</sup> U du abhuka ani de ngubula napa me engú inde li polofeta Isaya apa e-e, a mene lie, engú inde me:

«Ngámá, abhuka engú inde ya adu apa e da?

Ngámá apana angu gba e pi da?†»

<sup>39</sup> Isaya apa di nani me, ka ni li okpála bhomu-o ti nani da nabhuka lie de-e. Ani apa me:

<sup>40</sup> «Ebhe agbite djila uo.

Ani adji bua uo maka teme, ngubula me u aú 'kpí de, ngubula me u ambíla 'ngú bini de,

di me u adjí bua o de,

amba Ebhe akóbho uo de.†»

<sup>41</sup> Isaya apa engú bhomu-o, anga ani au nani sangu gba Yesu-o. Ani atsia akpokpo di 'ngú pindji ani. <sup>42</sup> La-a, belegu bhú ká ongámási gba omaYuda-a, bhelé

abhuka Yesu. Engú bini, ka nakpe omuFalisai-e, u du apa engú ango-o mbámhá de. Padhá de, anga u adu akpe me, u apándja o bhú 'ti nadge líli gba Moidje de. <sup>43</sup> U adu akunda me okpála dhege o ane me Ebhe dhege o ngae.

#### *Kpála inde abhúka 'li Yesu-o, ani kóbho*

<sup>44</sup> Yesu asula me: «Kpála inde abhuka ma-a, ani bhuka bhomu-o ma de. Engú bini, ani abhuka kpála inde atima ma ko. <sup>45</sup> Kpála inde ngau ma-a, ani ngau bhomu-o kpála inde atima ma-o. <sup>46</sup> Ngama-a, ma ago píla doto maka zi 'ke, ngubula me ndu okpála hana inde abhuka ma-a, adú bhú biti de. <sup>47</sup> I du me kpála nde adje 'li ma-a, ani lila de-e, ma kódho 'ngú gba ani-e ngama de. Padhá de, anga ma go ngubula na'o 'ngú pí okpála de. Engú bini, ma ago ngú nakobho uo. <sup>48</sup> Kpála inde ayala ma-a, inde i ziba di 'li ma de-e, u akódho 'ngú gba ani-o. Eli inde ma apa e, eli ango-o akódho 'ngú gba ani li sokpí-e ngae. <sup>49</sup> Padhá de, anga ma pa 'ngú gba ma makpe de. 'Dyi ma inde atima ma-a, aha líli muma ngae makpe ngubula ndu 'ngú hana inde a ayo me ma pa e, di ne bhende a ayo me ma kpokpo e-o. <sup>50</sup> Padhá de, anga ma ambíla me líli gba ani-e ngaha mukobho na dáduma. Kaka-a, ndu 'ngú hana inde ma ngapa e, ma ngapapa maka li 'Dyi ma apa muma lie ko.»

## 13

### *Yesu avulu 'dhu omukpata gba e*

<sup>1</sup> A adu nani ekpí kala anokomia na Pasika. Yesu ambíla nani me nedhinga nayie ka ni píla doto inde-e, ngú nanu agba 'Dyi ni-e akolo. Ani adu akunda okpála gba

e inde píla doto-o. Aní akúnda uo akolo alí soso.

<sup>2</sup> Yesu ne omúkpata gba e adú azú 'he tagolo. A adú me Djabulú nde a'o lí bua Yuda, ndílí gba Simo Ísikaliote, me aní pú Yesu pí obhulú yala. <sup>3</sup> Yesu ambila nani ndjindji me ngani makpe-e, ní ayie agba Ebhe. Aní atsia ambila la bhadi ndjindji me ní agie líní agba Ebhe, la dí me 'Dyi ní a'o ndú 'ngú hana sa 'kpa ní. <sup>4</sup> Aní ayie bhulá, aní ayie lí bílí nazú 'he-o. Aní agbe bongo inde u adyidyí e pí bongo koko-o. Aní aha pála bongo, aní agbite ludu e. <sup>5</sup> Pipita-a, aní aha engu, aní atuko bhú base. Aní aholo navulú 'dhú omúkpata gba e ne dí. Aní atsia adú akukuo ne bongo inde aní agbite e ludu e-o.

<sup>6</sup> Aní akolo lí Simo Piele. Do Piele pí aní me: «Ngámá, mo ovulú bha ndjú 'dhú ma ngamú makpe?» <sup>7</sup> Yesu atsia agie pí aní me: «Engú inde ma ngamene e mbia inde-e, mú mbila de. Engú bini, mo ombíla sídì.» <sup>8</sup> Piele apa pí aní me: «A mo-o ade. Mú vúlú 'dhú ma belegu de bini!» Yesu atsia agie pí aní me: «Í dú me ma nde vúlú 'dhú mú de-e, mú tí da nadú bhú dabilí bini ne ma de.» <sup>9</sup> Simo Piele apa pí aní me: «Ngámá, mo ovulú bha bini 'dhú ma de. Engú bini, vúlú dí 'kpa ma, ne 'ndji ma!» <sup>10</sup> Yesu apa pí aní me: «Kpála inde avulú kúte e avulú-o, kúte aní libhomu akolo ndjindji. Aní tí matá da navulú kúte e de. Engú bini, aní vúlú bha íbílí 'dhú e. Ngayi-e, yí bubu. La-a, yí bubu ndú yí hana ade.»

<sup>11</sup> Yesu apa 'ngú bhomú-o anga aní adú ambila ndjindji me, apú ní pí obhulú yala da-ie. Kaka-a, aní atsia apa me: «Yí ndú yí hana bubu ade.»

<sup>12</sup> Pita aní avulú 'dhú uo lie, aní aha bongo gba e, aní adyí. Aní

agie lie lí bílí nazú 'he-o. Aní atsia apa pí uo me: «Yí mbíla ta 'ngú inde ma amene e lí yí-e uu? <sup>13</sup> Yí nga'í ma me: «Músuno», yí la dí nga'í ma me: «Ngámá.» A ko kúkúlú 'ngú, anga ma mo-o. <sup>14</sup> Í dú me ngama, inde ne Ngámá, inde la dí ne Músuno-o, ma nde avulú 'dhú yí-e, ngayí dí-e, yí de vúlú 'dhú yí sùnda yí moko. <sup>15</sup> Ma asuno pí yí bhomú-o me amba ngayí dí-e, yí mene maka ma amene pí yí lie ko. <sup>16</sup> A moko, ma apa pí yí na paká me, kpála na kulu ngebéngbé ane ngámá gba e ade. La dí-e, bhulú titima ngebéngbé ane kpála inde atima aní-e ade. <sup>17</sup> Mbia inde-e, yí ambíla ndú ongú bhomú-o hana ambíla. A ko djali pí yí, í dú me yí nde ngamene ongú angó-o.

<sup>18</sup> Engú inde ma ngapa e, a pí ndú yí hana ade. Ma mbíla okpála inde ma abhú o-o hana. Engú bini, a ayo me engú inde u aye e bhú Bhuku gba Ebhe-e, a mene lie, engú inde me: «Kpála inde ya adú azú 'he ne e bhú dabilí bini-e, adji lie bhulú yala gba ma.†» <sup>19</sup> Ma apa pí yí mbia inde-e kala nakolo ka ongú angó-o, amba lí engú angó-o akólo lie, yí bhuka me ngama-a «Ma uu.» <sup>20</sup> A moko, ma apa pí yí na paká me: í dú me kpála nde asia kpála inde ma atima e, amba aní asia bhomú-o ma. Í dú la dí me kpála nde asia ma-a, amba aní asia bhomú-o kpála inde atima ma-o.»

*Yesu apa me Yuda apú ní pí obhulú yala gba ní-o*

*(Tsia bhú Mat. 26:20-25; ne bhú Mlk. 14:17-21; dí ne bhú Luk. 22:21-23.)*

<sup>21</sup> Pita lí Yesu apa ongú bhomú-o lie, aní asia líkabhu lí bua e naalí. Aní atsia apa mbámá me: «A moko, ma apa pí yí na paká me:

† 13:18 13:18 Tsia bhú Ets. 41:10.

suka yi bini apú ma pi obhulú yala gba ma-o.»<sup>22</sup> Omukpata-a aholo natsitsia bhúla o. U dú ambíla de me Yesu ngapa inde-e engú gba da-ie de.<sup>23</sup> Li nedhinga u adú azú 'he lie, suka omukpata gba Yesu inde li Yesu adú akúnda e naali-e, aseke 'ndji e pi mbulu ani.<sup>24</sup> Abhomú-o, Simo Piele amene 'kpa e pi mukpata angó-o me, ani yi Yesu me ani ngapa engú gba da.<sup>25</sup> Abhomú-o, mukpata angó-o adji bhúla e li pápá gba Yesu. Ani atsia ayi Yesu me: «Ngámá, a ko e da?»

<sup>26</sup> Yesu agie pi ani me: «Ma ngatunú mapa bhú 'mú 'zú-o, kpála inde ma ahá pi e-e, a ko ani.» Abhomú-o, Yesu aha mapa, ani atunú bhú 'mú 'zú-o. Pipíta-a, ani atsia aha pi Yuda, ndíli gba Simo Isikalote.<sup>27</sup> Bha li nedhinga li Yuda aha mapa-a lie, Satana ali bhú ani. Yesu atsia apa pi ani me: «Engú inde mú nde ne e, mene má gala!»<sup>28</sup> Kpála bini bhú ká okpála inde u adú azú 'he ne o-o mbíla de me ani apa pi Yuda mo-o ka ni-ie de.<sup>29</sup> Li Yuda adú alila tia lie ngae, kaka-a, okpála koko adú abhundja naao me, ani apa pi Yuda me ani kala ezú inde a ayo me u kala e ngú anokomia-o, ne me ani ha mbo ehe pi obhulú ndibhíli.<sup>30</sup> Li Yuda aha ndu mapa lie, kolo má gala me-e, ani akoto kilidjo. A adú me ekpí nde abi.

### *Líli na mbia*

<sup>31</sup> Pita li Yuda akoto lie, Yesu atsia apa me: «Mbia inde-e, Ndíli gba kpála, asia sangu gba e asia. Ebhe asia la di sangu ka ani.<sup>32</sup> Maka li Ebhe asia sangu ka ani lie, Ebhe asúno ngae makpe sangu gba ani-o. Ani asúno má gala!»<sup>33</sup> Odi ma, ní dú matá ne yi ngubula 'kpí bhelé de. Pipíta-a, yi agíli ma. Engú la bini, ma ngapa pi yi mbia inde-e engú inde ma apa e pi omaYuda koko me, yi tí da nanú li bíli inde ma adji

li e de.<sup>34</sup> Ma ngaha pi yi-e líli na mbia. Líli inde me yi dú ne mukúnda sunda yi. A ayo me yi dú ne mukúnda sunda yi maka ma nde lie ne mukúnda pi yi ko.<sup>35</sup> Padhá de, anga i dú me yi nde ne mukúnda sunda yi-e, li ndú okpála hana mbíla me yi ne omukpata gba ma-o.»

<sup>36</sup> Simo Piele ayi ani me: «Ngámá, mo odji su?» Yesu agie pi ani me: «Mú tí da nakpata ma li bíli ma adji li e mbia inde-e de. Engú bini, mo okpála ma sídi.»<sup>37</sup> Piele apa pi ani me: «Ngámá, ma tí da nakpata mú mbia inde-e de ka ní? Ma bedhe ngú nandala 'kpa li mukobho gba ma-a ngubula mú!»<sup>38</sup> Yesu agie pi ani me: «Mú bha ndjú bedhe ngú nandala 'kpa li mukobho gba mú-o ngubula ma? A moko, ma apa pi mú na paká me, kala me engú ku 'gbá-a, mo opá bhútsibhútsi bata me ní mbíla ma de.»

## 14

### *Yesu ne kpadji ngú nanú agba Ebhe*

<sup>1</sup> Yesu apa pi omukpata gba e me: «Yi a'ó bua yi abhúlá de. Yi bhuka Ebhe, yi bhuka di ma.<sup>2</sup> Abhú 'tí gba 'Dyi ma-a, dabíli nadú tété-e bhelé. Ma adji naleke dabíli pi yi. I dú mo-o de-e, ma de apa pi yi apa.<sup>3</sup> Pita nanú ka ma naleke dabíli pi yi-e, ma agó matá, ma atsia há yi ngú nadú bhú dabíli bini ne yi, amba bíli inde ma ngadu li e, yi dú bhadi tété.<sup>4</sup> Yi mbíla la di kpadji na bíli inde ma adji li e hana.»

<sup>5</sup> Tuma apa pi ani me: «Ngámá, ya mbíla bíli mo odji li e de. Ya tí da nambíla kpadji-e lele pi?»<sup>6</sup> Yesu agie pi ani me: «Ma ne kpadji. Ma ne kukulú 'ngú. Ma la di ne mukobho. Kpála bini tí da nanú agba 'Dyi ma li kpadji koko de, bha bini me ani nde apú

li pápá gba ma. <sup>7</sup> I ðu me yi nde ambíla ma-a, yi mbíla di 'Dyi ma. Nayie pi mbia inde-e, yi mbíla aní hana. Yi au la di aní au.»

<sup>8</sup> Filipino apa pi aní me: «Ngámá, pana 'Dyi mu pi ya, amba ale pi ya.» <sup>9</sup> Yesu agie pi aní me: «Filipo, enú ní abhue lie ne yi ngengele-e, mu mbíla nga ma sii di? Kpála inde au ma-a, aní au 'Dyi ma au. La ka ní mu ngapa lie me: «Pana 'Dyi mu pi ya?» <sup>10</sup> Mu bhuka de me ma ngadu bhú 'Dyi ma, 'Dyi ma la di ngadu bhú ma-a di? Oeli inde ma ngapa e pi yi-e, ayie ka ma makpe de. Engú bini, 'Dyi ma inde ngadu bhú ma-a, aní ngamene kulu gba e-o. <sup>11</sup> Yi bhuka ma, maka ma apa lie pi yi me ma ngadu bhú 'Dyi ma, 'Dyi ma la di ngadu bhú ma-o. I ðu mo-o de-e, yi de bhuka ka kulu inde ma ngamene e-o. <sup>12</sup> A moko, ma apa pi yi na paká me: kpála inde abhuka ma-a, aní améne bhadi okulu inde ma ngamene e-o. Aní améne belegu okulu na ng-bengbengbe ane bhende-e mane. Padhá de, anga ma adjí agba 'Dyi ma. <sup>13</sup> Ma améne ndu 'ngú hana inde yi ayó e ne 'li ma-a mamene, ngubula me 'Dyi ma sia sangu gba e bhú ma, Ndili gba e ko. <sup>14</sup> I ðu me yi nde ayo 'he ka ma ne 'li ma-a, ma améne.

*Ebhe atíma Bu Bhobua pi obhulu titima gba Yesu*

<sup>15</sup> I ðu me yi nde akunda ma-a, yi líla olíli gba ma-o. <sup>16</sup> Ma ayó ka 'Dyi ma me aní ha kpála koko ngú nateteke yi. Aní adú ne yi ðaduma ne ðaduma. <sup>17</sup> A ko Bua na kukulú 'ngú inde li okpála na píla doto ti da nasia e de. Padhá de, anga u u aní de. U mbíla la di aní de. Engú bini, ngayi-e, yi mbíla aní hana, anga aní ngadu bhú ká yi. Aní la di ngadu bhú yi. <sup>18</sup> Ma 'ó ká yi kpi yi kpi maka otsulosi de. Engú bini,

ma agie matá lima agba yi magie. <sup>19</sup> Atigala nedhinga bedi, okpála na píla doto ú matá ma de. Engú bini, ngayi-e, yi aú ma, anga ma bhú mukobho. Ngayi di-e, yi adú bhú mukobho. <sup>20</sup> Li 'kpí ango-o, yi ambíla me ma ngadu bhú 'Dyi ma, yi ngadu bhú ma, ma la di ngadu bhú yi. <sup>21</sup> Kpála inde akunda ma-a, a ko kpála inde ngalila, di ne namene olíli gba ma-o. 'Dyi ma akúnda kpála inde akunda ma-o. Li ma kúnda di aní. Ma tsia pána lima pi aní.»

<sup>22</sup> Abhomu-o, Yuda (a ko Yuda Isikaliote de) apa pi Yesu me: «Ngámá, mo opána bha bini limu pi ya, lele pi mu tsia pána limu pi okpála na píla doto lie de-e?» <sup>23</sup> Yesu agie pi aní me: «I ðu me kpála nde akunda ma-a, aní méne engú inde ma ngapa e-o. Li 'Dyi ma kúnda aní. Ngaya ne 'Dyi ma-a, ya agó agba aní, ya tsia dúlu oo ko. <sup>24</sup> Kpála inde i kúnda ma de-e, aní méne oeli ma ngapa e de. Engú inde yi ngadje ma ngapa e, a ngayie ka ma ade. Engú bini, a ngayie ka 'Dyi ma inde atíma ma ko.

<sup>25</sup> Ma apa ongu bhomu-o pi yi li nedhinga inde ní nde ngabha lie ne yi bhú dabili bini-o. <sup>26</sup> 'Dyi ma atíma Bu Bhobua pi yi ne 'li ma. Aní atéteke yi ngae. Bu Bhobua ango-o asúno ndu 'ngú hana pi yi ngae. Aní tsia méne di me yi bhundja ndu 'ngú hana inde ma apa e pi yi ko. <sup>27</sup> Ma a'o pi yi guo 'ngú . Ma aha guo 'ngú gba ma-a pi yi. Ma ha pi yi maka li okpála na píla doto ngahaha lie de. Kaka-a, yi a'ó bua yi abhúlá de. Yi adjé la di tsulu de. <sup>28</sup> Yi adje maka ma apa lie pi yi me: «Ma adjí, engú bini, ma agie matá lima agba yi magie.» I ðu me yi kúnda ma uu-o, yi de kpí djali kabula me ma adjí agba 'Dyi ma. Padhá



de, anga 'Dyi ma ngbéngbé ane ma. <sup>29</sup> Ma apa pi yi mbia inde-e kala me ongu'ango-o kolo, amba i kolo-o, yi de bhuka. <sup>30</sup> Ma gáma matá 'ngú ne yi nengele de, anga ngámá na píla doto inde-e ngago. Aní ne angu pí ma belegu'ade bini. <sup>31</sup> Engú bini, a ayo me okpála na píla doto mbila me ma kúnda 'Dyi ma. U mbila la di me ma ngamene olíli inde aní aha e muma-o. Yi yie bhúlá! Ní yie si yiyie.»

## 15

*Yesu ne ndula na vino na kukulu*

<sup>1</sup> «Ma ne ndula na vino na kukulu. 'Dyi ma la ne kpála inde ngaleleke-o. <sup>2</sup> Aní nga'e ndu yáyá hana inde akò lí ma inde i lí líli de ko. Engú bini, aní ngaleke obhende ngali líli-o, amba a lí matá líli bhelé. <sup>3</sup> Eli inde ma apa e pi yi-e, avulu yi avulu. <sup>4</sup> Yi du bhú ma, maka ma nde lie bhú yi ko. Padhá de, anga yá ndula ngae kpi e kpi ti da nali líli de, i du me a nde lí kute 'lá e ade ko. A bhadi moko, yi ti da nali líli de, i du me yi nde bhú ma ade ko.

<sup>5</sup> Ma ne ndula na vino. Yi ne oyáyá-o. Kpála inde ngadu bhú ma, ma nde la di ngadu bhú e-e, aní lí líli bhelé. Padhá de, anga i du me yi nde bhú dabilí bini ne ma ade-e, yi ti da namene 'he bini de. <sup>6</sup> Kpála inde bhú ma ade-e, u abhíke aní akilidjo maka u abhibhíke yá ndula lie-o. Yá ndula-a 'úlu, u há, u bhíke bhú djua, i tsí. <sup>7</sup> I du me yi nde bhú ma-a, 'li ma nde la di bhú yi-e, yi yo ehe inde yi akúnda e, amba yi sia. <sup>8</sup> I du me yi nde alí líli bhelé-e, yi suno di me yi ne omakpata gba ma-a, lí 'Dyi ma tsia sía sangu. <sup>9</sup> Maka lí 'Dyi ma akúnda ma lie, ma akúnda bhadi yi moko. Yi du bhú mukúnda gba ma-o. <sup>10</sup> I du

me yi nde alila olíli gba ma-a, yi dú bhú mukúnda gba ma-o, maka ma alila olíli gba 'Dyi ma lie, ma ngadu bhú mukúnda gba aní-o.

<sup>11</sup> Ma apa engú bhomu-o pi yi, ngubula me djali gba ma-a du bhú yi, amba djali gba yi-e du libhomu. <sup>12</sup> Líli gba ma-a ngae inde: yi kúnda líli sunda yi maka ma akúnda yi lie ko. <sup>13</sup> Mukúnda na ngbéngbé inde lí kpála ti da nasuno e, a ko naha mukobho gba e pi oolia e. <sup>14</sup> Yi ne oolia ma, i du me yi nde amene líli gba ma-o. <sup>15</sup> Ma nga'i matá yi me okpála na kulu ade. Padhá de, anga kpála na kulu mbila ehe inde lí ngámá gba aní-e ngamene e de. Ma nga'i yi me oolia ma. Padhá de, anga ma asuno ndu 'ngú hana inde ma asia e ka 'Dyi ma-a pi yi asuno. <sup>16</sup> Yi bhú ma ngayi de. Engú bini, ma abhu yi ngama. Ma atima yi me yi nu zu nguwa inde i ti da nabhue mabhue, amba ndu 'he hana inde yi ayó e ka 'Dyi ma ne 'li ma-a, aní de ha pi yi. <sup>17</sup> La-a, líli ma aha e pi yi-e ngae inde, yi kúnda líli sunda yi.»

*Yesu apa me okpála na doto ayála ni ne omaha ni*

<sup>18</sup> «I du me okpála na doto nde ngayala yi-e, yi mbila ndjindji me u ayala ngaiza ma pi yi kalanu. <sup>19</sup> I dú me, yi dú ne okpála na doto-o, okpála na doto de ngakúnda yi. Padhá de, anga yi bhú ngu doto. Engú bini, ma abhu yi, ma atsia a'e yi bhú ká okpála na doto. Kaka-a, okpála na doto ngayala yi. <sup>20</sup> Yi bhundja engú inde ma apa e pi yi-e me: «Kpála na kulu ngbéngbé ane ngámá gba e ade.†» Maka nani u ato mbolo lí ma lie, u ató bhadi mbolo lí yi moko. I dú me u djé 'li ma uu-o, u de adjé bhadi 'li yi moko.

† 15:20 15:20 Tsia bhú Mat. 10:24; ne bhú Luk. 6:40; di ne bhú Dja. 13:16.

<sup>21</sup> Engú bini, u améne ndu 'ngú bhomɔ-o hana li yi kabula ma. Padhá de, anga u mbila kpála inde atima ma-a de. <sup>22</sup> I dú me ma gó de-e, i dú la di me ma kpókpo pi uo de-e, a de okpála namene siti 'ngú ade. Engú bini, mbia inde-e, u mbú li siti 'ngú inde u amene e de. <sup>23</sup> Kpála inde ayala ma-a, ani ayala di 'Dyi ma. <sup>24</sup> Ma amene bhú ká uo ongamba 'ngú , inde li kpála bini mene nga e de. I dú me ma méne mo-o de-e, a de okpála namene siti 'ngú ade. Engú bini, u au ongamba 'ngú gba ma-o, u ayala ma, u atsia yala di 'Dyi ma. <sup>25</sup> Engú bini, engú bhomɔ-o akolo ngubula me, eli inde u aye e bhú líli gba uo-o, amene lie, eli inde me: «U ayala ma padhá, tata tété ade.†»

<sup>26</sup> Ma atíma pi yi kpála inde a ayo me ani teteke yi-o. Kpála angoo ayie agba 'Dyi ma. A ko Bua na kukulu 'ngú inde ayie agba 'Dyi ma-o. Nedhinga ani agó lie, ani akpókpo 'ngú gba ma-a ngae. <sup>27</sup> Ngayi di-e, yi akpókpo 'ngú gba ma-o. Padhá de, anga ní adu ne yi nayie li lilita.»

## 16

<sup>1</sup> «Ma apa 'ngú bhomɔ-o pi yi, amba yi a'ó de me nabhuka gba yi-e kpi-e de. <sup>2</sup> U apándja yi bhú otí nadje líli gba Moidje . La di-e, ekpí akólo makolo, li okpála inde abhíli yi-e adú abhundja lie me o ngamene lío bhomɔ-o kulu pi Ebhe. <sup>3</sup> U améne mo-o, anga u mbila 'Dyi ma de, u mbila la di ma de. <sup>4</sup> Kaka-a, ma apa 'ngú angoo pi yi kalanu, amba li engú angoo akólo lie, yi de bhundja me ma apa engú angoo pi yi apa.»

*Bua na kukulu 'ngú agó mago*

† 15:25 15:25 Tsia bhú Ets. 35:19, 69:5.

«Ma pa nga nani engú angoo pi yi nayie li lilita de, anga ní adu nga nani ne yi bhú dabili bini. <sup>5</sup> Mbia inde-e, ma adjí agba kpála inde atima ma ko. La-a, kpála bini bhú ká yi yi ma de me: «Mo odji su?» <sup>6</sup> Engú bini, bua yi abedhe ne babuma, anga ma apa pi yi moko. <sup>7</sup> Ma apa la pi yi na paká me, pi yi-e, a ndjindji me ma nu. Padhá de, anga i du me ma nde nu de-e, kpála inde atéteke yi-e gó-o de. Engú bini, i du me ma nde anu-o, ma tsia tima ani pi yi. <sup>8</sup> Nedhinga ani agó lie, ani asúno pi okpála na doto me u ngapite lío pindji osisiti 'ngú inde u ngamene e-o. U di ngapite lío pindji ngbili 'ngú , di ne pindji nakodho 'ngú gba Ebhe-o. <sup>9</sup> U ngapite lío pindji osisiti 'ngú inde u ngamene e, anga u bhuka ma de. <sup>10</sup> U ngapite lío pindji ngbili 'ngú, anga ma adjí agba 'Dyi ma. La di-e, u ú matá ma de. <sup>11</sup> U ngapite lío pindji nakodho 'ngú, anga u akodho 'ngú gba ngámá na doto inde-e akodho.

<sup>12</sup> Ma matá ne engú bhelé na-papa pi yi. Engú bini, yi ti da nakikibila mbia inde-e de. <sup>13</sup> Nedhinga li Bua na kukulu 'ngú-o agó lie, ani asúno pi yi ndu okukulu 'ngú hana. Ani pá 'ngú gba e makpe-e de. Engú bini, ani apá ndu 'ngú hana inde ani adjé e-o. Ani tsia pá di ndu 'ngú hana inde akólo-o pi yi. <sup>14</sup> Ani adhégo ma. Padhá de, anga ndu 'ngú hana inde ani apá e pi yi-e, ani asia ka ma. <sup>15</sup> Ndu 'he gba 'Dyi ma-a hana, a ko di naama 'he. Kaka-a, ma apa me ndu 'ngú hana inde li Bua apá e pi yi-e, ayie ka ma.»

*Yesu apa me babuma adjí lie djali*

<sup>16</sup> «Pita nedhinga bedi, yi ú matá ma de. La matá pita

nedhinga bedi-e, yi ú ma.»  
 17 Omukpata koko gba ani-e apa sùnda o me: «Ani apa pi ní me: «Pita nedhinga bedi, yi ú matá ma de. La matá pita nedhinga bedi-e, yi ú ma.» Ani apa matá di me: «Ma adji agba 'Dyi ma.» Engú bhomu-o akúnda napa pi?»  
 18 U adu apa matá me: «Engú inde ani ngapa e me: «Nedhinga bedi», a akúnda napa pi? Ní mbila engú inde ani ngapa e de.»

19 Yesu ambila me, u ngakúnda nayi ni. Abhomu-o, ani atsia apa pi uo me: «Yi ngagili sùnda yi ta 'ngú inde me: «Pita nedhinga bedi, yi ú matá ma de. La matá pita nedhinga bedi-e, yi ú ma.»  
 20 A moko, ma apa pi yi na paká me yi akú 'gbá, yi tsia lópolo di liyi. La-a, okpála na doto adú naa akpi djali. Yi adú ne babuma engú bini, likabhu gba yi-e adjí lie djali.  
 21 Nedhinga li elø ngazu lie, ani dú adje likabhu naali. Padhá de, anga nedhinga na likabhu pi ani akolo. Engú bini, nedhinga inde ani azu lie, ani 'li 'to e 'to likabhu ango-o hana ka djali. Padhá de, anga u azu kpála-kuti píla doto.  
 22 Ngayi di-e, mbia inde-e, yi bhú likabhu. Engú bini, ma aú matá yi mau. Yi tsia kpí djali li bua yi. La di-e, kpála bini 'é djali ango-o bhú yi de.

23 Li ekpí ango-o akólo lie, yi yí matá ma li 'ngú belegu de bini. A moko, ma apa pi yi na paká me ndu 'he hana inde yi ayó e ka 'Dyi ma ne 'li ma-a, ani ahá pi yi maha. 24 Nakolo pi mbia inde-e, yi yo nga 'he ne 'li ma belegu de bini. Yi yoyo, amba yi sia, ngubula me djali gba yi-e du bedhe.»

### *Yesu aha angu doto*

25 «Engú bini, ma apa 'ngú bhomu-o pi yi bhú ogbitaku. Nedhinga inde ngago-o, ma pá matá 'ngú pi yi mo-o belegu de

bini. La-a, nedhinga ango-o, ma akpókpó ongú gba 'Dyi ma-a pi yi mbámbá. 26 Li 'kpí ango-o, yi ayó 'he ka 'Dyi ma ne 'li ma. Ma pa la di pi yi de me, ma ayó 'Dyi ma Ebhe pi yi-e de. 27 Padhá de, anga 'Dyi ma, ngae makpe akúnda yi. Ani akúnda yi, anga yi akúnda ma. La di-e, anga yi abhuka me ma ayie agba Ebhe. 28 Ma ayie agba 'Dyi ma. Ma atsia ago píla doto. Mbia inde-e, ma nga'o ká doto, ma tsia gíe lima agba 'Dyi ma.»

29 Abhomu-o, omukpata gba ani-e atsia apa pi ani me: «Tsia nga mbia inde-e, mu ngapa 'ngú mbámbá. Mu matá ngapapa bhú ogbitaku ade. 30 Mbia inde-e, ya ambila me, mu ngambila ndu 'ngú hana. A padhá me u yi mu li 'ngú. Kaka-a, ya ngabhuka me mo oyie agba Ebhe.»  
 31 Yesu atsia agie pi uo me: «Yi abhuka la mbia inde-e abhuka? 32 Yi tsitsia nga. Nedhinga ngago, mbia inde-e, nedhinga ango-o akolo, nedhinga inde yi andjambala lie má mæ! Kpála ne kpála atápa li kpadji gba e. Yi tsia 'ó la di ká ma kpi ma kpi. Engú bini, ma la kpi ma kpi ade, anga 'Dyi ma bhú dabili bini ne ma. 33 Ma apa 'ngú bhomu pi yi, amba yi sia guo 'ngú bhú ma. Yi asia likabhu píla doto. Engú bini, yi adjé tsulu de! Padhá de, anga ma aha angu doto aha.»

## 17

### *Yesu ayo Ebhe ngú e makpe*

1 Pita li Yesu apa ongú bhomu-o lie, ani atsia 'kpí ne bhúlá, ani atsia apa me: «'Dyi ma, nedhinga akolo. Ha sangu muma, ngama Ndili gba mu-o, amba ngama, Ndili gba mu-o, ma ha di sangu pi mu. 2 Padhá de, anga mo oha angu muma pí 'ndji ndu okpála hana, amba ma ha mukobho na duduma pi ndu okpála hana inde mo oha

o m̄ma-o. <sup>3</sup> La-a, m̄kobho na d̄d̄ma-a, a ko me u mbila m̄, ngam̄ koli Ebhe inde na k̄k̄l̄u-o. A ko me u mbila la di Yesu Kilisito, kp̄ala inde mo otima e-o. <sup>4</sup> Ma aha sangu pi m̄ p̄la doto. Ma andjia kulu inde mo oha e m̄ma me ma mene e andjia. <sup>5</sup> La mbia inde-e, 'Dyi ma, ha sangu m̄ma de m̄, sangu inde ma ad̄ nani ne e agba m̄ kala me u bho doto ko.»

*Yesu ayo Ebhe ngubula om̄kpata gba e*

<sup>6</sup> «Ma asuno 'li m̄ pi okp̄ala inde mo 'e o bh̄ú k̄a okp̄ala na doto, mo otsia aha o m̄ma-o. A ko nani okp̄ala ka m̄, mo otsia aha uo m̄ma. U atsia alila la di 'li m̄. <sup>7</sup> Mb̄ia inde-e, u ambila me nd̄u 'he inde mo oha e m̄ma hana, ayie ka m̄. <sup>8</sup> Padhá de, anga oeli inde mo okpokpo e m̄ma-a, ma akpokpo pi uo. U asia oeli ango-o. U ambila na paká me ma ayie agba m̄. U atsia abhuka di me mo otima ma ngam̄.

<sup>9</sup> Ma ngayo m̄ ngubula uo. Ma ngayo m̄ ngubula okp̄ala na doto ade. Engú bini, ma ngayo ngubula obhende mo oha o m̄ma ko. Padhá de, anga a ko okp̄ala ka m̄. <sup>10</sup> Nd̄u 'he inde ka ma-a hana, a ko naam̄. Nd̄u 'he inde la di ka m̄-o hana, a ko naama. La di-e, ma atsia asia sangu ka uo. <sup>11</sup> Ma matá ne kp̄ala na doto ade. Engú bini, ngauo-o, a ko okp̄ala na doto. Ngama-a, ma adji agba m̄. 'Dyi ma inde bubu, lila uo ne 'li m̄ inde mo oha e m̄ma-o, amba u d̄ bini maka ngan̄í ne m̄, ní nde lie bini-o. <sup>12</sup> Nedhinga ya ad̄ lie ne uo-o, ma alila uo ne 'li m̄ inde mo oha e m̄ma ko. Ma alila uo ndjindji, kp̄ala bini bh̄ú k̄a uo ngita de. Angita bha bini ne kp̄ala inde a ayo me an̄ ngita-o ngubula me engú inde u aye e bh̄ú Bhuku-o, a amene lie.

<sup>13</sup> La mb̄ia inde-e, ma adji agba m̄. Ma ngapa mo-o li nedhinga inde ma nde nga lie p̄la doto, amba u sia djali gba ma-a bh̄ú o makpe, u bedhe la di ne di bedhe. <sup>14</sup> Ma aha 'li m̄ pi uo. Okp̄ala na doto atsia ayala uo. Padhá de, anga uo bh̄ú ngu doto ade, maka ma nde lie bh̄ú ngu doto ade ko. <sup>15</sup> Ma ngayo m̄ ade me m̄ 'e uo p̄la doto ma'e-e de. Engú bini, ma ngayo m̄ me lila uo sakpa Siti malila. <sup>16</sup> A ko okp̄ala na doto de, maka ma nde lie ne kp̄ala na doto ade ko. <sup>17</sup> Mene me u d̄ libhomu bubu li kpadji na k̄k̄l̄u 'ngú. 'Li m̄-o, a ko k̄k̄l̄u 'ngú. <sup>18</sup> Ma atima uo p̄la doto, maka mo otima ma lie p̄la doto-o. <sup>19</sup> Ngama makpe-e, ma aha lima hana pi m̄ ngubula me ngauo di-e, u ha lio hana pi m̄ li kpadji na k̄k̄l̄u 'ngú.»

*Yesu ayo Ebhe ngú nd̄u okp̄ala hana abhuka ani-o*

<sup>20</sup> «Ma ngayo bha bini ngubula uo ade. Engú bini, ma di ngayo ngubula okp̄ala bhende abhúka ma ka 'li uo ko. <sup>21</sup> Ma ngayo me nd̄u uo hana d̄ bini. 'Dyi ma, a ayo me u d̄ bh̄ú ní, maka m̄ nde lie bh̄ú ma, ma la di bh̄ú m̄-o. A ayo me u d̄ bini, amba okp̄ala na doto bhuka me mo otima ma ngam̄.

<sup>22</sup> Ma aha sangu inde mo oha e m̄ma-a pi uo, amba u d̄ bini maka ngan̄í ne m̄ ní nde lie bini-o. <sup>23</sup> Ma bh̄ú uo, m̄ la di bh̄ú ma. Abhom̄-o, u tí da nad̄u bha nd̄u bini, amba okp̄ala na p̄la doto mbila me mo otima ma ngam̄, u mbila la di me mo okunda uo maka mo okunda ma lie ko. <sup>24</sup> 'Dyi ma, mo oha uo m̄ma. Ma akunda me u d̄ bh̄ú dabili bini ne ma li bili inde ma nde li e, amba u uo sangu gba ma ko, sangu inde mo oha e m̄ma anga mo okunda ma kala nabho doto. <sup>25</sup> 'Dyi ma

inde ngbingbili, okpála na pála doto mbila m̄ de. Engú bini, ngama-a, ma ambila m̄. Okpála inde-e ambila la di me mo oṣima ma ngam̄. <sup>26</sup> Ma asuno 'li m̄ pi uo. Ma asúno la matá m̄ pi uo masuno, ngubula me mukunda inde m̄ nde ne e m̄ma-a d̄ bhú uo, amba ngama makpe-e, ma d̄ di bhú uo.»

## 18

*U aholo Yesu*

*(Tsia bhú Mat. 26:47-56; ne bhú Mlk. 14:43-50; di ne bhú Luk. 22:47-53.)*

<sup>1</sup> Pita li Yesu andjia nayo Ebhe lie, ani an̄ ne om̄kpata gba e ayi m̄tselem̄tsele inde 'li e me Sedolo. Edyi bini ad̄ oo. Yesu atsia al̄ ne om̄kpata gba e bhúbhú. <sup>2</sup> Yuda, bhul̄u nap̄u Yesu-o ad̄ ambila di bil̄i angoo ndjindji. Padhá de, anga Yesu ne om̄kpata gba e ad̄ an̄ oo p̄ko. <sup>3</sup> Abhom̄-o, Yuda an̄ abhú 'dyi oo bhú dabili bini ne ká osudha, di ne om̄lila na 'ngbé 'ti Ebhe gba omaYuda, inde li ongbengbe odimand̄o di ne om̄Falisai atima o-o. A ad̄ sa 'kpa osudha-a ne otolosi, ne oeke, di ne otia 'gú. <sup>4</sup> La-a, Yesu inde ad̄ ambila nd̄u 'ngú inde akólo li kute e hana-a, adyudyo lie de uo. Ani atsia ayi uo me: «Yi ngagili da?» <sup>5</sup> U agie pi ani me: «Ya ngagili Yesu, kpála na Nadjaleta.» Yesu atsia apa pi uo me: «A ko ma.» Yuda, bhul̄u nap̄u Yesu-o ad̄ di bhú dabili bini ne uo. <sup>6</sup> Li Yesu apa pi uo lie me: «A ko ma-a», u agbe lio ne sidi, u atuko kuto má dhululu!

<sup>7</sup> Yesu atsia ayi matá uo me: «Yi ngagili da?» U agie me: «Ya ngagili Yesu, kpála na Nadjaleta.»

<sup>8</sup> Yesu apa pi uo me: «Ma apa igini pi yi apa me, a ko ma. I d̄ la me, yi nde ngagili ma-a, yi de 'o okpála koko-o, amba u gbida naao.» <sup>9</sup> Engú bhom̄-o amene lie

mo-o, ngubula me eli inde nani li Yesu apa e, amene lie, eli inde ani apa nani e me: «'Dyi ma, bhú ká okpála inde mo oha o m̄ma-a, s̄ka uo bini ngita ka ma de.»

<sup>10</sup> Simo Piele ad̄ ne mbotia ludu e. Ani aluko ngise angoo bhú 'ti e má vuu! Ani as̄ Malakusi, kpála na kulu gba 'ngbé dimand̄o gba Ebhe-o. Ani atsia akodho kpadje ani li pápá na kokpa-a má tse! <sup>11</sup> Engú bini, Yesu atsia apa pi Piele me: «Gie mbotia gba m̄-o bhú titi. Mo obhundja naam̄ me likabhu inde li 'Dyi ma aha e m̄ma-a, ma azú-u di?»

*U an̄ ne Yesu kala Ana*

<sup>12</sup> Abhom̄-o, osudha ne ngámá gba o, di ne om̄lila na 'ngbé 'ti Ebhe gba omaYuda inde an̄ naholo Yesu-o, atsia aholo ani. U agbite ani ne ekp̄. <sup>13</sup> U atsia an̄ ngaiza ne ani gba Ana. Ana angoo, a ko nani 'dyi wala Kaifa. Kaifa ad̄ nani bhele kpála gba odimand̄o bhú kalanga bhom̄-o ngae. <sup>14</sup> Abhom̄-o, Kaifa atsia aha nani mabhundja pi ongámási gba omaYuda ngae me, a ndjindji mangbo me koli kpála bini kpi ngubula nd̄u okpála hana.

*Piele apa me ni ne mukpata gba Yesu ade*

*(Tsia bhú Mat. 26:69-70; ne bhú Mlk. 14:66-68; di ne bhú Luk. 22:55-57.)*

<sup>15</sup> Simo Piele, ngauo ne mukpata koko ad̄ akpata Yesu. Bhele kpála gba odimand̄o ambila nani mukpata angoo ndjindji. Kaka-a, mukpata angoo al̄ nani ne Yesu bhú dabili bini bhú mbadhasu gba bhele kpála gba odimand̄o-o. <sup>16</sup> Engú bini, Piele atigala naae li 'bh̄o aga akilidjo. Abhom̄-o, mukpata koko inde li bhele kpála gba odimand̄o ambila e ndjindji-e akoto. U agama 'ngú ne olo inde ad̄ alila 'bh̄o aga-o. Ani atsia ato

Piele. <sup>17</sup> Өlө inde adu bhú kulu nalila 'bhө aga-a, apa pi Piele me: «Ngamu di-e, mu ndi ne suka omakpata gba kpála inde-e adi?» Piele agie pi ani me: «A mo-o ade, ma ne suka uo ade.» <sup>18</sup> Okpála na kulu, di ne omulila na 'ngbé 'ti Ebhe gba omaYuda-a akpo djua na makala. U ago alulu dede ngú natutu. Padhá de, anga zini adu naali. Piele ago ala di bhú dabili bini ne uo ngú natu djua-o.

*Bhele kpála gba odimandө ayiyi Yesu*

(*Tsia bhú Mat. 26:59-66; ne bhú Mlk. 14:55-64; di ne bhú Luk. 22:66-71.*)

<sup>19</sup> Abhomu-o, bhele kpála gba odimandө-o aholo nayiyi Yesu pindji 'ngú gba omakpata gba ani, di ne pindji nasuno gba ani-o. <sup>20</sup> Yesu agie pi ani me: «Ma akpokpo 'ngú mbámbá pi ndu okpála hana. Ma adu asuno ndu 'kpí hana bhú oti nadge líli gba Moidje , di ne bhú 'ngbé 'ti Ebhe gba omaYuda li bili li ndu omaYuda hana adu apokөbhө bhúla o li e-o. Ma pa 'ngú bhú pepe belegu de bini. <sup>21</sup> Mu ngayi ma ka ni? Yi okpála inde adje ma-a me ma apa pi. Padhá de, anga u mbila engú inde ma apa e ndjindji.» <sup>22</sup> Li Yesu apa lie mo-o, suka okpála nalila 'ngbé 'ti Ebhe gba omaYuda-a asu pála ani má pa! Ani atsia apa pi ani me: «Abhomu-o eli inde mu ti da nagie e pi bhele kpála gba odimandө gba Ebhe-e?» <sup>23</sup> Yesu atsia apa pi ani me: «Engú inde ma apa e, i du me a nde sisiti-e, yi de suno sisiti ango-o. Engú bini, i du la me ma nde apa ndjindji-e, mo otsia asu la ma ngú ni?» <sup>24</sup> Abhomu-o, Ana atsia atima Yesu pi Kaifa, bhele kpála gba odimandө-o me u nde agbigbite ani magbigbite.

*Piele apa matá me ni ne makpata gba Yesu ade*

(*Tsia bhú Mat. 26:71-75; ne bhú Mlk. 14:69-72; di ne bhú Luk. 22:58-62.*)

<sup>25</sup> Nedhinga ango-o, Simo Piele ala de djua-o. Ani adu atutu. U atsia apa pi ani me: «Ngamu di-e, mu ne suka omakpata gba kpála inde-e adi?» Piele ayala, ani atsia apa me: «A mo-o ade, ma ne suka uo ade.» <sup>26</sup> Suka okpála na kulu gba bhele kpála gba odimandө gba Ebhe-e, inde adu kpála na piga gba kpála li Piele akodho kpadje e, ayi Piele me: «A ko mu di inde ma au nako e ne Yesu abhu 'dyi-e?» <sup>27</sup> Engu bini, Piele atsia ayala matá. Bha bini li nedhinga ango-o, engu atsia aku 'gbá.

*U anu ne Yesu kala Pilato*

(*Tsia bhú Mat. 27:1-2, 11-14; ne bhú Mlk. 15:1-5; di ne bhú Luk. 23:1-5.*)

<sup>28</sup> Abhomu-o, omaYuda ayie ne Yesu agba Kaifa, u atsia anu ne ani agba ngámá na Loma , inde adu atsia 'kpí li ndu doto-o. A adu kөkpí má bhө! Engu bini, omaYuda li naao abhu 'ti oo de. Padhá de, anga u adu akunda nadu bubu kala Ebhe, amba o zu anokomia na Pasika-o . <sup>29</sup> Kaka-a, Pilato ngámá na ndu doto ango-o ago abhaka uo akilidjo. Ani atsia ayi uo me: «Yi agbe kpála inde-e kala ma me ani nde amene mangua siti 'ngú dho?» <sup>30</sup> U agie pi ani me: «Li kpála inde-e dú ne siti kpála de-e, ya de go ne ani pi mu de.» <sup>31</sup> Abhomu-o, Pilato atsia apa pi uo me: «Yi ha ani ngayi makpe, amba yi kodho 'ngú gba ani-e maka li líli gba yi-e apa lie ko.» OmaYuda agie pi ani me: «U ha kpadji pi ya ngú nabhөlө kpála de.»

<sup>32</sup> Engu bhomu-o amene lie mo-o ngú nakpata engú inde li Yesu apa nani e-o. Engu inde ani apa

nani e ngú nasuno lele maka ani akpí lie ko. <sup>33</sup> Abhomu-o, Pilatø agie matá lie abhú 'ti. Aní a'í Yesu, aní atsia ayi ani me: «Mú ne 'ngbé ngámá gba omaYuda?» <sup>34</sup> Yesu agie pí ani me: «Engú inde mo opa e bhomu-o, mo obhundja bha ngamu makpe? Ne me okpála koko apa 'ngú gba ma-a pí mú ngao!» <sup>35</sup> Pilatø agie pí ani me: «Ngama-a, ma ne maYuda? Okpála na kuti gba mú di ne ongbengbe odimandø gba Ebhe-e apu mú muma. Mo omene la mangua 'ngú dho?»

<sup>36</sup> Yesu agie pí ani me: «Nau gba ma-a, a ko bhende na doto inde-e de. I dú bhende na doto inde-e, okpála gba ma-a de agu 'gú, ngubula me u apú ma pí omaYuda de. Engú bini, nau gba ma-a, a ko bhende na doto inde-e de.» <sup>37</sup> Pilatø atsia apa pí ani me: «A akunda napa me, mú ne 'ngbé ngámá?» Yesu agie pí ani me: «Mo opa ngamu me ma ne 'ngbé ngámá. U azu ma, ma atsia ago píla doto ngú nakpokpo 'ngú pindji kukulu 'ngú. Kpála inde bhú kukulu 'ngú-o ngadje engú inde ma ngapa e-o.» <sup>38</sup> Pilatø ayi ani me: «Kakulu 'ngú-o, a ko ní?»

Pita li Pilatø apa 'ngú bhomu-o lie, ani akoto, ani anu matá nabhaka omaYuda akilidjo. Aní atsia apa pí uo me: «Ma u engú inde u ti da nabhøø kpála inde-e ka e belegu de bini. <sup>39</sup> Engú bini, maka u amemene lie agba yi-e, bhú anokomia na Pasika-a, a ayo me ma tse 'kpa li bhulu 'kpú pí yi bini. Yi akunda me ma tse 'kpa li 'ngbé ngámá gba omaYuda-a pí yi?» <sup>40</sup> Abhomu-o, u aholo asusula me: «I-i! Ngaani de. Engú bini, tse mangbo pí ya 'kpa li Balabasi!» La-a, Balabasi nani ne 'ngbé bhulu 'zi.

## 19

<sup>1</sup> Abhomu-o, Pilatø atsia apa me u go ne Yesu, amba u bhi ani ne fimbo. <sup>2</sup> Osadha agala ehe na eti má kilili, u ato bhú 'ndji ani! U atsia ato di bongo na zumbe zumbe li kute ani. <sup>3</sup> U adu ago de ani. U atsia adu apa pí ani me: «'Ngbé ngámá gba omaYuda-a, atou!» U adu di nabhi bhula ani.

<sup>4</sup> Abhomu-o, Pilatø akoto matá kilidjo. Aní atsia apa pí uo me: «Yi djedje nga! Ma agbé ani pí yi kilidjo ei, amba yi mbila ndjindji me ma u belegu ehe bini de inde ma ti da naholo ani ngú e.» <sup>5</sup> Abhomu-o, Yesu atsia akoto kilidjo me u nde ato ehe na eti-e bhú 'ndji ani, ani nde di ne bongo na zumbe zumbe li kute e. Abhomu-o, Pilatø atsia apa pí uo me: «Kpála ango-o i!» <sup>6</sup> Engú bini, li ongbengbe odimandø gba Ebhe , di ne omelila na 'ngbé 'ti Ebhe au ani lie me-e, u aholo nasusula me: «Gi ani li kulusi! Gi ani li kulusi!» Pilatø apa pí uo me: «Yi nu gi ani li kulusi ngayi makpe. Padhá de, anga ngama-a, ma u belegu ehe bini de inde ma ti da naholo ani ngú e.» <sup>7</sup> OmaYuda agie pí ani me: «A ka ya ne líli. A ayo me ani kpi maka li líli ango-o apa lie-o. Padhá de, anga ani apa me ní ne ndili gba Ebhe.»

<sup>8</sup> Li Pilatø adje engú bhomu-o lie, ani adje matá tsulu naali. <sup>9</sup> Aní agie lie abhú 'ti. Aní atsia ayi Yesu me: «Mo oyie su?» Engú bini, Yesu gie 'ngú de. <sup>10</sup> Abhomu-o, Pilatø atsia apa pí ani me: «Mú kanda nagama 'ngú muma di? Mú mbila de me ma ne angu natse 'kpa li mú. Ma la di ne angu nagí mú li kulusi-e di?» <sup>11</sup> Yesu atsia apa pí ani me: «Mú ne angu pí ma belegu ade bini. I dú me Ebhe há angu pí mú de-e, mú de ti da namene 'he bini ngú ma de. Kaka-a, kpála inde apu ma pí

m̄-o, amene siti 'ngú naali ane m̄.»<sup>12</sup> Nayie li nedhinga bhom̄-o, Pilat̄o adu agili kpadji me ni tse 'kpa li Yesu. Engú bini, omaYuda aholo asusula me: «† d̄u me m̄ nde atse 'kpa li kpála bhom̄-o, amba m̄ kunda 'ngbé ngámá Kaisala de! Nd̄u kpála hana inde apa me ni ne 'ngbé ngámá-a, a ko bhul̄u yala gba 'ngbé ngámá Kaisala!»

<sup>13</sup> Li Pilat̄o adje eli bhom̄-o lie, ani agbe Yesu kilidjo. Pilat̄o atsia adu pí dabili nakodho 'ngú-o, li bili inde u a'i e me «U apa oteme kuto» (inde u a'i e bhú eli na ebele me «Gabata»).<sup>14</sup> A adu nani masikpe de tulukpe, kala ekpí na Pasika. Pilat̄o apa pí omaYuda me: «'Ngbé ngámá gba yi-e i!»<sup>15</sup> Engú bini, u aholo nasusula me: «Bh̄el̄o ani! Bh̄el̄o ani! Ḡi ani li kulusi!» Pilat̄o apa pí uo me: «A ayo me ma ḡi 'ngbé ngámá gba yi-e li kulusi?» Ongbengbe odimand̄o gba Ebhe-e agie pí ani me: «'Ngbé ngámá koko ka ya ade. A ko bha bini 'ngbé ngámá Kaisala.»<sup>16</sup> Abhom̄-o, Pilat̄o atsia atse 'kpa li Yesu ngubula me u ḡi ani li kulusi.

*U agi Yesu li kulusi*

(*Tsia bhú Mat. 27:32-44; ne bhú Mlk. 15:21-32; di ne bhú Luk. 23:26-43.*)

U aha Yesu, u atsia atapa ne ani.<sup>17</sup> Yesu abi kulusi gba e ngae makpe. Ani atsia akoto nayie bhú gud̄hu akolo li bili na «Pelege 'ndji» (u a'i e bhú eli na ebele me «Gologota»).<sup>18</sup> A bhom̄-o bili inde li osudha agi Yesu li e li kulusi-o. U atsia agi di okpála koko bhisi li kulusi. Yesu adu tutu, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali.<sup>19</sup> Pilat̄o atsia aha di líli me, u ye balua,

amba u bh̄i li kulusi gba Yesu-o. Balua ang-o adu me: «YESU, KPÁLA NA NADJALETA, 'NGBÉ NGÁMÁ GBA OMAŸUDA.»

<sup>20</sup> Abhom̄-o, omaYuda bhel̄é atanga balua ang-o. Padhá de, anga bili inde u agi nani Yesu li kulusi li e, a adu de gud̄hu masikpe. La di-e, balua ang-o adu bhú eli na ebele, a adu bhú eli na latino, a atsia adu di bhú eli na giliki.<sup>21</sup> Abhom̄-o, ongbengbe odimand̄o gba omaYuda atsia apa pí Pilat̄o me: «Mo oyé de me, 'ngbé ngámá gba omaYuda-a de. Engú bini, ye mangbo me, «Kpála bhom̄-o apa me, ma ne 'ngbé ngámá gba omaYuda.»<sup>22</sup> Pilat̄o agie pí uo me: «Bhende ma aye e, adjí lie de.»

<sup>23</sup> Li osudha agi Yesu li kulusi lie, u abha obongo gba ani-o. U agbo bh̄usu bh̄usu badha. Sudha bini ne bini aha naae bini. U atsia aha di bongo gba ani inde u d̄u e madu de-o. Pápála adu bha bini nayie abhúl̄a akolo akuto.<sup>24</sup> Osudha-a apa s̄unda o me: «Ní asidha bongo inde-e de. Engú bini, ní ḡu mangbo gbanda tété, amba ní mbila me a adú na da.» U amene mo-o ngubula me eli inde u aye e bhú Bhuku-o, amene lie, eli inde me:

«U agbogbo bh̄usu o li obongo gba ma-o.

U atsia aḡu gbanda li bongo gba ma ko.†»

A bhom̄-o engú inde li osudha amene e-o.

<sup>25</sup> Malia , 'hi Yesu, ne ndai e na eel̄e, ne Malia , wala Kolopasi, di ne Malia , kpála na kuti na Magadala, alul̄u de kulusi gba Yesu-o.<sup>26</sup> Yesu au 'hi e ne mukpata inde li ani adu akunda e naali-o. Mukpata ang-o adu me ani nde al̄u de 'hi ani oo. Ani atsia apa pí 'hi e me: «Ol̄e-e,\* tsia ndili gba m̄-o i.»<sup>27</sup> Pipita-a, ani atsia apa

† 19:24 19:24 Tsia bhú Ets. 22:19. \* 19:26 19:26 Li kulusi-e, Yesu agama 'ngú pí 'hi e maka Ebhe. Kaka-a, ani a'i ani me: «Ol̄e-e.»



pi mukpata-a me: «Tsia 'hi mu i.» Nayie li nedhinga bhomu-o, mukpata-a atsia aha 'hi Yesu agba e.

*Yesu akpi*

(*Tsia bhú Mat. 27:45-56; ne bhú Mlk. 15:33-41; di ne bhú Luk. 23:44-49.*)

<sup>28</sup> Pita ongu bhomu-o, Yesu ambila me, mbia inde-e, ndu 'ngú hana andjia. Abhomu-o, ngubula me 'li Bhuku-o amene lie akolo ali soso-o, ani atsia apa me: «A li ma ne gumu 'ngu.» <sup>29</sup> Lusa bini adu oo. A adu bhúbhú ne kpongadha pandi bedhe. Osudha aha epondje, u ato bhú kpongadha pandi-o. U agbite li ndula inde u a'i e me idjope.† U atsia adyudyo de 'bhø Yesu masakpe. <sup>30</sup> Li Yesu andji kpongadha pandi-e lie, ani atsia apa me: «Ndu 'ngú hana andjia!» Abhomu-o, ani atu 'ndji e ne kuto, ani atsia andala 'kpa li bua e.

*Sudha bini adu pá kala Yesu ne mandambi*

<sup>31</sup> A adu nani ekpi inde u adu aleke lio lie ngu ekpi nagu-o-o. Ongamási gba omaYuda du akunda de me okuo okpála du li okulusi li 'kpi nagu-o-o de. Padhá de, anga ekpi nagu-o-o, adu ngbéngbé ane okoko mane. Kaka-a, u atsia ayo ka Pilatø me u gugumu 'dhu okpála inde u agi o li okulusi-o, amba u 'e okuo uo tété ma'e. <sup>32</sup> Abhomu-o, osudha ago de okpála inde u agi o li okulusi bhú dabili bini ne Yesu-o. U agugumu 'dhu kpála bhe na kalanu-o. Pipita-a, u agugumu 'dhu kpála bhe koko-o. <sup>33</sup> U akolo lie li Yesu-o, u abhaka me ani nde akpi. Kaka-a, u gugumu 'dhu ani de.

<sup>34</sup> Engú bini, sudha bini adu pá kala ani ne mandambi má puu! Kolo me-e, ngute di ne engu aze bhú eka ango-o. <sup>35</sup> Kpála inde ngakpokpo ongu inde-e, au ongu ango-o ne djila e. La di-e, ongu inde ani ngakpokpo e, a ko kukulu 'ngú. Ngaani-e, ani mbila ndjindji me ni ngakpo e kukulu 'ngú. Ani ngakpokpo ngubula me ngayi di-e, yi bhuka. <sup>36</sup> Ongú bhomu-o akolo ngubula me engú inde u aye e bhú Bhuku-o, amene lie, engú inde u aye e me: «U gumu suka biki ani belegu de bini.†» <sup>37</sup> La di-e, u aye bhú Bhuku li bili koko me: «U atsia kpála inde u adu e-o.†»

*U azi Yesu*

(*Tsia bhú Mat. 27:57-61; ne bhú Mlk. 15:42-47; di ne bhú Luk. 23:50-56.*)

<sup>38</sup> Pita ongu akodho 'kpi-e, Djodjefu, kpála na gudhu na Alimatayo, ayo ka Pilatø me ani ha kpadji pi ni ngu na'e kuo Yesu. (Djodjefu nani ne suka omukpata gba Yesu-o. Engú bini, ani du asuno lie mbámbá de, anga ani adu akpe ongamási gba omaYuda-o.) Pilatø aziba pi ani. Abhomu-o, Djodjefu anu, ani atsia a'e kuo Yesu. <sup>39</sup> Nikodemu, inde anu nani nabhaka Yesu 'kpi bini sukpe-e, ago di. Ani ago ne mungotsi inde u amene e li mila bhú dabili bini ne aloesi.‡ Mungotsi ango-o, adu masakpe de kilo ndjikpa bata. <sup>40</sup> Abhomu-o, ndu uo bhisi hana aha kuo Yesu. U agagala ne opapala bongo na lene me u nde atuko mungotsi tété, maka li omaYuda adu amemene lie bhú nedhinga nazi kuo-o. <sup>41</sup> Li bili nani u agi Yesu li e li kulusi-e, edyi bini adu oo. Bhú 'dyi ango-o, edú

† **19:29** 19:29 Idjope: A ko suka ondula na gba omaYuda. Epondje nani u ato e bhú kpongadha pandi inde u aha nani e pi Yesu me ani ndji-e, nedhinga ani adu lie li kulusi-e, u agbite nani li Idjope. † **19:36** 19:36 Tsia bhú Eki. 12:46; ne bhú Nom. 9:12; di ne bhú Ets. 34:21. † **19:37** 19:37 Tsia bhú Djkl. 12:10. ‡ **19:39** 19:39 Aloesi: A ko mungotsi inde li se e nde má wese. A ko la di elá, u memene li ndende ndula.

bini na mbia adu oo. Edú angoo, u zi nga nani kpála bini bhúbhú de. <sup>42</sup> U atsia ato Yesu bhúbhú. Padhá de, anga u adu agbene lio ka li ekpí naguo gba omaYuda adu lie masakpe-o. La di-e, edú angoo adu oo masakpe.

## 20

*Yesu azuku*

*(Tsia bhú Mat. 28:1-8; ne bhú Mlk. 16:1-8; di ne bhú Luk. 24:1-12.)*

<sup>1</sup> Abhomu-o, bhú 'kpí yinga kòkpí má bhó-o, Malia, kpála na gadu na Magadala, anu abhú lata. A adu me ekpí nde nga bha ne biti. Ani au me teme inde adu li 'bhé lata-a nde ayie li bhèbhè ayie. <sup>2</sup> Abhomu-o, ani anu ne holo, ani anu abhaka Simo Piele, di ne mukpata koko inde li Yesu adu akunda e naali-o. Ani atsia apa pi uo me: «U agbe kuo Ngámá bhú lata-a agbe. La-a, ya mbila de me u a'o ani su-oie de.»

<sup>3</sup> Abhomu-o, Piele ne uo ne mukpata koko-o aholo 'nú, u atsia agbida abhú lata. <sup>4</sup> Ndu uo bhisi hana agu holo. Engú bini, mukpata bhe koko agu nae holo kpekpeke ane Piele mane. Kaka-a, ani atsia akolo abhú lata kalanu. <sup>5</sup> Ani akita ne kuto ngu natsia 'kpí bhúbhú. Ani au opapala bongo na lene me a nde a'o lie oo. La-a, ani li de. <sup>6</sup> Abhomu-o, Simo Piele inde adu akpata ani sidi-e, akolo di. Ani atsia ali abhú lata. Ani au opapala bongo na lene me a nde a'o lie oo, <sup>7</sup> la di ne bongo bhende adu me a nde abuku bhúla Yesu-o. Bongo angoo du bhú dabili bini ne opapala bongo na lene de. Engú bini, a adu me a nde agagala nae lie kpi li bili koko. <sup>8</sup> Abhomu-o, mukpata koko inde akolo abhú lata kalanu-o, atsia ali di. Ani au, ani atsia abhuka. <sup>9</sup> Padhá de, anga nakolo li nedhinga bhomu-o, omukpata

mbila nga nani ndjindji de, engú inde u aye e bhú Bhuku gba Ebhe-e me Masiya azúku bhú ká okpála inde amu-o mazuku. <sup>10</sup> Pita 'ngú bhomu-o, omukpata bhisi-e atsia agie lio agba o.

*Yesu akoto li Malia, kpála na kuti na Magadala*

*(Tsia bhú Mat. 28:9-10; di ne bhú Mlk. 16:9-11.)*

<sup>11</sup> Malia adu me ani nde alu akilidjo de lata-o. Ani adu naku 'gbá. Nedhinga inde ani adu nga bha lie naku 'gbá-a, ani akita ne kuto ngubula natsia 'kpí abhú lata. <sup>12</sup> Ani au oandjelu bhisi. U adyidi obubu bongo. U adulu li bili inde u a'o nako kuo Yesu li e ko. Bini adu li papá na 'ndji ani, koko atsia adu li papá na 'dhu ani. <sup>13</sup> Oandjelu-o ayi Malia me: «Èlè-e, mu ngaku 'gba ngu ni?» Ani agie pi uo me: «U a'e kuo Ngámá gba ma-a a'e. Ma mbila de me u a'o su-oie de.»

<sup>14</sup> Pita ani apa 'ngú bhomu-o lie, ani adji lie, ani atsia au Yesu me ani nde alu oo. Engú bini, ani du ambila de me a ko Yesu-o de. <sup>15</sup> Yesu ayi ani me: «Èlè-e, mu ngaku 'gbá ngu ni? Mu ngagili da?» Malia abhundja me a ko kpála inde ngamene kulu bhú 'dyi-o. Kaka-a, ani apa pi ani me: «'Dyi ma, i du me mu nde a'e kuo Ngámá gba ma-a ngamu-o, suno bili mo o'o li e mama, amba ma nu ha.» <sup>16</sup> Yesu apa pi ani me: «Malia!» Malia adji lie, ani atsia apa pi ani bhú eli na ebele me: «Laboni!» (A akunda napa me «Musuno.») <sup>17</sup> Yesu apa pi ani me: «Mo obú 'kpa mu li ma de. Padhá de, anga ma nu nga agba 'Dyi ma abhúla de. Engú bini, nu bhaka ondaise ma, amba mu pa pi uo me: «Ma adji abhúla agba 'Dyi ma. A ko la di 'Dyi yi. Ma adji abhúla agba Ebhe gba ma-o. A ko la di Ebhe gba yi-o.»

18 Abhomu-o, Malia, kpála na kuti na Magadala, atsia anu akpokpo pi omukpata me: «Ma au Ngámá au!» Aní atsia akpokpo 'ngú inde li Yesu apa e pi ani-e, pi uo.

*Yesu akoto li omukpata gba e-o (Tsia bhú Mat. 28:16-20; ne bhú Mlk. 16:14-18; di ne bhú Luk. 24:36-49.)*

19 Bha bhú 'kpí yinga bhomu-o tagolo-o, omukpata-a apo bhúla o bhú 'ti bini. U atsia adhodho obhe bhoti nganda o madhodho. Padhá de, anga u adu akpe ongámási gba omaYuda-o. Yesu ago alu tu uo. Aní atsia apa pi uo me: «Guo 'ngú du bhú dabili bini ne yi!»<sup>20</sup> Pita aní apa 'ngú bhomu-o lie, aní asuno 'kpa e, di ne pála kala e pi uo. Li omukpata au Ngámá lie, u abedhe ne djali bedhe. <sup>21</sup> Yesu atsia apa matá pi uo me: «Guo 'ngú du bhú dabili bini ne yi! Maka li 'Dyi ma atima ma lie, ngama di-e, ma atima yi.»<sup>22</sup> Pita aní apa lie mo-o, aní a'ulu wo e pí uo, aní atsia apa pi uo me: «Yi sia Bu Bhobua !<sup>23</sup> Okpála bhende yi ambú li siti 'ngú gba o-o, li Ebhe mbú di li siti 'ngú gba uo-o. Okpála bhende yi mbú li siti 'ngú gba o de-e, Ebhe mbú di tété de.»

*Yesu akoto li omukpata gba e pita Tuma*

<sup>24</sup> Nedhinga li Yesu akoto li omukpata gba e lie abhú 'ti-e, saka omukpata ndjikpa ne ká bhisi-e Tuma (inde u a'i di-e me Bhuko-o) du bhú dabili bini ne uo de. <sup>25</sup> Abhomu-o, omukpata koko atsia apa pi ani me: «Ya au Ngámá.» Engú bini, aní atsia agie pi uo me: «Ma akunda nau oeka na osete inde li okpa ani-o. Ma akunda na'o likpa ma li pokoli na osete angoo. Ma akunda la di na'o 'kpa ma li pála kala ani. I du mo-o de-e, ma bhúka de.»<sup>26</sup> Pita 'kpí madjina, omukpata gba Yesu

apo matá bhúla o abhú 'ti. Tuma adu bhú dabili bini ne uo. Obhe bhoti-e adu me a nde adhodho lie madhodho. Engú bini, Yesu ago, aní alu tu uo. Aní atsia apa pi uo me: «Guo 'ngú du bhú dabili bini ne yi!»<sup>27</sup> Pipita-a, aní apa pi Tuma me: «'O likpa mu si, amba mu tsia 'kpa ma. Go ne 'kpa mu, amba mu 'o li pála kala ma. Mo odú ne bua na bhisi bhisi de. Du mangbo ne nabhuka .»<sup>28</sup> Tuma agie pi ani me: «Ngámá gba ma, di ne Ebhe gba ma!»<sup>29</sup> Yesu apa pi ani me: «Mo obhuka ka mo ou ma lie? A ko djali pi okpála inde ngabhuka me u nde u ne djila o de ko.»

*A inde-e ta bhuku inde*

<sup>30</sup> Yesu amene matá ongamba 'ngú koko bhelé li djila omukpata gba e-o. La-a, u ye bhú bhuku inde-e de. <sup>31</sup> Engú bini, ongú inde aye lie bhúbhú-o, a ko ngubula me yi bhuka me Yesu ne Masiya, Ndili gba Ebhe, amba i du la me yi nde abhuka ani-e, yi de sia makobho ka 'li ani.

## 21

*Yesu akoto li omukpata gba e lingo ekpe na Tibeliade*

<sup>1</sup> Ekpí koko pipita-a, Yesu akoto matá li omukpata gba e lingo ekpe na Tibeliade. Lele maka aní akoto li uo lie, ngae inde:<sup>2</sup> a adu nani Simo Piele, ne Tuma, (inde u a'i e me Bhuko), ne Natanaele, (kpála na kuti na Kana, bhú ndu doto na Galilaya), ne ongisi gba Djebedayo, di ne omukpata koko bhisi gba Yesu-o. U adu bhú dabili bini. <sup>3</sup> Simo Piele apa pi uo me: «Ma adjí nagbe sungu.» U agie pi ani me: «Ngaya di-e, ní anú ne yi bhú dabili bini.» Abhomu-o, u anu, u atsia a'u'u bhú zabu. Engú bini, sukpe bhomu-o, u gbe sungu belegu de bini.

<sup>4</sup> Li ekpí aholo naseke lie, Yesu alu lingo 'ngu oo. Engú bini,

omukpata-a dũ ambila de me a ko ani-e de. <sup>5</sup> Abhomũ-o, Yesu atsia apa pi uo me: «Odi ma, yi aholo mbo sungu uu?» U agie pi ani me: «Ya holo de.» <sup>6</sup> Ani apa pi uo me: «Yi bhike nado lingo zabũ-o ne li pp na kokpa, amba yi holo sungu.» Abhomũ-o, u atsia abhike nado-o bh ʼngu. U ale nagbele nado ango-o bh ʼngu pima. Padh de, anga osungu adũ bhbh bhibhiti naali. <sup>7</sup> Abhomũ-o, mukpata inde li Yesu adũ akũnda e naali-e apa pi Piele me: «A ko Ngm!»

Li Simo Piele adje lie me a ko Ngm-a, ani adyi bongo . Padh de, anga abhaka me ani nde agbe bongo-o magbe ng nagbe sungu-o. Ani atsia ag ʼi e bh ʼngu. <sup>8</sup> Omukpata koko agie lio ne zabũ-o me u nde ngagbele nado-o. Nado ango-o adũ me a nde abedhe ne osungu bedhe. U dũ nani dengo ʼgø-o tsutsu de. U adũ masikpe de metele km bini.

<sup>9</sup> Nedhinga u aze lie api ʼgø-o, u au djua ne sungu pp, di ne mapa. <sup>10</sup> Yesu apa pi uo me: «Yi go ne t osungu inde yi aholo e-o.» <sup>11</sup> Abhomũ-o, Simo Piele a ʼu mat bh zabũ-o. Ani agbele nado apigo. Nado ango-o adũ me a nde abedhe ne ongbengbe osungu km bini ndjikpa bhuluvue ne k bata. Abana li osungu adũ lie bhbh bhel-e, nado ango-o tsotsolo de. <sup>12</sup> Yesu apa pi uo me: «Yi go z ʼhe.» Kpla bini bh k omukpata-a le nayi ani de me: «Mũ ne da?» Padh de, anga u adũ ambila hana me, a ko Ngm. <sup>13</sup> Abhomũ-o, Yesu adyudyo lie masikpe. Ani aha mapa, ani atsia agapa li uo. Ani atsia aha di sungu-o pi uo. <sup>14</sup> A adũ nani bhomũ-o bhutsibhutsi na bata me Yesu koto li omukpata gba e, pita ani azuku lie bh k okpla bhende amu ko.

*Yesu ayi Piele bhutsibhutsi bata me ani kũnda ni uu ie*

<sup>15</sup> Pita u azu ʼhe-e lie, Yesu ayi Simo Piele me: «Simo, ndili gba Djaa , mũ kũnda ma nane maka li okpla koko inde-e akũnda ma lie mane?» Piele agie pi ani me: «Heni, Ngm, mũ mbila hana me ma kũnda mũ.» Yesu apa pi ani me: «K ongisi kandelø gba ma-o.» <sup>16</sup> Yesu ayi mat ani bhutsibhutsi na bhisi-e me: «Simo, ndili gba Djaa, mũ kũnda ma uu?» Piele agie pi ani me: «Heni, Ngm, mũ mbila hana me ma kũnda mũ.» Yesu apa pi ani me: «Lila okandelø gba ma-o.» <sup>17</sup> Yesu ayi mat ani bhutsibhutsi na bata-a me: «Simo, ndili gba Djaa, mũ kũnda ma uu?» Piele asia likabhu li bua e. Padh de, anga Yesu ayi ani bhutsibhutsi na bata me: «Mũ kũnda ma uu?» Ani atsia apa pi Yesu me: «Ngm, mũ mbila ndu ʼng hana. Mũ mbila bhadi hana me ma kũnda mũ!» Yesu apa pi ani me: «K okandelø gba ma-o.

<sup>18</sup> A moko, ma apa pi mũ na pak me, nedhinga nani mo odũ lie makombi-e, mo odũ agbite ekp gba mũ-o ludu mũ ngamũ makpe. Mo odũ la di anu li bili inde mo odũ akũnda nanu li e-o. Eng bini, nedhinga mo oklo lie ʼgb kpla-a, mo o ʼe ʼkpa mũ abhl, li kpla koko tsia gbite ʼkp gba mũ-o ludu mũ ngae. Ani tsia n di ne mũ li bili inde mũ kũnda nanu li e de.» <sup>19</sup> Yesu adũ apa mo-o ngubula nasuno lele maka li Piele akpi lie, ani tsia h la di sanga pi Ebhe ko. Pipita-a, Yesu apa pi ani me: «Kpata ma!»

*Piele ayi ʼng pindji mukpata inde li Yesu adũ akũnda e naali-o*

<sup>20</sup> Li Piele adji lie lie, ani au mukpata li Yesu adũ akũnda e-o, (kpla inde aseke nani ʼndji e pi mbulu Yesu, nedhinga inde u adũ azu ʼhe lie-o, inde atsia ayi di nani

Yesu me: «Ngámá, kpála bhende apú mu-o, a ko da?»<sup>21</sup> Abhomu-o, Piele au mukpata ango-o, ani atsia ayi Yesu me: «Ngámá, a la ani-e, a akólo li ani ne mangua 'ngú dho?»

<sup>22</sup> Yesu agie pi ani me: «I du me ma nde akunda me ani du, akolo li nedhinga inde ma agó matá lie, a ko naamu 'ngú? Ngamu-o, kpata ma!»<sup>23</sup> Abhomu-o, ngali atsia ayangba bhú ká omabhuka me, mukpata ango-o kpi naae de. La-a, Yesu pa nani pi Piele de me: «Ani kpi de-e de.» Engú bini, ani apa nani mangbo me: «I du me ma nde akunda me ani du akólo li nedhinga inde ma agó matá lie, a ko naamu 'ngú?»<sup>24</sup> Mukpata ango-o ngakpokpo ongu inde-e ngae makpe. Ani aye la di bhú bhuku ngae. Ya mbila la di ndjindji me engú inde ani ngakpokpo e, a ko kakulu 'ngú.<sup>25</sup> Yesu amene di nani ongu koko bhelé. I dú me u yé ongu ango-o bini ne bini hana-a, ma abhundja me doto libhomu de tí ne obhuku inde i de yé lie de.

## Kulu gba oBhulu Titima gba Yesu Eli na kalanu

Kulu gba oBhulu Titima gba Yesu ne bhuku na bhisi inde li Luka aye e-o.

Engú na ngbéngbé inde bhú bhuku inde-e, a ko nakpokpo lele maka li omukpata gba Yesu na kalanu adu adhuku bhú angu gba Bu Bhobua, u atsia adu akpokpo Bádha Ngali pindji Yesu inde adu ayangba abhú: «Yelusalema, ne bhú Yudaya, ne abhú Samalia nakolo makolo abhú dje doto» (1:8). A ko Ngali gba Kilisito inde akpo lita e agba omaYuda atsia akolo nabhuka pi ndu okpála na píla doto hana.

Engú na ngbéngbé inde bhú bhuku gba obhulu titima-a, a ko kulu gba Bu Bhobua inde ago ne angu pí omabhuka abhú Yelusalema li 'kpí na Patekote. Bu Bhobua ang-o, la di ngateteke ne naha angu pi Piga gba Ebhe ne okpála inde ngadjedjele, nakpata lele ongu inde u aye e bhú bhuku ang-o. Engú na kalanu inde atsia omakilisito akpokpo lie bhelé bhú eli gba Ebhe inde u adu aha e pi okpála-o. A la di ongu inde u aye e bhú bhuku gba obhulu titima gba Yesu ngasuno angu na ongu ang-o bhú mukobho gba omabhuka, la di bhú makpètse inde bhú Piga gba Ebhe-o.

### **Ongbenge ongu inde bhú bhuku inde-e ngae inde:**

Naleke lio ngu nakpokpo 'ngú pindji 'ngú mo ue ne bhe mo adje e 1:1-26

(1) Lili na soso ne engú inde li Yesu apa me ni amene e 1:1-14

(2) Kpála inde aha da Yuda-o 1:15-26

Okpála inde akpokpo 'ngú pindji 'ngú inde u au e ne bhe u adje e abhú Yelusalema 2:1 – 8:3

Okpála inde akpokpo 'ngú pindji 'ngú inde u au e ne bhe u adje e abhú Yudaya ne abhú Samalia 8:4 – 12:25

Kulu gba Polo 13:1 – 28:31

(1) Dholo gba Polo na kalanu ngubula nakpokpo Bádha Ngali 13:1 – 14:28

(2) Bula abhú Yelusalema 15:1-35

(3) Dholo gba Polo na bhisi ngubula nakpokpo Bádha Ngali 15:36 – 18:22

(4) Dholo gba Polo na bata ngubula nakpokpo Bádha Ngali 18:23 – 21:16

(5) Polo bhú tikpu abhú Yelusalema, ne bhú Sedjale a la di-e bhú Loma 21:17 – 28:31

*Yesu apa me: «Yi asia Bu Bhobua»*

<sup>1</sup> Ndaí ma na mukunda Tiofile,

Bhú bhuku gba ma na kalanu-o, \* ma akpokpo ndu 'ngú hana inde li Yesu amene e di ne bhende ani asuno e ko. Ma akpokpo nayie li lilita<sup>†</sup> <sup>2</sup> akolo li 'kpí li Ebhe aha ani lie abhúlá ko. Kala nanu ka ani abhúlá-a, bhú angu gba Bu Bhobua-a , ani aha olili gba e pi okpála inde ani alo nani o maka obhulu titima-o . <sup>3</sup> Pita nakpi ka ani-e, ani apana lie pi obhulu titima gba e-o. Ani asuno pi uo li okpadji bhelé me ni bhú mukobho. Ani asuno lie pi uo ngubula 'kpí ndjikpa badha. Ani

\* 1:1 1:1 Bhuku na kalanu: A akunda napa me Bádha Ngali gba Yesu Kilisito maka li Luka aye lie ko. Kulu gba obhulu titima gba Yesu ne bhuku na bhisi gba ani-o. † 1:1 1:1 Lilita: A akunda napa me a ko nayie li lita kulu gba Yesu Kilisito li 'kpí ani asia batisimo lie ko.

atsia akpokpo di 'ngú pí uo pindji Nau gba Ebhe . <sup>4</sup> Ekpí bini, li ani adu azu 'he lie bhú dabili bini ne uo-o, ani atsia aha líli inde-e pí uo me: «Yi ayie bhú Yelusalema de, engú bini, yi djeke ehe inde li 'Dyi ma apa me ni ahá e pí yi ko. A ko ehe inde ma apa 'ngú pí yi pindji e ko. <sup>5</sup> Padhá de, anga Djaa abatisa nani okpála ne engu. Engú bini ngayi-e, pita 'kpí masudha-a, yi asia batisimo na Bu Bhobua.»

### *Ebhe aha Yesu abhúlá*

<sup>6</sup> Li obhulú titima adu apo bhúla o lie de Yesu-o, ekpí koko-o, u atsia ayi ani me: «Ngámá, mo ogbégbé omafalaale bhú bali, mu tsia há ngámá pí uo mbia inde-e?» <sup>7</sup> Yesu atsia agie pí uo me: «A ko engú ka yi de ngú nambila nedhinga di ne oekpí ang-o. Padhá de, anga Ebhe ne angu gba e makpe, a'o oekpí ang-o maka ani akunda lie ko. <sup>8</sup> Engú bini, yi asia angu, li nedhinga li Bu Bhobua aké pí yi lie-o. Yi tsia kpókpo 'ngú gba ma inde yi au e ne bhe yi adje di e bhú gudhu na Yelusalema, bhú ndu doto na Yudaya libhomu, ne bhende na Samalia, akólo makolo ali dje doto.»

<sup>9</sup> Li Yesu andjia nakpokpo 'ngú bhomu-o lie, Ebhe atsia aha ani abhúlá me ndu uo hana nde ngatsia ani. Abhomu-o, ndindi atsia abuku ani. U u matá ani de. <sup>10</sup> Nedhinga u adu nga bha lie atsia 'kpí abhúlá-a, li pápá li Yesu atapa lie, kolo me-e, okpála bhisi aze li uo. U adyidyí bubu bongo . <sup>11</sup> U atsia apa pí uo me: «Ngayi okpála na Galilaya, yi alulu sí ne natsia 'kpí abhúlá ka ní? Yesu inde li Ebhe aha e abhúlá bhomu-o, ani agie bhadi lie maka yi au ani lie anu abhúlá ko.»

### *Libi obhulú titima gba Yesu*

<sup>12</sup> Abhomu-o, obhulú titima-a ayie pí eta u a'i e me eta na ondula na Olive, u atsia agie lío bhú gudhu na Yelusalema. Eta ang-o adu de Yelusalema masakpe de kilometele bini.† <sup>13</sup> U akolo lie bhú Yelusalema-a, u a'u bhú tina 'ti bhe abhúlá, bili inde u adu adulu lie-o. A adu nani: Piele ne Djaa , ne Djaki di ne Andili, ne Filipino di ne Tuma, ne Batelemi di ne Matié, ne Djaki ndili gba Alafayo, ne Simo kpála nakunda doto gba o, la di ne Djude ndili gba Djaki. <sup>14</sup> Ndu uo hana, adu apo bhúla o ne bua bini, ndu nedhinga hana ngú nayo Ebhe. U adu bhú dabili bini ne olisi koko, ne Malia 'hi Yesu, di ne ondaise Yesu.

### *U agbe kpála bhú dá Yuda*

<sup>15</sup> Bhú oekpí bhomu-o, ekpí bini, omabhuka apo bhúla o. U adu masakpe de kámá ne ndjikpa bhisi. Abhomu-o, Piele ayie bhúlá bhú ká uo. Ani atsia apa pí uo me: <sup>16</sup> «Ondaise ma, engú inde u aye e bhú Bhuku gba Ebhe-e , a ayo me amene lie. Bu Bhobua apa 'ngú ang-o bhú 'li Davidi pindji Yuda, kpála inde ago nani ne okpála inde aholo Yesu-o. <sup>17</sup> Yuda nako ne suka ní. Ngámá abhu ani ngú namene kulu maka ní adu di ne di lie-o.»

<sup>18</sup> (Ani akala edyi ne tia inde u aha e pí ani li ani abhele kpála lie-o. Bhú edyi ang-o, ani ati adjí 'ndji e ne kuto. 'Bu ani aupa. 'Ndja ani atsia aze kuto. <sup>19</sup> Ndu okpála hana na Yelusalema ambila 'ngú ang-o ndjindji. Kaka-a, u a'o nani 'ili li edyi ang-o bhú eli na gba o me «Akeledama», a akunda napa me «edyi na Ngute».)

<sup>20</sup> Pipita-a, Piele apa matá me: «Padhá de, anga u aye bhú bhuku na oEtsi gba omaYuda-a me:

† 1:12 1:12 Masikpe de kilometele bini: U aye bhú obhuku koko me «maka enú na ekpí naguo gba omaYuda.»

«A ayo me kuti gba ani-e kolo mili bili,  
kpála bini adú bhúbhú de.»

U atsia aye matá me:

«A ayo me kpála koko ha kulu gba ani-o.†»

<sup>21-22</sup> Kaka-a, a ayo me kpála bini li bhú ká ní, amba ani du akpokpo ngali nazuku gba Ngámá Yesu-o. A ayo me kpála ango-o du saka okpála inde adhuku bhú dabili bini ne ní ndu nedhinga hana li Ngámá Yesu adhuku lie ne ní pila doto ko. Kpála ango-o du kpála inde adhuku bhú dabili bini ne ní nayie li nedhinga li Djaa abatisa Yesu lie,§ akolo li ekpí li Ebhe aha ani lie ngú nanu abhúlá-o.»

<sup>23</sup> Abhomu-o, u atsia agbe okpála bhisi. A adu 'li bhe bini-e me Djodjefu , inde u a'i e me Balasabasi. 'Hli koko gba ani-e matá me Djusitusi. A adu 'li bhe koko me Matiasi. <sup>24</sup> U atsia ayo Ebhe me: «Ngámá, mu mbila bua ndu okpála hana. Pana kpála inde mo obhu e bhú ká okpála bhisi inde-e pi ya. <sup>25</sup> Ani adú bhulu titima gba Yesu. Ani ahá kulu inde li Yuda a'o ká e ngú nanu li bili gba e makpe ko.» <sup>26</sup> Pita u ayo Ebhe lie, u agu gbanda.\* Gbanda asuno Matiasi. Abhomu-o, u atsia ato ani bhú ká obhulu titima ndjikpa ne ká bini-o.

## 2

*Bu Bhobua aké pí omabhuka*

<sup>1</sup> Li ekpí na Patekote akolo lie, ndu omabhuka hana apo bhúla o li bili bini. <sup>2</sup> Má gala kolo me-e, tolo ayie abhúlá maka anvi na kpekpeke. Tolo ango-o aha bili bhú 'ti inde u adu bhú e hana. <sup>3</sup> Abhomu-o, u au oehe

maka dingidhi djua. Oehe ango-o agbogbo bhusu e, atsia adulu pí 'ndji ndu uo hana bini ne bini. <sup>4</sup> Ndu uo hana abedhe ne Bu Bhobua . U atsia aholo agama 'ngú bhú oeli koko, maka li Bu Bhobua aduahaha pi uo lie ngú nagagama ko.

<sup>5</sup> Bhú gudhu na Yelusalema-a, omaYuda inde ayie bhú ndu okuti hana\* pila doto libhomu adu oo. A adu okpála inde adu akpe Ebhe. <sup>6</sup> Li u adje tolo ango-o lie, bhiti okpála ango-o ago apo bhúla o. U atsia adu angamba naali. Padhá de, anga kpála ne kpála adu adje omabhuka agama 'ngú bhú eli gba e makpe. <sup>7</sup> U abedhe ne nangamba, di ne nakiaka. U atsia adu apa me: «Okpála i ngagama 'ngú inde-e, ndu uo hana ne okpála na ndu doto na Galilaya adi? <sup>8</sup> Lele pi ndu ní hana bini ne bini, ní ngadje uo lie ngagama 'ngú bhú eli gba ní makpe na kuti-e?»

<sup>9-10</sup> Bhú ká ní si-e, okpála koko ayie bhú doto na Palate. Okoko ayie bhú Media. Okoko ayie bhú Elama. Okoko ayie bhú Edjipeto. Okoko ne okpála na Medjopotami. Okoko ayie bhú ndu doto na Yuda. Okoko ayie bhú Kapadose. Okoko ayie bhú Pote di ne Adjia. Okoko ayie bhú Filidjia. Okoko ayie bhú Pamifilia. Okoko ayie lingo gudhu na Silene inde bhú doto na Libi ko. Okoko ayie bhú gudhu na Loma . <sup>11</sup> Okoko ayie bhú kpemø na Kelete. Okoko ayie bhú doto na Alabi. U azu okoko omaYuda. Okoko-o, a ko ogandji okpála inde abhuka Ebhe gba omaYuda-o. La-a, lele pi ní ngadje uo ngakpokpo 'ngú pindji

† **1:20** 1:20 Tsia bhú Ets. 69:26, 109:8. § **1:21-22** 1:21-22 Nayie li nedhinga li Djaa abatisa Yesu lie: U aye bhú obhuku koko me «nayie li nedhinga inde li Djaa adu abatisa okpála lie-o.»

\* **1:26** 1:26 U agu gbanda: U du nani agu gbanda ango-o pi Ebhe, ngú nambila engú inde ani akunda e-o. \* **2:5** 2:5 OmaYuda inde ayie bhú ndu okuti hana: U adu nani ago bhú Yelusalema ngú nadhøgo Ebhe bhú anokomia na Patekote .



ongamba 'ngú gba Ebhe bhú eli gba ní na kuti lie bini ne bini-e!»<sup>12</sup> Ndú uo hana adú ne nangamba naali. Mabhundja gba uo-o angbingi. Abhomu-o, u atsia apa sùnda o me: «Engú inde-e akúnda napa pi?»<sup>13</sup> Engú bini, okoko adú amú omabhuka. U atsia adú apa me: «Pandì aholo uo e-e nge bha-a!»

*Piele akpokpo eli gba Ebhe-e pi bhiti okpála*

<sup>14</sup> Piele ayie bhúlá bhú dabili bini ne obhúlú titima ndjikpa ne ká bini koko-o. Anì aholo agama 'ngú kpekpeke pi bhiti okpála me: «Ngayi omaYuda, di ne ndú yi okpála hana inde ngadulú bhú gudhú na Yelusalema-a, yi dje ma ndjindji, amba yi mbila la di engú i ngakodho 'kpí inde.»<sup>15</sup> Okpála inde-e, a holo uo ne pandì maka yi ngabhubhundja lie de. Padhá de, anga a ko nga bha saa na odukupabini na kèkpí.<sup>16</sup> Engú bini, engú i ngakodho 'kpí mbia inde-e, a ko engú inde li polofeta Djúele apa nanì e-o. Engú inde me:

<sup>17</sup> «Ebhe apa me: li sokpí-e, ma atúko Bua† gba ma-a pí ndú okpála hana.

Ongìsi gba yi na obhosibhosi, di ne obhe na olisilisi akpókpo ongú inde ma akúnda e-o.

Omakombise gba yi-e aú ongú inde ma akúnda nasuno e bhú loto.

Ogbegbe okpála gba yi-e atsia alóto oloto inde ma atíma e pí uo ko.

<sup>18</sup> Li oekpí ango-o, ma atúko belegu di Bua gba ma-a

pí okpála na kulu gba ma na obhosibhosi, di ne obhe na olisilisi.

U tsia kpókpo ongú inde ma akúnda e-o.

<sup>19</sup> Ma améne ongamba 'ngú abhúlá.

Ma tsia méne ongamba 'ngú kuto píla doto.

Ngute atúko, li djua tsí, a adú di ne ndindi nguwa.

<sup>20</sup> Kala me ekpí gba Ngámá-a kolo-o, ekpí na ngbéngbé, di ne ekpí na asasaua-a, ela adjí lie biti.

Li epe djí lie maka ngute.

<sup>21</sup> Abhomu-o, kpála ne kpála inde abhú 'li Ngámá-a, tsia sía makobho.†»

<sup>22</sup> Abhomu-o, Piele atsia apa me: «Ngayi okpála na Isalaele, yi dje nga engú ma adjí apa e pí yi inde: Ebhe apana pí yi mbámbá me ní atíma Yesu, kpála na kuti na Nadjaleta-a, pí yi. Anì apana li namene ongamba 'ngú sùnda yi bhú anì. Anì amene okiaka 'ngú , di ne oehe na tsulutsulú bhú anì. Ngayi makpe-e, yi mbila 'ngú tété ndjindji.»<sup>23</sup> Kpála bhomu-o, u apu anì pí yi. Ebhe ambila nanì 'ngú tété kalanu. Anì atsia akúnda me amene lie moko. Yi abhèlè anì. Padhá de, anga yi aha anì pí okpála na sisiti. U agì anì li kulusi, u atsia abhèlè anì.»<sup>24</sup> Engú bini, Ebhe azuku anì, anì atsia a'e anì bhú likabhu na kuo. Padhá de, anga a ayo nanì de me kuo to anì bhú tikpu gba e-e de.»<sup>25</sup> Kaka-a, Davidi apa li 'ngú gba anì-e me:

«Ma adú au Ngámá Ebhe kala ma ndú nedhinga hana.

Padhá de, anga anì li pá 'kpa ma na kokpa, amba ma agúku de.

<sup>26</sup> Kaka-a, bua ma abedhe ne djali bedhe.

Ma la di ngali 'tsi ne djali hana.

Ekpí ma akpí lie,

ma adú ne 'to ma me ma akóbho makobho.

† 2:17 2:17 Bua: I du me u nde aye ne 'dhu balua na ngbéngbé-e (madjisikile), amba a ko Bu Bhobua. † 2:21 2:17-21 Tsia bhú Djl. 3:1-5.

27 Padhá de, anga mu 'ó ká ma de me ma du li bili gba okpála inde amu-o de.

Mu kúnda de me kpála gba mu na ngbingbili-e zi bhú lata-a de.

28 Mo osuno muma okpadji na mukobho.

Mo obédhe ma ne djali, anga ní ne mu bhú dabili bini.†»

29 Piele apa matá me: «Ondaise ma, ma ti da napa engú pi yi mbámbá pindji ogbi ní Davidi. Aní akpi, u atsia azi ani. Lata ani bhú ká ní akolo pi naki. 30 Engú bini, a ko nani polofeta. Aní ambila me Ebhe apa nani ne natu silika me: «Ma a'ó saka ongisi gba mu-o bini ngámá bhú da mu.»

31 Davidi au nani engú inde agó-o kalanu. Kaka-a, ani atsia apa engú nazuku gba Masiya me:

«Ebhe 'o ká ani li bili gba okpála inde amu-o de.

Aní 'o la di de me ani zi bhú lata-a de.»

32 Yesu inde ma ngapa 'ngú gba e-e, Ebhe azuku ani. Ndu ya hana, ya au engú ango-o ne djila ya.

33 Pipita-a, Ebhe a'e ani abhúlá, ani atsia a'o ani li pá 'kpa e na kokpa. 'Dyi ní Ebhe aha Bu Bhobua pi ani maka ani apa nani lie kalanu ko. Aní atsia atuko Bu Bhobua ango-o pí ya. A ko bhende yi ngau e, di ne bhende yi ngadje e mbia inde-e ko. 34 Padhá de, anga Davidi ngae makpe 'u nani abhúlá de. Engú bini, ani apa ngae me:

«Ngámá Ebhe apa nani pi Ngámá gba ma-a me:

Du li pá 'kpa ma na kokpa,

35 akólo li 'kpí ma a'ó obhulu yala gba mu-o lie sa 'dhu mu ko.†»

36 A ayo me ndu okpála hana na Isalaele mbila engú inde-e

ndjindji me: Yesu inde-e, inde yi abhelo e li kulusi-e, Ebhe a'o ani Ngámá, ani atsia a'o di ani Masiya!»

37 Li u adje engú bhomu-o lie, bua uo asia likabhú naali. U atsia ayi Piele di ne obhulu titima koko-o me: «Ondaise ya, a ayo me ya mene pi?» 38 Abhomu-o, Piele atsia agie pi uo me: «Kpála ne kpála dji bua e, ani sia batisimo ne 'li Yesu Kilisito, amba Ebhe 'e siti 'ngú gba ani-o. Abhomu-o, yi tsia sía la di Bu Bhobua padhá. 39 Padhá de, anga ani apa nani kalanu me ni améne pi yi ne ongisi gba yi-e moko. Aní atsia apa me ni améne di pi okpála bhende ngadulu tsutsutsu,‡ di ne pi ndu okpála hana bhende li Ngámá gba ni-e a'í o-o.»

40 Abhomu-o, Piele atsia akpo 'ngú koko pi uo bhelé ngú naha pi uo gumu me u bhuka, di me u du ne nalila lio malila. Aní adu apa pi uo me: «Okpála na naki inde-e sisiti. Yi yie bhú ká uo mayie, amba Ebhe kobho yi.» 41 Okpála bhelé inde adje 'li Piele-e, aziba. U atsia asia batisimo. Li ekpi ango-o, okpála masakpe de kutu bata ali bhú ká omabhuka.

*Omabhuka na kalanu-o adu nani lele o pi?*

42 U adu aha lio ndu 'kpí hana ngú nadije nasuno gba obhulu titima gba Yesu-o. U adu nadu sunda o bhú mukunda maka ondaise. U adu azu 'he bhú dabili bini,§ u atsia adu di ayo Ebhe bhú dabili bini. 43 Ndu okpála hana adu ne tsulu. Padhá de, anga obhulu titima-a adu amene ongú na ngangamba, di ne okiaka 'ngú naali. 44 Ndu omabhuka hana adu adulu bhú dabili bini. Ndu 'he gba

† 2:28 2:25-28 Tsia bhú Ets. 16:8-11. † 2:35 2:34-35 Tsia bhú Ets. 110:1. † 2:39 2:39 Okpála bhende ngadulu tsutsutsu: A akunda napa me ogandji okpála, okpála bhende ne omaYuda

ade. § 2:42 2:42 Nazu 'he bhú dabili bini: A ko nazu komonyo. A ko la di nazu 'he bhú dabili bini.

uo-o hana adu bhadi bhú dabilí bini. U atsia adu agbogbo bhusu bhusu li o. <sup>45</sup> U adu atsindji oedyi gba o, di ne oehe koko gba o-o. U atsia adu agbogbo bhusu tia ango-o li ndu okpála hana, maka li gumu gba kpála bini ne bini adu lie ko. <sup>46</sup> Ekpí bini ne bini hana, u adu apo bhúla o bhú dabilí bini, u adu ali bhú 'ngbé 'ti Ebhe gba omaYuda. U adu agumu mapa bhú eti gba o, u atsia adu azu 'he ne djali, di ne bua na bhubhuku. <sup>47</sup> U adu atoko Ebhe. Engú inde u adu amene e-e bhú bádha bhú 'bu gba Ebhe-e , a adu anga li okpála naali. Abhomu-o, ndu 'kpí hana, Ngámá atsia adu ato okpála koko bhende asia mukobho-o bhú ká uo.

### 3

#### *Dukuto adhuku*

<sup>1</sup> Ekpí bini, pita tulukpe, Piele ne Djaa adu anu bhú 'ngbé 'ti Ebhe gba omaYuda, ngu nayo Ebhe inde u adu ayo e bhú saa na bata-o. <sup>2</sup> De 'bhé 'ngbé 'ti Ebhe gba omaYuda ango-o inde u a'i e me «Babadha-a», kpála bini inde i dhuku de nayie maka u azu ani lie adu oo. Ndu 'kpí hana, u adu ago a'o ani oo ngubula me ani du ayo tia ka okpála inde ngali bhú 'ti Ebhe ko. <sup>3</sup> Li ani au Piele ne Djaa lie me u nde adji ali bhú 'ngbé 'ti Ebhe-e, ani atsia ayo tia ka uo.

<sup>4</sup> Piele ne Djaa abanga djila o li ani. Abhomu-o, Piele atsia apa pi ani me: «Tsia ya!» <sup>5</sup> Kpála ango-o atsia a'o mabhundja gba e-e hana pí uo. Padhá de, anga ani adu abhundja me ni asia 'he ka uo masia. <sup>6</sup> Abhomu-o, Piele atsia apa pi ani me: «Falanga ka ma ade. Olo la di ka ma ade. Engú bini, ma ahá pi mu ehe inde ka ma-o: ne 'li Yesu Kilisito na Nadjaleta-a, yie

bhúla, amba mu dhuku!» <sup>7</sup> Pipita-a, Piele aholo 'kpa ani na kokpa, ani atsia a'e ani bhúla. Má gala kolo me-e, obiki na 'dhu ani akolo kpekpeke. <sup>8</sup> Ani a'ulu, aké má kprii! Ani atsia aholo nadhuku. Pipita-a, ani ali bhú 'ngbé 'ti Ebhe bhú dabilí bini ne Piele ne Djaa. Ani adu adhuku. Ani adu a'u'ulu. Ani atsia adu adhogo Ebhe. <sup>9</sup> Ndu okpála hana au ani me ani nde ngadhuku, ani nde ngadhogo Ebhe. <sup>10</sup> U atsia ambila me, a ko kpála inde adu nadu li 'bhé 'ngbé 'ti Ebhe, li bhobho bhende u a'i e me «Babadha», ngubula nayo 'he. Abhomu-o, ndu uo hana angamba, u atsia akiaka naali ka engú inde akolo li kute dukuto-o.

*Piele akpokpo 'ngú pi bhiti okpála bhú 'ngbé 'ti Ebhe gba omaYuda*

<sup>11</sup> Abhomu-o, kpála ango-o du ayie de Piele ne Djaa de. Ndu okpála hana angamba naali ka engú inde akodho 'kpí-o. U ago ne holo, u atsia apo bhúla o de uo sa basa inde u a'i e me «Sa ngba 'ti gba Salomo.\*»

<sup>12</sup> Li Piele au lie mo-o, do ani pi bhiti okpála bhomu-o me: «Ngayi okpála na Isalaele, yi ngangamba li nakobho ka kpála inde-e ka ni? Li yi abanga djila yi lie li ya mugito me ya amene ngaya ne angu gba ya makpe me kpála inde-e dhuku-o? La di mugito me a ko anga ya ngakpata engú gba Ebhe-e? A mo-o ade. <sup>13</sup> Ebhe gba Abalahama, Ebhe gba Isaka, Ebhe gba Yakobho, Ebhe gba onguo ogbi ní amene me 'li bali gba ni Yesu-o adhogo lie. La-a, ngayi makpe-e, yi apu ani pi ongámási. Yi atsia ayala ani kala Pilato me ani nde adu akunda la me ni tse 'kpa li ani-o.

\* 3:11 3:11 Sa ngba 'ti gba Salomo: A ko sa ngba 'ngbé 'ti Ebhe gba omaYuda-o.

14 Ngayi-e, yi ayala Kpála bhende bubu, inde di ngbingbili. Yi atsia ayo me Pilate suno bádha bhú 'bu pi kpála bhende ngabhili okpála-o. 15 Yi abhøle kpála inde ngaha mukobho. Engú bini, Ebhe azuku ani bhú ká kpála bhende amu-o. Ya au engú ango-o ne djila ya makpe. 16 Mbia inde-e, yi ngau kpála inde, yi mbila la di hana me a ko nako dukuto. Ani akobho ka 'li Yesu. Padhá de, anga ya abhuka ani. A ko ka nabhuka bhú Yesu, ani atsia akobho hana maka yi ngau ani lie inde.

17 Engú bini, ondaise ma, ma ambila ndjindji me ngayi ne ongámási gba yi-e, yi amene li Yesu mo-o, anga yi mbila nani kukulu 'ngú-o de. 18 La-a, Ebhe ngae makpe amene mo-o ngubula nasuno mbámbá engú inde ani apa nani e kalanu bhú 'li ndu opolofeta hana ko. Ani apa nani me Masiya gba ni-e azú likabhu. 19 Kaka-a, yi dji bua yi. Yi gie liyi li pápá gba Ebhe, amba ani 'e siti 'ngú gba yi-o. 20 Abhomu-o, Ebhe ahá onedhinga naguo pi yi. Ani tsia tíma matá Masiya inde ani abhu nani e kalanu-o pi yi. A akunda napa me Yesu.

21 Engú bini, mbia inde-e, a ayo me Yesu Kilisito du ngaiza abhúla. Ani du oo akólo li nedhinga inde li ndu 'ngú hana akólo lie na mbia-o. Nayie didili naali-e, Ebhe apa nani engú ango-o bhú 'li obubu opolofeta-o. 22 Maka li Moidje apa la di nani lie me: «Ebhe Ngámá gba yi-e atíma polofeta pi yi maka ma. A adú suka ondaise yi. A ayo me yi dje ndu 'ngú hana inde ani apá e pi yi ko. 23 La-a, kpála bhende i djé 'li ani de-e, u agbé ani bhú ká okpála gba Ebhe, u tsia bhøle ani.†»

24 La di-e, ndu opolofeta hana

inde akpokpo 'ngú gba Ebhe-e, nayie li Samuele, akpo engú ndu o hana bini ne bini pindji engú inde-e akolo li 'kpí ango-o ko. 25 Engú li Ebhe apa nani e kalanu bhú 'bhe opolofeta-a, a pi yi. La di-e, gandja inde li Ebhe akodho nani e kalanu-o ne onguo ogbi yi-e, a di pi yi. Ani apa nani kalanu pi Abalahama me: «Ma atúko bisagu pí ndu opiga hana píla doto li pápá gba ongisi gba mu-o.†» 26 Kaka-a, Ebhe abhu bali gba e, ani atsia atima ngaiza ani pi yi omaɬsalaele. Ani atima ani me ani tuko bisagu pí yi. Ani agbé kpála ne kpála bhú siti 'ngú gba e-o.»

## 4

*Libi okpála natsia 'kpí li 'ngú gba omaYuda aholo Piele ne Djaa*

1 Li Piele ne Djaa adu akpo 'ngú lie pi okpála-a, odimandø gba Ebhe-e ago bhú dabili bini ne ngámá gba okpála nalila 'ngbé 'ti Ebhe gba omaYuda di ne oSadukai . 2 U adje siti bua naali. Padhá de, anga Piele ne Djaa adu asuno pi bhiti okpála. U adu akpokpo pi uo me okpála inde amu-o azúku di mazuku, maka li Yesu azuku lie ko. 3 Abhomu-o, u aholo Piele ne Djaa. U atsia ato uo bhú tikpu akolo pi køkpi, anga adu me ekpi nde ngabi. 4 La-a, bhelé na okpála inde adje nani eli gba Ebhe-e , akolo omabhuka . Abhomu-o, omabhuka abe ndu o, u atsia akolo masikpe de okpála kutu bhuluvue.

5 Li ekpi aseke lie, ongámási gba omaYuda , ne obhelesi okpála di ne omasuno na líli gba Moidje , apo bhúla o bhú gudhu na Yelusalema. 6 A adu nani: bhele kpála gba odimandø Ana, ne Kaifa, ne Djaa , ne Alekidjandele di ne ndu okpála hana inde bhú

† 3:23 3:22-23 Tsia bhú Det. 18:15, 18, 19. † 3:25 3:25 Tsia bhú Dje. 22:18.

piga gba bhele kpála gba odi-mandø gba Ebhe-o. <sup>7</sup> Abhomu-o, okpála inde aholo Piele ne Djaa, atsia agbe Piele ne Djaa kala uo. U atsia ayi uo me: «Yi akobho kpála inde ne mangua angu dho? La di ne 'li da?»

<sup>8</sup> Abhomu-o, Piele inde abedhe nani ne Bu Bhobua-a atsia apa pi uo me: «Ngayi ongámási, di ne yi obhelesi okpála-a, <sup>9</sup> ya amene bádha 'ngú pi dukuto inde. La naki-e, u ngayi ya me ani akobho lele pi. <sup>10</sup> A ayo me ndu yi hana, di ne ndu okpála na Isalaele hana, yi mbila engú inde-e ndjindji: kpála inde-e ala kala yi ne kute na angu ka angu gba Yesu Kilisito , kpála na Nadjaleta. A ko Yesu inde yi agi nani e li kulusi, Ebhe atsia azuku ani-o. <sup>11</sup> Yesu ne kpála inde li Bhuku gba Ebhe-e apa nani engú gba e me Ebhe apa me:

«Ani ne teme inde li ngayi okpála nayiki 'ti-e abhike e-o.

La-a, teme ang-o akolo teme inde abi eti-e libhomu.†

<sup>12</sup> Ani ti bha da nakobho okpála ngae kpi e kpi. Padhá de, anga pila doto libhomu, Ebhe ha 'li kpála koko bini de inde u ti da nakobho ka e.»

<sup>13</sup> Li Libi okpála natsia 'kpi li 'ngú gba omaYuda au lie me Piele ne Djaa ngagama 'ngú ne tsulu ade-e, u angamba naali. Padhá de, anga u adu ambila ndjindji me Piele ne Djaa ne okpála na padhá. U mene balua bhelé de. La di-e, u adu ambila ndjindji me, u adu adhuku nani bhú dabili bini ne Yesu. <sup>14</sup> Engú bini, u adu di au kpála inde akobho-o ala de uo. U tsia du ne engú nagigie pi uo de. <sup>15</sup> Abhomu-o, ongámási aha líli me obhulu titima ne kilidjo. U atsia aholo nagama 'ngú sunda o. <sup>16</sup> U adu apa me: «Ní améne ngú okpála inde-e pi? Padhá

de, anga ndu okpála hana na Yelusalema ambila ndjindji me, u amene ngamba 'ngú inde-e ngao. Ní ti la di da nayayala de. <sup>17</sup> Engú bini, ngabula me ngali ang-o ayángba naali sunda okpála de-e, a ayo me ní gbele 'dje uo kpekpeke me u apa matá engú ne 'li Yesu pi kpála belegu de bini.»

<sup>18</sup> Abhomu-o, u a'i matá obhulu titima-o. U atsia aha líli pi uo kpekpeke me, u agama 'ngú di ne me u asuno ne 'li Yesu matá-a de. <sup>19</sup> Engu bini, Piele ne Djaa agie pi uo me: «Yi kodho 'ngú inde-e ngayi makpe. Bhú djila Ebhe-e, a ngbingbili ne bhedho? Ne me ya mene líli gba yi, ne me ya mene mangbo líli gba Ebhe! <sup>20</sup> La pi ya-a, ya ti da na'o nakpokpo ngali na engú inde ya au e ne bhende ya adje e de.» <sup>21</sup> Abhomu-o, Libi okpála natsia 'kpi li 'ngú gba omaYuda agama matá engú pi uo kpekpeke. Pipita-a, u atsia atse 'kpa li uo. La-a, u u nani engú inde u ti da namene uo sisiti ka e de. Padhá de, anga ndu okpála hana adu adhøø Ebhe ka engú inde akodho 'kpi-o. <sup>22</sup> Dukuto li nakobho gba e adu ngangamba bhomu-o, adu nani ne kalanga nane ndjikpa badha mane.

### *Omabhuka ayo Ebhe*

<sup>23</sup> Li u atse 'kpa li Piele ne Djaa lie, u anu abhaka obi o. U atsia akpokpo ndu 'ngú hana inde li ongbengbe odimandø gba Ebhe di ne obhelesi okpála apa e-e pi uo. <sup>24</sup> Pita u adje engú bhomu-o lie, omabhuka ayo Ebhe ne bua bini me: «Ngámá, mo obho ekpi ne ndu 'he inde bhúbhú-o hana ngamu. Mo obho doto ne ndu 'he inde bhúbhú-o hana ngamu. Mo obho la di 'ngbé 'ngu ne ndu 'he inde bhúbhú-o hana ngamu. <sup>25</sup> Mo opa nani ngamu bhú angu

† 4:11 4:11 Tsia bhú Ets. 118:22.

gba Bu Bhobua, bhú 'li ogbi ya Davidi, bali gba m̄-o, me:

«Opiga inde ne omaYuda ade-e abedhe ne siti bua ka ni?»

Okpála na kuti koko adje lio ngú namene ongú na padhá padhá ka ni?

26 Ongbengbe ongámási na doto aleke lio ngú egú.

Ongámási apo bhúla o bhú dabili bini

ngú nagú Ngámá Ebhe, di ne kpála inde li Ebhe abhu e-o.\*

27 Padhá de, anga a na paká me ngámá Elode Atipasi ne Pose Pilate apo nani bhúla o bhú gudhu inde, bhú dabili bini ne opiga inde ne omaYuda ade, di ne opiga na Isalaele. U apo bhúla o ngubula me o gá Yesu, bali na bubu gba m̄, inde mo obhu e maka Masiya-o . 28 U amene bhom̄-o ndu 'ngú hana inde mo opa nani e didili ne angu gba m̄-o me améne lie mamene ko.

29 La mbia inde-e, Ngámá, tsia nga maka u ngato mbolo li ya lie-o. Kaka-a, ha angu pi ya, obalise gba m̄, amba ya akpókpo eli gba m̄-o ne tsulu de. 30 Ha angu gba m̄-o pi ya, ngubula me ya akobho okpála, amba ya mene ongamba 'ngú di ne okiaka 'ngú ne 'li Yesu, bali gba m̄ na bubu-o.» 31 Li u andjia nayo Ebhe lie, bili inde u apo bhúla o lie adyiki má djigi djigi! Ndu uo hana abedhe ne Bu Bhobua. U tsia du akpokpo eli gba Ebhe-e ne tsulu de.

*Omabhuka abu 'he gba o bhú dabili bini*

32 Ndu omabhuka hana adu ne bua bini. U adu di ne nabhundja bini. Bhú ká uo-o, kpála bini du abhundja de me ehe gba ni-e bha pi ni kpi ni kpi-e de. Engú bini, oehe gba uo-o adu bha pi ndu uo hana. 33 Obhulu titima gba Yesu

adu akpokpo ne angu hana me Ngámá Yesu azuku. Abhom̄-o, bádha bhú 'bu gba Ebhe-e atsia adu pi ndu uo hana. 34 Bhú ká uo-o, kpála bini du aneke 'he de. Padhá de, anga ndu okpála hana inde adu ne oedyi di ne oeti-e adu atsitsindji, u adu ago ne tia angu-o. 35 U atsia adu ahaha pi obhulu titima. Pipita-a, u atsia adu agbogbo bhusu tia angu-o li kpála bini ne bini maka li gumu gba ani adu lie ko.

36 Kpála bini adu nani bhú ká uo, a adu 'li ani me Djodjefu . Ani adu kpála na piga gba Levi. U azu nani ani bhú kpem̄ na Sipele. Obhulu titima agisila nani 'li koko li ani me Balanabasi (inde akunda napa me «Kpála inde ngato masi»). 37 Ani atsindji edyi gba e. Ani ago ne tia angu-o, ani atsia a'o kala obhulu titima.

## 5

### *Siti 'ngú gba Anania ne Safila*

1 Abhom̄-o, kpála bini inde adu 'li e me Anania, adje lie ne wala e Safila. U atsindji edyi gba o-o. 2 Ani aha té tia angu-o, a'o pi e. Ani atsia anu a'o dudu-o kala obhulu titima gba Yesu-o . Wala ani adu ambila 'ngú tété ndjindji. 3 Abhom̄-o, Piele apa pi ani me: «Anania, mo oziba me Satana pite ni ngú ni? Mo opa eu pi Bu Bhobua , anga mo oha té tia na edyi-e, mo o'o pi m̄. 4 Kala me m̄ tsindji edyi angu-o, a ko nako naamu di? La di-e, mo otsindji lie, tia angu-o, a ko nako naamu di? Mo oziba me ni mene ngua 'ngú inde-e ka ni? M̄ pite okpála de, engú bini, mo opite bhom̄-o Ebhe.» 5 Bha li nedhinga inde li Anania adje engú bhom̄-o lie, ani ati, ani atsia akpi. Ndu

\* 4:26 4:25-26 Kpála inde li Ebhe abhu e-o: A akunda napa me Kilisito. Tsia bhú Ets. 2:1-2.

okpála hana inde adje engú angoo, adu ne tsulu naali. <sup>6</sup> Abhomu-o, omakombise ago. U agala kuo ani ne bongoo, u a'e, u atsia anu azi.

<sup>7</sup> Masikpe de pita saa bata-a, wala Anania ago ali oo me ani nde mbila engú inde akodho 'kpí-e de. <sup>8</sup> Piele ayi ani me: «Pa nga muma, yi atsendji bha ndju edyi gba yi-e bhú mase inde-e?» Olo-o agie me: «A moko, ya atsendji bhú mase bhomu-o.» <sup>9</sup> Abhomu-o, Piele atsia apa pi ani me: «Yi adje liyi ne 'ko mu ngu nale Bua gba Ngámá-a ngu ni? Djedje nga! Okpála inde i kolo nazi 'ko mu-o, u alulu li bhoti bhomu. U abí bhadi mu moko!» <sup>10</sup> Bha li nedhinga bhomu-o, olo-o ati kuto bhú li 'dhu Piele, ani atsia akpi. Omakombise ali, u abhaka me ani nde akpi. Abhomu-o, u a'e kuo ani, u atsia anu azi ani denge 'ko e. <sup>11</sup> Ndu okpála na Piga gba Ebhe-e hana, di ne ndu okpála hana inde adje engú inde akodho 'kpí-e, adje tsulu naali.

*Obhulu titima gba Yesu-o amene ongamba 'ngú bhelé*

<sup>12</sup> Obhulu titima gba Yesu-o adu amene nani ongamba 'ngú di ne okiaka 'ngú bhelé bhú ká okpála. Ndu omabhuka hana adu apo bhula o sa basa inde u a'i e me «Sa ngba 'ti gba Salomo.» <sup>13</sup> Kpála bini bhú ká okpála bhende i bhuka de-e le nani nali bhú ká uo de, abana li ndu okpála hana adu apa 'ngú gba uo-o lie ndjindji-o. <sup>14</sup> Obhosi bhelé naali di ne o'isi bhelé naali inde abhuka Ngámá-a, adu ali bhú ká omabhuka, u atsia adu abe ndu o. <sup>15</sup> U aholo belegu apandja okpála na kuo li okpadji. U adu aseke uo pí okalagba di ne pí otsala. U adu amene mo-o, anga u adu abhundja me i du me Piele nde akodho 'kpí oo, kulu ani de pu mbo pí suka uo, amba ani kobho. <sup>16</sup> Okpála bhelé adu di ayie bhú

okuti na ngo Yelusalema, u adu ago ne okpála na kuo di ne okpála inde adu ne osisiti bua bhú o-o. Ndu uo hana atsia adu akobho.

*U aholo obhulu titima gba Yesu*

<sup>17</sup> Abhomu-o, bhele kpála gba odimandé gba Ebhe-e di ne ndu okpála hana inde adu bhú dabili bini ne ani-e, a akunda napa me libi oSadukai, adje siti bua naali pindji obhulu titima gba Yesu. U atsia apa me, a ayo namene uo sisiti. <sup>18</sup> U aholo obhulu titima-o, u atsia ato uo bhú tikpu bhe na ngbéngbé-o. <sup>19</sup> La sukpe-e, andjelu bini gba Ngámá a'u obhe bhoti na tikpu-o. Ani apandja obhulu titima-o. Ani atsia apa pi uo me: <sup>20</sup> «Yi nu bhú 'ngbé 'ti Ebhe gba omaYuda. Oo, yi kpokpo pi okpála ndu 'ngú hana inde atsia mukobho na mbia-o.» <sup>21</sup> Obhulu titima-a amene bhadi mo-o. Kekpi naali-e, u anu bhú 'ngbé 'ti Ebhe, u atsia aholo nasuno pi okpála.

Li nedhinga bhomu-o, bhele kpála gba odimandé gba Ebhe-e bhú dabili bini ne okpála gba e-e, u a'i Libi okpála natsia 'kpí li 'ngú gba omafalaale-o. U atsia atima okpála me u nu ha obhulu titima-a bhú tikpu, amba u go ne uo. <sup>22</sup> Engú bini, li okpála angoo anu lie, u bhaka uo bhú tikpu de. U agie lio, u atsia apa pi Libi okpála natsia 'kpí li 'ngú gba omaYuda-a me: <sup>23</sup> «Ya abhaka me 'bhe tikpu-o nde ani lie ndjindji. Okpála nalila tikpu-o nde adulu li obhebhe. La-a, ya a'u bhoti-e lie, ya abhaka kpála bhúbhú oo belegu de bini!» <sup>24</sup> Li ngámá gba okpála nalila 'ngbé 'ti Ebhe-e, di ne ongbengbe odimandé gba Ebhe, adje engú angoo lie-e, mabhundja gba uo angbingi naali. U mbila de me a akolo li obhulu titima-a ne mangua 'ngú dho-ie de. <sup>25</sup> Pipita-a, kpála bini ago, ani apa pi uo me: «Yi djedje

nga! Okpála inde yi abu nako o bhú tikpu-o, uo mbia inde-e bhú 'ngbé 'ti Ebhe. U alulú malulú, u ngasuno pi okpála.»

<sup>26</sup> Abhomu-o, ngámá gba omulila-a anu ne osudha gba e-o. Aní aha obhulú titima-a, aní ago ne uo. Engú bini, u mene uo sisiti de. Padhá de, anga u adu akpe me okpála abhili o ne teme de. <sup>27</sup> Pita aní ago ne uo lie, aní a'o uo kala Libi okpála natsia 'kpí lí 'ngú gba omaYuda-o. Abhomu-o, bhele kpála gba odimandø gba Ebhe-e aholo nayiyi uo me: <sup>28</sup> «Ya aha nako líli pí yi kpekpeke me yi asúno ne 'li kpála bhomu-o de. La-a, nasuno gba yi-e aha Yelusalema libhomu! Yi ngakunda me ngute kpála bhomu-o tuko pí ya!»

<sup>29</sup> Piele di ne obhulú titima koko agie me: «A ayo me ya mene líli gba Ebhe ane líli gba okpála. <sup>30</sup> Ngayi-e, yi abhøle Yesu li kulusi. Engú bini, Ebhe gba ogbi ní-e azuku aní bhú ká okpála inde amu. <sup>31</sup> Ebhe a'e'e aní abhúlá lí pá 'kpa e na kokpa, aní a'o aní Ngámá di ne Mukobho . Aní amene mo-o ngubula me okpála na Isalaele dji bua o, amba Ebhe 'e siti 'ngú gba uo-o. <sup>32</sup> Ya au ongú bhomu-o ne djila ya makpe. Bu Bhobua, inde lí Ebhe ngaha e pi okpála inde ngamene líli gba aní-e, au di.»

<sup>33</sup> Lí Libi okpála natsia 'kpí lí 'ngú gba omaYuda adje engú ango-o lie, u abi 'gú naali. U di me bhili obhulú titima gba Yesu-o. <sup>34</sup> Engú bini muFalisai bini inde adu 'li e me Gamaliele, a adu bhú ká uo. A adu musuno na líli . Ndu okpála hana adu amanga aní ndjindji. Aní ayie bhúlá. Aní ayo me u pandja nga obhulú titima-a kilidjo. <sup>35</sup> Pipita-a, aní atsia apa me: «Ngayi okpála na Isalaele, yi lila liyi ndjindji lí 'ngú inde yi adjí amene e lí

kute okpála inde-o! <sup>36</sup> Padhá de, anga ane nga ekpí bhelé de, kpála bini akoto nako, a adu 'li aní me Teudasi. Aní adu apa me ní ne 'ngbé kpála. Okpála masakpe de kámá badha adu akpata aní. Engú bini, u abhøle aní lie, ndu okpála hana inde adu akpata aní-e atsia atsambala. Abhomu-o, engú gba aní-e atsia andjia.

<sup>37</sup> Pita aní-e, lí nedhinga u adu atanga okpála lie, Yuda, kpála na Galilaya, akoto. Aní agbele okpála nganda e bhelé. Ngaani di-e, u abhøle aní. Abhomu-o, okpála inde adu akpata aní-e atsia atsambala. <sup>38</sup> Kaka mbia inde-e, ma apa pí yi me yi adhedhe lí okpála inde-e de. Yi 'o uo. Padhá de, anga i du me mabhundja di ne ongú gba uo nde ayie ka okpála-a, i kólo padhá. <sup>39</sup> Engú bini, i du la me ongú bhomu-o nde ayie ka Ebhe-e, yi tí da nabhøbhøle de. 'E-e! Yi agú gbele ne Ebhe de.»

Abhomu-o, Libi okpála natsia 'kpí lí 'ngú gba omaYuda atsia aziba mabhundja gba Gamaliele-o. <sup>40</sup> U a'i obhulú titima-o. U aha líli me u bhí uo ne fimbo. U aha di líli pí uo kpekpeke me u akpó 'ngú matá ne 'li Yesu belegu de bini. Pipita-a, u atsia atse 'kpa lí uo. <sup>41</sup> Abhomu-o, obhulú titima-a akoto me u nde abedhe ne djali bedhe. Padhá de, anga Ebhe au ndjindji me u zu likabhu ngubula 'li Yesu. <sup>42</sup> Ekpí bini ne bini hana, u adu bha nasuno di ne nakpokpo Bádha Ngali gba Yesu Masiya bhú 'ngbé 'ti Ebhe di ne bhú otí gba o-o.

## 6

*U alo okpála mananika ngú nateteke obhulú titima gba Yesu*

<sup>1</sup> Lí nedhinga ango-o, omukpata adu akolo bhelé. Engú bini, omaYuda inde adu nadi eli na giliki-e, atsia aholo nadi



m̄atokono li obhende adu nadi eli na ebele-o. U adu apa me: «Ndu 'kpí hana nedhinga nagapa 'zu-o, u ngaha ezu pí ookesi na libi gba ya-a ndjindji ade.» <sup>2</sup> Abhomu-o, obhulu titima ndjikpa ne ká bhisi gba Yesu-o apokobhø bhúla ndu omabhuka hana. U atsia apa pí uo me: «A ayo de me ya 'o ká nakpokpo eli gba Ebhe-e ngú nagapa 'zu-o de. <sup>3</sup> Kaka-a, ondaise ya, yi gili okpála mananika inde li okpála ngaziba o ndjindji, inde abedhe ne Bu Bhobua di ne imbilangú bhú ká yi, amba ya ha kulu bhomu-o pí uo. <sup>4</sup> Abhomu-o ngaya-a, ya tí da naha ndu nedhinga gba ya-a hana ngubula nayo di ne nakpokpo Bádha Ngali gba Ebhe-o.»

<sup>5</sup> Ndu okpála hana aziba engú inde li obhulu titima apa e ko. Abhomu-o, u alo Etieni, kpála inde abedhe ne nabhuka di ne Bu Bhobua, ne Filipino, ne Polokole, ne Nikanola, ne Timoni, ne Palamenasi, ne Nikola, kpála na kuti na Atiokia inde abhuka nani Ebhe gba omaYuda ko.\* <sup>6</sup> U anu ne uo kala obhulu titima. Abhomu-o, obhulu titima a'o 'kpa o pí uo, u atsia ayo Ebhe pí uo.

<sup>7</sup> Eli gba Ebhe-e adu bha naya ne kalanu. Abhomu-o, alo gba omabhuka atsia adu a'u ne bhúla naali bhú Yelusalema. Odimandø gba Ebhe bhelé atsia abhuka di.

### *U aholo Etieni*

<sup>8</sup> Etieni abedhe nani ne angu ka bádha bhú 'bu gba Ebhe . Abhomu-o, aní atsia adu amene ongbengbe 'ngú di ne ongu na ngangamba bhú ká okpála. <sup>9</sup> Okpála koko ago ngú namene kpekebhe ne Etieni. Bhú ká uo-o, okoko adu okpála inde adu apo bhúla o bhú eti nadje líli gba Moidje , inde u a'i e me «Eti

nadje líli gba okpála inde aze bhú bali-o.» Okoko ayie nani bhú gudhu na Silene, ne bhú gudhu na Alekidjandili, ne bhú ndu doto na Silisia di ne bhú ndu doto na Adjia. <sup>10</sup> Engú bini, imbilangú gba uo tí nani da nakolo li bhe gba ani-e de. Padhá de, anga ani adu agama 'ngú ne imbilangú di ne angu inde li Bu Bhobua adu aha e pí ani ngae ko.

<sup>11</sup> Abhomu-o, u aha tia pí okpála, amba u pa eu li ani me: «Ya adje ani me ani nde ngasobho Moidje di ne Ebhe!» <sup>12</sup> U amene moko ngubula me okpála, ne obhelesi okpála di ne omusuno na líli-e , bi 'gú ngú Etieni. Pipita-a, u aze li Etieni, u aholo ani. U atsia anu ne ani kala Libi okpála natsia 'kpí li 'ngú gba omaYuda ko. <sup>13</sup> Oo, u anu di ne okpála inde adu apa 'ngú li Etieni ne eu. Okpála ango-o atsia adu apa me: «Kpála inde-e, ndu 'kpí hana, ngapa bha bini 'ngú sisiti li kute 'ngbé 'ti Ebhe na bubu gba ní, di ne li kute líli gba Moidje-o . <sup>14</sup> Ya adje ani me ani nde ngapa me: «Yesu ango-o, kpála na Nadjaleta, abhólø 'ngbé 'ti Ebhe inde, ani tsia dji di odasundu inde ya asia e ka Moidje ko.» <sup>15</sup> Ndu okpála inde adu bhú 'ti oo hana abanga djila o li Etieni. U atsia au me bhúla ani adu asu maka bhúla andjelu .

## 7

### *Etieni akpokpo 'ngú kala okpála*

<sup>1</sup> Abhomu-o, bhele kpála gba odimandø ayi Etieni me: «Engú inde u ngapa e li mu bhomu-o, a ko bha ndju kukulu 'ngú?»

<sup>2</sup> Etieni atsia agie me: «Odyi ma di ne ondaise ma, yi djedje nga! Ebhe na sangu akoto nani li ogbi

\* 6:5 6:5 Nabhuka Ebhe gba omaYuda: A akunda napa me okpála koko, inde ne omaYuda ade-e, adji nani bua o, u atsia abhuka Ebhe gba omaYuda-o. Nikola inde-e, atsia abhuka di nani Yesu.

ní Abalahama bhú ndu doto na Medjopotami kala me ani nū nasi kuti bhú ndu doto na Alana. <sup>3</sup> Ani atsia apa pi ani me: 'O ká doto gba mu di ne piga gba mu-o, amba mu nū bhú doto inde ma asúno e pi mu ko.†

<sup>4</sup> Abhomu-o, Abalahama ayie bhú doto gba oKaladea, ani atsia anu nasi kuti bhú Alana. Pita li 'dyi ani akpi lie, Ebhe a'e ani bhú Alana, ani atsia ago a'o ani bhú doto yi nde bhú e mbia inde-e ko. <sup>5</sup> Ebhe ha nga nani edyi pi ani sii de, belegu de mboye bili na'o 'dhu e ka ani tété. La-a, ani atsia apa nani pi ani kalanu me: 'Ma ahá doto inde-e pi mu, li ongisi gba mu-o\* tsia tígala ne di pita mu-o ngao.' La-a, li nedhinga bhomu-o, ndili du nga nani ka ani de.

<sup>6</sup> Ebhe apa pi ani bhomu-o me: 'Ongisi gba ongisi gba mu-o anú adulu bhú doto na gandji gandji. Oo, u akólo obalise gba okpála na doto ango-o. Li okpála ango-o méne uo sisiti ngubula kalanga kámá badha.' <sup>7</sup> La-a, Ebhe apa matá di me: 'Ma akódho 'ngú gba okpála inde u akólo obalise pi o-o ngama. Pipita-a, u zé oo, u tsia gó dú adhogè ma li bili inde.†' <sup>8</sup> Abhomu-o, Ebhe atsia akodho gandja ne Abalahama. Li Abalahama azu Isaka lie, ani atsia ato ani bhú gandja bhú 'kpi na madjina nayie li 'kpi u azu ani lie-o. Isaka amene bhadi moko pi Jakobho. Jakobho atsia amene bhadi moko pi onguo ogbi ní ndjikpa ne ká bhisi-o.

<sup>9</sup> Pipita-a, onguo ogbi ní ango-o adje siti bua naali pi Djodjefu, ndindili pita o-o. Abhomu-o, u atsia atsindji ani me u nu ne ani bhú bali bhú Edjipeto. La-a, Ebhe adu bhú dabili bini ne ani. <sup>10</sup> Ebhe agbegbe Djodjefu bhú

likabhu gba e hana. Ani asuno bádha bhú 'bu gba e pi ani ne imbilangu, ani atsia amene di me engú gba ani-e du anga li Falao, 'ngbé ngámá na doto na Edjipeto-o naali. Abhomu-o, Falao atsia a'o ani ngámá pi 'ndji Edjipeto di ne pi 'ndji eti gba e libhomu.

<sup>11</sup> Pipita-a, adyindi atsia ali bhú Edjipeto libhomu di ne bhú doto na Kanana. Likabhu adu naali. Kaka-a, onguo ogbi ní du asia ehe nazu mazu de. <sup>12</sup> Li Jakobho adje lie me ehe nazu mazu bhú Edjipeto-o, ani atsia atima ongisi gba e, onguo ogbi ní oo bhutsibhutsi na bini. <sup>13</sup> U anu lie bhutsibhutsi na bhisi-e, Djodjefu atsia asuno lie pi ondaise e. Abhomu-o, Falao atsia ambila piga gba Djodjefu-o. <sup>14</sup> Pipita-a, Djodjefu atima okpála me u nu ha 'dyi ní Jakobho ne piga gba e hana. U adu nani ndu o hana okpála ndjikpa mananika ne ká bhuluvue. <sup>15</sup> Abhomu-o, Jakobho anu bhú dabili bini ne ongisi gba e, onguo ogbi ní, bhú Edjipeto. U atsia amu oo. <sup>16</sup> U abha kuo uo anu ne di bhú gudhu na Sikeme. Abhomu-o, u atsia azi bhú lata inde li Abalahama akala nani e ka ongisi gba Emola bhú Sikeme-o.

<sup>17</sup> Li nedhinga akolo lie masikpe ngubula me Ebhe mene engú inde ani apa nani e kalanu me ní améne e pi Abalahama, piga gba ní-e abe ndu e. Okpála atsia akolo bhelé bhú Edjipeto. <sup>18</sup> Pipita-a, ngámá koko aholo nau bhú Edjipeto. Ngámá ango-o mbila nani engú gba Djodjefu-o de. <sup>19</sup> Ani apite okpála gba ní-o, ani atsia amene onguo ogbi ní sisiti. Ani aholo uo ne kpéke me u 'o ká ongisi na ndjendje gba o-o, amba ongisi ango-o mu. <sup>20</sup> Li nedhinga bhomu-o, u azu Moidje. Ani adu babadha naali bhú djila Ebhe. U

† 7:3 7:3 Tsia bhú Dje. 12:1. \* 7:5 7:5 Ongisi gba mu: A akunda napa me ongisi gba ani na obhosibhosi. † 7:7 7:6-7 Tsia bhú Dje. 15:13-14.

akw ani epe bata bhú 'bu 'ti gba 'dyi e. <sup>21</sup> Li u a'o ká ani lie, ndili na eole gba Falao aha ani, ani atsia akw ani maka ndili gba e makpe. <sup>22</sup> U asuno ndu imbilangu hana gba okpála na Edjipeto pi Moidje. Ani atsia akolo kpekpeke bhú nagama 'ngú di ne namene 'he.

<sup>23</sup> Li Moidje akolo lie ne kalanga ndjikpa badha-a, ani atsia abhundja li bua e me ni nu tsia ondaise ni, omafalaale. <sup>24</sup> Oo, ani au me maEdjipeto bini ngamene suka omafalaale sisiti. Abhomu-o, ngú nagie siti 'ngú bhomu-o, ani atsia abhelo maEdjipeto ang-o. <sup>25</sup> Moidje adu abhundja nae me ondaise ni omafalaale ambila me Ebhe alo ni ngú nakobho o. Engú bini ngauo-o, u mbila la mo-o de. <sup>26</sup> Li ekpi aseke lie, Moidje abhaka me omafalaale bhisi nde ngagu gbele sunda o. Abhomu-o, ani akunda nayoko uo. Do ani de-e: 'Wai, yi ne ondaise. Yi ngamene liyi sisiti ka ni?' <sup>27</sup> Engú bini, kpála bhende adu amene kilí e sisiti-e andjimba Moidje, ani atsia apa me: 'A ko da inde a'o mu ngámá di ne kpála nakodho 'ngú gba ya-a? <sup>28</sup> Mo okunda nabhelo ma, maka mo obhelo lili maEdjipeto lie?†' <sup>29</sup> Li Moidje adje eli bhomu-o lie, ani ayie bhú Edjipeto, ani akpe, ani atsia anu adu bhú doto na Madiana. Oo, ani azu ongisi na obhosibhosi bhisi.

<sup>30</sup> Pita kalanga ndjikpa badha-a, andjelu bini akoto li Moidje bhú mili bili dengo eta na Sinai. Andjelu ang-o akoto li ani bhú djua me a nde ngatsi bhú tsá 'pó. <sup>31</sup> Ani angamba naali ka engú inde ani au e-o. Nedhinga ani adu adyudyo lie lie masakpe ngú natsitsia-a, ani atsia adje 'li Ngámá apa me:

<sup>32</sup> 'Ma ne Ebhe gba onguo ogbi mu, Ebhe gba Abalahama, Ebhe gba Isaka, Ebhe gba Yakobho.†' Moidje aholo naguku ka tsulu, ani le natsitsia de. <sup>33</sup> Abhomu-o, Ngámá atsia apa pi ani me: 'Pandja maloko bhú 'dhu mu, anga bili mo olu lie inde-e, a ko bili na bubu. <sup>34</sup> Ma au maka u ngato mbolo li okpála gba ma bhú Edjipeto lie au. Ma atsia adje la di maka u ngalopolo lio lie adje. Ma ago ngú nagbegbe uo bhú bali ang-o. Mbia inde-e, ma ngatima mu bhú Edjipeto, nunu.†'

<sup>35</sup> A ko Moidje inde li omafalaale ayala e, inde u apa pi e me: 'A'o mu ngámá di ne kpála nakodho 'ngú gba ya-a da?' Ebhe atima ani me ani du ngámá di ne mukobho. Andjelu apa pi ani li nedhinga inde ani akoto li ani lie bhú tsá 'pó inde adu atsi ko. <sup>36</sup> Moidje agbegbe omafalaale bhú doto na Edjipeto ngae. Ani amene ongú na ngbengbengbe di na ngangamba bhú doto ang-o, bhú 'ngbé 'ngu na Mbembe di ne bhú 'gu. Ani amene ongú ang-o bhú kalanga ndjikpa badha. <sup>37</sup> A ko matá bhadi Moidje inde apa pi omafalaale me: 'Ebhe agbé polofeta pi yi maka ma bhú ká ondaise yi.†' <sup>38</sup> Li onguo ogbi ní apokobho bhúla o lie bhú 'gu-o, Moidje adu oo. Ani adu bhú dabili bini ne onguo ogbi ní. Ani adu la di bhú dabili bini ne andjelu inde adu agama 'ngú pi ani api 'ta na Sinai-o. Ani asia eli na mukobho-o ngú nakpokpokpo pi ní ngae.

<sup>39</sup> Engú bini, onguo ogbi ní du amene líli gba ani-e de, u adu ayala ani. Abhomu-o, u adu akunda nagie lio bhú doto na Edjipeto. <sup>40</sup> U apa pi Alona me: 'Bho oebhe pi ya, amba u du adholo kala

† 7:28 7:27-28 Tsia bhú Eki. 2:14. † 7:32 7:32 Tsia bhú Eki. 3:6. † 7:34 7:33-34 Tsia bhú Eki. 3:5, 7, 8, 10. † 7:37 7:37 Tsia bhú Det. 18:15, 18.

ya. Padhá de, anga Moidje inde-e, inde apandja ya bhú doto na Edjipeto-o, ya mbíla engú inde akolo li ani-e de.†<sup>41</sup> Abhomu-o, u abho kulu ndili bagala, bhú oekpí bhomu, u atsia atsulu enu pí ani. U amene anokomia kabula ehe inde u abho e ne 'kpa o-o.<sup>42</sup> Engú bini, Ebhe adjí 'ngbu e li uo, ani atsia a'o uo me u dhөгө oikupala, maka u aye lie bhú bhuku gba opolofeta me:

«Ngayi okpála na Isalaele-e, yi atsulu nani oenu muma uu? Yi aha la di oehe koko muma uu sunda kalanga ndjikpa badha bhú 'gu-o? A mo-o ade.

<sup>43</sup> Yi abi mangbo wema gba ebhe Moloko, di ne kulu ikupala gba ebhe gba yi Lefana-o.

A bhomu-o kulu oehe na padhá padhá, inde yi abho o ngubula nadhөгө o-o.

Kaka-a, ma ambá yi tsutsu nane Babilona mane.†

<sup>44</sup> Onguo ogbi ní, bhú 'gu-o, adu nani ka uo ne 'ti ngbangbali li Ebhe adu asuno lie bhú e-o. Moidje abho nani maka bhende li Ebhe asuno nani e pí ani-o.<sup>45</sup> Abhomu-o, u atsia aha 'ti ngbangbali ango-o pí ongisi gba onguo ogbi ní, inde adu li nedhinga li Djodjue adu lie ngámá-o. U atsia adu ali ne di bhú odoto gba opiga inde li Ebhe ato nani holo bhú 'dhu o kala uo-o. U adu oo akolo bhú nedhinga gba 'ngbé ngámá Davidi.<sup>46</sup> Engú gba Davidi inde asia nani bádha bhú 'bu gba Ebhe-e, adu bhú djila Ebhe ndjindji. Ani atsia ayo nani kpadji me ni yiki eti pí Ebhe gba Yakobho.<sup>47</sup> Engú bini, Salomo, ndili gba Davidi-e, ayiki mangbo nani eti pí ani ngae.<sup>48</sup> La-a, Ebhe Apí 'Kpí dudu bhú 'ti inde

li okpála ayiki e ne 'kpa o-o de. Maka li polofeta apa lie me:

<sup>49</sup> «Ngámá apa me: ekpí ne dabili na ngámá gba ma-o.

Doto ne dabili na sa 'dhu ma. Mangua 'ti dho yi ayiki e muma? Bili ma agúo lie su?

<sup>50</sup> Ma bho ndu 'he bhomu-o hana ngama di?†»

<sup>51</sup> Pipita-a, Etieni atsia apa me: «Ngayi-e, yi ne okpála na kpekpeke 'ndji! Bua yi agbigbite lie, 'dje yi atsia anini! Ndu 'kpí hana yi ngamene kpekebhe ne Bu Bhobua maka onguo ogbi yi! <sup>52</sup> A ko polofeta bhedho inde li onguo ogbi yi to mbolo li e de-e? U abhөлө belegu obhende akpokpo 'ngú pindji nago ka Kpála na Ngbingbili-o. Mbia inde-e, kpála ango-o, yi apu ani, yi atsia abhөлө ani. <sup>53</sup> Ngayi okpála inde asia líli gba Ebhe-e ka oandjelu-o, engú bini, yi mene la líli ango-o de!»

#### *U abhөлө Etieni*

<sup>54</sup> Li okpála inde adu li bili nakodho 'ngú-o adje engú li Etieni apa e lie, u abi 'gú li bua o. U atsia aholo nazu tate o ngubula ani. <sup>55</sup> Engú bini, Etieni inde adu me ani nde abedhe ne Bu Bhobua-a, atsia 'kpí ne abhúlá, ani au zi Ebhe. Ani atsia au di Yesu me ani nde alu li pá 'kpa na kokpa gba Ebhe-o. <sup>56</sup> Ani atsia apa me: «Yi djedje nga! Ma au kokpí abhulu lie, Ndili gba kpála alu li pá 'kpa na kokpa gba Ebhe!»

<sup>57</sup> Ndu okpála hana inde adu oo adje engú bhomu-o lie, u asula ne 'ue kpekpeke, u anini 'dje o. U anu ndu o hana bhú dabili bini, u atsia atuko pí Etieni. <sup>58</sup> U agbe ani bhú gudhu-o, u atsia aholo natutulú ani ne oteme ngú nabhөлө ani. Okpála inde adu apa 'ngú li ani ne eu-o, abhu nani makombi bini. U atsia abu obongo gba o-o bhú

† 7:40 7:40 Tsia bhú Eki. 32:1. † 7:43 7:42-43 Tsia bhú Ams. 5:25-27. † 7:50 7:49-50 Tsia bhú Isa. 66:1-2.

li 'dhu ani ngú nalilila. A adu 'li makombi ango-o me Saulo.†  
 59 Nedhinga u adu atutulú Etieni lie ne teme ngú nabhelo ani-e, ani atsia ayo Ebhe me: «Ngámá Yesu, ha bua ma haha!»  
 60 Abhomu-o, ani akikita lipaku e kuto, ani asula kpekpeke me: «Ngámá, mo otsia siti 'ngú gba uo-o de!» Pita ani apa 'ngú bhomu-o lie, ani atsia andala 'kpa li bua e.

## 8

1 Abhomu-o, Saulo atsia aziba me u bhelo Etieni.

*U aholo nato mbolo li okpála na Piga gba Ebhe*

Bha li 'kpi ango-o, u aholo nato mbolo naali li okpála na Piga gba Ebhe na gudhu na Yelusalema. Ndu omabhuka hana akpe, naneke bha bini obhulu titima gba Yesu-o . U atsia at-sambala bhú ndu doto na Yudaya ne bhú ndu doto na Samalia.  
 2 Okpála koko bhende adu akpe Ebhe-e aku 'gbá Etieni naali. U aha kuo ani, u atsia anu azi. 3 La-a, Saulo aholo nato mbolo li Piga gba Ebhe-e ngú nabhobhelo. Ani adu nali bhú 'ti bini ne bini. Ani adu napanja omabhuka, olisi di ne obhosi, ani atsia adu namba uo bhú tikpu.

*Filipo akpokpo Bádha Ngali bhú Samalia*

4 Omabhuka inde atsambala adu anu ne ndu bili hana me u nde ne kpokpo Bádha Ngali . 5 Abhomu-o, Filipo anu bhú saka gudhu bini na Samalia. Oo-o, ani atsia akpokpo ngali gba Masiya-o . 6 Okpála bhelé ne bua bini abhuka 'li Filipo. Padhá de, anga u adu adje ngali ongu na ngangamba inde ani adu amene e-o. U atsia adu la di auu ne djila

o. 7 Osisiti bua bhelé aze bhú okpála. Osisiti bua ango-o adu aze me u nde ngatu 'ue kpekpeke. Okpála bhelé inde adu odakuto, di ne obhende adu ne eze li 'dhu o-o, atsia akobho. 8 Abhomu-o, djali atsia adu naali bhú gudhu ango-o.

9 Kpála bini adu nani bhú gudhu ango-o, a adu 'li ani me Simo. Nayie didili naali, ani adu amene 'ngú na mambengu mambengu. Ndu okpála hana na ndu doto na Samalia adu angamba ka ani naali. Ani atsia adu apa me ni ne 'ngbé kpála. 10 Ndu okpála hana adu aha lio ngú nadije ani, nayie li okpála na padhá, akólo li okpála na ngbengbengbe. U adu napa me: «Kpála inde-e, a ko angu gba Ebhe, angu inde u a'i e me «Angu na ngbéngbé.»  
 11 U adu nakpata ani, anga nayie didili naali, ongu na mambengu gba ani-e adu angamba uo naali.  
 12 Engú bini, li Filipo adu akpokpo Bádha Ngali Nau gba Ebhe , di ne Yesu Kilisito lie pi uo-o, olisi ne obhosi abhuka. Pipita-a, u atsia asia batisimo. 13 Simo abhuka belegu di ngae, ani atsia asia batisimo. Ani du matá nayie de Filipo de. Ani adu nangamba naali li oehe di ne ongamba 'ngú na ngbengbengbe inde li Filipo adu namene e-o.

14 Obhulu titima gba Yesu abhu gudhu na Yelusalema adje me okpála na ndu doto na Samalia asia eli gba Ebhe-o . Abhomu-o, u atima Piele di ne Djaa pi uo. 15 U akolo lie bhú ndu doto na Samalia oo, u atsia ayo Ebhe pi uo ngubula me u sia Bu Bhobua . 16 Padhá de, anga Bu Bhobua ke nga nani pi saka uo bini de. U asia nga bha nani batisimo ne 'li Ngámá Yesu. 17 Abhomu-o, Piele ne Djaa a'o 'kpa o pi 'ndji uo, u atsia asia

† 7:58 7:58 Saulo: A ko 'ili na ebele. Polo: a ko 'ili na giliki. U aholo na'i ani me Polo li nedhinga ani aholo nakpokpo Bádha Ngali lie pi ogandji okpála ko.

Bu Bhobua.

<sup>18</sup> Simo au me Bu Bhobua aké pí okpála inde lí obhulú titima a'ó 'kpa o pí 'ndji o-o. Abhomu-o, ani ago ne tia me ní ngaha makiso pí Piele ne Djaa. <sup>19</sup> Do ani de me: «Yi ha di angu ango-o muma, amba kpála bhende ma a'ó 'kpa ma pí 'ndji e, ani de sia Bu Bhobua.» <sup>20</sup> Engú bini, Piele agie pí ani me: «Siti de bhaka bhado bha mu bhú dabili bini ne tia gba mu-o! Padhá de, anga mo obhundja me mu ti da nakala ehe inde lí Ebhe ngaha e padhá-a ne tia. <sup>21</sup> Ndu 'ngú inde ngakodho 'kpí inde-e hana, a pí mu ade. Mu ti la di da nali bhúbhú de. Padhá de, anga bua mu kala Ebhe ngbingbili ade. <sup>22</sup> La-a, dji bua mu ka siti 'ngú inde mo obhundja e lí bua mu ko. Yo ka Ngámá ngubula me, i du me ani nde akunda-a, ani de 'e siti 'ngú ango-o. <sup>23</sup> Padhá de, anga ma au me mo obedhe bhú mu ne gumu 'he. Mu la di bhú 'kpú gba siti.» <sup>24</sup> Abhomu-o, Simo apa pí Piele ne Djaa me: «Ngayi makpe-e, yi yo mangbo Ngámá ngú ma ngayi, ngubula me ngua 'ngú yi apa e bhomu-o, akólo lí ma de.»

<sup>25</sup> Pipita-a, Piele ne Djaa akpokpo ongu inde lí Ngámá Yesu amene e lí djila uo-o. U asuno eli gba ani-e pí okpála. Abhomu-o, u atsia agie lio bhú Yelusalema. Lí kpadji-e, u akpokpo Bádha Ngali bhú okuti bhelé na ndu doto na Samalia.

*Kpála bini na Etiopi adji bua e*

<sup>26</sup> Pipita-a, andjelu bini gba Ngámá-a apa pí Filipo me: «Yie bhúlá, amba mu ké lí pápá na yoyoko, lí kpadji inde ayie bhú gudhu na Yelusalema, atsia aké bhú Gadjá ko. Kpadji ango-o apu bhú mili bili.» <sup>27</sup> Abhomu-o, Filipo ayie bhúlá, ani atsia aholo ne

enú lí kpadji ango-o. Lí kpadji-e, bhoko bini akoto. A adu nani eniki,\* 'ngbé pála na doto na Etiopi. Ani adu nalila ndu tia hana gba Kandase, ngámá na eole na Etiopi-o. Ani anu nani bhú Yelusalema ngú nadhege Ebhe, <sup>28</sup> ani atsia adu nagie lie agba e. Ani adu kuto bhú kpulukpulu gba e-o. Ani atsia adu natanga bhuku gba polofeta Isaya.

<sup>29</sup> Bu Bhobua apa pí Filipo me: «Nu de kpulukpulu bhomu, amba yi nu ne bhubhulu-o.» <sup>30</sup> Filipo anu bhú holo, ani atsia adje kpála na Etiopi bhomu-o ngatanga bhú bhuku gba polofeta Isaya. Abhomu-o, Filipo ayi ani me: «Engú inde mu ngatanga e bhomu-o, mu ngadje tata-a uu?» <sup>31</sup> Kpála ango-o agie me: «Ma ambila la tata-a lele pí, i du me kpála nde kpokpo kúkú muma de-e?» Abhomu-o, ani 'i Filipo me ani 'u bhú kpulukpulu-o, amba ani du de ní. <sup>32</sup> Eli inde ani adu atanga e bhú bhuku gba Isaya ngae inde:

«U adu nanu ne ani maka kandele inde u adji nabhele e, maka ndili kandele inde agbite 'bhø e lí nedhinga u ngaka su ani lie-o.

Ani 'u 'bhø e de.

<sup>33</sup> U aké ani ne kuto, u kodho 'ngú gba ni-e ngbingbili de.

A ko da inde i ti da napa 'ngú gba ongisi gba ani-e?

Padhá de, anga u a'e mukobho gba ani-e píla doto a'e.†»

<sup>34</sup> Bhoko na Etiopi ango-o ayi Filipo me: «Ma ayo ka mu me pa nga muma: polofeta ngapa 'ngú bhomu-o lí da? Ne me ani ngapapa lí e, ne me ani ngapapa lí kpála koko?» <sup>35</sup> Abhomu-o, Filipo aholo na'o'o tata pí ani lí Bádha

\* 8:27 8:27 Eniki: A ko bhoko inde i ti da nakunda øle de, anga angu na bhoko bhú ani ade. Tsia bhú Mat. 19:12. † 8:33 8:32-33 Tsia bhú Isa. 53:7-8.

Ngali gba Yesu-o nayie li Eli inde ani adu atanga e-o.

<sup>36</sup> U adu anu lie li kpadji-e, u akolo li bili bini, adu oo ne engu. Abhomu-o, 'ngbé kpála ang-o apa pi Filipino me: «Tsia nga engu ii! Nasia batisimo ka ma-a, a adha mbia inde-e li ni?» [ <sup>37</sup> Filipino atsia apa pi ani me: «f du me mu nde abhuka ne bua mu hana-a, mu ti da nasia batisimo.» Kpála ang-o agie pi ani me: «Ma abhuka me Yesu Kilisito ne Ndili gba Ebhe.»] <sup>38</sup> Abhomu-o, ani atsia apa me kpulukpulu-o lulú. Pipita-a, ndu uo bhisi hana, Filipino ne kpála ang-o, aké bhú 'ngu. Filipino atsia abatisa ani. <sup>39</sup> Li u aze lie bhú 'ngu-o me-e, Bua gba Ngámá-a atsia adhepe Filipino. Kpála na Etiopi u matá ani de. Kpála na Etiopi ang-o aholo bha ibili enú kpi e kpi me ani nde ngakpi djali. <sup>40</sup> La pi Filipino-o, u anu au bha ibili ani bhú gudhu na Adjota. Pipita-a, ani apu bhú ndu ogudhu hana me ani nde ngakpokpo Bádba Ngali akólo bha bini li nedhinga ani akolo lie bhú Sedjale ko.

## 9

*Saulo adji bua e*

(*Tsia bhú Kul. 22:6-16, 26:12-18.*)

<sup>1</sup> Li nedhinga bhomu-o, Saulo adu nagili omukpata gba Ngámá Yesu ngú nabhili uo. Ekpí koko ani anu nabhaka bhele kpála gba odimandé gba Ebhe-o. <sup>2</sup> Ani anu nayo balua me ni nu ne di ngú nali bhú oti nadje líli gba Moidje inde bhú gudhu na Damasi. Ni nu oo, amba i du me ni nde abhaka okpála inde ngakpata 'ngú gba Yesu-o, obhosi di ne olisi, ni de holo uo, amba ni nu ne uo bhú gudhu na Yelusalema.

<sup>3</sup> Nedhinga ani adu anu lie, ani akolo lie de Damasi masikpe-e, má gala kolo me-e, zi 'kpí bini

ayie abhúlá, a ago asa ngo ani ngbalina. <sup>4</sup> Ani atsokodho ati kuto má ngbi! Ani atsia adje eli bini apa pi ani me: «Saulo, Saulo, mu ngato mbolo li ma ngú ni?»

<sup>5</sup> Abhomu-o, Saulo atsia ayi me: «Ngámá, a ko mu da?» Eli atsia akoto matá pi ani me: «A ko ma Yesu, mu ngato mbolo e li ma. <sup>6</sup> La-a, yie bhúlá yiyie, amba mu nu bhú gudhu. Engú inde ayo me mu mene e-e, u apa pi mu oo ko.»

<sup>7</sup> Okpála inde adu anu ne ani bhú dabili bini-e alulu. Bhú 'bhé uo akpina má ndje ka tsulu. U adu adje eli, engú bini, u du au kpála inde adu agama 'ngú-o de. <sup>8</sup> Abhomu-o, Saulo ayie bhúlá, ani abhulu djila e, engú bini, ani u la 'kpí de. U atsia aholo 'kpa ani ngú nanu ne ani bhú Damasi. <sup>9</sup> Oo, ani amene ngbolo 'kpí bata. Ani u 'kpí de, ani zu 'he de, ani ndji la di ehe nandji mandji de.

<sup>10</sup> Mukpata bini adu bhú Damasi oo, a adu 'li ani me Anania. Ngámá a'i ani bhú ehe maka loto me: «Anania!» Anania atsia abhuka me: «Ma ii, Ngámá!»

<sup>11</sup> Abhomu-o, Ngámá atsia apa pi ani me: «Mbia inde-e, a ayo me mu nu li kpadji inde u a'i e me Ngbili kpadji bhú 'ti gba kpála bini inde u a'i e me Yuda. Yi Saulo, kpála na gudhu na Talasi. Li nedhinga inde-e, ani ngayo Ebhe. <sup>12</sup> Ani atsia au bhú 'he maka loto kpála bini, inde 'li e me Anania, ali bhú 'ti nganda ni. Kpála ang-o atsia a'o 'kpa e pí 'ndji ani ngú napa me ani u matá 'kpí.»

<sup>13</sup> Anania atsia agie me: «Ngámá, okpála bhelé apa 'ngú muma pindji bhoko bhomu. Ma mbila la di ndu siti 'ngú hana inde ani amene e li kate okpála na bububu gba mu bhú Yelusalema-o. <sup>14</sup> Ongbengbe odimandé aha la di kpadji pi ani me ani go ei ngú naholo ndu okpála hana inde

ngabhuka ma-o.» <sup>15</sup> Engú bini, Ngámá apa pí aní me: «Nn̄n̄, anga bhoko bhomu-o, ma abhu aní ngú kulu gba ma-o. Aní anú nakpokpo engú gba ma-a pí opiga inde i mbila ma de, pí ongbengbe ongámási gba uo, di ne pí omafalaale. <sup>16</sup> Ma asúno pí aní, ngama makpe, ndu likabhu hana inde a ayo me aní zu e kabula 'li ma-o.»

<sup>17</sup> Abhomu-o, Anania anu, aní ali bhú 'ti oo, aní abhaka Saulo, aní a'o 'kpa e pí aní. Aní atsia apa me: «Ndai ma Saulo, Ngámá atima ma ngae. A ko Yesu inde akoto li ma li kpadji nedhinga mo odu nago lie-o. Aní atima ma, ngubula me ma u matá 'kpí, amba ma bedhe di ne Bu Bhobua .» <sup>18</sup> Kolo má gala me-e, ehe maka kudhu 'he ayie bhú djila Saulo, abala kuto. Aní atsia aholo nau matá 'kpí. Abhomu-o, aní ayie bhúlá, aní atsia asia batisimo. <sup>19</sup> Pipita-a, aní azu 'he, aní atsia asia angu.

### *Saulo akpokpo Bádha Ngali bhú gudhu na Damasi*

Saulo amene mbo ekpí bhú dabili bini ne omakpata na Damasi. <sup>20</sup> Kolo má gala me-e, aní aholo nakpokpo pí omaYuda bhú oeti nadjé líli gba Moidje me Yesu ne Ndili gba Ebhe. <sup>21</sup> Ndu okpála hana inde adu nadjé aní-e adu angamba naali. U adu nayi me: «A inde-e bhulu nato mbolo li okpála inde ngabhuka Yesu abhu gudhu na Yelusalema di? Aní go nako e ngú naholo uo, di ne nanu ne uo pí ongbengbe odimandé gba Ebhe di?»

<sup>22</sup> Engú bini, Saulo adu akolo ne angu bhú nasuno. Aní adu asuno mbámá pí omaYuda na Damasi me Yesu ne Masiya . Kaka-a, u du nambila matá engú inde u agie e pí aní-e de.

<sup>23</sup> Pita ekpí bhelé, omaYuda adje lio me o bhelé Saulo. <sup>24</sup> Engú bini, Saulo ambila siti mabhundja gba uo-o. U atsia adu di nalila obhoti na gudhu-o sukpe ne ngbikpi ngubula nato aní, amba o bhelé aní. <sup>25</sup> Sukpe bini-e, ngaani ne omakpata gba e, u anu li malilisa na aga na gudhu-o. U ato aní bhú kili, u atsia aké aní ne di kuto akilidjo.

### *Saulo bhú gudhu na Yelusalema*

<sup>26</sup> Li Saulo akolo lie bhú Yelusalema-a, aní adu nale nagbite lie li omakpata, engú bini, ndu uo hana adu nadjé tsulu. Padhá de, anga u du nabhuka de me a ko ndju kukulu makpata-a de. <sup>27</sup> La-a, Balanabasi anu aha Saulo, aní atsia anu ne aní pí obhulu titima gba Yesu-o . Oo, Balanabasi akpokpo pí uo maka li Saulo au Ngámá Yesu lie li kpadji, di ne maka li Ngámá agama 'ngú lie pí aní-o. Aní atsia akpokpo di maka li Saulo du nasuno 'ngú lie ne tsulu de ne 'li Yesu bhú Damasi-o. <sup>28</sup> Abhomu-o, obhulu titima atsia aziba Saulo. Nayie li nedhinga bhomu-o, Saulo du matá na'o ká obhulu titima-a de. U adu adhuku bhú Yelusalema bhú dabili bini. Aní tsia du nasuno ne 'li Yesu ne tsulu de. <sup>29</sup> Aní adu di nasuno pí omaYuda inde adu nadi eli na giliki-o, aní atsia adu namene kpekebhe ne uo. Engú bini, ngauo-o, u adu agili nabhelé aní. <sup>30</sup> Li ondaise Saulo, omabhuka adje lie, u anu na'o Saulo bhú Sedjale. Oo, u atsia atima aní bhú Talasi.

<sup>31</sup> Abhomu-o, omabhuka bhú ndu doto na Yudaya, bhú ndu doto na Galilaya, di ne bhú ndu doto na Samalia libhomu adu bhú guo 'ngú . U adu akolo kpekpeke bhú nabhuka. U adu amanga Ngámá mamanga. U atsia adu nabe ndu o, ka angu gba Bu Bhobua.

### *Piele akobho Ene*



<sup>32</sup> Piele adu naru ne ndu bili hana. Abhomu-o, ekpi bini, ani anu natsia omabhuka inde adu bhú gudhu na Lida-o. <sup>33</sup> Oo-o, ani abhaka bhoko bini, a adu 'li ani me Ene. Sunda kalanga madjina, ani adu me ani nde asi kuto pi kalagba gba e-o. Padhá de, anga adu nani dukuto. <sup>34</sup> Li Piele au ani lie, ani atsia apa pi ani me: «Ene, Yesu Kilisito akobho mu mbia inde akobho! Yie bhúlá, amba mu leke dabili gba mu-o, ngamu makpe.» Kolo má gala me-e, Ene ayie bhúlá. <sup>35</sup> Ndu okpála hana na Lida, di ne egu na Salona au lie mo-o, u adji bua o, u atsia abhuka Ngámá

### *Piele azuku Tabita*

<sup>36</sup> Li nedhinga bhomu-o, mukpata bini na øøø adu nani bhú gudhu na Djope, a adu 'li ani me Tabita (bhú eli gba oGiliki-e me «Dolokasi», a akunda napa me «gbelende»). Ani adu amene obabadha 'ngú, ani atsia adu ateteke di obhulu ndibhili ndu 'kpi hana. <sup>37</sup> Ekpi bini, ani asi kuo, ani atsia akpi. U avulu kute kuo ani, u atsia a'o bhú tina 'ti bini abhúlá.

<sup>38</sup> Gudhu na Lida masakpe de gudhu na Djope. Kaka-a, li omukpata adje lie me Piele bhú Lida-a, u atsia atima okpála bhisi ngú napa pi ani me: «Kikiliako, ya ayo ka mu me go nga gba ya ei má gala!» <sup>39</sup> Piele ayie bhúlá kolo má gala, ani atsia anu bhú dabili bini ne okpála inde u atima o-o. Ani akolo lie oo-o, u anu na'o ani bhú tina 'ti inde abhúlá-o. Ndu oekesi hana na gudhu angoo ago de Piele me u nde ngaku 'gbá. U adu asuno obongo na mbulu, di ne okoti inde li Tabita adu amene e nedhinga ani adu lie bhú mukobho-o pi ani.

<sup>40</sup> Piele apandja ndu okpála hana kilidjo, ani akikita lipuku e

kuto, ani atsia ayo Ebhe. Pipita-a, ani adji bhúla e ne api kuo-o, ani atsia apa me: «Tabita, yie bhúlá!» Abhomu-o, Tabita a'u djila e. Li ani au Piele lie, ani atsia adu madu. <sup>41</sup> Piele aholo 'kpa ani, ani atsia a'e ani bhúlá. Pipita-a, Piele a'i omabhuka koko di ne oekesi na olisilisi, ani atsia asuno ani pi uo me ani nde uu. <sup>42</sup> Ndu okpála hana na Djope adje engú inde akodho 'kpi-o. Abhomu-o, okpála bhelé atsia abhuka Ngámá. <sup>43</sup> Piele amene bhú Djope ekpi bhelé. Ani adu nadu gba kpála bini inde li 'li e adu me Simo. Kpála angoo adu namene kulu na kó 'nu.

## 10

### *Koloneli a'i Piele agba e*

<sup>1</sup> Kpála bini adu nani bhú gudhu na Sedjale, a adu 'li ani me Koloneli. Ani adu ngámá pi 'ndji osudha kámá bini. Libi osudha angoo inde u a'i e bhú dabili bini ne osudha koko-o me «Libi osudha na Itali.» <sup>2</sup> Kpála angoo adu amanga Ebhe di ne nakpe Ebhe bhú dabili bini ne piga gba e libhomu. Ani adu ateteke obhulu ndibhili inde adu bhú ká omaYuda-a naali. Ani atsia adu ayo Ebhe piko.

<sup>3</sup> Ekpi bini, masakpe de saa na bata pita tulukpe-e, ani au mbámá bhú 'he maka loto me andjelu bini gba Ebhe-e nde ngali agba ani. Andjelu angoo a'i ani me: «Koloneli!» <sup>4</sup> Ani atsia andjelu angoo ne tsulu hana. Ani atsia apa pi ani me: «A ko mangua 'ngú dho, Ngámá?» Andjelu-o agie pi ani me: «Ebhe adje nayo gba mu-o adje. Ani aziba di oehe inde mu ngaha e pi obhulu ndibhili-o. Kaka-a, 'to ani 'ili li mu de. <sup>5</sup> Mbía inde-e, tima okpála bhú Djope ngubala na'i kpála bini inde u agisila 'li e me Simo Piele-o. <sup>6</sup> Ani ngasi agba kpála bini

inde 'li e me Simo, kpála namene kulu na kó 'nũ. Kuti gba ani-e a de 'ngbé 'ngu.»<sup>7</sup> Pipita-a, andjelu inde agama 'ngú pí ani-e atapa. Abhomu-o, Koloneli atsia a'i okpála na kulu gba e bhisi, di ne sũdha bini. Sũdha ango-o adũ kpála nakpe Ebhe. Ani atsia asi di nani bhũ kulu gba ani-e naali.<sup>8</sup> Koloneli akpokpo ndũ 'ngú inde akodho 'kpí-e hana pí uo. Pipita-a, ani atsia atima uo bhũ Djope. Abhomu-o, u atsia agbida.

### *Piele anũ agba Koloneli*

<sup>9</sup> Li ekpí aseke lie, okpála u atima o-o adũ nga bha lie li kpadji-e, u akolo de gũdhũ na Djope. A abhaka me Piele nde a'ũ apí 'ngbũ 'ti ngú nayo Ebhe masakpe de tulukpe.<sup>10</sup> La-a, gumũ aholo amene ani, ani adũ akũnda nazũ 'he. Nedhinga u adũ alũ 'zũ-o lie pí ani-e, ani atsia au engú maka loto.<sup>11</sup> Ani au kokpí abhulu lie. Ani au ehe bini maka 'ngbé 'kpá bongo. U ahoholo li odjedje badha. A ayie abhũlálá, atsia adũ akø kuto.

<sup>12</sup> Bhũ 'ngbé 'kpá bongo ango-o, ndũ djua onũ hana na 'dhũ badha, ne ndũ djua onũ inde ngagbele lio ne 'bu o kuto, di ne ndũ djua odhu hana adũ bhũbhũ.<sup>13</sup> Abhomu-o, ani adje eli bini inde apa pí ani me: «Piele, yie bhũlálá! Bhøbhøle, amba mũ zũ!»<sup>14</sup> Engú bini, Piele agie me: «A mo-o ade, Ngámá! Padhá de, anga ma zũ nga ezũ inde li líli gba Moidje ayala e, di ne bhende na sisiti kala Ebhe belegũ de bini.\*»<sup>15</sup> Ani adje matá eli ango-o bhũtsibhũtsi na bhisi-e me: «Ehe inde li Ebhe adji e akolo bubu-o, mo opá de me a sisiti-e de.»<sup>16</sup> Engú ango-o amene lie bhũtsibhũtsi bata. Pipita-a, má

gala kolo me-e, bongo ango-o atsia agie lie abhũlálá.

<sup>17</sup> Abhomu-o, mabhundja gba Piele atsia angingi ka engú inde ani au e-o. Ani adũ ayi bua e me: «Tata-a pí?» Bha li nedhinga li Piele adũ ayi bua e lie bhomu-o, okpála inde li Koloneli atima o akolo li bhoti gba Simo-o. A adũ me u nde ayi okpála me eti gba Simo-o su.<sup>18</sup> U a'i kpála bini, u atsia ayi ani me: «A inde-e bìli li Simo u agisila 'li e me Piele asisi lie?»<sup>19</sup> Li nedhinga bhomu-o, Piele adũ nga bha nabhundja pindji engú inde ani au e-o. Abhomu-o, Bu Bhobua atsia apa pí ani me: «Tsitsia nga, okpála bata† ngagili mũ.<sup>20</sup> Yie bhũlálá, kø akuto, amba yi nũ bhũ dabilì bini ne uo. Mo odjidji limũ de. Padhá de, anga ma atima uo ngama.»

<sup>21</sup> Abhomu-o, Piele akø, ani abhaka okpála ango-o. Do ani pí uo me: «Kpála inde yi ngagili e-e, a ko ma. Yi ago la ngú ni?»<sup>22</sup> U agie pí ani me: «Ngámá gba osũdha, inde 'li e me Koloneli-e atima ya ngae. A ko kpála na ngbingbili, inde di ngadhøge Ebhe. Ndũ omaYuda hana ngapa 'ngú gba ani-e ndjindji. Andjelu bini gba Ebhe-e akoto li ani, ani atsia apa pí ani me: «Tima okpála ngú na'i Piele, amba mũ dje engú inde ani akpókpo e pí mũ ko.»<sup>23</sup> Abhomu-o, Piele ato okpála ango-o abhũ 'ti. Ani atsia asuno dabilì u asi lie pí uo. U atsia asi tété.

Li ekpí aseke lie, Piele anũ bhũ dabilì bini ne uo. Abhomu-o, omabhuka koko na Djope atsia anũ na'o Piele.<sup>24</sup> Pita 'kpí bini-e, u atsia akolo bhũ Sedjale. A abhaka me Koloneli nde apo bhũla omaha e di ne obi e na mukũnda. Ani atsia adũ adjeke uo oo.<sup>25</sup> Li Piele

\* **10:14** 10:14 Líli gba omaYuda adũ nani nayala nazũ onũ koko maka pame mayala. † **10:19** 10:19 U aye bhũ obhuku koko me «kpála bini.» U aye bhũ okoko me «okpála bhisi.» U atsia aye bhũ okoko me «okpála.»

akolo lie, Koloneli ago nakø lio ne ani. Ani ati bhú li 'dhu ani, Ani atsia atu bhúla e ne kuto ngú namanga ani. <sup>26</sup> Engú bini, Piele a'e ani bhúlá. Ani atsia apa pi ani me: «Lú malú! Padhá de, anga ngama-a, ma bhadi ne kpála na padhá!» <sup>27</sup> Ani adu agama 'ngú lie ne Koloneli-e, ani atsia ali abhú 'ti. Oo-o, ani abhaka me bhiti okpála nde apo bhúla o. <sup>28</sup> Ani apa pi uo me: «Yi ambila ndjindji me líli ziba de me maYuda bini du bhú dabili bini ne gandji kpála-a de. A ziba la di de me ani nu agba ani-e de. Engú bini, ngama-a, Ebhe asuno muma me ma a'í kpála bini de me a ko kpála na sisiti kala Ebhe-e de. <sup>29</sup> Kaka-a, mo o'i ma lie, ma yala de. Mbia inde-e, ma akunda nambila ta 'ngú inde mo o'i ma ngú e-o.»

<sup>30</sup> Abhomu-o, Koloneli agie pi ani me: «A ane nga ekpi bata, masikpe de li ngua nedhinga inde, bhú saa na bata pita tulukpe, ma adu nayo Ebhe bhú 'ti gba ma-o. Kolo me-e, kpála bini alu kala ma. Ani adyi bongo inde adu li e ne zizi. <sup>31</sup> Ani atsia apa muma me: «Koloneli, Ebhe adje nayo gba mu-o adje. Ani atsia abhundja di maka mu ngateteke obhulu ndibhili lie ko. <sup>32</sup> Mbia inde-e, tima okpála bhú Djope ngú na'i Simo inde u agisila 'li e me Piele. Ani ngadu gba Simo, inde adudu dengo 'ngbé 'ngu, kpála namene kulu na kó 'nu.» <sup>33</sup> Abhomu-o, ma atima bha kolo okpála ngú na'i mu má gala! Heni naali! A ndjindji maka mo ogo lie-o. Mbia inde-e, ndu ní hana ní kala Ebhe si ngú nadje ndu 'ngú hana inde li Ngámá akpokpo e pi mu me mu pa e pi ya-o.»

*Piele akpokpo Bádha Ngali pi ogandji okpála*

<sup>34</sup> Abhomu-o, Piele aholo nakpokpo me: «Mbia inde-e, ma

ambila ndjindji me Ebhe gbogbo bhusu okpála de. <sup>35</sup> Engú bini, bhú ká ndu opiga hana, kpála inde ngamanga Ebhe, inde di ngamene engú na ngbingbili-e, kpála ango-o bhú djila Ebhe ndjindji. <sup>36</sup> Yi mbila ndjindji me Ebhe atima eli gba e pi omafalaale. A ko Bádha Ngali na guo 'ngú inde ní asia e ka Yesu Kilisito-o. Ngaani-e, a ko Ngámá gba ndu okpála hana. <sup>37</sup> Yi mbila ndu 'ngú hana inde akodho 'kpí nayie bhú ndu doto na Galilaya, akolo bhú ndu doto na Yudaya libhomu, pita li Djaa akpokpo eli gba Ebhe, di ne nabatisa okpála lie ko.

<sup>38</sup> Yi mbila hana me Ebhe abhu nani Yesu, kpála na Nadjaleta-a kalanu. Ani atsia aha Bu Bhobua di ne angu pi ani ngú namene kulu gba e-o. Ani apu ne ndu bili hana me ani nde ngamene bádha 'ngú. Ani atsia adu di nakobho ndu okpála hana inde li Djabulu agbigbite o-o. Padhá de, anga Ebhe adu bhú dabili bini ne ani. <sup>39</sup> Ngaya makpe, obhulu titima gba Yesu-o, ya au ndu 'ngú hana inde ani amene e bhú kati gba omaYuda di ne bhú Yelusalema ne djila ya. U abhelo ani me u nde agi ani li kulusi. <sup>40</sup> Engú bini, Ebhe azuku ani bhú 'kpí na bata. Ani aha angu pi ani ngú napana lie pi okpála me ni uu.

<sup>41</sup> Ani pana lie pi ndu okpála hana de. Engú bini, ani apana bha lie pi ya okpála inde li Ebhe abhu o kalanu, inde au 'ngú ango-o ne djila o-o. Pita ani azuku lie, ya azu 'he, ya atsia andji di ehe bhe nandji mandji ne uo bhú dabili bini. <sup>42</sup> Abhomu-o, ani atsia atima ya me ya nu ne kpokpo Bádha Ngali pi okpála. Ani atima ya me ya apa pi okpála me, a ko kpála inde li Ebhe a'o e ngú nakodho 'ngú gba okpála inde uu di ne

okpála bhende amu-o. <sup>43</sup> Ndu opolofeta hana akpokpo 'ngú gba ani-o. U akpokpo me kpála na kpála inde abhuka Yesu-o, Ebhe a'é siti 'ngú gba ani-e ka Yesu.»

### *Ogandji okpála asia Bu Bhobua*

<sup>44</sup> Bha li nedhinga li Piele adu akpokpo 'ngú bhomu-o lie, Bu Bhobua atsia akø pí ndu okpála hana inde adu adje ani-o. <sup>45</sup> OmaYuda koko inde abhuka Yesu-o, ago bhú dabili bini ne Piele. U angamba naali, anga u au me Ebhe atuko di Bu Bhobua pí ogandji okpála. <sup>46</sup> Padhá de, anga u adu adje uo ngagama 'ngú bhú odikongu koko. U adu adhøø Ebhe maka ani nde lie ngbéngbé-o. Abhomu-o, Piele atsia apa me: <sup>47</sup> «Mbia inde-e, li okpála inde asia di Bu Bhobua lie maka ní-e, kpála bini ti da nayoko me u abátisa uo ne engu di?» <sup>48</sup> Ani aha líli me u batisa uo ne 'li Yesu Kilisito. Abhomu-o, u atsia ayo ka ani me ani du nga mbo ne o ngabula mbo 'kpí bedi.

## 11

### *Piele akpokpo maka li ogandji okpála asia Bu Bhobua lie ko*

<sup>1</sup> Obhulú titima gba Yesu , di ne omabhuka inde bhú ndu doto na Yudaya-a, adje me ogandji okpála asia di eli gba Ebhe , u atsia abhuka Yesu Kilisito . <sup>2</sup> Li Piele agie lie lie bhú gudhu na Yelusalema-a, omaYuda inde abhuka\* aholo namene kpekebhø ne ani. <sup>3</sup> U adu apa me: «Lele pí ngamu kpála inde alí gandja mo oli lie bhú 'ti gba okpála inde i li gandja de-e, mo otsia azu belegu di 'he ne uo bhú dabili bini-e?†»

<sup>4</sup> Abhomu-o, Piele atsia aholo akpokpo kúku pí uo nayie li

lilita. Ani pí uo me: <sup>5</sup> «Ngama-a, ma adu bhú gudhu na Djope. Nedhinga ma adu ayo Ebhe lie, ma au engú maka loto. Ehe bini ayie abhúlá maka 'ngbé 'kpá bongo . U ahoholo li odjedje badha. A ayie abhúlá, atsia akø kuto li bili ma adu lie-o. <sup>6</sup> Ma atsia 'kpí bhúbhú ne kpéke djila. Ma au onu na kuti, ma au onu na bili, ma au onu bhende ngagbele lio ne 'bu o kuto di ne odhu. <sup>7</sup> Ma atsia adje di eli bini inde apa muma me: «Piele, yie bhúlá! Bhøbhøø amba mu zu!» <sup>8</sup> Abhomu-o, ma atsia apa me: «A mo-o ade, Ngámá! Padhá de, anga ezu inde li líli gba Moidje ziba e de-e, di ne bhende na sisiti kala Ebhe li nga bhú 'bhø ma belegu de bini.» <sup>9</sup> Bhutsibhutsi na bhisi, ma adje matá eli ayie abhúlá, a apa muma me: «Ehe inde li Ebhe apa li e me a bubu-o, mo opá de me a sisiti-e de.» <sup>10</sup> Engú angu-o, amene lie bhutsibhutsi bata. Pipita-a, bongo angu-o ne ndu 'he inde bhúbhú-o hana atsia agie lie abhúlá.

<sup>11</sup> Bha li nedhinga bhomu-o, obhosi bata akolo li bili inde ya adu li e-o. Kpála bini na gudhu na Sedjale atima uo me u go bhaka ma. <sup>12</sup> Abhomu-o, Bu Bhobua apa muma me: «Nu bhú dabili bini ne uo, mo opá de me a ko ogandji okpála-a de.» Ondaise ma madhia inde-e atsia anu bhú dabili bini ne ma. Ndu ya hana, ya alí bhú 'ti gba kpála inde a'i ya-o. <sup>13</sup> Abhomu-o, ani akpokpo pí ya maka li andjelu akoto li ani lie abhú 'ti gba ani-o. Andjelu angu-o atsia apa pí ani me: «Tima okpála bhú gudhu na Djope ngú na'i Simo inde u agisila 'li e me Piele-o. <sup>14</sup> Ani akpokpo pí mu, ngamu di ne okpála inde bhú 'ti gba mu-o,

\* **11:2** 11:2 Okpála koko na imbilangu adu nabhundja me té omaYuda bedi adu apa me a ayo me ogandji okpála li bhú gandja ngú nakolo omakilisito. † **11:3** 11:3 Líli gba omaYuda ziba nani de me u du bhú dabili bini ne ogandji okpála de.

eli gba Ebhe inde akóbho m̄-o.»

<sup>15</sup> Li nedhinga li ngama Piele, ma aholo ngama 'ngú lie, Bu Bhobua atsia aké pí uo maka aní aké nani di lie pí ní li 'kpí na Patekote ko. <sup>16</sup> Abhom̄-o, ma atsia abhundja eli gba Ngámá inde apa me: «Djaa abatisa nani okpála ne engu, engú bini ngayi-e, yi asia batisimo na Bu Bhobua.» <sup>17</sup> Ma au mbámá me Ebhe aha Bu Bhobua pí ogandji okpála bhom̄-o, maka aní aha di nani koli Bu Bhobua bini bhom̄-o pí ní, li nedhinga inde ní abhuka Ngámá Yesu Kilisito lie-o. La-a, ngama-a, ma ne da me ma yoko Ebhe li engú inde aní akúnda namene e?» <sup>18</sup> Li omaYuda inde abhuka bhom̄-o adje lie, u adhögö Ebhe, u atsia apa me: «A na paká me Ebhe aha di nadji bua o pí ogandji okpála, amba u sia di mukobho na duduma.»

*Lita Dadjua gba Ebhe na gudhu na Atiokia bhú ndu doto na Silia*

<sup>19</sup> Pita u abhölö Etieni lie, u aholo namene omabhuka sisiti. Abhom̄-o, omabhuka bhelé atsia atsambala.† Okoko bhú ká uo agbida bhú ndu doto na Fenisia, di ne bhú kpömö na Sipele, di ne bhú gudhu na Atiokia. U atsia adu nakpokpo Bádha Ngali gba Yesu-o bha bini pí omaYuda. <sup>20</sup> Okoko bhú ká uo adu okpála na kpömö na Sipele, di ne gudhu na Silene. U anu bhú gudhu na Atiokia. Abhom̄-o ngauo, u atsia aholo nakpokpo Bádha Ngali gba Ngámá Yesu di pí ogandji okpála. <sup>21</sup> Angu gba Ngámá-a adu bhú dabilí bini ne uo. Kaka-a, ogandji okpála bhelé abhuka, u atsia adji lio pí Ngámá.

<sup>22</sup> Omabhuka na Yelusalema adje engú ang-o. Abhom̄-o, u atsia atima Balanabasi bhú Atiokia. <sup>23-24</sup> Balanabasi nani ne bádha

kpála. Aní abedhe nani ne Bu Bhobua di ne nabhuka bedhe. Aní akolo oo, aní atsia au me Ebhe atuko bisagu pí omabhuka. Abhom̄-o, aní akpi djali, aní atsia ato masi bhú ndu uo hana me u ha lio pí Ngámá ne bua o bini. Abhom̄-o, okpála bhelé atsia abhuka Ngámá.

<sup>25</sup> Pipita-a, Balanabasi anu nagili Saulo bhú gudhu na Talasi. <sup>26</sup> Li aní au aní lie, u atsia agie lio ne aní bhú gudhu na Atiokia. Ndu uo bhisi hana amene kalanga bini libhomu bhú ká omabhuka ang-o. U atsia adu asuno pí okpála bhelé. U agisila nani 'ilí na omakilisito li omabhuka bhútsibhútsi na bini bhú gudhu na Atiokia.

<sup>27</sup> Li nedhinga bhom̄-o, opolofeta koko ayie bhú gudhu na Yelusalema, u atsia ago bhú gudhu na Atiokia. <sup>28</sup> Abhom̄-o, saka uo bini, a adu 'li aní me Agabusi ayie bhúlá. Aní akpokpo bhú angu gba Bu Bhobua me: «Adyindi na ngbéngbé alí píla doto libhomu.» (Atsia amene lie bhú nedhinga li Kolode adu lie 'ngbé ngámá-o.) <sup>29</sup> Omabhuka atsia apa me kpála ne kpála ha tia bhende li angu aní akólo lie, ngubula natitima me ateteke omabhuka inde bhú ndu doto na Yudaya ko. <sup>30</sup> Abhom̄-o, u amene bhadi mo-o. U atsia atima tia ang-o pí obhelesi okpála bhú Yelusalema sa 'kpa Balanabasi ne uo ne Saulo.

## 12

*Elode abhölö Djaki, aní atsia abhike Piele bhú tikpu*

<sup>1</sup> Bhú nedhinga bhom̄-o, 'ngbé ngámá Elode Agilipa aholo amene okpála koko na Piga gba Ebhe-e sisiti. <sup>2</sup> Aní aha líli me u bhölö Djaki, ndai Djaa , ne mbotia. U

† **11:19** 11:19 Pita nabhölö Etieni-e, u adu ato mbolo li omabhuka ane kalanga ndjikpa mane. Kaka-a, omabhuka bhelé atsia atsambala.

atsia abhøle ani. <sup>3</sup> Li ani au lie me engú ang-o anga li omaYuda naali-e, ani atsia aha matá líli me u holo Piele. (A adu masíkpe de nedhinga na anokomia na Pasika , di ne anokomia nazu mapa inde li levile nde bhú e ade ko.) <sup>4</sup> Li ani aholo Piele lie, ani abhike ani bhú tikpu. Abhomu-o, ani atsia a'o osudha badha badha bhú libi badha ngu nalila ani. Ani adu akunda nakodho 'ngú gba ani-e bhú ká djila ndu okpála hana pita anokomia na Pasika-o. <sup>5</sup> Li Piele adu lie bhú tikpu-o, okpála na Piga gba Ebhe-e adu ayo Ebhe ne bua o hana ngubula ani.

*Piele akoto bhú tikpu maka ndjombe*

<sup>6</sup> Sukpe kala me Elode kodho 'ngú gba Piele, Piele adu ala sunda osudha bhisi. A adu me u nde agbigbite ani ne ogbindjili bhisi. Omulila atsia adu alila obhoti na tikpu-o. <sup>7</sup> Má gala kolo me-e, andjelu bini gba Ngámá-a akoto. Zi djua aha bili bhú tina 'ti ang-o hana. Andjelu-o adula Piele li kala e, ani azuku ani. Ani atsia apa pi ani me: «Yie bhúlá má gala!» Abhomu-o, ogbindjili-e abhulu bhú 'kpa ani, atsia abala kuto.

<sup>8</sup> Pipita-a, andjelu-o apa pi ani me: «Gbite 'kpú ludu mu, mu toto la di maløke gba mu-o bhú 'dhu mu.» Piele amene bhadi moko. Andjelu-o atsia apa matá pi ani me: «To koti gba mu-o, amba mu kpata ma.» <sup>9</sup> Piele aholo nakpata andjelu-o, ani atsia akoto bhú tina 'ti inde ani adu bhú e ko. Ani du ambila de me engú inde li andjelu ngamene e-e, a ko kukulu 'ngú-o de. Ani adu abhundja nae me a ko ehe maka loto. <sup>10</sup> U ane libi osudha na bini inde adu nalila tikpu-o. Pipita-a, u ane libi osudha bhende na bhisi-o. U akolo li 'ngbé bhoti na kalase inde nakoto

bhú gudhu-o. Bhoti ang-o a'u bha lie kala uo ne titi e, u atsia aze. U aholo 'nú, u akolo li kpadji bini. Má gala kolo me-e, andjelu-o angita li ani má pele!

<sup>11</sup> Abhomu-o, Piele ambila me engú inde amene lie-e, a ko kukulu 'ngú. Ani atsia apa me: «Mbia inde-e, ma ambila na paká me Ngámá atima andjelu gba e, ani atsia akobho ma sa 'kpa Elode di ne ndu osisiti 'ngú hana inde li omaYuda adu akunda namene e ngu ma ko.»

<sup>12</sup> Li imbilangu gba Piele abhulu lie lie, ani atsia anu bhú 'ti gba Malia , 'hi Djaa , kpála u agisila 'li e me Maloko-o. Oo, okpála bhelé apøkøbhe nani bhúla o, u atsia adu ayo Ebhe. <sup>13</sup> Piele abhi bhoti na ngbéngbé-o. Abhomu-o, suka kpála bini na kulu na øøle adu oo, a adu 'li ani me Lode. Ani atsia ago ngu na'u bhoti-o. <sup>14</sup> Li ani ambila 'li Piele lie, ani tsia 'u bhoti-e de ka djali. Engú bini, ani agie lie ne holo abhú 'ti, ani atsia apa pi okpála inde adu bhú 'ti oo me: «Piele ala li bhoti akilidjo!»

<sup>15</sup> Okpála ang-o atsia agie pi ani me: «Mu ne bhulu pele!» Engú bini, ani azi bha kekele tété me a ko kukulu 'ngú. Abhomu-o, u atsia apa pi ani me: «A ko andjelu gba ani ko.» <sup>16</sup> La-a, Piele adu bha nabhi bhoti-o. U a'u lie, u au ani, u atsia angamba naali. <sup>17</sup> Abhomu-o, Piele amene 'kpa e pi uo me u ndjili nga má bulu! Ani atsia akpokpo pi uo maka li Ngámá agbe ani lie bhú tikpu-o. Ani atsia apa matá me: «Yi kpokpo pi Djaki\* di ne pi ondaise ní koko-o.» Pipita-a, ani akoto, ani atsia atapa li bili koko.

<sup>18</sup> Li ekpí aseke lie, osudha inde adu alila tikpu-o, aholo nazi tolo naali sunda o. Abhomu-o, u atsia

\* 12:17 12:17 Djaki: A ko Djaki bhende ndai Yesu, nani akolo bhele kpála na Piga gba Ebhe na Yelusalema ko. Tsia bhú Kul. 15:13.

adu ayi lio me: «A akolo li Piele ne mangua 'ngú dho?»<sup>19</sup> Elode atima okpála me u gili ani. Engú bini, u u ani de. Aní ayiyi osúda inde adu alila aní-o. Abhomu-o, aní atsia aha líli me u bhili uo. Pipita-a, Elode ayie bhú Yudaya, aní atsia anu bhú gudhu na Sedjale. Oo, aní adu mbo ngubula nedhinga.

*'Ngbé ngámá Elode Agilipa akpi*

<sup>20</sup> La-a, Elode adu adje siti bua naali pí okpála na gudhu na Tile di ne Sidona. Okpála ango-o adje lio. Pipita-a, u atima okpála ngú nanu nagama 'ngú ne 'ngbé ngámá Elode. Okpála ango-o adje ngaiza lio ne Balasitisi, kpála natsia 'kpí li oehe gba 'ngbé ngámá Elode-o. U adu nayo ka 'ngbé ngámá guo 'ngú, anga ndu ezu gba uo-o hana adu nayie bhú doto gba aní-o.

<sup>21</sup> Abhomu-o, Elode a'o 'kpí ngú nagama 'ngú pí uo. Li 'kpí ango-o, aní adyi bongo na ngámá, aní atsia adu pí kiti na ngámá gba e-o. Aní atsia aholo agama 'ngú pí uo bhú ká djila ndu okpála hana. <sup>22</sup> Ndu okpála hana asula me: «A ngagama 'ngú inde mboye ebhe, a ko kpála-kuti de!» <sup>23</sup> Li Elode adje lie mo-o, aní atsia aziba, aní dhøge Ebhe de. Bha li nedhinga bhomu-o, andjelu bini gba Ngámá-a asu ani. Padhá de, anga aní dhøge Ebhe de. Obangili aholo nazu ani, aní atsia akpi.

<sup>24</sup> Li nedhinga bhomu-o, eli gba Ebhe-e adu ayangba naali. <sup>25</sup> Li Balanabasi ne Saulo andjia kulu gba o-o lie bhú gudhu na Yelusalema-a, u atsia agie lio bhú Atiokia bhú dabili bini ne Djaa inde u agisila 'li e me Maloko-o.

## 13

*U alo Balanabasi ne Saulo ngú kulu*

<sup>1</sup> Opolofeta di ne omusuno inde adu nani bhú Piga gba Ebhe na Atiokia, a ko nani Balanabasi, Simeo (inde u a'i e me Negele\*), Lukiusi (kpála na Silene), Man-aene inde abhele bhú dabili bini ne ngámá Elode Atipasi, di ne Saulo. <sup>2</sup> Ekpí bini, nedhinga u adu nayo Ebhe lie di ne natse 'zu-o, Bu Bhobua atsia apa pí uo me: «Yi 'o Balanabasi ne Saulo muma kpi ngubula namene kulu inde ma a'i uo ngú e ko.» <sup>3</sup> Abhomu-o, pita natse 'zu di ne nayo Ebhe-e, u a'o 'kpa o pí 'ndji uo, u atsia aha kpadji pí uo me u nunu.

*Balanabasi ne Saulo anu bhú Sipele*

<sup>4</sup> Li Bu Bhobua atima uo lie, u atsia anu bhú gudhu na Selusia. Oo, u a'u bhú 'ngbé zabu, u atsia atapa bhú Sipele. <sup>5</sup> U akolo lie bhú Salamine-e, u aholo nakpokpo eli gba Ebhe-e bhú oeti nadge líli gba omaYuda-o. Djaa Maloko adu bhú dabili bini ne uo ngú nateteke uo. <sup>6</sup> U agulu kpomø-o hana, u atsia akolo bhú Pafosi. Oo, u abhaka maYuda bini, bhulu mambengu inde adu 'li e me Bale-Yesu. Aní adu apa me ni ne polofeta. <sup>7</sup> Aní adu nadu agba Selugio Polo, kpála na imbilangu, inde adu ngámá na ndu doto ango-o. Ngámá ango-o a'i Balanabasi ne Saulo, anga aní akunda nani nadge 'li Ebhe. <sup>8</sup> Engú bini, bhulu mambengu Elimasi (anga 'li bhomu-o akunda napa bhú eli gba oGiliki moko) ayala. Aní adu agili me ni yoko ngámá na ndu doto ango-o me aní abhúka de.

<sup>9</sup> Abhomu-o, Saulo, inde li 'li e adu di me Polo-o,† abedhe

\* 13:1 13:1 Negele: U aye bhú obhuku koko me «Bibili.» † 13:9 13:9 Polo: 'Hi na Saulo bhú eli gba omaYuda, bhende na Polo bhú eli gba oGiliki. U agisila nani 'ili na Polo li ani nedhinga inde ani abhu ka nakpokpo Bádha Ngali gba Yesu Kilisito lie pí oGiliki ko.

ne Bu Bhobua, ani atsia ani ne kpéke djila. <sup>10</sup> Ani atsia apa me: «Ngamɔ siti kpála na kali inde ngapite okpála, ndili gba Djabulu, kpála nayala ndu 'ngú na babadha hana, mu 'ó nasiti okpadji na ngbingbili gba ngámá-a di! <sup>11</sup> Tsitsia, mbia inde-e, Ebhe asú mɔ. Djila mu aní. La di-e, mu ú matá zindjila de ngubula mbo oekpí.» Kolo me-e, ndindi ani djila Elimasi. Biti atsia abuku ani hana, ani adu abubudha bili de e ngbalina nagili me kpála holo 'kpa ni ngú nateteke ni. <sup>12</sup> Li ngámá na ndu doto au engú akodho 'kpí-e lie me-e, ani atsia abhuka di ne nangamba naali ka nasuno inde u asuno e ne 'li Ngámá ko.

*Polo ne Balanabasi bhú Atiokia inde abhú Písidia*

<sup>13</sup> Polo di ne okpála inde adu adhuku bhú dabili bini ne ani-e, ayie bhú Pafosi ngú nanu bhú Peledje bhú ndu doto na Pamifilia. Engú bini, Djaa Maloko a'o ká uo oo, ani atsia agie lie abhú Yelusalema. <sup>14</sup> Ngauo-o, u akpata bha kpadji gba o-o. U ayie bhú Peledje, u atsia akolo bhú Atiokia inde bhú Písidia ko. Bhú 'kpí nago gba omaYuda-a, Polo ngauo ne Balanabasi ali bhú 'ti nadje líli gba Moidje, u atsia adulu kuto. <sup>15</sup> Pita natanga líli di ne obhuku gba opolofeta-a, ongámási na eti nadje líli-e atsia atima eli pi uo me: «Ondaise ya, i du me yi nde ne engú ngú nateteke okpála ne di-e, yi de pa!»

<sup>16</sup> Polo ayie bhúlá, ani amene 'kpa e pi okpála, ani atsia apa me: «Ngayi okpála na Isalaele di ne yi okpála inde ngakpe Ebhe-e, † yi dje nga ma! <sup>17</sup> Ebhe gba okpála inde omaIsalaele, abhu nani onguo

ogbi ní. Ani abe ndu uo bhú nedhinga u adu lie bhú bali bhú Edjipeto-o. Pipita-a, ne angu gba e-e, ani atsia agbe uo bhú doto na Edjipeto. <sup>18</sup> Ani akibila uo bhú mili bili ngubula kalanga masikpe de ndjikpa badha. <sup>19</sup> Pipita-a, ani abhili opiga mananika bhú doto na Kanana. Ani atsia aha doto gba uo-o pi onguo ogbi ní <sup>20</sup> ngubula kalanga masikpe de kámá badha ne ndjikpa bhuluvue.

Pipita-a, ani aha okpála nakodho mangimbo pi uo akolo bhú nedhinga gba polofeta Samuele. <sup>21</sup> Pipita-a, u ayo me o okunda 'ngbé ngámá. Abhomu-o, Ebhe atsia aha Saulo pi uo, ndili gba Kisi, bhú piga gba Bendjamé. Ani au nani pí 'ndji uo ngubula kalanga ndjikpa badha. <sup>22</sup> Pita li Ebhe ayala Saulo lie, ani atsia agbe 'ngbé ngámá Davidi pi uo. Ani atsia apa li 'ngú gba ani-e me: «Ma au Davidi, ndili gba Yese. A ko kpála na babadha bhú djila ma. Ani améne ndu 'ngú hana maka ma akunda lie.†» <sup>23</sup> Bhú piga gba Davidi-e, Ebhe agbe pi omaIsalaele Mukobho Yesu maka ani apa nani lie kalanu ko. <sup>24</sup> Kala nago ka ani-e, Djaa akpokpo Bádha Ngali pi ndu okpála na Isalaele hana. Ani adu ayo ka uo me u dji bua o, amba u sia batisimo. <sup>25</sup> Li Djaa akolo lie li 'so kulu gba e, ani adu apa me: «Yi ngabhundja me ma ne da? Ma ne kpála inde yi ngadjeke e ade! Engú bini, yi djedje, a ngago pita ma ne kpála. Ma ne tetele kpála ade ngubula me ma gbe maloké\$ bhú 'dhu ani.»

<sup>26</sup> Ondaise ma, ngayi okpála na piga gba Abalahama di ne yi okpála inde si-e, inde ngakpe

† **13:16** 13:16 Okpála inde ngakpe Ebhe: A ko ogandji okpála inde abhuka Ebhe gba omaYuda ko. † **13:22** 13:22 Tsia bhú 1 Sam. 8:5, 19, 10:21, 13:14, 16:12. § **13:25** 13:25 Nagbe maloké: Nani agba omaYuda-a, kulu nagbe maloké bhú 'dhu ogomago ne navalu 'dhu uo-o, a ko nani kulu ka obalise di ne okpála na padhá.



Ebhe-e, Ebhe atima nani ngali na makobho inde-e pi ní. <sup>27</sup> A na paká me okpála na Yelusalema di ne ongamási gba o-o mbila nani Yesu de. Bhú oekpí naguo gba omaYuda bini ne bini hana-a, u adu atanga obhuku gba opolofeta. La-a, u du ambimbila de. Engú bini u akodho 'ngú gba Yesu lie me u bhөлө ani-e, u amene bhomu-o engú inde li opolofeta apa e ko. <sup>28</sup> Belegu u u nani engú bini inde u ti da nabhөлө Yesu ka e lie de-e, u ayo ka Pilatө me u bhөлө ani. <sup>29</sup> Pita u amene ndu 'ngú hana maka li 'li Ebhe apa lie li 'ngú gba ani-e, u a'e ani li kulusi, u atsia anu ato ani bhú lata.

<sup>30</sup> Engú bini, Ebhe atsia azuku ani bhú ká okpála inde amu-o. <sup>31</sup> Yesu asuno lie pi okpála inde adu adholo ne ani bhú dabili bini nayie bhú Galilaya akólo bhú Yelusalema ngubula 'kpí bhelé. Mbia inde-e, okpála ango-o ngakpokpo 'ngú gba ani-e pi okpála na Isalaele ngao. <sup>32</sup> Ngayá makpe-e, ya ago ngú nakpokpo Bádha Ngali inde-e pi yi, Bádha Ngali inde li Ebhe apa nani kalanu me ni apá e pi onguo ogbi ní-o. <sup>33</sup> Ani amene mbia inde-e pi ní ongisi gba uo-o, li kpadji nazuku Yesu bhú ká okpála inde amu, maka u aye nani lie bhú Etsi na bhisi gba omaYuda-a me:

«Mu ne ndili gba ma na bhobhoko,  
Ma azu mu naki ngama makpe.†»

<sup>34</sup> Ebhe apa nani me ni azúku Yesu bhú ká okpála inde amu-o mazuku, ngubula me ani akpí matá-a de. A ko engú inde ani apa nani e me:

«Ma ahá obisagu na bububu inde di na kukulu-o pi mu,  
inde ma apana nani e pi Davidi ko.†»

<sup>35</sup> Kaka-a, ani apa matá li bili koko me:

«Mu 'ó de me kpála na ngbingbili gba mu-o zi bhú lata-a de.†»

<sup>36</sup> Padhá de, anga Davidi bhú nedhinga gba e, amene líli gba Ebhe-e hana. Pipita-a, ani akpi, u azi ani de onguo ogbi e, ani atsia azi. <sup>37</sup> Engú bini, kpála inde li Ebhe azuku e, ani zí naae de. <sup>38-39</sup> Ondaise ma, yi mbila ndjindji me u apa pi yi me u a'e osisiti 'ngú gba yi-e ka Yesu. Yi ti da nakobho ka namene líli gba Moidje-e de. Engú bini yi akóbo bha me yi nde abhuka Yesu. <sup>40</sup> 'E-e! Yi lila liyi uu me engú inde li opolofeta apa e akólo li yi de, engú inde me:

<sup>41</sup> «Yi tsisia nga, ngayi okpála na 'ngbé 'ndji, yi ngamba naali, amba yi ngingita má pele pele!

Padhá de, anga bhú nedhinga gba yi-e, ma améne engú bini inde

yi ti da naziba e de,

abana i du me kpála bini nde apa nani engú ango-o pi yi kalanu.†»

<sup>42</sup> Li Polo ne uo ne Balanabasi akoto lie bhú 'ti nadje líli-e, u atsia ayo ka uo me u go bhú 'kpí naguo na sidi, amba u kpokpo matá engú bini bhomu-o. <sup>43</sup> U atsambala lie bhú bula-a, bhelé na omaYuda ne ogandji okpála inde adu akpe Ebhe-e, akpata Polo ne uo ne Balanabasi. Abhomu-o, Polo ne uo ne Balanabasi, bhú nagama 'ngú gba o ne uo-o, u ato masi bhú uo me u holo lio li bádha bhú 'bu gba Ebhe-e kpekpeke.

<sup>44</sup> Ekpí naguo na sidi-e, masikpe de ndu okpála na gudhu hana apo bhúla o ngú nadje 'li Ebhe. <sup>45</sup> Li omaYuda au bhiti okpála ango-o lie, u asia siti bua , u atsia adu asobho Polo ka eli inde ani adu apa e ko. <sup>46</sup> La-a, Polo ne uo ne

† 13:33 13:33 Tsia bhú Ets. 2:7. † 13:34 13:34 Tsia bhú Isa. 55:3. † 13:35 13:35 Tsia bhú Ets. 16:10. † 13:41 13:41 Tsia bhú Abk. 1:5.

Balanabasi dɔ nani nagama 'ngú pì uo ne tsulɔ de. U adɔ apa me: «A ayo nani me ya kpo ngaiza nakpokpo eli gba Ebhe-e kalanɔ pì yì. Engú bini, maka yì ayala lie, yì au la di me yì tì da nasia mukobho na dɔdɔma de. Kaka mbia inde-e, ya anú ibili agba ogandji okpála. <sup>47</sup> Padhá de, anga líli inde ya asia e ka Ngámá-a ngae inde:

«Ma a'o mɔ eke pì opiga,  
ngɔbula me mɔ gapa ngali na mukobho

akólo bha bini ali 'dje doto!†»

<sup>48</sup> Lí ogandji okpála adje lie mo-o, u akpì djali, u atsia aholo nadhegò 'lí Ngámá. Ndu okpála hana lí Ebhe alo o ngú nasia mukobho na dɔdɔma atsia abhuka.

<sup>49</sup> Abhomɔ-o, 'lí Ngámá atsia adhuku bhú ndu doto ango-o libhomu. <sup>50</sup> Engú bini, omaYuda ato 'ngú bhú 'ndji olisi na tia inde adɔ adhegò Ebhe di ne obhelesi okpála na kuti-o. Abhomɔ-o, u aholo amene Polo ne uo ne Balanabasi sisiti, u atsia agbe uo bhú doto gba o-o. <sup>51</sup> Abhomɔ-o, okpála bhisi ango-o apulu doto na kuti gba uo inde adhedhe lí 'dhu o, ngɔbula nasuno pì uo me u amene siti 'ngú. U atsia agbida bhú Ikoniomɔ. <sup>52</sup> Engú bini, pì omakpata-a, u abedhe ne djali di ne Bu Bhobua bedhe.

## 14

*Polo ne Balanabasi bhú Ikoniomɔ*

<sup>1</sup> Bhú Ikoniomɔ-o, a amene bhadi lie moko. Polo ne uo ne Balanabasi ali bhú 'tì nadje líli gba omaYuda. OmaYuda bhelé di ne okpála inde ne omaYuda ade-e, akolo omabhuka ka engú inde u agama e ko. <sup>2</sup> Engú bini,

omaYuda bhende i bhuka nani de-e, a ato bhú ogandji okpála mabhundja na sisiti pindji ondaise ní, omabhuka. <sup>3</sup> La-a, Polo ne uo ne Balanabasi abhue mbo nani bhú Ikoniomɔ naali. U dɔ agama 'ngú ne tsulu de anga u adɔ ne nabhuka bhú Ngámá, inde adɔ asuno me eli inde u adɔ akpokpo e pindji bádha bhú 'bu gba ni-e, adɔ kukulɔ 'ngú. Padhá de, anga aní adɔ aha angu pì uo ngú namene okiaka 'ngú di ne engú na ngangamba. <sup>4</sup> Kaka-a, okpála na gudhu ango-o atsia agbo bhusu o: okoko adɔ pì omaYuda, okoko atsia adɔ pì obhulu titima gba Yesu.

<sup>5</sup> Abhomɔ-o, omaYuda di ne ogandji okpála bhú dabili bini ne ongámási gba o-o, atsia aleke lío ngú namene Polo ne Balanabasi sisiti, ngú nabhili uo ne teme. <sup>6</sup> Lí okpála bhisi bhomɔ-o ambila 'ngú ango-o lie, u atsia akpe agbida bhú ogudhu na Lisitele ne Delebe, la di ne bhú okuti na ngongo, bhú ndu doto na Likaonia. <sup>7</sup> Oo di-e, u aholo akpokpo Bádha Ngali pì okpála.

*Polo ne Balanabasi bhú Lisitele*

<sup>8</sup> Bhú Lisitele-e, kpála inde lí eze adɔ lí 'dhu e adɔ oo. Aní dhuku de nayie maka nani u azu aní lie-o. <sup>9</sup> Aní adɔ adje engú inde lí Polo adɔ apa e ko. Polo atsia aní ne kpéke djila. Aní au me kpála ango-o abhuka me ní tì da nasia mukobho. <sup>10</sup> Abhomɔ-o, Polo atsia apa pì aní ne kpéke 'lí me: «Yie bhúlá, lɔ ngbingbili!» Kpála ango-o ayie bhúlá, aní a'ulu akò má kprii! Aní atsia aholo nadhuku. <sup>11</sup> Lí okpála bhelé au engú lí Polo amene e lie, u asula bhú eli na kuti gba okpála na ndu doto na Likaonia me: «Oebhe akolo maka okpála-kuti, u atsia

† 13:47 13:47 Tsia bhú Isa. 49:6. \* 14:12 14:12 Djeusi: Bhú mabhundja gba oGiliki-e, Djeusi nani ne ngámá gba oebhe na eu. Elemesi atsia adɔ bhulu titima gba uo ko.

ago gba ní!»<sup>12</sup> U a'o 'ili li Bal-anabasi me Djeusi,\* u atsia a'o 'li Polo me Elemesi, anga ani adu agama 'ngú-o ngae.<sup>13</sup> Dimandø gba ebhe Djeusi, inde li 'ti ebhe gba e adu li 'bhø gudhu-o, ago ne obagala na obhosibhosi li 'bhø bhoti na gudhu-o. Ani aha di 'i felele, bhú dabili bini ne okpála na kuti-o, ani atsia adu akunda me ni bhøle onu ang-o ngú nahaha pi Balanabasi ne uo ne Polo.

<sup>14</sup> Li obhulu titima gba Yesu adje engú bhomu-o lie, u asidha obongo li kute o má tsue tsue!† U anu ne holo bhú ká okpála ne nasusula me: <sup>15</sup> «Ondaise ya, yi ngamene bhomu-o ni? Ya bha ne okpála maka yi. Ya ago pi yi ne Bádha Ngali me yi 'o ká oebhe inde na padhá padhá bhomu-o, inde li mbinimbini nde bhú o ade ko. La di me yi ha liyi pi Ebhe na mukobho inde abho ekpi, abho doto, abho 'ngbé 'ngu ne ndu 'he inde bhúbhú-o hana ko. <sup>16</sup> Bhú nedhinga gba okpála na kalanu-o, ani a'o me u kpata kpadji gba o makpe ko. <sup>17</sup> Engú bini, ani 'ili 'to e li napaná lie ne namene babadha 'ngú pi uo de. Padhá de, anga ani ngatima pi yi ebha di ne onguwa bhú nedhinga gba o-o. Ani ngaha ezú pi yi. Ani la di ngabedhe yi ne djali.» <sup>18</sup> Abana u adu apapa lie mo-o, da me u yoko bhiti okpála adu kpekpeke me u abhøle onu pi o de ko.

<sup>19</sup> Li nedhinga bhomu-o, omaYuda inde ayie bhú Atiokia, bhú ndu doto na Pisidia, di ne bhú Ikoniomu, apite bhiti okpála bhomu-o me, u tutulu Polo ne teme ngú nabhøle ani. U agbe ani ali ngo gudhu anga u adu abhundja me ani akpi. <sup>20</sup> Engú bini, li omabhuka ago asa lio lie dengo ani-e, ani ayie

bhúlá, ani atsia agie matá lie bhú gudhu. Li ekpi aseke lie, ngauo ne Balanabasi-e, u atsia atapa bhú Delebe.

*Polo ne Balanabasi agie lio bhú Atiokia bhú ndu doto na Silia*

<sup>21</sup> Bhú gudhu na Delebe, u akpokpo Bádha Ngali pi okpála, u atsia asia omakpata bhibhiti. Pipita-a, u agie lio bhú Lisitele, bhú Ikoniomu di ne bhú Atiokia bhú ndu doto na Pisidia. <sup>22</sup> U a'e tsulu li bua uo, u ato masi bhú uo me u lu kpekpeke bhú nabhuka. U adu apa pi uo me: «A ayo me ní dje likabhu naali ngú nali bhú kuti na Nau gba Ebhe ko.» <sup>23</sup> Bhú Dadjua gba Ebhe bini ne bini hana, u adu alo obhelesi okpála. Pita u atse ezú ngú nayo Ebhe lie, u atsia a'o uo sa 'kpa Ngámá inde u abhuka e ko.

<sup>24</sup> U agulu Pisidia lie, u atsia akolo bhú Pamifilia. <sup>25</sup> Pita u akpokpo 'li Ebhe lie pi okpála bhú Peledje-e, u atsia anu bhú Atalia. <sup>26</sup> U ayie lie oo, u ali bhú zabu, u atsia anu bhú Atiokia. A bhomu-o bili inde u a'o nani uo lie me u sia bádha bhú 'bu gba Ebhe ngubula kulu inde u amene e mbia inde-ko.

<sup>27</sup> U akolo lie oo, u apo bhúla okpála na Dadjua gba Ebhe-o. U atsia akpokpo pi uo ndu 'ngú hana inde li Ebhe amene e bhú dabili bini ne uo-o. U atsia akpokpo di pi uo maka li Ebhe abhulu kpadji pi ogandji okpála lie ngú nabhuka di ani Ebhe ko. <sup>28</sup> Polo ne Balanabasi asi nani mbo ekpi bhelé bhú dabili bini ne omakpata na Atiokia.

## 15

*Kpekpebhe pindji nakodho gandja*

<sup>1</sup> Okpála koko inde ayie bhú Yudaya-a, akolo bhú Atiokia. U adu asuno pi omabhuka me: «Yi

† 14:14 14:14 Li bili inde-e, nasidha bongo li kute akunda nasuno me nayala 'ngú.

ti da nasia mukobho de, i du me u nde kodho yi bhú gandja maka li líli gba Moidje apa lie de ko.»  
<sup>2</sup> Abhomu-o, Polo ne Balanabasi agbe bhayiki, u atsia aholo amene kpekebho ne uo naali pindji engú ango-o. U atsia adje lío me Polo ne Balanabasi, la di ne okpála koko na Atiokia, nu bhú Yelusalema, amba u kpokpo 'ngú pindji 'ngú ango-o bhú dabili bini ne obhulu titima gba Yesu di ne obhelesi okpála .

<sup>3</sup> Abhomu-o, ndu okpála hana na Dadjua gba Ebhe atsia anu a'o uo li kpadji. U apu bhú ndu doto na Fenisia di ne bhú Samalia. U adu akpokpo maka li ogandji okpála akolo omakilisito lie ko. Ngali ango-o aha djali naali pi ndu omabhuka hana. <sup>4</sup> U akolo lie abhú Yelusalema-a, ndu okpála hana na Dadjua gba Ebhe, ne obhulu titima gba Yesu di ne obhelesi okpála-a, atsia asia uo. U atsia akpokpo pi uo ndu 'ngú hana inde li Ebhe amene e bhú dabili bini ne uo-o. <sup>5</sup> Engú bini, okpála bini bini bhú ká omuFalisai , obhende akolo omabhuka-a, ayie bhúlá, u atsia apa me: «A ayo me omabhuka inde ne omaYuda de-e, u to uo bhú gandja, amba u pa pi uo me u mene líli gba Moidje ko.»

<sup>6</sup> Abhomu-o, obhulu titima gba Yesu di ne obhelesi okpála apo bhúla o ngú natsia 'kpí li engú ango-o. <sup>7</sup> Pita u amene kpekebho lie naali-e, Piele ayie bhúlá, ani atsia apa me: «Ondaise ma, yi mbila hana me Ebhe abhu nani ma bhú ká yi bhutode ngubula me ma akpokpo Bádha Ngali pi okpála inde ne omaYuda ade ko. U dje, amba u bhuka di Ngali ango-o. <sup>8</sup> La di-e, Ebhe inde ambila bua okpála-a, asuno me ni aziba uo anga ani aha Bu Bhobua pi uo maka ani aha nani di lie pi

ní ko. <sup>9</sup> Ani gbo bhusu ní ne uo de. Ani avulu bua uo anga u abhuka. <sup>10</sup> Mbia inde-e, ka ni yi ngale Ebhe lie ne na'o tili 'ngú pi omabhuka? Engú inde li onguo ogbi ní, abana nganí makpe, ní ti nani da nabi e de-e! <sup>11</sup> A mo-o ade! Engú bini, ní abhuka mangbo me ní akobho maka uo ka bádha bhú 'bu gba Ngámá Yesu.»

<sup>12</sup> Abhomu-o, ndu okpála hana andjili má bulu! U atsia adu adje engú inde li Balanabasi ne Polo adu akpokpo e ko. U adu adje okiaka 'ngú di ne ongú na ngangamba inde li Ebhe amene e bhú dabili bini ne uo bhú ká ogandji okpála ko. <sup>13</sup> U andjia nagama 'ngú lie, Djaki atsia apa me: «Ondaise ma, yi dje nga ma! <sup>14</sup> Simo akpokpo maka li Ebhe amene nani lie nayie li lilita pi okpála inde naao ne omaYuda ade-e, maka ani alo piga bini lie bhú ká uo ngú nakolo piga gba e-o.† <sup>15</sup> La di-e, engú inde li opolofeta apa e aviti bini ne di, anga u aye bhú Bhuku gba Ebhe-e me:»

<sup>16</sup> «Pita bhobhomu-o, ma agó matá, Ngámá apa moko, ngú nayiki eti gba Davidi inde atuko-o.

Ma aléke obili bhende asisiti-e, ma atsia líli ngbingbili.

<sup>17</sup> Ndu okpála koko hana agáli ma, Ngámá,

bhú dabili bini ne ndu okpála hana inde nani ma alo o-o.

<sup>18</sup> A bhomu-o eli inde li Ngámá apa nani e ko.

Ngaani inde i ngamene engú inde ani apa nani e didili-o.†»

<sup>19</sup> Djaki atsia apa matá me: «Kaka-a, ma abhundja me, a ayo nani kpadji pi ogandji okpála inde ngabhuka Ebhe-e de. <sup>20</sup> Engú bini, ní ye mangbo balua pi uo amba

ní yo ka uo me, u 'o nazu so 'nu inde u abhøle e pi oebhe na padhá padhá-a ma'o. U 'o nakunda olisi di ne obhosi ngangá ma'o. U 'o di nazu so 'nu inde akpi ne ngute bhú e hana, amba u 'o di nazu ngute ma'o.† <sup>21</sup> Padhá de, anga nani bhutode, bhú ogudhu bini ne bini hana, okpála ngasuno líli gba Moidje. U la di ngatatanga bhú oti nadje líli-e ndu 'kpí nagueo hana.»

*Balua pi omabhuka inde naao ne omaYuda ade*

<sup>22</sup> Abhomu-o, obhulu titima gba Yesu ne obhelesi okpála, bhú dabili bini ne ndu okpála na Dadjua gba Ebhe hana, atsia aziba me u gbe okpála koko bhú ká o. U tima uo bhú Atiokia bhú dabili bini ne Polo ne Balanabasi. U atsia alo Djude inde u a'i e me Balasabasi, di ne Sila, okpála bhisi inde li ndu okpála koko hana adu amanga o ko. <sup>23</sup> Balua u atima uo ne e, a ngae inde:

«Obhulu titima gba Yesu di ne obhelesi okpála na Dadjua gba Ebhe, ondaise yi-e, u apa me o yi ondaise o inde naao ne omaYuda ade inde ngadulu bhú Atiokia, bhú Silia di ne bhú Silisia mayi. <sup>24</sup> Ya adje me okpála koko inde ayie bhú ká ya ei-e, ato kpekebhe bhú ká yi ne 'li o, u atsia angbingi bua yi. Engú bini, yi mbila ndjindji me ya tima uo ngaya de. <sup>25</sup> Kaka-a, ya adje liya ne bua bini me ya alo okpála, amba ya tima uo gba yi oo. U anú bhú dabili bini ne ondaise ya na mukunda, Balanabasi ne Polo. <sup>26</sup> Okpála inde aha lio libhomu ngubula kulu gba Ngámá gba ní Yesu Kilisito ko.

<sup>27</sup> Kaka-a, ya atima pi yi Djude ne uo ne Sila, u akpókpo ndu

'ngú hana inde ya aye e si-e pi yi ndjindji. <sup>28</sup> Padhá de, anga Bu Bhobia di ne ya makpe-e, ya abhunda me, a ayo na'o tili 'ngú koko pí yi de, bha bini bhende a ayo me yi mene e ko: <sup>29</sup> yi azú so 'nu inde u abhøle e pi oebhe na eu-o de. Yi azú ngute de. Yi azú so 'nu inde akpi ne ngute bhú e hana-a de. Yi adú akunda olisi di ne obhosi ngangá de. † du me yi nde alila liyi makpe ne ndu 'ngú bhomu-o hana-a, bhobhomu-o dú ndjindji. Yi du ndjindji.»

<sup>30</sup> Abhomu-o, u aha kpadji pi uo, u atsia agbida bhú Atiokia. Oo, u apo bhúla omabhuka hana, u atsia aha balua pi uo. <sup>31</sup> U atanga balua-o. Ndu uo hana akpi djali naali ka masi inde li balua ango-o ato e bhú uo ko. <sup>32</sup> La-a, li Yuda ne Sila adu di lie ngao makpe opolofeta-a, u agama 'ngú pi omabhuka ngengele ngubula nato masi bhú uo, di ne naha angu pi uo. <sup>33</sup> Mbo pita 'kpí bedi-e, omabhuka atsia a'o uo me u gie lio ne guo 'ngú agba okpála inde atima uo ko. [ <sup>34</sup> \* ] <sup>35</sup> Abhomu-o, Polo ne Balanabasi atigala bhú Atiokia. U atsia adu asuno di ne nakpokpo Bádha Ngali gba Ngámá-a bhú dabili bini, di ne okpála koko bhelé.

*Polo ne Balanabasi agbo bhusu o*

<sup>36</sup> Pita mbo 'kpí masudha, Polo apa pi Balanabasi me: «Ní gie liní bhú ndu okuti hana inde ní akpokpo nako eli gba Ngámá-a bhú e-o, amba ní mbila maka li omabhuka nde lie oo ko.» <sup>37</sup> Balanabasi adu akunda me o nu bhú dabili bini ne Djae inde u agisila 'li e me Maloko-o. <sup>38</sup> Engú bini, Polo tsia ziba naha ani de, anga ani a'o nani ká uo bhú

† 15:20 15:20 Tsia bhú Eki. 34:15-16; di ne bhú Lev. 18:6-20, 17:10-14. \* 15:34 15:34 Lukuluku inde-e, a bhú obhuku koko na didili u aye e bhú eli na giliki ade. [Engú bini, Sila atsia au ndjindji me ni tigala ne ani oo.]

Pamifilia. Aní tsia dū di matá namene kulu ne uo bhú dabilí bini de. <sup>39</sup> U amene kpekebhe sūnda o naali. Kaka-a, u atsia agbogbo bhūsu o. Abhomu-o, Balanabasi aha Maloko, u a'u bhú zabu, u atsia agbida bhú Sipele. <sup>40</sup> Pita lí omabhuka ayo lie me Polo sia bádha bhú 'bu gba Ebhe-e , aní aha Sila, aní atsia atapa. <sup>41</sup> Aní apu bhú ndu doto na Silia di ne Silisia. Aní atsia adu nateteke omabhuka na oDadjua gba Ebhe-o.

## 16

*Timoté anu bhú dabilí bini ne Polo di ne Sila*

<sup>1</sup> Abhomu-o, Polo akolo bhú Delebe, pipita-a, bhú Lisitele. Mukpata bini adu nani oo, a adu 'li aní me Timoté. 'Hi aní adu ne maYuda inde abhuka Ebhe. Engú bini, 'dyi aní nani nae ne Giliki. <sup>2</sup> Omabhuka na Lisitele di ne Ikoniomu adu apa 'ngú gba ani-e ndjindji naali. <sup>3</sup> Polo adu akunda me ni ha aní ngú nadhuku bhú dabilí bini ne aní. Aní aha aní, aní atsia ato aní bhú gandja. Aní amene nani mo-o ka omaYuda inde adu oo, anga ndu okpála hana adu ambila ndjindji me 'dyi Timoté nani ne Giliki.\*

<sup>4</sup> Bhú ndu ogudhu inde u adu apu bhú e hana-a, u adu akpokpo pi omabhuka líli inde lí obhulu titima gba Yesu di ne obhelesi okpála na Yelusalema aha e-o. U atsia adu ayo ka uo me u mene líli ang-o ko. <sup>5</sup> ODadjua gba Ebhe-e adu akolo kpekepe bhú nabhuka . Alo gba omabhuka atsia adu abe ndu e ndu 'kpí hana.

*Polo apu bhú Adjia*

<sup>6</sup> La lí Bu Bhobua ayoko uo lie me u akpokpo 'ngú gba Ebhe bhú ndu doto na Adjia de-e, u atsia apu bhú ndu doto na Filidjia di

ne Galatia. <sup>7</sup> U akolo lie de ndu doto na Misia-a, u adu ale nanu bhú Bitinia. Engú bini, Bua gba Yesu atsia ayoko uo. <sup>8</sup> Abhomu-o, u agulu Misia, u atsia aké bhú gudhu na Tuluasi. <sup>9</sup> A akolo lie sukpe-e, Polo au engú maka loto: kpála bini na Makedonia alu kala aní. Aní atsia adu akikiliki lie pi aní me: «Kodho 'ngbé 'ngu-o, nu bhú Makedonia, amba mu teteke ya!» <sup>10</sup> Pita engú inde lí Polo au e, ya agili bha kolo má gala me ya anu bhú Makedonia. Padhá de, anga ya ambila na paká me Ebhe a'i ya ngú nakpokpo Bádha Ngali pi okpála na kuti ang-o.

*U akolo bhú gudhu na Filipoi*

<sup>11</sup> Ya a'u bhú zabu bhú Tuluasi, ya anu ngbingbili bhú Samutalasi. Lí ekpi aseke lie, ya atsia anu bhú Neapolisi. <sup>12</sup> Ya ayie lie oo, ya atsia akolo bhú gudhu na Filipoi, gina kuti na ndu doto na Makedonia inde adu sa oLoma-o . Ya amene mbo ekpi bhelé bhú gudhu ang-o. <sup>13</sup> Bhú 'kpí naguo gba omaYuda-a , ya akoto bhú gudhu ngú nanu alí ngo 'ngu. Padhá de, anga ya adu abhundja me dabilí gba omaYuda ngú nayo Ebhe oo. Ya adulu kuto, ya atsia akpokpo 'ngú pi olisi inde apokobhe bhúla o oo. <sup>14</sup> A adu 'li saka olisi ang-o me Lidia. Aní ayie nani bhú gudhu na Tiatile. Aní adu nani atsindji ombembe obongo na mase naali. Aní adu nani adhogo Ebhe. Maka aní adu adje ya lie, Ngámá atsia abhulu bua aní ngú nabhuka engú inde lí Polo adu apa e-o. <sup>15</sup> Abhomu-o, aní atsia asia batisimo bhú dabilí bini ne piga gba e-o. Pipita-a, aní atsia ayo ka ya me: «I dū me yi nde au me ma abhuka Ebhe kukulú-o, yi de go dū gba ma.» Aní atsia agbite ya ne kpeke ngú naziziba.

\* **16:3** 16:3 'Dyi Timoté nani ne maYuda ade. Kaka-a, Timoté lí nga nani bhú gandja kalanu de.

*U aholo Polo ne Sila*

<sup>16</sup> Ekpí bini, ya adu anu lie li bili nayo Ebhe-e, ndili na eele bini na kulu ago abhaka ya. Bua na madhoko adu bhú ani. Ani atsia adu asia tia pi omakulasi e naali. <sup>17</sup> Ngaya ne Polo-o, ani aholo akpata ya. Ani atsia adu asusula me: «Okpála inde-e, a ko okpála na kulu gba Ebhe Apí 'Kpí! U ngasuno pi yi kpadji na makobho.» <sup>18</sup> Ani amene engú angó-o ngubula ekpí bhelé. Li engú angó-o andala Polo lie naali-e, ani adji lie, ani atsia apa pi bua angó-o me: «Ne 'li Yesu Kilisito , ma apa pi mu me: koto bhú ani!» Abhomu-o, bua na madhoko angó-o atsia akoto bha kolo bhú ani bhú nedhinga angó-o. <sup>19</sup> Li omakulasi ani au lie me o sia matá tia ka ani de-e, u aholo Polo ne Sila, u atsia agbele uo bhú mbadhasu kala okpála nakodho 'ngú. <sup>20</sup> U atsia anu ne uo kala ongámási na Loma, do uo de-e: «Okpála inde-e, a ko omaYuda. U ngato mbedhembedhe bhú gudhu gba ya-o. <sup>21</sup> U ngasuno ongú. La-a, líli gba ní okpála na Loma ziba nasia ongú angó-o ne namemene de.»

<sup>22</sup> Abhomu-o, ndu okpála hana atsia abi di 'gú ne uo. Ongámási aha líli me u pandja bongo li kute uo, amba u bhi uo ne fimbo. <sup>23</sup> Pita u abhi uo lie ne fimbo naali-e, u atsia abhike uo bhú tikpu. U atsia aha líli pi mulila na tikpu-o me ani lila uo ndjindji. <sup>24</sup> Li mulila asia líli angó-o lie, ani ato uo bhú tina tikpu bhe na tutu-o. Ani atsia atoto 'dhu uo bhú kpekpe.

*Polo ne Sila aze bhú tikpu*

<sup>25</sup> Masikpe de tutu sukpe-e, Polo ne Sila adu ayo Ebhe di ne nadhoge ani bhú etsi. Okpála koko na tikpu-o adu adje uo. <sup>26</sup> Má gala kolo me-e, doto adyiki ne adjigidjo na ngbéngbé má djigi

djigi, masikpe de me tikpu-o tuko kuto! Ndu obhoti na tikpu-o hana akolo abhubhulu lie. Ogbindjili inde u agbigbite ndu okpála hana na tikpu-o ne e-e, atsia abhubhulu di lie.

<sup>27</sup> Li mulila agbungbua lie lie tila-a, ani au me ndu obhoti-e hana baba. Abhomu-o, ani agbe mbotia me ni ngabhelo lini ne di, anga ani adu abhundja me ndu okpála na tikpu-o hana akpekpe. <sup>28</sup> Engú bini, Polo atsia asula pi ani kpekpeke me: «Mo oméne limu sisiti de, anga ndu ya hana bha si!» <sup>29</sup> Abhomu-o, mulila-a ayo eke, ani ali kolo má gala abhú 'ti me ani nde ngaguku ka tsulu má kpi kpi kpi! Ani atsia ati bhú li 'dhu Polo ne Sila. <sup>30</sup> Pipita-a, ani apandja uo kilidjo. Ani atsia ayi uo me: «Odyi ma, a ayo me ma mene pi ngubula me ma kobho?»

<sup>31</sup> U atsia agie pi ani me: «Bhuka Ngámá Yesu, amba mu kobho, ngamu di ne piga gba mu-o hana.» <sup>32</sup> Abhomu-o, u atsia akpokpo eli gba Ngámá Ebhe-e pi ani, di ne pi ndu okpála hana inde adu bhú 'ti gba ani-o. <sup>33</sup> Bha sukpe bhomu-o, mulila na tikpu-o abha uo, ani atsia avulu oeka gba uo-o. Pipita-a, ani asia bha kolo batisimo má gala, bhú dabili bini ne okpála gba e hana. <sup>34</sup> Pipita-a, ani anu ne uo agba e. Ani atsia aha ezu pi uo. Ngaani ne piga gba e-e, u akpi djali naali, anga u abhuka Ebhe.

<sup>35</sup> Li ekpí aseke lie, ongámási gba okpála na Loma atima okpála me u nu pa pi mulila na tikpu-o me: «Pandja okpála bhomu-o bhú tikpu-o, amba mu 'o uo, u gbida.» <sup>36</sup> Abhomu-o, mulila atsia ago apa pi Polo me: «Ongámási atima eli me ma apandja yi bhú tikpu papandja. Yi zeze, amba yi nu ne guo 'ngú .» <sup>37</sup> Do Polo pi okpála angó-o me: «Ya ne okpála

na Loma! U aha líli me u bhí ya bhú ká djila okpála me u nde kpokpo 'ngú li 'ngú gba ya-a de. U abhike ya bhú tikpu. La mbia inde-e, u ngakunda napandja ya bhú pepe? Belegu de bini, u go gbegbe bha ya ngao makpe!»<sup>38</sup> Okpála angoo atsia anu apa eli angoo pi ongámási na Loma. Li ongámási na Loma adje lie me Polo ne Sila a ko okpála na Loma, u atsia adje tsulu.<sup>39</sup> Abhomu-o, ongámási ago nakikiliki lio pi uo. U atsia ayo ka uo me u yie bhú kuti angoo yiyie.<sup>40</sup> Li Polo ne Sila aze lie bhú tikpu-o, u atsia anu agba Lidia. Pita u au omabhuka lie, u ato masi bhú uo, u atsia agbida.

## 17

*Polo ne Sila bhú gudhu na Tesalonike*

<sup>1</sup> Li Polo ne Sila agulu gudhu na Afipolisi ne Apolonia lie, u atsia akolo bhú gudhu na Tesalonike. A bhomu-o bili inde li omaYuda adu ne eti nadje líli gba Moidje lie ko.<sup>2</sup> Polo amene maka ani amemene lie-o. Ani adu anu abhaka uo bhú 'ti nadje líli-e ngubula poso bata bhú 'kpí nague gba omaYuda-o . Ani atsia adu amene kpekebhe ne uo pindji Bhuku gba Ebhe-o .<sup>3</sup> Ani adu abhulu tata pi uo mbámá, di ne nasuno pi uo me bhuku apa me a ayo me Kilisito zu likabhu, amba ani zuku. Ani adu apa pi uo me: «Yesu inde ma ngakpokpo 'ngú gba e pi yi-e, a ko Kilisito ngae.»<sup>4</sup> Okpála koko bhú ká uo abhuka, u atsia akpata Polo ne Sila. OGiliki bhelé, inde adu adhoge Ebhe-e, amene bhadi moko bhú dabili bini ne bhiti olisi inde adu ne tia naali-o.

<sup>5</sup> Engú bini, omaYuda abi 'gú naali. U abha okpála koko na sisiti inde adu adjakadha li okpadji, u apekebhe bhúla uo. U agbe tolo bhú ká okpála, u atsia ato mbedhembde bhú 'ndji okpála bhú

gudhu. U anu nagili Polo ne Sila bhú 'ti gba Djasone ngubula me o gbe uo kala okpála na kuti bhomu-o.<sup>6</sup> U bhaka la uo lie de-e, u aha Djasone di ne omabhuka koko, u atsia anu ne uo kala ongámási. U aholo asusala me: «Okpála inde angbingi 'ndji okpála pála doto libhomu. Mbia inde-e, u akolo ibili si!»<sup>7</sup> Djasone asia uo agba e! Ndu uo hana ngayala namene líli gba 'ngbé ngámá Kaisala . U ngapa me ngámá koko uu! A 'li ani me Yesu.»<sup>8</sup> Li bhiti okpála di ne ongámási na kuti angoo adje eli angoo lie, bua uo atsia ake.<sup>9</sup> Pita li Djasone di ne okpála koko akakala lio lie ka uo, u atsia atse 'kpa li uo.

*Polo ne Sila bhú gudhu na Beloya*

<sup>10</sup> A akolo lie sukpe-e, omabhuka anu a'o bha kolo Polo ne Sila bhú Beloya má gala! U akolo lie oo, u atsia ali bhú 'ti nadje líli gba Moidje-o.<sup>11</sup> Okpála angoo adu ne bádha bua nane okpála na Tesalonike. U asia eli gba Ebhe-e ne gugumu naali. Ndu 'kpí hana, u adu atsia 'kpí bhú Bhuku gba Ebhe ngú nambila me ongú angoo, a ko 'ngú na paká.<sup>12</sup> Abhomu-o, okpála bhelé bhú ká uo atsia abhuka. Olisi na Giliki inde adu ne tia naali-e abhuka. Bhiti obhosi inde adu oo atsia abhuka di.<sup>13</sup> Engú bini, li omaYuda na Tesalonike adje lie me Polo ngakpokpo eli gba Ebhe-e di bhú Beloya-a, u atsia ago di oo. U ato mbedhembde bhú ká okpála bhomu-o, u atsia angbingi di 'ndji uo.<sup>14</sup> Abhomu-o, omabhuka anu bha kolo a'o Polo me ani nu ali ngo 'ngbé 'ngu. Engú bini, Sila ne Timoté atsia atigala naao abhú Beloya.<sup>15</sup> Obhende anu na'o Polo-o, u akolo ne ani bhú gudhu na Atene. Pipita-a, u adu agie lio lie, Polo atsia atima eli me Sila ne



Timoté kpata ni má gala! U atsia agbida.

*Polo akolo bhú gúdhú na Atene*

<sup>16</sup> Bhú nedhinga li Polo adu adjeke Sila ne Timoté lie bhú Atene-e, ani au me gúdhú ango-o abedhe ne oebhe na eu bedhe. Kaka-a, bua ani adu ne likabhu naali. <sup>17</sup> Abhomu-o, ani adu amene kpekebhe ne omaYuda di ne okpála koko inde adu adhögö Ebhe bhú 'ti nadjé líli gba Moidje-o. Ndu 'kpí hana, ani adu amene bhadi moko ne okpála inde ani adu aké lie ne o oo. <sup>18</sup> Okpála na imbilangu koko oEpikulo\* ne oSatua† adu di agama 'ngú ne ani. Okoko adu ayi me: «Bhulu agelö inde-e ngapa-e pi?» Li okpála koko adje Polo ngakpokpo 'ngú pindji Yesu di ne nazuku ka ani-e lie, u atsia adu apa me: «A amana mugito me ani ngasuno bhomu-o oebhe na gandji gandji.»

<sup>19</sup> Abhomu-o, u aholo ani, u anu ne ani kala okpála inde adu atsia 'kpí li 'ngú na gúdhú na Atene-o. U adu a'i uo me Aliopadje.‡ U atsia apa pi ani me: «Ya ti da nambila engú na mbia inde mu ngasuno e uu? <sup>20</sup> Ya akunda nambila tata-o. Padhá de, anga mu ngandala 'dje ya ne ndu 'ngú na gandji gandji.» <sup>21</sup> (Ndu okpála na Atene hana di ne okpála na gandji gandji inde adu nadu oo, adu abhelö nedhinga gba o-o bha li nakpokpo 'ngú di ne nadjé engú na mbia.)

<sup>22</sup> Abhomu-o, Polo ayie bhúlá tu Aliopadje-o, ani atsia apa me: «Ngayi okpála na Atene, ma au me yi kpekpeke li engú gba oebhe ane ndu 'ngú hana. <sup>23</sup> Padhá

de, anga ma adu adhuku lie bhú gúdhú gba yi-e, ma atsia okulu oebhe gba yi-o. Ma au belegu bili bini inde u ngatsulu enu lie pi Ebhe. U aye tété me: «Pi EBHE INDE YA AMBILA E DE.» A moko, ma ago asuno pi yi ebhe inde yi ngadhögö e me yi nde mbila e de ko. <sup>24</sup> Ebhe inde abho doto di ne ndu 'he inde bhúbhú-o hana-a, a ko Ngámá na abhúlá di ne Ngámá na doto. Ani dadu bhú oeti inde li okpála ayiki e ne 'kpa o-o de. <sup>25</sup> Ani ne gumu ade me okpála mene ehe pi ni-e de, anga ani ne gumu 'he bini ade. Ani ngaha mukobho, ewo di ne ndu 'he koko pi ndu okpála hana ngae. <sup>26</sup> Ani abho kpála bini inde li ndu opiga hana aze bhú e-e ngae. Ani atsia abu uo píla doto libhomu. Ani agbo bhusu kalanga ne gbokokpi. Ani atsia akokodho okozie li bili inde ayo me u sili kuti lie ko.

<sup>27</sup> Ebhe amene mo-o ngubula me okpála gili ni amba u le nau ni, i du me u nde ti da nau ni uu ko. A na paká me Ebhe de ní bini ne bini tsutsu ade. <sup>28</sup> Padhá de, anga ani ngaha mukobho ne angu ngú namene ehe di ne maka ní nde lie pi ní ngae. La di maka li okpála koko na etsi gba yi-e apa lie me: «Ní di ne ongisi gba ani.» <sup>29</sup> La-a, ka ní nde lie ne ongisi gba Ebhe-e, a ayo nabhundja de me Ebhe maka ebhe na padhá u abho e li olo, li aladja di ne teme-e de. A ayo la di nabhundja de me Ebhe maka ebhe inde akoto li kulu di ne mabhundja gba kpála-a de.

<sup>30</sup> Nani-e, okpála du ambila Ebhe de. Ani tsia matá 'kpí li nedhinga ango-o de. Engú bini mbia inde-e, ani nga'i ndu okpála

\* **17:18** 17:18 OEpikulo: A ko nani omukpata gba Giliki bini inde adu 'li e me Epikulo. Ani adu asuno me engú na ngéngbé bhú mukobho gba kpála, a ko nadu ndjindji, nadu ne likabhu de. † **17:18** 17:18 OSatua: A ko nani omukpata gba Giliki bini inde adu 'li e me Djeno. U adu nani nau engú nadu bhú djali bhú djila o padhá. U atsia adu bha bini akpata 'ngú pindji imbilangu inde bhú kpála. ‡ **17:19** 17:19 Aliopadje: A adu nga nani kalanu 'li eta inde li okpála ango-o adu apekebhe bhúla o pí e-o.

hana ne ndu bili hana me u dji bua o. <sup>31</sup> Padhá de, anga ani a'o ekpí bini inde ani akódho 'ngú gba okpála na doto libhomu lie ngbingbili ko. Ani abhú kpála bini inde akódho 'ngú ang-o. Ani asuno engú ang-o pi ndu okpála hana li nedhinga inde ani azuku kpála ang-o lie ko!»

<sup>32</sup> U adje Polo lie apa me okpála inde amu-o azúku mazuku-o, u aholo amu ani. Okoko atsia apa me: «Ya adjé nga matá mu pindji 'ngú ang-o li 'kpí koko.» <sup>33</sup> Abhomu-o, Polo atsia a'o ká uo. <sup>34</sup> Abana mo-o, okpála koko aziba ani, u atsia abhuka. Bhú ká uo adu nani Denisi, suka okpála na Aliopadje, ne ebe bini inde adu 'li e me Damalisi di ne okpála koko.

## 18

*Polo akpo lita Dadjua na gudhu na Kolito*

<sup>1</sup> Pipita-a, Polo ayie bhú gudhu na Atene, ani atsia atapa bhú gudhu na Kolito. <sup>2</sup> Oo, ani abhaka maYuda bini, a adu 'li ani me Akuila, kpála na ndu doto na Pote. Ngaani-e, ani ayie nani bhú Itali, bhú dabili bini ne wala e Pilisila, anga 'ngbé ngámá Kolode aha nani líli me ndu omaYuda hana ze bhú Loma maze. Abhomu-o, Polo atsia anu nabhaka uo. <sup>3</sup> Ani adu la lie amene ngua kulu bini ne uo (u adu abho eti inde u a'i e me 'ti ngbangbali), ani adu nadu agba uo, u atsia adu amene kulu bhú dabili bini. <sup>4</sup> Polo adu nasuno eli gba Ebhe-e bhú ndu 'kpí naguo gba omaYuda hana bhú eti nadje líli gba Moidje-o. Ani atsia adu di namene ne kpéke me omaYuda di ne oGiliki ziba 'li ni.

<sup>5</sup> Li Sila ne uo ne Timoté ayie lie bhú ndu doto na Makedonia, u atsia akolo bhú gudhu na Kolito. Polo aha nedhinga gba e hana ngú nakpokpo Bádha Ngali gba Ebhe-e pi okpála. Ani adu asuno

pi omaYuda me Yesu ne Masiya . <sup>6</sup> Engú bini, omaYuda adu ayayala, u atsia adu di nasobho Ebhe. Abhomu-o, ani apulu doto li bongo gba e, ani atsia apa pi uo me: «A ayo me ngute gba yi-e, tuko pí 'ndji yi. A ko matá naama 'ngú de. Nayie pi mbia inde-e, ma anú ibili agba ogandji okpála .» <sup>7</sup> Abhomu-o, Polo ayie oo, ani atsia anu agba kpála bini inde li 'li e adu me Tito Djustusi. Kpála ang-o adu kpála nadhogo Ebhe. Kati gba ani-e adu de eti nadje líli gba Moidje-o. <sup>8</sup> Kilisipisi, ngámá na eti nadje líli-e, abhuka Ebhe di ne piga gba e libhomu. Okpála bhelé na gudhu na Kolito adje Polo lie, u abhuka, u atsia asia di batisimo.

<sup>9</sup> Ekpí bini sukpe-e, Ebhe apa pi Polo bhú ehe maka loto me: «Mo odjé tsulu de. Engú bini, du bha nagama 'ngú, mo ondjili má bulu de. <sup>10</sup> Padhá de, anga ma bhú dabili bini ne mu. Kpála bini bú 'kpa e li mu ngú namene mu sisiti de, anga okpála gba ma bhú gudhu inde-e bhelé.» <sup>11</sup> Abhomu-o, Polo asi bhú gudhu na Kolito oo kalanga bini ne epe madhia. Ani adu asuno eli gba Ebhe-e pi ndu okpála hana.

*OmaYuda asungula Polo pi ongámási*

<sup>12</sup> Bhú nedhinga inde li okpála na Loma a'o Galio lie ngámá na ndu doto na Akai-e, omaYuda adje lio bhú dabili bini me o mene Polo sisiti. Abhomu-o, u atsia agbe ani kala okpála nakodho 'ngú. <sup>13</sup> Do uo de me: «Kpála inde ngagili nagbele okpála ngú nadhogo Ebhe li kpadji bhende li líli ziba e de.» <sup>14</sup> Li Polo di me gama 'ngú lie, Galio atsia apa pi omaYuda me: «Ngayi omaYuda-a, i dú igini me kpála inde-e bhele kpála, ani méne di engú na sisiti naali-e, ma de adje yi ndjindji. <sup>15</sup> La-a, i nde

lie me yi nde ngamene kpekebho pindji oeli ne o'ili di ne lili gba yi makpe-e, atsia bha-a yi! Ma akunda naama nakodho 'ngú li ngua 'ngú bhomu-o de!»<sup>16</sup> Ani at-sambala uo li bili nakodho 'ngú-o.<sup>17</sup> Abhomu-o, ndu uo hana aholo Sosetene, ngámá na eti nadje lili gba Moidje, u atsia aholo nabhi ani bhú mbadhasu li bili nakodho 'ngú-o. Engú bini, Galio adu bha au 'ngú ango-o bhú djila e padhá.

*Polo agie lie bhú gudhu na Atiokia*

<sup>18</sup> Polo adu matá mbo ngengele bhú gudhu na Kolito. Pipita-a, ani a'o ká omabhuka, ani a'u bhú zabu, ani atsia atapa bhú ndu doto na Silia bhú dabili bini ne Pilisila di ne Akuila. Kala me ani 'u bhú zabu-o, u aka ngaiza 'ndji ani bhú gudhu na Sekele, anga ani asili nani ndjinga me ni aha lini pi Ebhe.<sup>19</sup> U akolo bhú gudhu na Efeso. Oo, Polo a'o ká Pilisila ne Akuila. Ani ali bhú 'ti nadje lili gba Moidje, ani atsia adu akpokpo 'ngú ne omaYuda.

<sup>20</sup> La-a, u ayo ka ani lie me o du nga matá mbo ne ani ngengele-e, ani atsia ayala.<sup>21</sup> Engú bini, nedhinga inde ani adu a'e ne enú lie, ani atsia apa me: «I du me Ebhe nde akunda-a, ma agó matá agba yi mago.» Ani a'u bhú zabu. Ani ayie bhú gudhu na Efeso,<sup>22</sup> ani atsia atapa bhú gudhu na Sedjale. Oo, ani a'u bhú gudhu na Yelusalema ngú nabhana lie pi omabhuka. Pipita-a, ani atsia aké bhú gudhu na Atiokia.<sup>23</sup> Ani abhue oo mbo ekpi bedi, abhomu-o, ani atsia atapa. Ani agulu ndu doto na Galatia ne ndu doto na Filidjia me ani nde ngato masi bhú omabhuka.

*Apolosi anu bhú gudhu na Efeso, di ne bhú gudhu na Kolito*

<sup>24</sup> MaYuda bini akolo bhú gudhu na Efeso, a adu 'li ani me Apolosi,

kpála na gudhu na Alekidjandili. Ani mbila nani nagama 'ngú ndjindji. Ani mbila di nani Bhuku gba Ebhe-e ndjindji.<sup>25</sup> U asuno nani kpadji gba Ngámá pi ani ndjindji. Ani adu ne bua na masi, ani atsia adu akpokpo di ne nasuno engú pindji Yesu ngbingbili. Engú bini, ani ambila bha nani naae batisimo gba Djaa-o.

<sup>26</sup> Abhomu-o, ani aholo nakpokpo 'ngú ango-o bhú 'ti nadje lili gba Moidje. Ani du ne tsulu de. Li Pilisila ne Akuila adje engú ani apa e lie, u aha ani, u anu ne ani. U atsia asuno kpadji gba Ebhe-e pi ani ndjindji.<sup>27</sup> Pipita-a, Apolosi adu akunda nanu bhú ndu doto na Akai. Abhomu-o, omabhuka ato masi bhú ani, u atsia aye balua pi omabhuka na ndu doto ango-o me, u sia ani ndjindji. Ani akolo lie oo, ani ateteke okpála inde abhuka ka bádha bhú 'bu gba Ebhe-e ndjindji naali.<sup>28</sup> Padhá de, anga ani adu asuno mbámbá ne angu hana bhú ká djila ndu okpála hana me omaYuda li ngbili kpadji ade. Ani atsia adu apana pi uo bhú Bhuku gba Ebhe-e me Yesu ne Masiya.

## 19

*Polo akpokpo 'ngú gba Ebhe-e bhú gudhu na Efeso*

<sup>1</sup> Nedhinga li Apolosi adu lie bhú gudhu na Kolito-o, Polo agulu ndu doto na ndu ká eta na Adjia, ani atsia akolo bhú gudhu na Efeso. Ani abhaka omukpata koko oo.<sup>2</sup> Ani atsia ayi uo me: «Yi akolo omabhuka lie, yi asia Bu Bhobua uu?» U atsia agie pi ani me: «Ya adje nga engú pindji Bu Bhobua belegu de bini.»<sup>3</sup> Abhomu-o, Polo atsia ayi uo me: «Yi asia la man-gua batisimo dho?» U agie pi ani me: «Batisimo bhende gba Djaa ko.»<sup>4</sup> Polo atsia apa pi uo me:

«Djaa adu abatisa okpála inde adu aziba nadji bua o. Ani atsia adu apa pi okpála na Isalaele me: «Yi bhuka kpála inde ngago pita ma ko.» A akunda napa me Yesu.»

<sup>5</sup> U adje engú bhomu-o lie, Polo atsia abatisa uo ne 'li Ngámá Yesu.

<sup>6</sup> Pipita-a, ani a'o 'kpa e pí 'ndji uo, u atsia asia Bu Bhobua. U aholo agama 'ngú bhú odikongu koko di ne nakpokpo 'ngú maka opolofeta . <sup>7</sup> Ndu obhosi bhomu-o hana adu masakpe de ndjikpa ne ká bhisi.

<sup>8</sup> Polo adu ali piko bhú 'ti nadje líli gba Moidje , sunda epe bata, ani du akpokpo 'ngú pindji Nau gba Ebhe-e ne tsulu de. Ani atsia adu amene ne kpéke ngubula me okpála bhuka Yesu. <sup>9</sup> Engú bini, okpála koko adu ne kpéke 'ndji. U ayala nabhuka . U atsia adu apa sisiti 'ngú li kute okpála inde adu akpata kpadji gba Yesu-o kala ndu okpála hana. Abhomu-o, Polo a'o ká uo, ani anu ne omukpata-a bhú 'ti balua gba Tulanisi. Oo, ani atsia adu asuno pi uo ndu 'kpí hana. <sup>10</sup> Ani amene mo-o ngubula kalanga bhisi. Abhomu-o ndu okpála hana na ndu doto na Adjia, omaYuda di ne oGiliki, atsia adje eli gba Ngámá-o.

*Engú inde akolo li ongisi na obhosibhosi gba Seva*

<sup>11</sup> Ebhe adu amene ongamba 'ngú na ngbengbengbe pi okpála bhú Polo. <sup>12</sup> Kaka-a, okitambala di ne obongo inde atunu lie li kute Polo-o, u adu ago ne di, a'o'o li kute okpála na kuo. Abhomu-o, okpála na kuo ango-o adu akobho, osisiti bua atsia adu di aze bhú uo.

<sup>13</sup> OmaYuda koko, inde adu anu li obili koko hana ngubula napandja osisiti bua bhú okpála-a, ale di napandja osisiti bua ne 'li Ngámá Yesu. U adu apa pi osisiti bua ango-o me: «Má aha líli pi yi ne 'li Yesu, inde li Polo ngakpokpo 'ngú gba e me, yi

zeze.» <sup>14</sup> Ongisi na obhosibhosi mananika gba Seva, saka 'ngbé dimandé bini gba omaYuda-a adu amemene moko. <sup>15</sup> Engú bini, siti bua-a agie pi uo me: «Ma mbila Yesu hana. Ma mbila la di hana me Polo ne da-ie. Ngayi-e, yi la naayi ne oda?»

<sup>16</sup> Abhomu-o, kpála inde li siti bua adu bhú e, ati pi uo ne gbele, angu gba ani ane bhende gba uo-o mane. Ani amene uo sisiti naali. Kaka-a, u atsia aze bhú 'ti ango-o ndumbu di ne oeka li kute o. <sup>17</sup> Ndu okpála na gudhu na Efeso hana, omaYuda di ne oGiliki, adje engú ango-o. Ndu uo hana adje tsulu naali. Abhomu-o, u atsia adhögé 'li Ngámá Yesu. <sup>18</sup> Bhiti okpála inde abhuka adu ago ambamba ta osisiti 'ngú inde u amene e ko. <sup>19</sup> Bhelé bhú ká uo adu obhulu mambengu. U ago ne obhuku gba o-o, u atsia atsulu kala ndu okpála hana. U ako masemase-e lie, u atsia au me a akoto olí falanga kutu ndjikpa bhuluvue. <sup>20</sup> Abhomu-o, ka angu gba Ngámá-a, eli-e adu ayangba, atsia adu akolo kpekpeke.

*Tolo akoto bhú ká okpála na gudhu na Efeso*

<sup>21</sup> Pita ongu bhomu-o, Polo atsia abhundja me ni gulu ondu doto na Makedonia di ne Akai ngu nanu bhú gudhu na Yelusalema. Ani adu apa me: «I du me ma nde akolo oo, a ayo me ma akolo di bhú gudhu na Loma .»

<sup>22</sup> Abhomu-o, ani atima okpála bhisi bhú ká okpála inde adu ateteke ani-e, Timoté di ne Elaste, bhú gudhu na Makedonia. Engú bini, ani atsia adu mbo matá naae bhú ndu doto na Adjia ngubula nedhinga bedi.

<sup>23</sup> Bha li nedhinga bhomu-o, tolu na ngbéngbé atsia akoto bhú gudhu na Efeso pindji kpadji gba Ngámá Yesu-o. <sup>24</sup> Kpála bini adu

oo, a adu 'li ani me Demetiliusi. Aní adu abho djedje kulu eti gba ebhe na eelø Alatemi lí teme inde u a'i e me aladja. Okpála na kulu ango-o adu asia tia tété naali.

<sup>25</sup> Abhomu-o, ani apo bhúla uo bhú dabilí bini ne okpála inde adu amene di ngua kulu ango-o. Aní atsia apa pí uo me: «Ondaise ma, yi mbíla ndjindji me ní ngakobho ka kulu inde. <sup>26</sup> Yi ngauu, yi la di ngadjedje, engú lí Polo inde-e ngamene e-o. Aní ngapa me oebhe inde lí okpála amene e ne 'kpa-a, a ko oebhe de. Aní agbele okpála nganda e bhelé. Aní mene mo-o, bha bini bhú gudhu na Efeso síi de, engú bini, masakpe de bhú ndu doto na Adjia libhomu. <sup>27</sup> Eli ango-o tí da nasiti bha bini kulu gba ní-e de, engú bini, a tí da nayaka di sa eti gba 'ngbé ebhe na eelø Alitemi. Abhomu-o, lí okpála 'ó nadhøgø Alitemi, ebhe na eelø inde lí okpála na ndu doto na Adjia di ne pála doto libhomu ngadhøgø e-o.»

<sup>28</sup> Lí okpála inde adu oo adje engú bhomu-o lie, u abí 'gú naali. U atsia aholo nasusula me: «Alitemi gba okpála na gudhu na Efeso-o ngbéngbé!» <sup>29</sup> Abhomu-o, tolo aha gudhu libhomu. U aholo Gayusi, ngauo ne Alisitaluka, okpála bhisi na gudhu na Makedonia inde adu adhaku bhú dabilí bini ne Polo-o. U atsia anu ne uo bhú holo lí bíli lí okpála apøkøbhe bhúla o lie ko. <sup>30</sup> Kaka-a, Polo me ní ngakoto kala ndu okpála hana, engú bini, omakpata atsia ayoko aní. <sup>31</sup> Okpála koko di na ndu doto na Adjia inde adu akunda aní-e, atima eli pí aní me, ngaani makpe-e, aní anú lí bíli lí okpála apøkøbhe bhúla o lie de.

<sup>32</sup> Lí nedhinga ango-o, tolo adu naali. Abhomu-o, okpála dje lío de. Okoko adu asusula ne engú kpi, okoko atsia adu di asusula

ne engú koko. Bhelé na uo du ambíla ta 'ngú inde u apøkøbhe bhúla o ngú e de. <sup>33</sup> Okpála koko bhú ká bhiti okpála bhomu-o, akpokpo pí Alekidjandele inde adu bhú ká uo-o, u atsia adyudyo aní ne akalanu. Abhomu-o, aní a'e 'kpa e bhúlá, ngubula nasuno me ní ngakunda nagama 'ngú kala okpála. <sup>34</sup> Engú bini, lí okpála ambíla lie me a ko maYuda-a, ndu uo hana aholo asusula bhú dabilí bini ngubula nedhinga masakpe de saa bhisi me: «Alitemi gba okpála na gudhu na Efeso-o ngbéngbé!»

<sup>35</sup> Alí soso-o, ndombi bini na gudhu ango-o ayoko uo, aní atsia apa me: «Ngayi okpála na gudhu na Efeso-o, ndu okpála hana mbíla ndjindji me gudhu na Efeso ngalíla 'tí ebhe gba 'ngbé ebhe na eelø Alitemi, di ne kulu aní inde ayie nani abhúlá atsia atí kuto-o. <sup>36</sup> Kpála bini tí da nayayala de. Kaka-a, a ayo me yi 'o bua yi kuto. Yi améne 'ngú bhú holo de.

<sup>37</sup> Yi ago ne okpála inde-e ei. Ngauo-o, u zí 'he bhú 'tí ebhe na eelø gba ní-e de. U tsia sobho la di aní de. <sup>38</sup> Í du me Demetelisi ne okpála na kulu gba e nde ne engú sunda o ne kpála bini-e, a ne oekpí di ne ongámási ngú nakodho 'ngú ango-o. A bhomu-o bíli inde a ayo me u nu kpokpo 'ngú sunda o lie ko. <sup>39</sup> Í du me a nde matá ne engú koko inde a ayo me u gama 'ngú lie, ya apøkøbhe bhúla ya maka lí líli apa lie, ya tsia kpókpo 'ngú tété. <sup>40</sup> Atigala bedi me u pa lí ní me, ní ngaha kpéke 'ndji pí okpála lí 'ngú inde akodho 'kpí naki-o. Padhá de, anga tata lí napøkøbhe bhúla ní me-e ade. Ní tí la di da nakpokpo 'ngú tété pí okpála

ndjindji de.» [ 41 \*]

## 20

### *Polo ayie bhú gúdhú na Efeso*

<sup>1</sup> Li tolo andjia lie, Polo a'i omakpata-o, ani atsia ato masi bhú uo. Pipita-a, ani abhana lie pi uo, ani atsia atapa bhú ndu doto na Makedonia. <sup>2</sup> Ani agulu ndu doto ang-o, ani ato masi bhú omabhuka ne oeli bhelé. Pipita-a, ani atsia akolo bhú ndu doto gba oGiliki. <sup>3</sup> Oo, ani asi epe bata. Li nedhinga inde ani adu akunda lie naha 'ngbé zabu ngú nanu bhú ndu doto na Silia, ani adje me omaYuda apo bhúla o ngú namene ni sisiti. Abhomu-o, ani atsia au ndjindji me ni gie lini, amba ni pu ne abhú ndu doto na Makedonia. <sup>4</sup> Okpála inde adu nani adhuku ne ani bhú dabili bini-e, adu nani: Sopatolosi, ndili gba Pilusi, kpála na gúdhú na Belya; Alisitaluka ngauo ne Sekundusi, okpála na gúdhú na Tesalonike; Gayusi, kpála na gúdhú na Delebe, ne uo ne Timoté; Tisike ngauo ne Tolofime, okpála na ndu doto na Adjia. <sup>5</sup> Okpála bhomu-o agbida kalanu, u atsia adu adjeke ya bhú gúdhú na Tuluasi. <sup>6</sup> Engú bini, ngaya-a, ya aha 'ngbé zabu bhú gúdhú na Filipoi. Pita anokomia nazu mapa inde li levile nde bhú e ade-e, ya atsia anu abhaka uo bhú gúdhú na Tuluasi, pita ekpi bhuluvue. Oo, ya asi poso bini.

### *Polo akpokpo 'ngú gba Ebhe-e bhú gúdhú na Tuluasi*

<sup>7</sup> Bhú 'kpi kulu madhia tagolo-o,\* ya apo bhúla ya ngú nazu mapa-o. Polo adu agama 'ngú pi uo, anga ani adu akunda nanu

pita 'kpi ang-o. Ani atsia agama 'ngú ngengele akolo tutu sukpe. <sup>8</sup> Ya apo bhúla ya bhú tina 'ti bhende na abhúla-o. Oo, oeke adu bhelé. <sup>9</sup> Makombi bini, a adu 'li ani me Etikusi, ani adu li malilisa. Li Polo adu la lie agama 'ngú ngengele-e, ani ati ne ela má kolio! Abhomu-o, ani atsokodho abhúla bhú tina 'ti na bata-a, ani atsia ati kuto má kpu! U a'e bha ibili ani me ani nde akpi. <sup>10</sup> Polo aké, ani angumba pi ani, ani aha ani, abi ani sa 'kpa e. Ani atsia apa me: «Yi adjé tsalu de. Ani kpi de.» <sup>11</sup> Pipita-a, Polo agie matá lie abhúla, ani aha mapa-o, ani agumu, ani atsia azu. Abhomu-o, ani agama matá 'ngú ngengele akolo bhú sikikpi. Pipita-a, ani atsia atapa. <sup>12</sup> La-a, pi makombi bhomu-o, u anu ne ani me ani nde uu. Engú bhomu-o ateteke okpála naali.

### *Polo anu bhú gúdhú na Milete*

<sup>13</sup> Ya ayie kalanu, ya aha 'ngbé zabu ngú nanu bhú gúdhú na Asosa. A bhomu-o bili inde a ayo lie me ya ha Polo bhú 'ngbé zabu-o. Padhá de, anga ani apa pi ya mo-o ngae me, ni anu naani ne 'dhu ni. <sup>14</sup> Ani ago abhaka ya lie bhú gúdhú na Asosa-a, ya aha ani bhú 'ngbé zabu, ya atsia atapa bhú gúdhú na Mitilene. <sup>15</sup> Li ekpi aseke lie, ya ayie oo, ya akolo bhúla kpemé na Kio. Ekpi na bhisi-e, ya akolo bhú kpemé na Samosi. Ekpi na bata-a, ya atsia akolo bhú gúdhú na Milete. <sup>16</sup> Polo abhundja me ni lá bhú gúdhú na Efeso de. Padhá de, anga ani du akunda de me ni bhue bhú ndu doto na Adjia ngengele-e de. Ani adu agbene lie ngubula

\* 19:41 19:41 Lukuluku inde-e, a bhú obhuku koko na didili u aye e bhú eli na giliki ade.

[Pita li ani andjia nakpo 'ngú bhomu-o lie, ani atsia aha kpadji pi okpála.] \* 20:7 20:7 'Kpi kulu madhia tagolo: U aye bhú obhuku koko me «Ekpi na kalanu.» Pi omaYuda-a, ekpi na kalanu-o, a ko 'kpi kulu madhia. La pi ní-e, ekpi na kalanu-o, a ko 'kpi yinga.

me, i dɔ me nedhinga nde u-o, ni de dɔ bhú gɔdhu na Yelusalema bhú anokomia na Patekote .

*Polo abhana lie pi obhelesi okpála na gɔdhu na Efeso*

<sup>17</sup> Li Polo adɔ lie bhú gɔdhu na Milete-e, ani atima okpála bhú gɔdhu na Efeso me u nu 'i obhelesi okpála na Dadjua gba Ebhe-o. <sup>18</sup> U akolo lie de ani-e, ani atsia apa pi uo me: «Yi mbila maka ma adɔ nadɔ lie bhú ká yi, nayie li 'kpí ma akolo lie bhú ndu doto na Adjia hana. <sup>19</sup> Ma amene kulu gba Ngámá me ma nde akɔ lima ne kuto. Ma adɔ aku 'gbá, ma atsia adɔ di adje likabhɔ ka li omaYuda adɔ adje lio lie ngú namene ma sisiti-o. <sup>20</sup> Yi mbila hana me ma wo 'he bini inde i ti da nadɔ pi yi ndjindji-e belegu de bini. Ma akpokpo Bádha Ngali gba Yesu-o. Ma atsia asuno la di pi yi mbámbá bhú ká okpála, ne bhú oeti gba yi-o. <sup>21</sup> Ma apa pi omaYuda di ne oGiliki me u dji lio pi Ebhe, amba u bhuka Yesu Ngámá gba ní ko.

<sup>22</sup> Mbia inde-e, ma adji bhú gɔdhu na Yelusalema maka li Bu Bhobua aha líli mɔma lie ngú namemene ko. Ma mbila de me abháka ma oo ne mangua 'ngú dho-ie de. <sup>23</sup> Ma ambila bha bini me Bu Bhobua ngapa mɔma me bhú gɔdhu bini ne bini-e, tikpu di ne likabhɔ ngadjeke ma. <sup>24</sup> La-a, mukobho gba ma makpe-e, bhú djila ma ngbéngbé ade. Padhá de, anga ma akunda namene kulu inde li Ngámá Yesu aha e mɔma-a, akólo bha bini alí soso: nakpokpo Bádha Ngali na bádha bhú 'bu gba Ebhe ko.

<sup>25</sup> Ma apɔ bhú okuti gba yi, ma akpokpo 'ngú pindji Nau gba Ebhe . Engú bini mbia inde-e, ma ambila me yi ú matá ma de. <sup>26</sup> Kaka-a, ma apa pi yi nakí me: i dɔ me kpála bini bhú ká yi nde angita-a, a ko matá naama

'ngú de. <sup>27</sup> Padhá de, anga ma akpokpo ndɔ 'ngú gba Ebhe-e pi yi hana. Ma wo engú belegu de bini. <sup>28</sup> Yi lila liyi ngayi makpe, di ne ndɔ piga hana inde li Bu Bhobua a'o e sa 'kpa yi me yi lila e ko. Yi lila Piga gba Ebhe inde ani akala e ne ngute Ndili gba e makpe ko. <sup>29</sup> Padhá de, anga ma ambila ndjindji me pita ma-a, okpála inde maka onute-e alí bhú ká yi. U tsia bhéle piga gba Ebhe-o. <sup>30</sup> Abana bha bhú ká yi makpe-e, okpála koko azé, u adú apa eu, u tsia gbéle omabhuka bhelé nganda o. <sup>31</sup> 'E-e! Yi lila liyi, amba yi bhundja la di me, bhú sɔnda kalanga bata, sukpe ne ngbikpi, ma ndala li nasuno pi kpála bini ne bini de. Ma adɔ asuno belegu ne ngula bhú djila ma.

<sup>32</sup> Mbia inde-e, ma nga'o yi sa 'kpa Ebhe, di ne eli na bádha bhú 'bu gba ani-o. A ko ani inde ngateteke yi ngubula me yi lɔ kpekpeke-o. Ani di ne angu ngú naha pi yi obabadha 'ngú inde ani awo e pi ndɔ obubu okpála gba e hana-o. <sup>33</sup> Ma dɔ ne gumu tia de. Ma dɔ ne gumu olo de. Ma dɔ di ne gumu bongo gba kpála bini de. <sup>34</sup> Ngayi makpe, yi ambila ndjindji me ma amene kulu ne 'kpa ma ngubula me ngaya ne obi ma-a, ya sia 'he inde ya adɔ ne gumu e ko. <sup>35</sup> Ma apana pi yi bhú ndɔ 'ngú hana me a ayo namene kulu ngubula nateteke okpála bhende bhú ndibhili-o. Yi bhundja di eli inde li Ngámá Yesu apa e ngae makpe me: «Djali naali pi kpála inde ngaha 'he ane kpála inde ngasia 'he ko!»

<sup>36</sup> Pita ani apa 'ngú bhomu-o lie, ani atutu lipuku e kuto, ani atsia ayo Ebhe bhú dabili bini ne uo. <sup>37</sup> Ndɔ uo hana aholo naku 'gbá. U aga ngulu ani. U atsia apa pi ani me, ani nu ndjindji. <sup>38</sup> U adɔ ne

likabhu naali, anga Polo apa pi uo me u ú matá ni de. Abhomu-o, u atsia anu a'o ani ade 'ngbé zabu-o.

## 21

*Polo atapa bhú gudhu na Yelusalema*

<sup>1</sup> Pita ya agbo bhusu ya ne uo lie, ya aha 'ngbé zabu, ya anu bhú kpemø na Kosi. Li ekpí aseke lie, ya akolo bhú kpemø na Lodosi. Ya ayie lie oo, ya atsia anu akolo bhú gudhu na Patala. <sup>2</sup> Oo, ya abhaka me 'ngbé zabu bini nde adji bhú ndu doto na Fenisia. Abhomu-o, ya a'u bhúbhú, ya atsia atapa. <sup>3</sup> Ya akolo lie lingo kpemø na Sipele-e, ya nde ibili ngauu hana-a, ya a'o káká ne li pápá na gali ngú nanu li pápá na ndu doto na Silia. Ya akolo bhú gudhu na Tile, li bili inde a ayo lie me u pandja 'he bhú 'ngbé zabu-o. <sup>4</sup> Ya abhaka la omabhuka lie oo, ya amene ne uo poso bini. Abhomu-o, Bu Bhobua atsia apa pi uo me, u pa pi Polo me ani anú bhú gudhu na Yelusalema de. <sup>5</sup> Engú bini, li ekpí gba ya ale lie, ya atsia agbida. Ndu uo hana, ne olisi di ne ongisi gba o-o, anu na'o ya. Ya akoto bhú gudhu-o. Ya akolo lingo 'ngbé 'ngu, ya atutu lipuku ya kuto, ya atsia ayo Ebhe. <sup>6</sup> Kala me ya agbo bhusu ya ne uo-o, ya aholo 'kpa uo. Ya anu a'u bhú 'ngbé zabu-o. Abhomu-o, u atsia agie lio agba o.

<sup>7</sup> Ya ayie bhú gudhu na Tile, ya akodho 'ngbé 'ngu-o, ya atsia akolo bhú gudhu na Potolemaisí. Ya akolo lie oo, ya aholo 'kpa ondaise ya, ya atsia adu ne uo ekpí bini. <sup>8</sup> Li ekpí aseke lie, ya aholo ne enú, ya atsia akolo bhú gudhu na Sedjale. Oo, ya ali bhú 'ti gba Filipo, musuno na Bádha Ngali gba Ebhe, suka okpála mananika nani inde u abhu o bhú gudhu na Yelusalema ko. Ya atsia adu agba

ani. <sup>9</sup> A adu nani ka ani ne ongisi na olisilisi badha inde i mbila nga nani engú na obhosi de. U adu nani akpokpo 'li Ebhe pi okpála.

<sup>10</sup> Ya adu oo ngabula ekpí bhelé. Li nedhinga angoo, polofeta Agabusi ayie bhú ndu doto na Yudaya atsia ago oo. <sup>11</sup> Ani ago abhaka ya. Ani abhulu ekpí na ludu Polo. Ani agbigbite 'kpa e di ne 'dhu e ne di. Do ani de me: «Bu Bhobua apa me: «Bhulu ekpí inde-e, bhú gudhu na Yelusalema-a, omaYuda agbigbite bhadi ani moko, u tsia pu ani pi ogandji okpála .» <sup>12</sup> Ya adje engú bhomu-o lie, ngaya, di ne omabhuka na gudhu na Sedjale-e, ya akikiliki liya pi Polo me ani anú bhú gudhu na Yelusalema de. <sup>13</sup> Engú bini, Polo atsia agie me: «Yi ngamene bhomu-o ni? Yi ngaku 'gbá, di ne nangbingi bua ma lie mo-o! Ma bha bini bedhe ade ngabula me u mbimbi ma ne ekpu, engú bini, ma bedhe ngabula me ma kpi bhú gudhu na Yelusalema ngabula 'li Ngámá Yesu.» <sup>14</sup> Ya ale la nadji mab-hundja gba ani-e lie pima-a, ya tsia zi kekele tété de. Ya apa bha ibili me: «A ayo me Ngámá mene maka ani akunda lie ko!»

<sup>15</sup> Pita ekpí ya amene e li bili bhomu-o, ya aleke liya. Abhomu-o, ya atsia agbida bhú gudhu na Yelusalema. <sup>16</sup> Omakpata koko na gudhu na Sedjale anu bhú dabili bini ne ya. U anu a'o ya gba kpála bini inde a ayo me ya adu gba e-o. A adu 'li ani me Menaso, kpála na kpemø na Sipele, suka omakpata na kalanu ko.

*Polo anu natsia obhelesi okpála bhú gudhu na Yelusalema*

<sup>17</sup> Ya akolo lie bhú gudhu na Yelusalema-a, omabhuka asia ya ne djali. <sup>18</sup> Li ekpí aseke lie, Polo anu bhú dabili bini ne ya agba



Djaki. Oo, ndu obhelesi okpála hana na Dadjua gba Ebhe-e, atsia apəkəbhə bhála o. <sup>19</sup> Polo aholo 'kpa uo. Abhomu-o, ani atsia akpokpo ndu 'ngú hana bini ne bini maka li Ebhe adu amemene lie bhú kulu gba ani bhú ká ogandji okpála ko. <sup>20</sup> Li u adje lie-e, u atsia adhəgə Ebhe. Pipita-a, u atsia apa pi ani me: «Ndai ya, mu ngauu! A ko omaYuda kətə ne kətə inde abhuka Ebhe, ndu uo hana agbite lio li líli. <sup>21</sup> La-a, u adje li 'ngú gba mu-o me, mu ngasuno pi ndu omaYuda hana inde ngadulu bhú ká ogandji okpála me, a ayo me u 'o nakpata líli gba Moidje-o. U adje di me mo opa di pi uo me, u 'o nato ongisi gba o-o bhú gandja, amba u 'o di nakpata dasundu gba omaYuda-o. <sup>22</sup> A ayo me ya mene pi? A na paká me, u adjé madje me mo okolo si.

<sup>23</sup> Mene bhende ya apa e pi mu ko. A ka ya si ne obhosi badha inde asili ndjinga me, o aha lio pi Ebhe. <sup>24</sup> Ha uo, yi nu ne uo, yi valu liyi ngubula me yi kolo bubu kala Ebhe, amba mu ha tia ngubula me u ka 'ndji uo. Abhomu-o, li ndu okpála hana tsia mbila me engú inde u apa e li mu-o, a ko kakulu 'ngú de. Engú bini ngamu di-e, mu ngakpata líli gba Moidje ko. <sup>25</sup> La pi ogandji okpála inde abhuka-a, ya aye pi uo líli gba ya-o: u 'o nazu so 'nu inde u abhəle e pi oebhe na eu-o ma'o. U 'o nazu ngute di ne so 'nu inde akpi ne ngute bhú e hana, amba u 'o nakunda olisi di ne obhosi ngangá ma'o.»

<sup>26</sup> Abhomu-o, li ekpí aseke lie, Polo abha obhosi ango-o, ani anu avulu lie ne uo bhú dabili bini ngubula me o kolo bubu kala Ebhe. Pipita-a, ani ali bhú 'ngbé 'ti Ebhe gba omaYuda, ani atsia a'o ekpí inde li mavulu ango-o andjia lie, u tsia bhəle enu pi Ebhe

ngubula ndu uo hana bini ne bini.

*U aholo Polo bhú 'ngbé 'ti Ebhe gba omaYuda*

<sup>27</sup> A akolo lie masikpe de me oekpi mananika-a ndjia, omaYuda koko na ndu doto na Adjia au Polo bhú 'ngbé 'ti Ebhe gba omaYuda. Abhomu-o, u ato siti 'ngú bhú 'ndji ndu okpála hana. U atsia aholo ani. <sup>28</sup> U adu asusula me: «Ngayi omaɬsalaele-e, yi go teteke ya! Yi tsia nga kpála inde ngasuno ne ndu bili hana pi ndu okpála hana me, u yala omaɬsalaele, u yala líli gba Moidje, di ne 'ngbé 'ti Ebhe gba omaYuda-o. Ani amba belegu oGiliki bhú 'ngbé 'ti Ebhe. Abhomu-o, ani atsia asiti di bili na bubu ango-o.» <sup>29</sup> (U adu apa mo-o, anga kalanu-o, u au Tolofime, kpála na gudhu na Efeso, bhú dabili bini ne Polo abhu gudhu. Kaka-a, u adu abhundja me Polo ato ani bhú 'ngbé 'ti Ebhe gba omaYuda.)

<sup>30</sup> U aholo amene tolo bhú gudhu libhomu. Abhomu-o, okpála ayie ne ndu bili hana, u ago apəkəbhə bhála o. U aholo Polo, u agbele ani akilidjo, u atsia anini kolo obhoti na 'ngbé 'ti Ebhe gba omaYuda-o. <sup>31</sup> Li u adu agili nabhəle Polo lie, ngali ango-o atsia akolo li 'ngbé ngámá gba osudha na gudhu na Loma me okpála bhú gudhu na Yelusalema libhomu ngazi tolo. <sup>32</sup> Kolo má gala me-e, ani abha ongámási gba osudha di ne osudha, ani anu ne uo li bili li okpála adu azi tolo lie-o. U au 'ngbé ngámá di ne osudha-a lie, u atsia a'o nabhi Polo. <sup>33</sup> Abhomu-o, 'ngbé ngámá-a adyudyo lie de Polo. Ani me u holo ani, ani atsia aha líli me u gbigbite ani ne gbindjili bhisi. Pipita-a, ani ayi me: «A ko naae da, ani amene la di ni?» <sup>34</sup> Bhú ká bhiti okpála bhomu-o, okpála adu asusula ne engú ngangá, u dje lio

de. Li tolo adu lie naali-e, 'ngbé ngámá-a tsia dje ta 'ngú ango-o de. Abhomu-o, ani atsia aha líli me u nu ne Polo bhú 'ti inde li osudha nalila gudhu adu lie ko.

<sup>35</sup> Ani akolo lie li ngba 'ti-e, osudha atsia abi ani ka li bhiti okpála bhomu-o adu amene ani lie sisiti-o. <sup>36</sup> Padhá de, anga ndu uo hana adu akpata ani. U atsia adu atu 'ue me u bhelø ani.

*Polo akpokpo 'ngú gba e-o*

<sup>37</sup> Nedhinga u adu akunda nato Polo lie abhú 'ti-e, Polo apa pi 'ngbé ngámá-a me: «Mu ti da naziba uu me ma pa mbo engú pi mu?» 'Ngbé ngámá-a atsia ayi ani me: «Mu mbila eli gba oGiliki-e hana? <sup>38</sup> A ko ndi mu di maEdjipeto inde ato kpéke 'ndji bhú okpála sunda 'kpí inde-e? Ani atsia anu di ne okpála koto badha bhú 'gu-o?» <sup>39</sup> Abhomu-o, Polo agie me: «Ngama-a, ma ne maYuda. U azu ma bhú gudhu na Talasi bhú ndu doto na Silisia. Ma ne kpála na gudhu na padhá padhá ade. Kikiliako, ha kpadji muma, ma gama 'ngú pi okpála.» <sup>40</sup> 'Ngbé ngámá-a atsia aziba pi ani. Abhomu-o, Polo alu li ngba 'ti-o, ani amene 'kpa e me ni akunda nagama 'ngú pi okpála. Ndu okpála hana andjili má bulu! Abhomu-o, Polo aholo nagama 'ngú pi uo bhú eli gba omaYuda me:

## 22

<sup>1</sup> «Odyi ma, di ne ondaise ma, yi dje engú inde ma adjí apa e pi yi mbia inde-e ndjindji, amba yi mbila me ma mene 'ngú bhomu-o de.» <sup>2</sup> Li u adje lie me ani ngagama 'ngú pi o bhú eli gba omaYuda-a, u atsia andjili la matá má bulu! Polo atsia apa me: <sup>3</sup> «Ngama-a, ma ne maYuda. U azu ma bhú gudhu na Talasi, bhú

ndu doto na Silisia. Ma abhele bhú gudhu na Yelusalema inde. Musuno gba ma Gamaliele asuno nambila líli gba onguo ogbi ní-e muma ndjindji. Ma aha nani lima pi Ebhe ne bua ma bini maka ndu yi hana yi ngamemene lie naki ko.

<sup>4</sup> Ma adu ato mbolo li okpála inde adu akpata kpadji gba Ngámá-o, ma atsia adu agili nabhili uo. Ma azumu obhosi di ne olisi, ma atsia amba uo bhú tikpu. <sup>5</sup> Bhele kpála gba odimandø gba Ebhe di ne obhelesi okpála mbila ndjindji me ma ngapa e kukulu 'ngú. U aha belegu obalua muma ngubula me ma nu ne di pi ondaise ní inde bhú gudhu na Damasi. Ma anu oo me ma holo omabhuka inde oo, ma gbigbite uo ne gbindjili, amba ma mba uo bhú gudhu na Yelusalema ngubula me u mene uo sisiti.»

*Polo akpokpo maka ani adjí bua e lie ko*

*(Tsia bhú Kul. 9:1-19, 26:12-18.)*

<sup>6</sup> «Abhomu-o, ma adu lie li kpadji-e, masakpe de nakolo bhú gudhu na Damasi de tulukpe-e, kolo me-e, zi 'kpí na kpekpeke ayie abhúla, a ago asa ma ngbalina. <sup>7</sup> Ma agu 'i ma kuto má gbwae! Ma atsia adje eli bini inde apa muma me: «Saulo, Saulo, mu ngato mbolo li ma ngú ní?» <sup>8</sup> Abhomu-o, ma atsia agie me: «A ko mu da, Ngámá?» Ani atsia agie muma me: «A ko ma Yesu, kpála na kuti na Nadjaleta, inde mu ngato mbolo lie ko.» <sup>9</sup> Okpála inde adu bhú dabili bini ne ma-a, au zi 'kpí ango-o. Engú bini, u dje 'li kpála inde adu agama 'ngú muma-a de. <sup>10</sup> Abhomu-o, ma atsia ayi matá me: «Ngámá, a ayo la me ma mene pi?» Ngámá agie muma me: «Yie bhúla, nu bhú gudhu na Damasi. Oo, u apá pi mu ndu 'ngú hana inde li Ebhe

akunda me mu mene e ko.» <sup>11</sup> La-  
a, ma du au 'kpi ka kpeke zi 'kpi  
bhomu-o lie de-e, okpala inde adu  
bhu dabili bini ne ma-a, aholo  
'kpa ma, u atsia anu ne ma bhu  
gudhu na Damasi.

<sup>12</sup> Kpala bini adu nani oo, a adu  
'li ani me Anania. Ani adu akpe  
Ebhe, ani atsia adu di akpata lili  
gba ni-e ndjindji. Ndu omaYuda  
hana na gudhu na Damasi adu  
apa 'ngu gba ani-e ndjindji. <sup>13</sup> Ani  
ago natsia ma. Ani akolo lie  
de ma-a, ani atsia apa muma  
me: «Ndai ma Saulo, u mata 'kpi  
uul!» Bha li nedhinga bhomu-o,  
djila ma abhulu, ma atsia au ani.  
<sup>14</sup> Abhomu-o, ani atsia apa muma  
me: «Ebhe gba onguo ogbi ni abhu  
nani mu didili ngubula me mu  
mbila engu inde ani akunda e-  
o. Ani abhu mu ngubula me  
mu mbila Kpala inde ngbingbili-  
o, amba mu dje di 'li ani makpe.  
<sup>15</sup> Padha de, anga pi ani-e, mo odu  
akpokpo ongu gba ani bhende mo  
ou e, di ne bhende mo odje e pi  
ndu okpala hana. <sup>16</sup> Mbila inde-e,  
mu mata ngadjeke ni? Yie bhula,  
sia batisimo, mu yo Ebhe, amba  
ani 'e siti 'ngu gba mu ko.»

*Polo akpokpo maka li Ebhe  
atima ani lie agba ogandji okpala-  
o*

<sup>17</sup> Abhomu-o, ma agie lima bhu  
gudhu na Yelusalema. Ekpí bini,  
ma adu ayo Ebhe bhu 'ngbe 'ti  
Ebhe gba omaYuda, ma atsia au  
engu maka loto. <sup>18</sup> Ma au Ngama,  
ani atsia apa muma me: «Yaka!  
Koto bhu gudhu na Yelusalema  
ma gala, anga okpala na gudhu  
inde-e, u ziba engu gba ma inde  
mo opa e pi uo-o de.» <sup>19</sup> Abhomu-o,  
ma atsia apa me: «Ngama, u mbila  
hana me ma adu nako nanu bhu  
oti nadje lili gba Moidje, ma adu  
aholo okpala inde abhuka mu-o.  
Ma adu amba uo bhu tikpu, ma  
atsia adu di abhi uo ne fimbo.

<sup>20</sup> Nedhinga u adu abhelo Etieni,  
kpala nakpokpo Bada Ngali gba  
mu-o lie, ma adu di oo. Ma ziba  
okpala inde adu abhelo ani-o. Ma  
atsia adu alila obongo gba uo-  
o.» <sup>21</sup> Abhomu-o, Ngama atsia apa  
muma me: «Nunu, anga ma atima  
mu tsutsu agba ogandji okpala .»

*Polo apa me, ni ne kpala na  
gudhu na Loma*

<sup>22</sup> Bhiti okpala bhomu-o adu nga  
bha nadje ani akolo li engu inde  
ani apa e bhomu-o. Abhomu-o, u  
atsia aholo asusula me: «Yi bhele  
kpala bhomu-o mabhele! Ani ti  
da nandu pala doto de!» <sup>23</sup> U adu  
asusula kpekpeke. U adu ape  
obongo gba o, u atsia adu abala  
ndju doto ne abhula. <sup>24</sup> Abhomu-  
o, 'ngbe ngama gba osudha aha lili  
me u to Polo abhu 'ti gba osudha.  
Ani atsia apa me u bhi ani ne  
fimbo, amba ani pa ta 'ngu inde  
li okpala ngasusula lie me u mene  
ani sisiti-o. <sup>25</sup> Li u agbigbite ani  
lie ne ekpu ngubula nabhi ani ne  
fimbo-o, abhomu-o, ani atsia apa  
pi ngama gba osudha inde adu oo  
me: «A ayo bha ndju uu me, yi bhi  
ndili na kuti na Loma ne fimbo  
me, u nde kodho nga 'ngu gba ani-  
e di?»

<sup>26</sup> Li ngama bhomu-o adje engu  
li Polo ayi e lie, ani atsia anu  
abhaka 'ngbe ngama gba osudha-  
o. Ani atsia ayi ani me: «Mo  
omene pi, anga kpala bhomu-o,  
a ko ndili na kuti na Loma!»  
<sup>27</sup> 'Ngbe ngama-a ago abhaka Polo,  
ani atsia ayi ani me: «Pa nga  
muma, mu ne ndili na kuti na  
Loma na paká?» Polo atsia agie  
pi ani me: «Heni, a na paká.»  
<sup>28</sup> Abhomu-o, 'ngbe ngama-a atsia  
apa me: «Ma aha nani tia bhele  
ngubula me ma kolo kpala na kuti  
na Loma.» Polo atsia apa naae  
me: «Ngama-a, u azu ma kpala  
na kuti na Loma.» <sup>29</sup> Kolo ma gala  
me-e, okpala inde i di me bhi ani

ngubula me ani gama 'ngú-o, u atsia atsambala de ani. Abhomu-o, 'ngbé ngámá gba osudha-aholo adje tsulu, li ani ambila lie me ni aha líli ngani me u gbigbite ndili na kuti na Loma-o.

*Polo kala Libi okpála natsia 'kpí li 'ngú gba omaYuda*

<sup>30</sup> Abhomu-o, 'ngbé ngámá gba osudha-a adu akunda me, ni mbila kukulu ta 'ngú inde li omaYuda asungula Polo lie pi ongámási-o. Kaka-a, li ekpí aseke lie, ani aha líli me u bhuhulu Polo, di me ongbengbe odimandé gba Ebhe, di ne Libi okpála natsia 'kpí li 'ngú gba omaYuda pekèbhè bhúla o. Pipita-a, ani ago ne Polo, ani atsia a'o ani kala uo.

## 23

<sup>1</sup> Abhomu-o, Polo atsia Libi okpála natsia 'kpí li 'ngú gba omaYuda ne kpéke djila. Do ani de-e: «Ondaise ma, nakolo pi mbia inde-e, ma adhuku kala Ebhe ndjindji.» <sup>2</sup> Engú bini, bhele kpála gba odimandé Anania aha líli pi okpála inde adu de ani-e me u su 'bhè ani. <sup>3</sup> Abhomu-o, Polo atsia apa pi ani me: «Ebhe asú mu ngae, ngamu kpála inde maka pabu 'ti inde u ato embú lie! Mo odu oo ngú nakodho 'ngú gba ma-a maka li líli apa lie. Engú bini, mo ogumu líli anga mo opa me u su ma!» <sup>4</sup> Abhomu-o, okpála inde adu de Polo atsia apa pi Polo me: «Mu ngasobho bhele kpála gba odimandé gba Ebhe!» <sup>5</sup> Polo agie me: «Ondaise ma, ma mbila igini de me a ko bhele kpála gba odimandé gba Ebhe-e de. Padhá de, anga Bhuku gba Ebhe-e apa me: «Mo osóbho ngámá gba okpála na doto gba mu-o de.†»

<sup>6</sup> Li Polo ambila na nani lie me bhú ká okpála inde apo bhúla o

bhomu-o, okoko adu oSadukai, okoko adu omuFalisai-e, ani atsia asula bhú ká uo me: «Ondaise ma, ma ne muFalisai, ndili gba omuFalisai. I da me u nde nga'o 'ngú pí ma me-e, a ko anga ní ne 'to ní me okpála inde amu-o, azúku mazuku.» <sup>7</sup> Li ani apa 'ngú bhomu-o lie, omuFalisai ne oSadukai aholo natsi sunda o. Abhomu-o, okpála atsia agbo bhusu o bhisi. <sup>8</sup> (Padhá de, anga oSadukai ziba nani naao de me okpála azúku mazuku-o de. U atsia apa di nani matá me andjelu ade, bua di ade. Engú bini, omuFalisai atsia aziba nani naao ndu 'ngú bhomu-o hana.) <sup>9</sup> Abhomu-o, tolo atsia akolo naali. Omusuno na líli koko inde adu bhú ká omuFalisai-e ayie bhúlá, u atsia apa ne angu hana me: «Ya u siti 'ngú bhú kpála inde-e belegu de bini. A mana mugito me andjelu bini, i da di-e bua, agama 'ngú pi ani ngae!»

<sup>10</sup> Li okpála adu alo 'bhè lie sunda o naali-e, 'ngbé ngámá gba osudha-aholo adje tsulu me u adjí adolo Polo. Kaka-a, ani aha líli pi osudha-a me, u kè, u nu ha Polo bhú ká uo, amba u gie ani abhú 'ti gba osudha inde ngalila gudhu-o.

<sup>11</sup> Sukpe-e, Ngámá akoto li Polo, ani atsia apa pi ani me: «Atou! Padhá de, anga maka mo okpokpo 'ngú gba ma lie bhú gudhu na Yelusalema-a, a ayo bhadi me mu nu kpokpo bhú gudhu na Loma moko.»

*OmaYuda adje lio ngú nabhèle Polo*

<sup>12</sup> Li ekpí aseke lie, omaYuda adje lio pindji Polo, u atsia atu silika me o zú bha bini 'he, li o ndjí la bhadi 'he bhe nandji mandji-e me, o nde abhèle bha bini ani kalanu. <sup>13</sup> Okpála inde

nani adje lio bhomu-o ane nani ndjikpa badha mane. <sup>14</sup> U anu abhaka ongbenge odimandø di ne obhelesi okpála, u atsia apa pi uo me: «Ya atu silika me ya azu bha 'he me ya nde abhele Polo kalanu. <sup>15</sup> Mbia inde-e, a ayo me ngayi ne Libi okpála natsia 'kpí li 'ngú gba omaYuda-a, yi yo ka 'ngbé ngámá gba osudha-a me, ani go ne Polo kala yi si. Yi mene mugito me yi akunda atsia 'kpí li engú gba ani-e ndjindji. La pi ya-a, ya bedhe ngú nabhele ani me ani nde kolo nga de.»

<sup>16</sup> Engú bini, ndili na bhobhoko gba ndai Polo na øle-o adje engú angoo. Ani anu, ani ali bhú 'ti gba osudha inde ngalila gudhu-o. Ani atsia apa pi Polo. <sup>17</sup> Abhomu-o, Polo a'i suka ongámási gba osudha-o. Do ani pi ani me: «Nu ne makombi inde-e pi 'ngbé ngámá gba osudha-o. Padhá de, anga ani ne engú napapa pi ani.» <sup>18</sup> Ngámá gba osudha-a aha ani, ani anu ne ani pi 'ngbé ngámá gba osudha-o. Ani atsia apa me: «Bhulu 'kpú Polo a'i ma, ani atsia ayo ka ma me, ma go ne makombi inde-e pi mu. Padhá de, anga ani ne engú napapa pi mu.»

<sup>19</sup> Abhomu-o, 'ngbé ngámá gba osudha-a aha 'kpa makombi-o. Ani anu ne ani ne li ngongo, ani atsia ayi ani me: «Mo okunda napa muma mangua 'ngú dho?» <sup>20</sup> Ani atsia apa me: «OmaYuda adje lio me, o yo ka mu me ha Polo, amba mu go mambi ne ani kala Libi okpála natsia 'kpí li 'ngú gba omaYuda-o. U améne mugito me u ngakunda atsia 'kpí li 'ngú gba ani-e ndjindji. <sup>21</sup> Engú bini, mo obhúka uo de. Padhá de, anga okpála nane ndjikpa badha bhú ká uo, adje lio ngú namene ani sisiti. U atu silika me o zú bha bini 'he, li o ndji la bhadi 'he bhe nandji mandji-e me, o nde abhele

bha bini Polo kalanu. Mbia inde-e, uo bedhe. U ngadjeke bha maka mo opá lie ko.» <sup>22</sup> 'Ngbé ngámá gba osudha-a apa pi makombi angoo me: «Mo opá pi kpála bini de me, ni apa engú inde-e muma apa-a de.» Pipita-a, 'ngbé ngámá gba osudha-a atsia agie ani sidi.

*U atima Polo bhú gudhu na Sedjale*

<sup>23</sup> Pipita-a, 'ngbé ngámá gba osudha-a a'i ongámási na sudha gba e-e bhisi. Ani atsia apa pi uo me: «Yi po bhúla osudha kámá bhisi, di ne obhende ndjikpa mananika inde adhudhuku pí 'ngbu opunda, amba yi po la di bhúla obhende na mandambi-e kámá bhisi. Ndu yi hana yi du bedhe ngú nanu bhú gudhu na Sedjale tagolo bhú saa na odukupabini. <sup>24</sup> Yi leke di punda ngú nabi Polo. Yi mene me ani kolo li bili li ngámá Felikisi nde lie ndjindji me ehe bini nde mene ani de.»

<sup>25</sup> Abhomu-o, ani atsia aye balua me:

<sup>26</sup> «Kolode Lisiasi apa me, ni yi Felikisi, ngámá na asasaua, mayi. <sup>27</sup> OmaYuda aholo nako kpála inde ma atima e pi mu inde-e ngao. U adu akunda nabhele ani. La-a, ma adje lie me a ko ndili na kuti na Loma-a, ngama ne osudha gba ma-a, ya atsia agbulu ani ka uo. <sup>28</sup> Maka ma adu akunda nambila ta 'ngú inde u aholo ani ngú e lie, ma atsia anu ne ani kala Libi okpála natsia 'kpí li 'ngú gba uo-o. <sup>29</sup> Ma au me, u aholo ani pindji ongú inde atsia líli gba uo-o. La-a, ma u ani ne engú bini inde u ti da nabhele ani, di ne bhende u ti da naholo ani ka e de. <sup>30</sup> Li u apa muma lie me u adu agili nabhele ani-e, ma atsia atima ani pi mu kolo má gala! Ma atsia apa di pi okpála inde a'o 'ngú pí ani-e me,

u nu kpokpo 'ngú gba ani-e pi m̄.»

<sup>31</sup> Abhom̄-o, osudha-a atsia amene maka li 'ngbé ngámá gba uo apa pi uo lie ko. U aha Polo, u atsia an̄ bha ne ani sukpe bhom̄ bhú gudhu na Atipatilisí. <sup>32</sup> Li ekpí aseke lie, osudha bhende adhuku ne 'dhu o agie lio li bili li osudha nalila gudhu-o adudu lie ko. U atsia a'o obhende adu adhuku pí 'ngbu opunda-a me, u nu ne Polo. <sup>33</sup> U akolo lie bhú gudhu na Sedjale-e, osudha-a aha balua pi ngámá na ndu doto ango-o. U atsia a'o di Polo sa 'kpa ani. <sup>34</sup> Abhom̄-o, ngámá-a atanga balua-o. Ani atsia ayi me Polo ne kpála na ndu doto bhedho. Ani adje la lie me a ko kpála na ndu doto na Silisia-a, <sup>35</sup> ani atsia apa pi ani me: «Ma adjé engú gba m̄-o me okpála inde yi nde ne o bhú 'ngú-o nde akolo.» Abhom̄-o, ani atsia aha líli me u lila Polo bhú eti gba 'ngbé ngámá Elode. \*

## 24

*OmaYuda agbe Polo kala ngámá Felikisi*

<sup>1</sup> Pita ekpí bhuluvue, bhele kpála gba odimandé Anania akolo bhú gudhu na Sedjale, bhú dabili bini ne obhelesi okpála koko di ne avuka bini inde adu 'li e me Teletulusi. U atsia ato siti 'ngú ne 'li Polo pi Felikisi, ngámá na ndu doto ango-o. <sup>2</sup> U a'i Polo. Abhom̄-o, Teletulusi atsia aholo akpokpo li ani me: «Ngámá na asasaua, Felikisi, mo oto guo 'ngú bhú ndu doto inde-e ngam̄. M̄ di aleke ongú bhelé bhú doto gba ya ne imbilangu gba m̄-o. <sup>3</sup> Ndu 'kpí hana di ne ndu bili hana, ngámá na asasaua, Felikisi, ya ngagie heni ngú ndu 'ngú bhom̄-o hana. <sup>4</sup> Engú bini, ma kunda nabhelo

nedhinga gba m̄-o de. Kaka-a, ma ayo ka m̄ me dje nga mbo ya bedi ne bádha bua.

<sup>5</sup> Ya au me kpála inde-e, a ko kpála na mugwe. Ani ngato kpéke 'ndji bhú 'ndji ndu omaYuda hana píla doto libhomu. A ko la di ngámá na Dadjua bini na Ebhe gba okpála na kuti na Nadjaleta. <sup>6</sup> Ani ale belegu nasiti 'ngbé 'ti Ebhe gba omaYuda-o. Abhom̄-o, ya atsia aholo ani. [Ya akunda nako me kodho 'ngú gba ani-e maka li líli gba ya apa lie-o. <sup>7</sup> Engú bini, Lisiasi, 'ngbé ngámá gba osudha-a, atsia ayoko. Ani atsia agbulu ani ka ya. <sup>8</sup> Pipita-a, ani atsia aha líli pi ya me ya go ne ani kala m̄.] I du me m̄ nde ayi ani ngam̄ makpe-e, m̄ tsia mbíla me ndu 'ngú hana inde ya apa e li ani-e, a ko kukulu 'ngú.» <sup>9</sup> OmaYuda atsia aziba di ongú ango-o. Do uo me: «A ko kukulu 'ngú.»

*Polo akpokpo 'ngú gba e kala ngámá Felikisi*

<sup>10</sup> Abhom̄-o, ngámá Felikisi amene 'kpa e pi Polo me ani kpokpo 'ngú gba e-o. Polo atsia apa me: «Ma mbíla ndjindji me, ngubula kalanga bhelé-e, m̄ ngakodho 'ngú gba ya okpála na kuti inde-e ngbingbili. Kaka-a, ma ne djali naali ngú nakpokpo 'ngú gba ma-a pi m̄. <sup>11</sup> M̄ ti da nambíla bha ngam̄ makpe me ane nga ekpí ndjikpa ne ká bhisi de maka ma an̄ nako lie bhú gudhu na Yelusalema ngú nadhogè Ebhe-o. <sup>12</sup> Kpála bini bhaka ma namene kpekebho ne kpála bini na 'ngbé 'ti Ebhe gba omaYuda-a de. Kpála bini bhaka la di ma nato kpéke 'ndji bhú 'ndji okpála bhú 'ti nadje líli gba Moidje , di ne li kpadji de.

\* 23:35 23:35 Eti gba 'ngbé ngámá Elode: A adu nani bhú Sedjale. Elode Ngbéngbé ayiki nani ngae. Ongámási na Loma atsia adji nani dabili nadu ka o tété.

<sup>13</sup> Okpála ago ne ma kala mu inde-e ne engú bini ade inde i ti da nasuno me engú inde u ngapa e li ma inde-e, a ko kukulú 'ngú. <sup>14</sup> Ma aziba kala mu si me ma ngakpata kpadji na mbia inde ngauo, u ngau e me a sisiti-o. La-a, ma ngadhögø Ebhe gba onguo ogbi ní. Ma la di ngabhuka ndu 'ngú inde u aye e bhú obhuku na líli di ne bhe gba opolofeta-a hana. <sup>15</sup> Ma ne nabhuka bhú Ebhe bhadi maka uo me, okpála na ngbingbili di ne obhende ngbingbili ade-e azúku mazuku. <sup>16</sup> Kaka-a, ma ngamene ndu 'kpí hana ne kpéke me, bua ma du ndjindji kala Ebhe, di ne kala okpála.

<sup>17</sup> Ma du lie de bhú gudhu na Yelusalema ngubula kalanga bhelé-e, ma atsia agie lima oo ngú nateteke obhulu ndibhili na doto gba ma-a ne tia, di ne naha makiso gba ma-a pi Ebhe. <sup>18</sup> Kaka-a, u abhaka ma bhú 'ngbé 'ti Ebhe gba omaYuda me, ma nde avulu lima ngú nakolo bubu kala Ebhe avulu. Ma bha ká okpála de. Ma to la di kpéke 'ndji bhú 'ndji okpála de. <sup>19</sup> OmaYuda koko bhú ká obhende ayie bhú ndu doto na Adjia, adu oo. A ayo nako me u gbe ma kala mu ngao, i du me u nde ne engú li pápá gba ma-o. <sup>20</sup> I du mo-o de-e, a ayo me okpála inde si-e suno siti 'ngú inde u au ma ne e, nedhinga inde u agbe nako ma lie kala Libi okpála natsia 'kpí li 'ngú gba omaYuda-o .

<sup>21</sup> Padhá de, anga ma amene bha koli 'he bini. Ma apa kpekpeke kala uo me: «Yi agbe nakí ma kala yi ngú nakpokpo 'ngú anga ma abhuka me okpála inde amu-o, azúku mazuku!» <sup>22</sup> La-a, pi ngámá Felikisi-e, ani adu ambila kpadji gba Yesu-o ndjindji. Abhomu-o, ani agie engú ang-o me ni akódho sisi. Ani atsia apa pi uo me: «Ma akódho

'ngú gba yi-e, li nedhinga li 'ngbé ngámá gba osudha Lisiasi agó lie ko.» <sup>23</sup> Ani atsia aha líli pi ngámá gba osudha-a me u lila Polo, kpála na 'kpú-o, malila. Engú la bini, u 'o ani me ani du mbo bhú ngú e. U ayóko di omaha ani ngú nateteke ani de.

*U agbe matá Polo kala ngámá Felikisi ne Dulusile*

<sup>24</sup> Pita mbo ekpí bedi-e, ngámá Felikisi ago ne wala e Dulusile. Ølø ang-o adu maYuda. Ngámá Felikisi atima okpála me u nu 'i Polo. Abhomu-o, ani atsia adje engú li Polo akpokpo e pindji nabhuka Yesu Kilisito-o . <sup>25</sup> Pipita-a, Polo aholo akpokpo lele maka a ayo lie nadu ngbingbili , ne nane gumu kute di ne me ekpí koko akólo makolo, ekpí inde li Ebhe akódho 'ngú gba okpála lie ko. Abhomu-o, ngámá Felikisi aholo adje tsulu. Ani atsia apa me: «Mbia inde-e, mu ti da nanu. I du me ma nde asia nedhinga-a, ma tsia 'i matá mu.» <sup>26</sup> Ani adu di ne 'to e me ni asia tia ka Polo. Kaka-a, ani adu a'i Polo piko ngú nakpokpo 'ngú ne ani.

<sup>27</sup> Pita kalanga bhisi-e, Polosiusi Fesitusi akolo ngámá bhú da ngámá Felikisi. Engú bini, ngámá Felikisi a'o ká Polo bhú tikpu, anga ani adu amene me omaYuda u ni ndjindji.

## 25

*Polo ayo me 'ngbé ngámá Kaisala kodho 'ngú gba ni-e ngae*

<sup>1</sup> Li ngámá Fesitusi akolo lie bhú ndu doto ang-o, pita 'kpí bata-a, ani ayie bhú gudhu na Sedjale, ani atsia anu bhú gudhu na Yelusalema. <sup>2</sup> Ongbengbe odimandø , di ne ongámási gba omaYuda-a , ago kala ani. U atsia ato siti 'ngú ne 'li Polo pi ani. U akikiliki lio pi ani me, <sup>3</sup> ani ziba

pí o me o nū ne Polo bhú gúdhū na Yelusalema. U adje lío me, lí o kolo lí kpadjí-e, o de bhelè aní. <sup>4</sup> Engú bini, ngámá Fesitusi agie pí uo me: «Bili na tikpū gba Polo-o, a ko Sedjale. La-a, ngama makpe-e, ma adjí bhadi oo mbia inde.» <sup>5</sup> Aní atsia apa matá me: «A ayo me ongbengbe okpála gba yi-e nū bhú dabili bini ne ma. Í dū me kpála bhomū-o nde amene siti 'ngú-o, u de kpokpo oo ko.»

<sup>6</sup> Ngámá Fesitusi amene agba uo ekpí nayie bhú madjina masakpe de nakolo bhú ndjikpa. Pípita-a, aní atsia agie lie bhú gúdhū na Sedjale. Lí ekpí aseke lie, aní atsia anū lí bili nakodho 'ngú-o. Abhomū-o, aní atsia aha lílí me u go ne Polo. <sup>7</sup> Lí Polo ago lie, omaYuda inde ayie bhú gúdhū na Yelusalema-a, asa lío dengo aní. Abhomū-o, u aholo apa osisiti 'ngú na ngbengbengbe lí aní bhelé bhelé. La-a, u dū ambila nakpokpo ta ongú angoo de, anga a adū eu. <sup>8</sup> Abhomū-o, Polo atsia aholo nakpokpo 'ngú gba e me: «Ma mene siti 'ngú bini de. Ma gumū lílí gba omaYuda-a de. Ma siti 'ngbé 'ti Ebhe gba omaYuda-a de. Ma mene la di siti 'ngú lí 'ngbé ngámá Kaisala de.» <sup>9</sup> Ngámá Fesitusi adū amene me omaYuda u ní ndjindji. Kaka-a, aní atsia ayi Polo me: «Mo kunda nanū bhú gúdhū na Yelusalema, ngubula me u kodho 'ngú gba mū-o kala ma oo?»

<sup>10</sup> Engú bini, Polo agie me: «Ma alū e bhú ndende gba 'ngbé ngámá Kaisala-o. A ayo me u kodho 'ngú gba ma-a bha si. Ma mene siti 'ngú lí omaYuda belegū de bini. Ngamū makpe-e, mo ombila 'ngú tété ndjindji. <sup>11</sup> Í dū me ma nde atū 'ngú, í dū di me ma nde amene siti 'ngú inde ayo me u bhelè ma ka e-e, ma yala nakpi de. Engú bini, í dū la me, kukulū 'ngú

nde bhú ká ongú inde u ngapa e lí ma ade-e, kpála bini tí da natse 'kpa lí ma pí uo de. Ma ayo me 'ngbé ngámá Kaisala kodho bha 'ngú gba ma-a ngae.» <sup>12</sup> Abhomū-o, pita lí ngámá Fesitusi agama 'ngú ne obhelesi okpála gba e lie, aní atsia apa me: «Mo oyo lie me 'ngbé ngámá Kaisala kodho bha 'ngú gba mū-o ngae, mo onú agba aní.»

*Polo akpokpo 'ngú gba e kala 'ngbé ngámá Agilipa*

<sup>13</sup> Pita mbo oekpí, 'ngbé ngámá Agilipa ne ndai e na øelø Belenise, akolo bhú gúdhū na Sedjale. U anū natsia ngámá Fesitusi. <sup>14</sup> U asi oo mbo ekpí bhelé. Abhomū-o, ngámá Fesitusi atsia akpokpo 'ngú gba Polo pí 'ngbé ngámá Agilipa me: «Kpála bini bhú tikpū si, ngámá Felikisi a'o nani ka aní ngae. <sup>15</sup> Ma anū nako lie bhú gúdhū na Yelusalema-a, ongbengbe odimandø gba Ebhe di ne obhelesi okpála gba omaYuda-a, ato siti 'ngú ne 'lí aní mūma. U atsia apa mūma me, ma 'o 'ngú pí aní. <sup>16</sup> Ma agie pí uo me: «Agba ya okpála na Loma-a, kala me u 'o 'ngú pí kpála-a, ayo me u dūlu ngaiza kala ongámási ne okpála inde agbe aní kala uo-o bhú dabili bini. Aní kpokpo 'ngú gba e ngú nagbegbe lie bhú 'ngú angoo ko.»

<sup>17</sup> Ya atsia ago sí ne uo bhú dabili bini. Ma djeke de, lí ekpí aseke lie, ma aha lílí me u go ne kpála angoo kala ma lí bili nakodho 'ngú-o. <sup>18</sup> Okpála inde ato siti 'ngú lí aní pí ongámási-e ago. Engú bini, ma u siti 'ngú inde u asungula aní pí ongámási ngú e maka bhende ma adū abhundja e de. <sup>19</sup> La-a, u adū amene kpekebhø pindji 'ngú na Ebhe gba o di ne pindji 'ngú gba kpála bini inde 'lí e me Yesu. Padhá de, anga



kpála ango-o akpi, engú bini, Polo na ngapa me aní ɛɛ.

<sup>20</sup> Muma-a, ma mbila 'ngú ma akódho e li ngua 'ngú bhomu-o de. Kaka-a, ma ayi Polo atigala aní ziba nanu bhú gudhu na Yelusalema, amba u kodho 'ngú gba ani-e oo. <sup>21</sup> Engú bini, Polo ayo me 'ngbé ngámá na gudhu na Loma kodho bha engú gba ni-e ngae. Abhomu-o, ma atsia aha líli me u lila aní bhú tikpu akolo li 'kpí ma átíma aní lie pí 'ngbé ngámá Kaisala ko.» <sup>22</sup> 'Ngbé ngámá Agilipa atsia apa pí ngámá Fesitusi me: «Ngama di-e, ma akunda nga di me ma dje kpála ango-o.» Ngámá Fesitusi atsia agie pí ani me: «Mo odjé ani mambi.»

<sup>23</sup> Abhomu-o, li ekpí aseke lie, 'ngbé ngámá Agilipa ne Belenise ago bhú asasaua ne bhiti okpála. U ali bhú 'ti nakodho 'ngú bhú dabili bini ne ongámási gba osudha di ne ongbengbe okpála na gudhu-o. Ngámá Fesitusi atsia aha líli me u go ne Polo. <sup>24</sup> Pipita-a, ngámá Fesitusi atsia apa me: «'Ngbé ngámá Agilipa di ne ndu yi okpála hana inde bhú dabili bini ne ya si-e, yi tsia nga kpála inde. Ndu omaYuda hana ago akpokpo 'ngú gba ani-e muma. U abhaka ma bhú gudhu na Yelusalema, u atsia ago belegu ei ne nasusula me: «A ayo me u bhelø ani!»

<sup>25</sup> Muma-a, ma u siti 'ngú inde ayo me u bhelø ani ka e de. La-a, ani ayo lie me 'ngbé ngámá na Loma kodho bha 'ngú gba ni-e ngae, ma atsia aziba me ma tima ani pí ani. <sup>26</sup> Ma mbila engú inde ma ti da naye e pí 'ngbé ngámá li engú gba ani-e de. Kaka-a, ma agbe ani kala yi, la ndju makpe kala mu, 'ngbé ngámá Agilipa. Yi ani, amba ma sia engú inde ma ayé e ko. <sup>27</sup> Padhá de, anga a ko muma engú na ngingi me,

ma tima kpála na tikpu pí 'ngbé ngámá Kaisala me, ma nde suno ta 'ngú inde u aholo ani ngú e pí ani de ko.»

## 26

*Polo akpokpo 'ngú gba e kala 'ngbé ngámá Agilipa*

<sup>1</sup> 'Ngbé ngámá Agilipa atsia apa pí Polo me: «Mu ti da nakpokpo 'ngú gba mu-o.» Abhomu-o, Polo a'e 'kpa e, ani atsia akpokpo 'ngú gba e me: <sup>2</sup> «'Ngbé ngámá Agilipa, naki-e, ma ne djali naali ngubula nakpokpo 'ngú gba ma kala mu li ndu 'ngú hana inde li omaYuda apa e li ma ko. <sup>3</sup> Padhá de, anga mu mbila dasundu di ne kpekebho gba omaYuda hana. Kaka-a, ma ayo ka mu me, dje nga mbo ma ne 'ndjá bua.

<sup>4</sup> Ndu omaYuda hana mbila mukobho gba ma-a ndjindji nayie li nedhinga ma adu lie makombi-o. U mbila maka ma adu akobho lie bhú ká okpála na doto gba ma di ne bhú gudhu na Yelusalema ndjindji. <sup>5</sup> U ambila nani ma didili. U ti da napapa ngao, i du me u nde akunda-o. Ma du nani ne suka omuFalisi inde adu alila líli nadhogø Ebhe gba ní-e ndjindji-o. <sup>6</sup> La mbia inde-e, u agbe ma li bili nakodho 'ngú-o anga ma ne 'to ma 'to engú inde li Ebhe apa nani kalanu me ni améne e pí onguo ogbi ní-o. <sup>7</sup> Okpála na piga ndjikpa ne ká bhisí gba ní-e, nga'o 'to o me engú ango-o améne lie mamene. Ka 'ngú ango-o, u ngamene kulu kpekpeke pí Ebhe, sukpe ne ngbikpi. 'Ngbé ngámá Agilipa, ngama di-e, ma bhadi ngabhuka moko. Kaka-a, omaYuda atsia ato siti 'ngú ne 'li ma pí ongámási. <sup>8</sup> Ka ní ngayi omaYuda, yi ti da nabhuka lie de me, Ebhe azúku okpála inde amu-o mazuku-o?

<sup>9</sup> Ngama makpe, ma adu abhundja nani me, ma mene ne kpeke me okpala abhuka Yesu, kpala na kuti Nadjaleta de. <sup>10</sup> A ko engu inde ma amene di-e bhú gudhu na Yelusalema ko. Ongbengbe odimandə aha kpadji mama ngao. Ma amba omabhuka bhelé bhú tikpu. U adu akodho 'ngu gba uo lie me u bhili uo, ma atsia adu aziziba. <sup>11</sup> Ma adu apu piko bhú oti nadjé lili gba Moidje-o. Ma adu amene uo sisiti ngubula me u sobho Yesu. Bhú nabi 'gu gba ma-a, ma adu belegu nakpata uo bhú ogudhu gba ogandji okpala .»

*Polo akpokpo maka ani adji bua e lie-o*

<sup>12</sup> Kaka-a, ekpi bini ma adu anu bhú gudhu na Damasi. Ongbengbe odimandə aha angu mama, u atsia atima ma oo. <sup>13</sup> Li kpadji-e, bhú nedhinga na tulukpe-e, 'ngbé ngámá Agilipa, ma au zi 'kpi ayie abhulá. Zi 'kpi ango-o adu kpekpeke naali ane zi ela mane. Zi 'kpi ango-o aholo aziga ma ngbalina bhú dabili bini ne okpala inde ya adu ne o ko. <sup>14</sup> Ndu ya hana, ya atuko kuto má dhululu! Abhomu-o, ma atsia adje eli bini apa mama bhú eli gba omaYuda me: «Saulo, Saulo, mu ngato mbolo li ma ka ni? Mu ngaha likabhu pi mu makpe maka enu inde atú lie li ndula gba mulila gba e-o.» <sup>15</sup> Ma atsia ayi me: «A ko mu da, Ngámá?» Abhomu-o, Ngámá atsia agie mama me: «Ngama-a, ma ne Yesu inde mu ngato mbolo lie ko.

<sup>16</sup> Engu bini, yie bhulá, amba mu lu malu. Padhá de, anga ma akoto li mu ngubula me mu kolo kpala na kulu gba ma-o. Mo okpokpo pi okpala me mo ou ma naki. Mo okpokpo di matá pi okpala ndu 'ngu hana inde ma

asuno e pi mu sidi ko. <sup>17</sup> Ma alila mu ka omaYuda di ne ogandji okpala inde ma atima mu agba o-o. <sup>18</sup> Mo obhulu djila uo, u ze bhú biti, u tsia li li zi 'kpi. U du matá sa lili gba Satana de. Engu bini, u adjí ibili lio pi Ebhe. I du me u nde abhuka ma-a, u tsia sia nambu li siti 'ngu gba o-o. U tsia du la di bhú dabili bini ne okpala na bububu gba Ebhe-o.»

*Polo akpokpo 'ngu pindji engu inde ani amene e-o*

<sup>19</sup> «Kaka-a, 'ngbé ngámá Agilipa, nayie li nedhinga bhomu-o, ma yala titima na engu ma au e inde ayie ka Ebhe-e de. <sup>20</sup> Engu bini, ma akpokpo ngaiza pi okpala na gudhu na Damasi, ne okpala na gudhu na Yelusalema, ne okpala na ndu doto na Yudaya libhomu, la di ne pi ndu okpala hana na gandjigandji. Ma akpokpo pi uo me: «Yi dji bua yi, amba yi gie liyi li pápá gba Ebhe.» La matá di me: «Yi mene badha kulu inde asuno me yi adji bua yi kukulu.» <sup>21</sup> Ka 'ngu ango-o, omaYuda aholo ma bhú 'ngbé 'ti Ebhe gba omaYuda, u di me bhele ma. <sup>22</sup> Engu bini, Ebhe alila ma nakolo pi naki. Padhá de, anga ma ngakpokpo engu gba Yesu-o pi ndu okpala hana, pi ongisi di ne pi obhelesi okpala. Ma pa 'ngu koko de, bha bini bhende li opolofeta di ne Moidje apa nani e me akolo makolo-o. <sup>23</sup> U apa nani me Masiya azu likabhu, ani tsia du kpala na bini inde azuku bhú ka okpala inde amu-o. Ani akpokpo pi ndu okpala na piga gba ni-e hana di ne pi ogandji okpala ngali na zi 'kpi na mukobho.»

*Eli gba Polo ale nagbele bua 'ngbé ngámá Agilipa*

<sup>24</sup> Li nedhinga li Polo adu akpokpo 'ngu gba e lie, ngámá Fesitisi atsia asula me: «Polo, mu

ne bhulá pele! Baláa mo omene e naali-e ato bhú djila ma pele!»

<sup>25</sup> Abhomu-o, Polo atsia agie pi ani me: «Ngámá Fesitusi, ma ne bhulá pele ade. Engú inde ma ngapa e, a ko 'ngú na kukulá di na imbilangu. <sup>26</sup> 'Ngbé ngámá Agilipa mbila ndu 'ngú bhomu-o hana ndjindji. Kaka-a, ma ngakpokpokpo pi ani ne tsulu ade. Ma aziba me ani mbu li susuka bini de. Padhá de, anga ndu 'ngú bhomu-o hana mene lie bhú pepe de. <sup>27</sup> 'Ngbé ngámá Agilipa, mo obhuka engú inde li opolofeta apa e uu? Ma ambila me mo obhuka!»

<sup>28</sup> Abhomu-o, 'ngbé ngámá Agilipa ayi Polo me: «Mo obhundja naamu me ni ti da nadji ma makilisito bhú nedhinga bedi mo-o?»

<sup>29</sup> Polo atsia agie me: «Belegu i du ngabula nedhinga bedi, belegu i du di ngabula nedhinga bhelé-e, ma ngayo Ebhe bha ngabula ma kpi ma kpi ade. Engú bini, ma ngayo Ebhe ngubula ndu yi okpála hana inde ngadje ma li 'kpí na nakí. Ma ngayo Ebhe ngú yi me, yi kolo di maka ma nde lie, naneke bha bini ogbindjili inde bhú 'kpa ma inde.»

<sup>30</sup> Abhomu-o, 'ngbé ngámá Agilipa, ne ngámá Fesitusi, ne Belenise di ne ndu okpála hana inde adu bhú dabili bini ne uo-o, ayie bhúlá. <sup>31</sup> U agbe lio ne li ngongo, u atsia akpokpo sunda o me: «Kpála inde-e mene siti 'ngú bini de inde ayo me, u to ani bhú tikpu di me u bhelø ani ka e-o.» <sup>32</sup> 'Ngbé ngámá Agilipa apa pi ngámá Fesitusi me: «Í dú me kpála inde-e yó nako de me 'ngbé ngámá Kaisala kodho bha 'ngú gba ni-e ngae de-e, ma de agbe ani bhú tikpu agbe.»

## 27

*U atima Polo bhú gudhu na Loma*

<sup>1</sup> Li u apa lie me ya nu bhú doto na Itali bhú 'ngbé zabu-o, u atsia aha Polo di ne okpála koko na tikpu-o pi ngámá bini gba osudha. A adu 'li ani me Djuliusi. Aní adu ngámá pí 'ndji libi osudha inde u adu a'i o me «Osudha gba 'ngbé ngámá Kaisala-o.» <sup>2</sup> Ya aha 'ngbé zabu na gudhu na Adalamite. 'Ngbé zabu ango-o adu anu li pápá li obili li ozabu alulu lie bhú ndu doto na Adjia-o. Abhomu-o, ya atsia agbida. Kpála bini na gudhu na Tesalonike, bhú ndu doto na Makedonia, anu bhú dabili bini ne ya. A adu 'li ani me Alisitaluka.

<sup>3</sup> Li ekpí aseke lie, ya akolo bhú gudhu na Sidona. Djuliusi adu ne bádha bua li pápá gba Polo. Abhomu-o, ani atsia aha kpadji pi Polo me ani nu agba obi e, amba u teteke ani ne oehe inde ani nde ne gamu e-o. <sup>4</sup> Ya yie lie oo, ya apu lingo kpemø na Sipele, anga anvi adu akunda nagie ya ne sidi. <sup>5</sup> Ya agulu 'ngbé 'ngu inde lingo ndu doto na Silisia di ne Pamifilia ko. Abhomu-o, ya atsia akolo bhú gudhu na Mila bhú ndu doto na Lisia. <sup>6</sup> Oo, ngámá gba osudha-a abhaka 'ngbé zabu bini na gudhu na Alekidjandili me a nde adji bhú doto na Itali, ani atsia abu ya bhúbhú.

<sup>7</sup> 'Ngbé zabu-o adu adhuku bhúbhuku naali. Kaka-a, ya amene 'kpí bhelé, ya atsia adje likabhu naali ngubula nakolo lingo gudhu na Sinide. La ya ale lie nanu li pápá bhomu-o pima ka anvi-e, ya atsia apu lingo doto na Salamone inde ali ne abhú 'ngu bhú kpemø na Kelete ne asage-o. <sup>8</sup> Ya adhuku má tili tili lingo kpemø-o, ya atsia akolo li bili inde u a'i e me «Babadha ngo 'ge», masikpe de gudhu na Ladje.

<sup>9</sup> Abhomu-o, da nadhuku bhú 'ngbé zabu-o atsia akolo sisiti, masikpe de namu ka okpála.

Padhá de, anga nedhinga na anokomía natse 'zu na epe na odukupabini-e adú me a nde ane. Kaka-a, Polo atsia apa pí uo me: <sup>10</sup> «Ondaise ma, ma ngau me enú inde-e adú sisiti. 'Ngbé zabu ne oehe inde bhúbhú-o asíti masiti, abana nganí makpe-e, ní akólo masikpe de namu.»

<sup>11</sup> Engú bini, ngámá gba osudha adu aziba naae naali mabhundja gba kpála inde adu adjele 'ngbé zabu-o, di ne bhe gba bhulu 'ngbé zabu-o. Ani tsia ziba bhe gba Polo-o de. <sup>12</sup> Matá di-e, kuti ango-o ti ne nabhue bhúbhú bhú nedhinga na zini de. Abhomu-o, masikpe de ndu okpála hana inde adu bhú 'ngbé zabu-o atsia apa me o yie oo mayie. U adu akunda di me, i du me o nde ne ngasa-a, o de kolo bhú gudhu na Fenikisi. A ko suka gudhu na ngo 'ngu na kpomø na Kelete. A ngatsia 'kpí ne li pápá na sunda yoyoko ne akati, di ne sunda abebe ne akati. U adu akunda me o kolo oo ngubula me nedhinga na zini-e kodho 'kpí me o nde oo ko.

*Anvi na kpekpeke ape pí 'ngu*

<sup>13</sup> Abhomu-o, anví na bhúbhuku aholo nape nayie ne li pápá na yoyoko. U atsia aziba me mabhundja gba o-o akódho 'kpí ndjindji. U agbe kalase inde u agbite e li 'kpú ngú nalu ka 'ngbé zabu-o bhú 'ngu, u atsia aholo akpangba ngo kpomø na Kelete. <sup>14</sup> Kolo pita nedhinga bedi-e, anví na kpekpeke inde u a'i e me «Elakele», ayie bhú kpomø, atsia aholo nape. <sup>15</sup> Anvi ango-o aholo atumba 'ngbé zabu-o. Da napa me 'ngbé zabu-o lu kakala-a adu kpekpeke. Abhomu-o, ya atsia a'o me 'ngbé zabu-o nu ibili bha ne ya li pápá inde li anví adu atumba ya lie ko.

<sup>16</sup> Ya akolo lingo mboye kpomø u a'i e me Kauda inde alila mbo

ya bedi ka anví-o. Abhomu-o, ya atsia amene ne kpéke ngú nagbili mboye kókó-o ne bhúlá. <sup>17</sup> U aha, u ato bhú 'ngbé zabu-o. Pipita-a, u agbigbite ngo 'ngbé zabu-o hana ne ekpú ngú nalilila. U adu la lie ne tsulu me 'ngbé zabu anu atu lie li sike, i tsia bála o lingo doto na Libi de-e, u a'e bongo inde pí 'ngbu 'ngbé zabu-o, u atsia a'o me anví du ibili adyudyo o ngae. <sup>18</sup> Li ekpí aseke lie, anví adu bha adyiki 'ngbé zabu-o ne ya kpekpeke. Kaka-a, u atsia aholo apandja oehe inde adu bhúbhú-o, ababala bhú 'ngu. <sup>19</sup> Bhú 'kpí na bata-a, okpála na kulu ngao makpe-e, u abha oehe inde nadjele 'ngbé zabu-o, u atsia abala bhú 'ngu. <sup>20</sup> Sunda 'kpí bhelé, ya u ela de. Ya u di oikupala de. Anvi adu bha nape kpekpeke. Ya du matá ne 'to ya de me ya akóbho makobho-o de.

<sup>21</sup> Okpála inde adu bhú 'ngbé zabu-o zu 'he de ngubula 'kpí bhelé. Abhomu-o, Polo ayie bhúlá, aní alu bhú ká uo. Aní atsia apa me: «Ondaise ma, i dú nako me yi djé ma uu me ní ayie bhú kpomø na Kelete de-e, ní de sia ngua likabhu inde-e de. Oehe-e de siti la di-i de. <sup>22</sup> La mbia inde-e, yi sia kpéke bua. Padhá de, anga suka yi bini kpí-i de, engú bini, asíti bha bini ne 'ngbé zabu-o. <sup>23</sup> Sukpe na naki-e, Ebhe inde ma nde ne bali gba e-e, ma nde la di ngamene kulu pí e-e, atima andjelu gba e muma. <sup>24</sup> Aní atsia apa muma me: «Polo, mo odjé tsulu de. A ayo me mu kpokpo 'ngú gba mu-o kala 'ngbé ngámá Kaisala. Kaka-a, Ebhe bhú bádha bhú 'bu gba e akóbho mu di ne okpála inde yi nde ngadholo bhú dabili bini ne o bhú 'ngbé zabu-o.» <sup>25</sup> Ka 'ngú ango-o, ondaise ma, atou! Padhá de, anga ma ngabhuka me, Ebhe améne maka aní apa lie muma ko.

26 Engú bini, 'ngbé zabu anú atu lie ne ní lingo kpomè bini.»

27 Sukpe na ekpí na ndjikpa ne ká badha, anvi adu adyudyo 'ngbé zabu-o ne ya pí 'ngbé 'ngu inde 'li e me Adiliatike.\* Abhomu-o, tutu sukpe-e, okpála nadjele 'ngbé zabu-o abhundja naao me ya akolo dengo 'gø. 28 U aha ekpú inde u agbite tili 'he li 'ndji e, u abhike bhú 'ngu. U atsia au me engu-o tsutsu metele ndjikpa bata ne ká mananika. U adyudyo mbo lio ne kalanu masudha, u atsia abhike matá bhú 'ngu. U au me engu-o tsutsu metele ndjikpa bhisi ne ká madjina.

29 U adu adje tsulu me 'ngbé zabu-o atú lie li oteme de. Kaka-a, u atsia abala okalase badha inde u agbigbite e li okpu-o bhú 'ngu ne akele 'ngbé zabu-o, ngubula me alu bhú da e bini. U atsia adu ne gumu me ekpí seke bhado má gala! 30 Okpála nadjele 'ngbé zabu-o adu agili kpadji ngú nakpe. Abhomu-o, u agbe mboye kéké-o, u abhike pí 'ngu. U amene mugito me u adji abala okalase inde u agbigbite e li 'kpu-o, ngú nalu ka 'ngbé zabu-o ne akala zabu-o. 31 Polo atsia apa pi ngámá gba osudha di ne pi osudha-a me: «Li okpála inde-e du bhú 'ngbé zabu-o de-e, yi ti da nakobho de.» 32 Abhomu-o, osudha-a atsia atsotolo okpu na mboye kéké-o, atsia atapa.

33 Kala me ekpí seke-e, Polo ayo ka ndu okpála hana me u zu 'he. Aní atsia apa pi uo me: «A ko naki ekpí ndjikpa ne ká badha, yi ngadjeke. Yi ngasi gumu. Yi le ku 'he belegu de bini. 34 Kaka-a, ma ayo ka yi me yi zu 'he. Padhá de, anga yi ne gugumu ngubula me yi

kobho. Kpála bini bhú ká yi kpí-i de.» 35 Pita aní apa lie mo-o, aní aha mapa, aní agie heni pi Ebhe bhú ká djila ndu okpála hana. Pipita-a, aní agumu mapa-o, aní atsia aholo nazuzu. 36 Abhomu-o, ndu uo hana asia kpéke bua, u atsia aholo di nazu 'he. 37 Bhú 'ngbé zabu-o, ya adu hana okpála kámá bhisi ndjikpa mananika ne ká madhia.† 38 U a'u'u lie, u atsia abala ngano bhú 'ngu ngubula me 'ngbé zabu-o kolo yayaka.

### 'Ngbé zabu-o alinda bhú 'ngu

39 Li ekpí aseke lie, okpála nadjele 'ngbé zabu-o mbila de me o bhú mangua doto dho-ie de. Engú bini, u au ngo 'gø di ne sike. U atsia abhundja me o ti da nadyudyo 'ngbé zabu-o li bili ango-o. 40 U abhubhulu okalase-o, u atse 'kpa tété bhú 'ngu. U abhubhulu di ekpú na oehe inde adu amene me 'ngbé zabu-o dhuku-o. Pipita-a, u abhulu bongo inde li bhúla 'ngbé zabu-o ngubula me anvi holo nadyudyudyo. Abhomu-o, u atsia aholo nanu ne li pápá na ngo 'gø. 41 Engú bini, 'ngbé zabu-o anu atu lie li 'ta sike, li bili inde li engu ngago lie ne ndu pasu bhisi hana-o. Bhúla 'ngbé zabu-o adha bhú 'ta sike-o, a ale adula lie pima. Tabhu tabhu-o atsia agumu. Padhá de, anga engu-o atu lie tété kpekepeke.

42 Osudha adu akunda nabhili okpála na tikpu-o, amba suka uo bini akpé ne akango de. 43 Engú bini, ngámá gba osudha-a adu akunda nakobho Polo. Abhomu-o, aní ayoko uo me u améne mo-o de. Aní atsia aha líli pi okpála bhende ambila nati akango me u bala bhú 'ngu kalanu, amba u ze apí 'gø. 44 Okpála koko akpáta uo sidi

\* 27:27 27:27 Adiliatike: 'Ngbé 'ngu ango-o sunda doto na Itali ne bhende gba oGiliki. U aye bhú obhuku koko me «'ngbé 'ngu na Meditelani». † 27:37 27:37 Kámá bhisi ne ndjikpa mananika ne ká madhia: U aye bhú obhuku koko me «kámá bhisi ne ndjikpa mananika ne ká bhuluvue.»

me u nde ahoholo lio li opalangi di ne opapala 'he na 'ngbé zabu-o. Abhomu-o, ndu uo hana atsia akolo apí 'gè ndjindji.

## 28

### *Polo bhú kpəmø na Malete*

<sup>1</sup> Pita ya akobho lie, ya atsia adje me a 'li kpəmø ango-o me Malete. <sup>2</sup> Okpála na kpəmø ango-o asia ya ndjindji. Li ebha aholo adhi lie, zini aholo amene ya. Abhomu-o, u akpo djua má tu tu tu! Ya atsia ago adulu ndu ya hana dede. <sup>3</sup> Polo akuo 'i 'wa, ani abu bhú djua. Engú la bini, mbama akoto bhúbhú ka wowo djua, ani atsia adhedhe li 'kpa ani. <sup>4</sup> Li okpála na kpəmø ango-o au lie me kpulu adhedhe li 'kpa ani mo-o, u atsia apa sunda o me: «Kpála inde-e bha ndju ne bhulu nabhøø kpála kukulu. Padhá de, anga belegu ani akobho lie bhú 'ngu-o, Ebhe inde 'li e me ngbili 'ngú ziba de me ani du bhú mukobho-o de.»

<sup>5</sup> Engú bini, Polo adyiki 'kpa e, kpulu-o atsia ati bhú djua, ehe bini mene ani de. <sup>6</sup> La-a, u adu adjeke me 'kpa ani adji asika di ne me ani ati kuto ne nakpi ka e bini. U adjeke ngengele, u au la lie me ehe bini mene ani de-e, u adji mabhundja gba o-o. U atsia apa me: «A ko ebhe!» <sup>7</sup> Ngámá na kpəmø inde adu 'li e me Pubiliusi adu ne kuti gba e na ngbéngbé de bili ango-o. Ani asia ya ndjindji, ya atsia asi agba ani ekpí bata. <sup>8</sup> Bhú nedhinga bhomu-o, 'dyi Pubiliusi adu ne kuo pí mako. Ani adu ne bandji, ani atsia adu di agie ngute. Abhomu-o, Polo anu natsia ani. Ani ayo Ebhe pí ani. Ani a'o 'kpa e pí 'ndji ani. Ani atsia akobho ani. <sup>9</sup> Pipita-a, okpála koko inde adu ne

kuo bhú kpəmø bhomu-o, ago di nabhaka ani, ani atsia akobho uo. <sup>10</sup> U adhøø ya naali. Nedhinga nayie ka ya oo, u aha ndu 'he hana inde a ti ne ya ngubula kpadji-e pí ya.

### *Polo akolo bhú gudhu na Loma*

<sup>11</sup> Pita epe bata-a, ya a'u bhú 'ngbé zabu na Alekidjandili. A adu 'li 'li me «Diosikulese.\*» Nedhinga na zini ane nani 'ngbé zabu ango-o bhú kpəmø oo. <sup>12</sup> Ya akolo lie bhú gudhu na Silakusi, ya asi oo ekpí bata. <sup>13</sup> Ya ayie oo, ya aholo nakpangba ngo 'ngu, ya atsia akolo bhú gudhu na Ledjio. Li ekpí aseke lie, anvi ayie ne li pápá na yoyoko, aholo nape. Abhomu-o, pita 'kpí bhisi-e, ya atsia akolo bhú gudhu na Pudjole. <sup>14</sup> Bhú gudhu ango-o, ya abhaka ondaise ya omabhuka oo. U atsia ayo ka ya me ya du mbo ne o ngubula poso bini. Abhomu-o, ya atsia anu bhú gudhu na Loma. <sup>15</sup> Ondaise ya na gudhu na Loma adje me ya akolo. Kaka-a, u ago akolo bhú gudhu inde 'li e me Daposo na Apiusi, di ne bhende 'li e me Oeti Bata, ngú nakø lio ne ya. Li Polo au uo lie, ani agie heni pí Ebhe, ani atsia asia kpéke bua. <sup>16</sup> Abhomu-o, ya akolo bhú gudhu na Loma. U aha dabili pí Polo kpi bhú dabili bini ne sudha inde adu atsia 'kpí li ani-o.

### *Polo akpokpo 'ngú gba e bhú gudhu na Loma*

<sup>17</sup> Abhomu-o, pita ekpí bata-a, Polo a'i ongámási gba omaYuda inde ngadulu bhú gudhu na Loma-a agba e. U apo bhúla o lie, ani atsia apa pí uo me: «Ondaise ma, ma mene okpála na kuti gba ní-e sisiti de. Ma siti la di dasundu gba onguo oghi ní-e de. Abana mo-o, u aholo ma bhú gudhu na

\* **28:11** 28:11 Diosikulese: A ko nani oebhe obhukosi inde li oGiliki adu aha o maka oebhe gba o. Okpála nadhuku bhú 'ngu aha nani uo maka oebhe inde adu alila o ko.

Yelusalema, u atsia apu ma pi okpála na gudhu na Loma. <sup>18</sup> U ayiyi ma li ongu. Engu bini, u u ma ne engu bini inde u ti da nabhelø ma ka e de. Kaka-a, u adu akunda me o tse 'kpa li ma. <sup>19</sup> La li omaYuda ayala lie, ma atsia au ndjindji me 'ngbe ngama Kaisala kodho 'ngu gba ma-a ngae. Engu la bini, ma du akunda na'o 'ngu pi okpála na kuti gba ma-a de. <sup>20</sup> Kaka-a, ma akunda nako me ma u yi, amba ni gama la di 'ngu ne yi. Padhá de, anga u agbite ma ne gbindjili inde-e kabula kpála inde li omaɟsalaele nde ne 'to o me Ebhe atima e-o.»

<sup>21</sup> U agie pi ani me: «Ya sia balua bini nayie bhú ndu doto na Yudaya inde akpokpo 'ngu pindji 'ngu gba mu-o de. Suka ondaise ya bini yie oo go ei de ne engu gba mu, di go kpokpo 'ngu na sisiti li kute mu de. <sup>22</sup> Engu bini, ya akunda me kpokpo nga bha ngamu makpe, engu inde mu ngabhundja e ko. Padhá de, anga ya ambila me ne ndu bili hana, okpála ngapa 'ngu sisiti li libi okpála gba mu-o.»

*Polo akpokpo Bádha Ngali pi omaYuda na gudhu na Loma*

<sup>23</sup> Abhomu-o, omaYuda a'o matá ekpi bini ngu nake lio ne Polo. Li 'kpi ango-o, u ago bhelé naali li bili inde ani adu asi lie ko. Nayie kekpi nakolo tagolo-o, Polo adu akpokpo 'ngu pi uo pindji Nau gba Ebhe-o . Ani adu amene ne kpeke me u ziba Yesu. Bhú nakpokpo 'ngu ango-o, ani adu atanga pi uo líli gba Moidje di ne obhuku gba opolofeta . <sup>24</sup> Okpála koko aziba engu inde ani akpokpo e-o. Engu bini, okoko tsia bhuka de. <sup>25</sup> Abhomu-o, u agbo bhusu o me u nde dje lio sunda o de. Polo atsia apa bha pi uo me: «Engu

nani inde li Bu Bhobua apa e bhú 'li polofeta Isaya pi onguo ogbi yi-e, a ko kukulu 'ngu! <sup>26</sup> Ani apa nani me:

«Nu pa pi okpála bhomu-o me:

Yi adjé 'kpi ndjindji, engu la bini, yi mbila tata-a de.

Yi atsia 'kpi ndjindji, engu la bini, yi u 'kpi de.

<sup>27</sup> Padhá de, anga bua uo akolo maka teme.

U anini 'dje o, u agbagba djila o,

ngubula me, djila o au 'kpi de, 'dje o adjé 'kpi de,

imbilangba gba o-o ambila tata-a de,

u adjí bua o de,

amba ma akobho uo de. Ebhe apa mo-o.†»

<sup>28</sup> Do Polo matá me: «Yi mbila me, Ebhe atima ngali na makobho gba e pi ogandji okpála . Ngauo di-e, u adjé madje.» [ <sup>29</sup> Li u adje engu inde li Polo apa e lie, omaYuda atsambala me u nde ngamene kpekebhe sunda o kpekepe.]

<sup>30</sup> Abhomu-o, Polo asi kalanga bhisi libhomu bhú eti inde ani adu nadu bhú e me ani nde ngaha pi bhuhulu-o falanga ko. Oo, ani atsia adu asia ndu okpála hana inde adu ago atsia ani-o. <sup>31</sup> Ani adu akpokpo ngali Nau gba Ebhe, di ne nasuno ne angu hana engu gba Ngama Yesu Kilisito-o . Ehe bini ni kpadji pi ani de.

† 28:27 28:26-27 Tsia bhú Isa. 6:9-10.

**Balua gba Polo  
pi omabhuka na  
gudhu na  
Loma  
Eli na kalanu**

Balua inde li Polo aye nani e pi omabhuka na Loma-a , ani aye nani ngu napa pi uo me ni ne gumu ngu nanu atsia Dadjua na gudhu na Loma. Gumu gba ani adu me ni mene mbo kulu ne omabhuka inde oo, ngubula nedhinga bedi amba u teteke di ni ngubula nanu abhu Esipanye. Ani aye balua angoo ngu nakpokpo lele maka ani ambila lele nabhuka bhú Yesu nde lie di ne ongu inde li nabhuka angoo ngamene e, ngubula mukobho gba omakilisito. Engu li Polo akpokpo e hana abhu bhuku inde.

Pita li Polo ayi okpala na Dadjua na gudhu na Loma di ne ani ayo Ebhe pi uo lie-e, ani akpokpo engu na ngéngbé inde bhú balua pi uo, engu inde me: Bádha Ngali ngasuno maka li Ebhe ngamene lie me okpala kolo ngbingbili: a ko ka nabhuka, nayie li lilita akolo ali soso (1:17).

Pipita-a, Polo atsia abhulu 'ngu angoo. Ani apa me: i du omaYuda, i du die omupagano, a ayo me u kolo ngbingbili kala Ebhe. Padhá de, anga ndu uo hana amene siti 'ngu. Abhomu-o, li soso, Polo aye ongu pindji lele nadi ka mukobho gba omakilisito, ane la mane li kpadji na mukunda bhú nadi nadi lie ne okpala koko. Ani atsia agama matá 'ngu pindji ongu maka kulu gba Ebhe, ne engu inde a ayo me omakilisito mene e pi ongámasi na doto, ne bhende gba okpala sunda o. Ani abu ta balua gba e

ne nakpokpo 'ngu gba e makpe di ne oeli bhe nadhoge Ebhe.  
**Onghengbe ongu inde bhú bhuku inde-e ngae inde:**

Eli na kalanu ne engu na ngéngbé inde bhú bhuku inde 1:1-17

Gumu nasia mukobho 1:18 - 3:20

Mabhundja gba Ebhe ngubula mukobho 3:21 - 4:25

Mukobho na mbia bhú Kilisito 5:1 - 8:39

Isalaele bhú mabhundja gba Ebhe 9:1 - 11:36

Lele dasundu gba omakilisito 12:1 - 15:13

Eli na soso ne nayi okpala 15:14 - 16:27

*Polo yi omabhuka na gudhu na Loma mayi*

<sup>1</sup> Ma aye balua inde-e ngama Polo. Ma ne bali gba Yesu Kilisito . Ebhe a'i ma me ma du ne bhulu titima gba ni, ani atsia a'o ma kpi pi e ngu nanu nakpokpo Bádha Ngali gba ni-e pi okpala.

<sup>2</sup> Ebhe apa nani bhutode me ni atima Bádha Ngali bhomu-o pi okpala li kpadji gba opolofeta gba ni-o. Ani apa nani engu angoo bhú Bhuku gba e-o. <sup>3</sup> Bádha Ngali angoo pindji ndili gba ani Yesu Kilisito inde Ngámá gba ní-o. U azu ani bhú kute bhú piga gba 'ngbé ngámá Davidi. <sup>4</sup> Engu bini, li kpadji gba Bu Bhobua-a , ani asuno lie maka Ndili gba Ebhe bhú angu nedhinga ani azuku lie bhú ká okpala inde amu-o.

<sup>5</sup> Li kpadji gba ani-e, Ebhe asuno bádha bhú 'bu mama me ma kolo bhulu titima gba ani. Ma ne bhulu titima ngubula me ma gbele ndu okpala inde ne omaYuda ade-e hana me u bhuka Yesu Kilisito, u manga ani, amba u toko la di ani. <sup>6</sup> Ngayi okpala na Loma-a , yi di bhú ká okpala bhomu-o, ngayi okpala inde li Ebhe a'i o me yi kolo di okpala gba Yesu Kilisito-o.



<sup>7</sup> Ma aye balua inde-e pi ndu yi hana, ngayi okpala inde li Ebhe nde ne mukunda pi o-o, ani atsia a'i o me yi du bhú mukobho pi ni-o. A ayo me Ebhe 'Dyi ní, ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

*Polo apa me ni ne gumu nakpokpo Bádha Ngali gba Ebhe-e pi ndu okpala hana*

<sup>8</sup> Kala ndu 'ngú hana-a, ma ngagie heni pi Ebhe gba ma li kpadji gba Yesu Kilisito. Ma ngagie heni pi ani li 'ngú gba ndu yi hana, anga okpala na píla doto libhomu ngakpokpo 'ngú pindji nabhuka gba yi-o. <sup>9</sup> Ndu nedhinga hana, ma du nayo Ebhe-e, ma ngayo ani ngubula yi. Ebhe apa li ma ngae me a ko kukulu 'ngú. Ma ngamene kulu lima pi Ebhe bhomu-o li kpadji nakpokpo Bádha Ngali inde atsia Ndili gba ani-o. <sup>10</sup> Ma ngayo Ebhe ndu 'kpí hana me ani kunda-a, ani de bhulu kpadji muma me ma kolo li yi. <sup>11</sup> Padhá de, anga ma ne gumu naali me ma u yi ngubula me yi sia di bádha bhú 'bu inde ayie ka Bu Bhobua-a, amba yi sia angu li bua yi. <sup>12</sup> Ma akunda mangbo napa me ma ne gumu nakolo li yi ngubula napa me ní to angu bhú ní sunda ní ne yi. Ka nabhuka ní nde ne e bhú Kilisito-o, ma to angu bhú yi, amba yi to di angu bhú ma.

<sup>13</sup> Ondaise ma, yi mbila me bhutsibhutsi, ma adu ne mab-hundja nanu agba yi, engú bini, ma sia nga kpadji de nato pi naki. Ma ne gumu nago gba yi ngubula me kulu gba ma-a zu di nguwa agba yi maka a azu di nguwa lie agba opiga koko inde ne omaYuda ade-o. <sup>14</sup> Kaka-a, a ayo me ma kpokpo Bádha Ngali pi ndu okpala hana, abana i du pi oGiliki di ne pi

okpala inde ne oGiliki ade-o. Ma akpókpo Bádha Ngali bhomu-o pi okpala inde amene balua di ne obhende i mene balua de. Ebhe aha bhobhomu-o muma ngae. <sup>15</sup> A bhomu-o ta 'ngú inde ma nde lie ne gumu nago nakpokpo di Bádha Ngali pi yi, ngayi okpala inde ngadulu bhú gadhu na Loma-o.

<sup>16</sup> Ma belegu ne numu ade ngú nakpokpo Bádha Ngali-o. Padhá de, anga a bhúbhú ne angu inde li Ebhe ngamene kulu ne e ngú nakobho ndu okpala hana inde ngabhuka-o. Ebhe ade kpadji angu-o ngú nakobho ngaiza omaYuda, pipita-a, okpala inde ne omaYuda ade ko. <sup>17</sup> Padhá de, anga Bádha Ngali angu-o ngasuno lele maka li Ebhe nga'o okpala lie ngbingbili bhú djila e-o. Kpadji angu-o ngakpo lita e bhú nabhuka, engú koko kekele ade. A maka li Bhuku gba Ebhe-e apa lie me: «Kpala inde abhuka Ebhe-e, Ebhe méne me ani kolo bhú djila ni ngbingbili, a ko kpala inde bhú kukulu mukobho.†»

*Bua Ebhe ngake ne osisiti 'ngú gba okpala make*

<sup>18</sup> Li Ebhe nde lie abhúlá-a, ani ngasuno mbámbá me ni ngazi mbutu li ndu osisiti 'ngú hana inde li okpala ngamene e li ani-o di ne bhe li okpala ngamene e sunda o-o. Ani ngazi mbutu anga ndu osisiti 'ngú li okpala ngamene e ngani kpadji me okpala koko ambila kukulu 'ngú de. <sup>19</sup> La-a, engú inde ayo me okpala mbila e li pápá gba Ebhe-e mbámbá pi ndu okpala hana. Ebhe ngae makpe apana pi uo mbámbá.

<sup>20</sup> Padhá de, anga nayie maka li Ebhe abho kokpi ne doto lie nakolo pi naki-e, ndu oehe inde ani abho e hana ngasuno ani mbámbá me ani maka da-ie. Oehe

† 1:17 1:17 Tsia bhú Abk. 2:4.

bhomu-o ngasuno me a bhú ani ne angu na duduama, oehe bhomu-o la bhadi ngasuno mbámbá me a ko Ebhe. Kaka-a, Ebhe ti da nambu li okpála inde aziba siti 'ngú-o de. <sup>21</sup> Padhá de, anga abana u ngambila lie hana me Ebhe uu-o, u dhögø ani de, u gie la di heni pi ani de maka ayo lie me u mene pi ani-o. Engú bini, mabhundja gba uo-o ati ngingi, bua uo bhú biti, u mbila matá bádha 'ngú de. <sup>22</sup> U ngapa me a bhú 'ndji o ne imbilangu, engú bini, u akolo obhulu pele. <sup>23</sup> Pi uo-o, ngú napa me u dhögø sangu gba Ebhe inde bhú mukobho duduama ne duduama-a, u mene mo-o de. U mangbo ngadhögø okulu 'he inde li okpála abho o maka o-o. La-a, kpála bhú mukobho duduama ne duduama ade. U di ngadhögø okulu 'he inde li okpála abho o maka oedhu, maka onu di ne obhende ngagbeke lio ne 'bu o kuto.

<sup>24</sup> Kaka-a, Ebhe atse 'kpa li uo me u mene ongú na sisiti inde li bua uo ngakunda me u mene e-o. U ngamene lie mo-o, u bhomu-o ngamene engú na numu lio sunda o. <sup>25</sup> Ngauo-o, u a'o nabhuka kukulu 'ngú inde atsia Ebhe-e li ngongo, u atsia abhuka eu. U ngadhögø oehe inde li Ebhe abho o, uo di ngamene kulu lio pi oehe angoo-o, engú bini u dhögø Ebhe inde abho ndu 'he hana ngae de. A ayo la me u de atoko mangbo ani duduama ne duduama. A adu moko!

<sup>26</sup> Kaka-a, Ebhe atse 'kpa li uo me u mene ongú na numu li gumu e asi bhú uo bedhe-o. Olisi gba uo-o nga'o ká obhosi, u ngadhuku ne obi o olisi mada obhosi. <sup>27</sup> A bhadi pi obhosi moko. U di nga'o ká nadhuku ne olisi, u abedhe mangbo ne gumu nadhuku ne obi o obhosi mada olisi. Obhosi ngamene engú na numu ne obi

o obhosi koko. U ngagbele pí o makpe bhomu-o ke 'ngú gba Ebhe inde ati ne ngua siti 'ngú u amene e bhomu-o.

<sup>28</sup> Maka li okpála bhomu-o ayala lie nambila kukulu 'ngú inde atsia Ebhe-e, Ebhe atse 'kpa li uo me u abhúndja matá ndjindji de, di ne me u mene engú inde ayo de me u mene e mo-o de. <sup>29</sup> Sisiti 'ngú abedhe li bua uo bedhe, u abedhe ne gumu 'he gba okpála koko, a ko okpála na siti bua , u ngadje siti bua li obi o naali, u ngabhili obi o, a ko obhulu nagbe bhayiki, a ko obhulu kali, a ko obhulu napa eu ne 'li obi o. <sup>30</sup> U ngapa 'ngú lio sunda o sisiti, a ko obhulu yala gba Ebhe, u ngasobho obi o, u ngadje kute o, u ngapa 'li o, uo ndu 'kpi hana bedhe 'ngú nabhundja siti 'ngú koko na mbia, u manga okpála azu o-o de.

<sup>31</sup> Bubua li uo ade, u ngapa 'ngú ne 'li o bhisi bhisi, u ne mukunda pi obi o ade, ndjinga bhú uo ade. <sup>32</sup> U mbila hana me 'li Ebhe apa me okpála inde ngadhuku li ngua kpadji bhomu-o ati ne nakpi. Abana u ambila lie mo-o hana-a, u bha bini nganu ne kalanu bhú namene ngua osisiti 'ngú bhomu-o. Bhe ane la matá mane-e, u ngakpi ndjili li okpála inde ngamene ngua osisiti 'ngú bhomu-o.

## 2

*Ebhe ngakodho 'ngú gba okpála li lelele*

<sup>1</sup> Ngamu kpála bhende a'o lie bhú dá djudji ngú nakodho 'ngú gba okpála koko-o, abana mu du bha ne da-ie, Ebhe mbú li mu de. Padhá de, anga nedhinga mu ngakodho 'ngú gba okpála koko lie me mu nde bhadi ngamene 'ngú maka uo-o, mu ngato ngulu mu bhú 'kpi bhomu-o ngamu makpe. <sup>2</sup> Ní mbila hana me Ebhe

ngakodho 'ngú gba okpála inde ngamene ngua sisiti 'ngú bhomú-o li lelele. <sup>3</sup> Ngamú kpála inde ngakodho 'ngú gba okpála koko li ngua siti 'ngú inde ngamú makpe mú ngamene e-e, mo obhundja naamú me mo onéke mangimbo gba Ebhe-e maneke?

<sup>4</sup> Nedhinga koko-o, mú ngau Ebhe bhú djila mú padhá, anga ani babadha naali, ani di ne 'ndjá bua, ani di ngandjili má bulu li osisiti 'ngú mú ngamene e-o. Mú u de me ani ngamene mú ndjindji ngubula me mú dji bua mú-o dí? <sup>5</sup> Ngamú-o, mú ne kpéke 'ndji, mú kúnda nadjí bua mú de. Kaka-a, mú bhomú-o ngagbele pí 'ndji mú mangimbo bhende ane la matá mane bhú ekpí inde li Ebhe asúno ke 'ngú gba e lie, ani tsia kódho di engú gba okpála hana ngbingbili-o. <sup>6</sup> Ekpí angó-o, ani ahá makalá pí kpála ne kpála li lele kulu gba e inde ani amene e-o.† <sup>7</sup> Ani ahá makobho na dáduma pí okpála bhende adhedhe li namene bádha 'ngú-o. Okpála angó-o ngagili sangu sakpa ani, u ngagili me ani pa 'ngú gba o-o ndjindji, di ne me o sia makobho na dáduma.

<sup>8</sup> Engú bini, ani asúno ke 'ngú gba e pí okpála bhende agbe kpéke 'ndji li ani-o, okpála inde ayala kúkulu 'ngú inde di ngaziba namene siti 'ngú-o. Ani aké 'ngú lie pí uo na kuo kuo! <sup>9</sup> Ndu okpála hana inde ngamene siti 'ngú-o, asía likabhu bhe na kuo kuo! Likabhu angó-o akpó ngaiza li omaYuda, pipita-a i kó di li okpála inde ne omaYuda ade-o. <sup>10</sup> Engú bini, Ebhe ahá sangu pí kpála ne kpála inde ngamene bádha 'ngú, ani apá 'ngú gba uo-o ndjindji, ani tsia há di guo 'ngú pí uo. Ndu babadha 'ngú bhomú-o hana, Ebhe ahá ngaiza

pí omaYuda, pipita-a ani tsia há di pí okpála inde ne omaYuda ade-o. <sup>11</sup> Padhá de, anga Ebhe ngakodho 'ngú gba kpála ne kpála li lelele, ani tsia bhúla kpála de.

<sup>12</sup> Ndu okpála hana inde ngamene siti 'ngú mandí nambila líli gba Moidje-e , amú mamú, nakpi gba uo kpála la lele líli gba Moidje de. Engú bini, ndu okpála hana inde ngamene siti 'ngú me u nde ambila líli gba Moidje hana-a, Ebhe akódho bhadi 'ngú gba uo-o nakpata lele líli bhomú-o.

<sup>13</sup> Padhá de, anga okpála inde ngbingbili bhú djila Ebhe-e, a ko obhende ngadje líli gba Moidje ne 'dje o-o de, engú bini, okpála inde ngbingbili bhú djila Ebhe-e, a ko obhende ngamene engú maka li líli-e aziba lie-o. <sup>14</sup> Okpála inde ne omaYuda ade-e, u mbila líli gba Moidje-e de. Nedhinga koko, u la ngamene 'ngú maka li líli apa lie. Bhobhomú-o asuno me líli angó-o asi kuti e abhú uo, belegu u mbila lie de-o. <sup>15</sup> U bhomú-o ngasuno me engú inde li líli-e apa e asi kuti e li bua o. Bua nakpokpo ku 'ngú ne mabhundja gba uo-o bhadi ngasuno moko. Nedhinga koko-o, u ngambila me o omene engú ndjindji ne me o omene sisiti. <sup>16</sup> A bhomú-o engú inde akóto ekpí inde li Ebhe akódho 'ngú gba okpála lie li kpadji gba Yesu Kilisito-o . Ekpí angó-o, Ebhe akódho 'ngú gba okpála maka li Bádha Ngali inde ma ngakpokpo e ngapapa lie-o. Ebhe akódho 'ngú angó-o pindji ongú inde awo lie mawo, inde li okpála ngabhundja e li bua o-o.

*OmaYuda na kúkulu-o ngao dho?*

<sup>17</sup> La ngamú kpála inde ngapa me ni ne maYuda-a, mú ngalú pí líli gba Moidje-o, mú di ngabhi

† 2:6 2:6 Tsia bhú Ets. 62:13; di ne bhú Gbt. 24:12.

'kpa m̄ pí mbulu m̄ me ni ne kpála gba Ebhe. <sup>18</sup> M̄ mbila engú li Ebhe akúnda e hana, líli gba Moidje asuno la bhadi pí m̄ ndjindji me engú inde babadha ngae dho-ie. <sup>19</sup> M̄ ngabhundja li bua m̄ me ni ngasuno kpadji pí okpála inde i u kpí de. M̄ di ngabhundja li bua m̄ me ni ne zi 'kpí pí okpála inde bhú bitio. <sup>20</sup> M̄ ngabhundja li bua m̄ me ni ti da nasuno 'ngú pí okpála bhende imbila 'ngú de-o. M̄ di ngabhundja li bua m̄ me ni ti da nasuno 'ngú pí okpála bhe i bhele nga li kpadji gba Ebhe-e de-o. M̄ ngabhundja me líli gba Ebhe-e asuno imbilanḡ ne kúkulu 'ngú pí ni hana.

<sup>21</sup> Kaka-a, ma ngayi m̄ me, ngam̄ kpála inde ngasuno 'ngú pí okpála koko-o, m̄ suno 'ngú ang-o pí m̄ ngam̄ bhúbhul̄ de ka ni? Ngam̄ kpála inde ngapa pí okpála me u azí 'he de-e, m̄ ngazi 'he ka ni? <sup>22</sup> Ngam̄ kpála inde ngapa pí okpála me u akúnda øl̄, i d̄ di-e bhoko gba kpála koko de-e, m̄ la ngakúnda øl̄, i d̄ di-e bhoko gba kpála koko ka ni? Ngam̄ kpála inde ngayala engú na oebhe na eu-o, m̄ la ngabha oehe bhú 'ti nayo gba uo-o ngú ni? <sup>23</sup> Ngam̄ kpála inde ngabhi 'kpa m̄ pí mbulu m̄ me ni mbila líli gba Ebhe-e hana-a, m̄ nde la ngandjo líli ang-o, okpála ngasiti 'li Ebhe ka m̄, anga m̄ ngamene engú maka li líli gba an̄-e apa lie ade. <sup>24</sup> A maka u aye lie bhú Bhuku gba Ebhe-e me: «Okpála inde ne omaYuda ade-e ngasobho 'li Ebhe ka engú li ngayi omaYuda yi ngamene e-o.†»

<sup>25</sup> I d̄ me m̄ nde ngamene engú maka li líli-e apa lie, nali gandja pí m̄ ne tata. La-a, i d̄ me m̄ nde mene engú maka li

líli-e apa lie de-e, a mana m̄gito me m̄ li gandja de. <sup>26</sup> La di-e, li kpála inde i li gandja de-e d̄ namene engú maka li líli-e apa lie, Ebhe ú an̄ m̄gito me a ko kpála bhe ali gandja. <sup>27</sup> Kpála inde i li gandja bhú kute de, engú bini, inde i ngamene engú maka li líli-e apa lie, akódho 'ngú gba m̄-o ngae, ngam̄ kpála inde i kpata líli-e de, abana inde lie me a ka m̄ ne líli, m̄ nde ali la di gandja-o.

<sup>28</sup> Padhá de, anga a ko de me kúkulu maYuda-a, a ko bha bhende li okpála ngau e li kute e de, inde ali di gandja bha li kute e de, ngú napa me okpála u ne djila o-o de. <sup>29</sup> La-a, kúkulu maYuda-a, a ko bhende ne maYuda li bua e, inde ali gandja li lele Bua gba Ebhe, inde i li gandja bha bini ka líli-e de. Kpála ang-o, Ebhe ngatoko ani ngae, okpála toko ani ngao de.

### 3

*Ebhe nd̄ 'kpí hana bedhe ngú namene engú inde ani apa me ni améne e-o*

<sup>1</sup> I d̄ me a nde mo-o, ta nad̄ ne maYuda ne ni? Nali gandja ngateteke kpála lele pí? <sup>2</sup> Nd̄ 'ngú bhom̄-o hana bha ndjindji! Ebhe ambamba ngaiza nani ta engú gba e pí uo omaYuda. <sup>3</sup> A na paká me okpála koko bhú ká uo kpata nani on̄gú li Ebhe apa e ne bua bini-e de. La-a, Ebhe amene bha naae engú inde ani apa nani me ni améne e pí uo-o. <sup>4</sup> Abana li nd̄ okpála hana d̄ bha ne obhul̄ eu-o, Ebhe papa bha naae kúkulu 'ngú. A maka u aye lie bhú Bhuku gba an̄-e me:

«Ngam̄ Ebhe, nedhinga m̄ ngagama 'ngú lie,  
nd̄ okpála hana ngambila  
me m̄  
ne ngbili kpála .

† 2:24 2:24 Tsia bhú fsa. 52:5.

I du di me u nde anu ne mu  
gba okpála nakodho 'ngú-o,  
u ú ehe inde ayo me u holo mu  
li e belegu de bini.†»

<sup>5</sup> Ma gama nga 'ngú nakpata lele  
maka okpála-kuti agagama 'ngú  
lie. Nedhinga koko, okpála koko  
pá me siti 'ngú ní ngamene e  
ngateteke okpála ngú nambila me  
Ebhe ne ngbili kpála. U pa mo-  
o, ní gíe pí uo mangua 'ngú dho?  
Ní gíe pí uo me a ko paká, Ebhe  
ne ngbili kpála, anga aní nga'o  
mangimbo pí 'ndji ní ade. <sup>6</sup> Ebhe  
bha ndu 'kpí hana ne ngbili kpála,  
aní ngakodho 'ngú gba okpála na  
doto kaka.

<sup>7</sup> Engú bini, okpála koko tí da  
napa me eu o ngapa e ngagbe  
kukulu 'ngú gba Ebhe bhú mbasu,  
a di ngaha sangu pí ani. A ko la ní  
li Ebhe nga'o 'ngú lie pí o mugito  
me o ne osisiti okpála? <sup>8</sup> Okpála  
koko ngasobho ya. U ngapa lí  
ya me ya apa me: «Ní mene siti  
'ngú, amba ní u lele bádha 'ngú  
inde akóto bhúbhú-o.» Ebhe a'o  
mangimbo pí okpála bhomu-o a'o.  
U ati la bhadi ne di.

*Ndu okpála hana ngamene siti  
'ngú*

<sup>9</sup> Nganí omaYuda-a, ní belegu  
bhú djila Ebhe ngbéngbé ade da  
nane opiga koko. Ma apa ígini apa  
me ndu ní okpála hana ní sa líli  
gba siti 'ngú. <sup>10</sup> A maka u aye lie  
bhú Bhuku gba Ebhe-e me:  
«Ngbili kpála ade, belegu de bini.

<sup>11</sup> Kpála inde ngakø mboli  
'ngú ade,  
kpála inde ngagili Ebhe-e belegu  
ade bini.

<sup>12</sup> Ndu okpála hana a'o ká kpadji  
gba Ebhe-e a'o,  
ndu uo hana angita.

Kpála inde ngamene bádha 'ngú-o  
ade,

belegu de bini!†

<sup>13</sup> Tangu lu uo mana lata inde lí  
'bhø e nde bábá.  
'Mí uo ngapa 'ngú napite  
okpála.

Eli inde ngaze bhú 'bhø uo  
mana sili kpulu inde ngab-  
hili okpála.†

<sup>14</sup> U ngatu pedjø lí okpála ndu  
'kpí hana ne 'bhø o,

u di ngapa oeli na susu pí uo.†

<sup>15</sup> U ngagu holo ne angu o hana  
ngú nanu nabhili okpála.

<sup>16</sup> Ndu bili u ngapu lí e hana-  
a, u ngasiti ohe, u di ngato  
mbolo lí okpála.

<sup>17</sup> U mbila kpadji na guo 'ngú de.†

<sup>18</sup> Tsalu Ebhe bhú uo belegu  
ade bini.†»

<sup>19</sup> Ní mbila hana me ndu 'ngú  
inde u aye e bhú líli-e hana, u aye  
pí okpála inde lí Ebhe aha nani líli  
ango-o pí o-o. Ebhe amene mo-o  
ngubula nagbite 'bhø ndu okpála  
hana ne napa me ní 'o mangimbo  
pí 'ndji ndu uo hana. <sup>20</sup> Padhá de,  
anga kpála bini belegu ade inde í  
tí da nakoto ngbili kpála kala Ebhe  
ka namene líli-o. Kulu gba líli-e  
bha bini ne nateteke okpála ngú  
nambila me siti 'ngú ngae dho-ie.

*Kpála ngakolo ngbingbili bhú  
djila Ebhe ka nabhuka*

<sup>21</sup> Mbia inde-e, Ebhe apana  
kpadji inde ngamene lie me  
okpála kolo ngbingbili kala ní-o.  
Kpadji ango-o kpi, a koto lí líli de.  
Obhuku na olíli di ne obhuku gba  
opolofeta apa nani engú ango-o  
kalanu. <sup>22</sup> Kpadji ango-o me, Ebhe  
nga'o okpála ngbingbili kala e lí  
kpadji nabhuka Yesu Kilisito ka  
uo-o. Aní ngamene mo-o pí ndu  
okpála hana inde ngabhuka ani-  
o. Ndu uo hana ngasia mukobho  
bha lí kólí kpadji bini inde gba

† 3:4 3:4 Tsia bhú Ets. 51:6. † 3:12 3:10-12 Tsia bhú Ets. 14:1-3, 53:1-3; di ne bhú Ekl. 7:20.

† 3:13 3:13 Tsia bhú Ets. 5:10, 140:3. † 3:14 3:14 Tsia bhú Ets. 10:7. † 3:17 3:15-17 Tsia

bhú Isa. 59:7-8. † 3:18 3:18 Tsia bhú Ets. 36:2.

Yesu Kilisito-o. <sup>23</sup> Padhá de, anga ndu okpála hana amene siti 'ngú, kaka-a, Ebhe bhú sangu gba e adjí 'ngbu e li uo adjí.

<sup>24</sup> Engú bini, Ebhe bhú bádha bhú 'bu gba e amene me u kolo ngbingbili bhú djila ni padhá. Aní amene mo-o li kpadji gba Yesu Kilisito inde ngagbegbe uo sakpa siti-o. <sup>25-26</sup> Yesu Kilisito ne kpála inde li Ebhe abhu e me aní kpi mada ní ka siti 'ngú gba ní-o. Aní tuko ngute e ngú na'e siti 'ngú gba ní-o. Kpadji ango-o Ebhe aleke pi okpála bhende abhuka-o. Ebhe amene mo-o ngubula me ní mbila me ni ne ngbili kpála. Bhú nedhinga na kalanu-o, nedhinga li okpála adu namene siti 'ngú lie, aní adu ne 'ndjá bua pi uo, aní adu atsia siti 'ngú inde u adu amene e mugito me aní u de. Bhú nedhinga na mbia inde-e, aní ngasuno me ni ne ngbili kpála. Kaka-a, aní a'o ndu okpála hana inde abhuka Yesu-o me u du ngbingbili bhú djila ni.

<sup>27</sup> I nde lie mo-o, engú bini belegu ade inde i ti da naha 'ngbé 'ndji pi ní. Ka ni? Anga ehe bhende ane ne engbé-e, a ko matá namene líli-e de, engú bini, a ko bha bini nabhuka. <sup>28</sup> Padhá de, anga ya au me kpála-kuti ngakolo ngbingbili kala Ebhe ka nabhuka gba e. A ko de me anga aní amene líli-e hana-a de. <sup>29</sup> Yi abhundja naayi me Ebhe bha ne Ebhe ka omaYuda? A ko di Ebhe gba okpála inde ne omaYuda ade-e di? A mo-o ade. A ko di Ebhe gba okpála inde ne omaYuda ade-o. <sup>30</sup> Padhá de, anga koli Ebhe bha bini. Aní amene me ni 'o omaYuda kala ni ngbingbili li kpadji na nabhuka. Aní améne bhadi pi okpála inde ne omaYuda ade-e moko. <sup>31</sup> I du me a nde mo-o, a kunda napa me ní u ibili líli-

e padhá? A mo-o ade, ní mangbo bhomu-o nga'o líli-e bhú da e.

## 4

### *Nabhuka gba Abalahama*

<sup>1</sup> Ní bhundja nga pindji ogbi ní Abalahama. Ní apá li 'ngú gba ani-e pi? A akolo nani li aní ne mangua 'ngú dho? <sup>2</sup> Li Ebhe ú nani aní me a ko ngbili kpála bhú djila ni ka obabadha kulu inde aní adu amene e, Abalahama de adú ne engú inde aní ti da nabhi 'kpa e pí mbulu e ka e-o. La-a, aní ti da namene bhú djila Ebhe mo-o de. <sup>3</sup> Padhá de, anga Bhuku gba Ebhe ngapa me: «Abalahama abhuka Ebhe, abhomu-o Ebhe atsia au aní me a ko ngbili kpála ka natsia nabhuka gba ani-o.†» <sup>4</sup> Ní mbila hana me li kpála mene kulu-o, u há kuo 'kpa pi aní tété, kuo 'kpa bhomu-o ha lie pi aní padhá de. Aní amene ngánga kulu. <sup>5</sup> La-a, li kpála mene kulu de, aní bhuka me Ebhe ngasia obhulu namene siti 'ngú-o, nabhuka gba ani-e nga'o aní ngbingbili bhú djila Ebhe. <sup>6</sup> Kaka-a, Davidi ngapa 'ngú na djali gba kpála inde li Ebhe au e maka ngbili kpála bhú djila e-o, inde aní tsia okulu gba e de-o. <sup>7</sup> Davidi apa me:

«A ko djali pi okpála inde li Ebhe ambu li ndjondjo gba o ambu, okpála inde li Ebhe a'e osisiti 'ngú gba o a'e-o!

<sup>8</sup> A ko djali pi okpála inde li Ebhe Ngámá lila osisiti 'ngú gba o li bua e de-o!†»

<sup>9</sup> Engú li Davidi apa e bhomu-o, ne me a atsia bha bini okpála bhende ali gandja, ne me a atsia di obhende i li gandja de-o? Ní de ngapa me: «Ebhe au Abalahama ngbingbili bhú djila e, anga

† 4:3 4:3 Tsia bhú Dje. 15:6. † 4:8 4:7-8 Tsia bhú Ets. 32:1-2.

Abalahama abhuka ani.»<sup>10</sup> Engú bhomu-o akodho 'kpí nadho? Ne me a ko me Abalahama nde ali gandja ali, ne me a ko me ani nde li nga gandja de? A mo-o ade, a ko kala me Abalahama li gandja.

<sup>11</sup> Kala me Abalahama li gandja-a, Ebhe au ani bhú djila e me a ko ngbili kpála. Pipita-a, Ebhe apa pi ani me ani li gandja. Gandja bhomu-o adu maka ehe inde asuno me ani ngbingbili bhú djila Ebhe kabula nabhuka gba e-o. Kaka-a, Abalahama akolo 'dyi ndu okpála hana inde ngabhuka Ebhe mandí nali gandja. Ebhe ngau ndu okpála bhomu-o hana bhú djila e ngbingbili maka ani au nani Abalahama lie-o. <sup>12</sup> Abalahama di ne 'dyi okpála bhende ali gandja-o. A akunda napa me Abalahama di ne 'dyi okpála inde ngakpi bha bini ndjili li nali gandja ade, engú bini, inde ngakpata lele nabhuka inde adu nani bhú ogbi ní Abalahama kala me ani li gandja-o.

<sup>13</sup> Ebhe apa nani pi Abalahama ne odi e me ni ahá doto pi uo. A ko de me Ebhe apa nani engú bhomu-o ka anga Abalahama amene líli-e de, a ko mangbo anga Ebhe au nani ani ngbingbili bhú djila e ka nabhuka gba e-o. <sup>14</sup> I du me okpála bhende ngamene líli-e nde asia bha bini ohe li Ebhe apana e ngao, a akunda napa me tata li nabhuka ade. La di-e, engú inde li Ebhe apa nani me ni amene e pi uo, a ko 'ngú na padhá. <sup>15</sup> Padhá de, anga nedhinga li okpála adje líli lie, i du me u nde kpata de-e, li Ebhe ké 'ngú lie. La-a, bili li líli nde li e ade-e, u agumu líli-e lele pi?

<sup>16</sup> A bhomu-o engú yi ngau lie me Ebhe apa nani me ni ahá doto pi Abalahama ne odi e kabula nabhuka gba e ngubula me a adu

pi uo maka ehe ani aha e pi uo padhá bhú bádha bhú 'bu gba e-o. Oehe li Ebhe apa me ni ahá e pi okpála-a, a bha bini pi obhende ngakpata líli-e ade, engú bini, a di pi okpála inde abhuka Ebhe maka Abalahama abhuka lie-o. Kaka-a, Abalahama ne 'dyi ndu ní hana. <sup>17</sup> A maka u aye lie bhú Bhuku gba Ebhe-e me Ebhe apa pi Abalahama me: «Ma a'o mu 'dyi okpála na opiga bhelé.†» Abalahama ne 'dyi ní bhú djila Ebhe inde ani abhuka e-o. A ko Ebhe inde ngazuku okpála inde amu, inde di ngabho oehe inde nga ade-o.

<sup>18</sup> Abalahama adu bha ne nabhuka bhú Ebhe, ani atsia adu bha na'o 'to e 'to ani. Natsia la lele ani-e, a ko nani kpála inde i ti matá nani da na'o 'to e 'to ehe inde li Ebhe apa me ni ahá e pi ani-e de. Abhomu-o, Ebhe amene engú ani apa nani me ni améne e pi ani-o. Ani atsia akolo 'dyi okpála na opiga bhelé maka li Ebhe apa nani lie pi ani me: «Opiga gba mu-o adu bhelé.†» <sup>19</sup> A abhaka me ani nde ne kalanga masikpe de kámá bini. Ani adu nambila ndjindji me ni agbe, ani adu di nambila hana me wala ni Sala ne izude, engú bini, nabhuka gba ani-e gie lie ne sidi de. <sup>20</sup> Ani adu bha nabhuka me Ebhe ahá ehe inde ani apa me ni ahá e pi ni-e maha. Ani du ne bua bhisi bhisi de da napa me ni gbe 'to ni 'to Ebhe-e de. Engú bini, nabhuka inde ani adu ne e bhú Ebhe-e, adu bha naha angu pi ani ngú nanu ne kalanu, ani atsia adu adhögö Ebhe. <sup>21</sup> Ani adu nabhuka na paká me Ebhe ne angu ngú namene engú inde ani apa me ni améne e-o.

<sup>22</sup> Ka nabhuka gba Abalahama-a, Ebhe au ani bhú djila e me a ko ngbili kpála. <sup>23</sup> I du me Bhuku gba Ebhe-e nde apa me, Ebhe au

ani bhú djila e me, a ko ngbili kpála-a, a ko bha bini pi ani kpi e kpi de. <sup>24</sup> Eli bhomu-o aye di lie pi ní okpála inde li Ebhe aú o bhú djila e me ní ne okpála na ngbingbili-o. Padhá de, anga ní ne nabhuka bhú Ebhe inde azuku Yesu Ngámá gba ní-e bhú ká okpála inde amu-o. <sup>25</sup> Ebhe apu Yesu pi okpála ngubula me u bhele ani li 'ngú na siti 'ngú gba ní-o. Ebhe atsia azuku ani bhú ká okpála inde amu-o ngú napa me ní kolo ngbingbili bhú djila ni.

## 5

*Yesu ato guo 'ngú sunda ní ne Ebhe*

<sup>1</sup> I nde lie me Ebhe au ní me ní ne okpála na ngbingbili bhú djila e ka ní abhuka ani lie, ní mbia inde-e ne guo 'ngú sunda ní ne Ebhe li kpadji gba Yesu Kilisito , Ngámá gba ní-o. <sup>2</sup> Yesu abhulu kpadji pi ní ngae ngubula me Ebhe suno bádha bhú 'bu gba e pi ní li kpadji na nabhuka . Nabhuka gba ní-e alu pí bádha bhú 'bu bhomu-o. Ní la bhadi ngakpi djali anga ní nga'o 'to ní me Ebhe ahá di sangu pi ní maka ani aha pi Yesu lie-o. <sup>3</sup> A pise bha bini li bhobhomu-o de. Ní di ngakpi ndjili bhú likabhu ní ngazu e anga ní ambila me likabhu ngaha pi ní nambila nadu ne 'ndjá bua. <sup>4</sup> Nadu ne 'ndjá bua ngaha pi ní nasia angu bhú kpéke da 'ngú, ní sia angu bhú kpéke da 'ngú-o, bhobhomu-o ngaha pi ní me ní 'o 'to ní li engú li Ebhe apa me ní améne e-o. <sup>5</sup> Ní du na'o 'to ní 'to engú li Ebhe apa me ní améne e mo-o, a padhá ade. Padhá de, anga li kpadji gba Bu Bhobua-a , Ebhe asuno me ní abedhe ne mukunda pi ní bedhe.

<sup>6</sup> A ko paká, nedhinga ní adu lie me ní nde ti da nagbe 'ndji ní de-e, Yesu Kilisito akpi li 'ngú

gba ní osisiti okpála li nedhinga inde li Ebhe a'o nani e-o. <sup>7</sup> Ní mbila hana me, da napa me kpála ziba nakpi li 'ngú gba ngbili kpála kpekpeke. Nedhinga koko-o, kpála ti da naziba mangbo nakpi li 'ngú gba kpála na bádha 'ngú. <sup>8</sup> Engú bini, ehe inde asuno me Ebhe ne mukunda pi ní-e ngae inde: nedhinga ní adu nga bha lie bhú siti 'ngú-o, Yesu Kilisito akpi li 'ngú gba ní-o.

<sup>9</sup> I nde la lie me mbia inde-e Ebhe au ní okpála na ngbingbili bhú djila e li kpadji na ngute ani-e, ní mbila me ní akóbho bhú 'bhe ke 'ngú gba Ebhe-e li kpadji na ngute ani. <sup>10</sup> Nani kalanu, nedhinga ní adu lie nayala Ebhe-e, Ebhe ato guo 'ngú sunda ní ne o li kpadji nakpi gba Ndili gba e-o. Kaka-a, ní mbila ndjindji me maka li Ebhe ato guo 'ngú lie sunda ní ne o ato-o, ani akóbho bhadi ní li kpadji gba Ndili gba e, anga Ndili ango-o bhú mukobho. <sup>11</sup> La matá pépé-e, ní ngakpi djali li 'ngú li Ebhe amene e li kpadji gba Ngámá gba ní Yesu Kilisito-o. Padhá de, anga ani amene me guo 'ngú li sunda ní mbia inde-e ne Ebhe.

*Ní ali bhú mangimbo ka Adamu , ní akobho ka Yesu*

<sup>12</sup> Ní mbila hana me, siti 'ngú ali píla doto ka koli kpála bini má kpikili! A 'li kpála ango-o me Adamu . Siti 'ngú ango-o atsia azu kuo. Ka li ndu okpála hana amene siti 'ngú lie, kuo atsia akolo li ndu uo hana. <sup>13</sup> Kala me Ebhe ha líli gba e pi Moidje-e, siti 'ngú adu nani píla doto. Engú bini, inde lie me Ebhe nde ha nga nani líli gba e pi okpála de-e, ani du na'o 'to e 'to siti 'ngú gba uo de. <sup>14</sup> La-a, abana a adu lie mo-o, nayie li Adamu, nakolo li Moidje , kuo adu ne angu pí ndu okpála hana, abana pí okpála bhende i mene siti 'ngú maka Adamu andjo nani



'li Ebhe lie de-o. Adamu nani ne kulu kpála inde a ayo nani me ani go-o.

<sup>15</sup> Engú bini, siti 'ngú gba Adamu-o kpo 'ndji e ne bisagu li Ebhe aha e padhá-a de. Eu ade, okpála bhelé amu kabula siti 'ngú gba koli kpála bini bhomu-o. Engú bini, bádha bhú 'bu gba Ebhe-e ane ne engbé. La di e, bisagu inde ani aha e padhá pi okpála bhelé li kpadji gba koli kpála bini inde 'li e me Yesu Kilisito-o, ane di ne engbé. <sup>16</sup> Bádha bhú 'bu li Ebhe aha e pi okpála-a naae ngazu ngua koko. A vití bini ne siti 'ngú inde li koli kpála bini bhomu-o amene e de. Siti 'ngú li koli kpála bini bhomu-o amene e, amene me Ebhe 'o 'ngú pí okpála. La-a, bádha bhú 'bu li Ebhe aha e pi okpála padhá pita u amene siti 'ngú lie bhelé-e aha pi u me u kolo ngbingbili kala Ebhe.

<sup>17</sup> A na paká me kuo apa lie li okpála ka siti 'ngú gba koli kpála bini. Engú bini, kpála bhe koko inde 'li e me Yesu Kilisito-o ngamene naae okulu na ngbeng-bengbe. Li kpadji gba ani-e, Ebhe ngasuno bádha bhú 'bu gba e inde ane mane-e pi okpála padhá, ani di ngau uo bhú djila e me a ko okpála na ngbingbili. Bha li kpadji gba ani-e, u asia mukobho na duduma, u aú di ngámá ka ani.

<sup>18</sup> Ní au me kabula siti 'ngú gba koli kpála bini inde 'li e me Adamu-o, mangimbo gba Ebhe-e ati pí ndu okpála hana. A bhadi moko, kabula bádha kulu gba kpála bini inde 'li e me Yesu Kilisito-o, okpála hana akolo ngbingbili bhú djila Ebhe. Bádha kulu gba Yesu Kilisito di ngaha mukobho pi okpála ngae. <sup>19</sup> Ka li kpála bini andjo 'li Ebhe lie, okpála bhelé ati bhú siti 'ngú. A bhadi moko, ka li kpála bini adje

'li Ebhe lie, okpála bhelé akolo ngbingbili bhú djila ani.

<sup>20</sup> Píndji bhende atsia líli gba Moidje-e, Ebhe aha nani pi okpála ngae. La natsitsia-a, siti 'ngú atsia abe matá ndu e naali. Engú bini, li bili inde li siti 'ngú abe ndu e lie, bádha bhú 'bu gba Ebhe abe la matá ndu e ane mane. <sup>21</sup> A bhadi moko, maka li siti 'ngú apana angu e pi okpála lie li kpadji gba nakpi-e, bádha bhú 'bu gba Ebhe-e apána bhadi angu e pi okpála li kpadji nakobho uo. Bádha bhú 'bu angu-o améne me ní kolo bhú mukobho na duduma li kpadji gba Yesu Kilisito, Ngámá gba ní-o.

## 6

*Ní akpi bhú dabili bini ne Yesu, ní azúku bhadi maka ani*

<sup>1</sup> Ní apá la ibili pi? Ní mene bha ibili siti 'ngú ne kalanu, amba bádha bhú 'bu gba Ebhe-e nu ne kalanu? <sup>2</sup> Belegu de bini! Ní amu li pabili gba siti 'ngú amu. Lele pi ní ti lie matá da nanu bhú siti 'ngú ne kalanu-o? <sup>3</sup> Yi mbila de me nedhinga ní asia batisimo lie, ndu ní hana ní akpetse liní bhú dabili bini ne Yesu Kilisito bhú nakpi ka e di? <sup>4</sup> Li kpadji na batisimo-o, ní amu ne ani bhú dabili bini, u atsia azi ní ne ani bhú lata bhú dabili bini ngubula me Ebhe 'dyi ní zuku di ní bhú ká okpála inde amu-o maka ani azuku Yesu Kilisito lie bhú angu gba e inde ane mane-o. Ani azuku ní ngubula me ní du di ne lele mukobho na mbia.

<sup>5</sup> Padhá de, anga maka ní akpetse liní ne ani lie bhú ngua nakpi inde ani akpi e-e, ní azúku bhadi ngua nazuku inde ani azuku e-o. <sup>6</sup> Ní mbila ndjindji me, nedhinga li Yesu Kilisito akpi lie li kulusi-e, Ebhe agi lele mukobho gba ní na kalanu-o bhadi li kulusi oo ngubula me lele mukobho bhomu-o kpi di, amba ní adú matá

obalise gba siti 'ngú de. <sup>7</sup> Padhá de, anga kpála inde akpi-e, akoto bhú bali gba siti 'ngú akoto. <sup>8</sup> Ɔ ðu me ní nde akpi bhú dabili bini ne Yesu Kilisito akpi-e, ní bhadi ne nabhuka me ní adú bhadi ne aní bhú mukobho. <sup>9</sup> Yesu Kilisito azuku nani azuku. Ní mbila hana me nayie li 'kpi bhomu-o, aní kpi matá-a de. Nakpi matá ne angu pí aní ade. <sup>10</sup> Bhú nakpi ka aní e-e, aní akpi li pápá na siti 'ngú bhutsibhutsi bini má kpikili! Aní nde lie bhú mukobho mbia inde-e, aní bhú mukobho pí Ebhe. <sup>11</sup> A viti bhadi bini, ngayi di-e, yi 'o liyi mágito me yi amu li pápá gba siti 'ngú-o amu. La mbia inde-e, yi bhú mukobho pí Ebhe li kpadji na makpètse gba yi ne Yesu Kilisito.

<sup>12</sup> Ɔ nde lie mo-o, a ayo matá de me siti 'ngú ko angu e pí kute yi na kukuo inde-e de. Yi adhúku li lele gumu na sisiti gba kute yi bhomu-o de. <sup>13</sup> Yi a'ó matá oyá yi de me adu bhú kulu gba siti 'ngú maka otia kulu gba aní-e de. Yi ha mangbo liyi pí Ebhe maka okpála inde amu, u atsia azuku. Yi ha liyi libhomu ngú kulu gba Ebhe maka otia kulu ngú namene ngbili 'ngú . <sup>14</sup> Padhá de, anga a ayo de me siti 'ngú ko matá angu e pí yi-e de, anga yi matá sa líli ade, engú bini yi mangbo sa bádha bhú 'bu gba Ebhe-o.

*Ní matá ne obalise gba siti 'ngú ade, ní ibili ne obalise gba Ebhe*

<sup>15</sup> Mbía inde-e, ní matá ngadhúku sa líli ade, ní mangbo sa bádha bhú 'bu gba Ebhe. Ɔ nde li mo-o, a ayo me ní nu bha ne siti 'ngú ne kalanu anga ní nde sa bádha bhú 'bu gba Ebhe? Belegu de bini! <sup>16</sup> Yi mbila hana me i ðu me mu nde bhú kulu gba kpála bini ngú namene engú aní akunda e-e, mu ne bali gba kpála inde mu nde bhú kulu gba e-o. Ɔ ðu me

mu nde bhú kulu gba siti 'ngú-o, mu ne bali gba aní. Mu ðu bhú kulu gba Ebhe-e, mu ne bali gba aní. Yi mbila la me, siti 'ngú ngato kpála bhú kuo. Engú bini, namanga Ebhe ngamene me Ebhe 'o kpála ngbingbili bhú djila e.

<sup>17</sup> Heni pí Ebhe, anga yi ðu nako ne obalise gba siti 'ngú, la mbia inde-e, yi abhuka Ebhe. Yi atsia aziba di ne bua yi bini nadu bhú mukobho nakpata lele nasuno inde u asuno e pí yi-o. <sup>18</sup> Ebhe agbegbe yi bhú bali gba siti 'ngú-o agbegbe, yi atsia akolo obalise gba aní ngú namene engú inde ngbingbili. <sup>19</sup> Ma ngakpokpo 'ngú bhomu-o pí yi ne nasusuno li kute obalise, anga yi ngake mboli engú má gala ade. Nani kalanu-o, yi aha kute yi libhomu maka obalise inde bhú kulu gba siti 'ngú inde ngazu kpéke 'ndji li pabili gba Ebhe. Maka yi aha nani liyi lie libhomu pí siti 'ngú-o, mbia inde-e, yi ha di liyi libhomu pí Ebhe maka obalise inde bhú kulu gba ngbili 'ngú ngubula me lele mukobho gba yi-e ðu bhende nganga li Ebhe manga.

<sup>20</sup> Nedhinga yi adu nako lie obalise gba siti 'ngú-o, ehe bini ade inde i ti nako da natima yi me yi mene ngbili 'ngú. <sup>21</sup> Nedhinga yi adu lie amene osisiti 'ngú inde nga'o naki numu li yi bhomu-o, yi asia bhúbhú mangua bádha 'ngú dho? Ehe bini ade! Ongú bhomu-o ngatima kpála bhú kuo. <sup>22</sup> La mbia inde-e, Ebhe agbegbe yi bhú siti 'ngú agbegbe, yi atsia akolo okpála na kulu gba aní-o. Li kpadji bhomu-o, yi asia nadu bhú mukobho inde nganga li Ebhe-o. Ali soso-o, yi asia mukobho na duduma. <sup>23</sup> Padhá de, anga makalá gba siti 'ngú-o, a ko nakpi, engú bini, Ebhe naae ngaha pí okpála mukobho na duduma inde

bhú Yesu Kilisito Ngámá gba ní-e padhá.

## 7

*Ní aze bhú bali gba líli-e aze*

<sup>1</sup> Ondaise ma, yi mbila engú inde ma adji apa e hana, anga yi ambila líli-e ndjindji. Yi mbila hana me líli ngako angu e pí kpála bha bini li nedhinga ani nde lie bhú mukobho-o. <sup>2</sup> Ní ha nga kukulu li elø inde bhú kuva. Nedhinga li 'ko ani nde lie tété-e, ani tí da na'o ká ani ngú nanu naha bhoko koko de, anga líli ziba mo-o de. † dɔ la me 'ko ani nde akpi-e, ehe bini inde ani matá kpadji pí ani ngú naha bhoko koko ade. <sup>3</sup> Bhobhomu-o apa me, i dɔ me elø yie nu ha bhoko koko me 'ko ani nde nga bha tété-e, líli apa me elø bhomu-o akunda bhoko gba kpála koko. † dɔ la me 'ko ani nde akpi ma kpi-e, líli ne engú bini pí ani ade. Kaka-a, ani tí da naha bhoko koko. U pá li ani de me ani aha bhoko gba kpála koko-o de.

<sup>4</sup> A bhadi pí yi moko, ngayi ondaise ma. Yi akolo li pabili gba líli maka okpála bhende amu, anga Yesu Kilisito akpi mada yi. Kaka-a, yi ibili ne okpála ka ani, ngaani kpála inde li Ebhe azuku e-o. Ebhe amene mo-o ngubula me ní dɔ azu pí ni onguwa na babadha. <sup>5</sup> Nedhinga ní adu nani akobho lie maka li osisiti gumu na kute ní adu atima ní lie, líli adu apana pí ní me, a inde-e siti 'ngú. La-a, ní dje mo-o, kute ní adu mangbo atima ní me ní mene osisiti 'ngú bhomu-o. Osisiti 'ngú angu-o adu atima ní ne kalanu ngú nazu nguwa inde ngatima kpála bhú kuo. <sup>6</sup> Engú bini, mbia inde-e, maka ní amu lie li pápá gba ehe inde a'o nako ní bhú bali-e amu-o, líli matá ne engú pí ní

ade. Kaka-a, ní tí da namene kulu liní pí Ebhe li lele bhe na mbia. Ní améne kulu angu li kpadji gba Bu Bhobua , a adú matá li lele bhe na kalanu ní adu amene e sa líli inde u aye e maye-e de.

*Líli gba Ebhe-e asuno siti 'ngú gba ní-e mbámá*

<sup>7</sup> † dɔ mo-o, ní pa me líli ne ehe na sisiti? A mo-o ade! † dɔ ka líli de-e, ma de mbila siti 'ngú de. U yé nani bhú líli de me: «Mo odú ne gumu 'he gba kpála de-e»,† ma de mbila de me nadu ne gumu 'he gba kpála ne siti 'ngú-o de. <sup>8</sup> Nedhinga ma ambila líli bhomu-o lie, siti 'ngú au kpadji e abhú ma. A tsia amba bhúla ma me ma dɔ ne gumu ohe gba okpála ngangá. Padhá de, anga li líli dɔ de-e, siti 'ngú kó angu e pí ma de. <sup>9</sup> Nani kalanu me ma nde mbila nga líli de-e, bua ma adu má bii! La-a, nedhinga ma akø mboli engú li Ebhe akunda e lie, siti 'ngú me ni ngani bhomu, <sup>10</sup> ma atsia akpi. Líli inde li Ebhe aha e ngubula me aha mukobho pí okpála-a, aha naae muma nakpi. <sup>11</sup> Padhá de, anga ma ambila líli-e lie, siti 'ngú au kpadji e bhú ma. A apite bua ma, ma atsia akpi kaka.

<sup>12</sup> Bhobhomu-o atima ní naziba me ndu líli-e hana ayie ka Ebhe, la di-e ndu ongu inde u aye e bhúbhú-o hana ayie ka ani. Ehe na sisiti bhúbhú belegu ade bini. <sup>13</sup> A akunda napa me ehe na babadha-a abhøø ma ngae? A mo-o ade! A abhøø mangbo ma ne siti 'ngú. Siti 'ngú-o aha líli, ani atsia abhøø ma nedi. A mene lie mo-o ngubula me okpála mbila me siti 'ngú bha ne siti 'ngú. Li kpadji gba líli-e, siti 'ngú atsia asuno la ibili me ni ane ne siti mane.

† 7:7 7:7 Tsia bhú Eki. 20:17; di ne bhú Det. 5:21.

*Nganí okpála-kuti-e, ní ngagu gbele ne siti 'ngú inde abedhe bhú ní bedhe-o*

<sup>14</sup> Ní mbíla hana me líli-e ayie ka Ebhe. La ngama-a, ma ne kpála lí angu nde bhú e ade, ma ne bali gba siti 'ngú. <sup>15</sup> Ma ngake mboli engú inde ma ngamene e ade. Padhá de, anga ma ngamene engú inde ma kúnda namene e de. Ma mangbo ngamene bhende ma ayala namene e-o. <sup>16</sup> Í dú me ma nde ngamene engú inde ma ngayala e, bhobhomu-o asuno me ma abhuka me líli ne bádha 'he. <sup>17</sup> Bhobhomu-o apa me nedhinga ma ngamene siti 'ngú lie, a ko ma de, a ko mangbo siti 'ngú inde asi kuti e abhú ma ko. <sup>18</sup> Padhá de, anga ma ambíla me bádha 'ngú si kuti e bhú ma de, a akúnda napa me bhú kúte ma, ngama kpála inde lí angu nde bhú e ade-o. A na paká me a bhú ma ne gumu namene bádha 'ngú, engú bini angu namemene la bhú ma ade. <sup>19</sup> Padhá de, anga bádha 'ngú inde ma akúnda namene e-e, ma ngamemene ade. Siti 'ngú inde ma ayala namene e-e, ma mangbo ngamene e. <sup>20</sup> Lí ma dú amene engú inde ma akúnda namene e de-e, a kúnda napa me, a ko ma de, a ko mangbo siti 'ngú inde asi kuti e abhú ma-o.

<sup>21</sup> Í nde lie mo-o, engú ma ngau e ndu 'kpí hana ngae inde: ngama kpála inde ne gumu namene bádha 'ngú-o, a bha bini bhú ma ne angu namene siti 'ngú. <sup>22</sup> A lí bua ma-a, ma ngakpi ndjili lí líli gba Ebhe-o. <sup>23</sup> Engú bini, a bhú kúte ma-a, ma ngau líli koko inde ngagu gbele ne líli inde lí bua ma ngaziba e-o. Líli inde bhú kúte ma-a nga'o ma bali gba líli na siti 'ngú inde abhú ma-o. <sup>24</sup> A ko líkabhu muma! A agbégbé ma sakpa kúte ma inde ngato ma lí kpadji nakpi inde-e da? <sup>25</sup> Heni

pi Ebhe lí kpadji gba Yesu Kilisito, Ngámá gba ní-o!

Ma tí da nabu 'lí ma me, lí bua ma-a, ma ne bali gba líli gba Ebhe, engú bini, lí kúte ma-a, ma ne bali gba líli gba siti 'ngú.

## 8

*Nadu bhú mukobho inde lí Bu Bhobua aziba e*

<sup>1</sup> Mbia inde-e, engú na'o'o matá pí okpála inde akpetse lío bhú dabíli bini ne Yesu Kilisito ade. <sup>2</sup> Padhá de, anga líli gba Bu Bhobua inde ngaha mukobho pí kpála lí kpadji gba Yesu Kilisito agbegbe ma bhú bali gba líli na siti 'ngú bhú dabíli bini ne bali gba nakpi-e agbegbe. <sup>3</sup> Líli gba Moidje tí nako da naha mukobho pí ní de, anga nganí okpála-kuti-e, angu bhú ní ngú namene olíli-e hana-a de. Engú bini, Ebhe amene ehe inde lí líli-e tí nako da namene e de-o. Ngú na'e osisiti 'ngú gba ní-e, aní atima Ndíli gba e makpe me aní go kobho maka ní osisiti okpála. Bhobhomu-o akúnda napa me Ebhe kúnda siti 'ngú inde lí okpála ngamene e belegu de bini.

<sup>4</sup> Ebhe amene mo-o ngubula me nganí okpála inde ngakobho maka Bu Bhobua akúnda lie, ní mene ndu 'ngú hana inde lí líli-e aziba e, ní améne matá ongú maka lí kúte ní aziba lie de. <sup>5</sup> Padhá de, anga mu dú akobho nakpata ongú inde lí kúte mu aziba e, mu dú bha nabhundja engú na kúte. Engú bini, mu dú akobho nakpata ongú inde lí Bu Bhobua akúnda e-e, mu dú bhadi nabhundja ongú gba Bu Bhobua. <sup>6</sup> Í dú me mu nde ngabhundja bha bini pí ongú inde lí kúte mu akúnda e-e, mu kpí. Engú bini, lí mu dú abhundja bha bini pí bhende lí Bu Bhobua gba Ebhe-e ngakúnda e, Ebhe méne me mu

du bhú mukobho bhú dabili bini ne guo 'ngú .

<sup>7</sup> Okpála bhende ngabhundja bha bini ongu li kute o aziba e, a ko obhulu yala gba Ebhe. U ngamene lili gba Ebhe-e ade, u ti la di da namemene de. <sup>8</sup> Okpála bhende ngamene mo-o, u ti da nanga li Ebhe de.

<sup>9</sup> La ngayi-e, yi ngamene engú maka li kute yi aziba lie ade. Yi ngamene engú maka li Bu Bhobua aziba lie-o. Padhá de, anga Bu Bhobua gba Ebhe ngadu bhú yi. Kpála inde li Bua gba Ebhe-e ngadu bhú e ade-e, a ko makilisito de. <sup>10</sup> Li Yesu Kilisito du bhú yi-e, li pápá na kute yi-e, yi amú mamu, anga yi nde amene siti 'ngú. La li pápá na bua yi-e, Bua gba ani-e ngaha mukobho pi yi, anga yi akolo ngbingbili bhú djila Ebhe. <sup>11</sup> La di-e, li Bua gba Ebhe inde azuku nani Yesu bhú ká okpála inde amu-o du bhú yi-e, a na paká me Ebhe bini bhomu-o ahá di mukobho pi okute yi na kukuo bhomu li kpadji gba Bua gba ani inde ngadu bhú yi-o.

<sup>12</sup> Kaka-a, ondaise ma, a ayo me ní du akobho maka li Bu Bhobua akunda lie, a ayo de me ní du akobho maka li kute ní akunda lie de. <sup>13</sup> Padhá de, anga yi du akobho maka li kute yi makpe ngatima yi lie, yi mú. Engú bini, li Bu Bhobua teteke yi me yi 'o namene siti 'ngú na paká-a, yi sía mukobho. <sup>14</sup> Padhá de, anga ndu okpála hana inde ngadhuku maka li Bua gba Ebhe-e akunda lie, a ko ongisi gba Ebhe.

<sup>15</sup> Bu Bhobua inde li Ebhe aha e pi yi-e nga'o yi bhú bali ade, ani di ngabedhe matá yi ne tsulu ade. A ko mangbo Bua inde ngamene me yi kolo ongisi gba Ebhe. Ka angu gba Bua bhomu-o, ní ti da nagama 'ngú pi Ebhe ne na'i ani me: «Aba, 'Dyi ya!» <sup>16</sup> Bua gba Ebhe-e belegu

ngapapa ngae makpe pi ní abhú ní me ní ne ongisi gba Ebhe. <sup>17</sup> Ní ne ongisi gba ani-e na paká. A akunda napa me ní asía obabadha 'ngú inde li Ebhe apa me ní ahá e pi ní-e masia. Ní asía obabadha 'ngú bhomu-o nganí bhú dabili bini ne Yesu Kilisito. Maka ní ngazu likabhu lie bhú dabili bini ne ani-e, ní adú bhadi bhú dabili bini ne ani li bili gba ani na sangu-o .

*Sangu inde ní nga'o 'to ní 'to e-o*  
<sup>18</sup> Ma ambila na paká me olikabhu ní ngazu e mbia inde-e kpo 'ndji e ne sangu inde li Ebhe ambamba galikpe 'ta e pi ní-e belegu de bini. <sup>19</sup> Padhá de, anga ndu 'he inde li Ebhe abho e hana ngadjeke ne gugumu hana ekpi inde li Ebhe asúno lie mbamba me okukulu ongisi gba ni-e ngao dho. <sup>20</sup> Padhá de, anga ndu 'he inde li Ebhe abho e hana ati sakpa angu na padhá. A ko de me ohe bhomu-o akunda ngao-o de, a ko mangbo anga Ebhe ato uo sa angu bhomu-o ngae. Engú bini, ohe li Ebhe abho e ti da na'o nga matá 'to e 'to engú bini. <sup>21</sup> Engú angu-o me, ekpi akólo makolo li Ebhe tsía gbégbe bhú bali gba kuo ndu ohe inde ani abho e hana. U kpi matá-a de, u asía sangu maka ongisi gba Ebhe-o.

<sup>22</sup> Ní mbila hana me nayie nani aoo, nakolo pi mbia inde-e, ndu ohe li Ebhe abho e hana-a, ngazu likabhu, u di ngazu tate o maka ole inde li bhú 'bu e nde ngazu ka ezú. <sup>23</sup> Ohe inde li Ebhe abho e bha bini ngazu likabhu kpi e kpi ade, abana nganí okpála inde asía Bu Bhobua maka gina 'he inde li Ebhe aha e pi ní-e, ní di ngazu likabhu. Ní ngazu likabhu ali bua ní nedhinga ní ngadjeke lie me Ebhe mene me ní kolo ongisi gba ni, amba ani gbegbe la di ní libhomu bhú bali. <sup>24</sup> Ebhe akobho nani ní akobho, ní u nga la sangu

ango-o de, ní bha nga'o 'to ní toto. Li ní dũ au ongú inde ní nga'o 'to ní 'to e ne djila ní-e, a bhomu-o matá na'o 'to o 'to 'ngú de, anga a nde sakpa ní. Padhá de, anga kpála 'o'o 'to e 'to ehe inde aní au e ne djila e au-o de. <sup>25</sup> Engú bini, i dũ me ní nde u nga ehe inde ní nga'o 'to ní 'to e de-e, ní dũ nadjedjeke ne 'ndjá bua.

<sup>26</sup> Engú koko di ngae inde, Bu Bhobua ngateteke ní li kpadji gba Ebhe-o, anga angu nde bhú ní ade. Padhá de, anga ní mbila nayo Ebhe li lelele de. Bu Bhobua mangbo ngayo Ebhe mada ní ngae makpe. Aní ngayo Ebhe ne bua e hana da napa me u ti da napa ne ebhe de. <sup>27</sup> Ebhe mbila ndũ 'ngú hana inde bhú kpála. Aní ngambila di engú inde li Bu Bhobua ngakunda napa e hana. Padhá de, anga Bu Bhobua ngayo Ebhe mada omaha Ebhe maka li Ebhe akunda lie ngae.

<sup>28</sup> Ní mbila hana me ndũ 'ngú li Bu Bhobua ngamene e hana-a, aní ngamemene ngubula me okpála bhende ne mukunda pi Ebhe-e sia bádha 'ngú. A ko okpála inde li Ebhe a'i nani o me u mene engú inde ni akunda e. <sup>29</sup> Padhá de, anga Ebhe abhu nani uo kalanu, aní atsia apa di kalanu me ni améne me u kolo maka Ndili gba ni, ngubula me Ndili gba ni-e dũ ne gina 'zu bhú ká ongisi bhelé. <sup>30</sup> Obhe li Ebhe amene engú bhomu-o pi o-o, aní a'i di uo. Obhe aní a'i o-o, aní amene di me u kolo bhú djila ni okpála na ngbingbili . Obhe aní amene me u kolo bhú djila ni okpála na ngbingbili-e, aní amene di me u sia sangu gba ni-o.

*Ehe bini gbó bhusu ní ne mukunda li Ebhe nde ne e pi ní-e de*

<sup>31</sup> Nakpata ndũ 'ngú bhomu-o hana-a, ya ti da nabu tata-a me: «Li Ebhe nde lie pi ní-e, kpála bini ti da naha angu ní de.» <sup>32</sup> Ngaani Ebhe-e, aní gili Ndili gba e makpe pi ní de. Aní apu aní ngú napa me aní go kpi pi ndũ ní hana. Maka aní apu Ndili gba e lie pi ní-e, aní ahá di ondu 'he koko-o hana pi ní bhú bádha bhú 'bu gba e-o. <sup>33</sup> Kpála bini ne engú napa mapa li okpála li Ebhe abhu o ade. Padhá de, anga Ebhe ngae makpe au uo me u bhú djila ni ngbingbili.

<sup>34</sup> Kpála bini ti da na'o 'ngú pí okpála li Ebhe abhu o de. Padhá de, anga Yesu Kilisito ngae makpe akpi pi ní. Pépé-e, aní azuku, aní ali li pá 'kpa na kokpa gba Ebhe. Aní di ngayo Ebhe ngubula ní. <sup>35</sup> A ti da nagbo bhusu ní ne mukunda li Yesu Kilisito nde ne e pi ní-e da? Abana ní dũ bhú likabhu, abana ní dũ bhú kpéke da 'ngú, abana li okpála dũ nato mbolo li ní, abana ní dũ bhú ndibhili, abana li kpéke 'ngú dũ nago ngú ní, abana li okpála dũ nakodho ngulu ní, abana li gumu dũ namene ní, ehe bini inde ayóko mukunda li Yesu Kilisito nde ne e pi ní-e belegu ade bini. <sup>36</sup> A maka u aye lie bhú bhuku gba Ebhe-e me:

«Okpála ngagili ndũ 'kpí hana me o bhøle ya kabula 'ngú gba mu-o. Okpála ngau ya mugito me ya ne okandøle inde u adji abhili o.†»

<sup>37</sup> La bhú ndũ 'ngú bhomu-o hana-a, ya ngaha angu ndũ ongú bhomu-o hana ka angu gba kpála inde ne mukunda pi ya-o. <sup>38</sup> Padhá de, anga ma ambila na paká me ehe bini inde agbo bhusu ní ne mukunda li Yesu Kilisito nde ne e pi ní-e ade. Abana i dũ me ní nde bhú mukobho, abana i dũ me ní nde amu, a viti bha bini. Abana

i dɔ oandjelu , abana i dɔ di onɔ́ na bití, abana onɔ́ na nakí, abana onɔ́ inde ngago, bini bhú káká-a gbó bhusú ní ne mukunda gba Yesu Kilisito de. <sup>39</sup> Abana i dɔ ohe inde ngadu abhúlá, abana ohe bhende ngadu asa doto, abana ndu ohe koko hana inde li Ebhe abho e, ehe bini ade inde i tí da nagbo bhusú ní ne mukunda inde li Ebhe nde ne e pi ní li kpadji gba Yesu Kilisito, Ngámá gba ní-o.

## 9

*Ebhe ngamene ndu 'ngú hana bhú ngu e*

<sup>1</sup> Ma ne kpála gba Yesu Kilisito ! Engú ma adji apa e inde-e, a ko kukulú 'ngú, ma pa eu de. Bu Bhobua ngasuno muma me 'li ma-a, a ko paká, bua nakpokpo kú 'ngú gba ma la bhadi ngaziziba moko me a ko paká. <sup>2</sup> A ko paká me bua ma ne likabhu naali, likabhu inde li bua ma-a ndjindjia di-i de. <sup>3</sup> Li kpadji dú uu-o, ngama makpe, ma de ayó me Ebhe tɔ pɔdjɔ li ma, amba ani gbo bhusú ya ne Yesu Kilisito i dɔ me a nde tí da nateteke ondaise ma omaYuda u-o, anga a ko ondaise ma na piga. <sup>4</sup> A ko okpála na piga gba Isalaele. Ebhe abhu uo me u kolo ongisi gba ni, ani aha pi uo me u u sangu gba ni-o, ani akodho gandja ne uo bhutsibhutsi, ani aha líli gba e pi uo, ani asuno lele nayo pi uo, ani apa me ni améne obabadha 'ngú pi uo. <sup>5</sup> A ko odi Abalahama ne ongisi gba e-o. La di-e Yesu Kilisito ngae makpe li pápá na kute-e, a ko kpála na piga gba uo. Ngaani, a ko Ebhe inde pí 'ndji ndu 'he hana-o. A ayo me okpála toko ani duduma ne duduma. A adu moko.

<sup>6</sup> Ma pa de me engú li Ebhe apa me ni améne e, aneke de. Ní mbila hana me a ko de me ndu

odi Isalaele hana bha ne ongisi gba ani makpe-e de. <sup>7</sup> La di-e, ndu odi Abalahama hana bha ne ndu ongisi gba ani makpe ade. Padhá de, anga Ebhe apa pi Abalahama me: «Odi mu akóto li kpadji gba Isaka.†» <sup>8</sup> A akunda napa me ndu ongisi li Abalahama azu o hana ne ongisi gba Ebhe ade. Pi Ebhe-e, kukulú odi Abalahama bha bini ne ongisi inde ani azu o nakpata lele maka li Ebhe apa nani lie me ni ahá pi ani-o. <sup>9</sup> Padhá de, anga Ebhe apa nani engú na ongisi ang-o pi ani me: «Bhú kalanga na sisi-e, bhú ngua onedhinga inde-e, ma agie matá lima, ma abháka me Sala nde azu ndili na bhobhoko.†»

<sup>10</sup> A viti bhadi bini ne bhe gba Lebeka-o. Ndu ongisi gba ani-e bhisi hana, koli 'dyi uo bha bini, ogbi ní Isaka. <sup>11-12</sup> La-a, kala napa me u zu uo-o, Ebhe apa me: «Bhebhele-e adú kpála na kulu gba ndindili-o.†» Ebhe apa 'ngú bhomu-o kala me saka uo mene bádha 'ngú, i dɔ di-e siti 'ngú. Lebeka nde zu nga uo de. Ebhe amene mo-o ngú nasuno me ni memene bha bini engú maka ni akunda lie. Ani ngabhu okpála bha bhú ngu e. Ani tsia de me kpála ang-o amene bádha 'ngú ne me ni amene siti 'ngú-o de. <sup>13</sup> A maka u aye lie bhú bhuku gba Ebhe-e me Ebhe apa me:

«Ma ne mukunda pi Yakobho, ma ayala Esau.†»

<sup>14</sup> † dɔ me a nde mo-o, ní pá me ngbili 'ngú bhú Ebhe adi? Belegu de bini! <sup>15</sup> Padhá de, anga Ebhe apa pi Moidje me:

«Ma kunda namene bádha 'ngú pi kpála-a, ma méne.

I dɔ di me ma nde akunda nadje ndjinga kpála-a, ma djé.†»

<sup>16</sup> Bhobhomu-o akunda napa me, li Ebhe mene bádha 'ngú pí kpála-a, ani amene bha pí ani anga ani adje ndjinga ani. A ko de me ani amene pí ani anga kpála ango-o akunda ngae, ne me ani amene tété kulu-o de. <sup>17</sup> A maka engú inde ani apa nani e bhú Bhuku gba e pí 'ngbé ngámá na Edjipito me: «Ma a'o mu 'ngbé ngámá ngubula me ngama Ebhe-e ma pana angu gba ma bhú mu, di ne ngubula me ndu okpála na pila doto libhomu mbila me ma ne da-ie.†» <sup>18</sup> Kaka-a, ní ngau me li Ebhe kunda nadje ndjinga kpála-a, ani djé, ani kunda nato kpéke 'ndji bhú 'ndji kpála-a, ani tó.

*Ní ti da nadjidji 'ngú sa 'li Ebhe de*

<sup>19</sup> Nedhinga koko-o, kpála bini ti da nayi ma me: «Li Ebhe dú nabhu okpála maka ani akunda lie, ka ni ani nde lie nga'o 'ngú pí okpála, u nde bha ngamene bhomu-o bhende ani akata uo me u mene e?» <sup>20</sup> Ngamu kpála inde ngayi ma mo-o, mu ne da ngú nadjidji 'ngú sa 'li Ebhe? Madakpa ti da nayi kpála inde apo ani-e uu me: «Mo omene ma me-e ka ni?» Belegu de bini!† <sup>21</sup> Bhalu napo lusa ti da namene engú inde ani akunda e ne doto na lusa-a hana. Ani ti da nagbo bhusu doto na lusa-a bhisi. Ani há bhe bini-e, ani méne tété lusa na kpéke mase, ani há bhe koko-o, ani méne tété lusa u amemene kulu ne e ndu 'kpi hana.

<sup>22</sup> Li Ebhe kunda nadu maka bhulu napo lusa-a, naamu bhúbhú ne ni? Ani amene mo-o ngubula nasuno ke 'ngú gba e,

di ne me a bhú ni ne angu. La-a, ani akibila nani ne 'ndjá bua okpála inde a ayo nani me u sia ke 'ngú gba ani-o, inde adu nako masakpe de napa me ani bhili o-o. <sup>23</sup> Ebhe amene mo-o ngubula me okpála mbila me sangu abedhe bhú ni bedhe pí okpála inde ni nde ne ndjinga pí o-o. Ani aleke uo kalanu me u sia sangu gba ni-o. <sup>24</sup> Ní di ne okpála inde ani a'i o pí e. Ani bhú bha bini okpála ani a'i o pí e bhú ká omaYuda de, ani abhu di uo bhú ká opiga inde ne omaYuda ade-e uu. <sup>25</sup> A bhomu-o engú ani apa e bhú bhuku gba polofeta Oze me:

«Okpála inde nani i dɔ okpála ka ma de-e,

ma a'í uo me a ko okpála ka ma.

Okpála inde nani ma dɔ ne mukunda pí o de-e,

ma apa me ma ne mukunda pí uo.†

<sup>26</sup> Li bili nako ma apa pí uo lie me:

«Ngayi-e, yi ne okpála ka ma ade-e,

bha li bili bini bhomu-o, ma apa pí uo me:

«Yi ne ongisi gba ma, Ebhe na mukobho-o.†»

<sup>27</sup> La pí okpála na Isalaele-e, polofeta Isaya agama di 'ngú li 'ngú gba uo-o. Ani atsia apa me: «Abana li omafsalaele du bha bhelé maka sike abhu 'ngbé 'ngu-o, yi mbila me obhe li Ebhe akóbho o-o bhelé ade. <sup>28</sup> Padhá de, anga engú li Ebhe apa me ni améne e pila doto-o, ani améne bha hana má kpəkəbhə! Ani améne la di má gala!†» <sup>29</sup> A di maka polofeta Isaya apa matá nani lie me:

«Li Ebhe Ngámá Apí 'Kpi bhili nani ongisi gba ní-e hana-a,

† 9:17 9:17 Tsia bhú Eki. 9:16. † 9:20 9:20 Tsia bhú Isa. 29:16, 45:9. † 9:25 9:25 Tsia bhú Oz. 2:25. † 9:26 9:26 Tsia bhú Oz. 2:1. † 9:28 9:28 Tsia bhú Isa. 10:22-23.



ní de andjula maka okpála na Sodomó ne Gomolo andjula nani lie-o.†»

*Okpála koko bhú ká omafalaale bhuka de*

<sup>30</sup> † du mo-o, ní ti da nabu tata pi? Engú inde ya akunda nabu tata ne e ngae inde, okpála inde bhú piga gba omafalaale ade-e, gili nako nandu ngbingbili kala Ebhe de. La-a, Ebhe au uo me a ko okpála na ngbingbili bhú djila e ka u abhuka ni lie-o. <sup>31</sup> La-a, okpála na Isalaele inde adu agili me o kolo ngbingbili bhú djila Ebhe li kpadji namene lili-e, kolo nedi ali soso de. <sup>32</sup> U kolo nedi ali soso de ka ni? U kolo de, anga u adu abhundja me o kolo ngbingbili bhú djila Ebhe ka okulu gba o-o. U du abhuka de me kpála ngakolo ngbingbili bhú djila Ebhe ka nabhuka gba e de. U atsia ado 'dhu o li teme inde ngagbo 'i kpála-o. <sup>33</sup> Bhuku gba Ebhe-e ngapa 'ngú na teme ang-o me: «Yi gbo 'dje yi!

Ma nga'o bhú gudhu na Siona teme bini inde li okpála ngado 'dhu o lie.

A ko teme inde ngagbo 'i kpála.

La-a, kpála abhuka ani-e, ani dji 'ngbu e li ani 'kpi bini de.†»

## 10

<sup>1</sup> Ondaise ma, engú inde ma ngakunda e ne bua ma hana-a, a ko me omafalaale sia mukobho. Ma ngayo Ebhe pi uo nganga. <sup>2</sup> Ma au me u akunda namene kulu lio pi Ebhe na paká. Engú bini, u mbila kpadji ang-o de. <sup>3</sup> U mbila kpadji li Ebhe ngau kpála li e bhú djila e ngbingbili-e de. U agili nade kpadji bhe gba o ngao

makpe. Kaka-a, u ayala nakpata kpadji li Ebhe ngau kpála li e bhú djila e ngbingbili-o. <sup>4</sup> Padhá de, anga li Yesu Kilisito ago lie, ani andjia angu lili gba Moidje-o. Ani amene mo-o ngubula me ndu okpála hana inde abhuka ni-e kolo ngbingbili bhú djila Ebhe.

*Ebhe ngakobho ndu okpála hana inde abhuka Yesu*

<sup>5</sup> Moidje aye engú pindji lele maka li Ebhe ngau okpála lie bhú djila e ngbingbili ka nakpata lili-o. Ani me: «Kpála inde akpáta ndu lili-e hana-a, adu bhadi bhú mukobho kaka.†» <sup>6</sup> Engú bini, u papa pindji lele maka li Ebhe ngau okpála lie bhú djila e ngbingbili ka nabhuka me: «Mo opá li bua mu de me: «A a'ú abhúla da?†» Padhá de, anga li mu pa mo-o, a akunda napa me, mu ngayi li bua mu me: «A a'ú abhúla da ngú napa pi Yesu Kilisito me ani go bhaka ní kuto ei.» <sup>7</sup> Mo opá di li bua mu de me: «A akó asatø da?» Padhá de, anga li mu pa mo-o, a akunda napa me, mu ngayi li bua mu me: «A akó asatø da ngú nagbegbe Yesu Kilisito bhú ká okpála inde amu-o?†» <sup>8</sup> Bhuku gba Ebhe-e apa mangbo me: «'Li Ebhe dengo mu masikpe.

A bhú 'bhø mu, a di li bua mu.†»

Engú ya ngakpokpo e-e, a pindji eli bhomu, a ayo me okpála bhuka eli ang-o. <sup>9</sup> Li mu pa ne 'bhø mu kala ndu okpála hana me Yesu ne Ngamá-a, li mu bhuka di ne bua bini me Ebhe azuku ani bhú ká okpála inde amu-o, Ebhe kóbho mu. <sup>10</sup> Padhá de, anga ní bhuka Yesu Kilisito li bua ni-e, ní kolo ngbingbili bhú djila Ebhe. Ní pa ne 'bhø ní mbámhá me Yesu Kilisito ne Ngamá-a, Ebhe kóbho

† 9:29 9:29 Tsia bhú Isa. 1:9. † 9:33 9:33 Tsia bhú Isa. 8:14-15, 28:16. † 10:5 10:5 Tsia bhú Lev. 18:5. † 10:6 10:6 Tsia bhú Det. 30:13. † 10:7 10:7 Tsia bhú Det. 30:13. † 10:8 10:8 Tsia bhú Det. 30:14.

ní. <sup>11</sup> A maka u aye lie bhú Bhuku gba Ebhe-e me: «Ndu okpála hana inde abhuka ani-e, ani dji 'ngbu e li uo 'kpí bini de.†» <sup>12</sup> Ka 'ngú ang-o, abana omaYuda, abana di okpála bhende ne omaYuda ade-e, u viti bha bini. Koli Ngámá gba uo bha bini. Ani ngaha obabadha 'ngú gba e bhelé pi ndu okpála hana inde ngayo ka ani me ani teteke o-o. <sup>13</sup> A maka u aye lie bhú Bhuku gba Ebhe-e me: «Ndu okpála hana inde ayó ka Ebhe Ngámá me ani teteke o-o, ani akóbho uo makobho.†»

<sup>14</sup> A moko. Engú bini, li okpála bhuka ani de-e, u ayó ani lele pi? Li okpála dje engú gba ani-e de-e, u abhúka ani lele pi? Li kpála kpokpo 'ngú gba ani-e de-e, okpála adjé engú gba ani-e lele pi? <sup>15</sup> Li ani tima okpála de-e, u anú nakpokpo 'ngú gba ani-e lele pi? U aye di bhú Bhuku gba ani-e me: «Tsitsia nga, a ko djali nau okpála inde ngakpokpo obabadha ngali-e nago ne kpokpokpo!†» <sup>16</sup> Engú bini, a ko de me ndu okpála hana abhuka Bádha Ngali-e de. Padhá de, anga Isaya ayi nani belegu me: «Ngámá, a abhuka ongali ya akpokpo e pi okpála da?†»

<sup>17</sup> Ní mbila me, kpála ngabhuka nedhinga inde ani adje ngali lie-o. Ngali bhomu-o, a ko bhende ngalu pí 'li Yesu Kilisito-o.

<sup>18</sup> I nde lie mo-o, ma ngayi me, a akanda napa me omaYuda dje nga ngali bhomu-o di? A mo-o ade, u adje! Bhuku gba Ebhe-e ngapa me:

«Ngbikpi ne sukpe u ngakpokpo 'li Ebhe ne ndu bili hana píla doto.

'Li uo akolo ne li ndu 'dje doto badha hana.†»

<sup>19</sup> Ma ngayi matá engú bini, okpála na Isalaele ke mboli engú u adje e di? A mo-o ade, u akó mbolimboli akó! Ngaiza kalanu-o, Moidje apa nani me:

«Ebhe apa me:

«Ma améne engú da napa me ngayi okpála gba ma-a yi kolo ne siti

bua pi okpála inde ne okpála gba ma ade-o.

Ma améne engú da napa me yi kolo ne ke 'ngú pi opiga inde li imbilangú

nde bhú 'ndji o ade-o.†»

<sup>20</sup> Pipita-a, polofeta Isaya apa belegu me:

«Ebhe apa me:

«Okpála inde i du agili ma de-e, au ma.

Ma asuno lima pi okpála inde i du ayo ma de-o.†»

<sup>21</sup> La li 'ngú gba omaIsalaele-e, Ebhe apa me:

«Ekpí libhomu, ma ato 'kpa ma pi omaha ma me u gogo, engú bini, u amene kpéke 'ndji,

u ayala engú inde ma adu napa e-o.†»

## 11

*Ebhe ne ndjinga pi omaIsalaele*

<sup>1</sup> Ma ngayi me, i nde lie mo-o, Ebhe abala omaha e abala? A mo-o ade! Padhá de, anga ngama makpe-e, ma ne maIsalaele. Abalahama ne ogbi ma, u azu ma bhú piga gba Bendjame. <sup>2</sup> Ebhe bala omaha e inde ani abhu nani o pi e bhutode-e de. Yi mbila engú inde li Bhuku gba Ebhe apa e hana li bili inde li polofeta Eliya adu alopola lie lie kala Ebhe li 'ngú gba okpála na Isalaele-o. <sup>3</sup> Eliya adu alopola lie me: «Ngámá, u abhili opolofeta gba mu-o. U

† 10:11 10:11 Tsia bhú Isa. 28:16. † 10:13 10:13 Tsia bhú Djl. 3:5. † 10:15 10:15 Tsia bhú Isa. 52:7. † 10:16 10:16 Tsia bhú Isa. 53:1. † 10:18 10:18 Tsia bhú Ets. 19:5. † 10:19 10:19 Tsia bhú Det. 32:21. † 10:20 10:20 Tsia bhú Isa. 65:1. † 10:21 10:21 Tsia bhú Isa. 65:1-2.

atsia agugumu di odabili inde ya tsutsulu 'he pi mu pi e-o. Ma atigala bha koli ma kpi ma kpi. U la bhadi ngagili nabhelo ma.†»

<sup>4</sup> Ebhe atsia agie pi ani pi? Ebhe agie pi ani me: «A mo-o ade, mu kpi mu kpi ade. Ma alila okpala ketō mananika pi ma makpe. U tutu lipuku o kala Bala inde li okpala ngau e maka Ebhe-e de.†»

<sup>5</sup> Bhú okpi na naki inde-e, a bhadi moko. Dú omafalaeele koko atigala, inde li Ebhe abhu o pi e ka bádha bhú 'bu gba e-o. <sup>6</sup> Ani bhú uo ka babadha okulu gba uo de, ani abhu uo ka bádha bhú 'bu gba e-o. Li Ebhe bhú uo ka obabadha okulu gba uo-o, ní de apá me bádha bhú 'bu gba ani-e, a ko bádha bhú 'bu de.

<sup>7</sup> Bhobhomu-o akunda napa me okpala na Isalaele sia ehe inde u adu nagili e de. Okpala bini bini bhú ká uo inde li Ebhe abhu o-o asia ehe inde u adu nagili e bha bini ngao. La pi okpala koko-o, Ebhe ato kpeke 'ndji bhú uo. <sup>8</sup> A maka u aye lie bhú Bhuku gba Ebhe-e me:

«Ebhe amene me u aké mboli 'ngú bini de.

Ani ani djila uo me u aú kpi de.

Ani atsia abuku di 'dje uo me u adjé 'kpi de nakolo pi naki.†»

<sup>9</sup> Davidi atu di nani 'kpa e li uo me:

«Oanokomia gba uo du pi uo maka ekú,

a adú pi uo maka ndjukudu li kpadji,

amba u sia mbini kulu inde u ngamene e-o.

<sup>10</sup> A ayo me Ebhe dudu djila uo me u aú 'kpi de.

A ayo me Ebhe ha likabhu pi uo, me 'ngbu uo kodho.†»

<sup>11</sup> Ma atsia ayi matá me, li okpala na Isalaele ati lie, u ati bha na paká-a? A mo-o ade! Engú bini, ka u ati lie, okpala inde ne omafalaeele ade atsia asia mukobho. Ebhe amene mo-o ngubula napa me omafalaeele du ne siti bua li okpala inde ne omafalaeele ade-o. <sup>12</sup> Li omafalaeele amene siti 'ngú lie, Ebhe amene bádha 'ngú pi ndu okpala na doto hana. Li omafalaeele ati lie, Ebhe aha tia pi okpala inde ne omafalaeele ade-o. I du me Ebhe nde amene bádha 'ngú pi ndu okpala na doto hana nedhinga inde li omafalaeele andjo 'li ani lie, ani améne la matá bádha 'ngú pi uo ane mane, nedhinga li ndu omafalaeele hana agie lio lie li pápá gba ani-o.

*Lele maka li Ebhe akobho okpala inde ne omaYuda ade-e lie-o*

<sup>13</sup> Mbía inde-e, ma ngagama 'ngú inde-e pi yi okpala inde ne omaYuda ade-o. Ma ne bhulu titima inde li Ebhe atima e pi okpala inde ne omaYuda ade-o. Kaka-a, ma ngau kulu inde li Ebhe aha e muma ne tata. <sup>14</sup> Ka ma ngau kulu ango-o lie ne tata-a, ma abhundja me okpala na piga gba ma-a adjé siti bua li ma tété, li Ebhe tsia kóbho di bini bini bhú ká uo. <sup>15</sup> Li Ebhe abala omaYuda lie, okpala na opiga koko atsia apo bhúla o de ani. Li Ebhe ató guo 'ngú sunda o ne omaYuda lie, adú djali na ngéngbé. A adú maka kpala inde akoto bhú kuo, ani atsia agie lie bhú mukobho!

<sup>16</sup> I du me u nde aha ndu mapa na kalanu-o pi Ebhe-e, a akunda napa me mapa bhomu-o libhому ne naani. Li u ha sie ndula pi Ebhe-e, a akunda napa me oyáyá-a hana di ne naani. <sup>17</sup> Okpala

† 11:3 11:3 Tsia bhú 1 Ong. 19:10, 14. † 11:4 11:4 Tsia bhú 1 Ong. 19:18. † 11:8 11:8 Tsia bhú Det. 29:3; di ne bhú Isa. 6:10, 29:10. † 11:10 11:9-10 Tsia bhú Ets. 69:23-24.

na Isalaele maka 'lá ndula na olive. Ebhe ava oyáyá bini bini. Aní atsia ato yi, opiga koko inde ne omaYuda ade-e, bhú da oyáyá bhomu-o. Obabadha ohe inde li omaYuda adu asia e-e, ngayi omatobhakayi-e, yi di ngasisia maka li oyá ndula asisia angu lie ka sie e-o.

<sup>18</sup> Kaka-a, a ayo de me yi u okpála inde maka oyá ndula inde u ava e padhá-a de. Yi nga'o liyi ne bhúlá ka ní? Sie ndula-a dha bhú yá e de, yá ndula adha mangbo bhú sie ndula ko. <sup>19</sup> Eu ade. Mú ti da napa me: «Ebhe ava nani oyáyá bhomu-o ngubula napa me, ngama-a, aní to ma mada uo-o.» <sup>20</sup> A ko paká me, Ebhe ava nani uo anga u bhuka nani aní de. Mo osia dabili bhomu-o anga mo obhuka ani. Engú bini, mo o'ó límú kaka abhúlá naali de. Dú mangbo ne tsulú Ebhe. <sup>21</sup> Padhá de, anga Ebhe va nani omaYuda padhá de, a asi la masi maka mú. OmaYuda la nani ne okukulu oyá ndula na olive ngao. Mú lila límú de-e, Ebhe akódho bhadi mú maka aní ava uo lie-o. <sup>22</sup> Mbila me Ebhe babadha, aní la di ngakodho 'ngú gba okpála ngbingbili. Aní ngakodho 'ngú gba okpála bhende nga'o ká kpadji gba ani-o. Aní la babadha li pápá gba mú-o. La-a, a ayo me nú bha li kpadji gba ani-e ne kalanú. † dú mo-o de-e, aní akódho di mú maka aní ava oyá ndula koko lie-o.

<sup>23</sup> La pí omaYuda-a, i dú me u nde a'o kpéke 'ndji gba o-o, Ebhe gie matá uo li bíli u adu nako lie-o. Padhá de, anga Ebhe ne angu ngú nagie uo matá bhú da o ne toto. <sup>24</sup> Ngayi okpála inde ne omaYuda ade-e, yi maka oyá ndula na olive inde u lu e malu de. Ebhe atsia ava yi, aní ago a'o yi li kute 'lá olive bhende u alu e malu. U memene la mo-o de. La pí omaYuda-a, uo maka oyá ndula

na olive bhe u a lu e malu. Kaka-a, dá napa me Ebhe gie uo bhú dá o-o kpekpeke ade.

*Ndjinga gba Ebhe-e pí ndu okpála hana*

<sup>25</sup> Ondaise ma, ma akunda me yi mbila engú inde li Ebhe awo e mawo-o, ngubula me yi aú liyi mugito de me yi ne obhulu imbilangú-o de. Yi mbila me té okpála na Isalaele adú nagbe kpéke 'ndji li 'ngú gba Ebhe-o, nakolo li 'kpí inde li ndu okpála inde ne omaYuda ade-e hana agie lio lie agba Ebhe-o. <sup>26</sup> Abhomu-o li 'kpí ang-o, li omatsalaele hana tsia kóbho maka li Bhuku gba Ebhe-e apa lie me:

«Kpála inde akóbho okpála ayie bhú Siona :

Aní a'é osisiti 'ngú gba odi Yakobho.

<sup>27</sup> A bhomu-o gandja inde ya akódho e ne uo-o, nedhinga ma a'é osisiti 'ngú gba uo lie-o.†»

<sup>28</sup> Li ní tsia maka li omaYuda ayala Bádha Ngali-e lie, a ko obhulu yala gba Ebhe. Engú bhomu-o amene lie lie mo-o, ngayi okpála inde ne omaYuda ade-e, yi atsia asia bádha 'ngú gba Ebhe-o. Engú bini, ní tsia maka li Ebhe abhú uo lie me u dú bhú ngu ní-e, Ebhe ndu 'kpí hana ne mukunda pí uo ka gandja nani u akodho e ne onguo ogbi uo mo-o. <sup>29</sup> Padhá de, anga li Ebhe ha 'he pí kpála-a, aní gbúlú matá ka aní de. Aní 'i di kpála-a, aní dji matá mabhundja gba e li pabili gba ani-e de. <sup>30</sup> Nani kalanu-o, ngayi di-e, yi andjo 'li Ebhe. Engú bini mbia inde-e, yi ambila ndjinga gba Ebhe anga omaYuda andjo di 'li ani. <sup>31</sup> A bhadi moko. U andjo bhadi 'li Ebhe mbia inde-e ngubula me Ebhe dje ndjinga yi. Ebhe amene mo-o ngubula me

ngauo di-e ni dje ndjinga uo mbia inde. <sup>32</sup> Padhá de, anga ka li ndu okpála hana andjo 'li Ebhe lie, u akolo maka obhulú tikpu. Ebhe amene mo-o ngubula me ni dje ndjinga ndu uo hana.

*Ebhe ngbéngbé ane ndu 'he hana*

<sup>33</sup> A na paká me bádha bhú 'bu gba Ebhe ane ne engbé mane! Imbilangu gba ani-e ane ndu 'ngú hana! Ani mbila ndu 'ngú hana! Engú inde ani ngabhundja e li bua e, kpála bini ti da nakpokpo kúkú de. Kpála bini ti da nakø mboli okpadji gba ani-e de. <sup>34</sup> A maka u aye lie bhú Bhuku gba ani-e me:

«Kpála bini mbila mabhundja gba Ebhe Ngámá-a de.

Kpála bini ade inde i ti da nakpokpo pi Ebhe

lele engú inde ayo me ani mene e-o.†

<sup>35</sup> Kpála bini ade inde akpo naha 'he pi Ebhe

ngubula napa me ani du ad-jeke

me Ebhe gie pi ni-o.†»

<sup>36</sup> Padhá de, anga ani abho ndu 'he hana ngae. Ani ngamene me ndu 'he ni abho e hana du bhú mukobho. Ndundu hana ngagie lie agba ani. A ayo me okpála dhøgø Ebhe duduuma ne duduuma! A adu moko.

## 12

*Ebhe aha kulu pi okpála kpikpikpi*

<sup>1</sup> Ondaise ma, i nde lie me Ebhe nde adje ndjinga ní mo-o, ma ayo ka yi me yi ha liyi ngayi makpe pi Ebhe maka makiso inde na uu. Yi du libhomu pi ani ngú nanga li ani. Pi yi-e, a bhomu-o kukulú lele nadhøgø Ebhe-o. <sup>2</sup> Yi adú amene 'he maka okpála na doto inde-e de. Yi 'o mangbo me Ebhe dji yi, amba

ani ha pi yi imbilangu na mbia. Yi mene mo-o, yi tsia mbíla me Ebhe akunda ni i-e. A akunda napa me yi ambíla engú inde na babadha, engú inde anga li ani, engú inde li kpadji.

<sup>3</sup> Kabula kulu inde li Ebhe aha e muma ka bádha bhú 'bu gba e-e, ma ngapa pi ndu yi hana me: yi aú liyi ne bhúlá nane mane de. Yi mbila mangbo lele yi makpe, maka yi nde lie-o. Yi tsia lele nabhuka li Ebhe aha e pi yi ngú nambíla me da yi ngae dho-ie. <sup>4</sup> Koli 'lá kpála bha bini, engú bini oyáyá tété bhelé inde ngamene okulu kpikpikpi. <sup>5</sup> A viti bhadi pi ní bini. Abana ní nde lie bhelé-e, ní akolo koli kpála bini bhú nakpøtsø liní ne Yesu Kilisito-o. Ní atsia akpøtsø liní maka oyá kpála-kuti akpøtsø lie lie-o.

<sup>6</sup> Ebhe aha pi ní oangu ngangá ngú namene kulu nedi. Ani aha pi ní padhá bhú bádha bhú 'bu gba e, li lele maka anga li bua ani lie-o. Kaka-a, li suka ní sia angu nakpokpo eli inde ayie ka Ebhe-e, a ayo me, ani kpokpo nakpata lele nabhuka gba e-o. <sup>7</sup> Li Ebhe ha pi kpála koko angu nateteke obi e, a ayo me ani teteke uo. Li Ebhe ha pi koko angu nasuno 'ngú pi okpála koko-o, a ayo me ani suno. <sup>8</sup> Li Ebhe ha pi kpála koko angu nato masi bhú obi e-e, a ayo me ani to masi bhú uo. Li Ebhe ha pi kpála koko angu napu 'he pi obi e-e, a ayo me ani pu ne bua e hana. Li Ebhe ha pi kpála koko angu nau pí 'ndji obi e-e, a ayo me ani mene kulu ang-o ne bádha bua. Li Ebhe ha pi kpála koko angu nateteke obhulú ndibhili-e, a ayo me ani mene ne djali.

*Lele nakobho gba omabhuka*

<sup>9</sup> Yi du ne mukunda pi ndu okpála hana ne bua bini. Yi adú

† 11:34 11:34 Tsia bhú Isa. 40:13. † 11:35 41:3.

11:34-35 Tsia bhú Isa. 40:13; di ne bhú Djib.

apa 'ngú na mukunda bha ne 'bhø yi de. Yi yala siti 'ngú, yi dhedhe li bádha 'ngú. <sup>10</sup> Yi du ne mukunda sunda yi maka a ayo lie me ondaise du ne mukunda sunda o. Yi du ne mazima sunda yi na paká paká. <sup>11</sup> Yi ha liyi pi kulu ne angu yi hana. Yi adú ne obhulá ipio de. Yi mene kulu liyi pi Ngámá ne bua yi hana. <sup>12</sup> Yi du bhú djali kabula yi nga'o 'to yi lie 'to ohe li Ebhe apa me ni ahá e pi yi-o. Yi kibila okpekpeke da 'ngú ne 'ndjá bua. Yi ayó Ebhe ne ndala tété de. <sup>13</sup> Yi teteke ondaise yi inde bhú ndibhili-o. Yi sia obhende ngago li yi-e ndjindji.

<sup>14</sup> Yi yo Ebhe me ani tuko bisagu pí okpála bhende ngato mbolo li yi-o. Yi ayó de me Ebhe tu pødjø li uo de. <sup>15</sup> Yi kpi djali bhú dabili bini ne obhende bhú djali-o. Yi ku 'gbá bhú dabili bini ne obhende bhú 'gbá-o. <sup>16</sup> Yi du nadge liyi sunda yi ne obi yi ndjindji. Yi adú ne 'ngbé 'ndji de, engú bini, yi ziba ndu kulu hana inde u ahá e pi yi-o, abana i du bha kulu li okpála ngau e padhá. Yi aú liyi de me ni ambila ndu 'ngú hana-a de.

<sup>17</sup> Yi agie siti pi siti de. Yi le ne kpeke me yi mene bádha 'ngú kala ndu okpála hana. <sup>18</sup> I du li naayi-e, yi mene ne kpeke me yi du bhú guo 'ngú ne ndu okpála hana. <sup>19</sup> Ngayi okpála na mukunda gba ma-a, yi agie siti pi okpála de, yi 'o mangbo me Ebhe gie siti pi uo ngae. Padhá de, anga Ngámá Ebhe apa bhú Bhuku gba e me:

«Ngama-a, ma agie siti 'ngú li okpála amene e li yi-e ngama.

Ngama makpe,

ma améne uo nakpata lele engú u amene e li yi-o.†»

<sup>20</sup> Engú bini, pi yi-e, yi mene mangbo maka li Bhuku gba Ebhe-e apa lie me:

«I du me a nde li bhulá yala gba mu-o ne gumu-o,  
mu de ha ezu pi ani.

I du li ani ne gumu 'ngu-o,  
mu de ha engu nandji mandji pi ani.

Padhá de, anga mu mene mo-o, a adú mugito me mu ngabu ndjekedhe djua na dédé pí 'ndji ani.†»

<sup>21</sup> Mo o'ó de me siti 'ngú ha angu ni-e de. Engú bini, ha mangbo angu siti 'ngú ne namene bádha 'ngú.

## 13

*A ayo me ní manga ongámási mamanga*

<sup>1</sup> A ayo me ndu yi hana, yi manga ongámási inde pí 'ndji ní-e mamanga. Padhá de, anga ndu okpála hana inde ngau ngámá-a, u au ka Ebhe. Ani a'o okpála inde ngau ngámá-a ngae. <sup>2</sup> Kpála inde ngagbe kpéke 'ndji li ongámási-e ngagbe bhomu-o kpéke 'ndji li líli inde li Ebhe a'o e-o. Okpála inde ngamene mo-o agbéle ke 'ngú gba Ebhe-e pí o makpe. <sup>3</sup> Okpála inde ngamene ngbili 'ngú kpekpe ongámási de, engú bini, a kpekpe mangbo ongámási ne okpála inde ngamene siti 'ngú-o. Kaka-a, li mu kunda me ni adú nakpe ongámási de-e, mene bádha 'ngú ngubula me mu du nanga bhú djila ongámási manga.

<sup>4</sup> A mo-o. Padhá de, anga ongámási ngamene kulu inde li Ebhe aha e pi uo-o ngubula me u teteke yi, amba yi du amene bádha 'ngú. I du la me mu nde ngamene siti 'ngú-o, mu de kpe ongámási makpe! Padhá de, anga angu li Ebhe aha e pi uo-o, ani ha

padhá de. Aní aha pí uo, anga aní a'o uo bhú kulu gba e ngú nasuno ke 'ngú gba e pí okpála inde ngamene siti 'ngú. <sup>5</sup> Kaka-a, a ayo me yi manga ongámási mamanga. Yi amána bha bini uo ka nakpe ke 'ngú gba Ebhe-e de, engú bini, yi manga di uo ka anga yi ambila li bua nakpokpo kú 'ngú gba yi-e ndjindji me, a ko bádha 'ngú.

<sup>6</sup> A di bhomu-o ta 'ngú yi ngakala mandjandja ka e ko. Padhá de, anga Ebhe a'o ondombi na mandjandja ngubula me u mene kulu bhomu-o. <sup>7</sup> Yi ha pí kpála ne kpála ehe inde ati ne aní-o. Yi futa ndu mandjandja hana inde a ayo me yi futa e-o. Yi manga ongámási inde a ayo me yi manga o-o mamanga.

*Ndu líli hana agbite lie bhú mukúnda*

<sup>8</sup> Yi adú ne bopulu gba kpála bini de. Yi du bha bini ne koli bopulu bini na mukúnda inde yi nde ne e sunda yi-o. Kpála inde ne mukúnda pí obi e-e, aní amene bhomu-o ndu líli gba Ebhe-e hana má kpekebhe! <sup>9</sup> Líli gba Ebhe-e apa me: «Mo okúnda òlò, i du di-e bhoko gba kpála koko de, mo obhéle kpála de, mo ozí 'he de, mo odú ne gumu 'he gba kpála koko de.» Olíli bhomu-o ne ndu olíli koko hana agbite lie bhú koli líli bini inde me: «A ayo me kúnda kilí mu maka mo okúnda limu lie ngamu makpe.†» <sup>10</sup> Kpála inde ne mukúnda pí kilí e, aní méne aní sisiti belegu de bini. Kaka-a, mu du ne mukúnda pí kilí mu-o, mo omene bhomu-o ndu líli-e hana.

*A ayo me ní du bedhe ndu nedhinga hana*

<sup>11</sup> Yi 'o 'ngú bhomu-o li bua yi, anga yi mbila nedhinga ní nde bhú e hana. A inde-e nedhinga

ayo lie me yi du li zuku. Nedhinga inde li Ebhe akóbho ní lie akolo masikpe, a matá tsutsu maka nedhinga nani ní abhuka lie ade. <sup>12</sup> Ekpí-e abi abhue, ngbikpi ibili masikpe. Kaka-a, ní adú matá namene engú na biti de. Ní dyi li kute ní otia 'gú inde u agúgu 'gú ne e ne ngbikpi-o. <sup>13</sup> Ní mene 'he liní ndjindji maka okpála inde ngamene 'he ne ngbikpi. Ní adú nadho osisiti 'bi de, ní adú nalangba ne pandi de. Ní adú nasi ne olísi, i du di-e obhosi ngangá de. Ní adú nagbe bhayiki de, ní adú di ne 'ngbé bua li okpála koko de. <sup>14</sup> Yi dyi mangbo Ngámá Yesu Kilisito li kute yi maka tia 'gú. Yi adú nadhuku maka li kute yi akúnda lie de.

## 14

*Yi aú okpála koko bhú djila yi padhá de*

<sup>1</sup> Yi sia kpála inde bhúbhuku bhú 'bu nabhuka-o, yi abí bhayiki ne aní pindji engú bhende atsia mabhundja gba aní-e de. <sup>2</sup> Ní ha nga kukulu pindji engú na ezú. Okpála koko ngabhuka me o ti da nazú ndu 'he hana. La-a, okoko inde bhúbhuku bhú nabhuka-a ngabhundja me a ndjindji bha bini ne nazú okpálá. <sup>3</sup> A ayo de me kpála bhende ngazú ndu 'he hana-a u kilí e inde i zú mbilika de-e padhá-a de. A ayo di de me kpála bhende i zú mbilika de-e u di bhende ngazú ndu 'he hana-a padhá-a de. Padhá de, anga Ebhe aziba di aní. <sup>4</sup> Ngamu-o, mu ne da ngú nakodho 'ngú gba kpála na kulu gba kpála koko-o? Ngámá na kulu ne angu nakodho 'ngú gba kpála na kulu gba e ngae, abana aní mene babadha, ne me aní ti li kpadji na kulu gba e-o. Ma au la bhadi me aní alú kpekpeke, anga

† 13:9 13:9 Tsia bhú Eki. 20:13-17; ne bhú Det. 5:17-21; di ne bhú Lev. 19:18.

Ngámá Yesu ne angu ngú nali ani me ani atí-i de.

<sup>5</sup> Okpála koko ngabhundja me oekpí koko ane okoko ne tata. La pí okpála koko, ndu 'kpí hana viti bha bini. A ayo me kpála ne kpála kò mboli engú ani ngabhundja e li bua e ndjindji me a ko kukulu 'ngú. <sup>6</sup> Kpála inde ngau ekpí koko ngbéngbé-e, ngadhögò Ngámá gba ní-o. Kpála inde ngazu ndu 'he hana-a, ngadhögò di bhomu-o Ngámá gba ní-o. Padhá de, anga ani ngagie heni pí Ebhe pindji ezú inde ani ngazu e-o. Kpála inde i zu ndu 'he hana de-e ngamene mo-o ngú nadhögò Ngámá gba ní-o. Ani di ngagie heni pí Ebhe pindji ezú inde ani ngazu e-o.

<sup>7</sup> Yi mbila ndjindji me kpála bini ade bhú ká ní inde ngakobho ka e makpe. Kpála bini la di ade inde ngakpi ka e makpe. <sup>8</sup> I du me ní nde bhú mukobho-o, ní ngakobho ngubula me ní toko Ngámá gba ní-o. I du me ní mu di-e, ní amu ngú naha sangu pí Ngámá gba ní-o. Kaka-a, belegu ní du bhú mukobho, belegu ní mu di mamu-o, ndu ní hana, ní ne okpála gba Ngámá Yesu. <sup>9</sup> Padhá de, anga Yesu Kilisito akpi, ani atsia azuku ngubula nadu ngámá gba okpála inde bhú mukobho bhú dabili bini ne obhende amu-o. <sup>10</sup> I nde lie mo-o, ngamu-o, mu ngakodho 'ngú gba ndai mu-o ka ní? Ngamu-o, mu ngau ndai mu bhú djila mu padhá ka ní? Ndu ní hana, ní alú kala Ebhe ngú napa me ani kodho 'ngú gba ní-o. <sup>11</sup> Padhá de, anga Bhuku gba Ebhe-e apa me:

«Ngama Ebhe Ngámá inde uu-o,  
ma apa pí yi na paká me  
ndu okpála hana atútu lipuku o  
kuto kala ma.  
Ndu uo hana tsia pá me ma ne  
Ebhe.†»

<sup>12</sup> Bhobhomu-o akunda napa me kpála ne kpála bhú ká ní akpókpo engú inde ani amene e ngae makpe-e pí Ebhe.

*Mo otó kilí mu bhú siti 'ngú de*

<sup>13</sup> I nde lie mo-o, yi 'o nakodho 'ngú gba obi yi-e ma'o. Yi 'o mangbo li bua yi me a ayo de me ní mene engú inde li kilí ní asendele ka e de, ngú napa me ani li bhú siti 'ngú-o de. <sup>14</sup> Bhú makpøtsø gba ya ne Ngámá Yesu Kilisito-o, ma ambila na paká me ezú na ligina ade. Engú bini, li kpála bini bhundja me ezú inde-e sisiti-e, ezú bhomu-o akolo ligina pí ani. <sup>15</sup> I du me mu nde ngato likabhu li bua ndai mu pindji ezú inde mu ngazu e-e, bhobhomu-o a akunda napa me mu ne mukunda pí ani ade. Kaka-a, lila limu me ní ató kpála inde li Kilisito akpi pí e bhú ngita kabula 'ngú na ezú de. <sup>16</sup> Li ehe du bhú djila mu ndjindji-e, mo oméne de, i du me mu nde au me, li mu mene e li okpála koko pá 'ngú tété sisiti-o.

<sup>17</sup> Padhá de, anga Nau gba Ebhe-e , a ko engú na ezú, i du di-e engú na pandi de. Engú bini, Nau gba Ebhe-e mangbo ne engú inde atsia kulu li Bu Bhobua ngamene e bhú ní-o. Bu Bhobua ngaha pí ní engú inde ngbingbili, ani ngaha pí ní nadu ne guo 'ngú sunda ní, ne nadu bhú djali. <sup>18</sup> Kpála inde ngamene kulu gba Yesu Kilisito li kpadji bhomu-o nganga li Ebhe ngae. Okpála ngapa di li ani me ani ngamene bádha 'ngú. <sup>19</sup> I nde lie mo-o, a ayo me ní gili namene engú inde ngato guo 'ngú sunda ní, engú inde ngamene me ní teteke liní li kpadji gba Ebhe-o.

<sup>20</sup> Mo obhélo kulu gba Ebhe-e ka engú na ezú de. A na paká me ndu ezú hana ndjindji ngú nazuzu. La-a, a ndjindji ade me ní du nazú

† 14:11 14:11 Tsia bhú Isa. 45:23.



'he inde ngato kpála bhú siti 'ngú-o de. <sup>21</sup> Engú inde ndjindji-e ngae inde: a ayo natse nazú mbilika, a ayo natse nandji pandi, a ayo natse ndú 'he hana inde i ti da nato kilí mú bhú siti 'ngú. <sup>22</sup> Lila engú inde li bua mú ngapa e pi mú pindji engú na ezú di ne bhe na pandi-e pi mú makpe. Mo opá pi kpála koko de, engú ango-o dú bha sunda mú ne Ebhe. A ko djali pi kpála inde li bua e yoko e li 'ngú bini de bhú ká ongú inde li bua ani ngatima ani me ani mene e-o. <sup>23</sup> La-a, Ebhe a'ó 'ngú pí kpála inde ngazú 'he inde li bua nakpokpo kú 'ngú gba e ngayoko e li e-o. Padhá de, anga ani ngamene engú inde i lú pí nabhuka de. Yi mbila hana me, ndú 'ngú hana inde li kpála ngamene e me a nde lú pí nabhuka de-e, a ko siti 'ngú.

## 15

*A ayo me ní mene engú inde nganga li obi ní manga-o*

<sup>1</sup> A ayo me nganí okpála inde alú kpekpeke bhú nabhuka-a , ní teteke di okpála bhende kpekpeke ade-o. A ayo de me ní dú bha bini namene engú bhende nganga li ní-e de. <sup>2</sup> A ayo me ní mene engú inde nganga li obi ní ngubula nateteke uo, amba u nú li kpadji gba Ebhe-e ne kalanú. <sup>3</sup> Padhá de, anga Yesu Kilisito ngae makpe gili nani engú inde adú anga lie de. Engú bini, a akolo li ani maka u aye lie bhú Bhuku gba Ebhe-e me: «Okpála asobho mú, Ebhe, abhomú-o, sobho ango-o atsia aku li kute ma.†»

<sup>4</sup> Ndú ongú hana inde u aye nani e bhú Bhuku gba Ebhe-e , u aye ngubula nasuno pi ní kúkulu 'ngú, ngú napa me ní dú na'ó 'to ní 'to Ebhe. Padhá de, anga

Bhuku ango-o ngato bhú ní masi, a la di ngaha pi ní nadú ne 'ndjá bua. <sup>5</sup> A ayo me Ebhe inde ngato masi bhú okpála-a, inde di ngaha 'ndjá bua pi uo-o mene me yi dú ne mabhundja bini, nakpata lele mukobho gba Yesu Kilisito. <sup>6</sup> Abhomú-o, ndú yi hana bhú dabili bini, ne koli eli bini, yi tsia dhógø Ebhe, 'Dyi Ngámá gba ní Yesu Kilisito-o.

*Ndú okpála hana atóko Ebhe*

<sup>7</sup> Kaka-a, yi dú nasia liyi sunda yi ne bua yi bini maka li Yesu Kilisito asia di yi lie-o. Yi mene mo-o ngubula me okpála dhógø Ebhe. <sup>8</sup> Ma apa pi yi na paká me, Yesu Kilisito akolo nani kpála na kulu gba omaYuda, ngubula me ani suno pi uo me Ebhe papa naae eu de. Ani ago nani ngú nabedhe 'bhø engú inde li Ebhe apa nani me, ní améne e pi onguo ogbi uo-o. <sup>9</sup> A ayo nani di me okpála inde ne omaYuda ade-e, toko Ebhe kabula ndjinga gba ani-o. A maka u aye lie bhú Bhuku gba Ebhe-e me:

«Kaka-a, ma atóko mú bhú ká okpála inde ne omaYuda ade,

ma alí oetsi pi mú.†»

<sup>10</sup> Bhuku gba Ebhe-e apa matá di me:

«Ngayi okpála inde ne omaYuda ade-e,

a ayo me yi kpi djali bhú dabili bini

ne okpála gba Ebhe-o.†»

<sup>11</sup> A atsia apa matá di li bili koko me:

«Ngayi, ndú yi hana okpála inde ne omaYuda ade-e, a ayo me yi toko Ngámá Ebhe.

A ayo me ndú okpála hana toko ani.†»

<sup>12</sup> Polofeta Isaya apa di me:

«Kpála bini akóto bhú piga gba Yese,

† 15:3 15:3 Tsia bhú Ets. 69:10. † 15:9 15:9 Tsia bhú Ets. 18:50. † 15:10 15:10 Tsia bhú Det. 32:43. † 15:11 15:11 Tsia bhú Ets. 117:1.

ani agó ngubula nau ngámá  
pí 'ndjí okpála inde ne  
omaYuda ade-o.

Okpála ango-o a'ó 'to o 'to ani.†»

<sup>13</sup> A ayo me Ebhe inde amemene  
me okpála du na'o 'to o 'to ni-  
e bedhe yi ne djali bedhe di ne  
guo 'ngú , anga yi abhuka ani.  
Abhomu-o, yi tsia dú na'o 'to yi 'to  
ani na pakápaká bhú angu gba Bu  
Bhobua-o .

*Polo akpokpo 'ngú pindji kulu  
gba e*

<sup>14</sup> Ondaise ma, ma ambila  
mbámhá me yi abedhe ne bádha  
'ngú bhú yi bedhe. Ma mbila  
di hana me yi ambila ndu 'ngú  
inde a ayo me yi mbila e hana,  
di ne me yi ti da nasusuno sunda  
yi. <sup>15</sup> Belega inde lie mo-o, ongú  
bini bini bhú balua inde-e, ma  
ala pépé kpekpeke ngubula me  
'ndji yi ayie tété de. Ma aye mo-o  
kabula bádha bhú 'bu inde li Ebhe  
asuno e muma-o. <sup>16</sup> Ebhe a'o ma  
kpála na kulu gba Yesu Kilisito  
bhú ká okpála inde ne omaYuda  
ade-o. Ma aha lima libhomu pi  
Ebhe ngubula nakpokpo Bádha  
Ngali gba ani-e pi uo ngubula me  
u bhuka ani, amba u du maka  
makiso inde ngangá li ani manga.  
Makiso ango-o, Bu Bhobua a'o kpi  
pi ani.

<sup>17</sup> † nde lie mo-o, ma ne  
gindaginda bhú kulu inde ma  
ngamene e pi Ebhe-o, anga ya  
akpètse liya ne Yesu Kilisito bhú  
dabili bini. <sup>18</sup> Ma ti da napa  
'ngú koko bini de. Ma apá  
bha bini engú inde li Yesu Kil-  
isito amene e li kpadji gba ma-o.  
Ani amene me ma gbele okpála  
inde ne omaYuda ade-e kala Ebhe  
ngubula me u du namanga ani.  
Ani amene mo-o bhú oeli inde  
ma akpokpo e-o, di ne bhú okulu  
inde ma amene e-o. <sup>19</sup> Ani  
amene di mo-o bhú ongamba 'ngú

ngangá di ne bhú nau maka li  
Bu Bhobua gba ani-e adu nasuno  
angu gba e lie-o. Abhomu-o, ma  
atsia akpokpo Bádha Ngali gba  
Yesu Kilisito pi okpála ne ndu  
bili hana, nayie bhú Yelusalema  
nakolo makolo bhú ndu doto na  
Ilili. <sup>20</sup> Ma adu nakunda ndu 'kpi  
hana nakpokpo Bádha Ngali-e li  
bili inde li okpála dje nga engú  
gba Yesu Kilisito lie de-o. Ma du  
nakunda nakpokpokpo li bili inde  
u adje engú gba ani-e lie adje-e de,  
ngubula me ma ayiki eti li bili li  
kpála koko abhu ka kulu lie abhu-  
o de. <sup>21</sup> Ma amene maka u aye lie  
bhú Bhuku gba Ebhe-e me:

«Obhende u kpokpo nga nani  
engú gba ani-e pi o de-e,

u au ani.

Obhende i dje nga nani engú gba  
ani-e de-e,

u aké mbolimboli.†»

<sup>22</sup> A bhomu-o engú inde ani kpadji  
muma bhatsibhatsi me, ma akólo  
li yi de-o.

*Gumu gba Polo ngú nanu bhú  
gudhu na Loma*

<sup>23</sup> Kalanga bhelé ane, ma adu ne  
gumu nakolo li yi, engú bini, kulu  
adu nani kpadji muma. La mbia  
inde-e, kulu gba ma bhú ondu  
doto ango-o andjia. <sup>24</sup> Sunda 'kpi  
inde-e, ma adji bhú Esipanye. Li  
ma du nanu-o, ma apú bhú Loma  
ngubula me ní si mbo ne yi ekpi  
bhisi. Pipita-a, yi téteke ma me ma  
kodho 'kpi.

<sup>25</sup> La-a pi mbia inde-e, ma  
adi nga bhú Yelusalema ngubula  
nateteke okpála gba Ebhe inde  
oo-o. <sup>26</sup> Padhá de, anga omab-  
huka na Makedonia di ne Akai  
au ndjindji me o po bhúla tia  
ngubula nateteke omabhuka inde  
bhú ndibhili bhú Yelusalema ne  
di. <sup>27</sup> U abhundja engú ango-o bhú  
ngu o, a ayo la bhadi nako me

u mene moko. OmaYuda ateteke okpála bhende ne omaYuda ade-e ngubula me u sia bádha bhú 'bu gba Ebhe . Kaka-a, a ayo bhadi me okpála inde ne omaYuda ade-e teteke omaYuda ne oehe inde aneke ka uo-o. <sup>28</sup> Abhomu-o, i du me ma nde andjia kulu bhomu-o andjia-a, ma kódkho 'kpí bhú Esipanye. A akúnda napa me pita nandjia nagapa tia u apo bhúla e li uo-o. Kala nakodho 'kpí ka ma-a, ma apú ngaiza agba yi. <sup>29</sup> Ma ambila me ma akólo lie agba yi-e, Yesu Kilisito asúno bádha bhú 'bu gba e pi ní na kuo kuo.

<sup>30</sup> Ondaise ma, ma ngayo ka yi ne 'li Ngámá gba ní Yesu Kilisito, di ne 'li mukúnda inde li Bu Bhobua ngaha e me, yi kpòtsò liyi ne ma bhú gbele inde ma ngagu e ne nayo Ebhe muma. <sup>31</sup> Yi yo Ebhe me nedhinga ma akólo lie bhú Yudaya-a, okpála inde i bhuka Yesu Kilisito de-e ató mbolo li ma de. Yi yo di Ebhe me, omabhuka inde bhú Yelusalema sia oehe inde ma adjí ne e pi uo-o ne bádha bua. <sup>32</sup> Abhomu-o, i du me Ebhe nde akúnda-a, ma kólo agba yi ne djali li bua ma, ní tsia dú ne yi bhú dabili bini. <sup>33</sup> A ayo me Ebhe inde ahaha guo 'ngú-o du bhú dabili bini ne ndu yi hana. A adu moko.

## 16

*Polo yi okpála bini bini na Loma mayi*

<sup>1</sup> Ma ngakpokpo 'ngú pi yi pindji ndai ní na øøø Foebe. Aní ngamene kulu bhú Dadjua gba Ebhe inde bhú Sekele-o. <sup>2</sup> Li aní akólo lie agba yi-e, yi de sia aní ndjindji kabula 'li Ngámá gba ní Yesu Kilisito . A ayo me okpála gba Ebhe-e du namene moko. Yi teteke aní ne ndu 'he hana inde aní nde ne gumu e-o, anga aní

ateteke okpála bhelé, aní atsia ateteke belegu di ma.

<sup>3</sup> Ma yi Pilisila ne 'ko e Akuila mayi. Ngaya ne uo-o, ya amene kulu gba Yesu Kilisito bhú dabili bini. <sup>4</sup> U di me mu ngubula nakobho ma. Ma ngagie heni pi uo naali. A ko la bha bini ma kpi ma kpi de, engú bini, ndu oDadjua gba Ebhe hana inde bhú ndu doto gba omaYuda ade-e di ngagie heni pi uo. <sup>5</sup> Ma yi di okpála na Dadjua inde apòpòkòbhò bhúla o ngubula nayo Ebhe bhú 'ti gba uo-o mayi.

Ma yi ndai ma na mukúnda Epainete mayi. A ko kpála na kalanu inde abhuka Yesu Kilisito bhú ndu doto na Adjia-o. <sup>6</sup> Ma yi di Malia inde amene kulu pi yi naali-e mayi. <sup>7</sup> Ma yi di okpála gba ma, Adolonikasi ne uo ne Djuniasi\* mayi. Ngaya ne uo-o, ya adu nako bhú tikpu bhú dabili bini. A ko obhulu titima inde li okpála mbila o ndjindji naali. U abhuka nani Yesu Kilisito muma kalanu.

<sup>8</sup> Ma yi di ndai ma na mukúnda Apiliatusi mayi. Ya akpòtsò liya ne aní bhú 'bu Ngámá gba ní-o. <sup>9</sup> Ma yi di Ulubano mayi. Ya ngamene kulu gba Yesu Kilisito ne aní bhú dabili bini. Ma yi di ndai ma na mukúnda Sitakisi mayi. <sup>10</sup> Ma yi Apelesi mayi. Aní azu likabhu kabula Yesu Kilisito, aní atsia alu kpekpeke. Ma yi di okpála na piga gba Alisitobile mayi. <sup>11</sup> Ma yi di Elodiona mayi. A ko kpála na piga gba ma. Ma yi di okpála gba Ebhe inde bhú piga gba Nalasisè mayi. <sup>12</sup> Ma yi di Tilifene ne Tilifose† mayi. U aha lio ngú namene kulu gba Ngámá gba ní-e ne bua o bini. Ma yi di ndai ní na øøø na mukúnda inde 'li e me Peleside mayi. Aní

\* **16:7** 16:7 Okpála bhelé ngabhundja me Adolonikasi nani ne 'ko Djuniasi. Okoko ngabhundja naao me a ko nani ondaise. † **16:12** 16:12 Tilifene ne Tilifose nani ne olisi.

aha di lie ngú namene kulu gba Ngámá gba ní-e ne bua bini. <sup>13</sup> Ma yi Lufusi, kùkùlù bádha kpála na kulu gba Ngámá gba ní-e mayi. Ma yi di 'hi ani, inde ateteke ma maka kùkùlù ndili gba e makpe mayi.

<sup>14</sup> Ma yi di Asikilite ne Felegone ne Elemesi ne Patalobasi ne Elemasi di ne ndu ondaise ní hana inde bhú dabili bini ne uo-o mayi. <sup>15</sup> Ma yi di Filologe ne Djulie ne Nele di ne ndai e na øele-o mayi. Ma yi di Olipasi di ne ndu okpála gba Ebhe-e hana inde ne uo-o mayi.

<sup>16</sup> Yi yi liyi sùnda yi bhú dabili bini ne mukúnda gba omabhukao. Ndu oDadjua gba Yesu Kilisito-o hana yi yi mayi.

*Polo aha olíli na soso pi omabhuka na Loma*

<sup>17</sup> Ondaise ma, ma ngagbele 'dje yi me: yi lila liyi ka okpála inde ngabi bhayiki li ongú inde u asuno e pi yi-e malila. Uo ngagbogbo bhusu okpála, u tsia mbá bhúla uo li osisiti kpadji. Yi gbe liyi de uo magbe. <sup>18</sup> Padhá de, anga ongua okpála bhomu-o ngamene kulu gba Ngámá gba ní Yesu Kilisito ade. Engú bini, uo mangbo ngamene engú bhende a nga li o makpe. U ngapite okpála inde i mbila kali de-e ne obabadha oeli di ne oeli ngú nabo kpála. <sup>19</sup> La pi yi-e, ndu omabhuka hana ambila me, yi ngamanga Ngámá gba ní-o. Abhomu-o, ma ngakpi djali naali kabula yi, ma akúnda la di me yi mbila engú inde babadha ngubula namemene, di ne me yi améne siti 'ngú de. <sup>20</sup> Ebhe inde ahaha guo 'ngú-o teteke yi me yi dedele Satana ne 'dhu yi má gala! A ayo me Yesu Ngámá gba ní-e suno bádha bhú 'bu gba e pi yi!

<sup>21</sup> Timoté, inde ngamene kulu bhú dabili bini ne ma-a, yi yi mayi. Okpála gba ma, Lukiusi

ne Djasone ne Sosipatele, yi di yi mayi.

<sup>22</sup> Ngama Teletiusi-e, Polo apa muma ngae me ma ye balua inde e pi yi. Ma yi di yi mayi ne 'li Ngámá.

<sup>23</sup> Gayusi, inde ma ngadu gba e-e, yi di yi mayi. Okpála na Dadjua gba Ebhe inde ei-e ngapo bhúla o bhú 'ti gba ani. Elasiite, inde alilila tia na gudhu-o bhú dabili bini ne ndai ní Kualatusi, yi di yi mayi. [ <sup>24</sup> A ayo me bádha bhú 'bu gba Ngámá gba ní Yesu Kilisito du bhú dabili bini ne ndu yi hana! A adu moko.]

<sup>25</sup> A ayo me ní dhøø Ebhe! Ani ti da naha angu pi yi ngubula me yi lu kpekpeke li kpadji gba ni-o, maka Bádha Ngali inde ma ngakpokpo e pi okpála pindji Yesu Kilisito apa lie-o. Ebhe mbamba nga nani ta Bádha Ngali ango-o pi okpála kalanu de. <sup>26</sup> La mbia inde-e, ani ambamba tata pi okpála. Okpála la bhadi ngakpokpokpo maka li opolofeta aye nani lie-o. Ebhe inde ngadu duduma ne duduma akata nani opolofeta me u ye me ndu opiga hana dje Bádha Ngali bhomu, ngubula me okpála bhuka ani, amba u manga di ani. <sup>27</sup> A ayo me ní dhøø Ebhe duduma ne duduma! Kùkùlù imbilangu makpe bha ka ani kpi e kpi. A ayo me ní dhøø ani kabula Yesu Kilisito! A adu moko.

## Balua na bini gba Polo pi omabhuka na gudhu na Kolito Eli na kalanu

Balua na bini inde li Polo aye nani e pi okpala na Kolito-o, ani aye nani pindji ongu atsia mukobho gba omakilisito di ne nabhuka inde ali bhú Piga gba Ebhe nani li Polo a'o e bhú gudhu na Kolito-o. Bhú nedhinga ango-o, Kolito nani ne gudhu na ngbéngbé gba oGiliki inde li okpala ngangá apo bhala o bhú e-o, a ko 'ngbé gudhu na ndu doto na Akayi inde bhú nau na Loma-o . 'Li gudhu na Kolito au nani naali ka oehe na mase inde adu bhúbhú bhele-o, ne ka dasundu gba okpala ango-o, ne engú na zabhe inde adu bhúbhú naali-o, a la di-e ongangá engú na ebhe inde abedhe nani bhúbhú bedhe-o. Engú na ngbéngbé inde li Polo adu agu gbele ne e, a ko engú nagbo bhusu o, engú na zabhe inde adu bhú Dadjua gba Ebhe-o, ne ongu inde u ayi e pindji bhoko ne olo, ne pindji naha lio, pindji bua nakpokpo kú 'ngú, pindji namene 'ngú li kúkú bhú Dadjua gba Ebhe, pindji ehe li Bu Bhobua ngaha e padhá, a la di-e pindji nazuku gba okpala-o. La, Polo atsia asuno imbilangu gba e ne nasuno lele maka li Bádha Ngali ngagama 'ngú li ongu ango-o lie-o.

Alo na (13) inde ngasuno mukunda maka ehe na babadha naali inde li Ebhe ngaha e pi omaha e padhá-a, okpala mbila 'ngú pindji alo (13) ndjikpa ne ká bata-a naali ane oalo koko hana bhú bhuku inde. A ko engú inde li okpala ambila e ane mane bhú bhuku inde ngae.

## Ongbengbe ongu inde bhú bhuku inde-e ngae inde:

Eli na kalanu 1:1-9  
Nagbogbo bhusu o bhú Dadjua gba Ebhe 1:10 - 4:21  
Dasundu na ndjindji gba olo ne bhoko, di ne piga gba e 5:1 - 7:40  
Omakilisito a la di-e omupagano 8:1 - 11:1  
Mukobho na Dadjua gba Ebhe a la di-e engú na Ebhe 11:2 - 14:40  
Nazuku gba Kilisito a la di-e nazuku gba omabhuka 15:1-58  
Naha makiso pi omakilisito na Yudaya 16:1-4  
Engú nayi mayi a la di-e engú bhe na soso 16:5-24

### *Polo yi omabhuka na gudhu na Kolito mayi*

<sup>1</sup> Ngama Polo, Ebhe a'i ma bhú ngu e me ma kolo bhala titima gba YesuKilisito . Ya aye balua inde bhú dabili bini ne ndai ní Sosotene. <sup>2</sup> Ya aye pi yi okpala na Dadjua gba Ebhe inde bhú gudhu na Kolito, ngayi okpala inde li Ebhe a'o o kpi pi e. Yi akolo okpala gba ani ka nabhuka Yesu Kilisito, bhú dabili bini ne ndu okpala hana inde ngabhu 'li Ngámá gba ní Yesu Kilisito ne ndu bili hana-o. Yesu ne Ngámá gba uo, a ko la di Ngámá gba ní-o. <sup>3</sup> Bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

### *Obabadha 'ngú inde li Ebhe aha e pi okpala na Kolito bhú bádha bhú 'bu gba e-o*

<sup>4</sup> Ma ngagie heni pi Ebhe ndu nedhinga hana ngubula yi kabula bádha bhú 'bu inde ani aha e pi yi li kpadji gba Yesu Kilisito-o. <sup>5</sup> Bhú makpøtsø gba yi ne Yesu Kilisito-o, Ebhe abedhe yi ne ndu obabadha ongu hana. Kaka-a, yi

mbila nadi mabelu li eli gba ani-e ndjindji, a la di bhú 'ndji yi ne imbilangú bhú ndu 'ngú hana. <sup>6</sup> Ngali gba Yesu Kilisito inde ya akpokpo e pi yi-e, asia dabili li bua yi ndjindji. <sup>7</sup> Kaka-a, yi asia ndu 'he hana inde li Ebhe ngaha e pi okpála bhú bádha bhú 'bu gba e-o, ngayi okpála inde ngadjeke ekpí li Ngámá gba ní Yesu Kilisito asúno matá lie lie pi okpála-o. <sup>8</sup> Aní atéteke yi ngae me yi lu kpekpeke akólo li soso, amba kpála bini adú ne engú na sísiti napapa li yi de, li 'kpí li Ngámá gba ní Yesu Kilisito agó lie-o. <sup>9</sup> Ebhe gba ní-e djidji 'li e de. Aní a'i yi me yi kpøtsø liyi ne Ndili gba ní Yesu Kilisito, Ngámá gba ní-o, aní djí 'li e bhomu-o de.

#### *Omakilisito na Kolito agbogbo bhusu o*

<sup>10</sup> Ondaise ma, ma ngakikiliki líma pi yi ne 'li Ngámá gba ní Yesu Kilisito me, yi dū ndu yi hana ne koli bua bini, yi agbógbo bhusu yi de. Yi gbite 'ngbo yi bini ne nadu ne mabhundja bini di ne nabhuka bini. <sup>11</sup> Ondaise ma, ma pa mo-o padhá de, a ko anga okpála na piga gba Koloe apa muma me yi ngadje liyi ade. <sup>12</sup> Engú ma apa e bhomu-o, ma apa anga sūnda yi-e, yi ngagbogbo bhusu yi. Okpála koko ngapa me o ngakpata Polo. Okoko ngapa me o ngakpata Apolosi.† Okoko ngapa me o ngakpata Piele. Okoko ngapa me o ngakpata Kilisito. <sup>13</sup> Engú yi ngamene e mana mágito me Kilisito agbo bhusu e magbo. Yi pa nga muma, u agi nani ma Polo li kulusi ngú nakobho yi uu? Yi asia nani batisimo ne 'li ma Polo? A mo-o ade.

<sup>14</sup> Ma ngagie heni pi Ebhe anga ma batisa kpála bini bhú ka yi de. Ma abatisa bha bini Kilisipusi ne

uo ne Gayusi† <sup>15</sup> Kaka-a, kpála bini ti da napa de me u abatisa yi ne 'li ma-a de. <sup>16</sup> A ko paká! Ma abatisa di nani piga gba Setefanasi.† Engú bini, ma ziba de me ma abatisa kpála koko uu-o de. <sup>17</sup> Padhá de, anga Kilisito tima nani ma ngú nabatisa okpála de. Engú bini, aní atima ma ngú nakpokpo Bádha Ngali pi uo. Ma ngakpokpo Bádha Ngali ang-o ne mabelu má pua pua maka okpála koko ade. Li ma dú nakpokpokpo ne mabelu maka okpála koko-o, nakpi gba Kilisito li kulusi-e de matá ne tata ade.

#### *Yesu Kilisito pi ní ne angu di ne imbilangú inde ayie ka Ebhe*

<sup>18</sup> Padhá de, anga pi okpála bhende li kpadji na ngita-a, nakpokpo ngali pindji nakpi gba Yesu li kulusi-e, a ko 'ngú na pele. Engú bini, pi ní obhende li Ebhe ngakobho o-o, ní ngau angu gba Ebhe-e bhú ngali ang-o. <sup>19</sup> A maka u aye lie bhú Bhuku gba Ebhe-e me:

«Ma améne me imbilangú gba obhulu imbilangú-o kolo padhá.

Ma aú imbilangú gba uo bhú djila ma maka ehe

na padhá.†»

<sup>20</sup> I dū me Ebhe nde apa mo-o, a akūnda napa me, okpála na imbilangú na doto inde-e, imbilangú gba uo bhú 'ngú de. Okpála inde ngasuno olíi gba omaYuda-a, tata li nasuno gba uo ade. La di-e, obhulu nadi mabelu na sūku inde-e, mabelu gba uo-o, tata tété ade. Ebhe asuno bhomu-o me imbilangú na doto inde-e padhá. <sup>21</sup> Padhá de, anga okpála na doto ne imbilangú gba o na kpála-kuti-e ti da nani nambila imbilangú gba Ebhe-e de. Kaka-a, li kpadji na engú inde li okpála

† 1:12 1:12 Tsia bhú 1 Kol. 16:12; di ne bhú Kul. 18:24-28. † 1:14 1:14 Tsia bhú Kul. 18:8, 19:29. † 1:16 1:16 Tsia bhú 1 Kol. 16:15-17. † 1:19 1:19 Tsia bhú Iša. 29:14.

ngau e bhú djila o maka engú na pele-e, Ebhe au ndjindji me ni kobho okpála inde ngabhuka-o. Engú na pele angó-o, a ko Bádha Ngali inde ya ngakpokpo e-o.

<sup>22</sup> OmaYuda ngayo ongamba 'ngú kala me u bhuka, oGiliki naao ngagili imbilangú. <sup>23</sup> La pi ya-a, ya ngakpokpo 'ngú gba Kilisito inde u agi e li kulusi-o. Li omaYuda ngadje engú angó-o lie, a ngangbingi 'ndji uo mangbingi. Li okpála bhende ne omaYuda ade-e ngadjedje lie, a ngamene uo maka engú na pele. <sup>24</sup> Engú bini, pi okpála bhende li Ebhe alo o-o, i du di-e omaYuda, i du di-e obhende ne omaYuda ade-e, u ngambila ndjindji me Yesu Kilisito akolo pi o angu di ne imbilangú inde ayie ka Ebhe-e ngae. <sup>25</sup> Okpála koko ngapa me engú li Ebhe amene e bhú nakpi ka Yesu-o, a ko 'ngú na pele. Engú bini, engú inde u a'i e me a ko 'ngú na pele bhomu-o ane imbilangú gba kpála-kuti mane. I du me u nde ngabhundja me Ebhe bhúbhuku-o, a mo-o ade. Padhá de, anga bhuku gba Ebhe-e ane angu gba okpála-kuti ne kpéke.

*Ebhe nga'o tata li ehe inde li okpála ngau e bhú djila o padhá*

<sup>26</sup> Ondaise ma, ngayi okpála li Ebhe a'i o-o, yi bhundja nga me yi ne oda-ie! Nakpata mabhundja gba okpála na doto-o, okpála na imbilangú, ne obhende na angu, ne obhende azu lio bhú piga na tia bhú ká yi bhelé ade. <sup>27</sup> Engú bini, Ebhe alo engú li okpála na doto nga'i e me a ko engú na pele-e ngubula me imbilangú gba obhulu imbilangú-o kolo ehe na padhá. Ani alo ongú bhende li okpála na doto ngau e me angu bhúbhú ade-e ngubula me angu gba bhulu angu-o kolo ehe na

padhá. <sup>28</sup> Ani alo ohe inde li tata nde lie e ade, inde li okpála na doto ngamu e, inde u ngau e bhú djila o padhá-o. Ani alo ngubula me ni bhili ohe bhende li okpála ngau e me a tété ne tata-a ne di.

<sup>29</sup> Kaka-a, kpála bini ti da nadje kute e kala Ebhe de. <sup>30</sup> La ngayi-e, Ebhe akpetse yi bhú dabili bini ne Yesu Kilisito. Ani amene me Yesu kolo pi ní imbilangú inde ayie ka ni-o. Yesu amene ngae me ní kolo ngbingbili bhú djila Ebhe. Ani amene me ní du libhomu pi Ebhe. Ani atsia agbegbe di ní bhú bali gba siti. <sup>31</sup> Kaka-a, a maka u aye lie bhú Bhuku gba Ebhe-e me: «I du me kpála nde akunda nau lie ngbéngbé-e, ani de u lie ngbéngbé bhú engú li Ngámá Ebhe amene e ko.†»

## 2

*Imbilangú li Polo adu akpokpo 'ngú pindji Yesu Kilisito ne e-o*

<sup>1</sup> Ondaise ma, ngama makpe-e, nedhinga ma anu nani lie agba yi ngubula nakpokpo engú inde li Ebhe ambamba ta e li kpadji gba Kilisito-o, ma di pi yi mabelu bhe nane mane de. Ma gama di 'ngú pi yi ne imbilangú naali de. <sup>2</sup> Padhá de, anga nedhinga ma adu lie agba yi-e, ma gili nambila engú koko bhú ka yi de. Ma agili bha bini nambila Yesu Kilisito, ma agili bha nambila makpe me-e Yesu Kilisito inde u agi nani e li kulusi-o. <sup>3</sup> Kaka-a, ma adu agba yi bhuku kpála, ma adu ne tsulu, ma atsia adu di naguku naali. <sup>4</sup> Bhú nasuno gba ma-a ne bhú nakpokpo Bádha Ngali-e, ma du nagama 'ngú ne imbilangú gba kpála-kuti de, ma du di nadi pi yi mabelu de. Engú bini, Bua gba Ebhe-e adu nani nasuno pi yi ne angu me engú ma adu akpokpo

e adu kukulu 'ngú. <sup>5</sup> Ma adu akpokpo 'ngú pi yi mo-o ngubula me yi a'ó nabhuka gba yi-e bhú imbilangu gba okpála de, engú bini yi 'o mangbo bhú angu gba Ebhe-o.

*Imbilangu li Polo ngakpokpo 'ngú ne e ayie ka Ebhe*

<sup>6</sup> Nedhinga ya ngasuno lie pi okpála inde abhele li kpadji gba Ebhe-e abhele-e, ya ngasuno kukulu imbilangu, a ko imbilangu na doto inde-e de. A ko la di bhende gba ongámási na doto inde li 'bhè ngámá gba o andjia mandjia de. <sup>7</sup> Imbilangu ya ngakpokpo 'ngú ne e inde-e, a ko mangbo imbilangu gba Ebhe. A ko ehe inde awo lie mawo, inde li okpála du nani nambila e de. Kala me Ebhe bho doto-o, Ebhe a'o nani imbilangu ang-o ngubula me ní sia té sangu gba ni-o. <sup>8</sup> Ongámási na doto inde-e mbila nani imbilangu ang-o de. I dú me u mbila nani uu-o, u de bhèlè nani Ngámá gba ní inde abedhe ne sangu bedhe li kulusi de. <sup>9</sup> Ehe li Ebhe amene e, a maka u aye lie bhú Bhuku gba ani-e me: «Engú inde li djila okpála u nga nani e de-e,

li 'dje okpála dje gba nani e de-e, di ne bhende li okpála bhundja belegu

engú li e de-e, a la bhomu-o engú inde li Ebhe aleke nani e pi okpála inde

ne mukunda pi ani-o.†»

<sup>10</sup> Pi ní-e, Ebhe ambamba ta engú ang-o bhú angu gba Bhobua gba e-o. Bhobua ang-o mbila ndu 'ngú hana. Ani mbila belegu mabhundja gba Ebhe inde awo lie mawo-o. <sup>11</sup> Bhú ká okpála-a, a ko da inde ambila engú inde bhú kilí e? A ambila bha bini

ne bua inde bhú kpála ang-o. A bhadi moko, engú inde bhú Ebhe-e, ambila bha bini ne Bhobua gba Ebhe-o. <sup>12</sup> Pi ní-e, Bua inde bhú ní-e yie ka okpála na doto inde-e de, engú bini, a yie ka Ebhe. Ebhe aha pi ní ngubula me ní mbila ndu 'he inde ani aha e pi ní bhú bádha bhú 'bu gba e hana. <sup>13</sup> Nedhinga ya ngakpokpo 'ngú lie pi okpála-a, ya ngakpokpo ne imbilangu gba okpála ade. Engú bini, ya ngakpokpokpo ne imbilangu inde ayie ka Bhobua gba Ebhe-o. A akunda napa me, ya ngambamba ta ongú pindji Bhobua gba Ebhe-e pi okpála inde li Bua ang-o nde bhú o-o.\*

<sup>14</sup> Kpála bhende li Bhobua gba Ebhe-e nde bhú e ade-e ti da naziba obisagu inde li Bhobua ang-o ngaha e pi okpála-a de. Bisagu ang-o pi ani maka engú na pele. Imbilangu ngú nambila 'ngú ang-o bhú 'ndji ani ade. Padhá de, anga Bua gba Ebhe-e ti da nambamba ta 'ngú ang-o bha pi kpála ngae. <sup>15</sup> Kpála inde li Bua gba Ebhe-e nde bhú e mbila ndu 'ngú hana, bhende na babadha, ne bhende na sisiti. Engú bini, ngaani-e, kpála bini ti da nambila 'ngú inde bhú ani-e má kpulukutu de. <sup>16</sup> A maka u ye lie bhú Bhuku gba Ebhe-e me:

«Kpála bini mbila engú inde li Ebhe Ngámá ngabhundja e de.

Kpála bini ti da naha líli pi ani de.†»

Engú bini, ngaya okpála li Bua gba Ebhe nde bhú o-o, nambhundja gba ya viti ne bhe gba Kilisito bini.

### 3

*Omabhuka na gudhu na Kolito maka okpála inde ngakpata Yesu*

† 2:9 2:9 Tsia bhú İsa. 64:3, 52:15. \* 2:13 2:13 Li bili inde-e, u tí da di napa me: «Ya ngakpokpo engú pindji Bhobua gba Ebhe-e pi okpála ne oeli inde ayie ka Bhobua ang-o.»

† 2:16 2:16 Tsia bhú İsa. 40:13.



*na mbia*

<sup>1</sup> Ondaise ma, pi ma-a, nedhinga ma adu lie agba yi-e, ma ti nani da nagama 'ngú pi yi maka okpála li Bua gba Ebhe-e nde bhú o-o de. Engú bini, ma agama bha ibili 'ngú pi yi maka okpála na doto inde. Padhá de, anga yi adu maka okpála inde i ngakpata nga Yesu Kilisito na mbia. <sup>2</sup> Ongú inde ma asuno e pi yi-e adu maka miliki. A adu ezú na kpekpeke de. Belegu pi mbia inde-e, yi ti nga da nazú ezú na kpekpeke de. <sup>3</sup> Padhá de, anga yi nga bha ngakobho maka okpála na doto inde, anga yi ngamene 'he liyi sunda yi ne 'ngbé bua. Yi la di ngatsi sunda yi. I du me yi nde ngamene mo-o na paká-a, yi mbila de me bhobhomu-o ngasuno me yi nga bha ngadhuku maka li kute yi akunda lie di? <sup>4</sup> Nedhinga li kpála bini bhú ká yi ngapa lie me ni ngakpata Polo-o, li kpála koko pa me ni naani ngakpata Apolosi-e, asuno me yi ne okpála inde na doto. A mo-o adi?

*Ebhe ne Ngámá na kulu gba ní-e ngae*

<sup>5</sup> Apolosi ne da? Polo la di ne da? Ya bha ne obalise gba Ebhe inde ani atima o ngú nakpokpo eli gba e pi yi, ngubula me yi bhuka Ngámá Yesu Kilisito. Kpála ne kpála bhú ká ya bha ngamene kulu inde li Kilisito aha e pi ani-o. <sup>6</sup> Ya adu maka okpála nalu nguwa. Ngama-a, ma akpo lita nakpokpo eli gba Ebhe-e bhú ká yi maka kpála inde ngalu nguwa. Apolosi anu ne di ne kalanu maka kpála inde ngabolo 'ngu pí 'zu-o. Engú bini, Ebhe amene ngae me ezú ango-o bhele. <sup>7</sup> Bhobhomu-o asuno me, ne kpála inde ngalu nguwa, ne bhende ngatuko 'ngu pépé-e, tetele kpála bhú ká uo ade. Engú bini, kpála na tetele mangbo ne Ebhe, anga ani ngamene ngae

me ezú-o bhele. <sup>8</sup> Ne kpála inde ngalu nguwa, ne bhende ngatuko 'ngu pépé-e, u viti bini. Ebhe ahá makalá na kulu gba kpála ne kpála-a pi e li lele kulu gba e-o. <sup>9</sup> Ndu ya bhisi hana, ya ngamene kulu gba Ebhe-e bhú dabili bini. Ngayi-e, yi maka edyi gba Ebhe.

Yi la di maka eti li Ebhe ngayiki e-o. <sup>10</sup> Bhú bádha bhú 'bu gba Ebhe-e, Ebhe aha angu muma, ma atsia aholo namene kulu gba ani. Ma adu maka kpála nayiki eti ne imbilangu, inde ambila di nabanga 'dhu 'ti-e ndjindji, kpála na kulu koko atsia ago ngú nadyudyo kulu ango-o ne kalanu. A ayo me kpála ne kpála inde nga'o biliki pí 'dhu 'ti ango-o, 'o li lelele. <sup>11</sup> 'Dhu 'ti ango-o, a ko Yesu Kilisito inde yi nga'o nabhuka gba yi-e bhú e-o. Kaka-a, kpála bini ti da na'o matá 'dhu 'ti koko de. <sup>12</sup> Pí 'dhu 'ti ango-o, okpála koko ngayiyiki ne tia kulu inde ngabhue mabhue maka olo, aladja di ne teme na mase naali. Okpála koko ngayiyiki ne tia kulu inde i bhúe de maka ndula, ulu di ne soli.

<sup>13</sup> La-a, li 'kpí li Ebhe akódho 'ngú gba okpála na doto lie-e, kulu gba musuno bini ne bini akóto bhú mbasu. Okpála aú kulu gba uo-o mbámábá. Padhá de, anga li kpí ango-o, Ebhe alé kulu gba kpála ne kpála bhú djua ngú nambila me ne me a ndjindji, ne me a sisiti. <sup>14</sup> I du me kulu inde li kpála amene e nde tsi bhú djua de-e, li Ebhe há makalá pi kpála ango-o. <sup>15</sup> Engú bini, i du me kulu inde li kpála amene e nde atsi bhú djua-a, Ebhe há makalá pi ani de. Ebhe akóbho kpála ango-o makobho, engú bini, kpála ango-o avo kuku, ani de atsi bhú djua atsi.

<sup>16</sup> Yi mbila de me yi maka Eti gba Ebhe, di ne me Bua gba ani-e ngadu bhú yi-e di? <sup>17</sup> I du me

kpála nde abhólø Piga gba Ebhe-e, li Ebhe bhólø di kpála ango-o. Padhá de, anga Ebhe a'o Dadjua ango-o pi e. Piga inde ani ngadũ bhú e-e, a ko yi.

*Imbilangu gba Ebhe-e kpi ne imbilangu gba okpála-kuti*

<sup>18</sup> Kpála bini apíte lie de. I dũ me kpála bini bhú ka yi nde ngabhundja me ni ne imbilangu maka okpála na doto inde-e, ani de yala imbilangu gba e bhomu. Ani kolo mangbo bhú djila okpála na doto maka bhulu pele, amba ani sia imbilangu na kukulu. <sup>19</sup> Ma pa mo-o padhá de, a ko anga oehe li okpála na doto nga'i e me a ko imbilangu-o, a ko ongu na pele bhú djila Ebhe. A maka u aye bhú Bhuku gba Ebhe-e lie me:

«Ebhe ngaholo okpála i ngabhi 'kpa o pi mbulu o me o ne obhulu imbilangu bhú oeli na kali gba o-o.†»

<sup>20</sup> U aye di matá bhú bhuku gba Ebhe-e me:

«Ebhe mbila mabhundja gba okpála inde ngabhi 'kpa o pi mbulu o me o ne obhulu imbilangu-o hana.

Ani mbila hana me a padhá.†»

<sup>21</sup> Kaka-a, ma apa pi yi me kpála bini bhú ka yi abhi 'kpa e pi mbulu e bhú nakpata musuno de. Padhá de, anga ndu 'he hana ne naayi. <sup>22</sup> Ne ma Polo, ne Apolosi, di ne Piele-e, ya ndu ya hana ne naayi okpála. Belegu doto, ne makobho di ne kuo ne naayi 'he. Ongú na naki inde di ne ongu agó galikpe bhadi ne ndu naayi 'he. <sup>23</sup> Engú bini ngayi-e, yi ne okpála ka Yesu Kilisito, Yesu Kilisito ne kpála ka Ebhe.

## 4

*A ayo namanga obhulu titima gba Yesu-o mamanga*

<sup>1</sup> A ayo me okpála mbila me, ngaya, obhulu titima gba YesuKilisito-o , ya ne okpála na kulu gba ani. Ebhe a'o ongu inde nani awo lie mawo-o sakpa ya ngubula me ya suno pi okpála.

<sup>2</sup> Yi mbila ndjindji me, engú inde u ngayo e ka kpála inde u a'o 'he sakpa e, a ko nadu ngbingbili .

<sup>3</sup> La pi ma-a, belegu ngayi-e, yi pa me ma ne siti kpála, ne me ma ne siti kpála ade-e, a méne 'he bini ngu ma de. Abana li okpála nakodho 'ngu-o pa me nganda kulu gba ma-a a ndjindji, ne me a ndjindji ade-e, a méne 'he bini ngu ma de. Abana ngama makpe, ma pa de me nganda kulu gba ma-a ndjindji, ne me a sisiti-e de.

<sup>4</sup> Padhá de, anga pi ma-a, bua ma pa muma de me ma ngamene siti 'ngu-o de. Engú bini, bhobhomu-o kunda napa de me ma mene siti 'ngu de-e de. Ngámá Ebhe akódho mangbo engú gba ma-a ngae. A akódho ne kpála koko de. <sup>5</sup> Kaka-a, yi akódho 'ngu gba okpála koko de. Yi djeke mangbo me nedhinga li Ebhe a'o e ngu nakodho 'ngu gba okpála kolo paká. A ko okpi li Ngámá Yesu agie lie lie-o. Li 'kpi ango-o, ani apandja ondu 'ngu hana inde awo lie naki mawo-o bhú mbasu. Ani agbé engú inde li okpála nde ngabhundja e li bua o-o li zi 'kpi. Ekpí ango-o, li Ebhe tsia dhégo kpála ne kpála li lele kulu gba e-o.

<sup>6</sup> Ondaise ma, ma apa ongu bhomu-o pi yi pindji ya ne Apolosi ngubula nateteke yi, amba yi mbila ongu inde bhúbhú-o. Ma akunda me yi kpata nganda ya ngubula me yi kò mboli gbitaku inde-e me: «A ayo napise li kozie

† 3:19 3:19 Tsia bhú Djib. 5:13. † 3:20 3:20 Tsia bhú Ets. 94:11.

inde u a'o e-o.» A ayo de me kpála bini bhú ká yi sia 'ngbé 'ndji ne 'ili me ni naani ne kpála ka tsipakala, amba ani u okpála koko bhú djila e padhá-a de. <sup>7</sup> Ngamú kpála inde ngabundja me ni ane okpála koko mane-e, mu naamú ne da? Ebhe ha ndú 'he inde ka mu-o hana pi mu ngae di? I dú la me Ebhe nde aha pi mu ngae, mu ngamene 'ngbé 'ndji tété mugito me mo osia ka angu gba mu-o ka ni?

*'Ngbé 'ndji gba omabhuka na Kolito*

<sup>8</sup> A ndjindji, anga yi asia naayi ndú 'he hana inde li Ebhe ngaha e asia. Yi ibili ne obhulu tia li kpadji na nabhuka . Yi ngapa me yi ndú yi hana ne ongámási, la gaya obhulu titima gba Yesu Kilisito-o, ya naaya ne ongámási ade. I dú me yi dú bhú djila Ebhe ne ongámási na paká-a, a de ndjindji ngubula me ni u ne yi bhú dabili bini. <sup>9</sup> Ya ne obhulu titima gba Yesu Kilisito. Engú bini, ma ngau mugito me Ebhe a'o ya asidi pita ndú okpála koko hana. Ya maka okpála bhende u akodho 'ngú gba o, inde u abhili o kala ndú okpála hana. A akunda napa me doto libhomu ne okpála-kuti la di ne oandjelu ngatu 'ue bhú 'ndji ya maka bhú da ngeme.

<sup>10</sup> Gaya-a, ya ne obhulu pele kabula 'li Yesu Kilisito! La ngayi-e, yi ne obhulu imbilangu kabula ani! Gaya-a, ya ne okpála li angu nde bhú o ade! Engú bini, ngayi-e, yi ne okpekpeke okpála! Gaya-a, okpála ngau ya bhú djila o padhá, engú bini, ngayi-e u ngamanga yi mamanga! <sup>11</sup> Nakolo pi mbia inde-e, ya ngadje gumu di ne gumu 'ngu. Ya ngadyi obongo inde akadha. U ngato mbolo li ya. Ya sili kuti de. <sup>12</sup> Ya ngamene kulu ne 'kpa ya kpekpeke. Nedhinga li okpála ngasobho ya lie, ya ngayo

Ebhe me ani tuko bisagu pí uo. Nedhinga li okpála ngato mbolo li ya lie, ya ngakikibila, ya gisila de. <sup>13</sup> Nedhinga li okpála ngapa 'ngú gba ya lie sisiti-e, ya ngagie pi uo bhuku eli. Ya akolo maka oehe inde u abala e apí 'ká. Nakolo pi naki-e, ya akolo maka oehe inde li tata nde lie ade.

*Polo asuno bua gba e na 'dyi ongisi-e pi omabhuka na Kolito*

<sup>14</sup> Ma ye engú inde-e de me yi sia numu ká engú inde yi ngamene e de. Ma aye mangbo ngubula me ma ha líli, anga yi ne ongisi gba ma na mukunda. <sup>15</sup> Padhá de, anga abana li omusuno dú bha ka yi bhelé-e li kpadji gba Yesu Kilisito-o, koli 'dyi yi bha bini. 'Dyi yi ang-o, a ko ma. A akunda napa me ma akpo lita nakpokpo Bádha Ngali gba Yesu Kilisito pi yi ngama. <sup>16</sup> Ma nde lie ne 'dyi yi-e, ma ngayo ka yi me yi mene engú inde ma ngamene e-o. <sup>17</sup> Ngubula nateteke yi-e, ma atima Timoté agba yi oo. Ma atima ani ngubula me ani nu suno pi yi ne toto lele maka ma ngadhuku lie li kpadji gba Yesu Kilisito-o. Ongú inde ani asuno e pi yi-e, a bhomu-o ongú inde ma susuno e pi okpála gba Ebhe ne ndú bili hana-o. Yi dje Timoté, a ko ndili gba ma na mukunda-o. Ani la di ngadhuku ngbingbili li kpadji gba Ngámá Yesu Kilisito.

<sup>18</sup> Okpála koko bhú ka yi ngabhi 'kpa o pí mbulu o anga u ngabundja me ma agó matá gba yi oo de. <sup>19</sup> Engú bini, i dú me Ngámá gba ní-e nde aziba-a, ma agó oo ne 'kpí bhisi inde. Li ma kolo oo, ma ú obhulu 'ngbé 'ndji bhomu. Ma tsia mbila ne me u bha ngape 'li o padhá, ne me abhú uo ne angu namene engú. <sup>20</sup> Padhá de, anga Nau gba Ebhe-e ne eli ade, a mangbo bhú angu gba Bu Bhobua . <sup>21</sup> Nedhinga ma agó lie agba yi-e,

yi akunda me ma go ne mangua 'ngú dho? Yi akunda me ma ago sakpa ma ne fimbo? Ne me ma go ne bhuku bua ngú nasuno pi yi me ma kunda yi naali?

## 5

*Polo apa pi omakilisito me u gbe kpála inde amene siti 'ngú bhú ka o magbe*

<sup>1</sup> Ma ngadje ngali gba yi-e ndu 'kpí hana. Okpála ngapa me bhú ká yi-e, okpála koko ngadhuku ne olisi, i du di-e ne obhosi ngangá. A ko engú inde belegu okpála i bhuka Ebhe de-e ti da namene e de. A mana mugito me suka yi bini ngadhuku ne wala 'dyi e.†  
<sup>2</sup> Ngayi-e, engú ango-o ngaha pi yi 'ngbé 'ndji. A ayo la igini me yi de aku 'gbá ngubula siti 'ngú ango-o. A ayo la di igini me yi gbe ngua makilisito bhomu-o bhú ká yi magbe.

<sup>3</sup> Ngama-a, belegu ma nde lie bhú ka yi ade-e, bua ma ne yi bhú dabili bini. Ma akodho engú gba kpála inde amene engú bhomu-o akodho mugito me ma ne yi bhú dabili bini. <sup>4</sup> Ma akodho 'ngú bhomu-o ne 'li Ngámá gba ní Yesu. Ma ngapa pi yi me, yi po bhúla yi-e, li bua ma dú ne yi bhú dabili bini. Li angu gba Ngámá gba ní Yesu tsia súno di lie. <sup>5</sup> Nedhinga yi apó bhúla yi lie, yi pu kpála bhomu-o pi Satana\* ngubula me siti 'ngú inde bhú ani-e koto hana má kpekèbhe, amba Ebhe kobho bua ani li 'kpí li Ngámá gba ní Yesu agó lie ngú nakodho 'ngú gba okpála-o.

<sup>6</sup> A ndjindji ade me yi bhi 'kpa yi pí mbulu yi li siti 'ngú bhomu-o de. Yi mbila de me mboye ku levile bedi-e ngamene ngae me faline libhomu fuka di-i? <sup>7</sup> Yi 'e siti

'ngú bhomu-o bhú ka yi ma'e. I du me yi nde amene mo-o, yi kolo bubu maka faline inde u 'o levile bhú e de-o. Ma ambila ndjindji me Ebhe amene me yi kolo bubu li kpadji nakpi ka Yesu Kilisito . Yesu maka ndili kandelø inde u abhelø e ngubula me okpála zu bhú anokomia na Pasika . <sup>8</sup> Kaka-a, ní kpi djali kabula li Ebhe agbegbe ní lie bhú bali-o. Ní 'e osisiti 'ngú gba ní-e maka li omaYuda a'e nani dili levile gba o lie ngubula nazu anokomia nazu mapa inde li levile nde bhú e ade-o . Ní mene mo-o, ní dú bubu, di ngbingbili kala Ebhe.

<sup>9</sup> Bhú balua ma atima nako e pi yi kalanu-o, ma apa pi yi bhúbhú me yi adú bhú dabili bini ne okpála inde ngadhuku ne olisi, i du di-e ne obhosi ngangá-a de. <sup>10</sup> Ma pa engú bhomu-o pi yi pindji ndu okpála na doto inde-e hana de. Ma pa engú bhomu-o pindji okpála inde ngadhuku ne olisi, i du di-e obhosi ngangá-a de, ne pi obhende li gumu 'he gba okpála abedhe bhú o bedhe-e de. Ma pa la di engú bhomu-o pindji okpála inde ngazi 'he-e de, i du di-e obhende ngadhøgø ebhe na eu-o de. Li kpála kunda nadu bhú dabili bini ne okpála bhomu-o de-e, kpála ango-o de yie pila doto mayie.

<sup>11</sup> Ma akunda mangbo nayoko yi me, yi akpétse liyi ne kpála inde ngapa me ni ne makilisito me ani nde ngadhuku ne olisi, i du di-e ne obhosi ngangá-a de. Yi akpétse liyi ne omakilisito bhende li gumu 'he gba okpála abedhe bhú o bedhe-e de. Yi akpétse liyi ne omakilisito bhende ngayo ebhe na eu-o de, i du di-e makilisito inde ngasobho okpála koko, ne obhende ngalangba ne pandi, i du

† 5:1 5:1 Tsia bhú Lev. 18:8; di ne bhú Det. 23:1.

\* 5:5 5:5 Napu kpála pi Satana: Ti da napa li bili inde-e me nagbe kpála bhú Piga gba Ebhe.

di-e bhulá 'zi-e de. Yi akpétso liyi ne uo de. Yi azú 'he ne ngua kpála bhomu-o belegu de bini. <sup>12-13</sup> Padhá de, anga a ko 'ngú ka ma de me ma kodho 'ngú gba okpála inde ne omakilisito ade-o. Ebhe akódho 'ngú gba uo-o ngae. Engú bini ngayi-e, yi tí da nakodho 'ngú gba omakilisito yi nde ne o-o. Maka u aye lie bhú Bhuku gba Ebhe-e me: «Yi gbe kpála inde ngamene siti 'ngú bhú ká yi-e magbe.†»

## 6

*Lele naleke 'ngú sūnda omakilisito*

<sup>1</sup> I dū me sūka yi nde ne 'ngú sūnda o ne ndai e-e, lele pi ani tí da nanu lie ne di kala ongámási na doto? A ayo mangbo igini me ani nu ne ani kala okpála gba Ebhe. <sup>2</sup> Yi mbila de me okpála gba Ebhe-e akódho 'ngú gba okpála na doto li sokpí-e ngao di? I dū la me yi nde akódho 'ngú gba okpála na doto-o, lele pi yi tí da nakodho odjedje ongú inde-e lie de-e? <sup>3</sup> Yi mbila de me ní akódho belegu engú gba oandjelu-o ngani-e di? Ka ní la ní tí da nakodho odjedje 'ngú na naki inde-e lie de? <sup>4</sup> Li odjedje 'ngú dū sūnda yi-e, ka ní yi nganu lie ne di kala okpála inde bhú Piga gba Ebhe-e ade-e? <sup>5</sup> Ma ngapa 'ngú bhomu-o ngubula me yi sia numu. Kpála na imbilangu bini bhú ka yi adi ngubula me ani leke 'ngú sūnda omakilisito-o? <sup>6</sup> A bha ndju ndjindji me li makilisito dū ne engú sūnda e ne makilisito-o, u de nu ne di kala okpála inde i bhuka Yesu di?

<sup>7</sup> A na paká me nadu ne engú sūnda yi-e, a bhomu-o numu na ngbéngbé. I dū me u nde mene ngbili 'ngú li pabili gba yi-e de-e, u nde ngazi 'he gba yi-e, ka ní yi tí

da nakikibila lie ne 'ndjá bua de-e? <sup>8</sup> Engú bini, okpála inde i mene ngbili 'ngú pi okpála koko de-e ne yi! Yi la di ngazi 'he gba ondaise yi omakilisito!

<sup>9</sup> Yi mbila na paká me okpála inde ngamene osisiti 'ngú-o lí bhú Nau gba Ebhe-e de. Yi apíte liyi de, okpála inde ngakūnda olisi, i dū di-e ne obhosi ngangá-a, ne obhende ngadhoge oebhe na eu, ne obhende ngakūnda olisi, i dū di-e obhosi gba okpála koko, i dū di-e obhende ngakūnda lio sūnda o maka elə ne bhoko, u li bhú Nau gba Ebhe-e de. <sup>10</sup> Yi apíte liyi de, obhulu 'zi, ne obhende li gumu 'he gba okpála abedhe bhú o bedhe, ne obhende ngalangba ne pandi, ne obhende ngadi okpála koko, ne obhende ngagbulu 'he gba okpála ne kpéke djila-a, lí bhú Nau gba Ebhe-e de. <sup>11</sup> A na paká me bhú ká yi-e, okpála koko adu nani namene osisiti 'ngú bhomu. Engú bini, mbia inde-e, Ebhe avulu yi bhú siti 'ngú gba yi-e avulu. Ani a'o yi kpi pi e, ani atsia amene me yi kolo ngbingbili kala ní. Ani amene ndu 'ngú bhomu-o hana li kpadji gba Ngamá gba ní Yesu Kilisito di ne bhe gba Bu Bhobua gba e-o.

*Kute ní ne eti gba Bu Bhobua*

<sup>12</sup> Mu tí da napa me: «Ma nde lie ne makilisito-o, ma tí da namene ndu 'ngú hana.» A na paká moko, mu tí da namemene. Engú bini, ongú koko bhú ká ongú inde mu ngamene e bhomu-o tí da nateteke mu de. Ma aziba me, ma tí da namene ndu 'ngú hana. Engú bini ngama-a, ma kūnda nadu bali na 'ngú bini de. <sup>13</sup> Mu tí da napa matá me: «Ebhe aha ezū ngubula nabedhe ebu ne di. Ani atsia amene di ebu ngubula ezū.» A na paká moko. Engú bini, li sokpí-e,

Ebhe abhólø ebu, ani tsia bhólø di ezu. Ndũndũ bhisi hana tsia ndjulũ. Padhá de, anga Ebhe bho kute ní ngubula nadhũku ne olisi, i dũ di-e ne obhosi ngangá de. Ani amene mangbo kute ní ngubula nakpata Ngámá Yesu ne di. Padhá de, anga a ko Ngámá na kute ní ngae. <sup>14</sup> Ebhe azuku Ngámá gba ní Yesu Kilisito bhú kuo. Ani azúku bhadi kute ní bhú angu gba e-o.

<sup>15</sup> Yi mbila de me, kute yi ne sũka yá Kilisito di? Lele pi ma ahá kute ma inde sũka yá Kilisito lie ngũ nakpøkpøtø ne kute ølø na zabhe-e? Bhobhomũ-o méne lie belegũ de bini! <sup>16</sup> Yi mbila de me, i dũ me kpála nde akpøtø lie ne ølø na zabhe-e, ndũ uo bhisi hana akolo koli kute bini-e di? Padhá de, anga u aye bhú Bhuku gba Ebhe-e me: «Ndũ uo bhisi hana akólo koli kpála bini.\*» <sup>17</sup> La-a, kpála bhende akpøtø lie ne Ngámá-a, akolo ne ani ne koli bua bini. <sup>18</sup> Ka 'ngũ ango-o, yi 'o nadhũku ne olisi, i dũ di-e ne obhosi ngangá ma'o. Ondũ 'ngũ na sisiti li kpála amemene e hana-a, ani memene ne kute e de. Engũ bini, kpála inde ngakpøtø lie ne ølø na zabhe-e ngamene siti 'ngũ ne kute e makpe. <sup>19</sup> Yi mbila de me kute yi ne eti gba Bu Bhobua-a di? Yi mbila la di de me Bu Bhobua ango-o ngadũ bhú yi, Ebhe aha la di pi yi ngae di? Kute yi ne ehe ka yi ade. A ko na Ebhe. <sup>20</sup> Ebhe akala yi bhú kpéke mase. Kaka-a, kute yi dhøgø Ebhe bhú ndũ 'ngũ hana inde yi ngamene e ne di-o.

## 7

*Polo agie 'ngũ pi omabhuka na gũdhũ na Kolito pĩndji 'ngũ na kũva*

<sup>1</sup> Mbia inde-e, ma ngagie 'ngũ pi yi li ongũ maka yi ayi ma lie

bhú balũa gba yi-o. Ngayi-e, yi ngapa me: «A ndjĩndji pi bhoko me ani abũ 'kpa e li ølø de.»

<sup>2</sup> Abana mo-o, ma ngabhũndja me, kabula nadũ nadhũku ne olisi, i dũ di-e obhosi ngangá de-e maka okoko bhú ká yi ngamemene lie, a ndjĩndji me bhoko ha ølø gba e, amba ølø ha di bhoko gba e. <sup>3</sup> A ayo me bhoko mene pi ølø gba e ehe inde li bhoko amemene e pi ølø maka a ayo lie-o. A ayo la di me ølø mene pi 'ko e engũ inde li ølø amemene e pi bhoko gba e ko.

<sup>4</sup> Ølø ti da namene ne kute e maka ani akũnda lie de. Kute ani ne ehe ka 'ko ani. La di-e, bhoko ti da namene ne kute e maka ani akũnda lie de. Kute ani ne ehe ka wala ani. <sup>5</sup> Kpála bini agbĩte kute e pi killi e de. Yi mene bha bini mo-o me yi nde adje liyi bhú dabili bini, ngũ na'o mbo nedhinga ngubula nayo Ebhe. Pipita-a, amba yi gie liyi bhú dabili bini, anga yi mene mo-o de-e, yi tí bhú gumũ kute, yi tsia tí bhú ekú gba Satana . <sup>6</sup> Engũ nagbite kute o ngubula nedhinga bedi ma ngapa e pi yi inde-e, a ko líli de, a ko mangbo ngũ napa pi yi me, i dũ me yi nde amene mo-o, a adũ sisiti de.

<sup>7</sup> Ma akũnda naali me ndũ okpála hana dũ olingbangi maka ma. La-a, a ti da namene lie mo-o de, anga Ebhe aha makalá pi ní kpi kpi kpi. Ani aha pi okoko naha lio. Ani atsia aha pi okoko nadũ olingbangi.

<sup>8</sup> Engũ ma ngapa e pi olingbangi ne økøsi-e ngae inde: a ndjĩndji pi yi nadũ kpi yi kpi maka ma. <sup>9</sup> Engũ bini, yi u me yi ti da nadũ kpi yi kpi de-e, yi de ha liyi. A ndjĩndji me yi ha liyi nane me gumũ kute ha angu yi.

*A ayo me omabhuka inde bhú kũva-a agbø bhũsu o de*

\* **6:16** 6:16 Nakolo koli kpála bini inde si-e, a kpi ne nakolo koli kute bini. Tsia bhú Dje. 2:24.

<sup>10</sup> Pi okpála bhende bhú káva-a, ma ngapa bhobhomu-o ngama Polo ade, a ko Ngámá Yesu Kilisito . Aní apa me, a ayo de me ełe yie bhú káva-a de. <sup>11</sup> I du me ełe nde ayie bhú káva-a, aní ahá matá bhoko koko de. I du me aní nde au me ni ti da nadu kpi ni kpi de-e, aní de gie lie bhú káva gba e-o. Pi bhoko-o, a ayo de me aní gie wala e de.

<sup>12</sup> Pi okpála koko-o, ma ngapa 'ngú inde-e ngama, a ko Ngámá Yesu de. Ma ngapa me: i du me a nde ka makilisito na bhobhoko ne ełe inde mupagano-o, i du me ełe ango-o nde akunda nadu ne 'ko e-e, 'ko aní de du ne aní. <sup>13</sup> A bhadi moko pi ełe inde makilisito. I du me 'ko aní nde ne makilisito ade-e, li bhoko ango-o kunda nadu ne wala e-e, u de du ne aní. Ełe-o atsé aní de. <sup>14</sup> Padhá de, anga bhoko inde ne makilisito ade bhomu-o ti da nabhuka ka wala e inde ne makilisito-o. A bhadi moko pi ełe inde ne makilisito ade-o. I du me 'ko aní nde ne makilisito-o, aní ti da nabhuka ka 'ko e inde makilisito-o. Padhá de, anga i du mo-o de-e, li ongisi gba uo-o dú maka ongisi gba okpála inde i bhuka de. Engú bini, u ti da nabhuka ka 'dyi o, i du di-e ka 'hi o inde abhuka-o.

<sup>15</sup> La-a, kpála bhende ne makilisito ade-e kunda nagbo bhusu o ne makilisito-o, u de gbo bhusu o. A moko, kpála inde ne makilisito, i du bhoko, i du di-e ełe-o sa líli bini ngú nadu bha bhú káva bhomu ade. La-a, yi mbila me Ebhe a'i ní me ní du bhú káva bhú guo 'ngú . <sup>16</sup> Mu ti da nambila lele pi, ngamu ełe inde ne makilisito me ni ti da nakobho 'ko ni de-e? I du di-e ngamu bhoko inde makilisito-o, mu ti da nambila lele pi me ni ti da nakobho wala ni de-e?

*A ayo me kpála ne kpála du kala Ebhe lele maka aní adu nani lie-o*

<sup>17</sup> Engú na ngbéngbé inde bhú 'ngú bhomu-o, a ko me kpála ne kpála du maka li Ngámá Ebhe aha pi aní lie-o. A ayo la di me aní du maka aní adu nani lie nedhinga li Ebhe a'i aní lie-o. A bhomu-o líli inde ma aha e bhú ndu oDadjua gba Ebhe-e hana-o. <sup>18</sup> I du me Ebhe nde a'i kpála me aní nde ali gandja ali-e, a ayo de me aní wo gandja inde aní ali e bhomu-o de. I du la me Ebhe nde a'i kpála me aní nde li nga ngandja de-e, a ayo de me aní li gandja-a de. <sup>19</sup> Padhá de, anga li kpála li gandja-a, aní li di gandja de-e ne 'ngbé 'ngú ade. Engú na ngbéngbé-e, a ko namene líli gba Ebhe.

<sup>20</sup> A ayo me kpála ne kpála du lele maka aní adu nani lie li nedhinga li Ebhe a'i aní lie-o. <sup>21</sup> Mu du nani ne bali nedhinga li Ebhe a'i mu lie? Mo odjé tsulu de. Engú bini, i du me a nde pi mu nedhinga me mu koto bhú bali-e, mu de koto. <sup>22</sup> Kpála bhende adu nani bali li nedhinga li Ngámá a'i aní lie akoto mbia inde bhú bali-e akoto, anga aní akpetse lie ne Ngámá. La-a, kpála bhende ne bali bhú 'ngú na doto ade-e, inde li Ebhe a'i e-e, aní akolo mbia inde-e bali gba Kilisito. <sup>23</sup> Ebhe akala yi ne mase naali. Kaka-a, a ayo de me yi kolo obalise gba okpála na doto de. <sup>24</sup> Ondaise ma, a ayo me kpála ne kpála du kala Ebhe lele maka aní adu nani lie li nedhinga li Ebhe a'i aní lie-o.

#### *Engú pindji olingbangi*

<sup>25</sup> Pi okpála bhende i ha nga olisi de-e, ma ngaha pi yi-e mabhundja gba ma maka kpála inde u ti da naziba e ka bádha bhú 'bu gba Ebhe-o . Ebhe kata ma ngae de. <sup>26</sup> Ka likabhu inde na nedhinga inde-e, ma abhundja me a ndjindji pi kpála me aní du bha maka aní nde lie-o. <sup>27</sup> Mu ngakunda naha ełe? Mo oyála aní de. Mu kunda

naha ɔlɔ di? Dɔ lingbangi. Mo ohá ɔlɔ de. <sup>28</sup> Engú bini, i dɔ me mu nde aha ɔlɔ-o, mu mene bhomɔ-o siti 'ngú de. I dɔ la di me tsa ɔlɔ nde aha bhoko-o, ani mene siti 'ngú de. La-a, yi mbila ndjindji me okpála bhende ngaha olisi ngazɔ likabhu pɪla doto naali. Ma akunda la de me yi zɔ likabhu bhomɔ-o de.

<sup>29</sup> Ondaise ma, ma akunda napa pi yi me, nedhinga inde atigala pi ní-e bedi. Nayie pi mbia inde ngú nanɔ ne kalanɔ-o, a ayo me okpála bhende ka o ne olisi dɔ mɔgito me olisi ka uo ade. <sup>30</sup> Okpála bhende ngaku 'gbá-a mene mɔgito me uo bhú likabhu ade. Obhende ngamɔ 'zo-o mene mɔgito me uo bhú djali ade. Obhende ngakala 'he mene mɔgito me ehe ka uo ade. <sup>31</sup> Obhende ngasia tia na doto inde-e mene mɔgito me tia ka o ade. Padhá de, anga doto maka i ngau lie lie mbia inde-e, bhúe matá nedhinga bhelé de.

<sup>32</sup> Ma akunda me yi adú ne likabhu de. Bhoko bhende i ha ɔlɔ de-e gbite lie li engú gba Ebhe, ani ngagili nanga li Ebhe. <sup>33</sup> Engú bini, bhoko bhende aha ɔlɔ-o, agbite lie li ongú na doto, ani ngagili namene engú inde anga li wala e. <sup>34</sup> Ani agbo la di bhɔsɔ e li di kulu bhisi. A bhadi moko pi ɔlɔ inde aha bhoko, ani ngagbite lie li 'ngú na doto. Ani ngagili namene engú inde nganga li 'ko e. Engú bini, pi ɔlɔ, i dɔ di-e tsa ɔlɔ bhende i ha nga bhoko de-e, ani ngagbite lie li engú gba Ngámá. Padhá de, anga ani akunda naha lie pi ani bhú ndɔ 'ngú hana inde ani ngamene e, ne bhende ani ngabhundja e-o.

<sup>35</sup> Ma ngapa 'ngú bhomɔ-o ngubula bádha 'ngú gba yi, ma pa ngubula na'o tili kili li 'ngbɔ yi de. Engú bini, a ko ngubula me yi mene engú inde ndjindji, amba

yi kpata la di Ngámá Yesu ne bua yi hana.

<sup>36</sup> La mbia inde-e, i dɔ me makombi bini nde akpe namene siti 'ngú li pabili gba tsa ɔlɔ inde ani abedhe ne gumɔ naha e, ani bhundja me a ayo me engú ango-o kpata kpadji na ndjindji-e, ani de mene mɔka ani au lie. Ani mene siti 'ngú de. U de ha lio maka li bhoko-o akunda lie-o. <sup>37</sup> Engú bini, i dɔ me makombi-e nde apa me ni ha tsa ɔlɔ bhomɔ-o de-e, i dɔ me engú ango-o nde ayie li bua ani makpe me u nde kata ani tété gandji de-e, ani amene bhadi bádha 'ngú. <sup>38</sup> Bhoko bhende aha tsa ɔlɔ inde nako ani adɔ nakunda naha e amene bádha 'ngú. Engú bini, bhoko bhende apa naae me ni ha ani de-e, amene bádha 'ngú naali.

### *Engú pindji ɔɔkɔsi*

<sup>39</sup> Ɔlɔ inde li 'ko e nde bhú ka-a ti dɔ nadɔ ne bhoko koko de. Engú bini, i dɔ me bhoko ango-o nde akpi-e, bhobhomɔ-o aha kpadji pi ani ngú naha bhoko koko maka ani akunda lie. La-a, a ayo me bhoko ango-o dɔ ne makiliso. <sup>40</sup> Engú bini, ngama-a, ma abhundja me i dɔ me ani nde adɔ kpi e kpi-e, ani dú bhú djali nane me ani ha matá bhoko koko. Ma pa mo-o, ma abhundja me Bhobua gba Ebhe-e di bhú ma.

## 8

### *Kpadji na imbilangɔ di ne kpadji na mukunda*

<sup>1</sup> Mbia inde-e, ní tsia nga 'ngú pindji so 'nɔ inde u aha e pi oebhe na eu. A na paká me imbilangɔ bhú ndɔ ní hana, maka yi ngapapa lie-o. 'E-e! Imbilangɔ ango-o ti da naha pi kpála 'ngbé 'ndji. Engú bini, mukunda naae ngadyudyo ní bhú nabhuka ne kalanɔ. <sup>2</sup> Kpála bhende ngabhundja me ni ambila 'ngú-o mbila



nga maka a ayo lie me ani mbila-a de. <sup>3</sup> Engú bini, kpála kunda Ebhe na paká paká-a, Ebhe ambila kpála ango-o.

*Yi ató ondaise yi bhú ngíta de*

<sup>4</sup> Pindji 'ngú inde atsia so 'nú inde u aha e pi oebhe na eu-o, ní ti da nazuzú, ne me ní ti da nazuzú de? Ní mbila ndjindji me oebhe na eu ne oeh na kukulú ade. Ní ambila di me, Ebhe bha koli e bini kpi e kpi. <sup>5</sup> A na paká me a abhúlá di ne pála doto ne oeh inde li okpála ngadhögö o maka oebhe gba o. Ongua oebhe na eu bhomu-o bhelé, u di ngako pí okpála. <sup>6</sup> La pi ní-e, ní mbila ndjindji me koli Ebhe bha bini. A ko 'Dyi ní inde abho ndú 'he hana pála doto. Ani atsia abho di ní me ní dū pi ní. Ní la bhadi ne koli Ngámá bini, a ko Yesu Kilisito. Ndu 'he hana ngayie ka ani, ní di ngasia mukobho ka ani.

<sup>7</sup> Engú bini, i dū me ní nde ambila me mukobho bhú oebhe na eu ade-e, a ne okpála inde imbila nga kukulú 'ngú ango-o má kpulukutu de. Okpála koko bhú ká yi adū nadhögö oebhe na eu. La mbia inde-e, uo bha ngazú so 'nú ango-o ne nabhundja me oebhe na eu bhomu-o ne angu pépé. Okpála ango-o nga bha bhubhuku li kpadji gba Ebhe. Abhomu-o, u ngabhundja me so 'nú ango-o ngato o bhú siti 'ngú kala ani. <sup>8</sup> Ní mbila ndjindji me ezú bini ti da nadyudyo ní de Ebhe masikpe de. Belegu ní zu, belegu ní zu de-e, a méne 'ngú bini li ní de.

<sup>9</sup> 'E-e! Yi lila liyi me, kpadji inde u aha e pi yi ngú nazú ndú 'he hana-a, a tó okpála bhende bhubhuku bhú nabhuka bhú siti 'ngú de. <sup>10</sup> Padhá de, anga i dū me kpála inde bhubhuku bhú nabhuka nde au mū, ngamū kpála inde ambila kukulú 'ngú

ambila-a, mū nde ngazú so 'nú inde u abhölö e pi oebhe na eu bhú eti u adhödögö uo bhú e, mo ombhundja naamū me ani ti da di nazuzú di? <sup>11</sup> Kaka-a, kpála inde bhubhuku ango-o, ndai mū inde li Kilisito akpi pi e tsia ngíta ka mū, kabula engú nasisiti inde mo omene e, ngamū kpála ambila kukulú 'ngú má kpulukutu-o ambila-o! <sup>12</sup> Namene ngua siti 'ngú bhomu-o li pabili gba ondaise yi-e, di ne na'o eka li bua uo inde nakpokpo kú 'ngú inde bhubhuku bhomu-o, a ko namene siti 'ngú li Kilisito ngae makpe. <sup>13</sup> Kaka-a, i dū me ezú bini nde ngato ndai ma bhú siti 'ngú-o, ma zú matá ezú ango-o de, amba ndai ma atí bhú siti 'ngú ka ma de.

## 9

*Lele li Polo adū nakpokpo Bádha Ngali gba Yesu Kilisito lie-o*

<sup>1</sup> Ngama-a, ma ti da nasia ndú 'he hana maka sūka obhulú titima gba Ngámá gba ní Yesu Kilisito di? Ngama-a, ma u ani ne djila ma makpe di? Ngayi-e, yi bhuka ani ka kulu gba ani inde ma amene e bhú ka yi-e di? <sup>2</sup> Belegu li okpála koko ziba de me ma ne sūka obhulú titima gba Yesu-o di-e, la pi yi-e, ma ne bhulú titima gba ani. Padhá de, anga nau me yi akpötsö liyi ne Ngámá-a asuno na paká me, ma ne bhulú titima gba ani, anga ma akpokpo Bádha Ngali-e pi yi ngama.

<sup>3</sup> Eli inde ma agie e pi okpála inde ngapa 'ngú li ma sisiti-e ngae inde: <sup>4</sup> A ayo di de me ya sia ezú di ne ehe nandji mandji kabula kulu inde ya ngamene e di? <sup>5</sup> Yi abhundja naayi me li ya ha ölö inde makilisito me ya dū nadhuku bhú dabili bini ne ani maka Piele ne obhulú titima koko gba Yesu, di ne ondaise Yesu-o, amba ko siti 'ngú? <sup>6</sup> Yi abhundja naayi me,

okpála inde a ayo me u mene kulu ne 'kpa o ngú nakobho ka o-o bha ne ya ne Balabasi? <sup>7</sup> Kpála inde bhú kulu na sudha-a haha makalá gba e pi e ngae makpe uu? Belegu de bini. Li kpála lu edyi-e, ani zuzu ezu ango-o di, i du me kpála nde ngalila enu-o, ani ndjindji miliki na 'ka 'nu ango-o di?

<sup>8</sup> Ongú inde ma apa e bhomu-o, a ko bha bini bhende li okpála ngabhundja e ngao-o de. U aye bhadi bhú líli gba Moidje-e moko. <sup>9</sup> Padhá de, anga u aye bhú líli ango-o me: «I du me bagala nde ngatu ngano-o, mo ogbíte 'bhe ani de. 'O me ani zu mbo té ngano ango-o uu.†» Yi abhundja naayi me Ebhe apa 'ngú bhomu-o bha bini pi obagala? A mo-o ade. <sup>10</sup> Ebhe apa 'ngú bhomu-o pi ní makpe adi? A na paká me ani apa pi ní. Padhá de, anga kpála inde ngalu 'dyi-e nga'o 'to e li ezu inde ani asía e-o. A bhadi ndjindji me kpála bhende nga'e nguwa abhiye-e sia té nguwa ango-o.

<sup>11</sup> Ya akpokpo Bádha Ngali pi yi maka u alulu nguwa lie abhiye-o. I du la me yi nde ateteke ya ne tia na doto-o, amba a ko siti 'ngú? <sup>12</sup> I du me okpála koko nde ngasia tia na doto ka yi-e, ka ni ngaya-a, ya ti da nasisia ka yi lie de-e? Engú bini, ya tsia yo ehe ka yi de. Ya ngakibila ndu likabhu hana inde ngakolo li kute ya-a, anga ya kunda namene engú inde i ní kpadji pi okpála me u adjé Bádha Ngali gba Yesu Kilisito-o de-e de.

<sup>13</sup> Yi mbila de me okpála inde ngamene kulu bhú 'ngbé 'ti Ebhe-e ngasia ezu gba o bhú kulu inde u ngamene e adi? Obhende ngat-sulu enu pi Ebhe-e ngasia tété ngú nazuzu adi? <sup>14</sup> A bhadi moko pi okpála bhende ngakpokpo Bádha

Ngali-o. Ngámá gba ní-e apa me, okpála inde ngakpokpo Bádha Ngali-e, akóbho bhadi li Bádha Ngali.†

<sup>15</sup> Engú bini, belegu inde lie mo-o, ngama-a, ma yo ehe bini ka yi de. Ma pa pi yi de me, ma aye balua inde-e pi yi me yi tima 'he muma-a de. A ndjindji muma naali me ma kpi ne gumu! A ayo de me kpála bhelo engú inde ma nde ne gindaginda ka e de. <sup>16</sup> Nakpokpo Bádha Ngali ma ngakpokpo e-e ha kpadji muma de me 'ndji ma be-e de. Padhá de, anga Ebhe ngae makpe apa muma me ma kpokpo Bádha Ngali ango-o. A moko, a ko likabhu muma i du me ma nde kpokpo Bádha Ngali-e de ko. <sup>17</sup> I du nani me ma alo kulu ango-o ngama-a, a de adú ndjindji me u ha makalá muma tété. A la mo-o ade. Ma lo kulu ango-o ngama makpe de. Ma ngamemene anga Ebhe a'o kulu ango-o sakpa ma. <sup>18</sup> Makalá ma ngasia e li kulu ango-o ne ni? Makalá gba ma ne nakpokpo Bádha Ngali-e mandi nayo 'he. Maka kpála nakpokpo Bádha Ngali-e, ma ti da nayo 'he ka yi, la-a ma yó ehe bini de.

*Polo ateteke kpála ne kpála bhú dasundu gba e ngú nabhuka Ngámá Yesu*

<sup>19</sup> Ma bhú ngu ma, ma ne bali gba kpála bini ade. La-a, ma atsia a'o lima bali gba ndu okpála hana, ngubula me ma sia okpála bhelé ngú nabhuka Ngámá Yesu. <sup>20</sup> Li ma du bhú ká omaYuda-a, ma du maka uo ngubula me ma teteke uo ngú nabhuka Ngámá Yesu. Ma ambila ndjindji me líli gba Moidje ne angu pi ma ade. Engú bini, i du me ma nde bhú

† 9:9 9:9 Tsia bhú Det. 25:4; di ne bhú 1 Tim. 5:18. † 9:14 9:14 Tsia bhú Luk. 10:7; di ne bhú Mat. 10:10.

ká okpála inde ngamene líli ango-o, ma améne m̀gito me ma sa líli ango-o ngubula me ma teteke uo ngú nabhuka Ngámá Yesu.

<sup>21</sup> Lí ma d̀u bhú ká okpála bhende i mbila líli gba Moidje de-e, ma adú bhadi maka uo ngubula me ma teteke uo ngú nabhuka di Ngámá Yesu. Bhobhomu-o kunda napa de me ma mene líli gba Ebhe de-e de. Ma ngamemene anga ma ngamene líli gba Ngámá Yesu Kilisito. <sup>22</sup> Lí ma d̀u bhú ka okpála inde bhubhuku li kpadji gba Ebhe-e, li ma 'ó di lima bhubhuku ngú nateteke uo ngubula me u kolo kpekpeke bhú nabhuka Ngámá Yesu. Belegu li okpála d̀u lele pi-ie, i d̀u me ma nde akolo bhú ká uo-o, ma dú bhadi maka uo ngubula me ma teteke okpála koko bhú ká uo ngú nabhuka Ngámá Yesu, amba u kobho. <sup>23</sup> Ma ngamene ndu 'ngú bhomu-o hana ngubula me Bádha Ngali-e nu ne kalanu, amba Ebhe tuko bisagu pí ma bhú kulu ango-o.

*A ayo natsia 'kpí lío ndjindji bhú nabhuka*

<sup>24</sup> Yí mbila de me, okpála inde agugu holo-o, u dudu okpála bhelé, engú bini kpála bhende akokoto kalanu-o sisia makalá ngae. Yí mene ne kpéke maka okpála inde ngagu holo, amba yí sia di makalá. <sup>25</sup> Ndu okpála hana inde agugu holo-o dudu sa líli nakpekpeke. U ngamene mo-o ngubula nasia makalá. La-a, makalá ango-o bhúe de. Engú bini nganí-e, ní ngamene ngubula nasia makalá inde adú dudu ma ne dudu ma. <sup>26</sup> Kaka-a ngama-a, ma ngagu holo ngangá ade. Ma la di maka kpála inde ngagu gbele me ani nde ngatsia 'kpí lie ndjindji. <sup>27</sup> Ma ngamene kute

ma kpekpeke ngú napa me kute ma mene líli gba ma-o, amba li sokpí-e, Ebhe abhíke ma de, pita nakpokpo Bádha Ngali pí okpála koko-o.

## 10

*Yi lila liyi ka nale-e malila*

<sup>1</sup> Ondaise ma, ma ngagbele 'dje yi mo-o, ngubula me yi bhundja nga matá engú inde akolo nani li onguo ogbi ní bhú nedhinga u adu adhuku lie nganda Moidje-o. † Ebhe abuku nani ndu uo hana ne ndindi ngú nalila uo. Ndu uo hana agulu nani 'ngbé 'ngu na Mbembe. <sup>2</sup> Nabuku uo ne ndindi ne nakodho 'kpí ka uo bhú 'ngu-o amana m̀gito me Ebhe aha pi uo bhomu-o Batisimo, ngubula me u kpètse lío bini ne Moidje. <sup>3</sup> Ndu uo hana azu ezú inde adu ayie ka Ebhe. † <sup>4</sup> Ndu uo hana andji engu inde adu akoto bhú teme. Teme ango-o, a ko kulu Yesu Kilisito inde adu adhuku ne uo bhú dabilí bini-o. <sup>5</sup> La-a, belegu u au ongamba 'ngú bhomu-o lie hana-a, okpála bhelé bhú ká uo d̀u amene engú inde anga li Ebhe-e de. Kaka-a, u amu, u atsia atigala bhú 'gu. †

<sup>6</sup> Ongú bhomu-o ngasuno pi ní me, ní adú ne gamu namene siti 'ngú maka onguo ogbi ní de. † <sup>7</sup> Yí ayó oebhe na eu maka okoko bhú ká uo amene nani lie de. Padhá de, anga u aye bhú Bhuku gba Ebhe-e me: «Okpála adulu kuto ngubula nazu anokomia. Pipita-a, u atsia ayie bhúlá ngú nadho 'bi kala kulu ebhe na eu. †» <sup>8</sup> Okpála koko bhú ká uo adu adhuku ne olisi ngangá. Kaka-a, okpála kote ndjikpa bhisi ne ká bata atsia amu bhú koli 'kpí bini. Pí ní-e, ní améne maka uo de. † <sup>9</sup> Okpála

† **10:1** 10:1 Tsia bhú Eki. 13:21-22, 14:19-29. † **10:3** 10:3 Tsia bhú Eki. 16:35. † **10:5** 10:5 Tsia bhú Nom. 14:16, 29-30. † **10:6** 10:6 Tsia bhú Nom. 11:4, 34. † **10:7** 10:7 Tsia bhú Eki. 32:6. † **10:8** 10:8 Tsia bhú Nom. 25:1-18.

koko bhú ká uo ale Ngámá. Kaka-a, okpálu adolo uo má bi bi bi, uo atsia amu. Pi ní-e, ní améne maka uo de.† <sup>10</sup> Okpála koko bhú ká uo adu adi mutokono li Ebhe. Kaka-a, andjelu gba Ebhe inde abhèbhèlè kpála-a, a atsia ago abhili uo. Pi yi-e, yi adi mutokono li Ebhe maka uo de.†

<sup>11</sup> Ndu ongú bhomu-o hana akolo li uo ngubula nateteke okpála koko me u améne maka uo de. U aye ongú ango-o bhú Bhuku gba Ebhe ngubula me asuno kpadji pi ní, nganí inde ngakobho li sokpí-o. <sup>12</sup> Kaka-a, kpála bhende ngabhundja me ni alu bhú nabhuka kpekpeke-e lila lie ndjindji me ní atí-i de. <sup>13</sup> Nale inde ngabhaka yi-e, a ko nale inde ngakolo bha li ndu okpála hana. Ebhe atéteke yi maka ani apa lie-o. Ani ti da naka kpadji de me engú inde akólo li yi-e ha angu yi-e de. Engú bini, i du me nale nde akolo li yi-e, Ebhe há angu pi yi ngú nakikibila. Ani tsia téteke yi me yi atí-i de.

*Yi lila liyi ka oebhe na eu-o malila*

<sup>14</sup> Kaka-a, ondaise ma na mukunda, yi 'o nadhögø oebhe na eu ma'o. <sup>15</sup> Ma ngagama 'ngú pi yi maka okpála na imbilangu. Yi aló doto bhú 'ngú ma ngapa e ngayi makpe. <sup>16</sup> Nedhinga ní adulu lie pí misa gba Ngámá-a bhú dabili bini-e, ní ngandji vino inde ní ngagie heni pi Ebhe ngú e-o. Ní akpøtø liní bhomu-o ne Yesu Kilisito bhú ngute e. Li ní gumu mapa-a ngú nazuzu-o, ní akpøtø bhomu-o liní bhú kute Yesu Kilisito. <sup>17</sup> Koli mapa-a bha bini. Belegu ní nde lie bhélé-e, ndu ní hana ní ngazu koli mapa bini bhomu. Bhobhomu-o ngasuno me ní akpøtø liní, ní akolo bini.

<sup>18</sup> Yi bhundja nga okpála na Isalaele. Nedhinga u ngazu enu inde u aha e pi Ebhe lie, u akpøtø lio bhomu bhú dabili bini ne Ebhe inde u aha enu bhomu-o pi e-o. A mo-o adi? <sup>19</sup> Ma akunda napa bhomu-o pi? Ma akunda napa me, ebhe na eu di ne enu inde u ha e pi ani-e, a ne tata? <sup>20</sup> A mo-o ade. Ma apa mangbo me, li okpála bhende imbila Ebhe de-e du naha 'he bhú 'ti oebhe gba o-o, u haha pi odjabulu. U haha pi Ebhe de. La-a, ma kunda de me yi kpøtø liyi ne odjabulu-o de. <sup>21</sup> Yi ti da nandji vino bhú kópo gba Ngámá Yesu, yi tsia ndji di bhú bhende gba odjabulu-o de. Yi ti da nazu 'he pí misa gba Ngámá, yi tsia zu di pí misa gba odjabulu-o de. <sup>22</sup> Yi abhundja me ní kpekpeke ane Ngámá-a? Ní akunda me bua ani ke ne ní?

*Yi mene ndu 'ngú hana ngubula nadhögø Ebhe*

<sup>23</sup> Okpála koko bhú ká yi ngapa me: «Ya ne omakilisito, ya ti da namene ndu 'ngú hana.» A na paká, engú bini, ongú koko ti da nateteke ní de. Yi ngapa me: «Ní ti da namene ndu 'ngú hana.» La-a, ongú koko ti da namene de me okpála koko bhele li kpadji gba Ebhe-e de. <sup>24</sup> A ayo de me kpála 'o bha 'to e 'to e makpe de, engú bini, a ayo me ani 'o di 'to e 'to okpála koko.

<sup>25</sup> Yi ti da nazu ndu enu hana inde u ngatsindji e bhú daposu me yi nde yi 'ngú tété de kabula bua nakpokpo ku 'ngú gba yi-o. <sup>26</sup> Padhá de, anga Bhuku gba Ebhe-e apa me: «Doto ne ndu 'he inde bhúbhú-o hana ne tia ka Ngámá.†»

<sup>27</sup> I du me mapagano nde a'i mu agba e ngú nazu 'he-e, i du me mu nde akunda nanu-o, li mu kolo-o,

† 10:9 10:9 Tsia bhú Nom. 21:5-6. † 10:10 10:10 Tsia bhú Ets. 24:1.

10:10 Tsia bhú Nom. 17:6-14. † 10:26 10:26

m̄ de z̄ nd̄ 'he hana u ahá e pi m̄-o, mo oyí 'ngú bini de kabula bua nakpokpo ku 'ngú gba m̄-o. <sup>28</sup> La-a, i d̄ me kpála nde apa pi m̄ me en̄ inde m̄ ngaz̄ e bhom̄-o, a ko en̄ inde u aha e pi oebhe na eu-o, mo ozú-u de, amba bua nakpokpo kú 'ngú gba kpála inde apa 'ngú ango-o pi m̄-o asíti de. <sup>29</sup> Ma ngapa 'ngú bhom̄-o p̄ndji 'ngú inde li kpála bhom̄-o ti da nabhundja e li bua nakpokpo kú 'ngú gba e-o. Ma pa ngubula bua nakpokpo kú 'ngú gba m̄-o de. Ka ni ma améne 'ngú lie li lele mabhundja gba kpála koko, ma nde mene mangbo maka ma ngabhundja lie ngama makpe-e di-e? <sup>30</sup> I d̄ me ma nde agie heni pi Ebhe ngubula ez̄-o, ka ni li kpála koko nga uu lie sisiti-e?

<sup>31</sup> Abhom̄-o, i d̄ me yi nde ngaz̄ 'he, i d̄ di-e me yi nde ngandji 'he nandji mandji, i d̄ di-e me yi nde ngamene mangua 'ngú koko dho i-e, yi de mene nd̄ 'ngú bhom̄-o hana ngú nadh̄eḡe 'li Ebhe. <sup>32</sup> Yi améne engú inde li okpála koko ti da nati ka e de, abana omaYuda, abana obhende ne omaYuda ade, abana okpála na Piga gba Ebhe. <sup>33</sup> Ngama-a, ma bhadi ngamene mo-o. Nd̄ 'ngú ma ngamene e hana, ma ngamemene me a nga li nd̄ okpála hana. Ma bha ngabhundja engú inde atéteke ma-a ade. Ma ngabhundja mangbo p̄ndji engú inde i ti da nateteke okpála bhelé, amba Ebhe kobho uo.

## 11

<sup>1</sup> Yi kpata engú inde ma ngamene e maka ma ngakpata bhende gba Kilisito lie-o.

*Lele nad̄ ka obhosi di ne olisi bhú nedhinga nayo Ebhe*

<sup>2</sup> Ma ngaha apepe pi yi, anga yi ngabhundja ma bhú nd̄ 'ngú

hana. Yi la di ngamene olíli gba omabhuka inde ma asuno e pi yi-o. <sup>3</sup> La-a, ma akunda me yi mbila engú inde: Kilisito ne Ngámá pí 'ndji bhoko. Bhoko ne ngámá pí 'ndji el̄e. Ebhe ne Ngámá pí 'ndji Yesu Kilisito. <sup>4</sup> I d̄ me bhú nedhinga nayo Ebhe, li bhoko d̄ nayo Ebhe, ani d̄ di-e nakpokpo eli inde ani asia e ka Ebhe me ani nde adyi ndata-a, amba ani ngaha bhom̄-o n̄m̄ pi Ngámá gba e-o. <sup>5</sup> Engú bini, i d̄ me bhú nedhinga na mayo-o, li el̄e 'o 'ndji e padhá li nedhinga ani ngayo Ebhe lie, i d̄ di-e li nedhinga ani ngakpokpo eli inde ani asia e ka Ebhe-e lie-e, el̄e ango-o ngaha n̄m̄ pi ngámá gba e-o. Ani maka el̄e inde aka 'ndji e maka. <sup>6</sup> I d̄ me el̄e nde ga kitambala bhú 'ndji e de-e, amana m̄gito bhom̄-o me ani aka 'ndji e maka. I nde la lie me a nde n̄m̄ pi el̄e ngú naka 'ndji e ndundundu, i d̄ di-e ma ngbidhidhi-e, a ayo me ani ga kitambala bhú 'ndji e.

<sup>7</sup> La pi bhoko nedhinga ani ngayo Ebhe lie-e, a ayo de me ani dyi ndata-a de, anga Ebhe abho ani li kulu e. Ani ngasuno sangu gba Ebhe. La pi el̄e-o, ani ngasuno sangu gba bhoko. <sup>8</sup> Yi mbila ndjindji me, Ebhe bho gina bhoko li el̄e de, engú bini ani abho mangbo gina el̄e li bhoko. <sup>9</sup> La di-e, Ebhe bho bhoko pi el̄e de, ani abho mangbo el̄e pi bhoko. <sup>10</sup> Kaka-a, i nde lie me Ebhe abho el̄e mo-o, a ayo me ani ga kitambala bhú 'ndji e ngú nasuno me ani ti da nayo Ebhe, amba oandjelu mbila me nd̄ 'ngú hana li lelele.

<sup>11</sup> Ní mbila ndjindji me kala Ngámá-a, olisi ne gum̄ obhosi, obhosi la di ne gum̄ olisi. <sup>12</sup> Padhá de, anga maka u abho nani el̄e lie li bhoko-o, a bhadi moko a ngazu bhoko ne el̄e, la di-

e, ndu 'he hana ngayie ka Ebhe.

<sup>13</sup> Yi pa nga ngayi, a pi ɔlɔ ndjindji nayo Ebhe me ani nde buku 'ndji e di? <sup>14</sup> Ndu okpála na píla doto hana mbila ndjindji me a ko numu pi bhoko ngu na'o sundjo e ndjandjandja. <sup>15</sup> La pi ɔlɔ-o, ndjandja sundjo-o, a ko bádha 'ngú naali. Padhá de, anga Ebhe aha nani sundjo pi ɔlɔ ngu nabuku 'ndji e ne di. <sup>16</sup> I du me kpála nde akunda nabi bhayiki li 'ngú bhomu-o, a ayo me ani mbila me lele dasundu gba ní-e ngae bhomu. Piga gba Ebhe-e ala la bhadi pí 'ngú bini bhomu.

*Polo agbele 'dje omabhuka li lele nazu komonyo*

(*Tsia bhú Mat. 26:26-29; ne bhú Mlk. 14:22-25; di ne bhú Luk. 22:15-20.*)

<sup>17</sup> Ní kodho 'kpí li 'ngú koko. Ma ti da nadhøgø yi tété de. Padhá de, anga nedhinga yi ngakpɔtɔsø liyi lie ngu nayo Ebhe-e, engú yi ngamene e ngagie mangbo yi ne sidi. A dyudyo yi ne kalanu de. <sup>18</sup> Na bini-e, u apa muma me nedhinga yi ngakø liyi lie bhú dabili bini-e, yi ngagbogbo bhusu yi. Ma abhundja me a ti la bhadi nadu moko. <sup>19</sup> A ayo la bhadi me nagbo bhusu o du bhú ká yi, amba okpála mbila obhende ngakpata Yesu Kilisito ne bua o bini-o. A mo-o adi! <sup>20</sup> Nedhinga yi ngakpɔtɔsø liyi lie ngu nazu ezu gba Ngámá-a, yi ngabhundja ani bhúbhú ade. <sup>21</sup> Okpála koko bha bini ngagbene lio ngu nazu 'he gba o makpe. Ka 'ngú angoo, okoko ngalangba, okoko la ngadulu gumu. <sup>22</sup> Gbágbá li yi ade ngu nazu 'he di ne ngu nandji pandi tété-e? Ne me yi ngau Dadjua gba Ebhe-e padhá. Yi atsia akunda naha numu pi okpála inde li ehe nde ka o ade. Yi nga'o 'to yi me ma pá pi yi pi? Ma adhøge yi

lele pi me yi ngamene bádha 'ngú-o? A mo-o ade. Ma adhøge yi tété de.

*Lele nazu komonyo*

<sup>23</sup> Ongú inde ma asuno e pi yi ngama makpe-e, ma asia ka Ngámá Yesu. Engú angoo me: sukpe inde u adji apú ani lie pi obhulu yala-a, Ngámá Yesu aha mapa, <sup>24</sup> ani agie heni pi Ebhe, ani agugumu, ani atsia apa me: «A inde-e kute ma inde ma aha e pi yi-o. Yi du amene me-e, ngu nakina ma.» <sup>25</sup> Pita u andjia nazu 'he-e lie, ani aha bhadi kópo na vino moko. Ani atsia apa me: «Vino inde-e, ngasuno gandja na mbia inde li Ebhe akodho e ne yi-o. Gandja angoo ala pí ngute ma. Ndu nedhinga hana inde yi adú andjindji lie, yi du andjindji ngu nakina ma.» <sup>26</sup> Li bili bhomu-o, Ngámá Yesu akunda napa me: ndu nedhinga hana inde yi azú mapa lie di ne nedhinga inde yi andji vino lie mo-o, yi bhomu-o ngakpokpo pi okpála mbámbá nakpi ka ani akolo li 'kpí inde ani agie lie lie-o.

<sup>27</sup> Kaka-a, kpála inde azú mapa gba Ngámá Yesu, inde andji la di vino gba ani-e li lelele de-e, asia mangimbo anga ani andjo kute Ngámá Yesu, ani atsia andjo di ngute ani. <sup>28</sup> A ayo me kpála ne kpála tsia lie makpe ngae bhuhulu, amba pipita-a, ani tsia zu mapa, amba ani ndji di vino gba ani-o. <sup>29</sup> Padhá de, anga li kpála zu mapa gba Ngámá Yesu, ani tsia ndji di vino gba ani-e me ani nde ngauu maka i de ehe na padhá-a, ani bhomu-o ngagbele mangimbo pí e ngae makpe. <sup>30</sup> A bhomu-o, engú inde yi ngau ka e me okpála bhelé bhú ká yi ne kuo, okoko bhuhuku, la di-e, okoko bhelé amu. <sup>31</sup> I du me ní du atsia bua ní ngani makpe kala nazuzu-o, Ngámá de kódho 'ngú gba ní-e

de. <sup>32</sup> Engú bini, Ngámá ngakodho 'ngú gba ní-o, aní di ngalili ní ngubula me aní a'ó galikpe engú pí 'ndji ní bhú dabili bini ne pí 'ndji okpála koko de.

<sup>33</sup> Ka 'ngú ang-o, ondaise ma, nedhinga yi ngakpøtø liyi lie ngú nazu ezú gba Ngámá-a, yi dje liyi sunda yi. <sup>34</sup> I du me suka yi nde ne gumu-o, a ayo me aní zu ngaiza 'he agba e, ngubula me yi agbéle mangimbo gba Ebhe-e pí yi de bhú nakpøtø lie gba yi-o. Pindji ongú koko inde yi ayi e-e, ma agié 'ngú pí yi pépé nedhinga ma akólo lie agba yi-o.

## 12

*Angu inde li Bu Bhobua ngaha e pi kpála ne kpála ngú nateteke Piga gba Ebhe-o*

<sup>1</sup> Ondaise ma, pindji engú bhende atsia angu li Bu Bhobua ngaha e pi kpála ne kpála ngú nateteke Piga gba Ebhe-e, ma akunda me yi mbila 'ngú tété. <sup>2</sup> Yi mbila ndjindji me nedhinga yi adu nga lie ne omupagano-o, osisiti bua adu agbele yi li pápá gba oebhe na eu inde i gama 'ngú de-o. U atsia amba bhúla yi li okpadji ngangá. <sup>3</sup> Kaka-a, ma apa pi yi mbámbá lele nambila me kpála ngagama 'ngú bhú angu gba Bu Bhobua. Kpála du nagama 'ngú bhú angu gba Bu Bhobua-a, aní ti da napa de me a ayo me u tu pødjø li Yesu-o de. Engú bini, li kpála pa me: «Yesu ne Ngámá-a», a akunda napa me Bu Bhobua akata aní ngae.

<sup>4</sup> Angu li Bu Bhobua ngaha e pi kpála ne kpála ngú nateteke Piga gba Ebhe-e kpi kpi kpi, la-a, ngaani Bu Bhobua inde ngaha angu ang-o, koli aní bha bini má kpikili! <sup>5</sup> Ní ti da namene kulu pi Ngámá Yesu li okpadji ngangá, la-a, ngaani Ngámá Yesu inde ní

ngamene kulu ang-o pi e-e, koli aní bha bini má kpikili! <sup>6</sup> Ebhe ngaha angu pi okpála kpikpikpi ngú namene kulu gba aní-e ne di. La-a, Ebhe bhúla naha angu bhomu-o pi okpála-a, koli aní bha bini má kpikili!

<sup>7</sup> Angu gba Bu Bhobua-a ngasuno lie bhú kpála ne kpála ngubula me aní teteke okpála koko ne angu ang-o. <sup>8</sup> Bu Bhobua ngaha pi okpála koko-o angu nagama 'ngú ne imbilangu. Pi okpála koko-o, Bu Bhobua bini bhomu-o ngaha angu nasuno 'ngú gba Ebhe-e pi okpála. <sup>9</sup> Bu Bhobua bini bhomu-o ngaha pi okpála koko angu nadu ne nabhuka na kpekpeke. Koli Bu Bhobua bini bhomu-o ngaha pi okpála koko angu nadu nakobho okuo li okpála. <sup>10</sup> Bu Bhobua ngaha pi okpála koko angu namene ongamba 'ngú . Pi okoko-o, aní ngaha angu nakpokpo engú maka opolofeta . Pi okoko-o, aní ngaha angu nambila nagbogbo bhusu osisiti bua ne Bu Bhobua. Pi okoko-o, aní ngaha angu nagama 'ngú bhú eli gba oandjelu. Pi okoko-o, aní ngaha angu nambamba tata. <sup>11</sup> Ndu 'ngú bhomu-o hana ngayie ka koli Bu Bhobua bini. Aní ngaha pi kpála bini ne bini angu maka aní akunda lie.

*Piga gba Ebhe-e maka kute kpála inde ne oyáyá lie bhelé*

<sup>12</sup> Kute Yesu Kilisito maka kute kpála-kuti inde li oyáyá nde lie bhelé. Mu tsia 'lá kpála-kuti-e, yáyá li aní bhelé, kute aní la bha koli e bini má kpikili! Abana li yá kpála nde lie bhelé-e, ndundu hana amene bha koli kute bini. <sup>13</sup> Ndu ní hana, abana omaYuda ne okpála inde ne omaYuda ade, abana okpála inde bhú bali ne obhende bhú ngu o, ndu ní hana ní asia nani batisimo ngú napa me ní kolo maka kute bini li kpadji

gba Bu Bhobua bini. Ndu ní hana, ní atsia asia bhadi angu gba Bu Bhobua bhomu-o.

<sup>14</sup> Mu tsia kute kpála-kuti-e, oyáyá tété bhelé, a bha koli e bini ade. <sup>15</sup> Li 'dhu kpála pa me: «Ma ne yá kpála ade anga ma nde ne kpele kpála ade-e», a ko de me ani ayíe yá kpála kaka-a de. <sup>16</sup> Li 'dje kpála pa me: «Ma ne yá kpála ade, anga ma ne djila kpála ade-e», a ko de me ani ayíe yá kpála kaka-a de. <sup>17</sup> I du me 'lá kpála-kuti libhomu du bha ne djila-a, kpála de adú nadjé 'kpí lele pí? I du di me 'lá kpála-kuti libhomu nde bha ne edje-e, kpála de adú nadjé se 'he lele pí? <sup>18</sup> A na paká me Ebhe a'o nani oyá kpála-kuti maka ani akunda lie. <sup>19</sup> I du me Ebhe 'ó nani li kpála bha koli yáyá bini-e, u de 'í de me a ko kpála-kuti-e de. <sup>20</sup> Engú bini, a mo-o ade. Oyáyá li kute koli kpála bini-e bhelé.

<sup>21</sup> Kaka-a, djila ti da napa pi ekpa de me: «Ma ne gumu mu ade-e de.» La di-e, endji ti da napa pi odhu de me: «Ma ne gumu yi ade-e de.» <sup>22</sup> Engú bini, oyá kpála bhende ní ngau e me abhubhuku-o, pi ní ne tata. <sup>23</sup> Obhe ní ngau e me tata tété naali ade-e, ní ngalilila nane okoko mane. Obhe ní ngadje numu li napa 'ngú o-o, ní ngatsia 'kpí tété ndjindji. <sup>24</sup> Oyá ní bhe li numu nde li ní lie ade-e, ní nga'o 'to ní tété naali ade. Engú bini, Ebhe abho 'lá kpála-kuti da napa me ní du atsia 'kpí li oyá ní bhe nga'o numu li ní-e ndjindji.

<sup>25</sup> Ani amene mo-o ngubula me nagbo bhusu o adú bhú kute ní de, engú bini, oyá ní hana du nateteke lijo sunda o. <sup>26</sup> I du me yá kpála bini nde ngazu likabhu-o, ndu okoko hana ngazu likabhu bhú dabili bini ne ani. I du me u nde ngadhogé ya kpála-kuti bini-e, ndu okoko hana ngakpi ndjili ne ani bhú dabili bini.

<sup>27</sup> Pi yi-e, yi ndu yi hana ne kute Kilisito, akunda napa me, yi ne oyá ani. Kpála ne kpála ne da e bhú kute Yesu Kilisito. <sup>28</sup> Kaka-a, bhú Piga gba Ebhe-e, Ebhe a'o ngaiza na bini obhulu titima gba Yesu , na bhisi-e, ani a'o okpála bhende ngakpokpo 'ngú maka opolofeta, na bata ani a'o omusuno. Pipita-a, ani a'o okpála inde ngamene ongamba 'ngú. Pipita-a, ani a'o okpála bhende ngakobho obhulu kuo. Ebhe atsia aha di angu pi okpála koko ngú natsia 'kpí li obi o di ne nateteke uo. Ani a'o okpála inde ngasuno kpadji pi okpála koko. Ani atsia aha di angu pi okpála ngú nagama 'ngú bhú oeli gba oandjelu.

<sup>29</sup> Ndu okpála hana ne obhulu titima gba Yesu? Ndu okpála hana ne okpála nakpokpo 'ngú maka opolofeta? Ndu okpála hana ne omusuno? Ndu okpála hana ne angu namene ngamba 'ngú? <sup>30</sup> Ndu okpála hana di ne angu ngú nakobho okpála na kuo? Ndu okpála hana di ne angu ngú nagama 'ngú bhú oeli gba oandjelu? Ndu okpála hana di ne angu ngú nambamba ta 'ngú? <sup>31</sup> Kaka-a, a ayo me yi bedhe ne gumu namene ongú inde lie ne tata ngú nateteke okpála koko.

Mbia inde-e, ma adji asuno pi yi kpadji inde ane okoko ne bádha ngubula me yi teteke Piga gba Ebhe-e tete.

## 13

*Polo akpo 'ngú pindji mukunda bhú Piga gba Ebhe*

<sup>1</sup> Abana i du me ma nde ne angu nadi ndu eli gba okpála hana, i du di-e bhe gba oandjelu , i du me mukunda nde bhú ma ade-e, ma bha bini maka mangbou inde li gili e ngau, i du di-e mbulu ngbengbé inde li gili e



ngau kpekpeke. <sup>2</sup> Ɔ ɗu me ma nde ne angu nakpokpo 'ngú maka polofeta , i ɗu me ma nde ne imbilangu na ndu ongu hana, i ɗu me ma nde ne angu nakə mboli ndu ongu li Ebhe awo e mawo, i ɗu me ma nde di ne nabhuka inde i ti da napa me ma 'e ne di eta, i ɗu la me mukunda nde bhú ma ade-e, ma ne ehe na padhá. <sup>3</sup> Ɔ ɗu me ma nde apu ndu 'he gba ma-a hana pi obhulu ndibhili, i ɗu me ma nde atse belegu kute ma me u tsulu bhú djua, i ɗu la me mukunda nde bhú ma ade-e, bhobhomu-o ne tata pi ma ade.

<sup>4</sup> Kpála inde ne mukunda pi obi e-e, bua ani ndjándjá, ani di ngamene babadha 'ngú pi obi e. Ani ne 'ngbé bua li 'he gba okpála koko ade, a ko pa 'li e de, ani di ne 'ngbé 'ndji ade. <sup>5</sup> Kpála inde ne mukunda pi obi e méne engú na numu de. Ani bhándja bha bini engú gba e kpi e kpi de. Ani ké di 'ngú lie de. Ani gbíte di bua e pi obi e de. <sup>6</sup> Kpála inde ne mukunda pi obi e kpí djali li siti 'ngú de. Ani ngakpi mangbo djali li bádha 'ngú. <sup>7</sup> Kpála inde ne mukunda pi obi e ngakibila ndu 'ngú hana li okpála amene e li ani-o. Ani ngabhuka ndu 'ngú hana, ani nga'o 'to e ndu nedhinga hana 'to Ebhe, ani di ngagbite bua e ka ndu 'ngú hana magbite.

<sup>8</sup> Mukunda ndjía 'kpí bini de. La-a, nedhinga akolo makolo li ongu inde li okpála ngakpokpo e maka opolofeta andjía mandjia. Nagama 'ngú bhú oeli gba oandjelu-o andjía mandjia. Angu nasuno 'ngú gba Ebhe-e pi okpála-a andjía mandjia. <sup>9</sup> Padhá de, anga angu nasuno 'ngú gba Ebhe-e pi okpála píla doto akódho 'kpí makodho. La di-e, angu gba ní nakpokpo 'ngú maka opolofeta akódho 'kpí makodho. <sup>10</sup> Engú bini, ekpí li Ebhe ambámba ta

ongú na babadha pi ní lie, li ongu bhende libhomu ade-e tsia ndjía.

<sup>11</sup> Nani ma adu lie bhú ndili-e, ma adu agama 'ngú maka ndili, ma adu abhundja maka ndili, ma adu di akə mboli 'ngú maka ndili. Engú bini, nedhinga ma abhele lie, ma a'o namene engú bhe na ndili-o. <sup>12</sup> A la bhadi pi ní moko. Bhú mbia inde-e, ní ngau ohe bulusu bulusu mugito me ní ngatsia 'kpí bhú bitolobi bhende na didili. Engú bini, ekpí akólo makolo ní aú ndu 'he hana má ngilili ne djila ní! Bhú mbia inde-e, imbilangu gba ma-a mbila ndu 'ngú hana de. Engú bini, ekpí akólo makolo ma tsia mbila ndu 'ngú hana má ngilili maka Ebhe ambila ma lie ngae makpe-o!

<sup>13</sup> Ngú nabu tata-a, ní mbila me ongu bata inde-e yie bhú da o de. Ongú angoo ngae inde: nabhuka Ebhe, na'o 'to o 'to ani, a la di-e nadu ne mukunda pi ani di ne pi obi o. La-a, bhú káká hana-a, nadu ne mukunda pi Ebhe di ne pi obi o, ane ndu obhe bhisi bhomu-o hana.

## 14

*Nakpokpo 'ngú maka polofeta ane nakpokpo 'ngú bhú oeli gba oandjelu*

<sup>1</sup> Yi mene ne kpéke me yi ɗu ne mukunda pi obi yi. Yi ɗu ne gumu angu li Bu Bhobua ngaha e pi kpála ne kpála ngú nateteke Piga gba Ebhe-o, ane la mane angu nakpokpo 'ngú maka polofeta . <sup>2</sup> Kpála inde ngakpokpo 'ngú bhú oeli gba oandjelu ngakpokpokpo pi Ebhe. Ani kpo pi okpála de, anga kpála bini kə mboli engú ani ngakpokpo e de. Ani ngakpokpo bhú angu gba Bu Bhobua ta ongu inde li Ebhe awo ta e mawo-o.

<sup>3</sup> Engú bini, kpála inde ngakpokpo 'ngú maka polofeta-a, ngakpokpokpo pi okpála ngubula

nabe ndu nabhuka gba uo-o, ngu nato masi bhú uo di ne ngu nateteke bua uo. <sup>4</sup> Kpála inde ngagama 'ngú bhú eli gba oandjelu-o ngabe ndu nabhuka gba e kpi e kpi. Engú bini, kpála inde ngakpokpo 'ngú maka polofeta bhú oeli li ndu okpála hana ngadje e-e, ngabe ndu nabhuka gba okpála na Piga gba Ebhe-e libhomu. <sup>5</sup> Ma ne gumu me ndu yi hana yi du ngagama 'ngú bhú oeli u mbila e de. La-a, a nga matá li ma naali me yi du nakpokpo ongu maka opolofeta. Padhá de, anga kpála du nakpokpo 'ngú bhú oeli gba oandjelu-o, a ayo me kpála koko du ngu nambamba tata. I du mo-o de-e, kpála bhende ngakpokpo 'ngú maka polofeta ngabe ndu nabhuka gba okpála na Piga gba Ebhe-e libhomu ane mane.

<sup>6</sup> Ondaise ma, ma yi nga yi: i du me ma nde ago agba yi, ma nde ngagama 'ngú pi yi bhú oeli gba oandjelu-o, tata pi yi tété ne ni? Tata bini ade. A ayo mangbo me ma go kpokpo 'ngú pi yi bhú eli inde yi ambila e, belegu i du engú li Ebhe ambamba ta e muma, i du di-e me ma go ha pi yi imbilangu na mbia, i du di-e me ma go kpokpo 'ngú pi yi maka polofeta, ne me ma go suno 'ngú pi yi, a ayo me yi mbila tata-a ndjindji.

<sup>7</sup> Yi bhundja nga pindji omavulu mbála. U du na'u mbála-a, u 'u li lelele de-e, mo ombila salisali-e lele pi? A bhadi moko pi dumu. <sup>8</sup> La di-e, i du me bhulu na'u mbala nde 'u li lelele de-e, okpála aléke lio ngu egú lele pi? <sup>9</sup> A bhadi pi yi moko. Okpála aké mboli engú yi ngapa e bhú eli na gandji gandji-e lele pi, i du me u nde mbila eli bhomu-o de-e? A mana me yi ngagama 'ngú pi anvi. <sup>10</sup> Oeli pála doto kikipiki. Engú bini, ndundu hana abhú

'ngú. <sup>11</sup> La-a, li kpála du ngagama 'ngú bhú eli inde ma mbila e de-e, kpála bhomu muma ne gandji kpála, ma di pi ani ne gandji kpála. <sup>12</sup> A bhadi pi yi moko. Maka yi akunda lie ne bua yi hana nasia angu gba Bu Bhobua-a, yi gili naali nadu okpála inde ngabe ndu nabhuka gba okpála na Piga gba Ebhe-o.

<sup>13</sup> Kaka-a, kpála bhende ngagama 'ngú bhú eli gba oandjelu-o, a ayo me ani yo ka Ebhe angu nambamba ta eli angoo. <sup>14</sup> Padhá de, anga i du me ma nde ngayo Ebhe bhú ngua eli bhomu-o, bua ma bhú mayo na paká paká, engú bini, imbilangu gba ma-a li kulu bini ade. <sup>15</sup> I du mo-o, a ayo me ma mene pi? A ayo me ma yo Ebhe bhú eli gba oandjelu, engú bini, ma ayó di ani ne imbilangu gba ma-o. A ayo me ma li 'tsi bhú eli gba oandjelu-o, engú bini, ma alí di ne imbilangu gba ma-o. <sup>16</sup> Padhá de, anga i du me mu nde ngagie heni pi Ebhe bha bhú oeli gba oandjelu-o, kpála bhe yi nde ne e bhú 'ti Ebhe-e apá me: «A adu moko» li mayo gba mu nagie heni-e lele pi me, ani nde mbila engú mu ngapa e de-e? <sup>17</sup> A bana i du me mayo gba mu nagie heni-e nde bha babadha naali-e, i du bhú oeli gba oandjelu-o, a be ndu nabhuka gba kilí mu yi nde ne e bhú 'ti Ebhe-e de.

<sup>18</sup> Ma ngagie heni pi Ebhe anga ma ngagama 'ngú bhú oeli gba oandjelu-o ane ndu yi hana. <sup>19</sup> Engú bini, i du me ya nde apo bhála ya ne omaha Ebhe-e, ma uu ndjindji me ma pa engú bhuluvue inde li okpála adjé e ne tata ngubula nasuno 'ngú pi uo, ane me ma pa engú koto ndjikpa bhú oeli gba oandjelu.

*Pindji nakpokpo 'ngú bhú eli gba oandjelu-o, yi du nabhundja*

*maka obhelesi okpála*

<sup>20</sup> Ondaise ma, pɪndji onǵú ma apa e pi yi bhomu-o, yi adú abhundja pépé maka onǵisi de. Yi dɛ ne odjedje onǵisi li pápá na siti 'ngú. Engú bini, yi dɛ ne obhelesi okpála li pápá na nabhundja 'ngú.

<sup>21</sup> U aye bhú Bhuku gba Ebhe-e me, Ebhe Ngámá apa me:

«Li kpadji gba ogandji okpála ne bhú 'li uo-o, ma agáma 'ngú pi omaha ma.

Abana mo-o, u djé ma de.†»

<sup>22</sup> Kaka-a, nagama 'ngú bhú oeli na gandji gandji-e, a ko ehe inde ngasuno mangimbo gba Ebhe-e pi okpála inde i bhuka de-o. La-a, pi okpála bhende abhuka-a, a pi uo ade. Nakpokpo 'ngú maka polofeta-a, a pi omabhuka . La-a, pi obhende i bhuka de-e, a pi uo ade.

<sup>23</sup> I dɛ me yi nde apo bhúla yi ngú nayo Ebhe-e, li ndɛ yi hana holo nagama 'ngú bhú oeli gba oandjelu-o, i dɛ me okpála bhende i mbíla 'ngú bhomu-o de-e, i dɛ di-e obhende i bhuka de-e go oo, u pá de me yi ne obhulɛ pele-e di?

<sup>24</sup> La-a, i dɛ me yi nde ngakpokpo 'ngú maka opolofeta-a, li okpála bhe imbílá engú bhomu-o de, i dɛ di-e okpála bhe i bhuka de-e go li bhú ká yi-e, u tsia ké mboli siti 'ngú gba o-o. Engú inde u ngadje e hóló bua uo. <sup>25</sup> Ongú inde awo lie li bua uo-o zé li zi 'kpí. Abhomu-o, u tú 'ndji o ne kuto. U tsia dhéǵǵ Ebhe ne napa me: «Ebhe bhú ká yi na paká!»

*Yi dɛ amene 'ngú bhú Piga gba Ebhe-e li lelele*

<sup>26</sup> Ondaise ma, ní abú tata-a lele pi? Nedhinga yi apo bhúla yi lie ngú nadhéǵǵ Ebhe-e, kpála bini bhú ká yi tí da nali etsi, koko tí da nasuno eli gba Ebhe pi okpála, koko tí da nakpokpo

engú li Ebhe ambamba ta e pi ani, koko tí da nagama 'ngú bhú oeli gba oandjelu, li koko tsia mbámá tata. A ayo me yi mene ndɛ 'ngú bhomu-o hana da napa me abe ndɛ nabhuka gba okpála gba Ebhe-o.

<sup>27</sup> I dɛ me okpála holo nagama 'ngú bhú ká yi bhú oeli gba oandjelu-o, a ayo me a de dɛ okpála bhisi, i dɛ bhisi de-e, a de pise bhú bata. A ayo la di me u dɛ agagama bini bini, kpála bini nde ngambamba ta 'ngú u ngagama e-o. <sup>28</sup> Li kpála nambamba ta 'ngú bhomu-o dɛ de-e, a ayo me kpála inde i di me gama 'ngú bhomu-o ndjili bhú ká yi má bulu! Aní nɛ gama bha bini pi Ebhe agba e. <sup>29</sup> Pi okpála bhe ngakpokpo 'ngú maka opolofeta-a, a ayo me okpála bhisi, i dɛ di-e bata gama 'ngú, amba okpála koko lo doto bhú 'ngú u ngakpokpo e-o. <sup>30</sup> La-a, i dɛ me Ebhe nde asuno engú koko na mbia pi suka yi inde bhú ká yi oo, a ayo me kpála bhende ngagama 'ngú-o 'o nga nagagama, ngubula me kilí ani-e gama 'ngú.

<sup>31</sup> Kaka-a, yi dɛ nagama 'ngú maka opolofeta, a ayo me yi gama bini bini. Yi mene mo-o ngubula me ndɛ omaha Ebhe hana sia imbilangu, amba yi to di masi bhú ndɛ uo hana. <sup>32</sup> Okpála inde ngakpokpo 'ngú maka opolofeta-a, a di bhú uo ne angu ngú nagbite 'bhe o pí engú li Ebhe asuno e pi uo-o. <sup>33</sup> Padhá de, anga Ebhe kunda de me ní dɛ amene 'ngú pupulɛ-o de. Engú bini, aní akunda mangbo me ní dɛ amene 'ngú li kúkú. Maka u amemene lie bhú ndɛ oDadjua gba Ebhe-e hana, <sup>34</sup> nedhinga yi apokébhé bhúla yi lie ngú nayo Ebhe-e, a

ayo me olisi\* ndjili má bulu! U ha kpadji pí uo ngú nagama 'ngú oo de. A ayo me u ndjili ma bulu ngú nadje 'ngú u ngakpokpo e-o, maka li líli gba Moidje apa lie-o. <sup>35</sup> I dú me u nde akúnda nambila 'ngú pindji ongú bini bini-e, u de yi obhosi gba o-o akuti. A ndjindji ade me ełø gama 'ngú bhú makpetse gba omabhuka.

<sup>36</sup> Aiya! Ne me yi ngabhundja me eli gba Ebhe-e ayie agba yi, ne me eli ango-o, a ko bha bini na yi 'he kpi yi kpi? <sup>37</sup> Li kpála bhundja me ni ne polofeta-a, ne me ani bhundja me ni asia angu gba Bu Bhobua-a ngú nabe ndu nabhuka gba okpála gba Ebhe-e, a ayo me ani mbila me engú inde ma aye e pí yi inde-e, a ko líli ayie ka Ngámá. <sup>38</sup> Engú bini, ani bhuka mo-o de-e, Ngámá mbila di ani de.

<sup>39</sup> Kaka-a, ondaise ma, yi gili ne bua bini nadu nakpokpo 'ngú maka opolofeta. La-a, yi ayóko okpála de me u agáma 'ngú bhú oeli gba oandjelu-o de-e de. <sup>40</sup> A ayo mangbo me ndu 'ngú bhomu-o dhuku li lelele, yi améne bhú tolo de.

## 15

*Nabhuka gba ní-e alu pí nazuku gba Yesu Kilisito*

<sup>1</sup> Ondaise ma, ma akúnda matá nakpokpo pí yi Bádha Ngali inde yi asia e, inde yi adhedhe di lie má kpakala-o! <sup>2</sup> Bádha Ngali ango-o ngakobho yi, i dú me yi nde ngalilila maka nako ma akpokpo pí yi lie-o. I dú mo-o de-e, tata li nabhuka gba yi-e ade.

<sup>3</sup> Ma asuno pí yi ongú na ng-bengbengbe inde ma asia e ka Yesu Kilisito-o . Engú ango-o me: Yesu Kilisito akpi pindji mugwe

gba ní-o, maka u aye lie bhú Bhuku† gba Ebhe-o. <sup>4</sup> U azi ani, ani atsia azuku bhú 'kpi na bata maka li Bhuku gba Ebhe-e apa lie-o.† <sup>5</sup> Ani azuku lie, ani akoto li Piele. Pipita-a, ani akoto li obhulu titima ndjikpa ne ká bhisi gba e-o.

<sup>6</sup> Pipita-a, ani akoto li omakpata gba e nane kámá bhuluvue mane bhú nedhinga bini. Bhelé na uo nga bha bhúka, okoko amu. <sup>7</sup> Pipita-a, ani akoto li Djaki, ani atsia akoto di li ndu obhulu titima gba e hana.

<sup>8</sup> Pita ndu uo hana-a, ani akoto di li ma, belegu ma dú lie ne tetele kpála de-o. <sup>9</sup> Ma ne bhulu titima na yeye ane mane bhú ká obhulu titima-o. A na paká me, ma ti belegu da napa de me kpála 'i ma me bhulu titima gba Yesu-o de. Padhá de, anga ma ato nani mbolo li Piga gba Ebhe-o. <sup>10</sup> Engú bini, bhú bádha bhú 'bu gba Ebhe-e , ma maka ma nde lie inde. Bádha bhú 'bu gba ani nani ani aha e muma bhomu-o padhá ade. La-a, ma amene kulu kaka naali nane obhulu titima koko hana. Angu ango-o yie ka ma de, bádha bhú 'bu gba Ebhe-e adú mangbo namene kulu bhú ma ngae. <sup>11</sup> Kaka-a, abana ma, abana obhulu titima koko-o, a bhomu-o Bádha Ngali inde ya ngakpokpo e-o, a la bhadi bhomu-o Bádha Ngali inde yi abhuka e-o.

*A na paká me okpála azúku di mazuku*

<sup>12</sup> Bádha Ngali ya ngakpokpo e me Yesu Kilisito azuku. I dú la me a nde mo-o, lele pí li okpála koko bhú ká yi ti da napa lie me okpála inde amu-o zúku de-e? <sup>13</sup> I dú na paká me okpála inde amu-o nde zúku de-e, bhobhomu-o akúnda napa di me Yesu Kilisito zuku de.

\* **14:34** 14:34 Abana li olisi nde lie ne angu ngú nayo Ebhe-e, di ne nagama 'ngú maka opolofeta-a bhú ká omabhuka-a, u ha nani kpadji pí uo ngú nalo doto bhú ongú li opolofeta adu apa e de. Tsia bhú 1 Kol. 1:11, 5. † **15:3** 15:3 Tsia bhú Isa. 53:5-12. † **15:4** 15:4 Tsia bhú Oz. 6:2; di ne bhú Luk. 24:34-49.

14 **I** **du** la me Yesu Kilisito nde zuku de-e, akunda napa me tata bini li Bádha Ngali ya ngakpokpo e ade, tata bini la di li nabhuka gba yi-e ade.

15 **I** **du** me Yesu Kilisito nde zuku de-e, amba akunda napa me ní ngapa eu li Ebhe. Padhá de, anga ní ngapa pi okpála me Ebhe azuku Yesu Kilisito bhú ka okpála inde amu-o. La-a, ani mene mo-o de, i **du** me okpála nde zúku di de-o. 16 Padhá de, anga i **du** me okpála nde zúku de-e, bhobhomu-o akunda napa di me Yesu Kilisito zuku de. 17 **I** **du** me Yesu Kilisito nde zuku de-e, bhobhomu-o akunda napa me tata bini li nabhuka gba yi-e ade, yi nga bha sa mangimbo gba Ebhe.† 18 A akunda di napa me okpála bhende amu me u nde abhuka Kilisito-o, amu duduama ne duduama. 19 **I** **du** me nganí omabhuka ní nde a'o 'to ní 'to Kilisito bha bini ngubula mukobho inde-e, amba ní ne okpála na likabhu naali nane okpála koko.

20 La-a, a mo-o ade, a bha ndju na paká me Kilisito azuku bhú ka okpála inde amu-o! A ko kpála na gigena inde azuku bhú kuo. 21 Padhá de, anga koli kpála bini amene nani me kuo li pála doto, koli kpála bini koko atsia amene la bhadi me okpála amu-o zuku. 22 Ndu okpála hana ngamu, anga ní ne opiga gba Adamu . Ndu okpála hana inde abhuka Yesu Kilisito asia bhadi mukobho ka ani. 23 Engú bini, kpála ne kpála azúku li nedhinga gba e. Kilisito azuku nani kalanu. Li nedhinga ani agó lie, li okpála gba ani-e tsia zúku di.

24-25 Abhomu-o, Yesu Kilisito méne me ndu osisiti angu hana kolo padhá. Ani tsia kó angu e pi ndu okpála na angu hana inde

ngagu ani-o. Padhá de, anga a ayo me ani u ngámá akólo bha makolo li Ebhe a'ó ndu obhulu yala gba ani-e lie hana sa 'dhu ani-o. Pipita-a, li 'ngú na doto ndjia. Ani tsia gíe nau-o pi Ebhe 'Dyi e.† 26 Bhulu yala na soso inde li Ebhe abhólo e-e, a ko kuo. 27 Padhá de, anga u aye bhú Bhuku gba Ebhe-e me: «Ebhe a'o ndu 'he hana má kpokobhe sa 'dhu ani!†» Engú bini, i **du** me u nde apa mo-o, a mbámbá me u to Ebhe bhúbhú de. Ani sa Ndili gba e ade. 28 Li ndu 'he hana a akólo lie sa angu gba Kilisito-o, li ngaani makpe Ndili-e, ani tsia 'ó lie makpe sa angu gba Ebhe, ngubula me Ebhe u ngámá pí 'ndji ndu 'he hana má da!

*Pindji 'ngú nazuku ka okpála inde amu-o, yi apite liyi de*

29 Okpála koko bhú ká yi ngasia batisimo mada okpála inde amu-o. Uo ngasia ni? **I** **du** me okpála inde amu-o nde zúku de-e, uo la ngasia batisimo mada uo ka ni? 30 **I** **du** me okpála nde zúku de-e, ka ni ya ngazu likabhu lie ndu nedhinga hana-a? 31 Ondaise ma, a na paká me ndu 'kpi hana kuo de ma masikpe. A la bhadi paká me ma ne gindaginda kabula yi akpetse liyi lie ne Ngámá gba ní Yesu Kilisito-o. 32 A bhú gudhu na Efeso-o, ma azu likabhu naali sakpa okpála. A mana mugito me ma adu agu gbele ne onu 'te. **I** **du** me ma nde ngabundja bha bini ndu ongú na doto-o, gbele angoo atéteke ma lele pi? **I** **du** me okpála inde amu-o nde zúku de-e, bhobhomu asuno me engú inde u apapa e me: «Ní zu 'he, amba ní ndji di vino, anga ní amú mambi-e!†» A ko kukulu 'ngú.

† 15:17 15:17 Tsia bhú Lom. 6:8-11. † 15:24-25 15:24-25 Tsia bhú Ets. 110:1. † 15:27 15:27 Tsia bhú Ets. 8:7. † 15:32 15:32 Tsia bhú Isa. 22:13.

<sup>33</sup> Yi apíte liyi de. Yi mbila me, m̄ k̄ dh̄k̄ ne kpála na siti 'ngú-o, m̄ tágba di siti 'ngú. <sup>34</sup> Yi gie liyi li ngbili kpadji, amba yi améne matá siti 'ngú de. Okpála koko bhú ka yi mbila Ebhe de. Ma ngapa mo-o, ngubula me yi sia n̄m̄.

*Bhú nazuku ka okpála-a, kute ní adjí lie na mbia*

<sup>35</sup> Kpála bini tí da nayi ma me: «Okpála inde amu-o, azúku lele pí? Kute u azúku ne e adú lele pí?» <sup>36</sup> Ma gie pí ani me, ngam̄-o, m̄ ne ngingi. Ngua inde mo olu e tí da nak̄-̄ de, i d̄ me a nde zi de ko. <sup>37</sup> Ngua inde mo olu e, i d̄ di-e dadha, i d̄ di-e ngua koko-o, m̄ ngalu bha bini líli. M̄ lu lálá bhende ak̄-o de. <sup>38</sup> Pita lí ngua ak̄ lie, lí Ebhe há pí pí lálá na mbia maka ani akunda lie. Ani ngaha pí ngua ne ngua 'lá e makpe.

<sup>39</sup> Kute nd̄ 'he hana inde bhú mukobho-o bhadi kpi kpi kpi. Kute kpála-kuti kpi ne bhende gba on̄, bhende gba odhu di ne bhende gba osungu. <sup>40</sup> A ne oehe inde na abhúlá, a la di ne oehe na kuto ei. Bádha gba oehe na abhúlá-a kpi ne bhende gba oehe na kuto ei. <sup>41</sup> A lí ela ne zi e, a lí epe ne zi e, a la di lí oikupala ne zi o. Belegu bhú ká oikupala-a, zi uo kpi kpi kpi.

<sup>42</sup> A adú bhadi moko lí okpála amu-o azúku lie-o. Kute inde u azi e zí mazi. Kute inde azuku-o zí matá-a de. <sup>43</sup> U azi maka ehe lí tata nde lie naali ade, lí angu nde bhú e ade. Lí azúku lie-e, a abédhe ne angu, i tsia d̄ di babadha. <sup>44</sup> Nedhinga nazizi-e, a ko kute na doto. Lí azúku lie, a adú kute inde lí Bu Bhobua ngaha mukobho pí e ngae. A ne kute na doto, a la di ne kute inde lí Bu Bhobua ngaha mukobho pí e. <sup>45</sup> A maka u aye lie bhú

Bhuku gba Ebhe-e me: «Adam̄ nani ne kpála-kuti na kalan̄, ani asia mukobho ka Ebhe.†» La-a, Kilisito u a'i e me Adam̄ na bhisi-e abedhe ne Bu Bhobua, ngaani-e, ani ngaha mukobho pí okpála.

<sup>46</sup> Ehe na kalan̄ inde u ngau e-e, a ko kute na doto. Pipita-a, u tsia ú la kute inde lí Bu Bhobua ngaha mukobho pí e-o. <sup>47</sup> Adam̄, kpála na kalan̄ lí Ebhe abho e nani ne kpála-kuti, Ebhe abho ani lí doto. Kilisito, Adam̄ na bhisi-e ayie nae abhúlá. <sup>48</sup> Kute okpála-kuti maka kute kpála lí Ebhe abho nani e lí doto-o. La-a, kute okpála inde azúku ngú nan̄ abhúlá-a, adú bhadi maka kute kpála inde ayie abhúlá. <sup>49</sup> Mbia inde-e, ní maka kpála inde lí Ebhe abho e lí doto. Kpí bini, ní adú bhadi maka kpála bhende ayie abhúlá-o.

*Ngámá Yesu Kilisito aha angu kuo*

<sup>50</sup> Ondaise ma, ma apa pí yi me kpála-kuti lí bhú Nau gba Ebhe-e ne kute na doto inde-e de. Kute inde nazi mazi-e tí da nad̄ d̄d̄uma ne d̄d̄uma de.

<sup>51</sup> Yi gbo nga dje yi, ma adjí nambamba pí yi inde ta 'ngú inde lí Ebhe awo e nakolo pí mbia inde-o. Ní mú nd̄ ní hana de,† engú bini, nd̄ ní hana, kute ní adjí lie madji, i tsia kólo na mbia. <sup>52</sup> Engú ango-o améne lie bhú nedhinga bedi, maka nakopo ka djila, nedhinga u a'ú toti na soso lie-o. Lí a aú lie, okpála inde amu-o azúku ne kute inde i kpí matá-a de. La nganí bhende bhú mukobho-o, kute ní adjí lie na mbia. <sup>53</sup> Padhá de, anga a ayo me kute ní inde nakpi makpi inde-e dji lie, akolo kute inde i kpí matá-a de, i tsia zí la di matá de.

† 15:45 15:45 Tsia bhú Dje. 2:7. † 15:51 15:51 Tsia bhú 1 Tes. 4:15.

<sup>54</sup> Nedhinga li kute nakpi makpi-e akólo lie kute i kpí-i de-e, li kute nazi mazi-e akólo lie kute i zí-i de-e, li engú inde u aye e bhú Bhuku gba Ebhe-e tsia kólo mbámbá. U aye bhúbhú me: «Ebhe aha angu kuo aha, kuo matá ade.†» <sup>55</sup> U aye mata di me: «Oo kuo! Angu mu mo oko pí okpála ne e su?

Oo kuo! Angu mo obhibhili okpála ne e su?†»

<sup>56</sup> Angu li kuo ngabhili okpála ne e-e, ngayie ka siti 'ngú. Angu li siti 'ngú ngabhili okpála ne e-e, ngayie bhú líli gba Moidje . <sup>57</sup> La-a, a ayo me ní toko Ebhe inde amene me ní ha angu siti 'ngú di ne angu kuo kabula Ngámá gba ní Yesu Kilisito-o!

<sup>58</sup> Abhomu-o, ondaise ma na mukunda, yi lu kpekpeke, u apíte yi de. Yi nu ndu kpí hana ne kulu gba Ngámá-a ne kalanu. Yi mbila hana me kulu inde yi ngamene e pi Ngámá-a, nú padhá de.

## 16

*Tia inde ayo napa e pi omabhuka na Yelusalema*

<sup>1</sup> Ma adjí apa mbo engú inde-e pi yi pindji tia inde yi ngapo e pi omaha Ebhe inde bhú Yelusalema-o. Yi mene matá maka ma aha nako líli lie pi omabhuka na ndu doto na Galatia-o.† <sup>2</sup> Ndu 'kpí yinga hana, a ayo me kpála ne kpála 'o mbo té tia inde ani asia e li ngongo, nakpata lele bhende li Ebhe aha e pi ani-o. Yi wo tia bhomu-o nganda yi, ngú napa me ma gó lie, ní apó matá bhúla tia de. <sup>3</sup> Nedhinga ma kólo lie agba yi-e, ma ayé balua pindji tia bhomu, ma tsia tíma okpála bhende yi alo o bhú ka yi-e ne di ngú nanu na'o'o abhú Yelusalema. <sup>4</sup> † I yo

me ma nu di-e, ya anú ne uo bhú dabili bini.

*Onú inde ayo me Polo nu e-o*

<sup>5</sup> Ma agó agba yi pita nakodho 'kpí ka ma bhú ndu doto na Makedonia, anga ma apú bhú ndu doto bhomu. <sup>6</sup> Nedhinga koko-o, ní adú mbo ne yi ngú nedhinga bedi. Koko-o, ní adú ne yi oo ngú nadjeke me nedhinga na zini-e kodho 'kpí. † du me ní nde asi ekpí bhe ayo me ní si e ne yi-e asi-e, yi tsia teteke ma ngú nanu li obili bhe ma adjí lie-o. <sup>7</sup> Padhá de, anga mbia inde-e, ma kunda bha nau yi ne nakodho 'kpí ka ma makodho de. Ma ngabhundja me, i du me Ebhe nde akunda-a, ma de go sidi, amba ní bhue mbo ne yi ngengele.

<sup>8</sup> Mbia inde-e, ma ngabhundja me ma du nga bha bhú Efeso si nakolo bhú 'kpí na Patekote. <sup>9</sup> Padhá de, anga Ebhe abhulu 'bho 'ti muma mbámbá ngú namene kulu gba ani-e ne angu ma hana si, belegu li okpála bhelé nde lie ngagu kulu ma ngamene e lie-o.

<sup>10</sup> Kaka-a, li Timoté kolo-o, yi mene me ehe bini ato zini bhú ani agba yi oo de, anga ani ngamene kulu gba Ngámá-a maka ma ngamemene lie-o. <sup>11</sup> Kpála bini aú ani bhú djilla e padhá de. Yi teteke mangbo ani me ani dhuku bhú guo 'ngú ngú nakolo li bili ma nde lie-o, anga ma ngadjeke ani ne ondaise ní inde u agó ne o-o.

<sup>12</sup> Li 'ngú bhende atsia ndai ní Apolosi-e, ma ayo ka ani bhatsibhatsi me ani nu agba yi bhú dabili bini ne ondaise ní koko ngú natsia yi. La-a, ani kunda nga nanu oo mbia inde-e de. Ani sia nedhinga-a, ani tsia nú.

*Polo yi matá omabhuka na Kolito mayi*

† 15:54 15:54 Tsia bhú Isa. 25:8. † 15:55 15:55 Tsia bhú Oz. 13:14. † 16:1 16:1 Tsia bhú Lom. 15:25-26.

<sup>13</sup> Yi du li zuku, yi lu kpekpeke bhú 'bu nabhuka , bua yi adú ne tsulu de, yi du ne angu. <sup>14</sup> Yi mene ndu 'ngú yi ngamene e hana ne mukunda.

<sup>15</sup> Ondaise ma, yi mbila Etieni ne uo ne piga gba e hana. Yi mbila hana me u adji nani bua o bhú ndu doto na Akai kalanu ngao, u atsia aha lio ngubula nateteke omabhuka. Kaka-a, ma ayo ka yi me: <sup>16</sup> yi manga ongua okpála bhomu-o mamanga. Yi manga di okpála inde ngamene kulu ne kekele bhú dabili bini ne uo mamanga.

<sup>17</sup> Ma ne djali naali li nago nako ka Etieni, ne Folotunasi ne uo ne Akaikusi-o. Ma ngau uo lie, a mana mugito me ma ngau yi ndu yi hana. <sup>18</sup> U ato masi bhú ma maka u ato di nako masi bhú yi lie-o. Ongua okpála bhomu-o, a ayo bha ndju namanga uo mamanga.

<sup>19</sup> OAdjua gba Ebhe inde bhú ndu doto na Adjia yi yi ma yi. Akwila ne Pilisila bhú dabili bini ne omabhuka inde ayoyo Ebhe agba uo-o, yi yi ne 'li Ngámá mayi. <sup>20</sup> Ndu ondaise ní inde ei hana yi yi ma yi. Yi yi li yi sunda yi ne nakama liyi li kute yi.

<sup>21</sup> Ma yi yi ma yi. Engú inde ma aye e me ma yi yi mayi bhomu-o, ma aye ne 'kpa ma makpe. <sup>22</sup> I du me kpála nde kunda Ebhe de-e, u de tu pedjo li ani! Malanata: a ayo me Ngámá gba ní-e gógo! <sup>23</sup> A ayo me bádha bhú 'bu gba Ngámá Yesu-o du bhú dabili bini ne yi. <sup>24</sup> Ma kunda ndu yi hana naali ka ní akpotsø liní ne yi lie bhú 'bu Yesu Kilisito-o .



## Balua na bhisi gba Polo pi omabhuka na gudhu na Kolito Eli na kalanu

Balua na bhisi inde li Polo aye nani e pi okpála na Kolito, ani aye bhú nedhinga inde u du adje lio lie ne omabhuka na Dadjua na gudhu na Kolito de-o. Omabhuka koko na Dadjua gba Ebhe adu nani nagu Polo naali. Engú bini, ani asuno 'ndjá bua gba e ngú nadje lie ne uo, ani atsia adje djali naali li nedhinga li engú bhomu-o andjia lie sunda uo-o.

Engú na bini bhú balua inde-e, Polo ngakpo 'ngú pindji nadje lio ne okpála na Dadjua na Kolito, ani akpo ta ani agie 'ngú lie kpekpeke li sobho inde adu bhú Dadjua gba Ebhe-o, ne nagu inde li okpála na Kolito adu agu Dadjua gba Ebhe-e ne e-o. Polo atsia asuno di djali gba e, padhá de, anga egú inde ani agu e, amene me okpála dji di bua o amba u tsia dje di lio. Pipita-a, ani atsia ayo ka okpála na Dadjua gba Ebhe-e me u ha makiso ne bádha bua, ngubula nateteke omabhuka inde bhú ndibhili bhú Dadjua na Yudaya ne di. Bhú oalo na soso-o, Polo ngakpokpo 'ngú pindji kulu gba e na bhulu titima pi okpála koko na Kolito inde ngau lio me ni ne obhulu titima na kukulu gba Yesu ngaani. Padhá de, anga okpála ango-o adu apa me Polo ne bhulu titima na eu.

### **Ongbenge ongu inde bhú bhuku inde-e ngae inde:**

Eli na kalanu 1:1-11

Polo a la di-e Dadjua gba Ebhe na Kolito 1:12 – 7:16

Makiso pi omabhuka na Yudaya 8:1 – 9:15

Nakpokpo 'ngú gba Polo ne angu maka bhulu titima gba Yesu 10:1 – 13:10  
Eli na soso 13:11-13

*Polo yi omabhuka na gudhu na Kolito mayi*

<sup>1</sup> Ma aye balua inde-e ngama Polo bhú dabili bini ne ndai ní Timoté. Ma aye pi yi omabhuka na Dadjua gba Ebhe inde bhú gudhu na Kolito di ne pi yi obhende bhú ndu doto na Akai-e libhomu. Ebhe amene ngae me ma du ne bhulu titima gba Yesu Kilisito. <sup>2</sup> A ayo me Ebhe 'Dyi ní ne Ngámá Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

*Omabhuka na Kolito ngazu likabhu bhú dabili bini ne Polo*

<sup>3</sup> A ayo me u toko Ebhe. A ko 'dyi Ngámá gba ní Yesu Kilisito. A ko 'dyi ní inde abedhe ne ndjinga bedhe. A ko Ebhe inde ngateteke bua kpála bhú ndu 'ngú hana.

<sup>4</sup> Ani ngateteke bua ní bhú ndu olikabhu gba ní-e hana, ngubula me ní teteke bua okpála bhende ngazu likabhu-o, li kpadji na angu inde, ngani makpe, ní asia e ka ani-o. <sup>5</sup> Maka ya nde lie ngazu likabhu ne Kilisito na paká paká-a, ani bhadi ngateteke bua ya na paká paká. <sup>6</sup> I du me ya nde bhú likabhu-o, a ko ngubula me yi sia angu di ne mukobho. I du me bua ya nde akè-o, a ko ngubula me yi sia di angu. Angu ango-o ngaha pi yi nakibila ngua olikabhu inde ya nde ngakibila e-o. <sup>7</sup> Ya nga'o to ya me Ebhe ateteke yi mateteke. Padhá de, anga ya ambila ndjindji me yi ngazu likabhu bhú dabili bini ne ya. Li Ebhe aké bua ya lie-e, bua yi aké bhadi moko.

<sup>8</sup> Ondaise ya, ya akunda me yi mbila ngua likabhu inde ya

\* 1:8 1:8 Adjia: A ko ndu doto adu nani bhú kuti na Tiliki na naki-o. Efeso du nani ne 'ngbé gudhu na kuti ango-o ngae.

azụ e bhú ndu doto na Adjia\* ndjindji. Ya azụ likabhu naali, likabhu ango-o aha angu ya maha. Ya dū abhundja de me ya akóto bhúbhú makoto de. <sup>9</sup> Ya adū abhundja li bua ya me ekpí gba ya-a ale. La-a, engú bhomū-o akolo li ya ngubula me ya a'ó nabhuka gba ya-a bhú ya makpe de, ya 'o bha bini bhú Ebhe kpi e kpi. Aní ngazuku okpála inde amu-o ngae. <sup>10</sup> Aní agbegbe ya bhú nakpi bhomū-o ngae. Aní agbégbé matá ya bhú okoko magbegbe. Ya la di nga'o 'to ya me aní agbégbé galikpe ya bhúbhú magbegbe. <sup>11</sup> Ebhe améne bhobhomū-o, i dū me yi nde akpētō liyi ne ya bhú dabili bini bhú mayo-o. Abhomū-o, nedhinga li Ebhe adjé mayo gba yi-e lie, aní tsia há bádha bhú 'bu gba e pí ní padhá, li okpála bhelé tsia gíe di heni pi aní.

*Polo apa me ni nú nga bhú Kolito mbia inde-e de*

<sup>12</sup> Ehe inde ya nde ka e bhú djali ngae inde: bua ya ngaziba me ya adhuku bhú ká okpála ne naké liya ne kuto bhú dabili bini ne nawo 'ngú de. Ebhe akunda me ya dhuku bhú ká yi moko. Ya dhuku bhú ka yi ne imbilangu inde i yie ka okpála de. Engú bini, ya ngadhuku ne bádha bhú 'bu li Ebhe ngaha e pi ya ngae. <sup>13-14</sup> A ayo me yi mbila engú bhomū, anga bhú obalua ya aye e pi yi-e, ya aye bha engú inde yi ti da natanga e, yi ti di da naké mboli e ndjindji. Nakolo pi mbia inde-e, yi dje nga ya má kpulukutu de! Engú bini, ma abhundja me yi ahólo nadjé ya má kpulukutu madje! Abhomū-o, li 'kpí li Ngámá Yesu agó lie, yi akpí djali li 'ngú

gba ya maka ya nde di lie ngakpi djali li 'ngú gba yi-o.

<sup>15</sup> Ma adū nako ne nabhuka bhú 'ngú bhomū-o. Kaka-a, ma adū akunda me ma apū agba yi bhútsibhútsi bhisi, amba yi sia di bádha bhú 'bu bhútsibhútsi na bhisi. <sup>16</sup> A akunda napa me ma akunda nako nanū agba yi kala nanū bhú Makedonia.† Pipita-a, ma adū di akunda me ma gie matá lima agba yi ngubula me yi teteke ma ngubula nanū bhú Yudaya.

<sup>17</sup> Nedhinga ma apa lie pi yi me ma améne mo-o, ma apa ne 'li ma bhisi bhisi? A mo-o ade. Nedhinga ma nga'o oekpa gba ma-a lie, ma'o li mabhundja inde ayie ka ma makpe de, ngú napa me ma aziba engú ne nayayala bhú dabili bini. <sup>18</sup> Ebhe apá li ma ngae me engú ma apa e pi yi inde-e, ma pa ne eli bhisi bhisi de. <sup>19</sup> Padhá de, anga Yesu Kilisito, Ndili gba Ebhe inde ya akpokpo engú gba e pi yi-e, ngama Polo, ne Sila bhú dabili bini ne Timoté, aní go nani ngú naziba 'ngú ne nayayala bhú dabili bini de. Engú bini, aní memene engú inde aní ngapa e-o.

<sup>20</sup> Ndu 'ngú li Ebhe apa me ni améne e pi ní-e, améne lie kabula Yesu. Kaka-a, ya ngaziba me adū moko ne 'li aní ngú nadhegō Ebhe. <sup>21</sup> Ebhe abhu ya ngae makpe, la di-e, ngaani makpe ngato angu bhú ya bhú dabili bini ne yi li kpadji gba Yesu Kilisito-o. <sup>22</sup> Aní a'o di Bu Bhobua gba e li bua ní ngú nasuno me ní ne naani okpála. Maka aní aha Bu Bhobua gba e lie pi ní-e, ní ambila bhadi me aní ahá di ndū ohe koko inde aní apana e pi ní-e maha.

<sup>23</sup> Ne 'li Ebhe, li ma pa eu-o, Ebhe de bhөлө ma. Kabula nalila‡ yi-e, ma kunda nanū agba yi bhú Kolito mbia inde-e de. <sup>24</sup> A ko

† **1:16** 1:16 Makedonia: A ko ndu doto bhú kuti gba oGiliki. A li pápá na Abebe. ‡ **1:23** 1:23 Nalila: Polo akunda me ni 'o nedhinga pi okpála na Kolito ngú nadjé bua o li 'ngú u amene e li ani-o.

de me ya ngakunda nau ngámá pí nabhuka gba yi-e de ngú napa me yi bhuka bha bini bhende ya ngakunda e de. Padhá de, anga yi alu kpekpeke bhú nabhuka gba yi-o. Ya akunda mangbo namene kulu bhú dabili bini ne yi ngubula me bua yi du bhú djali.

## 2

<sup>1</sup> Abhomu-o, ngama-a, ma apa li bua ma me a ndjindji ade me ma nu nga agba yi-e de. Padhá de, anga ma asíti matá bua yi ne toto\* <sup>2</sup> Li ma ha siti pi bua yi-e, a há matá djali muma da? Padhá de, anga kpála inde li bua e asiti-e, tí matá da naha djali muma de. <sup>3</sup> Kaka-a, ma aye balua bhomu-o pi yi, maka ma aye nako lie bhú balua gba ma na kalanu-o.† Ma kunda nako de me ma kolo agba yi-e, bua ma de siti matá ka okpála inde ayo nako me u ha djali muma-a de. Ma ambila na paká me nedhinga ma nde lie bhú djali-e, ndu yi hana di bhú djali. <sup>4</sup> Nedhinga ma aye balua bhomu-o lie pi yi-e, bua ma adu me a nde abedhe ne likabhu di ne tsulu bedhe. Ma aku belegu egbá. Yi abhúndja de me ma aye balua bhomu-o pi yi ngú na siti bua yi-e de. Ma aye mangbo ngú nasuno pi yi lele mukunda ma nde pi yi ne e ko.

*Polo apa me u mbu li kpála inde amene siti 'ngú-o*

<sup>5</sup> Li 'ngú bhende atsia kpála inde amene siti 'ngú-o, ani asiti bua ndu yi hana ane ma mane. Engú bini, ma kunda napa 'ngú tété ne na'e'e bhú da e ma'e de.

\* **2:1** 2:1 Ne toto: Polo anu nani bhú gadhu na Kolito, suka mabhuka bini na Dadjua gba Ebhe-e atsia asobho ani, engú bini Dadjua gba Ebhe-e tsia gama 'ngú tété de. † **2:3** 2:3 Balua na kalanu: A ko bha ndju balua na bini gba Polo pi omabhuka na Kolito de. A ko balua inde angita pi ní-o. ‡ **2:14** 2:14 Bhú galasisi: Polo ngabhundja pindji 'ngbé ngámá gba osudha inde ngagie lie bhú 'gú me ani agboko 'gú-o agboko. Okpála ngabhia kuo li ani ne natsulu mungotsi.

Ani siti bua ndu yi hana de, la-a, ani asiti bua té okpála bedi bhú ká yi. <sup>6</sup> Okpála bhelé bhú ká yi ambe bhú 'ndji kpála bhomu-o ambe. Ma abhúndja me a pise moko. <sup>7</sup> A ayo ibili mangbo mbia inde-e me yi suno bádha bhú 'bu pi ani, amba yi to masi bhú ani, ngubula me likabhu ahá angu ani má tsitsidha de! <sup>8</sup> Kaka-a, ma ayo ka yi me yi suno mukunda gba yi-e pi ani. <sup>9</sup> Ta naye balua gba ma na kalanu-o pi yi-e, a ko ngubula nale yi, amba ma mbila me yi nani bedhe ngú namene ndu 'ngú inde ma apa e pi yi-e hana. <sup>10</sup> Yi suno bádha bhú 'bu pi kpála-a, ma asúno bhadi bádha bhú 'bu pi ani. Li ma mbu li siti 'ngú-o, i du me engú na sisiti ngú nambu tété ka ma nde uu-o, ma ambú tété ka yi kala Yesu Kilisito. <sup>11</sup> Ma amene mo-o ngubula me Satana apite ní li 'ngú bini de. Padhá de, anga ní mbila engú inde ani akunda namene e ndjindji.

*Polo adu akunda me Tito go bhaka ni bhú gadhu na Tuluasi ne ngali gba omabhuka na Kolito*

<sup>12</sup> Nedhinga ma akolo lie bhú gadhu na Tuluasi ngú nakpokpo Bádha Ngali gba Yesu Kilisito-o, ma au me Ngámá abhulu 'bhe bhoti muma ngú nakpokpokpo abhulu. <sup>13</sup> Engú bini, ma azu likabhu li bua ma naali anga ma bhaka ndai ma Tito de. Kaka-a, ma abhana lima pi okpála na Tuluasi, ma atsia atapa bhú ndu doto na Makedonia.

*Polo ngadhogé Ebhe kabula kulu gba e-o*

<sup>14</sup> Engú bini, a ayo me ya dhogé Ebhe, anga ani ngaké pi ya ndu

'kpí hana kalanu bhú galasisi† inde ngasuno me Yesu Kilisito agboko 'gú pí 'ndji ndu 'he hana agboko. Aní ngatima ya ne ndu bili hana ngubula nasuno Yesu Kilisito pí okpála. Nambila ani-e, a maka bádha se 'he inde ngapu ne ndu bili hana. <sup>15</sup> A ko paká. Ya maka mungotsi inde li se e nde babadha, inde li Yesu Kilisito aha e pí Ebhe. Se mungotsi angoo ngapu pí okpála inde li Ebhe ngakobho o di ne okpála bhende ngangita. <sup>16</sup> Pí okpála bhende bhú ngita-a, se mungotsi bhomu-o sisiti, pí uo-o, se mungotsi angoo ngatima uo bhú kuo. † Pí okpála bhende li Ebhe ngakobho o-o, se mungotsi bhomu-o babadha, a ngaha pí uo mukobho. A moko! A li nakpokpo Bádha Ngali-e ne tata na ngbéngbé. A ti da namemene da? <sup>17</sup> Ya maka okpála koko bhelé inde ngakpokpo eli gba Ebhe-e li nasia tia ade. Engú bini, ya mangbo ngakpokpo 'li Ebhe kala ani bhú ngbili 'ngú, bhú nakpøtøø lio ne Yesu Kilisito.

### 3

*Omabhuka ne balua inde li Yesu Kilisito aye e-o*

<sup>1</sup> Engú inde ma aye e bhomu-o akunda napa me ya akunda matá na'o liya ngaya makpe abhúlá? Ya ne gumu balua ngú nasuno pí yi me ya ne obhulu titima gba Yesu ade. Ya di ne gumu ade me yi ye balua pí ya ngú nadhuku ne di me ya du nasusuno pí okpála. La pí obhulu titima koko-o, a ayo balua. Ya maka uo ade! <sup>2</sup> Yi ne balua gba ya-a inde li Yesu Kilisito aye e li bua ya-a ngayi makpe. Ndu kpála hana ti da nambimbila ne natatanga. <sup>3</sup> A ko paká, a mbámbá me yi ne balua inde li Yesu Kilisito

aye e ngae, ani atsia atima sakpa ya. Aní ye ne 'ngu balua de. Aní aye mangbo ne Bua gba Ebhe inde uu-o. Aní ye pí opapala teme† de, ani aye mangbo li bua okpálakuti.†

*Polo ngamene kulu gba Ebhe-e li lele gandja na mbia*

<sup>4</sup> Ya ngabhuka bhú ongú bhomu-o anga Yesu Kilisito apana pí ya me Ebhe atima ya ngae. <sup>5</sup> A ko de me ya ngamene ngua kulu bhomu-o ne angu gba ya makpe-e de, ya mene bhú 'ndji ya de. Ebhe ngaha angu bhomu-o pí ya ngú namemene ngae. <sup>6</sup> Ebhe aha angu pí ya ngú nadu okpála na kulu na gandja na mbia-a ngae. Gandja angoo lu pí líli inde u aye nani e maye-e de, alu mangbo pí Bu Bhobua . Líli inde u aye nani e ngato kpála bhú kuo. La-a, Bu Bhobua naae ngaha pí okpála mukobho.

*Sangu na gandja na mbia ane bhende na didili-e mane*

<sup>7</sup> Nedhinga li Ebhe aye nani líli lie pí opapala teme ngú nahaha pí Moidje-e , sangu gba Ebhe-e adu asu bhúla ani. Abana li zizi adu andjia lie bhúla Moidje-e, a adu nga bha kpekpeke. Omafsalaele ti nani belegu da natsia bhúla ani de.† Ní au me belegu li gandja na didili adu ato kpála lie bhú kuo-o, adu bhadi ne sangu. <sup>8</sup> † du mo-o, gandja na mbia inde li Ebhe ngaha Bu Bhobua gba e pí ní bhú e asúno sangu gba Ebhe ane mane. A mo-o adi! <sup>9</sup> † du me kulu gba Moidje inde adu nato okpála bhú kuo nde nani ne sangu-o, asi la masi pí kulu na mbia gba Ebhe inde ngamene me okpála du ngbingbili-e, a asúno sangu gba ani-e ane mane di! <sup>10</sup> Ní

† 2:16 2:16 Bhú kuo: Bhú galasisi-e, adu nani ne osudha inde agboko 'gú, adu la di ne obhende u agboko o bhú 'gú-o. Obhende u agboko-o, adu nani nadjeké kuo. † 3:3 3:3 Tsia bhú Eki. 24:12. † 3:3 3:3 Tsia bhú Djlm. 31:33. † 3:7 3:7 Tsia bhú Eki. 34:29.

ti belegu da napa me sangu inde akoto nani bhomu-o matá ngau lie ka sangu na naki inde-e ade, anga a ane bhe nani na kalanu-o mane. <sup>11</sup> Padhá de, anga i du me gandja na didili, inde akoto nani ngu nedhinga bedi-e nde akoto ne sangu-o, asi la masi maka gandja na mbia inde ngabhue duduma ne duduma-a?

<sup>12</sup> Ya ne nabhuka bhú gandja na mbia-o. Kaka-a, ya ti da napa 'ngú pi yi mbámbá. <sup>13</sup> Ya mene maka Moidje de. Padhá de, anga Moidje adu nani nabuku bhúla e ne bongo ngubula me omafalaalele aú lele maka zi sangu gba Ebhe inde adu asu bhúla ani-e du abulu lie de-o. Zi sangu ang-o adu la bha nani ngu nedhinga bedi. <sup>14</sup> Omafalaalele ang-o-o, agbite nani bua o má ki! Ngú nakolo pi naki-e, li ongisi gba uo du natanga ongu inde u aye e bhú gandja na didili-e, u ke mbolimboli de. A mana mugito me bongo ngabuku tata-a pi uo. Bongo bhomu-o bha bini nga'e lie me kpála nde akpøtø lie ne Yesu Kilisito. <sup>15</sup> Abana pi naki, ndu nedhinga hana inde li omafalaalele ngatanga obhuku gba Moidje lie, u ke mbolimboli de.

<sup>16</sup> Engú bini, maka u aye bhú bhuku gba Ebhe-e lie me, li kpála dji bhúla e li pápá gba Ngámá Ebhe-e, oehe inde li pála bongo abuku e ú lie mbámbá. <sup>17</sup> A ko paká, Ngámá Ebhe-e, a ko Bu Bhobua. La-a, bili li Bua gba Ngámá-a nde li e, okpála inde oo bhú ngu o, a ko matá obalise na líli gba Moidje de. <sup>18</sup> Ndu ní hana inde li bongo nabuku bhúla ní-e ayie bhúla o ayie, ní ngasuno sangu gba Ngámá maka bhú bitolobi. Abhomu-o, Ngámá inde di Bu Bhobua-a ngadji ní me

ní kolo maka ni, ne sangu inde nganu bha ne kalanu.†

## 4

*Ebhe ngasuno angu gba e bhú bhuku gba obalise gba e-o*

<sup>1</sup> Ebhe bhú bádha bhú 'bu gba e aha pi ya kulu nakpokpo Bádha Ngali . Kaka-a, ya gie liya ne sidi de. <sup>2</sup> Ya ayala ndu 'ngú na pepe, i du di-e bhe na numu-o hana. Ya mene ehe bhú kali de, ya kpetø di 'li Ebhe bhú dabili bini ne engú na eu de. Ya mangbo ngasuno ngbili 'ngú pi okpála mbámbá. Ya ngamene mo-o kala Ebhe ngubula me okpála hana mbila me lele nadhuku gba ya-a ngbingbili. <sup>3</sup> La-a, i du me Bádha Ngali inde ya ngakpokpo e nde mbámbá ade-e, a mbámbá ade bha bini pi okpála inde ngangita-o. <sup>4</sup> U ngabhuka ade anga Satana , ebhe na doto inde-e angbingi imbilangu gba u-o angbingi. Ngaani ebhe ang-o amene me u aú zi 'kpí inde bhú Bádha Ngali-e de. A ko zi 'kpí na sangu gba Kilisito . Ngaani-e, ani mana Ebhe libhomu. <sup>5</sup> Nedhinga ya ngakpokpo Bádha Ngali-e lie, a ko de me ya ngakpokpo engú gba ya makpe-e de. Ya ngakpokpo me Yesu Kilisito ne Ngámá ngae. La pi ya-a, ya bha naaya ne obalise gba yi kabula ani. <sup>6</sup> Padhá de, anga Ebhe apa nani me: «Zi 'kpí su bhú biti!†» Ani amene ngae makpe me zi 'kpí gba ni-e su li bua ya ngubula me ya mbila sangu gba ni inde ngasu bhúla Yesu Kilisito-o.

<sup>7</sup> Oehe na babadha bhomu-o, Ebhe a'o bhú ya. Engú bini, ya bhubhuku maka madakpa. Ebhe amene mo-o ngu nasuno me angu na ngangamba bhomu-o yie bhú ya de, ayie mangbo bhú ni. <sup>8</sup> Ya ngazu ndu ngua likabhu hana,

engú bini, likabhu bini ha nga angu ya de. Bua ya angamba, engú bini, ya ngaholo bua ya. <sup>9</sup> Okpála ngato mbolo li ya, engú bini, Ebhe 'o ká ya de. U agbo 'i ya, engú bini, u bhele ya de. <sup>10</sup> Ya ngadhuku ne kuo ndu 'kpí hana sa so ya maka Yesu, ngubula me makobho gba ani u di lie bhú lele nadhuku gba ní-o. <sup>11</sup> Ndu nedhinga hana ya nde lie bhú makobho-o, kuo de ya masakpe kabula Yesu. Abhomu-o, u tsia tí da di nau makobho gba ani-e bhú lele nadhuku gba ní pila doto-o. <sup>12</sup> Kaka-a, kuo ngamene kulu bhú ya ngubula me makobho du namene kulu bhú yi.

<sup>13</sup> Bhuku gba Ebhe-e ngapa me: «Ma abhuka mu Ngámá, kaka-a, ma atsia agama 'ngú.†» Ngaya di-e, ya abhuka Ngámá, kaka-a, ya atsia agama di 'ngú. <sup>14</sup> Ya ambila me Ebhe inde azuku Ngámá Yesu bhú ká okpála inde amu-o, azúku di ya bhú dabili bini ne ani. Ani tsia 'ó di ya bhú dabili bini ne yi de e. <sup>15</sup> Ndu 'ngú ya ngakibila e hana-a, a ngubula yi, amba ngayi okpála inde li Ebhe ngasuno bádha bhú 'bu gba e pi yi-e, yi du nabe ndu yi ane mane. Abhomu-o, mayo gba yi nagie heni pi ani-e tsia bé di ndu e. Bbobhomu-o tsia há sangu pi Ebhe.

<sup>16</sup> Kaka-a, ya gie liya ne sidi de. Abana li kute ya du nandala-a, ya ambila me bua ya ngasia angu na mbia ekpí bini ne bini hana. <sup>17</sup> Likabhu ya ngazu e mbia inde-e mbomboye, ní tsia sangu na ngbéngbé inde ngadjeke ní-o. Sangu angu-o ane ndu 'he hana, a la di ngabhue dáduma ne dáduma. Olikabhu ní ngazu e inde-e ngaleke ní ngú nasia sangu bhomu-o. <sup>18</sup> Padhá de, anga ní nga'o 'to ní 'to engú i u lie ne

djila de-o. Ní 'o 'to ní 'to engú inde ngau lie ne djila de-e de. Ehe bhende ngau lie ne djila ngabhue naali ade, engú bini, ehe i u lie ne djila de-e, ngadu dáduma ne dáduma.

## 5

*Kute na mbia inde li omabhuka asia e abhúla-o*

<sup>1</sup> Ní mbila hana me li eti inde ní nde bhú e kpi-e, a ka ní ne eti koko abhúla a akunda napa me, ekpí bini, ní akpí makpi, ní tsia 'ó ka kute na doto inde. Eti li Ebhe aleke e pi ní-e, okpála yiki ngao de. Eti angu-o adú dáduma ne dáduma. <sup>2</sup> Nedhinga ní nde lie bhú kute inde-e, ní ngalopolo liní anga gamu gba ní na ngbéngbé-e me ní dyi kute na abhúla maka bongo na mbia. <sup>3</sup> Nedhinga ní a'ó ka kute na doto inde-e lie, ní dú abhúla mandí kute de. Ní asia kute na mbia. <sup>4</sup> Ní mbila hana me ní nde nga bha lie bhú kute na doto inde-e, ní ngalopolo liní mugito me ní abi tili 'he. A ko de me ní ngagili nadu mandí kute-e de. Ní mangbo ngagili me ní dyi kute na abhúla ngubula me makobho ha angu ehe bhe na kukuo-o. <sup>5</sup> Ebhe aleke ní ngubula makobho angu-o ngae makpe. Ani atsia aha ngaiza Bua gba e pi ní bhú ka ohe inde ani aleke e pi ní-o.

<sup>6</sup> Ní mbila hana me, nedhinga ní nde lie bhú kute na doto inde-e, ní nga bha tsutsu de bili li Ebhe Ngámá nde lie-o. Abana inde lie mo-o, ní abedhe ndu 'kpí hana ne masi. <sup>7</sup> Padhá de, anga ní ngadhuku li lele nabhuka makpe, ní dhuku li lele nakpata engú ní ngau e ne djila ní-e de. <sup>8</sup> A moko, ya abedhe ne masi bedhe. Ya la di ne gamu nayie bhú kute inde-e ngú nanu nadu dengo Ngámá gba ní-o. <sup>9</sup> Engú inde li bua ya

† 4:13 4:13 Tsia bhú Ets. 116:10.

ngae inde, a ayo me ya mene engú inde anga li Ebhe, abana ya du bhú kute inde, abana ya yie bhú kute ango-o. <sup>10</sup> Padhá de, anga a ayo me ndu ní hana ní ze bhú djila Yesu Kilisito ngú napa me ani kodho 'ngú gba ní-o. Abhomu-o, li kpála ne kpála tsia sia ehe inde ati ne engú li ani amene e li nedhinga ani adu lie bhú kute na doto-o. Kpála ne kpála asia makalá na bádha 'ngú, i du di-e bhe na siti 'ngú inde ani amene e-o.

*Ebhe nga'i okpála bhú 'li ya*

<sup>11</sup> Ya mbila hana me namanga Ebhe ne ni-ie. Kaka-a, ya ngagili me ya to bhú 'ndji okpála me u bhuka Bádha Ngali ya ngakpokpo e-o. Kala Ebhe-e, ní ti da nawo liní de. Ma ngabhundja la di me kala yi-e, ma wo lima de. <sup>12</sup> Ya kunda matá de me ya kpokpo 'ngú gba ya-a pi yi ngaya makpe de. Engú bini, ya ngakunda na'o yi me yi du ne gindaginda li 'ngú gba ya-o. Abhomu-o, yi ti da nagie 'ngú pi okpála inde ngau ngbengbe ongú bhende i ngau lie mbámhá, inde i tsia 'kpí li 'ngú bhende li bua kpála de-o.

<sup>13</sup> I du me ya nde ne obhulu pele maka li okpála koko ngabhundja lie-e, a ko kabula Ebhe. I du me ya nde ne obhulu pele ade-e, a ko ngubula nateteke yi. <sup>14</sup> Engú inde ngatima ya me ya mene kulu inde-e ne kekele-e, a ko mukunda li Yesu Kilisito nde ne e pi ya-o. Ya ambila ndjindji me Yesu Kilisito akpi mada ndu okpála hana. Kaka-a, bhú djila Ebhe-e, ndu okpála hana amu bhú dabili bini ne ani. <sup>15</sup> Ani akpi ngubula ndu okpála hana, amba ndu obhende bhú mukobho adú matá akobho bhú ngu o de, engú bini, u du akobho pi kpála inde akpi, atsia azoku pi uo-o.

<sup>16</sup> Kaka-a, ya matá ngatsia kpála ne djila bhe na kpála-kuti ade. A ko paká ya adu nako natsia Yesu Kilisito ne djila bhe na kpála-kuti, la mbia inde-e, ya matá ngatsia ani mo-o ade. <sup>17</sup> Nedhinga li kpála akpetse lie lie ne Yesu Kilisito-o, ani akolo kpála na mbia. Lele dasundu gba ani na kalanu-o andjia. A ibili bhú ani ne lele dasundu na mbia. <sup>18</sup> Ebhe ngamene ndu 'ngú bhomu-o hana ngae. Ani atima Yesu Kilisito me ani go to guo 'ngú sunda ní ne o. Ani aha kulu bhomu-o pi ya ngae me ya nu gbele okpála koko de ni, amba ni to guo 'ngú sunda ni ne uo. <sup>19</sup> Padhá de, anga Ebhe adu namene kulu ngú nato guo 'ngú sunda o ne okpála-kuti li kpadji gba Kilisito. Ani tsia matá siti 'ngú gba uo de. Abhomu-o, Yesu Kilisito atsia atima ya me ya kpokpo pi okpála lele maka a ayo lie me u sia guo 'ngú sunda o ne Ebhe-o.

<sup>20</sup> Bhobhomu-o akunda napa me Yesu Kilisito atima ya ngae makpe. A na paká me Ebhe nga'i okpála bhú 'li ya. Kaka-a, ya ngayo ka uo ne 'li Yesu Kilisito me, u 'o me Ebhe to guo 'ngú sunda o ne e. <sup>21</sup> Yesu Kilisito mene nani siti 'ngú belegu de bini. Engú bini, Ebhe a'o kili siti 'ngú gba ní-e li 'ngbu ani, ngubula me li kpadji gba ani-e, ní sia ngasa nakolo ngbingbili bhú djila Ebhe.

## 6

<sup>1</sup> Ya ngamene kulu bhú dabili bini ne Ebhe. Inde lie mo-o, ya ngayo ka yi me, yi aú bádha bhú 'bu li Ebhe apana e pi yi-e padhá de. <sup>2</sup> Padhá de, anga Ebhe apa bhú Bhuku gba e me:

«Nedhinga akolo lie me ma mene bádha 'ngú pi yi okpála gba ma-a, ma adje yi.

Nedhinga akolo lie me ma kobho yi-e, ma ateteke yi.†» Ondaise ma, yi gbo 'dje yi, a ko mbia inde-e nedhinga na babadha, a ko nedhinga na makobho.

*Likabhu li Polo azu e asuno me a ko kukulu bali gba Ebhe*

<sup>3</sup> Ya kunda namene engú bini de inde améne me okpála ti ka e-o, anga i du mo-o de-e, u pá 'ngú li kulu gba ya-a sisiti. <sup>4</sup> Bhú ndu 'ngú ya ngamene e hana-a, ya akunda mangbo nasuno pi okpála me ya ne obalise na kukulu gba Ebhe. Abana ya du nasia mangua likabhu dho-ie, abana u du nato mbolo li ya, ya bha ngakikibila makibila. <sup>5</sup> U abhi ya, u amba ya bhú tikpu, u ato kpéke ndji bhú 'ndji okpála me u mene ya sisiti. Ya abhele kuo ya ne kulu masakpe da napa me ya asia belegu nedhinga nala ne nazu 'he de. <sup>6</sup> Bua ya kala Ebhe bubu, ya ngasuno me ya ambila ongu gba Ebhe-e má kpulakutu! Ya ne 'ndjá bua, ya ne bádha bua, Bu Bhobua bhú ya, ya la di ne mukunda na kukulu.

<sup>7</sup> Ya ngakpokpo kukulu 'ngú pi okpála bhú angu gba Ebhe. Lele bádha nadhuku gba ya-a pi ya maka tia 'gú ngú naha 'gú ne obhulu yala gba ya-o. A di pi ya maka kopí ngú nalila liya ne di sakpa obhulu yala gba ya-o. <sup>8</sup> Okpála koko ngamanga ya, okoko ngau ya bhú djila o padhá. Okpála koko ngatoko ya, okoko ngasobho ya. Okpála ngau ya mugito me ya ne obhulu eu, ya nde la ngapa kukulu 'ngú-o. <sup>9</sup> Okpála koko ziba de me ya ne obhulu titima gba Yesu-o de, engú bini, okpála bhelé ngaziba ya. Okpála koko ngau ya mugito me ya ne omakpiakolo, ya nde la bhú

makobho-o. U ngato mbolo li ya, engú bini, ya mu de. <sup>10</sup> Abana li bua ya ngabi likabhu lie ka okpála naali-e, ya bha ndu 'kpi hana bhú djali. Ya bhú ndibhili, engú bini, ya ngamene me okpála bhelé kolo obhulu tia kala Ebhe. Ya ngau liya bhú djila okpála mugito me ehe bini ka ya píla doto inde-e ade. La-a, bhú ngbingbili-e, ndu 'he hana ne naaya 'he.

<sup>11</sup> Ngayi ondaise ya na Kolito-o, ya agama 'ngú pi yi mbámhá. Ya wo engú inde li bua ya-a belegu de bini. <sup>12</sup> Pi ya-a, ya gbite bua ya pi yi de, yi agbite mangbo bua yi pi ya ngayi. <sup>13</sup> Ma ngagama 'ngú pi yi mugito me yi ne ongisi ka ma. Ma ngapa pi yi me: «Yi gie mukunda ya nde ne e pi yi-e pi ya. Yi awó engú inde li bua yi-e pi ya de.»

*Yi akpétse liyi ne omupagano de*

<sup>14</sup> Yi akpétse liyi bhú dabili bini ne omupagano ngú namene ehe ne uo de. Ehe inde ngbingbili-e ti da nakpétse lie bhú dabili bini ne ehe na sisiti-e lele pi? Zi 'kpi ti da nakpétse lie bhú dabili bini ne biti lele pi? <sup>15</sup> Yesu Kilisito ti da nadge lio ne djabulu lele pi? Kpála inde abhuka Yesu-o ti da nadu ne mabhundja bini ne kpála bhende i bhuka de-e uu? <sup>16</sup> Nganí-e, ní ne 'ngbé 'ti Ebhe inde uu. 'Ngbé 'ti Ebhe ti da nakpétse lie ne 'ti atolo belegu de bini. A maka li Ebhe apa lie li 'ngú gba omaha e me:

«Ma adú bhú ká uo,

ma tsia dhuku bhú dabili bini ne uo.

Ma adú ne Ebhe gba uo, u tsia dú ne omaha ma.†»

<sup>17</sup> Ka 'ngú ang-o, Ebhe Ngámá apa pi uo me:

«Yi ze bhú ká omupagano maze, yi adú ne uo bhú dabili bini de.

† 6:2 6:2 Tsia bhú Isa. 49:8. † 6:16 6:16 Tsia bhú Lev. 26:11-12; ne bhú Edj. 37:27; di ne bhú Dglm. 32:28.



Yi abú 'kpa yi li 'he inde kala ma  
sisiti-e de,  
abhomu-o ngama-a, ma tsia  
ziba yi.†

18 Ma adú ne 'dyi yi,  
yi tsia dú ne ongisi gba ma.  
Ngámá Angbamili apa mo-  
o.†»

## 7

1 Ondaise ma na mukunda,  
Ebhe apa me engú inde ni apa  
me ni améne e pi ní-e, ni améne  
mamene. I nde lie mo-o, a ayo me  
ní vulu liní bhú ndu osisiti 'ngú  
inde ngato zibotu li kute ní ne bua  
ní-e hana. Ní mene ne kpéke me  
ní du bubu kala Ebhe ne namanga  
ani mamanga.

*Polo akpi ndjili ka li omabhuka  
na gudhu na Kolito adjí bua o lie-o*

2 Ondaise ma, yi 'o ya li bua yi!  
Ya amene siti 'ngú li pabilí gba  
kpála bini de. Ya a'e kpála bini li  
kpadji gba Ebhe-e de. Ya ha 'he ka  
kpála bini bhú napite ani de. 3 A  
ko de me ma ngapa 'ngú bhomu-  
o ngú na'o mangimbo pi yi-e de.  
A maka ma de apa lie-o, ya ne  
mukunda pi yi naali. Ehe bini gbó  
bhusu mukunda ya nde ne e pi yi-  
e de, abana i du nakpi, abana i  
du me ní nde bhú mukobho. 4 Yi  
ne kpúkpú na bua ma. Ma ne  
gindaginda naali li 'ngú gba yi-o.  
Bhú ndu likabhu ya ngazu e hana,  
ya gie liya ne sidi de, ya abedhe  
mangbo ne djali bedhe.

5 A ko paká, abana nedhinga ya  
akolo lie bhú Makedonia, ya sia  
belegu nedhinga bedi ngú naguo  
de. Ya asia okpekpeke da 'ngú ne  
ndu pasu hana. Ya du ne guo 'ngú  
sunda ya ne okpála koko de, ya  
atsia adu ne tsulu. 6 Engú bini,

Ebhe inde atoto masi bhú okpála  
inde andala-a, abedhe matá ya ne  
masi li nedhinga li Tito agie lie lie-  
o. 7 Ya bedhe bha ne masi ka nago  
ka ani-e de, engú bini, ngali ani  
akpokpo e pi ya-a ato di masi bhú  
ya ngae. Ani akpokpo pi ya lele  
maka yi ato masi bhú ani lie-o.  
Ani akpokpo pi ya me yi abedhe  
ne gumu nau ma bedhe. Ani apa  
me yi ngakina liyi ka osisiti 'ngú  
yi amene e-o. Ani apa me yi  
ne gumu nago nateteke ma bhú  
egú ma ngagu e ne obhulu yala  
gba ma-o. Ma adje lie mo-o, ma  
abedhe matá ne djali bedhe.

8 Ma ambila me balua\* inde ma  
aye nako e pi yi-e aha babuma  
pi yi naali. Ma ti nako da nadge  
likabhu li bua ma tété, padhá  
de anga, ma ambila me balua  
bhomu-o aha likabhu pi yi ngú  
nedhinga bedi. Engú bini, bua ma  
ne likabhu tété mbia inde-e ade.

9 A na paká me, ma mangbo  
ngakpi djali. Ma kpi djali ango-o  
ka babuma yi asia e ka ma-a de.  
Engú bini, ma ngakpi djali anga  
babuma yi asia e amene me yi dji  
bua yi. Babuma yi asia e bhomu-o,  
yi asia li lele maka li Ebhe akunda  
lie-o. Inde lie mo-o, ya mene yi  
sisiti de. 10 Padhá de, anga li kpála  
sia babuma li bua e li lele maka li  
Ebhe akunda lie-e, babuma ango-  
o há pi ani nadji bua e. Ani dji  
bua e-e, ani tsia kóbho. Ya ti da  
nadge likabhu li bua ya tété lele  
pi? Engú bini, li kpála sia babuma  
li bua e, i du me ani nde dji bua e  
de-e, bhobhomu-o ngagbele pi ani  
nakpi.

11 Babuma yi asia e, yi asia li  
lele maka li Ebhe akunda lie-o.  
Yi tsia nga obabadha 'ngú inde li  
babuma ango-o azu e bhú yi-o: a  
ngaha pi yi me yi du ne bádha

† 6:17 6:17 Tsia bhú Isa. 52:11; di ne bhú Edj. 20:34, 41. † 6:18 6:18 Tsia bhú 2 Sam. 7:8,  
14. \* 7:8 7:8 Balua: A ko balua na bini gba Polo pi omabhuka na Kolito de. A ko balua inde  
ani aye e atsia angita-o. † 7:11 7:11 Tsia bhú 2 Kol. 2:5-11.

bua ngú naleke 'ngú sunda yi má gala! Yi asuno mbámbá me yi li bhú siti 'ngú de.† Yi ngake 'ngú liyi li siti 'ngú ango-o. Yi ne tsulu li 'ngú inde li siti 'ngú ango-o ti da nazu e-o. Yi abedhe ne gamu nau ma di ne namene engú li lele maka li Ebhe akunda lie bedhe. Yi bedhe ngú na'o 'ngú pí kpála inde amene siti 'ngú-o. Yi apana mbámbá me ngayi makpe-e, yi li bhú 'ngú bhomu-o de.

<sup>12</sup> Li ma ye balua pí yi-e, ma ye ka 'ngú gba kpála inde amene siti 'ngú-o de. Ma ye di ka 'ngú gba kpála bhe u amene siti 'ngú li e de. Ma aye mangbo ngú nasuno me yi mbila mbámbá kala Ebhe me yi ne mukunda pí ya li bua yi naali. <sup>13</sup> Kaka-a, engú yi amene e ako bua ya kuto.

Bua ya kò bha kuto ngae de, ya akpi di djali naali ka nau me Tito adu ne djali naali ka li ndu yi hana ato masi bhú ani lie-o. <sup>14</sup> Nedhinga ma atima ani lie agba yi-e, ma akpo 'ngú yi pí ani ndjindji. Mbia inde-e, yi tsia ha numu muma de. Maka ya akpokpo nako lie pí yi kukulu 'ngú ndu 'kpi hana-a, ndu babadha 'ngú ya akpokpo e li 'ngú gba yi pí Tito asuno me a ko kukulu 'ngú. <sup>15</sup> Nedhinga ani akolo lie agba yi-e, yi asia ani ndjindji. Ndu yi hana, yi amanga ani naali, yi au ani ne tsulu, yi atsia adu amene engú maka ani akunda lie-o. Ani bhundja engú bhomu-o, ani bédhe matá ne mukunda pí yi bedhe. <sup>16</sup> Ma ne djali, anga yi ne kpúkpú na bua ma bhú ndu 'ngú hana.

## 8

*Polo ato masi bhú omabhuka na gudhu na Kolito me u teteke ondaise o na Yelusalema*

<sup>1</sup> Ondaise ya, ya akunda me yi mbila engú inde li Ebhe amene e bhú bádha bhú 'bu gba e pí okpála na oDadjua gba Ebhe na Makedonia.\* <sup>2</sup> Omabhuka inde oo azu nani likabhu naali, engú bini, u abedhe ne djali bedhe. U adu nani bhú ndibhili naali, engú bini, u du atsia bhúla 'he pí okpála de. <sup>3</sup> Ma au ne djila ma makpe. U apu 'he nakpata lele ehe inde adu ka uo-o. U apu belegu 'he nane dada mane. U aha bhú ngu o, okpála kata uo tété gandji de. <sup>4</sup> U akikiliki lio pí ya naali me ya asuno bádha bhú 'bu pí o, ngubula me o to 'kpa o pí omabhuka na Yudaya ne natima tia pí uo. <sup>5</sup> Ehe inde u amene e ane bhende ya adu nabhundja e-o. U aha ngaiza lio libhomu ngubula kulu gba Ngámá Yesu. U atsia aha di lio ngú nateteke ya nakpata lele maka li Ebhe akunda lie-o.

<sup>6</sup> Kaka-a, ya ayo ka Tito ne kekele me ani gie lie agba yi ngú nandjia dú kulu na bádha bhú 'bu inde ani akpo nani lita e ko. <sup>7</sup> Yi ne obhulu tia kala Ebhe nane okpála koko. Nabhuka gba yi-e kpekpeke. Yi ngakpokpo Bádha Ngali gba Ebhe-e ndjindji. Yi mbila 'ngú gba Ebhe-e ndjindji. Yi aha liyi libhomu ngú kulu gba Ebhe-o. Yi ne mukunda naali li pabili gba ya. Ka 'ngú ango-o, yi mene ne kpeke me yi du ne obhulu tia li kpadji na ngua bádha bhú 'bu bhomu-o.

<sup>8</sup> Engú inde ma apa e pí yi bhomu-o, a ko de me ma aha pí yi maka líli-e de. Ma apa mangbo pí yi, ngubula nasuno lele maka li oDadjua gba Ebhe koko amene lie-o. † du me yi nde akpata lele maka u amene lie-e, yi súno me mukunda gba yi-e di kukulu. <sup>9</sup> Padhá de, anga yi mbila bádha bhú 'bu gba Ngámá gba ní Yesu

\* 8:1 8:1 ODadjua gba Ebhe na Makedonia: A ko obhende bhú Filipoi, Tesalonike ne Beloya-o.

Kilisito hana. Ngaani kpála inde adu bhulu tia, ani a'o lie bhulu ndibhili ngú nateteke yi. Ani amene mo-o ngú napa me, bhú ndibhili gba ni-e, yi kolo obhulu tia kala Ebhe.

<sup>10</sup> Ma ngaha pi yi mabhundja gba ma pindji napu 'he pi omabhuka inde bhú ndibhili-o. Bhú kalanga inde akodho 'kpi-e, yi adu nako okpála na kalanu ngú napu 'he. Yi du bha bini kalanu bhú napu 'he de, yi adu di ne okpála na kalanu nabhundja 'ngú angoo. <sup>11</sup> Kaka-a, mbia inde-e, yi ndjia kulu bhomu-ndjindji. Yi 'o bua yi ngú nanu ne 'ngú angoo ne kalanu akolo a li soso, ne mukunda inde yi adu nani ne e ngú namemene, nakpata lele ehe inde ka yi-o.

<sup>12</sup> Padhá de, anga i du me yi nde apu 'he pi Ebhe ne bua yi bini-e, Ebhe ngaziziba bha bini li lele bhende ka yi-o. A ko de me Ebhe nga'o 'to e me yi pu pi ni ehe bhende ka yi ade-e de. <sup>13</sup> A ko de me ma akunda na'o likabhu gba okpála koko pi 'ngbu yi ngú nato yi bhú ndibhili-e de. A ko mangbo me ndu yi hana yi du ne 'he inde ati ne yi-o. <sup>14</sup> Mbia inde-e, ehe ka yi bhelé. Kaka-a, yi ti da nateteke okpála bhende bhú ndibhili-o. Ekpí koko-o, yi du di bhú ndibhili me ehe nde ka uo bhelé-e, u ti da nateteke di yi. Li ndu yi hana tsia du ne 'he inde ati ne yi-o. <sup>15</sup> A maka u aye lie bhú bhuku gba Ebhe-e me:

«Okpála anu ngú nalo mana.

Okpála bhende alo bhelé-e, u azu lie, ale ne uo.

Okpála bhende i lo bhelé de-e, u azu lie, ale bhadi ne uo.†»

*Polo atima Tito ne obi e nalo tia*

<sup>16</sup> A ayo me ní dhøø Ebhe inde a'o li bua Tito me ani nu teteke yi maka ya amemene lie-o. <sup>17</sup> Tito aziba engú inde ya ayo e ka ani-o.

Ani ziba bha bini 'li ya de, engú bini, ani aziba ne bua e makpe me ni nu agba yi anga ani ne mukunda pi yi. <sup>18</sup> Ya atima ani di bhú dabili bini ne ndai ní, inde li oDadjua gba Ebhe-e ngadhøø e kabula kulu inde ani ngamene e ngubula Bádha Ngali-o. <sup>19</sup> La matá di-e, oDadjua gba Ebhe abhu ani ngubula me ya anu ne uo bhú dabili bini ngú namene kulu na bádha bhú 'bu inde. A ko kulu inde a ayo me ní mene e ngú naha sangu pi Ngámá gba ní ngae makpe. Abhomu-o, i tsia suno di pi okpála bádha bua gba ní-o. <sup>20</sup> Otia inde ya apo bhúla e-e bhelé. Kaka-a, ya ngalilila ndjindji ngubula me okpála apá 'ngú na sisiti li ya tété de. <sup>21</sup> Ya ngagili ne kpéke me ya mene engú inde babadha bhú djila Ngámá gba ní di ne bhú djila ndu okpála hana.

<sup>22</sup> Ya di ngatima suka ndai ní bini bhú dabili bini ne obhe bhisi bhomu. Ya ale ani bhutsibhutsi, ya atsia au me ani ngaha lie ndu 'kpi hana ngú kulu gba Ebhe-o. La mbia inde-e, ani matá ngaha lie ane mane anga ani ngambila ndjindji me yi ne kpúkpú na bua ni. <sup>23</sup> La pi Tito-o, a ko kpála inde ya ngamene kulu ne e bhú dabili bini. Ya ngamene kulu ne ani bhú ká yi bhú dabili bini. Okpála bhe bhisi inde adhuku ne ani-e, okpála na oDadjua gba Ebhe-e atima uo ngao. U ngamene kulu ngú naha sangu pi Yesu Kilisito. <sup>24</sup> Kaka-a, yi suno mukunda gba yi-e pi uo ne bua bini. Li okpála na oDadjua gba Ebhe-e aú lie mo-o, bhobhomu-o suno pi uo me ya pa 'ngú gba yi-e bhú djila uo bhú eu de.

## 9

*Ebhe ne mukunda naali pi okpála inde ngapu 'he ne djali-o*

<sup>1</sup> Tata ngú napa me ma ye 'ngú pí yi pindji kulu gba ní nateteke omabhuka inde bhú ndu doto na Yudaya ade. <sup>2</sup> Padhá de, anga ma mbila bádha bua yi nde ne e pí uo hana. Ma ngapa 'li ma tété de ondaise ní na Makedonia\* me, «ngayi ondaise ya na Akai, yi bedhe ngú nateteke omabhuka na Yudaya, nayie bha bini bhú kalanga inde akodho 'kpí-o.» Li okpála na Makedonia adje lie mo-o, okpála bhelé bhú ká uo asia di gumu nanu nateteke uo.

<sup>3</sup> La-a, ma ngatima ondaise ní bata agba yi ngú napa me yi po bhúla tia bhomu-o kalanu maka ma apa nako pí okpála koko lie me yi améne mamene-o. Abhomu-o, nedhinga ya akólo lie agba yi-e, engú ya apa e pindji yi pí uo-o, akóto eu de. <sup>4</sup> Ne ma ne okpála na Makedonia, li ya kolo agba yi, ya bhaka me yi nde nga bedhe ade-e, numu méne ya naali. Ma ambila la bhadi me numu bhe gba yi-e dú la matá bhe nane mane, anga ma apa pí uo me yi bedhe. <sup>5</sup> Kaka-a, ma au ndjindji me ma yo ka ondaise ní inde-e me, u nu pí ya agba yi kalanu ngú napa me u holo napo bhúla tia inde yi apa nako me yi ahá e-o. Abhomu-o, tia bhomu-o adú bedhe ngú nadjeke nakolo ka ma-o. A tsia súno me yi ngahaha ne bádha bua, yi ha ne siti bua de.

<sup>6</sup> Yi mbila ndjindji me: kpála inde alu ezú bedi-e, ani asia bhadi bedi. Kpála inde alu ezú bhelé-e, asia bhadi bhelé! <sup>7</sup> Kaka-a, a ayo me kpála ne kpála ha maka ani abhundja lie-o. Ani apú ne bua na bhisi bhisi de, ani apú di de me anga u aholo ní tété ne kpéke-e de. Padhá de, anga Ebhe ne mukunda pí kpála inde ngapu 'he ne djali-o. <sup>8</sup> Yi mene mo-o, Ebhe ne angu ngú

nabedhe yi ne ndu bádha bhú 'bu hana, ngubula me yi du ndu 'kpí hana ne ndu 'he hana inde yi nde ne gumu e ngú mukobho gba yi-o. I du mo-o, yi du di ne 'he inde yi ti da na'o e li tula ndu obabadha kulu hana. <sup>9</sup> A maka u aye lie bhú Bhuku gba Ebhe-e li 'ngú gba kpála inde ngbingbili-e me:

«Kpála inde ngapu 'he pí obhulu ndibhili ne bua e bini-e, bádha 'ngú gba ani-e ngadu duduma ne duduma.†»

<sup>10</sup> Ebhe ngaha nguwa pí okpála ngú nalulu, di ne mapa ngú nazuzu. I nde lie mo-o, ani ahá ndu nguwa yi nde ne gumu e hana pí yi. Ani tsia méne di me a bhele ngubula me yi du napu 'he ne kalanu. <sup>11</sup> Ebhe améne me yi du ndu nedhinga hana ne obhulu tia ngubula me yi du napu 'he ndu 'kpí hana. Abhomu-o, li okpála bhelé gie heni pí Ebhe li ohe inde ya ahá e pí uo ne 'li yi-o. <sup>12</sup> Padhá de, anga ehe yi apú e téteke bha bini omabhuka inde bhú ndibhili-e de. A méne di me okpála bhelé gie heni pí Ebhe bhú mayo gba o-o. <sup>13</sup> U aú kulu yi ngamene e ne tata naali. Kaka-a, u agie heni pí Ebhe ngú nau me yi ngamanga Bádha Ngali gba Yesu Kilisito, di ne me yi ngagbo bhusu 'he gba yi-e ne o, di ne okpála koko. <sup>14</sup> U asúno mukunda gba o-o pí yi bhú nayo Ebhe. U améne mo-o, anga bádha bhú 'bu gba Ebhe-e amene me yi bhulu 'kpa yi pí uo. <sup>15</sup> A ayo me ndu okpála hana dhogé Ebhe ngú bádha 'ngú gba e inde ane mane-o.

## 10

*Polo agie 'ngú pí okpála inde nga'o 'ngú pí ani-o*

<sup>1</sup> Ngama Polo-o, ma ngayo ka yi engú bini, ne 'li Yesu Kilisito

\* 9:2 9:2 ODadja gba Ebhe na Makedonia: A ko obhende bhú Filipoi, Tesalonike ne Beloya-o.

† 9:9 9:9 Tsia bhú Ets. 112:9.

kpála na bhúku 'ngú di ne bádha 'ngú-o. U ngapa li ma me ní dū ne yi bhú dabili bini-e, ma ngakə lima ne kuto, i dū la me ma nde tsutsu-o, ma ngagama okpekpeke 'ngú pi yi bhú obalua gba ma-o. <sup>2</sup> Engú inde ma ngayo e ka yi-e, ma ngayo ka yi me, yi atíma ma de me ma gama okpekpeke 'ngú pi yi nedhinga ma akólo lie agba yi-e de. Okpála koko bhú ká yi ngabhundja me ya ngamene 'ngú maka okpála na doto. La-a, pi okpála bhomu-o, ma asúno angu gba ma-a pi uo masuno.

<sup>3</sup> A na paká me ya ne okpála-kuti, engú bini, ya ngagu gbele maka okpála-kuti ade. <sup>4</sup> Bhú gbele ya ngagu e-e, otia 'gú ya ngagu gbele ne e-e, a ko obhende na pila doto inde-e de. A ko okpekpeke tia 'gú inde ayie ka Ebhe. Otia 'gú bhomu-o ne angu ngú nabhili okpála inde ngagu Ebhe-o. Ya ngani ne di 'bhə obhulu eu inde ngagbe kpekebhe-o. <sup>5</sup> Ya ngaha angu eu gba uo inde ngamene me u abhúka Ebhe de-o. Ya ngagili nadji mabhundja gba uo-o ngubula me u manga Yesu Kilisito. <sup>6</sup> Nedhinga yi apána lie me yi ngamanga ya maka a ayo lie-e, ya 'ó 'ngú pí ndu okpála koko hana inde i kunda namanga ya de-o.

<sup>7</sup> Yi tsia 'ngú maka inde lie-o. Li okpála koko bhú ká yi pa me o ne okpála ka Yesu Kilisito-o, a ayo me u mbila me ya di ne okpála ka Yesu Kilisito maka uo. <sup>8</sup> Angu li Ngámá Yesu Kilisito aha e muma-a, a ngubula me ma teteke yi ne di. A ngubula nabhili yi ade. Nedhinga koko-o, ma ne gindaginda tété naali, ma dje numu tété de. <sup>9</sup> Ma kunda de me yi holo nabhundja me ma ngakunda nabu tsulu li yi, ne obalua gba ma, ma aye e pi yi-e

de. <sup>10</sup> Padhá de, anga okpála bini bini ngapa me: «Li Polo ye balua pi ní-e, ani ngaye okpekpeke 'ngú, a ngandjia angu ní mandjia. Engú bini, ani kolo bhú ká ní ngae makpe-e, ani holo nagaku, ani lé nagama 'ngú pima.» <sup>11</sup> A ayo me okpála inde ngapa ngua 'ngú bhomu-o mbila me, engú inde ya ngaye e bhú obalua gba ya me ya nde de yi tsutsu-o, ya kolo gba yi-e, ya améne bha maka ya aye lie pi yi bhú obalua-o.

<sup>12</sup> Okpála bhomu-o ngau lio ne bhúlá naali. Ya pá de me ya viti ne uo bini-e de, ya kpó 'ndji ya ne uo de. A ko ongingi. U ngapima lio ngao makpe, u ngakpo 'ndji o li kute o makpe. <sup>13</sup> Li pápá gba ya-a, ya ti da napa 'li ya nane dada mane de. Nedhinga li Ebhe amba bhúla ya lie ne kulu agba yi-e, ani atsia akodho kozie tété. Ya apise bha ne kulu gba ya li kozie angoo. <sup>14</sup> Ya gó nani ne Bádha Ngali gba Yesu Kilisito agba yi de-e, u de apá li ya me ya agulu kozie gba ya-a agulu. Engú bini, i nde la lie me ya nde ne okpála na kalanu ngú nanu ne Bádha Ngali pi yi-e, bhobhomu-o asuno me ya gulu nga kozie gba ya-a de.

<sup>15</sup> Kaka-a, ya pá 'li ya li kulu inde li okpála koko amene e de. Engú bini, ya ne gumu me nabhuka gba yi-e be ndu e, ngubula me kulu gba ya bhú ká yi-e be di ndu e. Ya abhundja me ya ne nga bili inde li Ebhe apa me ya pise lie de. <sup>16</sup> Pipita-a, ya ti da nasia kpadji ngú nanu ne Bádha Ngali-e bhú ondu doto koko. Ya kunda napa 'li ya li kulu li okpála koko amene e ngao li bili li Ebhe atima uo lie de.

<sup>17</sup> Padhá de, anga Bhuku gba Ebhe-e apa me: «Li kpála kunda napa lie-e, a ayo me ani de pa bha

bini li engú inde li Ebhe Ngámá amene e-o.†»<sup>18</sup> Padhá de, anga a ko de me Ebhe ngaziba okpála inde ngapa 'li o ngao makpe-e de. Engú bini, ani ngaziba obhende anga li ani-o.

## 11

*Polo akpo 'ndji e ne okpála inde ngabhi 'kpa o pí mbulu o me o ne obhulú titima-o*

<sup>1</sup> Yi ti da nadu ne 'ndjá bua muma uu, ngubula me ma gama mbo 'ngú maka bhulu pele! A moko, yi du ne 'ndjá bua muma.  
<sup>2</sup> Padhá de, anga ma ne botolo ngú yi ndu nedhinga hana, maka li Ebhe nde di lie ne botolo ngú yi-o. Ma ngatsia 'kpí li yi ndjindji ngubula me yi du bubu ngú kava. Bhoko na kava angoo, a ko Yesu Kilisito .  
<sup>3</sup> Yi bhundja me kpulu apite nani Eva, ani atsia ayie li bádha kpadji. Kaka-a, ma ngakpe me kpála bini agó apite yi de ngubula me mukunda gba yi pi Yesu Kilisito ndjia.

<sup>4</sup> Ma ngapa mo-o, anga li kpála bini go agba yi-e, yi bedhe ngú nabhuka ani má gala! Engú la li kpála angoo ngakpo e li 'ngú gba Yesu, ne li 'ngú gba Bu Bhobua, la di ne li 'ngú na Bádha Ngali-e kpi ne bhende ya asuno e pi yi-o.  
<sup>5</sup> Yi ngabhundja me okpála bhomu-o ne ongbengbe obhulú titima. La ngama-a, ma bhundja de me u ane ma-a de.  
<sup>6</sup> A na paká me pi yi-e, ma mbila nagama 'ngú bhú ká okpála ndjindji de. Engú bini, li pápá nambila Ebhe-e, ma mbila ani ndjindji. Ya asuno engú angoo pi yi mbánbá bhutsibhutsi bhú ndu 'ngú hana inde ya amene e-o.

<sup>7</sup> Nedhinga ma akpokpo Bádha Ngali gba Ebhe lie pi yi-e, ma dha bhú yi de. Ma akó lima ne kuto ngubula me yi 'u ne bhúlá. Bhobhomu-o apa me ma amene

sisiti? A mo-o ade.  
<sup>8</sup> Ma adu lie oo-o, ma aziba me oDadjua koko bi mukobho gba ma ngao. Ma abha otia na oDadjua angoo ngú nateteke yi nedi!  
<sup>9</sup> Oo-o, ma dha bhú kpála bini bhú ká yi de, li ma adu lie ne gumu tia-o. Engú bini, omabhuka na Makedonia ago muma ne ehe inde ma adu ne gumu e ngao. Ma alila lima bhú ndu 'ngú hana me ma adú pi yi maka tili kili de. Ma ayó la di galikpe ehe li yi de.

<sup>10</sup> Ne 'li Yesu Kilisito inde bhú ma-a, ma ngapa pi yi kukulu 'ngú: ma ne gindaginda naali anga ma nde ha 'he ka yi de. Bhú ndu doto gba yi na Akai libhomu-o, kpála bini ti da nayoko ma de me ma adú ne gindaginda tété de-e de.  
<sup>11</sup> Ma kunda nadu tili kili pi yi de ka ni? A ko anga ma ne mukunda pi yi adi? Ebhe apá bhobhomu-o li ma ngae!  
<sup>12</sup> Ma adú bha maka ma nde lie inde. Ma ziba tia ka yi de, ngubula me okpála bhe i ngabhi 'kpa o pí mbulu o me o ne obhulú titima aú kpadji ngú napa 'li o de me o bhadi ngamene kulu maka ya-a de.  
<sup>13</sup> Okpála angoo, ngapite okpála. U ngamene 'he mugito me a ko obhulú titima gba Yesu Kilisito.  
<sup>14</sup> Engú angoo ahá nangamba pi ní de, anga Satana ngae makpe ti bhadi da namene 'he mugito me a ko andjelu na zi 'kpí.  
<sup>15</sup> Kaka-a, li okpála na kulu gba ani-e mene 'he lio mugito me a ko kukulu okpála na kulu gba Ebhe inde ngbingbili-e, ní angamba tété de. Engú bini, li sokpí-e, u asía galikpe engú inde ati ne kulu inde u amene e-o.

*Polo apa 'li e li olikabhu ani azu e-o*

<sup>16</sup> Ma matá ngapapa ne toto, kpála bini apá li ma de me ma ne bhulu pele-e de. † du me okpála nde abhundja me ma ne bhulu pele-e, yi de ziba me ma ne bhulu

pele ngú napa me ngama di-e ma pa mbo 'li ma bedi. <sup>17</sup> Engú ma adjí apa inde-e, a ko de me ma adjí napapa maka li Ngámá akunda lie de. Ma adjí napa maka li bhulú pele agagama 'ngú lie-o. <sup>18</sup> Maka li okpála bhelé ngapa 'li o lie li ongú na doto-o, ngama di-e ma apá bhadi 'li ma tété moko. <sup>19</sup> Ngayi okpála na imbilangu-o, yi dje obhulú pele ngagama 'ngú-o, yi ngadje uo ne 'ndjá bua! <sup>20</sup> Yi ngakibila me okpála bhomu-o mene yi mugo me yi ne obalise. Yi ngakibila me u zi ohe gba yi-o. Yi ngakibila me u pite yi. Yi ngakibila me u u yi padhá. Yi ngakibila me u su bhála yi. <sup>21</sup> Yi mbu li ya, anga ya adu nani bhúbhuku ngú namene mo-o! Ma ne numu naali ngú napapa!

Mbia inde-e, ma adjí agáma 'ngú maka bhulú pele. Engú inde li okpála koko ngapa 'li o lie, ma apá nga bhadi 'li ma tété. <sup>22</sup> U ngapa me o ne omaYuda, ma di ne maYuda. U ngapa me o ne omaIsalaele, ma di ne maIsalaele. U ngapa me o ne odi Abalahama, ma di ne ye Abalahama. <sup>23</sup> U ngapa me o ne okpála na kulu gba Yesu Kilisito. Mbia inde-e, ma agama 'ngú maka bhulú pele. Ma belegu ngamemene ane uo mane. Ma mene kulu ango-o ne ndala de. Ma ali bhú tikpa ane uo mane. Ma azu bhikpa ane uo mane. Ma akolo masikpe de nakpi bhútsibhútsi bhelé.

<sup>24</sup> Ma adu azu fimbo ndjikpa bata ne ká odukpabini, bhútsibhútsi bhuluvue sakpa ongámási gba omaYuda-o. <sup>25</sup> Ongámási gba okpála na Loma abhi ma ne fimbo bhútsibhútsi bata. Okpála atatulú ma ne teme bhútsibhútsi bini ngú nabhøle ma. 'Ngbé zabu alinda ne ma bhú 'ngu bhútsibhútsi bata. Ekpí

bini, ma alipila bhú 'ngu, ma asi di bhúbhú.

<sup>26</sup> Bhú odhuku ma adu adhuku e naali-e, ma adu ne tsulu ka nasi ka engu. Ma adu ne tsulu ka obhulu nagbulu 'he gba okpála ne kpeke. Ma adu ne tsulu ka ondaise ma omaYuda, la di ka obhende ne omaYuda ade-o. Ma adu ne tsulu bhú gudhu, di ne bhú omili bili. Ma adu ne tsulu pí 'ngbé 'ngu. Ma adu ne tsulu ka okpála inde ngapa me o ne omakilisito, a nde la mo-o ade-o. <sup>27</sup> Ma amene kulu kpekpeke. Ma asi ndi 'la bhútsibhútsi. Ma adje gumu bhú dabili bini ne gumu 'ngu. Bhútsibhútsi bhelé, ma sia kpadji nazu 'he de. Bongo du ka ma bhelé de, ma atsia adu adje zini. <sup>28</sup> Olikabhu ma azu e bhelé, ma ti da nakpokpokpo hana de. Engú bini, engú inde li bua ma ngalu pí e, a ko nabhundja oDadjua gba Ebhe-e ndu 'kpí hana. <sup>29</sup> Li kpála bini du bhúbhuku li kpadji gba Yesu-o, a ngamene ma sisiti mugo me a ko ma. Li kpála bini ti bhú siti 'ngú-o, a ngamene bua ma sisiti naali.

<sup>30</sup> I du me a nde a ayo me ma pa 'li ma-a, ma apá bha bini li ongú inde ngasuno me ma bhúbhuku-o. <sup>31</sup> A ayo me okpála dhøgø Ebhe inde 'Dyi Ngámá Yesu-o duduma ne duduma. Ani mbila hana me engú inde ma adjí apa e pí yi inde-e, a ko eu de. <sup>32</sup> Yi tsia nga engú inde ngasuno me ma bhúbhuku-o. Ekpí bini, nedhinga ma adu lie bhú gudhu na Damasi-e, ngámá na kuti bhomu-o, adu 'li ani me Alitasi. A adu ka ani ne guvelenele bini inde adu atsia 'kpí li gudhu bhomu-o. Ani a'o nani okpála gba e li okpadji nali bhú gudhu bhomu-o ngú napa me u u ma-a, u de holo ma. <sup>33</sup> Engú bini, okpála gba Ebhe-e ato ma bhú бага, u agbite ekpí tété, u atsia akø ma ne di li malilisa na

aga asa kuti libhomu-o. Ma atsia akobho sakpa ani.†

## 12

*Polo apa 'li e pindji angu inde li Ebhe ngaha e pi ani bhú bhuku gba e-o*

<sup>1</sup> A ayo me ma pa matá 'li ma ne kalanu, abana li tata nde lie tété ade-o. Kaka-a, ma adji nagama 'ngú pindji ongú li Ngámá Yesu asuno e muma, ani atsia ambamba di ta e muma-o. <sup>2</sup> Ma ambila kpála bini\* inde agbite lie li Yesu Kilisito. A ane nga kalanga ndjikpa ne ká badha, Ebhe a'e kpála bhomu-o abhúla agba e, ani atsia agie ani kuto ei. Ma mbila de ne me ani aloto nani maloto, ne me Ebhe a'e ani abhúla na paká. Ebhe ambila bha ngae, ma mbila naama de. <sup>3</sup> Ma apa matá ne toto, ne me ani aloto maloto, ne me Ebhe a'e ani abhúla na paká. Ma mbila de, Ebhe ambila bha ngae.

<sup>4</sup> Ebhe a'e kpála bhomu-o abhú kuti na mundeysi. Oo, ani atsia adje ongú inde li kpála-kuti ti da nakpokpo kú e de. <sup>5</sup> Ma ti da napa 'li ma li 'ngú akolo li kpála bhomu-o. Engú bini, pindji ongú bhe atsia ma makpe-e, ma ti da napa 'li ma bha bini li engú inde ngasuno me engú bhú ma ade. <sup>6</sup> La-a, i dú me ma kúnda napa 'li ma u-o, ma de dú ne bhulu pele de. Padhá de, anga ma de apa kukulu 'ngú. Engú bini, ma kúnda napa 'li ma de, anga ma kúnda de me okpála u ma mugito me ma ne 'ngbé kpála-a de. Ma akúnda mangbo me okpála manga ma ka ongú inde u ngadje ma me ma ngapa e ko.

<sup>7</sup> A ayo nako me 'ndji ma be naali ka ongú na ngangamba inde li Ebhe ambamba ta e muma-o. La-a, ngú napa me 'ndji ma abé naali de-e, Ebhe a'o ehe bini

na ke make li kute ma. Ehe ango-o maka bhulu titima gba Satana. A ngabhi ma, a di ngayoko ma me ma abédhe ne 'ngbé 'ndji bedhe de. <sup>8</sup> Ma ayo ka Ngámá bhutsibhutsi bata me ani gbege ma bhú likabhu bhomu-o. <sup>9</sup> Ani agie muma me: «Ma ngaha bádha bhú 'bu gba ma-a pi mu ngubula me a teteke mu ngú nakibila likabhu bhomu-o. Padhá de, anga nedhinga li kpála nde lie bhubhuku-o, a bhomu-o nedhinga inde li angu gba ma-a ngamene kulu lie bhú kpála bhomu libhomu-o.» I nde lie mo-o, ma akúnda mangbo me ma pa 'li ma li ongú inde ngasuno me ma bhubhuku-o, ngubula me angu gba Yesu Kilisito mene kulu bhú ma.

<sup>10</sup> Kaka-a, ma tété ne djali li nedhinga ma nde lie bhubhuku-o. Abana li okpála sobho ma, abana ma zu likabhu, abana u to mbolo li ma, abana ma kibila olikabhu bhomu-o hana kabula 'li Yesu Kilisito-o, ma tété ne djali, anga nedhinga li angu nde lie bhú ma ade-e, a bhomu-o nedhinga ma nde lie kpekpeke-o.

*Polo alopole lie li 'ngú gba omabhuka na gudhu na Kolito*

<sup>11</sup> Ma agama 'ngú bhomu-o mugito me ma ne bhulu pele. La-a, yi akata ma tété ngayi. A ayo me yi kpo 'ngú gba ma-a ngayi. Padhá de, anga abana ma du ne kpála na padhá-a, me obhende yi nga'i o me a ko ongbengbe obhulu titima bhomu-o, u ne ma ne 'ngbé de. <sup>12</sup> Okulu inde-e ngasuno me ma ne bhulu titima, ma amene bhú ká yi ne 'ndjá bua. Ongú ango-o, a ko ongamba 'ngú inde li Ebhe amene e-o. <sup>13</sup> Ongú bhende ma amene e pi obi yi omabhuka na Dadjua

† 11:33 11:32-33 Tsia bhú Kul. 9:23-25. \* 12:2 12:2 Ngú nambila kpála inde li Polo ngakpo 'ngú gba e si-e, tsia lukuluku 7.



koko me ma nde mene agba yi de-e ngae dho? Belegu de bini! Ehe inde ma mene e agba yi de-e, a ko bha bini ma dha lie bhú yi de-o. Yi suno bádha bhú 'bu muma li siti 'ngú ma amene e li yi bhomu-o!

<sup>14</sup> Mbía inde-e, ma ngakunda nanu agba yi bhútsibhútsi na bata. Abana ma nu agba yi bhú dhuku inde-e, ma dhá bhú yi de. Ma ngakpata mangbo yi, ma kpata tia gba yi-e de. Yi mbila ndjindji me a ayo de me ongisi po tia pi okpála azu o de. A ayo mangbo me odyi ongisi, ne ohi ongisi po tia pi ongisi gba o-o. <sup>15</sup> Li pápá gba ma-a, abana ma pu ndu 'he inde ka ma-a hana ngubula yi, abana ma pu mukobho gba ma-a ngubula yi-e, ma dú bha tété bhú djali. Ma suno mukunda pi yi naali mo-o, yi tsia suno mukunda muma bedi?

<sup>16</sup> Ndu yi hana yi mbila ndjindji me ma dha nako bhú kpála bini bhú ká yi de. Engú bini, okpála koko bhú ká yi ngapa me: «Polo ne bhulu kali! Ani abha tia gba ní-e bhú nyali.» <sup>17</sup> Ma apite yi lele pi? Ma azi yi li kpadji gba saka okpála ma atima o agba yi-e? <sup>18</sup> Ma ayo ka Tito ne kekele me ani nu agba yi. Ma atima di bhú dabili bini ne ani ndai ní inde yi mbila e ndjindji-o. Tito akolo lie agba yi-e, ani aha 'he li yi bhú kali? A mo-o ade! Ehe inde li Tito amene e ne bhende ma amene e-e, aviti bha bini, bua ya ne ani bhú dabili bini.

<sup>19</sup> Nedhinga koko, nayie nani bhutode yi ngabhundja me ya ngagili nabubuku nganda ya bhú djila yi. A mo-o ade! Ya mangbo ngakpokpo 'ngú inde-e kala Ebhe maka li Yesu Kilisito akunda lie-o. Ondaise ya, ya apa ndu ongu bhomu-o hana pi yi, anga ya akunda nateteke yi me yi bhele li kpadji gba Yesu Kilisito-o. <sup>20</sup> Ma

ngakpe me nedhinga koko, li ma akólo lie agba yi-e, ma bhaka me yi ngakobho maka ma akunda lie de. Ma ngakpe di me lele dasundu gba ma-a ngá li yi de. Ma ngakpe me nedhinga ma akólo lie agba yi-e, yi du nagbe bhayiki sunda yi, yi du nadge gumu 'he liyi sunda yi, yi du nake 'ngú liyi sisiti, yi du nagbo busu yi, yi du nasobho li yi sunda yi, yi du napadha liyi sunda yi, yi du nadge kute yi, yi tsia du la di namene engú ngangá.

<sup>21</sup> Ma ngakpe me nedhinga ma agó lie agba yi bhe na sidi-e, Ebhe gba ní-e ha numu muma bhú djila yi. Ma ngakpe me ma ku 'gbá ka okpála bhelé inde ngamene siti 'ngú ne kalanu maka nako u adu namemene lie kalanu-o. Okpála ango-o, u dji nga bua o ne toto li namene siti 'ngú de, u ngakunda olisi, i du di-e obhosi ngangá, u ngamene ndu sisiti 'ngú hana.

## 13

*Polo agbele 'dje omabhuka na gudhu na Kolito ne toto*

<sup>1</sup> A inde-e bhútsibhútsi na bata me ma go agba yi. A maka u aye lie bhú Bhuku gba Ebhe-e me: «Li kpála pa 'ngú li kilí e, a ayo mbo me okpála bhisi, i du di-e okpála bata de lu pí 'ngú ango-o. I du mo-o de, u kódkho 'ngú tété de.†» <sup>2</sup> Nako ma ago lie agba yi bhútsibhútsi na bhisi-e, ma agbele 'dje okpála inde adu namene siti 'ngú-o bhú dabili bini ne okpála koko hana. Mbía inde-e, ma nde lie tsutsu-o, ma matá ngagbele 'dje uo ne toto me nedhinga ma agó matá lie agba yi-e, ma djé ndjinga kpála bini bhú ká uo de.

<sup>3</sup> Yi ngagili me yi u ehe inde ngasuno me Yesu Kilisito ngagama 'ngú bhú ma ngae-o. Ma asúno

† 13:1 13:1 Tsia bhú Det. 19:15; ne bhú Mat. 18:16; ne bhú 1 Tim. 5:19; ne bhú Ebe. 10:28; di ne bhú 2 Kol. 12:14.

pí yí masuno. Yesu Kilisito bhú ká yí bhúbhukú ade. Engú bini, aní ngasuno angu gba e bhú ká yí. <sup>4</sup> A na paká me nedhinga u abhi aní ne nyeli lie lí kulusi-e, angu dú bhú aní de. Engú bini, mbia inde-e, aní bhú mukobho ka angu gba Ebhe. Maka ya akpõtse liya lie ne ani-e, ngaya di-e, ya bhúbhukú maka aní adú naní lie-o. Engú bini, ya akpõtse liya lie ne aní bhú mukobho gba e-e, lele nalíli okpála ka ya bhú ka yí adú bhadi ne angu gba ani-o.

<sup>5</sup> Yí tsia bua yí ngayi makpe ngú nambíla me yí ngakobho maka omabhuka na paká. Yí mbíla ndjindjí me Yesu Kilisito bhú ka yí. A mo-o adí? I dú mo-o de-e, u ú ehe inde ngasuno me yí abhuka de. La-a, a ko líkabhu i dú me aní nde bhú yí ade-o. <sup>6</sup> Engú bini, ma abhundja me yí mbíla ndjindjí me, pí ya-a, okpála tí da nau ehe inde asuno me ya ne kúkúlu obhúlu titima gba Yesu Kilisito.

<sup>7</sup> Ya ngayo Ebhe me yí améne siti 'ngú bini de ne nayala me ya lí yí. A ko de me ya ngakúnda bhómú-o nasuno me angu ya akolo de. Engú bini, ya ngakúnda mangbo me ya dú nau yí namene bádha 'ngú, abana i dú me a nde ngau lie me angu ya kolo de-o. <sup>8</sup> Padhá de, anga ya tí da nagú yí de, i dú me yí nde ngakpata nasuno na kúkúlu gba Ebhe-o. I dú me yí nde amene mo-o, a ayo mangbo me ya teteke yí ngú nanu ne kalanú. <sup>9</sup> Ya ngakpi djali ndú 'kpí hana nedhinga lí ngaya-a, ya nde lie mandí angu, me a nde la bhú yí ne angu-o. Kaka-a, ya ngayo di bhú omayo gba ya-a me yí kolo ngbingbili ne ndú kpadjí hana. <sup>10</sup> Ka 'ngú angoo, ma ngaye ndú 'ngú bhómú-o hana pí yí nedhinga ma nde lie bhú ká yí ade-o. A ko ngubula me nedhinga ma akólo lie bhú

ká yí-e, ma améne yí kpekpeke de ne angu lí Ngámá Yesu aha e muma-o. Angu angoo ngateteke yí me Dadjua gba yí-e be ndú e ne kalanú, a ngubula nabhóbhóle mabhóle ade.

<sup>11</sup> Ngú nabu tata-a, ondaise ma, yí bedhe ne djali bedhe. Yí mene kulu ngú napa me yí dú ngbingbili ne ndú kpadjí hana, yí to masi bhú yí sunda yí, yí dú bhú nadjé líyí sunda yí, yí dú ne guo 'ngú sunda yí. Yí mene mo-o, Ebhe inde ne Ebhe na mukúnda di ne guo 'ngú-o tsia dú ne yí bhú dabilí bini. <sup>12</sup> Yí yí líyí sunda yí ne nakama líyí maka ondaise. Ndú ondaise ní inde ei-e hana apa me o yí yí ma yí. <sup>13</sup> A ayo me bádha bhú 'bu gba Ngámá Yesu Kilisito, ne mukúnda gba Ebhe, la di ne nakpõtse lío gba Bu Bhobua-a dú bhú dabilí bini ne ndú yí hana.

## Balua gba Polo pi omabhuka na gudhu na Galate Eli na kalanu

Li okpála inde ne omaYuda ade aholo aziba Bádha Ngali lie-e, abhomu-o, u atsia ayi ngú nambila me: ngú nakolo makilisito na kukulu-o, a ayo bha me kpála mene líli gba Moidje-e ? Polo atsia apa me a mo-o ade. Padhá de, anga engú na ngbéngbé inde bhú mukobho gba makilisito, a ko nabhuka inde li ndu okpála hana akolo ngbingbili kala Ebhe ka e-o. La-a, okpála koko adu agu Polo, u atsia adu apa me, a ayo me u mene di líli gba Moidje ngubula me u kolo ngbingbili kala Ebhe. Balua inde li Polo aye e pi okpála na Galate-e, ani aye nani ngubula me okpála inde ambu li kpadji ka omusuno na eu bhomu-o, u sia nabhuka na kukulu, amba u kolo la di li bádha kpadji. Polo aholo nakpokpo lele maka a ayo lie me u 'i ani me bhulu titima gba YesuKilisito . Ani atsia agama 'ngú pindji ngú napa me e'i ango-o ngú napa me ni kolo bhulu titima gba Yesu-o, ayie ka Ebhe, ayie ka angu gba kpála na doto belegu de bini. Ani atsia apa me kulu gba ni-e atsia naali okpála inde ne omaYuda ade-o. Bhú oalo na soso-o, Polo ngasuno me nabhuka bhú Kilisito ngaha mukunda, mukunda ngaha la di nadholo ndjindji bhú mukobho gba makilisito.

### Ongbengbe ongú inde bhú bhuku inde-e ngae inde:

Eli na kalanu 1:1-10

Angu gba Polo maka bhulu titima gba Yesu 1:11 – 2:21

Bádha Ngali na bádha bhú 'bu gba Ebhe 3:1 – 4:31

Nadu bhú ngu e gba makilisito a la di-e kulu gba ani 5:1 – 6:10  
Eli na soso 6:11-18

*Polo yi omabhuka na ndu doto na Galatia mayi*

<sup>1</sup> Ma aye balua inde-e ngama Polo, ma ne bhulu titima gba YesuKilisito . Ma ne bhulu titima gba kpála koko ade. Yesu Kilisito atima ma ngae, a la di-e 'Dyi ani inde azuku ani bhú ká okpála inde amu-o. <sup>2</sup> Ngama bhú dabili bini ne ndu ondaise ní hana inde ei-e, ya aye balua inde-e pi omabhuka na oDadjua gba Ebhe inde bhú ndu doto na Galatia. <sup>3</sup> A ayo me 'Dyi ní Ebhe bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú pi yi. <sup>4</sup> Yesu Kilisito andala 'kpa lie ngae makpe, ngubula nagbegbe ní bhú siti 'ngú gba ní, amba osisiti 'ngú na doto améne matá ehe bini ngú ní de. Ani amene mo-o nakpata lele maka li Ebhe 'Dyi ní akunda lie-o. <sup>5</sup> A ayo me okpála dhogé Ebhe duduma ne duduma. A adu moko!

*Koli Bádha Ngali gba Yesu Kilisito-o bha bini*

<sup>6</sup> Ma ngangamba ka yi naali! Ebhe abhu yi me yi du ne okpála gba ni-e li kpadji gba Yesu Kilisito, ani atsia asuno bádha bhú 'bu gba e pi yi. La-a, belegu mo-o, yi akolo adji 'ngbu yi li ani má gala, yi atsia aholo nadje Bádha Ngali koko. <sup>7</sup> A la na paká me Bádha Ngali koko matá ade. Engú bini, okpála koko ngangbingi 'ndji yi. U ngakunda nasiti Bádha Ngali gba Kilisito-o. <sup>8</sup> I du me kpála koko, i du di-e ya, i du di-e suka andjelu bini ayie abhú lá nde akpokpo Bádha Ngali koko kpí ne bhende ya akpokpo e pi yi-e, Ebhe de tu pedjé li ani. <sup>9</sup> Ya apa, ma la matá mbia inde-e ngapapa me, i du me kpála koko

nde akpokpo Bádha Ngali kpí ne bhende yi asia e-e, Ebhe de tu pedjò li ani.

<sup>10</sup> La-a, yi abhundja naayi me ma ngagili me okpála ziba ma? A mo-o ade, ma akunda mangbo me Ebhe ziba ma ngae. Yi abhundja naayi me ma akunda nanga li okpála? A mo-o ade. Í dú me ma kunda matá nanga li okpála-a, ma de ne bali gba Kilisito ade.

*Polo akpokpo lele maka ani akolo lie bhulú titima gba Kilisito-o*

<sup>11</sup> Ondaise ma, ma akunda me yi mbila me Bádha Ngali inde ma ngakpokpo e, yie ka kpála-kuti de. <sup>12</sup> Ma sia ka kpála-kuti de, kpála bini suno la di muma ngae de. Engú bini, Yesu Kilisito ambamba ta 'ngú inde awo lie mawo-o muma ngae. <sup>13</sup> Yi mbila lele nadholo gba ma nani na kalanu-o, nedhinga ma adu nakpata dasundu na Ebhe gba omaYuda lie hana. Li nedhinga bhomu-o, ma adu nato mbolo li omabhuka na Dadjua gba Ebhe-e nane dada mane. Ma adu nakunda nabhohohole mabhohole. <sup>14</sup> Ma ane nani omaYuda bhelé, inde adu ne kalanga maka ma bhú lele nakpata dasundu gba omaYuda-o. Ma aha nani lima libhomu ngubula dasundu gba ongu ogbi ní-o.

<sup>15-16</sup> Belegu inde lie mo-o, Ebhe abhu nani ma. Ani abhu nani ma me ma nde ngabha bhú 'bu 'hi ma. Ani asuno nani bádha bhú 'bu gba e muma, ani atsia a'i ma me ma mene kulu gba ní-o. Li nedhinga ani a'o nani e akolo lie, ani atsia amene me ma mbila Ndili gba ni-e, ngubula me ma kpokpo Bádha Ngali gba ani-e pi okpála inde ne omaYuda ade-o. Li nedhinga bhomu-o, ma nu bhaka kpála bini de. <sup>17</sup> Ma nu la di bhú Yelusalema ngú nabhaka okpála inde adu

nani obhulu titima gba Yesu Kilisito muma kalanu-o de. Engú bini, ma anu bha kolo má gala bhú Alabia, pipita-a, ma agie lima bhú Damasi. <sup>18</sup> Pita kalanga bata-a, ma atsia anu bhú Yelusalema ngubula me ya u li ya ne Piele\* bhutsibhutsi na bini. Ma adu agba ani ngubula 'kpí ndjikpa ne ká bhuluvue. <sup>19</sup> Ma u bhulu titima koko bini de, ma au bha bini Djaki, ndai Ngámá. <sup>20</sup> Engú inde ma aye e inde-e, a ko kukulu 'ngú, kala Ebhe-e, ma apa eu de.

<sup>21</sup> Pipita-a, ma atsia anu bhú ndu doto na Silia di ne ndu doto na Silisia. <sup>22</sup> Omabhuka na oDadjua gba Kilisito na ndu doto na Yudaya u nga nani ma ne djila o de. <sup>23</sup> U adu bha nadje ongu inde li okpála koko adu napa e li 'ngú gba ma-o. U adu napa me: «Kpála inde adu nako nato mbolo li ya kalanu-o ayipa, ani ibili mbia inde-e ngakpokpo pi okpála Bádha Ngali inde ani adu nako nakunda nabhohole e-o.» <sup>24</sup> Abhomu-o, u atsia adu nadhoge Ebhe kabula ma.

## 2

*Polo agama 'ngú ne obhelesi okpála bhú gudhu na Yelusalema*

<sup>1</sup> Pita kalanga ndjikpa ne ká badha-a, ngaya ne Balanabasi, ya anu matá bhú gudhu na Yelusalema. Ma atsia aha di Tito bhú dabili bini ne ma. <sup>2</sup> Ma anu maka li Ebhe asuno muma lie mbámbá me ma nu-o. Ma akolo lie, ngama bhú dabili ne obhelesi okpála-a, ya apokobho bhúla ya li ngongo. Abhomu-o, ma atsia akpokpo kú Bádha Ngali inde ma ngakpokpo e-e pi omupagano-o pi uo. Ma du nakunda de me kulu inde ma amene e ne bhe ma nde ngamane e-e du padhá-a de.

\* 1:18 Bhú eli na giliki-e, Sefasi-e: A ko 'ili koko gba Piele.

<sup>3</sup> Tito ya adu ne e adu Giliki. La-a, u pa pi ani de me ani li gandja-a de. <sup>4</sup> Engu bini, omabhuka na eu ali bhú ká ya, u atsia adu napa me, a ayo me ani li gandja. Okpála ango-o ali bhú pepe ngu natsia lele maka ya nde lie matá sa líli ade-o, anga ya akpɛtsɛ liya ne Yesu Kilisito . U ngakunda me ya kolo matá obalise na líli gba Moidje-o . <sup>5</sup> Ya 'o belegu nedhinga pi uo bedi de ngubula me ya lila kukulu 'ngu na Bádha Ngali-e pi yi malila.

<sup>6</sup> Engu bini, obhende li okpála ngau o bhú djila o maka ongámási na Piga gba Ebhe-e, muma-a, a ko 'ngbé 'ngu naali de. Padhá de, anga Ebhe tsia bhúla kpála de. Ongbengbe okpála bhomu-o, nedhinga ma akpokpo Bádha Ngali inde ma ngakpokpo e pi okpála lie pi uo-o, u 'o 'ngu koko pépé de. <sup>7</sup> Engu bini, u au me Ebhe a'o mangbo kulu na nakpokpo Bádha Ngali-e pi okpála inde ne omaYuda ade-e pi madhaka ma, maka ani a'o nani bhende nakpokpo Bádha Ngali pi omaYuda lie pi madhaka Piele-o. <sup>8</sup> Padhá de, anga u atsia ambila me a ko bha koli Ebhe bini inde nani aha ngu pi Piele, atsia atima ani agba omaYuda-o. Ebhe ango-o aha di angu muma, ani atsia atima di ma agba okpála inde naao ne omaYuda ade-o.

<sup>9</sup> Djaki ne Piele di ne Djaa inde li okpála adu nau o maka onepanda-a, ambila me Ebhe asuno bádha bhú 'bu ango-o muma na paká. Abhomu-o, u atsia aholo 'kpa ya ne Balanabasi. Bhobhomu-o asuno me ya akpɛtsɛ liya ne uo bhú dabilí bini. Ya atsia adje liya ne uo ndu ya hana me, ngaya-a, ya anu naaya namene kulu agba okpála inde naao ne omaYuda ade-o. La ngauo-o, u anu naao

namene kulu agba omaYuda. <sup>10</sup> U apa bha pi ya koli engu bini. U apa pi ya me ya teteke obhulu ndibhili inde bhú ká omabhuka inde abhú Yelusalema-o. A la bhadi bhomu-o engu inde ma amene e ne bua ma bini-o.

*Polo ambe bhú 'ndji Piele bhú Atiokia kala okpála*

<sup>11</sup> Li Piele† ago bhú Atiokia lie, ma ambe bhú 'ndji ani kala okpála. Padhá de, anga ani amene pulu 'ngu. <sup>12</sup> Kala me okpála li Djaki atima o kolo-o, Piele adu nazu 'he ne okpála inde ne omaYuda ade-e bhú dabilí bini. Li okpála ango-o akolo lie, Piele agbe lie bhú ká uo, ani za matá 'he ne okpála bhende ne omaYuda ade-e de. Padhá de, anga ani adu nakpe okpála inde adu akpata líli nali gandja-a makpe. <sup>13</sup> Ndu omaYuda koko hana adu di namene maka Piele. Abhomu-o ngaani Balanabasi, ani amene bhadi engu na kali maka uo. <sup>14</sup> Li ma u lie me u dhuku li kpadji na ngbingbili, na kukulu Bádha Ngali-e de-e, ma atsia apa pi Piele me: «Mu ne maYuda, mo omene la 'ngu maka kpála inde ne maYuda ade. I nde lie mo-o, lele pi mu ngagbite okpála bhende ne omaYuda ade-e lie ne kpéke me u du namene e lío maka omaYuda?»

*A ayo nabhuka Kilisito ngubula nasia mukobho*

<sup>15</sup> Ngani-e, ní azu liní omaYuda, ní ne okpála na kuti koko ade, inde i mbila líli gba Ebhe-e de-o. <sup>16</sup> Ní mbila ndjindji me kpála inde ngbingbili bhú djila Ebhe-e, a ko kpála bhende abhuka Yesu Kilisito, a ko bhende ngamene líli gba Moidje-e de. Ngani di-e, ní abhuka Yesu Kilisito ngubula me ní kolo ngbingbili kala Ebhe ka nabhuka gba ní bhú Yesu Kilisito-o. A ko ka de me ní ngamene líli

† 2:11 2:11 Tsia bhú Gal. 1:18, 2:9, 14.

gba Moidje-e de. Padhá de, anga kpála bini ti da nakolo ngbingbili kabula namene líli de.

<sup>17</sup> Engú bini nganí-e, ní ngagili nadu ngbingbili kala Ebhe, anga ní abhuka Yesu Kilisito. Ní ngamene lie mo-o, ní maka okpála na sisiti. Bhobhomu-o akunda napa me Kilisito ngato ní bhú siti? A mo-o ade! <sup>18</sup> Ɔ du me ma nde akoto sa líli-e, pípita-a, ma gie matá lima sasa-a, ma akolo matá bhomu-o ngama makpe kpála inde i manga líli-e de. <sup>19</sup> Lí bhende atsia líli-e, ma akpi kuo inde ayie ka líli makpe ngabula me ma du bhú mukobho pí Ebhe. U agi nani ya bhú dabili bini ne Kilisito lí kulusi. <sup>20</sup> Kaka-a, mukobho inde ma nde bhú e-e, a ko matá ma de, Kilisito ngakobho bhú ma ngae. Padhá de, anga mukobho ma nde ne e bhú kate inde-e, ma bhúbhú anga ma abhuka Ndili gba Ebhe inde akunda ma, ani atsia andala di kpa lí mukobho gba e mama. <sup>21</sup> Ma yala bádha bhú 'bu gba Ebhe-e de. Ɔ du me kpála nde ngbingbili kala Ebhe anga ani ngamene líli-e, bhobhomu-o akunda napa me tata lí nakpi gba Kilisito-o ade.

### 3

*Ebhe ngakobho okpála lí pápá na nabhuka*

<sup>1</sup> Ngayi okpála na Galatia, yi ne ongingi! Apite yi da? U akpokpo pí yi mbámbá lele maka lí Yesu Kilisito akpi lie lí kulusi-o. <sup>2</sup> Ma ngayi yi lí koli engú bini. Bu Bhobua inde lí Ebhe aha e pí yi-e, ani aha pí yi anga yi sa líli gba Moidje? Ne me ani aha pí yi anga yi adje, yi atsia abhuka la di Bádha Ngali-o. <sup>3</sup> Lele pí yi nde lie ne ongingi-e? Lí lilita-a, yi akpo nani ne angu gba Bu Bhobua. Lele

pí, yi ti da nabu tata lie ne angu gba kpála-kuti-e? <sup>4</sup> Engú apu pí yi bhelé. Yi abhundja naayi me a padhá? Ma abhundja naama me a padhá ade. <sup>5</sup> Ebhe ngaha Bua gba e pí yi, ani di ngamene ngamba 'ngú bhú ká yi. Ani ngamemene anga yi sa líli gba Moidje? Ani ngamemene anga yi adje, yi atsia abhuka la di Bádha Ngali-o?

<sup>6</sup> Abalahama abhuka nani Ebhe. Kaka-a, Ebhe atsia au ani bhú djila e me a ko ngbili kpála. <sup>†</sup> <sup>7</sup> A ayo me yi mbila ndjindji me, okpála abhuka Ebhe-e ne kakulu ongisi gba Abalahama-a ngao. <sup>8</sup> U aye nani didili bhú Bhuku gba Ebhe-e me, okpála inde ne omaYuda ade-e, Ebhe aú uo ngbingbili bhú djila e ka nabhuka gba o-o. Kaka-a, Ebhe akpokpo nani Bádha Ngali inde-e pí Abalahama didili me: «Ma atúko bisagu pí ndu okpála na píla doto hana kabula mu.†» <sup>9</sup> Abalahama abhuka nani Ebhe, abhomu-o, Ebhe atsia atuko bisagu pí ani. Okpála inde abhuka Ebhe-e, ani atúko bhadi bisagu pí uo maka ani.

<sup>10</sup> La pí okpála bhende ngab-hundja me o du ngbingbili kala Ebhe anga o ngamene engú inde lí líli ngapa e, mangimbo gba Ebhe-e pí uo. Padhá de, anga Bhuku gba Ebhe-e apa me: «Ndu kpála hana inde i líli líli inde u aye e bhú bhuku-o ndu nedhinga hana de-e, a ayo me u tu pedje lí ani.†» <sup>11</sup> A mbámbá me, kpála ngakolo kala Ebhe ngbing-bili anga ani ngamene líli-e de. Ní ambila bhobhomu-o anga Bhuku gba Ebhe-e apa me: «Kpála inde ngbingbili kala Ebhe ka nabhuka-a, a kóbho makobho.†» <sup>12</sup> La-a, líli dha bhú nabhuka de. A la di maka engú inde u aye e me: «Kpála inde

† **3:6** 3:6 Tsia bhú Dje. 15:6. † **3:8** 3:8 Tsia bhú Dje. 12:3, 18:18, 22:18. † **3:10** 3:10 Tsia bhú Det. 27:26. † **3:11** 3:11 Tsia bhú Abk. 2:4. † **3:12** 3:12 Tsia bhú Lev. 18:5.

ngamene onǵú inde li líli-e ngapa e akóbhho kaka.†»

<sup>13</sup> Kilisito agbegbe ní sa pǵdǵo na líli-o. Abhomu-o, pǵdǵo angoo atsia ati pí ani bhú da ní. Padhá de, anga u aye bhú Bhuku gba Ebhe-e me: «Kpála inde u agi e li ndula-a, a ayo me pǵdǵo tí pí ani.†» <sup>14</sup> Amene lie mo-o ngubula me bisagu nani li Ebhe apa me ni ahá e pí Abalahama-a, okpála inde ne omaYuda ade-e sia di li kpadji gba Yesu Kilisito. A ko la di me li pápá na nabhuka-a, ní sia Bu Bhobua inde li Ebhe apa nani me ni ahá e-o.

*Ebhe ngakobho okpála bhú gandja ani akodho e ne Abalahama-o*

<sup>15</sup> Ondaise ma, ma ngaha kukulu pí yi li engú inde ní auu e píko píko-o. † du me kpála bini nde apa ne bua e hana me ni améne engú inde ni abhundja namene e-e, † du la di me ongámási nde aziba engú angoo, kpála bini tí da nabhǵbhǵ de, ani 'ó la di engú koko pépé de. <sup>16</sup> Ebhe apa nani me ni améne 'ngú pí Abalahama, di ne pí ndili inde akóto bhú piga gba ani. Bhuku gba Ebhe-e pa de me: «pí ongisí inde azé bhú piga gba mu», mugito me a ko okpála bhelé-e de. A apa me: «ne pí ndili inde akóto bhú piga gba mu†», ngú nasuno koli kpála bini inde Kilisito.

<sup>17</sup> Engú inde ma ngakunda napa e ngae inde: Ebhe akodho nani gandja ne Abalahama, ani atsia apa me engú inde ni apa me ni améne e-e, ni améne mamene. Kalanga kámá badha ne ndjikpa bata pipita-a, líli gba Moidje atsia akoto. Líli angoo tí da natu silika nani li Ebhe akodho e ne Abalahama de, a tí la di da nabhǵ

engú inde li Ebhe apa nani me ni améne e pí Abalahama de. <sup>18</sup> † du me Ebhe nde ngamene bádha 'ngú pí okpála anga u ngakpata líli-e, amba a kpata engú inde li Ebhe apa me ni améne e pí okpála-a de. La-a, Ebhe asuno bádha bhú 'bu gba e pí Abalahama, anga ani apa nani me ni améne pí ani mamene.

*Ta líli li Ebhe aha e ne ní?*

<sup>19</sup> Ta líli-e ne ní? Ebhe aha nani líli-e ngubula me ní mbila me siti 'ngú ngae dho-ie. Ani aha nani ngú nadjeko nedhinga inde li Ndili gba Abalahama agó lie-o. A ko kpála inde li Ebhe apa nani me ni améne ehe pí e-o. Ebhe aha nani líli angoo pí okpála li pápá gba oandjelu , u atsia akpokpo 'ngú tété pí okpála li pápá gba bhende adu maka ludu\* sunda Ebhe ne okpála-o. <sup>20</sup> U dudu ne gumu ludu ngubula koli kpála bini de. La-a, Ebhe bha ngae kpi e kpi.

<sup>21</sup> A akunda napa me líli-e ngatu 'ndji e ne engú li Ebhe apa e? A mo-o ade. † dú ne líli inde † tí da naha mukobho na kukulu pí okpála-a, a de tí da namene me u kolo di ngbingbili kala Ebhe. <sup>22</sup> Engú bini, a maka u aye lie bhú Bhuku gba Ebhe-e me, siti 'ngú ako angu e pí ndu okpála na píla doto libhomu. Kaka-a, Ebhe aha ehe inde ani apa me ni ahá e pí omabhuka kabula nabhuka gba o bhú Yesu Kilisito-o.

<sup>23</sup> Nani kalanu me kpadji nde nga ade ngubula me okpála bhuka-a, ní adu maka okpála inde bhú tikpu sa líli, akolo li nedhinga li Ebhe asuno kpadji lie pí ní ngú nabhuka-o. <sup>24</sup> Líli-e adu nani pí ní maka mulila akolo li nedhinga li Yesu Kilisito ago lie-o. A adu mo-o ngubula me ní kolo ngbingbili bhú djila Ebhe, anga ní

abhuka Yesu Kilisito. <sup>25</sup> Mbia inde-e, li kpadji abhulu lie lie me ni bhuka Yesu Kilisito-o, lili-e matá ne mulila gba ní ade. <sup>26</sup> Padhá de, anga ndu yi hana yi ne ongisi gba Ebhe, anga yi abhuka Yesu Kilisito. <sup>27</sup> Ndu yi hana inde asia batisimo bhú Kilisito-o, yi akolo maka ani. <sup>28</sup> Kaka-a, ndu yi hana, yi akolo kpála bini anga yi akpetse liyi ne Yesu Kilisito, maYuda, i du di-e kpála inde ne maYuda ade-e ade. Bali, i du di-e kpála inde ne bali ade-e ade. Bhoko, i du di-e olo ade. <sup>29</sup> I du me yi nde ne okpála gba Yesu Kilisito-o, amba yi ne odi Abalahama. Abhomu-o, yi asia ehe inde li Ebhe apa nani me ni ahá e pi Abalahama masia.

#### 4

*Omakilisito matá bhú bali ade, engú bini, u akolo ongisi gba Ebhe*

<sup>1</sup> Engú inde ma akunda napa e ngae inde: a maka ndili inde asia tia gba 'dyi e-o. Nedhinga ani nde nga bha lie yeye-e, ani maka bali, belegu li ndu 'he hana nde lie naani-o. <sup>2</sup> Nedhinga ani nde nga bha lie yeye-e, okpála dú nalila ani, u tsia dú di natsia 'kpí li ongu gba ani-e akolo li ekpi li 'dyi ani a'o e-o. <sup>3</sup> A bhadi moko, li nedhinga ní adu nani lie maka ongisi-e, ní adu obalise gba osisiti bua inde ngau pila doto-o. <sup>4</sup> Nedhinga inde li Ebhe a'o nani e akolo lie, Ebhe atsia atima Ndili gba e-o. Olo bini azu ani ngae. Ani adu nani sa lili gba omaYuda-a, <sup>5</sup> ngubula me ani kobho okpála bhende adu sa lili-o, amba ní kolo ongisi gba Ebhe.

<sup>6</sup> Ka yi nde lie ne ongisi gba Ebhe-e, ani atima Bua gba Ndili gba e li bua ní. Bua ang-o ngapa me: «Aba, 'Dyi ma!» <sup>7</sup> Bhobhomu-o, akunda napa me, mu matá ne bali na lili gba Moidje ade, engú bini, mo okolo ndili gba Ebhe. Mu

nde lie ne ndili gba ani-e, ani ahá obabadha 'ngú inde ani a'o e pi ongisi gba e pi mu maha.

*Omabhuka na Galatia masikpe de nagie matá lio bhú bali ne toto*

<sup>8</sup> Nani kalanu-o, yi mbila nga nani Ebhe de, yi atsia adu obalise gba oebhe na eu, inde ne okukulu Ebhe ade. <sup>9</sup> Engú bini, la mbia inde-e, yi ambila Ebhe, ne me ani ambila mangbo yi ngae. La-a, lele pi yi ti da matá lie nagie liyi li pápá gba osisiti bua na padhá, inde li angu nde bhú o ade-e, inde li tata nde la di li o ade-e? Ka ni yi akunda matá lie nakolo obalise gba uo-o? <sup>10</sup> Yi aholo matá namene olili inde atsia oekpi, ne oepe, ne onedhinga di ne okalanga. <sup>11</sup> Ma ngadje tsulu me ndala gba ma li ma amene kulu lie pi yi-e anu padhá de.

<sup>12</sup> Ondaise ma, ma ngakilikili lima pi yi me, yi kolo maka ma, anga ma akolo di maka yi. Yi mene siti 'ngú li ma belegu de bini. <sup>13</sup> Yi ambila ndjindji me ma akpokpo Bádha Ngali-e pi yi bhutsibhutsi na bini-e anga adu li ma ne kuo. <sup>14</sup> Kaka-a, a ayo nako me kuo ang-o bu tsulu li yi, amba yi tse la di ma. La-a, yi u ma padhá de, yi tsia tse la di ma de. Yi asia ma maka andjelu gba Ebhe, mugito me yi asia Yesu Kilisito. <sup>15</sup> Li nedhinga bhomu-o, yi adu bhú djali. Akolo li yi ne mangua 'ngú dho? Ma ambila ndjindji me li kpadji dú uu-o, yi de apandja odjila yi, yi tsia há muma. <sup>16</sup> La mbia inde-e, ma akolo bhulu yala gba yi, anga ma ngapa pi yi kukulu 'ngú?

<sup>17</sup> Obhulu eu bhomu-o ngakunda me o gbele yi li pápá gba o, engú bini, ta namene ka uo mo-o ndjindji ade. U ngamene mo-o ngubula me yi dji 'ngbu yi li ma, amba yi gbite liyi li o. <sup>18</sup> A ndjindji ne nagbite lio ndu 'kpí



hana li bádha 'ngú. Yi améne bha bini de me ma nde bhú ká yi-e de. <sup>19</sup> Odi ma, ma matá ngazu likabhu kabula yi ne toto maka ølø inde ngazu. Ma azú likabhu ango-o akólo li nedhinga inde yi akólo lie maka Kilisito-o. <sup>20</sup> Ma ne gumu me ma du de yi mbia inde-e ngubula me ma gama 'ngú pi yi kpi. Padhá de, anga bua ma alu ngú yi abhúlá má gba!

*Agala ne Sala ngasuno lele gandja bhisi gba Ebhe-o*

<sup>21</sup> Yi pa nga mumu, ngayi okpála inde akunda nandu sa líli-o. Yi dje engú inde li líli ango-o ngapa e di? <sup>22</sup> U aye bhú Bhuku gba Ebhe-e me Abalahama azu nani ongisi na bhosi bhosi bhisi. Ani azu bini li Agala, ølø inde adu bhú bali, bhe koko-o, ani azu li Sala, ølø inde i du naae bhú bali de ko. <sup>23</sup> Ndili bhende ani azu e li ølø inde adu bali-e, ani azu ani maka u azuzu kpála-kuti lie-o. La-a, ndili bhende ani azu e li ølø inde i du bhú bali de-e, ani azu ani maka li Ebhe apa nani lie-o.

<sup>24</sup> Engú inde akodho 'kpi li bili bhomu-o ngasuno pi ní engú inde na ngbéngbé, li ta e awo di lie mawo. Olisi bhisi bhomu-o ngasuno gandja bhisi li Ebhe akodho nani e-o. Ølø na kulu, Agala ngasuno gandja inde li Ebhe akodho nani e ne Moidje pí eta na Sinai-o. Ongisi gba Agala nani ne obalise. <sup>25</sup> Agala-a, a ko kulu eta u a'i e me Sinai bhú doto na Alabia. Eta ango-o mbia inde-e maka Yelusalema. Padhá de, anga Yelusalema bhú bali ne ongisi gba e-e hana. <sup>26</sup> Engú bini, Yelusalema na abhúlá-a bhú ngu e. A ko 'hi ní ngae. <sup>27</sup> Padhá de, anga u aye bhú Bhuku gba Ebhe-e me:

«Kpi djali, ngamu i zu de, ngamu ølø inde i zuzu de-o.

Sula ne djali, amba mu tu 'ue,

ngamu ølø inde i dje likabhu nazu de-o!

Padhá de, anga ongisi gba ølø inde li 'ko e ngabhundja e ade-e, adú bhelé ane ongisi gba ølø inde bhú kuvu-o.†»

<sup>28</sup> Ngayi ondaise ma, maka Isaka-a, yi ne ongisi inde u azu o maka li Ebhe apa nani lie-o. <sup>29</sup> Nani li nedhinga bhomu-o, ndili inde u azu e maka u azuzu kpála-kuti lie adu nato mbolo li ndili inde u azu e bhú angu gba Bu Bhobua-o. A bhadi li nedhinga na naki-e moko. <sup>30</sup> La-a, Bhuku gba Ebhe-e apa pi? A apa me: «To holo bhú 'dhu ølø na bali-e bhú dabili bini ne ndili gba e-o. Padhá de, anga a ayo de me ndili gba bali-e sia ohe gba 'dyi o-o bhú dabili bini ne ndili gba ølø inde bhú bali ade-e de.†» <sup>31</sup> Kaka-a ondaise ma, ní ne ongisi gba ølø na bali-e ade, ní mangbo ne ongisi gba ølø inde bhú bali ade ko.

## 5

*Kilisito agbegbe ní bhú bali-e agbegbe*

<sup>1</sup> Kilisito agbegbe ní bhú bali-e agbegbe ngubula me ní du bha ndju bhú ngu ní. Kaka-a, yi lu kpekpeke, yi a'ó matá de me yi gie liyi bhú bali-e de.

<sup>2</sup> Yi djedje! Ngama Polo-o, ma apa pi yi me, i du me yi nde ali gandja-a, Kilisito dú pi yi ne tata de. <sup>3</sup> Ma ngapa matá na paká paká pi ndu obhosi hana inde ali gandja-a me, a ayo me u manga ndu líli-e hana. <sup>4</sup> Ngayi okpála bhende ngabhundja me Ebhe aú yi ngbingbili bhú djila e kabula namanga líli-e, yi agbo bhusu yi ne Kilisito agbo. Bádha bhú 'bu gba Ebhe-e aneke yi aneke. <sup>5</sup> La pi ya-a, ya nga'o 'to ya 'to Ebhe, inde améne me ya du bhú djila

ni ngbingbili ko. A bhomu-o engú inde ya ngadjeke me amene lie má gala li pápá na angu gba Bu Bhobua , inde ngau lie bhú nabhuka gba ya-o. <sup>6</sup> Padhá de, anga pi kpála bhende akpøtsø lie ne Yesu Kilisito-o, nali gandja , i du di-e nali gandja de-e, a pi ani ne tata ade. Engú bini, ehe inde ne tata-a, a ko nabhuka inde ngamene kulu ne mukunda.

<sup>7</sup> Yi akpo lilita ndjindji. A ani kpadji pi yi da me yi amána kukulu 'ngú-o de-e? <sup>8</sup> Engú na sisiti inde u ato e bhú 'ndji yi bhomu-o yie ka Ebhe kpála inde a'i yi-e de. <sup>9</sup> Mboye ku levile\* bedi ngamene me ndu mapa hana fuka. <sup>10</sup> Ngama-a, ma nga'o 'to ma libhomu 'to Ngámá li 'ngú gba yi-o, anga ma ambila na paká me yi bhundja 'ngú koko kpí ne ma de. Engú bini, kpála bhende ngangbingi 'ndji yi bhomu-o abí mangimbo gba Ebhe, belegu i du bha da-ie!

<sup>11</sup> Muma-a ondaise ma, i du me ma nde nga bha matá ngakpokpo 'ngú nali gandja-a, ka ni la u nde ngabha lie ngato mbolo li ma-a? I du mo-o, amba tata li nakpokpo 'ngú pindji nakpi gba Kilisito li kulusi-e ade. <sup>12</sup> A ayo me okpála inde ngangbingi 'ndji yi-e kolo maka oenike.†

<sup>13</sup> Pi yi-e ondaise ma, Ebhe a'i yi me yi adú matá obalise na líli gba Moidje de. Yi nde la lie bhú ngu yi-e, yi adú namene ogumu na sisiti gba yi na kalanu-o de. Engú bini, yi teteke liyi sunda yi ne mukunda. <sup>14</sup> Padhá de, anga ndu líli hana akpøtsø lie bhú koli líli bini inde me: «Kunda kilí mu maka mo okunda limu lie ngamu makpe ko.†» <sup>15</sup> Engú bini, i du me yi nde ngamene liyi maka onu 'te

inde nganunumu lío di ne na'o'o 'ka lío sunda o-o, 'e-e la-e, yi abhíli liyi sunda yi mabhili.

*Yi 'o me Bu Bhobua suno kpadji pi yi ngae*

<sup>16</sup> Ma apa pi yi me, yi 'o me Bu Bhobua suno kpadji pi yi ngae. I du me yi nde amene mo-o, yi kpáta matá ogumu na sisiti gba yi na kalanu-o de. <sup>17</sup> Padhá de, anga ogumu na sisiti gba yi ngagu bhende gba Bu Bhobua-o. Gumu gba Bu Bhobua di ngagu bhende gba ní makpe-o. Ogumu bhomu-o ngatu 'ndji o sunda o, masikpe de napa me yi ti da namene engú inde yi akunda namene e-e de. <sup>18</sup> I du me Bu Bhobua nde ngasuno kpadji pi yi ngae-e, yi matá sa líli ade.

<sup>19</sup> Okulu gba kute ní makpe ngau lie mbámbá. A ngau lie bhú nakunda olisi, i du di-e obhosi ngangá, di ne ogumu ongu koko hana na sisiti. <sup>20</sup> A ko nadhege oebhe na eu, a ko namene engú na kobha. U ngayala lío sunda o, u ngatsi, u ne 'ngbé bua, u ngake 'ngú lío, u bha bini ngabhundja engú gba o makpe. U ngagbogbo bhusu o, u dje lío de. <sup>21</sup> U abedhe ne gumu 'he gba okpála koko bhú o bedhe, u akolo obalise na pandi, a ko obhulu kundu 'zu, u ngamene ongu koko bhelé bhelé maka ongu bhomu-o. Ma ngagbele 'dje yi mbia inde-e maka ma amene lie nako kalanu-o: okpála inde ngamene ongu mo-o, sía dabili bhú Nau gba Ebhe-e de.

<sup>22</sup> Engú bini nguwa gba Bu Bhobua-a, a ko mukunda, djali, guo 'ngú , 'ndjá bua, bádha bua, namene bádha 'ngú, nadu ne kpála inde u ti da na'o 'to o 'to e, <sup>23</sup> nakø lío ne kuto, naholo bua

\* 5:9 5:9 Levile: Ngasuno lele kulu okpála inde apite omabhuka na Galatia-o. † 5:12 5:12 Eniki: A ko bhoko inde i ti da nakunda ølo de, anga angu na bhoko bhú ani ade. Tsia bhú Mat. 19:12. † 5:14 5:14 Tsia bhú Lev. 19:18.

o ka 'ngú maholo. Líli bini yala ongú bhomu-o de. <sup>24</sup> Okpála gba Yesu Kilisito agi ogumu na sisiti gba o-o li kulusi. <sup>25</sup> Bu Bhobua ngaha mukobho pi ní ngae, kaka-a, a ayo me ní 'o me ani suno kpadji pi ní ngae. <sup>26</sup> Ní adú ne 'ngbé 'ndji de. Ní adú nake 'ngú liní sunda ní de. Ní adú la di ne 'ngbé bua sunda ní de.

## 6

*Ní teteke liní sunda ní*

<sup>1</sup> Ondaise ma, i du me kpála bini nde ati bhú siti 'ngú-o, ngayi okpála bhende li Bua gba Ebhe-ende bhú o-o, yi de gie ani li ngbili kpadji ne bádha bua. Kpála ne kpála lila la di lie me ni atí bhú nale de. <sup>2</sup> Yi teteke liyi sunda yi bhú otitili 'ngú inde sunda yi-o. I du me yi nde ngamene mo-o, yi méne líli gba Kilisito . <sup>3</sup> I du me kpála bini nde ngabundja me ni ne 'ngbé kpála, a nde la kpála na padhá-a, amba ani ngapite lie ngae makpe. <sup>4</sup> A ayo me kpála ne kpála tsia lele nadhuku gba e ngae makpe. I du me a nde ndjindji-e, ani tsia kpí djali li kulu gba e-o. Ani kpí djali de me anga ni akpo 'ndji ni ne kpála koko de. <sup>5</sup> Padhá de, anga a ayo me kpála ne kpála bi titili 'ngú gba e-o.

<sup>6</sup> Kpála inde u asuno eli gba Ebhe-e pi e-e, a ayo me ani gbogbo bhusu tia gba e ne masuno gba e-o.

<sup>7</sup> Yi apite liyi de, u mumu Ebhe de. Kpála asía bha bini nguwa inde ani alu e-o. <sup>8</sup> I du me ani nde ngamene 'ngú maka li ogumu na sisiti ngatima ani lie-e, nguwa inde ani asía e-e, a dú kuo. Engú bini, ani mene engú inde nganga li Bu Bhobua-a , nguwa inde ani asía e-e, a dú mukobho na duduma. <sup>9</sup> Ní andála li namene babadha 'ngú de. Padhá de, anga ní zi kekele tété nakolo ali soso-o, ní

sía nguwa gba ní-e li nedhinga ango-o. <sup>10</sup> Kaka-a, i du me kpadji nde u-o, a ayo me ní mene bádha 'ngú pi ndu okpála hana, a ne la mane pi ondaise ní bhende bhú 'bu nabhuka ko.

*Polo ngaha olíli na soso*

<sup>11</sup> Engú inde ma aye e pi yi mbia inde-e, ma aye ne 'kpa ma makpe, maka yi ngauu lie ne ngbengbe djila balua-o. <sup>12</sup> Okpála inde ngaholo yi ne kpéke me yi li gandja-a, a ko okpála inde ngakunda nanga li okpála. U ngamene mo-o ngubula me okpála ató mbolo lio kabula kulusi gba Kilisito de. <sup>13</sup> Okpála inde ngali gandja bhomu-o ngamanga líli ade. Uo ngaholo yi ne kpéke me yi li gandja, amba u bhi 'kpa o pí mbulu o me o to yi bhú gandja ne kpéke.

<sup>14</sup> La muma-a, ma ngabhi bha bini 'kpa ma pí mbulu ma kabula kulusi gba Ngámá gba ní Yesu Kilisito-o. Padhá de, anga li pápá na kulusi-e, ma au ongu na doto maka ehe na kukuo, la di-e, ma maka kpála inde akpi bhú ongu na doto akpi. <sup>15</sup> Kaka-a, nali gandja , i du di-e nali gandja de-e, tata tété ade. Engú inde ane mane-e, a ko mangbo me Ebhe dji kpála, amba ani kolo kpála na mbia. <sup>16</sup> Pi ndu okpála hana inde ngakpata engú inde ma ngasuno e-e, a ayo me Ebhe ha guo 'ngú pi uo, amba ani dje di ndjinga uo bhú dabili bini ne omaf salaele na kukulu, inde okpála gba Ebhe ko.

<sup>17</sup> Nayie pi mbia inde-e, a ayo de me kpála bini 'o matá lungalu kala ma li 'ngú bini-e de. Padhá de, anga opokoli inde li kute ma inde-e ngasuno me ma ne kpála ka Yesu.

<sup>18</sup> Ondaise ma, a ayo me bádha bhú 'bu gba Ngámá gba ní Yesu Kilisito du bhú dabili bini ne ndu yi hana. A adú moko!

## Balua gba Polo pi omabhuka na gudhu na Efeso Eli na kalanu

Balua inde li Polo aye e pi omabhuka na Efeso-o, ngatsia ngaiza kalanu engu inde pindji mabhundja gba Ebhe, ngubula napo bhula ndu oeha hana inde ani abho e, ohe inde na abhula ne bhe na pala doto bhú dabili bini ne Kilisito maka ndjindji-o (1:10). Ani nga'i okpala gba Ebhe me u du akobho li lele mabhundja na ngbengbe bhomu inde pi ndu okpala hana bhú nakpøtø lio ne Kilisito.

Bhú balua inde ane okulu oeha bhele inde ngasuno me, okpala gba Ebhe ngadu bini bhú makpøtø bhú dabili bini ne Kilisito: Piga gba Ebhe maka kute kpala inde li Kilisito nde ne 'ndji e. A di maka eti inde li Kilisito nde ne nepanda na e-o. A la mata di maka ølø inde li Kilisito nde maka ko e-o. Bhú nagama ongu gba Polo pindji mabhundja na badha bhú 'bu gba Ebhe inde bhú Kilisito-o, a ne oeli bhende ngatu kpala, a la di ne oeli inde nga'e bua kpala abhula ma gba! Ndu 'ngu bhomu-o hana ngau lie li zi 'kpi na mukunda gba Kilisito, bhú makiso, bhú mambu, bhú badha bhú 'bu, a la di-e bhú navulu lio.

**Ongbengbe ongu inde bhú bhuku inde-e ngaie inde:**

Eli na kalanu 1:1-2

Kilisito a la di-e Dadjua gba

Ebhe 1:3 - 3:21

Mukobho na mbia bhú Kilisito

4:1 - 6:20

Eli na soso 6:21-24

*Polo yi omabhuka na Efeso mayi*

<sup>1</sup> Ngama Polo, ma ne bhulu titima gba YesuKilisito, anga Ebhe akunda mo-o. Ma aye balua inde e pi okpala na bububu gba Ebhe inde bhú gudhu na Efeso, inde abhuka la di Yesu Kilisito-o. <sup>2</sup> A ayo me Ebhe 'Dyi ní, ne Ngamá gba ní Yesu Kilisito, suno badha bhú 'bu gba o-o pi yi, amba u ha di guo 'ngu pi yi.

*Ebhe atuko bisagu pi ní bhú makpøtø gba ní ne Yesu Kilisito*

<sup>3</sup> Ní dhøgø Ebhe, 'Dyi Ngamá gba ní Yesu Kilisito-o! Ani atuko bisagu pi ní bhú nakpøtø liní ne Yesu Kilisito, anga ani aha ndu bisagu hana na bhobua na abhula-a pi ní. <sup>4</sup> Kala me Ebhe bho doto-o, ani abhu nani ní bhutode ngubula me ní du ne okpala gba ni li papa gba Kilisito, amba ní du ne okpala inde bubu, u ti da nau siti 'ngu napapa li o de. Padha de, anga ani akunda ní. <sup>5</sup> Kaka, nayie nani bhutode naali-e, ani amene me ní kolo ongisi gba ni li papa gba Yesu Kilisito. A bhomu-o engu inde ani amene e pi ní bhú badha bhú 'bu gba e-o. <sup>6</sup> Ní toko sangu gba Ebhe ngubula badha 'ngu inde ani amene e pi ní ne badha bua gba e, anga ani akunda me amene lie mo-o bhú Ndili gba e na mukunda-o.

<sup>7</sup> Padha de, anga bhú nakpøtø liní ne Yesu-o, Ebhe agbegbe ní bhú siti 'ngu ka ngute ani. Ani atsia ambu li siti 'ngu gba ní-o. Ebhe asuno pi ní bhomu-o tia inde bhú badha bhú 'bu gba e, <sup>8</sup> inde ani aha e me a nde abedhe bedhe-o. Ani atsia aha di ndu imbilangu hana pi ní. <sup>9</sup> Ani asuno engu gba e inde awo lie mawo-o pi ní. Engu inde bhú badha bhú 'bu gba e inde ani apa nani bhutode me ni amene e bhú Kilisito-o. <sup>10</sup> Engu inde ani apa me ni amene e li nedhinga ani a'o e-e, a ko nakpøtø ndu 'ngu hana inde

abhúlá, ne bhende pílá doto-o sa koli Ngámá bini, Kilisito.

<sup>11</sup> Bhú nakpɛtɛɛ liní ne Kilisito-o, ní asia ehe inde li Ebhe apa nani me ni ahá e pi ní-o. Padhá de, anga Ebhe alo nani ní kalanu didili naali maka ani akunda lie-o. La di-e, ani ngamene ndu 'ngú hana maka ani akunda nani lie, di ne maka ani apa lie-o. <sup>12</sup> Kaka-a, a ayo me ní toko sangu gba Ebhe, nganí okpála inde a'o 'to o nani bhútode bhú Kilisito-o.

<sup>13</sup> Ngayi di-e, li yi adje ngali na kukulu 'ngú-o lie, Bádha Ngali inde aha mukobho pi yi-e, yi atsia abhuka Kilisito. Abhomu-o, Ebhe atsia atu kasé inde ngasuno me yi ne ongisi gba ni-e li kute yi, li ani aha Bu Bhobua inde ani apa nani me ni ahá e pi yi-e lie-o. <sup>14</sup> Bu Bhobua angoo ne ehe na kalanu bhú ka obabadha 'ngú inde li Ebhe aleke e pi omaha e-o. Ani ngapa pi ní me ní asia ongu angoo masia li nedhinga li Ebhe agbégbé ní lie bhú siti 'ngú gba ní hana-o. Kaka-a, ayo me ní toko sangu gba Ebhe.

#### *Polo ayo Ebhe ngú omabhuka*

<sup>15</sup> Kaka-a, mbia inde-e, li ma adje lie me yi abhuka Ngámá Yesu-o, di ne me yi ne mukunda pi ndu omabhuka hana-a, <sup>16</sup> ma'o nagie heni pi Ebhe li 'ngú gba yi-e de. Ma ngabhundja yi bhú omayo gba ma-o. <sup>17</sup> Ma ngayo ka Ebhe gba Ngámá gba ní Yesu Kilisito, 'Dyi ní na asasaua me ani ha bua na imbilangu pi yi. Bua angoo asúno Ebhe pi yi mbámbá, ani tsia méne di me yi mbila ani na paká paká. <sup>18</sup> Ma ngayo me ani bhulu imbilangu gba yi ngú nambila obabadha 'ngú inde ani apa me ni ahá e pi okpála bhende ani a'i o-o. Ma la di ngakunda me yi mbila tia di ne sangu inde bhú obabadha 'ngú inde ani aleke e pi okpála gba e-o.

<sup>19</sup> Kaka-a, yi ambíla angu na kuo kuo inde ani nde ne e pi ní omabhuka-o. Angu angoo, a ko bhende li Ebhe asuno e na paká paká, <sup>20</sup> nedhinga li ani azuku Yesu Kilisito lie, ani atsia a'o ani li pá 'kpa e na kokpa abhúlá-o. <sup>21</sup> Oo, ani a'o Kilisito pí 'ndji ndu obua hana, pí 'ndji ndu obua hana na angu, pí 'ndji ndu obua hana na kpekpeke ne pí 'ndji ndu o'ili hana inde u ti da na'i e bha bini naki de, engú bini, inde u ti da di na'i e bhú oekpí inde ngago ko. <sup>22</sup> Ebhe a'o ndu 'he hana sa 'dhú Kilisito. Ani atsia a'o ani Ngámá pí 'ndji ndu 'he hana di ne pí 'ndji Dadjua gba e-o. <sup>23</sup> Piga gba Ebhe-e, a ko kute Yesu Kilisito. Angu gba ani-e ngadu bhú Dadjua angoo, ngaani-e, ani ne ndu bili hana.

## 2

#### *Ní azuku bhú dabili bini ne Yesu Kilisito*

<sup>1</sup> Nani kalanu-o, yi amu li bua yi kabula pulu 'ngú di ne kabula siti 'ngú gba yi-o. <sup>2</sup> Yi adu nakobho bhú siti 'ngú nakpata lele mukobho na doto inde. Yi adu namanga ngámá na angu gba osisiti bua inde atu 'kpí-o. Ngámá angoo, a ko bua inde ngamene kulu bhú okpála inde ngagu Ebhe-o. <sup>3</sup> Ní adu bhadi nani ndu ní hana maka uo. Padhá de, anga ní adu nani nakobho bhú gumu na sisiti gba ní-o. Ní adu namene gumu na kute ní, di ne gumu na bua ní. Ka siti 'ngú gba ní-e, a ayo nani me ke 'ngú gba Ebhe-e go pí ní maka okpála koko.

<sup>4</sup> Engú bini, ndjinga gba Ebhe-e ngbéngbé, mukunda gba ani pi ní-e ngbéngbé naali. <sup>5</sup> Kaka-a, ani aha matá mukobho pi ní li pápá gba Kilisito, nganí okpála inde amu nani ka siti 'ngú gba ní-o. A na paká me ní akobho ka bádha bhú 'bu gba Ebhe. <sup>6</sup> Bhú

makpɔtɔsɔ gba ní ne Yesu Kilisito-o, Ebhe azuku ní bhú kuo bhú dabilí bini ne aní, ngubula me ní ɔ bhú dabilí bini ne aní abhúlá. <sup>7</sup> Bhú nasuno bádha bhú 'bu inde aní asuno e pí ní bhú Yesu Kilisito-o, Ebhe akúnda nasuno bhómú-o ngubula ndú nedhinga hana inde ngago-o bádha bhú 'bu gba e na ngbéngbé ko. <sup>8</sup> Padhá de, anga yí akobho ka bádha bhú 'bu gba Ebhe kabula nabhuka . Múkobho ang-o yie ka yí de, a ko ehe inde lí Ebhe aha e pí yí padhá. <sup>9</sup> Múkobho ang-o yie ka okulu gba yí-e de. Kaka-a, a ayo de me kpála bini pa 'lí e tété-e de. <sup>10</sup> A na paká me Ebhe abho ní ngae. Aní abho ní bhú nakpɔtɔsɔ liní ne Yesu Kilisito ngubula me ní mene ongú na babadha. Obabadha 'ngú ang-o, Ebhe aleke nani pí ní bhútode me ní mene.

*Yesu akpɔtɔsɔ omaYuda ne obhende ne omaYuda ade-e bhú nakpi gba e-o*

<sup>11</sup> Yí bhundja nga maka yí adú nani lie kalanú-o. Ngayí okpála inde lí omaYuda adú na'í o me okpála inde í lí gandja\* de, anga bhú nazu-o, yí ne omaYuda ade. U atsia adú na'í lio me o ne okpála inde alí gandja. A ko la ehe inde lí okpála amene e lí kute ne 'kpa o. <sup>12</sup> A na paká me bhú nedhinga bhómú-o, yí adú nani de Kilisito tsutsu. Yí adú ne ogandji okpála , yí dú nani bhú piga gba omafsalaele de. Gandja inde lí engú lí Ebhe apa nani lie me ní améne e pí okpála gba ní-e alú pí e, dú pí yí de. Yí adú nani nadú pála doto me yí nde 'o 'to yí 'to Ebhe de. Ebhe dú la di bhú yí de. <sup>13</sup> La mbia inde-e, bhú nakpɔtɔsɔ liyí ne Yesu Kilisito-o, ngayí okpála inde adú nani de

aní tsutsu-o, yí adyudyo liyí de aní masíkpe kabula ngute aní-o.

<sup>14</sup> Padhá de, anga Kilisito ngae makpe aha guo 'ngú pí ní ngae bhú namene me omaYuda, ne okpála bhende ne omaYuda ade-e kolo koli okpála bini. Bhú nakpi ka aní-e, aní agugumú kozie inde adú nani nagbo bhúsú uo-o. Kozie ang-o adú nani nayala lio sùnda o. <sup>15</sup> Aní abulú lílí gba Moidje ne odapo ang-o hana. Aní amene me omaYuda, di ne okpála bhende ne omaYuda ade-e kolo koli piga bini na mbia bhú nakpɔtɔsɔ lio ne aní. Abhomú-o, aní atsia agie guo 'ngú. <sup>16</sup> Bhú nakpi ka aní lí kulusi-e, Kilisito akpɔtɔsɔ uo bhú koli kute bini. Aní atsia agie makpolia sùnda uo ne Ebhe. Lí pápá na kulusi-e, aní a'e yala sùnda uo. <sup>17</sup> Kilisito ago ngubula nakpokpo Bádha Ngali na guo 'ngú pí yí okpála inde adú nani tsutsu de Ebhe, di pí okpála inde adú nani masíkpe-o. <sup>18</sup> Lí pápá gba Kilisito-o, ndú ní hana, omaYuda ne okpála bhende ne omaYuda ade-e, ní tí da nadyudyo liní de Ebhe, 'Dyi ní, ka koli Bu Bhobua bini.

<sup>19</sup> Kaka-a, ngayí okpála inde ne omaYuda ade-e, yí matá ne ogandji okpála ade, yí maka ogomago ade. Engú bini, yí mbia inde-e ne ongisi na kuti, yí bhú ká okpála gba Ebhe. Yí ne okpála na piga gba Ebhe. <sup>20</sup> Ngayí-e, yí akolo ndula na eti inde lí 'dhu e nde ne obhulú titima gba Yesu , di ne opolofeta . Nepanda na eti ang-o, a ko Yesu Kilisito ngae makpe. <sup>21</sup> Aní ngamene ngae me eti-e lú kpekpeke. Aní la di ngamene me eti ang-o kolo 'ngbé 'tí Ebhe na bubu, inde u a'o e pí Ngámá. <sup>22</sup> Bhú nakpɔtɔsɔ lio ne Kilisito-o, ngayí di-e, yí maka ndula na eti inde u ayiki e-o. Yí atsia akolo ne

\* 2:11 2:11 Gandja: A adú nani engú inde asuno me a inde-e kpála ka Ebhe.

ndu okpála koko koli eti bini inde li Ebhe ngadu bhú e li pápá gba Bu Bhobua.

### 3

*Polo akpokpo 'ngú pindji engú inde awo lie mawo gba Kilisito*

<sup>1</sup> Kaka-a, ngama Polo-o, ma ne kpála na tikpa gba Yesu Kilisito kabula yi okpála inde ne omaYuda ade-o. <sup>2</sup> A na paká me yi adje engú pindji kulu inde li Ebhe aha e bhú bádha bhú 'bu gba e me, ma mene e pi yi ko. <sup>3</sup> Ebhe ambamba ta 'ngú gba e inde awo lie mawo muma, ngubula me ma mbila tata-a ndjindji. Ma aye mbo 'ngú pi yi pépé bedi. <sup>4</sup> Nedhinga yi ngatanga balua inde-e lie, yi ti da nambila imbilangu inde ma nde ne e li engú inde awo lie mawo gba Kilisito-o. <sup>5</sup> Nani kalanu-o, Ebhe mbamba nga nani ta engú ang-o pi okpála na kalanu-o de. Engú bini, ani asuno mbia inde-e li pápá gba Bua gba e pi obhulu titima na bububu gba Yesu, di ne pi opolofeta. <sup>6</sup> Okpála inde ne omaYuda ade-e ngasia koli ehe bini ne omaYuda. Uo bhú koli kate bini. U asia la di ehe inde li Ebhe apa me ni améne e bhú Yesu Kilisito li pápá na Bádha Ngali-e masia.

<sup>7</sup> Ma akolo kpála na kulu na kpokpo Bádha Ngali ka bádha bhú 'bu gba Ebhe, inde ani aha e muma bhú angu gba e-o. <sup>8</sup> Ngama-a, ma ne mboye kpála bhú ká ndu okpála gba Ebhe-e hana. Engú bini, Ebhe atsia aha bádha bhú 'bu gba e muma ngubula me ma kpokpo Bádha Ngali pi okpála bhende ne omaYuda ade-e pindji tia na ngbéngbé gba Kilisito, inde ane mabundja gba okpála mane-o.

<sup>9</sup> Ma ti da nasuno pi ndu okpála hana mbámbá maka li Ebhe ngamene engú gba e inde

awo lie mawo lie-o. Ngaani-e, a ko kpála inde abho ndu 'he hana. Nayie nani didili naali-e, engú ang-o adu me a nde awo lie mawo, <sup>10</sup> ngubula me mbia inde-e, kabula engú li Ebhe amene e bhú Dadjua gba e-e, ndu obua hana, di ne ndu obua hana na angu inde abhúlá-a ti da nambila imbilangu gba Ebhe inde u ti da nambila alo na e de. <sup>11</sup> Ndu 'ngú bhomu-o amene lie li lele mabundja li Ebhe adu nani ne e nayie li lilita, inde ani amene e bhú Yesu Kilisito, Ngámá gba ní-o. <sup>12</sup> Ní akpøtsø liní ne Kilisito, ní atsia abhuka la di ani. Kaka-a, li ndu kpadji hana ní adú ne tsulu de ngú nadyudyo liní de Ebhe. <sup>13</sup> Kaka-a, ma ngayo ka yi me, bua yi asia ndala ka likabhu inde ma ngazu e ngubula yi-e de. Likabhu ang-o mangbo ngaha pi yi sangu.

*A ayo me omabhuka mbila lele mukunda gba Kilisito inde ane ndu 'ngú hana-o*

<sup>14</sup> Kaka-a, ma ngatatu lipaku ma kuto kala 'Dyi ní Ebhe, <sup>15</sup> li ndu piga hana inde abhúlá ne pila doto adha bhú e-o. <sup>16</sup> Ma ngayo ka ani me ani ha angu pi yi li pápá na Bhobua gba e, anga sangu gba ani-e ne 'ngbé tia na ngbéngbé. Abhomu-o, yi tsia sia angu li bua yi. <sup>17</sup> A ayo me Kilisito si kuti e li bhobua yi li pápá bhe nabhuka. Ma ngayo me sie yi li bhú mukunda mali, la di me a lu bhú mukunda ang-o malu. <sup>18</sup> Abhomu-o, yi kolo ne angu ngú nambila bhú dabili bini ne ndu okpála gba Ebhe-e hana me lele mukunda gba Kilisito pi ní-e, ane mane! <sup>19</sup> Yi mbila lele mukunda gba Kilisito inde ane ndu 'ngú hana u ti da nambila e-o. Yi abédhe ne ndu 'ngú hana inde bhú Ebhe-e bedhe.

<sup>20</sup> Ebhe ngamene kulu bhú ní ne angu gba e-o. Li ní yo 'he ka

ani-e, ani ti da nahaha pi ní bhelé ane mane, anga angu gba ani-e ane ndu 'ngú hana inde ní ti da nabhndja e. <sup>21</sup> A ayo me sangu du ne ani bhú Piga gba Ebhe di ne bhú Yesu Kilisito, ndu nedhinga hana, duduma ne duduma. A adu moko.

#### 4

*Yi gili ndu 'kpí hana nadu bhú makpøtsø ne Kilisito*

<sup>1</sup> Ngama kpála inde bhú tikpu anga ma ngamene kulu pi Ngámá-a, engú inde ma ngayo e ka yi kpékpéke-e ngae inde: ngayi okpála inde li Ebhe a'i o-o, kaka-a, yi dhuku maka li okpála inde li Ebhe a'i o-o adhudhuku lie-o. <sup>2</sup> Yi du ndu 'kpí hana nakø liyi ne kuto, yi du ne bhuku bua, di ne 'ndjá bua. Yi kibila liyi bhú ongú inde sunda yi-e ne bua na mukunda. <sup>3</sup> Yi gili ne angu hana nadu bhú makpøtsø inde li Bu Bhobua ngaha e bhú guo 'ngú inde ngagbite yi bhú dabili bini ko. <sup>4</sup> A ne koli kate bini, di ne koli Bu Bhobua bini. Ebhe a'i la bhadi ní me ní 'o 'to ní to koli 'he bini. <sup>5</sup> Koli Ngamá bha bini, ne koli nabhuka bini, di ne koli batisimo bini. <sup>6</sup> Koli Ebhe bha bini, inde 'Dyi ndu okpála hana. Ani ngau pí 'ndji ndu okpála hana. Ani ngamene kulu bhú ndu okpála hana, ani la di ngadu bhú ndu omabhuka hana.

<sup>7</sup> La-a, Kilisito aha pi kpála ne kpála angu gba Bhobua ngú namene ehe. Ani atsia aha di bhe gba kpála ne kpála pi e ne bádha bua. <sup>8</sup> U aye me:

«Li ani a'u lie abhúlá-a,  
ani abha okpála na tikpu ne angu,  
ani atsia aha angu gba Bhobua ngú namene ehe pi okpála.†»

<sup>9</sup> La-a, napa me «ani a'u abhúlá-a», a akunda napa pi? Bhobhomu-o akunda napa me, kala na'u abhúlá-a, Kilisito akø ngaiza a satø. <sup>10</sup> Kpála inde akø a satø-o, a ko di kpála inde a'u abhúlá tsutsu ngubula me ani du bhú ndu 'he hana. <sup>11</sup> A ko ani inde aha kulu pi kpála ne kpála-o. Ani aha pi okoko nadu obhulu titima gba Yesu , okoko ne opolofeta . Okoko ne omusuno na Bádha Ngali , okoko ne odimandø, i du di-e omusuno. <sup>12</sup> Yesu amene me okpála gba Ebhe-e kolo bedhe ngú namene kulu gba ani, ne okulu inde li Kilisito aha e pi uo bhomu-o, ngubula me kate ni inde Piga gba Ebhe-e, kolo kpekpeke. <sup>13</sup> Ní mene mo-o, ndu ní hana ní kólo bhú makpøtsø bini bhú nabhuka ne nambila Ndili gba Ebhe-e ndjindji. Ní bhele bhú nabhuka angu-o, ní tsia kólo libhomu maka Kilisito.

<sup>14</sup> Abhomu-o, ní dú matá maka ongisi de. Ní dú la di maka zabu inde li anvi ngadyudyo e ne ndu pasu hana, di ne anvi na nasuno gba omusuno inde ngapite okpála-a de. <sup>15</sup> Engú bini, i du me ní nde ngapa kukulu 'ngú bhú mukunda-a, ní bhéle bhú ndu 'ngú hana li pápá gba Kilisito inde ne 'ndji Piga gba Ebhe-o. <sup>16</sup> Ani ngamene ngae me oyá ní du bini, ani atsia akpøtsø di lie bhú dabili bini ne ní. Kate ní inde Piga gba Ebhe-e bhadi moko. I du me nganí inde ne okpála na Piga gba Ebhe-e ní nde ngamene kulu gba ní bhú dabili bini ne mukunda-a, li Dadjua angu-o bhéle.

*Yi koto bhú mukobho na kalanu, amba yi kolo okpála na mbia*

<sup>17</sup> Engú inde ma ngayo e ka yi ne kekele-e ne 'li Ngámá-a ngae inde: yi adú nadhuku matá

† 4:8 4:8 Tsia bhú Ets. 68:19.



maka omupagano de. Padhá de, anga mabhundja gba uo-o padhá. <sup>18</sup> Imbilangu gba uo-o bhú biti. Makobho inde ngayie ka Ebhe-e pi uo ade. Padhá de, anga u mbila 'ngú bini de. U agbite la di bua o má ki! <sup>19</sup> U ngadje numu li 'ngú bini ade. U ngamene ndu 'ngú na sisiti hana inde u akunda namene e. U la di ngakunda olisi ne obhosi ngangá.

<sup>20</sup> Pi yi-e, a bhomu-o engú inde u apa e pi yi pindji Kilisito-o de. <sup>21</sup> A na paká me u apa ndu 'ngú gba Yesu-o pi yi hana. Maka omakilisito-o, u asuno pi yi kukulu 'ngú inde ní asia e ka anio. <sup>22</sup> Kaka-a, a ayo me yi tse makobho gba yi na kalanu-o. Lele nani maka yi adu lie kalanu-o, yi koto bhúbhú makoto, anga ogumu angu-o ngapite okpála. A la di ngato okpála bhú kuo. <sup>23</sup> A ayo na'o me Bu Bhobua dji yi libhomu, amba yi kolo okpála na mbia li bua yi, di ne bhú mabhundja gba yi ko. <sup>24</sup> Yi kolo okpála na mbia, inde li Ebhe abho o maka e makpe, inde la di ngau lie bhú makobho na ngbingbili, inde di bubu li kukulu 'ngú ngagbe e-o.

<sup>25</sup> Kaka-a, yi 'o napa eu ma'o. A ayo me kpála ne kpála pa pi kilí e kukulu 'ngú. Padhá de, anga ní ndu ní hana ne yá koli kute bini. <sup>26</sup> † du me bua yi nde ake-e, yi alí bhú siti 'ngú de. A ayo me bua yi kə kala me ela ti.† <sup>27</sup> Yi aká kpadji pi Djabulu de me ani ko pi yi-e de. <sup>28</sup> A ayo me kpála inde adu nako nazi 'he-e, 'o nazi 'he ma'o. A ayo mangbo me ani mene kulu ne 'kpa e makpe, amba ani sia ezu pi e li bádha kpadji. Ani du la di ne ehe ngú nateteke okpála inde li ehe aneke ka o-o. <sup>29</sup> Eli na sisiti bini akóto bhú 'bhe yi de. Yi pa bha bini eli na babadha inde i ti da nateteke okpála koko nakpata

gumu gba uo-o, a la di ngamene bádha 'ngú pi obhende ngadjedje-o.

<sup>30</sup> Yi ahá likabhu pi Bu Bhobua inde li Ebhe aha e pi yi-e de. Padhá de, anga Bu Bhobua inde li Ebhe atu e li yi maka kasé-e ngapa pi yi ngae me bhú oekpi inde ngago-o, Ebhe agbégbé yi bhú siti 'ngú gba yi-e magbegbe. <sup>31</sup> Yi 'e ndu 'ngú hana na sisiti li bua yi ma'e. Yi 'e ndu bua bhú yi ma'e. Yi 'e ke 'ngú bhú yi ma'e. Yi 'o nasusula ma'o. Yi 'o la di nasobho sobho ma'o. Yi 'o namene ndu sisiti 'ngú hana má kpəkəbhə! <sup>32</sup> Yi du sunda yi ndjindji, amba yi bedhe ne makunda bedhe. Yi mbu li sisiti 'ngú inde sunda yi maka li Ebhe ambu la di li yi lie kabula Kilisito-o.

## 5

*Yi dhuku maka okpála inde bhú zi 'kpí*

<sup>1</sup> † nde lie me yi nde ne ongisi li Ebhe-e akunda o-o, yi mene ne kpéke me yi du maka ani. <sup>2</sup> A ayo me yi du ne makunda maka Kilisito. Padhá de, anga ani akunda ní. Ani atsia andala 'kpa li makobho gba e pi ní maka makiso, maka enu inde u atsutsulu e pi Ebhe, inde li se e ngapu ndjindji.

<sup>3</sup> Yi ne okpála na bububu gba Ebhe. Kaka-a, a ayo de me u dje ongu nakunda olisi, di ne obhosi ngangá, di ne namene ndu ongu na sisiti hana, i du di-e gumu 'he naali bhú ka yi-e de. <sup>4</sup> A ayo de me siti 'li, ne engú na ngingi, ne zibotu koto bhú 'bhe yi-e de. Engú bini, yi gie mangbo heni pi Ebhe. <sup>5</sup> Yi mbila ndjindji me, kpála bini na zabhe, kpála na zibotu, i du di-e kpála na endju (padhá de, anga endju-o, a ko nayo ebhe na eu), ani li bhú Nau gba Kilisito di ne Ebhe-e belegu de bini.

6 Kpála bini apíte yi ne 'li na padhá padhá de. Padhá de, anga ngua osisiti 'ngú bhomu-o ngagbele ke 'ngú gba Ebhe-e pi okpála inde ngayala namene líli gba anie ngae. 7 Kaka-a, yi akpótse liyi ne ngua okpála bhomu-o de. 8 Yi adu nani kalanu-o bhú biti. La mbia inde-e, li yi akpótse liyi lie ne Ngámá-a, yi akolo bhú zi 'kpí. Kaka-a, yi dhuku maka okpála inde bhú zi 'kpí. 9 Padhá de, anga zi 'kpí ngazu ndu 'ngú na babadha hana. A la di ngazu ngbili 'ngú ne kukulu 'ngú. 10 Yi gili ne kpéke ngú nalo engú inde li Ngámá akúnda e-o. 11 Yi akpótse liyi ne okpála bhende ngamene ongú na padhá padhá na sukpe-e de. Engú bini, yi gbe engú angoo mbámbá bhú djila okpála. 12 Padhá de, anga a ko numu naali ngú nagama 'ngú li 'ngú inde li okpála angoo ngamene e bhú pepe. 13 La-a, engú inde u agbe e pi okpála-a, akolo mbámbá. 14 La di-e, ndu 'ngú hana inde u agbe e li zi 'kpí-e, a akolo bhadi li zi 'kpí. Kaka-a, u apa me:

«Ngamu kpála inde ngala-a,  
zuzuku,  
yie bhú ká okpála inde amu-o  
mayie,  
amba Kilisito suno zi 'kpí gba  
e pi mu.»

15 Kaka-a, 'ee, yi lila liyi ndjindji bhú nakobho ka yi-o. Yi adú nakobho maka ongingi de. Engú bini, yi du nakobho maka okpála na imbilangu. 16 Yi djele onedhinga inde yi nde bhú e ndjindji. Padhá de, anga onedhinga inde ní nde bhú e sisiti. 17 Kaka-a, yi adú maka ongingi de. Engú bini, yi mene ne kpéke me yi mbila engú inde li Ngámá akúnda me yi mene e-o.

18 Yi alángba ne pandi de.

Padhá de, anga pandi ngatima kpála bhú 'ngú na pupulu. Engú bini, yi bedhe mangbo ne Bu Bhobua. 19 Yi to masi bhú yi ne nali ndu odjua oetsi hana inde li Bu Bhobua ngaha e-o. Yi toko Ngámá ne bua yi hana. 20 Yi gie heni pi 'Dyi ní Ebhe ndu nedhinga hana, di ne ngú ndu 'ngú hana ne 'li Ngámá gba ní Yesu Kilisito.

*A ayo me olo ne bhoko manga lio sunda o*

21 Yi manga liyi sunda yi kabula mazima yi nde ne e pi Kilisito ko.

22 Ngayi olisi-e, yi manga obhosi gba yi-e maka yi ngamanga Ngámá lie-o. 23 Padhá de, anga bhoko ne ngámá pi 'ndji wala e, maka li Kilisito nde lie ne Ngámá pi 'ndji Piga gba Ebhe-o. Kilisito ne Mukobho na Piga gba Ebhe. Piga angoo maka kute ani. 24 A ayo me olisi manga obhosi gba oo bhú ndu 'ngú hana, maka Piga gba Ebhe-e ngamanga Kilisito lie-o.

25 Ngayi obhosi-e, yi du ne mukunda pi olisi gba yi, maka li Kilisito akúnda Piga gba Ebhe-e lie-o. Ani asuno mukunda angoo li nandala kpa li mukobho gba e ngubula Dadjua angoo. 26 Ani akúnda nani namene me Piga gba Ebhe-e kolo bubu, ani atsia avulu ne engu\* di ne 'li e. 27 Padhá de, anga ani akúnda nani me Piga gba Ebhe-e koto kala ni ne sangu gba e hana. A adú ne doto bhú e de, ne engú na sisiti napapa tété de, di ne zibotu de. Dadjua angoo du la di bubu, inde u ti da nau siti 'ngú napapa li e de.

28 Kaka-a, a ayo me obhosi du ne mukunda pi olisi gba o maka u akúnda kute o lie makpe-o. Padhá de, anga kpála inde ne mukunda pi wala e-e, ani ngakúnda bhomu-o li e makpe. 29 Padhá de, anga kpála bini inde

\* 5:26 5:26 Engu: A ko batisimo. Tsia bhú Tit. 3:5.

ayala kute e makpe ade. Engú bini, kpála ne kpála ngakú kute e, di ne nalilila ndjindji, maka Kilisito ngamemene lie bhú Piga gba Ebhe-e ko. <sup>30</sup> Padhá de, anga ní ne tika kute ani. <sup>31</sup> A maka u aye lie bhú bhuku gba Ebhe-e me: «Kaka-a, bhoko a'ó ká 'dyi e ne 'hi e ngubula nakpøtsø lie ne wala e. U tsia kólo ndu o bhisi hana koli kute bini.†» <sup>32</sup> 'Ngbé 'ngú na kukulu awo lie bhú engú inde u apa e bhomu-o. Ngama-a, ma apa me u ngapa 'ngú bhomu-o li 'ngú gba Kilisito di ne Piga gba Ebhe. <sup>33</sup> Engú bini, u la di ngapa 'ngú ang-o pi yi: a ayo me bhoko ne bhoko du ne mukunda pi ølø gba e maka ani akunda li e lie makpe-o. A ayo la di me ølø ne ølø manga 'ko e.

## 6

*Lele dasundu gba ongisi ne okpála azu o-o*

<sup>1</sup> Ngayi ongisi, engú inde a ayo me yi mene e maka li Ngámá akunda lie ngae inde: yi manga okpála azu yi-e mamanga, anga bhobhomu-o ndjindji. <sup>2</sup> Líli na kalanu inde li Ebhe asuno e di ne napa me ni améne ehe bhú e ngae inde: «Manga 'dyi mu ne 'hi mu mamanga, <sup>3</sup> amba mu du ne kpála na djali, mu tsia bhúe la di ngengele píla doto.†»

<sup>4</sup> Ngayi odyi ongisi, yi améne de me ongisi gba yi-e kolo ne kpéke 'ndji-e de. Engú bini, yi ku uo ne nalili uo di ne naha líli inde ayie ka Ngámá-a pi uo.

*Lele dasundu gba obalise ne omakulasi o*

<sup>5</sup> Ngayi obalise, yi manga omakulasi yi píla doto mamanga ne nazi uo ndjindji, ne koli bua bini mugito me yi ngamanga Kilisito. <sup>6</sup> Yi améne bha bini mo-o

li nedhinga inde u ngatsia 'kpí li yi lie de. Padhá de, anga yi mene mo-o, i mána mugito me yi amene ngubula me okpála ziba yi. Engú bini, yi mene engú inde li Ebhe akunda e ne koli bua bini, maka obalise gba Kilisito. <sup>7</sup> Yi mene kulu pi omakulasi yi ne bádha bua mugito me, yi ngamemene pi Ngámá ngae makpe, anga yi mene pi kpála de. <sup>8</sup> Padhá de, anga yi ambila me, abana i du bali, i du di-e bali de-e, kpála ne kpála asía makalá sakpa Ngámá li lele bádha kulu li kpála ang-o amene e-o.

<sup>9</sup> Ngayi, omakulasi okpála, yi mene bhadi moko pi obalise gba yi-o. Yi abú tsulu bhú uo ne napa de me yi ató mbolo li uo de. Yi mbila ndjindji me ngayi ne obalise gba yi-e, a ka yi ne koli Ngámá bini abhúlá. Ani gbogbo bhúsu okpála de.

*Yi bi tia 'gu inde li Ebhe ngaha e pi yi-o*

<sup>10</sup> Ngú nabu tata-a, yi gili angu gba yi-e bhú nakpøtsø liyi ne Ngámá, bhú angu na ngbéngbé gba ani-o. <sup>11</sup> Yi bi ndu tia 'gu hana inde li Ebhe ngaha e pi yi, ngubula me yi lu kpekpeke kala siti mabhundja gba djabulu-o. <sup>12</sup> Padhá de, anga ní ngagu gbele ne okpála-kuti ade. Engú bini, ní ngagu 'gú ne osisiti bua inde ne angu abhúlá. Ní ngagu 'gú ne ongámási na angu di ne obhende na sukpe. <sup>13</sup> Kaka-a, yi ha ndu tia 'gú gba Ebhe-e hana, amba li nedhinga na sisiti akólo lie, yi de lu kala bhulu yala gba yi-e kpekpeke. La di-e, píta nagu gbele akolo ali soso-o, yi tsia lu li bili yi nde li e kpekpeke.

<sup>14</sup> Ka 'ngú ang-o, yi lu kpekpeke. Yi gbite kukulu 'ngú ludu yi maka mukabha. Yi holo ngbili 'ngú maka bongo na kó 'nu

inde ngalila mbulu kpála. <sup>15</sup> Yi dyi gumu na nakpokpo Bádha Ngali na guo 'ngú maka maløkø. <sup>16</sup> Yi holo nabhuka ndu 'kpí hana maka kopí. Bhobhomu-o ahá angu pi yi ngú nabulu ndu edji hana inde ne djua gba Satana . <sup>17</sup> Yi dyi mukobho maka ndata na kalase. Yi holo Eli gba Ebhe-e maka mbotia inde li Bu Bhobua ngaha e-o.† <sup>18</sup> Yi mene ndu 'ngú bhomu-o hana bhú mayo. A na paká, yi yo Ebhe bhú ndu 'ngú hana maka li Bu Bhobua atéteke yi lie-o. Kaka-a, yi alá-a de, yi yo Ebhe ndu 'kpí hana pi ndu okpála hana na bububu-o.

<sup>19</sup> Yi yo di Ebhe muma, amba Ebhe ha eli na ngbingbili muma nedhinga ma akunda nagama 'ngú lie-o. La di-e, a ngubula me ma adú ne tsulu de nedhinga ma ngambamba ta ongu inde awo lie bhú Bádha Ngali-e lie-o. <sup>20</sup> Ma ne bhulu titima na Bádha Ngali inde ma nde bhú tikpu ngubula e-o. Kaka-a, yi yo Ebhe ngu ma, amba ma akpokpo Ngali ango-o ne tsulu de, ma kpokpo mangbo maka a ayo lie-o.

### *Eli na soso*

<sup>21</sup> Tisiko, ndai ní na mukunda, kpála inde di ngamene kulu gba Ngámá ndjindji akpokpo ndu 'ngú hana inde atsia ma pi yi. Ani akpokpo pi yi ngubula me yi mbila lele maka ma nde lie di ne ehe inde ma ngamene e-o. <sup>22</sup> Ma atima ani ngubula nakpokpo pi yi lele maka ya nde lie, amba ani to di masi bhú yi.

<sup>23</sup> A ayo me Ebhe 'Dyi ní, di ne Ngámá Yesu Kilisito ha guo 'ngú, ne mukunda di ne nabhuka pi ndu ondaise ní hana. <sup>24</sup> A ayo me bádha bhú 'bu gba Ebhe du ne ndu okpála hana inde ne

mukunda na duduma pi Ngámá gba ní Yesu Kilisito ko.

† 6:17 6:14-17 Tsia bhú İsa. 59:17, 11:5, 27:1, 34:5, 49:2; ne bhú Oz. 6:5; ne bhú Ebe. 4:12; di ne bhú Apok. 1:16, 19:15.

## **Balua gba Polo pi omabhuka na gudhu na Filipoi Eli na kalanu**

Polo aye nani balua inde-e pi omabhuka na Dadjua na kalanu inde ani a'o nani e bhú putu-o, bhú ndu doto na ngámá gba okpála na Loma inde abhú Makedonia-o. Ani aye balua angoo me ani nde bhú tikpu. Li nedhinga inde ani adu lie me bua ani nde angamba ka nagu inde li obhelesi okpála koko na Dadjua gba Ebhe adu agu ne e-o, la di bua ani atsia alu bhúlá má gba ka onasuno na eu inde adu bhú Dadjua gba Ebhe inde abhú Filipoi-o.

Engú inde i ti da nau lie má gala bhú balua inde-e, a ko nagie heni pi omakilisito na Filipoi ngubula makiso inde u atima nani e pi ani ngú nateteke ani bhú ongú gba e ko. Polo aha nedhinga bhomu ngú nato masi bhú omakilisito na Filipoi ngubula me u andala bhú kulu gba Ebhe-e de, abana u adu ato mbolo lie li ndu uo hana-o.

Balua inde-e agama 'ngú kpekpeke pindji djali, naziba, nadu bini di ne 'ndjá bua inde bhú nabhuka a la di-e mukobho gba makilisito. Ani atsia asuno la di mukunda na kpekpeke inde li Polo adu ne e pi Dadjua na Filipoi-o.

### **Ongbengbe ongú inde bhú bhuku inde-e ngaie inde:**

Eli na kalanu 1:1-11

Engú atsia Polo kpi e kpi 1:12-26

Mukobho inde bhú Kilisito-o 1:27 - 2:18

Mabhundja inde adu pi Timoté ngauo ne Epafolodite 2:19-30

Nalila lio ka obhulu yala di ne okpekpeke 'ngú inde ngago

3:1 - 4:9

Polo ngauo ne obi e na Filipoi

4:10-20

Eli na soso 4:21-23

### *Polo yi omabhuka na gudhu na Filipoi mayi*

<sup>1</sup> Ngama Polo, bhú dabili bini ne Timoté-e, ya yi yi mayi. Ya ne obalise gba Yesu Kilisito . Ma aye balua inde-e pi ndu yi omabhuka inde bhú gudhu na Filipoi hana, pi yi obhelesi okpála di ne pi yi okpála inde ngateteke kulu gba Ebhe, ndu yi hana inde akpõtso liyi bhú dabili bini ne Yesu Kilisito-o. <sup>2</sup> A ayo me Ebhe 'Dyi ní, bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú gba o-o pi yi.

### *Polo agie heni, ani atsia ayo di Ebhe ngú omabhuka na gudhu na Filipoi*

<sup>3</sup> Ma ngagie heni pi Ebhe, ndu nedhinga hana ma ngabhundja yi lie-o. <sup>4</sup> Ndu nedhinga hana ma ngayo Ebhe lie pi ndu yi hana-a, ma ngakpi djali. <sup>5</sup> Ma ngagie heni pi Ebhe anga yi akpõtso liyi ne ma bhú nakpokpo Bádha Ngali , nayie bha bini li 'kpí na kalanu yi abhuka lie, akolo makolo pi mbia inde. <sup>6</sup> Ma ambila ndjindji me Ebhe inde akpo nani lita bádha kulu li bua yi-e, anu bha ne di ne kalanu, ani tsia bú soso li 'kpí li Yesu Kilisito agó lie-o. <sup>7</sup> A ndjindji me ma bhundja bha pindji ndu yi hana mo-o. Padhá de, anga bua ma abedhe ne djali ka yi, anga Ebhe asuno bádha bhú 'bu muma di ne pi ndu yi hana, ngubula me yi teteke ma nedhinga ma nde lie mbia inde-e bhú tikpu, di ne nedhinga inde ma ngakpokpo lie ne anga ma hana kakalu 'ngú pindji Bádha

Ngali lie-e, kala okpála nakodho mangimbo-o. <sup>8</sup> Ebhe mbíla hana me, ma ngapa kúkúlú 'ngú me ma ne mukunda pí yi naali. Mukunda inde ma akunda yi ne e-e, ayie ka Yesu Kilisito.

<sup>9</sup> Ehe inde ma ngayo Ebhe pí yi ngú e ngae inde: ma ngayo Ebhe me mukunda gba yi-e nu bha ne kalanu, amba ateteke yi me yi mbíla engú na kúkúlú ne lele maka yi ngadu lie sunda yi-o. <sup>10</sup> Abhomu-o, yi tsia mbíla di nalo obabadha 'ngú. Ma ngayo ndu 'ngú bhomu-o hana ngubula me ekpí li Yesu Kilisito agie lie lie, bua yi de du má ngilili di ne me ehe bini na sisiti adú bhú yi de. <sup>11</sup> Nakolo li 'kpí ang-o, nadhuku gba yi-e du ndjindji bhú angu gba Yesu Kilisito, amba okpála dhogé Ebhe, u toko di ani.

*Polo akpi djali anga u ngakpokpo Bádha Ngali gba Kilisito*

<sup>12</sup> Ondaise ma, ma akunda me yi mbíla ndjindji me ongú inde akolo li ma-a, amene mangbo me Bádha Ngali-e yangba ne kalanu. <sup>13</sup> Ka 'ngú ang-o, ndu osudha hana inde ngalila eti gba guvelenele, di ne ndu okpála koko hana ambíla me ma bhú tikpu kabula kulu gba Kilisito ma ngamene e-o. <sup>14</sup> La matá di-e, nau ma me ma bhú tikpu-o, ato masi bhú omabhuka bhelé li kpadji gba Ngámá gba ní-o. Uo matá ne tsulu ngú nakpokpo Bádha Ngali-e ade.

<sup>15</sup> A na paká me okpála koko ngakpokpo Bádha Ngali gba Kilisito-o, anga u ne 'ngbé bua li kute ma, u ngakunda nagu ma. La-a, okoko di ngakpokpo engú gba ani-e ne bua bini. <sup>16</sup> Obhe ngamene ne bua o bini bhomu-o, ngamene anga u ne mukunda li pabíli gba ma, u mbíla ndjindji me kulu gba ma li bíli inde-e, a ko

ngubula me ma akpokpo Bádha Ngali, amba ma suno di pí okpála me a ko kúkúlú 'ngú. <sup>17</sup> Okpála ma de apa 'ngú gba o kalanu-o, ngakpokpo Bádha Ngali gba Kilisito anga u ngakunda me ní du nagu ma. Engú inde u ngakpokpo e yie li bua uo de, u ngakunda me ma zu matá likabhu bhú tikpu ei ane mane.

<sup>18</sup> A mene 'he bini de. Belegu u du akpokpo Bádha Ngali gba Kilisito ne sítí bua , i du di-e ne bádha bua, Bádha Ngali ang-o bha naae nganu ne kalanu. Kaka-a, ma ngakpi djali. La matá-a, ma adú bha ne djali, <sup>19</sup> padhá de, anga ma ambíla me ndu okpekpeke da 'ngú bhomu-o hana améne me Ebhe kobho ma, anga yi ngayo ani ngú ma, Bu Bhobua inde nani li Yesu Kilisito atima e-e, la di ngateteke ma.

<sup>20</sup> Engú inde ma nga'o 'to ma 'to e naali-e, a ko me ma ahá galikpe namu pí Kilisito 'kpí bini de. La-a, mbíla inde-e, maka ne ndu nedhinga hana-a, ma abhuka ne bua bini me, ma adú bha bini nadhogé Kilisito belegu ma du bhú mukobho, belegu ma kpi makpi. <sup>21</sup> Padhá de, anga muma-a, ma du bhú mukobho-o, ehe inde ane ne engbé-e, a ko nadhogé Kilisito. Ma kpi makpi-e ane la matá ne bádha. <sup>22</sup> I du me nadu ka ma bhú mukobho píla doto ei nde ade kpadji muma na ateteke okpála-a, ma mbíla kpadji bhende ayo nalo e de. <sup>23</sup> Ma ngadho 'bí sunda ongú bhisi bhomu. A nga líma naali ne nayie píla doto inde ngubula me ma nu du de Kilisito. <sup>24</sup> La-a, nadu ka ma bhú mukobho-o ndjindji kabula yi.

<sup>25</sup> Ma ambíla ndjindji me, a la bhadi moko, ma du nga matá bhú mukobho, ní tsia dú ne yi bhú dabíli bini ngubula me yi nu li kpadji gba Ebhe-e ne kalanu, amba yi tsia kpi di djali li kpadji

ango-o. <sup>26</sup> Nedhinga ma akóto lie bhú tikpu-o, ní tsia dú matá ne yi bhú dabili bini-e, yi atóko Yesu Kilisito naali ka engú inde ani amene e muma-o.

*Yi lu kpekpeke bhú nabhuka*

<sup>27</sup> Engú inde ane la mane-e ngae inde: a ayo me nadhuku gba yi du li lelele maka li Bádha Ngali gba Kilisito apa lie-o, ngubula me, belegu ma go natsia yi, belegu ma go de-e, ma de dje me yi alu kpekpeke ne mabhundja bini, ne me yi ngalila ndu yi hana nabhuka gba yi inde alu pí Bádha Ngali-o. <sup>28</sup> Yi adjé tsulu ka obhulu yala gba yi-e belegu de bini. Bhobhomu-o asúno pí uo mbámbá me, ngauo-o, u angita, la ngayi-e, yi li kpadji na mukobho. Ebhe asúno pí uo ngae. <sup>29</sup> Padhá de, anga Ebhe suno bha bini bádha bhú 'bu gba e pí yi ngú nabhuka Kilisito de, engú bini, ani asuno bádha bhú 'bu gba e pí yi ngú nazu di likabhu kabula Bádha Ngali gba ani-o. <sup>30</sup> Yi ngagu bhomu-o ngua gbele inde nako yi au me, ngama-a, ma adu agu e-o. Yi la di ngadje me, mbia inde-e, ma nga bha ngagu 'gu.

## 2

*Yi kə liyi ne kuto maka Yesu Kilisito*

<sup>1</sup> I nde lie me yi akpɔtɔ liyi bhú dabili bini ne Kilisito-o, bhobhomu-o ngaha angu pí yi. A mo-o adi! I nde lie me ani ne mukunda pí yi-e, bhobhomu-o ngaha angu pí yi ngú nakpata kpadji gba ani-o. A mo-o adi! A na paká me Bu Bhobua akpɔtɔe yi ngae. A mo-o adi! A na paká me Ebhe la di ngasuno bádha bhú 'bu pí yi ngae. A mo-o adi! <sup>2</sup> I nde lie mo-o, yi bedhe bua ma ne djali

bedhe li kpadji nadu, ne li kpadji nadu ne mukunda sunda yi, di ne li kpadji nadu ne makpɔtɔe na kakulu sunda yi. <sup>3</sup> Yi adú amene engú na bhayiki bhayiki de. Yi adú nabhi 'kpa yi pí mbulu yi li engú de. Engú bini, yi kə liyi ne kuto, yi du nau okpála koko me u ane yi mane. <sup>4</sup> Kpála ne kpála adú bha bini natsia engú gba e makpe de, engú bini, a ayo di natsia engú gba okpála koko uu.

<sup>5</sup> Yi du bhú ka yi ne ngua mabhundja li Yesu Kilisito adu nani ne e-o.

<sup>6</sup> Belegu u aviti nani lie ne Ebhe-e bhú dabili bini-e, ani kpo nani 'ndji e ne Ebhe de me ni du ndu 'kpí hana maka ani-e de.

<sup>7</sup> La-a, ani a'o ká ndu 'ngú bhomu-o hana, ani akolo bali, u atsia azu ani kpála-kuti.

Ndu okpála hana au me a ko kpála-kuti.

<sup>8</sup> Ani akə matá lie ne kuto, ani amanga Ebhe akolo bha makolo bhú nakpi ka e,\* inde u agi ani lie li kulusi-o.

<sup>9</sup> Ka 'ngú ango-o, Ebhe ngae makpe a'e'e ani ne abhúlá nane ndu ohe hana. Bhú bádha bhú 'bu gba e, ani atsia a'o 'ili li ani, inde ane ndu 'ili hana.

<sup>10</sup> Ani amene mo-o ngubula me ndu 'he hana inde abhúlá di ne píla doto di ne asa doto,† kikita lipuku o kuto kala Yesu ngú nadhəgə ani ka 'li ani-o,

<sup>11</sup> amba ndu okpála hana kpokpo mbámbá me Yesu Kilisito ne Ngámá.

U mene mo-o, u tsia dhəgə di Ebhe 'Dyi ani.

*Yi du maka zi 'ke píla doto*

\* **2:8** 2:8 Nakpi ka e: Nani bhú nedhinga gba omaYuda-a, u adu bha nani nagí li kulusi ongbenge obhulu 'zi. † **2:10** 2:10 Asa doto: A ngasuno kuti gba okpála inde amu.

12 Kaka-a, ondaise ma na mukunda, maka yi amemene lie gome gome-o, yi manga Ebhe mamanga. Yi amanga bha bini ani ka de djila ma de. Engu bini, yi manga ani la mata ane mane nedhinga ni nde lie ne yi bhú dabili bini ade ko. Yi mene kulu liyi pi Ebhe ngubula nasuno me yi akobho, yi mene kulu ango-o bhú dabili bini ne nakø liyi ne kuto. 13 Padhá de, anga Ebhe ngae makpe ngamene kulu li bua yi ngubula me yi du nakunda di ne namene ongu inde nganga li ni-o.

14 Bhú ndu kulu hana inde yi ngamene e-e, yi adú nadi mutokono de, yi adú la di ne kpeke 'bhø de, 15 ngubula me kpála bini aú engú na sisiti napapa li yi de, di ne me yi du libhomu hana ndjindji, amba yi du ne ongisi gba Ebhe, ongisi inde li siti 'ngú nde bhú o ade. Yi ngakobho bhú ká osisiti okpála na doto inde. Yi du bhú ká uo maka zi 'ke inde ngasu masu, 16 padhá de, anga yi ngakpokpo pi uo eli na mukobho. Abhomu-o, li 'kpi li Kilisito agó lie, ma adú kala ani ne gindaginda kabula yi, anga bhobhomu-o asuno mbámbá me kpeke kulu inde ma amene e bhú ka yi-e, ma mene padhá de. 17 Engu bini, nabhuka gba yi-e, a ko makiso inde yi ngaha e pi Ebhe-o. I du me u nde abhøø ma-a, bhobhomu-o dú maka makiso gba ma inde ma a'o e pi bhende gba yi-o. I du mo-o, ma adú ne djali, ni tsia kpi djali ne ndu yi hana bhú dabili bini. 18 A ayo me ngayi di-e, yi du ne djali, amba yi kpi djali ne ma bhú dabili bini.

*Polo atima Timoté bhú Filipo*

19 I du me Ngámá Yesu nde akunda-a, ma ne 'to ma me ma tima Timoté agba yi sunda 'kpi inde, ngubula me ani gie lie-e, ani de kpokpo ngali gba yi-e muma,

amba ani teteke bua ma maka ani adji di nateteke bua yi lie-o. 20 Kpála koko ka ma ei ade inde ngabhundja maka ma, a ko bha bini ani. Ani a'o bua e kukulu li 'ngú gba yi-o. 21 Ndu okpála koko hana bha bini nga'o bua o li ongu gba o makpe, u bhundja bhende gba Yesu Kilisito-o de. 22 Timoté makpe, yi mbila ndjindji me a ko bádha kpála. Ne ma ne ani-e, ya amene kulu nakpokpo Bádha Ngali. Ani ateteke ma bhú kulu ango-o maka li ndili ateteke 'dyi e lie-o. 23 Ma nga'o 'to ma me ma tima ani agba yi má gala, i du me u nde akodho 'ngú gba ma-a akodho-o. 24 Ma ne nabhuka me, i du me Ngámá nde akunda-a, ngama di-e, ma anú agba yi oo má gala!

*Polo agie Epafalodite bhú Filipo*

25 Ndai ma Epafalodite inde yi atima nako e me ani go teteke ma li ndu ongu bhende aneke ka ma-a, ya amene kulu ne ani bhú dabili bini. Ya agu egú ne ani bhú dabili bini. La mbia inde-e, ma abhundja me a ndjindji me ma gie ani pi yi. 26 Ani ne gumu naali me ni u mata ndu yi hana. Bua ani adu nako abhúá, anga ani adje me yi ambila me adu nako li ni ne kuo. 27 A na paká me a adu nako li ani ne kuo masikpe de nakpi. La-a, Ebhe asuno bádha bhú 'bu gba e pi ani. Ebhe suno bha bini bádha bhú 'bu gba e pi ani de, ani asuno di muma ngubula me ma asia mata likabhu pi koko nane mane de.

28 Kaka-a, bua ma alu abhúá má gba me ma gie ani pi yi, yi u mata ani, yi tsia kpi djali, amba muma-a, bua ma tsia ø. 29 Li ani akólo lie oo, yi de sia ani ne djali anga a ko ndai yi bhú 'bu Ngámá. A ayo me yi manga ngua okpála bhende maka ani-e mamanga, 30 anga ani di me kpi



nako li tula kulu gba Kilisito-o. Ani kpe kuo de, ani ateteke ma bhú da yi, maka a ayo nako lie me yi mene ngayi makpe, i dú me yi dú nako sii-o.

### 3

#### *Lele nadu ngbingbili kala Ebhe*

<sup>1</sup> Ondaise ma, 'li ma na soso pi yi-e ngae inde. Yi kpi djali anga yi ne okpála gba Ngámá. Ongú nako ma aye e pi yi kalanu-o, ma matá bha ngayeye ne toto. Ndala li ma tété ade, la pi yi-e, a ngubula nato masi bhú yi ne kalanu. <sup>2</sup> Ma apa pi yi me, yi lila liyi ka okpála inde ngamene sisiti kulu-o malila. A ko obúlu. U bha bini ngau ngbéngbé engú nato okpála bhú gandja. <sup>3</sup> Nganí-e, ní ne okpála inde ngakodho kukulu gandja-a nganí, anga ní ngamene kulu liní pi Ebhe ne angu gba Bu Bhobua. Ní ne gindaginda anga ní ne okpála ka Yesu Kilisito. Ní 'o bua ní li ongu inde ngayie ka okpála-a de.

<sup>4</sup> I dú me adu li ongu angoo-ne tata-a, ma de a'ó di bua ma tété. I du me kpála bini nde abhundja me ni ti da na'o bua ni li ongu angoo, ngama-a, ma ambila me ta na'o bua ma tété ane bhende gba ani-e mane. <sup>5</sup> Ngama-a, ma ne kukulu Ebele, azu ma ne oEbele. Ma ne matsalaele, bhú piga gba Bendjame. U azu ma lie, u ato ma bhú gandja pita 'kpi madjina.\* Li 'ngú bhende atsia líli gba omaYuda-a, ma nako ne maFalisai. <sup>6</sup> Li 'ngú bhende atsia nakpata líli gba ní-e li lelele-e, ma adu nako nato mbolo li omakilisito. Li 'ngú bhende atsia nadu ngbingbili inde li u aye e bhú olíli gba ní omaYuda-a, ma akpata ndundu hana má kpəkəbhə, ma ti belegu li susuka de bini.

<sup>7</sup> Ma adu nako abhundja me ongu bhomu-o ti da nateteke ma. La-a, kabula Kilisito, ma au ndundu hana padhá. <sup>8</sup> Ma au ndu oehe inde adu ka ma-a hana me tata tété ade. Padhá de, anga i du me ma nde ambila Ngámá gba ma Yesu Kilisito ndjindji-e, bhobhomu-o ane muma ne bádha ngae. Ma atse ndu 'he hana kabula ani. Ma ngau ongu bhomu-o bhú djila ma maka zibotu ngubula me ma sia Kilisito, <sup>9</sup> di ne me ma du libhomu hana pi ani. Ma pá matá de me ma ngbingbili kala Ebhe anga ma ngakpata líli gba omaYuda-a de. Ehe inde nga'o ma ngbingbili kala ani-e, a ko mangbo ma abhuka Kilisito lie-o. Ebhe amene ngae me ma kolo ngbingbili anga ma abhuka ani. <sup>10</sup> Ma akunda bha koli 'he bini. Ma akunda me ma mbila Kilisito, a la di-e me ma mbila angu inde azuku ani-o. Ma akunda la di me ma zu likabhu maka ani azu nani lie-o. Ma tsia du bedhe ngu nakpi pi ani maka ani akpi nani lie muma-o, <sup>11</sup> ngubula me i du me Ebhe nde akunda-a, ma de zuku di maka ani.

<sup>12</sup> Ma abhi 'kpa ma pí mbulu ma de me ma asia oehe bhomu-o asia, di ne me ma akolo ali soso akolo-o de. Engú bini, ma ngamene ne kpeke me ma sia oehe bhomu, anga Yesu Kilisito aholo 'kpa ma makpe ngae. <sup>13</sup> Ondaise ma, ngama-a, ma pa de me ma asia oehe bhomu-o asia de. Koli 'he bini inde ma ngamene e-e, a ko napa me ma 'ili 'to ma li ongu bhende akodho 'kpi akodho-o, amba ma mene ne kpeke me ma nu ne kalanu. <sup>14</sup> Ma ngagu holo ne kalanu ngubula me ma kolo li bili inde ma a'o bua ma lie-o, amba ma sia makalá li Ebhe nga'i ní ngu e abhúlá, kabula engú inde li Yesu Kilisito amene e pi ní-o. <sup>15</sup> A ayo

\* 3:5 3:5 Pita 'kpi madjina: A akunda napa me pita 'kpi mananika u azu ndili lie.

me, nganí obhende inde abhele li kpadji gba Ebhe-e abhele-e, ní dū nabhundja moko. I dū la me kpála koko nde ngabhundja kpi-e, Ebhe ambámba tata pi ani mambamba. <sup>16</sup> Belegu i dū bha pi-ie, ní kpata bha kpadji inde ní akpata e nakolo pi mbia inde-e ko.

<sup>17</sup> Ondaise ma, ndū yi hana yi kpata nganda ma. Yi banga djila yi li okpála bhende ngadhuku maka ya apana lie pi yi ko. <sup>18</sup> Ma pa mo-o padhá de, anga okpála bhelé ngadholo maka obhulū yala gba Kilisito kabula nakpi ka ani li kulusi-o. Ma apa 'ngú bhomu-o pi yi bhútsibhútsi. La mbia inde-e, ma matá ngapapa ne ngula bhú djila ma. <sup>19</sup> Li 'so 'kpí-e, u anú bhú djua. Padhá de, anga ebhe gba u-o, a ko 'bu uo. Uo ne gindaginda li ongú inde a ayo me u dje nūmū li e-o. U bha bini ngabhundja ongú na doto. <sup>20</sup> La pi ní-e, kuti gba ní-e abhúlá. Ní ngadjeke Ngámá gba ní Yesu Kilisito, inde di mukobho gba ní-e me ani yie abhúlá, amba ani go. <sup>21</sup> Ani agó lie, ani ayípa kute ní na mbolo inde-e me akolo maka kute ni na angu. Ani améne mo-o ne angu inde ani di ngako angu e pí ndū 'he hana ne e-o.

#### 4

<sup>1</sup> I dū mo-o, ondaise ma na mukunda, yi lū kpekpeke bhú Ngámá. Ma kunda yi naali, ma ne gumū me ma u matá yi. Ma ngakpi djali kabula yi, ma la di ne gindaginda kabula yi.

##### *Polo aha olíli na soso*

<sup>2</sup> Kikiliako, Evodia ne Sitika, ma ayo ka yi me yi dū ne guo 'ngú sūnda yi, anga yi ne okpála gba Ngámá. <sup>3</sup> Ma ayo di ka mū ndai ma na mukunda, teteke olisi bhisi bhomu-o mateteke, anga ya amene kulu ne uo kpekpeke, ya atsia azū di likabhu ne uo bhú

dabili bini ngubula Bádha Ngali, di ne Kelema, a la di-e ndū ondaise ma koko hana inde ya amene kulu gba Ngámá ne o ko. U aye ndū 'li uo hana bhú bhuku na mukobho.

<sup>4</sup> A ayo me yi kpi djali ndū 'kpí hana anga yi ne okpála gba Ngámá. Ma matá ngapapa ne toto me, a ayo me yi 'kpi djali. <sup>5</sup> A ayo me yi dū ne bhuku bua pi ndū okpála hana. Yi mbila hana me Ngámá agó mbia. <sup>6</sup> Bua yi agúku belegu ka 'ngú bini de, engú bini, yi yo mangbo ka Ebhe ndū 'he hana yi nde ne gumū e-o. Yi yo ani bhú nedhinga hana. Yi yo ani, amba yi gie heni pi ani. <sup>7</sup> I dū me yi nde amene mo-o, li Ebhe há guo 'ngú gba e inde ane ndū imbilangu hana-a pi yi. Guo 'ngú ango-o alíla bhobua yi bhú dabili bini di ne mabhundja gba yi-e, anga yi ne okpála gba Yesu Kilisito

<sup>8</sup> Ondaise ma, 'li ma na soso pi yi-e ngae inde: a ayo me yi mbila liyi ne nabhundja pindji obabadha ongú, li okpála atotoko e-o. A ko 'ngú inde li eu nde bhú e ade, engú inde ngbingbili, engú inde li zibotū nde bhú e ade. A ko 'ngú inde ngangga li okpála, engú inde li lelele. <sup>9</sup> Ongú inde ma akpokpo e pi yi, inde yi azíba e, ongú inde yi adje e bhú 'bhē ma, yi au ma ngamene e-e, yi mene ongú bhomu. Abhomu-o, Ebhe inde ahaha guo 'ngú pi ní-e dú bhú dabili bini ne yi.

##### *Polo agie heni ngubula oehe inde u atima e pi ani-o*

<sup>10</sup> Ma ngakpi djali naali bhú Ngámá anga yi amata abhundja ma. A na paká me yi adū nako nabhundja ma kalanū. Engú bini, kpadji dū nako de me yi teteke ma-a de. Nedhinga ane la bhadi naali me yi nde teteke ma de. <sup>11</sup> Ma pa mo-o ka 'ilí de me ma

bhú ndibhili-e de. Padhá de, anga ma ambila lima ne nagili nganda ma bhú ndu nedhinga hana. <sup>12</sup> Ma ambila lima ne nakobho bhú ndibhili, ma ambila di lima ne nakobho bhú nedhinga li ehe nde lie ka ma bhelé. Ma ambila lima ne nadu ndjindji ne ndu bili hana, ne bhú onedhinga hana, belegu li ehe nazu mazu du ka ma, belegu li nedhinga na gumu, belegu li ehe du ka ma bhelé, belegu ma du bhú ndibhili. <sup>13</sup> Ma ti da nakibila ndu ongu bhomu-o hana ka angu gba Yesu Kilisito inde bhú ma-o. <sup>14</sup> Belegu inde lie mo-o, yi amene ndjindji ngubula nateteke ma li nedhinga ma ngazu likabhu lie-o.

<sup>15</sup> Ondaise ma na gudhu na Filipoi, yi mbila hana me nedhinga ma abhuka nakpokpo Bádha Ngali lie bhú ndu doto gba yi na Makedonia-a, ateteke bha bini ma ne Dadjua gba yi-o. Dadjua koko bini ade inde ya amata 'kpa ya ne e. <sup>16</sup> Padhá de, anga ma adu lie bhú Tesalonike-e, yi atima ehe inde ma adu ne gumu e muma bhutsibhutsi. <sup>17</sup> A ko de me ma ngagili makalá-a de. Engu bini, ma ngagili mangbo me Ebhe suno bádha bhú 'bu gba e pi yi ane mane ka ohe yi ngapu e muma-o. <sup>18</sup> Ma asia ndu 'he hana inde yi atima e muma-a, ane belegu bhende ma adu ne gumu e-o. Li ma au oehe li Epafolodite ago muma ne e lie, ehe bini neke matá ka ma de. Oehe ango-o maka makiso inde u ahaha e pi Ebhe, inde li se e nde li Ebhe ndjindji, inde di nganga li Ebhe manga. <sup>19</sup> A ka Ebhe gba ma-a ne bhiti ehe na bhibhiti. Ani ahá pi yi ndu 'he hana yi nde ne gumu e-o. Ani ahá pi yi li kpadji gba Yesu Kilisito. <sup>20</sup> A ayo me u dhogo Ebhe 'Dyi ní duduma ne duduma. A adu moko!

*Polo abhana lie pi omabhuka na Filipino*

<sup>21</sup> Yi yi ndu okpála hana inde li Yesu Kilisito abhu o me u du ne okpála gba ni-o. Ondaise ni ya nde ne o ei-e, yi di yi mayi. <sup>22</sup> Ndu omabhuka koko hana inde ei yi yi mayi, ane la mane obhende ngamene kulu bhú 'ti gba 'ngbé ngamá na LomaKaisala-o .

<sup>23</sup> A ayo me Ngamá Yesu Kilisito suno bádha bhú 'bu gba e pi yi.

**Balua gba Polo  
pi omabhuka na  
gudhu na  
Kolosai  
Eli na kalanu**

Polo aye nani balua inde pi okpala na Dadjua na Kolosai, gudhu na Adji Minele ne Efeso. Dadjua ango-o, Polo 'o nani ngae de, la-a, adu nani bhú ndu doto inde li Polo adu atsia 'kpí lie ngae. Abhomu-o, ani atsia atima okpala na kulu nayie bhú Efeso, 'ngbé gudhu na ndu doto na ngámá gba okpala na Loma inde bhú Adji-o. Padhá de, anga Polo adje nani me omusuno na eu abhú Dadjua na Kolosai. Ta ngú nasuno ango-o adu me ngubula nambila Ebhe ne nadu ne mukobho na kukulu-o, a ayo nadhege obhelesi okpala koko di ne ongámási na Ebhe. La-a, omusuno bhomu-o apa me, a ayo naziba namene ongú koko maka nakodho gandja, amba u kpata li lelele ongú pindji oehe nazu mazú, ne pindji ongú koko.

Polo aye balua pindji nasuno na kukulu gba makilisito ngubula naboyo onasuno na eu ango-o ko. Engú na ngbéngbé ani agie e, a ko me Yesu Kilisito ne angu ngú naha mukobho na kukulu. La-a, omabhuka koko ne ndu ongú u ngamene e ngato bha kpala bhú ngita. Li pápá gba Kilisito, Ebhe abho doto. La di li pápá gba ani-e, Ebhe atsia agie ndu oehe na doto hana pi ani. Yi du bhú makpètse ne Kilisito de-e, mukobho dú pi okpala na doto de. Pipita-a, Polo ngapana mbámbá nasuno inde ngbéngbé inde pi omabhuka ngubula mukobho gba o-o.

Tisike inde anu ne balua gba Polo abhú Kolosai-e, adholo bhú

dabili bini ne Onezime inde bali li Polo aye balua li 'ngú gba e pi Filemo-o.

**Ongbengbe ongú inde bhú bhuku inde-e ngae inde:**

Eli na kalanu 1:1-8

Mukobho gba Kilisito ne kulu gba e-o 1:9 - 2:19

Mukobho na mbia bhú Kilisito 2:20 - 4:6

Eli na soso 4:7-18

*Polo yi omabhuka na gudhu na Kolosai mayi*

<sup>1</sup> Ngama Polo, ma ne bhulu titima gba Yesu Kilisito. Padhá de, anga Ebhe akunda ngae, a la die-e Timoté, ndai ní. Ya aye balua inde-e <sup>2</sup> pi okpala na bububu di na ngbingbili gba Ebhe inde bhú gudhu na Kolosai, ondaise ní na mukunda inde abhuka Kilisito. A ayo me Ebhe 'Dyi ní tuko bisagu pí yi, amba ani ha di guo 'ngú pi yi.

*Polo agie heni pi Ebhe*

<sup>3</sup> Ya ngagie heni pi Ebhe, 'Dyi Ngámá gba ní Yesu Kilisito ndu nedhinga hana ya ngayo Ebhe pi yi lie-o. <sup>4</sup> Padhá de, anga ya adje engú pindji nabhuka gba yi bhú Yesu Kilisito, di ne mukunda yi nde ne e pi ndu obubu okpala gba Ebhe-e hana-o. <sup>5</sup> Li ngali na kukulu 'ngú, inde Bádha Ngali akolo lie bhutsibhutsi na kalanu agba yi-e, yi atsia ambila 'ngú li engú inde li Ebhe awo e pi yi abhúla-o. Abhomu-o, nabhuka gba yi ne mukunda gba yi-e atsia ala pí engú inde yi nga'o 'to yi 'to e ango-o. <sup>6</sup> Bádha Ngali ango-o ngayangba, a la di ngazu nguwa píla doto libhomu. A amene bhadi pi yi moko li 'kpí inde yi adje engú lie pindji bádha bhú 'bu gba Ebhe-e lie-o, di ne yi ambila lie me bádha bhú 'bu ango-o kukulu-o. <sup>7</sup> Epafaladje, ndai ní na mukunda bhú kulu apa engú ango-o pi yi ngae. Ani ngamene kulu pi yi

maka kpála na kulu na kùkùlù gba Kilisito. <sup>8</sup> Anì akpokpo 'ngú pì ya pindji mukunda inde li Bu Bhobua aha e pi yi-o.

<sup>9</sup> Kaka-a, nayie li ekpí ya adje engú gba yi-e lie-e, ya ndala li nayo Ebhe pi yi de. Ya la di ngayo ka Ebhe me anì ha imbilangù na kpokpo kú 'ngú inde ngayie ka Bu Bhobua gba anì-e pi yi. Abhomu-o, yi tsia mbíla 'ngú inde anì akunda me yi mene e-o. <sup>10</sup> Yi tsia kóbho maka li Ngámá akunda lie-o. Yi tsia méne di ndu 'ngú hana inde anì akunda e-o. Yi méne ndu 'ngú na babadha hana, yi tsia mbíla Ebhe ndjindji. <sup>11</sup> Ya ngayo ka Ebhe me anì bedhe yi ne angu na اساسaua gba e bhú ndu 'ngú hana, ngubula me yi kibila ndu 'ngú hana ne 'ndjá bua. <sup>12</sup> Yi gie heni pi 'Dyi ní Ebhe ne djali hana. Padhá de, anga anì aha angu pì yi ngú nasia tia inde anì awo e pì okpála gba e bhú kuti na munde yi na zi 'ke-o. <sup>13</sup> Anì agbegbe ní bhú angu na biti, anì atsia a'o ní bhú kuti gba e na munde yi gba Ndili gba e na mukunda-o. <sup>14</sup> Li pápá gba anì-e, Ebhe agbegbe ní bhú bali. Anì atsia ambu di li siti 'ngú gba ní-o.

*Lele maka li Yesu Kilisito nde lie, la di ne kulu gba e-o*

<sup>15</sup> Ebhe inde u tí da nau e de-e ngau lie bhú Kilisito.

A ko Ndili na kalanu,\* inde di pí 'ndji ndu 'he hana li Ebhe abho e-o.

<sup>16</sup> Padhá de, anga Ebhe abho ndu 'he inde abhúlá ne bhende akuto-o hana li pápá gba anì: oehe inde u ngau e, ne bhende u uu e de, osisiti bua inde ngau abhúlá, ne píla doto, inde la di ne angu. Ebhe abho ndu 'he hana li pápá gba anì.

Anì abho la di ndu 'he ango-o hana pi anì.

<sup>17</sup> Kilisito bhú mukobho kala ndu 'he hana.

La di-e, ndu 'he hana inde bhú mukobho-o alu li kute anì.

<sup>18</sup> Ngaani-e, a ko 'ndji kute, inde Piga gba Ebhe-o.

Mukobho na mbia-a akpo lita e bhú anì, anì ne Ndili na kalanu-o ngae.

A ko kpála na kalanu inde u azuku e bhú ká okpála inde amu, ngubula me anì du kpála na kalanu bhú ndu 'he hana ngae.

<sup>19</sup> Padhá de, anga Ebhe apa me ni adú ndu 'kpí hana bedhe má kpaka bhú Ndili gba ni-o.

<sup>20</sup> La di-e, anì agie nadjé lio ne ndu 'he hana li pápá gba Ndili gba e-o.

A na paká me li Kilisito atuko ngute e lie li kulusi-e,

anì agie nadjé lio ka Ebhe ne ndu 'he hana inde abhúlá, di ne bhende píla doto-o.

<sup>21</sup> La ngayi-e, yi adu nani de Ebhe tsutsu. Yi adu obhulu yala gba anì ka ndu sisiti 'ngú hana inde yi adu abhundja e, di ne bhe yi adu amene e-o. <sup>22</sup> Engú bini, kabula nakpi inde li Ndili gba anì akpi e li kute e-e, Ebhe aholo matá nadjé lie ne yi. Anì amene mo-o ngubula me yi kolo kala ni bubu, amba yi adú bhú zibotu de, yi adú la di bhú siti 'ngú de. <sup>23</sup> Kaka-a, a ayo me yi lu kpekpeke bhú nabhuka. Yi ayie li kpadji na Bádha Ngali-e de, anga a ko ehe inde ní nga 'o 'to ní 'to e ko. Yi adje Ngali ango-o, u atsia akpokpo di pi ndu okpála hana. Ngama Polo, ma akolo kpála na kulu na Bádha Ngali ango-o.

\* **1:15** 1:15 Ndili na kalanu: A akunda napa me: anì adu nani bhú mukobho kala ndu 'he hana inde li Ebhe abho e-o.

*Polo ngadje likabhu, ani di ngagu gbele ngu omabhuka*

<sup>24</sup> Mbia inde-e, ma ngakpi djali ngu likabhu inde ma ngazu e ngubula yi ko. Padhá de, anga bhú kute ma-a, ma ngabedhe bhomu-o bhe likabhu inde li Kilisito a neke e ngubula kute e, inde Piga gba Ebhe-o. <sup>25</sup> Ma akolo kpála na kulu na Piga gba Ebhe, nakpata lele kulu inde li Ebhe aha e mama ngubula yi-o. Ani aha mama kulu nakpokpo ngali gba e hana. <sup>26</sup> Ngali angoo-o, a ko engú gba ani inde ani awo nani e bhutode pi ndu okpála hana. Engú bini, mbia inde-e, ani ambamba tata pi omabhuka gba e-o.

<sup>27</sup> Padhá de, anga Ebhe akunda nambamba ta engú gba e inde ani awo nani e mawo-o pi uo. A ko engú inde ndjindji naali, ne asasaua, inde ani aleke e pi ndu okpála hana. Engú angoo-o ngae inde: Kilisito bhú yi, ani atsia apa pi yi ndjindji me yi ali bhú Asasaua gba Ebhe inde yi nga'o 'to yi 'to e-o. <sup>28</sup> Kaka-a, ya ngakpokpo ngali gba Kilisito pi ndu okpála hana. Ya ngagbele 'dje okpála ne naha líli pi uo ne imbilangu hana, amba kpála ne kpála bhele bhú nabhuka bhú nakpètse lio ne Kilisito. <sup>29</sup> Kaka-a, ma ngamene kulu, ma la di ngagu gbele ne angu inde ayie ka Kilisito, inde la di ngamene kulu bhú ma ne angu hana-o.

## 2

<sup>1</sup> Ma akunda me yi mbila ndjindji me gbele inde ma ngagu e ngu yi-e kpekpeke. Ma ngagu gbele angoo-o pi okpála na Laodikia, la di pi okpála koko inde i u nga ma de-o. <sup>2</sup> Ma akunda me bua uo bedhe ne masi bedhe. U du bini bhú mukunda, u du la di ne djali hana bhú engú li imbilangu na kukulu-o ngaha e-o. U tsia ti da

nambila engú gba Ebhe inde awo li e mawo-o. A akunda napa me, a ko Kilisito ngae makpe. <sup>3</sup> Ndu otia na imbilangu hana inde ayie ka Ebhe-e awo lie bhú ani. <sup>4</sup> Ma ngapa 'ngú bhomu-o, amba kpála bini apíte yi ne babadha eli na eu de. <sup>5</sup> Abana ma nde lie de yi tsutsu bhú kute-e, ma ne yi bhú dabili bini li bhobua. Ma la di ne djali ngu nau me agba yi-e, ndu 'ngú hana ngadholo li kúkú, yi ala la di kpekpeke bhú nabhuka bhú Kilisito.

*Yi lu kpekpeke bhú nabhuka inde u asuno e pi yi-o*

<sup>6</sup> A na paká me yi asia Yesu Kilisito maka Ngámá. Kaka-a, yi du bhú makpètse ne ani. <sup>7</sup> Yi to sie yi bhú ani, mukobho gba yi du la di me a nde ala bhú ani. Yi du ndu 'kpí hana me yi nde ala kpekpeke bhú nabhuka, nakpata lele nasuno inde yi asia e-o. Yi bedhe ne nagie heni pi Ebhe.

<sup>8</sup> 'Ee! Yi lila liyi me kpála bini aholo yi li ekú ne obabadha oeli na eu, di ne imbilangu gba kpálakuti de. Padhá de, anga a ngalu pí nasuno gba okpála, a di ngalu pí angu na obua na doto inde. A ala pí Kilisito de. <sup>9</sup> Padhá de, anga ndu 'ngú hana inde bhú Ebhe-e asia kute bhú Kilisito. A la di ngadu hana libhomu bhú ani. <sup>10</sup> Yi asia la di ndu 'ngú hana má kpekèbhe bhú Kilisito. Ngaani-e, ani ne angu pí 'ndji osisiti bua inde ngau, inde la di ne angu-o.

<sup>11</sup> Bhú nakpètse liyi ne ani-e, yi ali gandja. Gandja angoo-o, akodho ne 'kpa kpála de. Engú bini, gandja angoo-o ayie ka Kilisito, ngubula nagbegbe yi bhú 'ngú inde adu ato yi bhú siti 'ngú-o. <sup>12</sup> Padhá de, anga li yi asia batisimo lie-e, u azi yi bhú dabili bini ne Kilisito. Yi atsia azuku la di bhú dabili bini ne ani. Padhá de, anga yi abhuka angu gba Ebhe

inde azuku ani bhú ká okpála inde amu-o.

<sup>13</sup> Nani kalanu-o, yi adu me yi nde amu li bhobua yi amu kabula siti 'ngú gba yi-o. Padhá de, anga yi adu me yi nde li gandja de. Yi adu la di omupagano. Engú bini, mbia inde-e, Ebhe amene me yi du bhú mukobho ne Kilisito. Ani ambu li sisiti 'ngú gba ní-e hana. <sup>14</sup> Ani abulu balua inde adu na'o 'ngú pí ní, inde adu di napa 'ngú li ní sisiti ka ongu inde u aye e bhúbhú-o. Ani abhø engú ango-o li u abhi ani lie li kulusi-o. <sup>15</sup> Ka kulusi gba Kilisito-o, Ebhe a'e angu gba osisiti bua inde ngau, inde la di ne angu-o. Ani atsia asuno nayie ka uo mbámbá maka okpála na 'kpú inde ngadhuku bhú galasisi li Ndili gba ani aha angu uo lie-o.

<sup>16</sup> Kaka-a, yi a'ó kpála bini de me ani 'o 'ngú pí yi pindji ezu inde yi nde ngazu e, di ne engu inde yi ngandji e, i du di-e pindji engú na anokomia , i du di-e ne epe inde akoto na mbia, di ne ekpí naguo de. <sup>17</sup> Ndu ongu bhomu-o hana ne kulu ongu na babadha inde ngago-o. Engú bini, engú na kukulu-o ne Kilisito. <sup>18</sup> Yi a'ó de me kpála bini 'o 'ngú pí yi-e de, okpála inde ngakpi djali bhú nakø lio ne kuto bhú namene ongu inde ngau lie mau-o de. La di ne bhú nayo oandjelu maka Ebhe-e, u ngaha lio pí ongu inde u ngau e-o. U abedhe ne 'ngbé 'ndji li tata nde lie ade, li mabhundja gba o na kpála-kuti ngatima me u mene e-o. <sup>19</sup> U ngayala nagbite lio li Kilisito inde maka endji na kute. Padhá de, anga kute ango-o libhomu ngasia angu ka Kilisito, a ngagbite la di lie bhú dabili bini maka li Ebhe akunda lie-o.

*Yi amu bhú dabili bini ne Kilisito, yi la di ngakobho bhú dabili bini ne ani*

<sup>20</sup> Li yi akpi lie bhú dabili bini ne Kilisito, yi atsia akoto bhú bali sakpa obua inde ngau pí doto-o, la ka ni yi ngamene 'ngú lie maka okpála na doto? Ka ni yi aziba lie me u ha olili pí yi me: <sup>21</sup> mo ohá ehe inde-e de. Mo olé ehe inde-e de. Mo obú 'kpa mu tété de. <sup>22</sup> Angu na ndu 'he bhomu-o ngandjia hana má kpøkøbhø nedhinga li okpála ngamene kulu lie ne di-o. A bhomu-o olili di ne nasuno gba okpála. <sup>23</sup> A na paká me olili bhomu-o ngau lie maka bhende na imbilangu. Padhá de, anga a ngagama 'ngú pindji mayo gba okpála, di ne nakø lio ne kuto di ne namene kute o kpekpeke. Engú bini, olili ango-o ne angu bini ade ngubula naha angu gumu na sisiti gba kute ní-o.

### 3

*Yi gili ongu inde abhúla*

<sup>1</sup> Yi azuku bhú dabili bini ne Kilisito . Kaka-a, yi gili ongu inde abhúla li bili li Kilisito adu lie li pá 'kpa na kokpa gba Ebhe-o. <sup>2</sup> Yi ha liyi libhomu ngubula engú na abhúla. Yi adu ne naha liyi ngubula engú na píla doto inde-e de. <sup>3</sup> Padhá de, anga yi amu, mukobho gba yi atsia awo lie bhú dabili bini ne Kilisito bhú Ebhe. <sup>4</sup> Mukobho gba yi na kukulu-o ne Kilisito. La di-e, li ani asúno lie lie, yi azé bhadi ne uo bhú sangu-o bhú dabili bini.

<sup>5</sup> Kaka-a, yi bhøø ogumu na doto inde li bhobua yi-e mabhøø: a ko zabhe, zibotu, gumu kute, gumu na sisiti, gumu 'he inde maka nayo ebhe na eu-o. <sup>6</sup> Ongua ongu bhomu ngagbele ke 'ngú gba Ebhe-e pí okpála inde ngandjo 'li ani-e ngae. <sup>7</sup> A bhomu-o lele maka yi adu nani lie li nedhinga yi adu amene siti 'ngú lie-o.

<sup>8</sup> La mbia inde-e, yi bala ndu ongu bhomu-o hana: ndu bua,

nake 'ngú lío, ne siti bua . Sobho ne siti 'li akóto bhú 'bhø yi de. <sup>9</sup> Yi apá eu sùnda yi de, anga yi a'o ká mukobho gba yi na didili-e ne ndu 'ngú ango-o hana. <sup>10</sup> La di-e, yi akolo bhú mukobho na mbia, anga yi akolo okpála na mbia inde li Ebhe ngamene lie me u kolo maka ni Ebhe gba yi, amba u mbila ni ndjindji. <sup>11</sup> Kaka-a, mbia inde-e, angu napa me: a inde-e omaYuda, obhende ne omaYuda ade, a inde-e okpála ali gandja, obhende i li gandja de-e matá ade. Ogandji okpála , di ne obhende i mbila lío ñe nakobho ne okpála bhende bhú bali ade-e matá di ade. Obalise, ne okpála bhende bhú bali ade-e matá di ade. Engú inde pi ní ngbéngbé-e, a ko Kilisito, inde ale pi ní bhú ndu 'ngú hana.

<sup>12</sup> Yi ne okpála gba Ebhe. Ani abhu yi, ani la di ne mukunda pi yi. Kaka-a, a ayo me yi du ne ndjinga. Yi du ne bádha bua. Yi ko liyi ne kuto. Yi du ne guo 'ngú di ne 'ndjá bua. <sup>13</sup> Yi kibila liyi sùnda yi makibila, amba yi du di ne mambu. Li kpála du ne engú ne kilí e-e, ani de mbu li ani maka Ngámá ambu nani li yi lie-o. <sup>14</sup> Bhú ndu 'ngú bhomu-o hana-a, yi du ne mukunda sùnda yi, anga mukunda ne ekpú inde ngagbite yi bhú dabili bini. <sup>15</sup> A ayo me guo 'ngú gba Ebhe-e si kuti e li bua yi. Ebhe a'i yi kabula guo 'ngú ango-o me yi du bhú koli kute bini. Yi du okpála inde ngagie heni pi Ebhe. <sup>16</sup> A ayo me eli gba Kilisito ne obabadha ndu 'ngú gba ani-e hana adu li bua yi. Yi suno ongu sùnda yi, amba yi ha la di líli sùnda yi ne imbilangu hana. Yi li ndu oetsi hana pi Ebhe ne bua yi hana, di ne nagie heni pi ani. <sup>17</sup> Ndu 'ngú hana inde yi ngamene e, i du bhú nagama 'ngú, i du di-e bhú namene ehe-e, yi mene ne 'li

ngámá Yesu, ne nagie heni pi 'Dyi ní Ebhe li pápá gba ani.

*Engú inde a ayo me omabhuka kpata e bhú mukobho na mbia-o*

<sup>18</sup> Ngayi olisi-e, yi manga obhosi gba yi-e mamanga maka a ayo lie me yi mene kala Ngámá-o. <sup>19</sup> Ngayi obhosi-e, yi du ne mukunda pi olisi gba yi-o. Yi aná bhúla yi pi uo de. <sup>20</sup> Ngayi ongisi-e, yi mene líli gba okpála inde azu yi-e bhú ndu 'ngú hana. Padhá de, anga a bhomu-o engú inde li Ngámá akunda e-o. <sup>21</sup> Ngayi odyi ongisi-e, yi adú nambembe bhú 'ndji ongisi gba yi-e de, amba bua uo asía ndala de.

<sup>22</sup> Ngayi obalise-e, yi mene líli gba omakulasi yi pála doto bhú ndu 'ngú hana. Yi améne bha bini li nedhinga u nde ngalila yi lie ngubula me u ziba yi-e de. Engú bini, yi mene líli gba uo-o ne bua bini kabula yi ngamanga Ngámá lie-o. <sup>23</sup> Bhú ndu 'ngú hana yi nde ngamene e, yi mene ne bádha bua mugito me yi ngamemene pi Ngámá. A aú lie de me yi amene pi kpála de. <sup>24</sup> Yi mbila ndjindji me Ngámá ahá makalá pi yi maha. Yi asía bádha 'ngú inde ani a'o e pi okpála gba e masia. Padhá de, anga Musuno na kukulu inde yi ngamene kulu pi e-e, a ko Kilisito. <sup>25</sup> Engú bini, kpála inde amemene siti 'ngú-o, asía makalá na siti 'ngú gba e-o. Padhá de, anga Ebhe gbogbo bhusu okpála de.

#### 4

<sup>1</sup> Ngayi omakulasi okpála-a, yi mene obalise gba yi-e ndjindji. Yi du di pi uo ne ngbili 'ngú . Yi mbila ndjindji me ngayi-e, a di ka yi ne Makala yi inde abhúlá.

*Lili pi omabhuka*

<sup>2</sup> Yi gbite liyi li mayo. Yi du li zaku bhú nayo Ebhe ne nagie



heni pi ani. <sup>3</sup> Bhú mayo gba yi-e, yi yo Ebhe di pi ya, amba ani ha kpadji pi ya ngú nakpokpo eli gba ani, di ne nakpokpo engú inde awo\* lie bhú Kilisito-o. Padhá de, anga ma mbia inde bhú tikpɔ kabula 'ngú ango-o. <sup>4</sup> Yi yo ka Ebhe me ma kpokpo 'ngú lí 'ngú inde awo lie bhomu, di ne me ma suno mbámbá maka a ayo lie-o.

<sup>5</sup> Yi dhuku bhú ká okpála inde ne omakilisito ade-e ne imbilangu, ne namene kulu ndjindji bhú ndu nedhinga gba yi-e hana. <sup>6</sup> A ayo me 'li yi du ndu 'kpí hana ndjindji, ati la di li bua okpála. Yi mbila liyi ne nagie bádha 'li pi ndu okpála hana.

*Polo bhú dabili bini ne obi e yi omabhuka mayi*

<sup>7</sup> Tisiko akpókpo ngali gba ma pi yi ngae. A ko ndai ní na mukunda, a ko bádha kpála na kulu. A ko kpála na kulu na kukulu bhú dabili bini ne ma bhú kulu gba Ngámá-o. <sup>8</sup> Kaka-a, ma atima ani ngaani makpe agba yi ngú nakpokpo lele maka ya nde lie pi yi, di me ani to masi bhú yi. <sup>9</sup> U adhuku bhú dabili bini ne ndai ní na mukunda inde la di ngbingbili, Onezime inde suka yi-o. U akpókpo ndu 'ngú inde ngakodho 'kpí ei-e pi yi hana.

<sup>10</sup> Alisitaluko inde bhú dabili bini ne ma bhú tikpɔ-o, yi yi mayi. A la di-e Maloko, dhongba gba Balanabasi-o. Yi adje engú pindji Maloko adje, i du me ani nde anu agba yi oo, yi de sia ani ndjindji. <sup>11</sup> Yesu, inde u agisila 'li e me Djusitisi-e, yi di yi mayi. Bhú ká omaYuda inde abhuka-a, a ko bha bini okpála bata bhomu, inde ngamene kulu bhú dabili bini ne ma ngubula Nau gba Ebhe-o. U ateteke ma naali.

<sup>12</sup> Epafalasi, inde di ne suka yi-e, yi yi mayi. Ngaani inde kpála na kulu gba Yesu Kilisito-o, ndala li nayo Ebhe pi yi de. Ani ngayo Ebhe me yi du omakilisito na kukulu, amba yi mene la di ndu 'kpí hana engú inde li Ebhe akunda e-o. <sup>13</sup> Ma ti da napa li ani pi yi me, ani ngadje likabhu naali pi yi, pi okpála na gudhu na Laodikia di ne pi obhende na Yelapolisi.† <sup>14</sup> Luka, mutia gba ní na mukunda, di ne Demasi yi yi mayi.

<sup>15</sup> Yi yi ondaise ní na Laodikia di ne obhende na Nimifia bhú dabili bini ne Dadjua gba Ebhe inde bhú 'ti gba ani-o. <sup>16</sup> I du me yi nde atanga balua inde-e, yi de tima pi omabhuka na Dadjua na Laodikia, amba yi tanga di balua inde ayie ka uo oo-o. <sup>17</sup> Yi pa pi Alukipo me: «Mene kulu gba Ngámá inde u a'o e sakpa mu-o ndjindji.»

<sup>18</sup> Ma aye engú nayi yi bhomu-o ngama ne 'kpa ma makpe. Ma ayi yi mayi. Yi a'ili 'to yi de me ma bhú tikpɔ-o de. A ayo me bádha bhú 'bu gba Ebhe-e du bhú dabili bini ne yi.

\* 4:3 4:3 Engú inde awo lie: A ko ngali gba Ebhe inde u mbila nga nani e kalanu de-o. Ngali ango-o, a ko Kilisito. † 4:13 4:13 Ogudhu bhisi inde-e, a de gudhu na Kolosai.

## **Balua na bini gba Polo pi omabhuka na gudhu na Tesalonike Eli na kalanu**

Tesalonike ne 'ngbé gudhu ngámá gba okpála na Loma na Makedonia-o. Polo a'o nani Dadjua gba Ebhe oo pita nayie ka ani bhú Filipoi-o. Má gala kolo me-e, omaYuda adu ne botolo u atsia adu agu ani. Padhá de, anga engú gba Kilisito inde li Polo adu akpokpo e adu anu bha ne kalanu bhú ká okpála inde ne omaYuda ade inde aziba engú na Ebhe gba omaYuda-o. Kaka-a, Polo ayie bhú gudhu na Tesalonike ani akodho 'kpí bhú gudhu na Bloya. Pita ani akolo lie bhú gudhu na Kolito-o, Polo asia ngali ka kilí e Timoté inde u adu amene kulu ne e-e, pindji mukobho na Dadjua gba Ebhe inde abhú gudhu na Tesalonike-o.

Polo aye balua na kalanu pi omabhuka na Tesalonike ngu nato masi di ngu naké bua omakilisito kuto. Polo atsia asia nedhinga bhomu ngu napa pi uo me u du bha namene kulu me u nde a'o bua o kuto me u nde ne 'to o 'to nago gba Kilisito-o.

### **Ongbengbe ongú inde bhú bhuku inde-e ngae inde:**

Eli na kalanu 1:1

Nagie heni ne natoko 1:2 – 3:13

Lili ngu mukobho gba makilisito 4:1-12

Olili pindji nago gba Kilisito 4:13 – 5:11

Nato masi na soso 5:12-22

Eli na soso 5:23-28

*Polo ne obi e yi omabhuka na gudhu na Tesalonike mayi*

<sup>1</sup> Ngayi omabhuka na Dadjua gba 'Dyi ní Ebhe, di ne Ngámá gba ní Yesu Kilisito na gudhu na

Tesalonike-e, ya yi mayi. Ma aye balua inde-e ngama Polo bhú dabili bini ne Silivano di ne Timoté. A ayo me bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

*Mukobho di ne nabhuka gba okpála na Tesalonike*

<sup>2</sup> Ya ngagie heni pi Ebhe piko ngubula ndu yi hana. Ya la di ngabhú 'li yi ndu nedhinga hana ya ngayo Ebhe lie-o. <sup>3</sup> Nedhinga ya ngayo Ebhe lie, ya ngagie heni pi Ebhe 'Dyi ní ndu nedhinga hana li ongú inde: yi ngamene kulu pi Ebhe anga yi abhuka Yesu, yi ngateteke okpála anga yi ne mukunda pi uo, yi ala kpekpeke bhú nabhuka gba yi nedhinga u ngato mbolo li yi lie, anga yi ngabhuka me Ngámá gba ní Yesu Kilisito agie lie magie.

<sup>4</sup> Ondaise ya, ya di ngagie heni pi Ebhe, anga ya ambila ndjindji me Ebhe akunda yi, ani atsia abhu di yi ngu nadu piga gba e makpe. <sup>5</sup> Padhá de, anga nedhinga ya adu lie agba yi-e, ya kpokpo bha bini Bádha Ngali pi yi ne 'li ya de, engú bini, ya akpokpo Bádha Ngali ang-o bhú dabili bini ne angu di ne Bu Bhobua . Ya adu ambila di ndjindji me engú inde ya adu apa e adu kukulu 'ngú. Yi mbila ndjindji lele maka ya adu nadu lie bhú ká yi ngubula me yi du ndjindji-o.

<sup>6</sup> Ngayi-e, yi asia Eli gba Ebhe-e ne djali inde ngayie ka Bu Bhobua, abana u adu ato mbolo li yi lie-o. Abhomu-o, yi amene 'ngú maka ya amene lie di ne maka li Ngámá gba ní Yesu Kilisito amene lie-o. <sup>7</sup> Kaka-a, yi akolo pi ndu omabhuka hana na ndu doto na Makedonia di ne Akai okpála inde li okpála koko ngakpata nganda o.

8 Mbíá inde-e, Eli gba Ngámá-a yangba bha bini nayie agba yi bhú ndu doto na Makedonia ne Akai de, engú bini, ngali pindji nabhuka gba yi bhú Ebhe-e ayangba di ne ndu bili hana. Kaka-a, ya matá ne gumu napa 'ngú gba yi-e pí okpála ade. <sup>9</sup> Padhá de, anga ndu uo hana ngakpokpo 'ngú pindji maka yi asia ya lie nedhinga ya akolo lie agba yi-o. U di ngakpokpo maka yi a'o nakpata oebhe na eu lie ngubula naha liyi pí Ebhe na kukulú inde na makobho-o. Mbíá inde-e, yi ngamene kulu liyi pí ani. <sup>10</sup> U di ngakpokpo me yi ngadjeke me Yesu, Ndili gba Ebhe-e yie abhúlá, go píla doto. A ko kpála inde li Ebhe azuku e bhú ká okpála inde amu, ani ngagbegbe ní bhú mangimbo li Ebhe akódho 'ngú lie-o. Ekpí nakodho 'ngú ango-o akolo masakpe.

## 2

*Kulu gba Polo bhú gudhu na Tesalonike*

<sup>1</sup> Ondaise ya, ngayi makpe-e, yi mbíla ndjindji me enú ya anu e agba yi-e, adu enú na padhá padhá de. <sup>2</sup> Yi mbíla la di ndjindji me, kalanu-o, u ato ngaiza mbolo li ya, ya atsia azu di likabhu bhú gudhu na Filipoi. Engú bini, Ebhe gba ní-e atsia ato masi bhú ya ngubula me ya kpokpo Bádha Ngali gba ní-e pí yi, belegu u adu ale nani kpadji pí ya lie-o. <sup>3</sup> Padhá de, anga e'i inde ya nga'i okpála lie me u ziba Bádha Ngali-e, a ko eu de, a ko di kabula gumu na sisiti de, ya gili la di napite kpála bini de. <sup>4</sup> Engú bini, ya ngakpokpo Bádha Ngali anga Ebhe ale ya, ani atsia au me ya ti da nakpokpokpo li lelele. Abhomu-o, ani atsia aha Bádha Ngali ango-o pí ya me ya kpokpo pí okpála koko. Ya gili nanga li okpála de, ya ngagili

mangbo nanga li Ebhe inde ngale bua ní ngú nambíla engú inde bhúbhú-o.

<sup>5</sup> Yi mbíla ndjindji me ya du apa 'ngú ka djila kpála 'kpí bini de. Ya pa di obabadha 'li ngú nasia ehe bini de. Ebhe apá bhobhomu-o li ya ngae. <sup>6</sup> Ya gili de me okpála dhogo ya-a de, abana i du yi, abana i du di okpála koko. <sup>7</sup> A ayo nako me ya du bhú ká yi maka ongbengbe okpála, anga ya ne obhulu titima gba Kilisito. Engú bini, ya adu bhú ká yi me ya nde abedhe ne bhuku 'ngú maka 'hi ongisi inde ngaku ongisi gba e.

<sup>8</sup> Ya kunda yi naali. Kaka-a, ya du bha bini bedhe de ngú nakpokpo pí yi Bádha Ngali gba Ebhe, engú bini ya adu bedhe ngú nateteke yi ne ndu kpadji hana, anga yi akolo kpákpá na bua ya. <sup>9</sup> Ondaise ya, yi bhundja nga kulu di ne ndala gba ya-o. Nedhinga ya adu akpokpo Bádha Ngali gba Ebhe-e lie pí yi-e, ya amene kulu ngbikpi ne sukpe ngubula me ya adhá bhú kpála bini bhú ká yi de. <sup>10</sup> Yi apá li ya ngayi, li Ebhe tsia pá di li ya ngae me, nedhinga ya adu lie bhú ká yi omabhuka-a, ya amene engú inde nganga li Ebhe, engú na ngbingbili, engú inde li okpála pá siti 'ngú li ya ka e de. <sup>11</sup> Yi mbíla la di ndjindji me ya amene pí kpála bini bini bhú ká yi maka li 'dyi ongisi amemene pí ongisi gba e makpe lie-o. <sup>12</sup> Ya ato masi bhú yi, ya atsia apa di pí yi ne kekele me yi dholo maka li Ebhe akunda lie. Ngaani-e, ani nga'i yi me yi li bhú Nau gba ní, di me yi sia sangu gba ní-o.

<sup>13</sup> La di-e, ya ngagie heni pí Ebhe ndu 'kpí hana, anga yi asia eli gba Ebhe inde ya akpokpo e pí yi-e lie, yi aziba me a ko 'li okpála de. Engú bini, yi aziba me a ko eli gba Ebhe na paká, eli inde di ngamene

kulu bhú yi okpála inde abhukao. <sup>14</sup> Ondaise ya, engú inde akolo li yi-e maka engú inde akolo li okpála abhuka Yesu Kilisito bhú oDadjua gba Ebhe bhú ndu doto na Yudaya-o. Padhá de, anga yi azu likabhu bhomu-o sakpa ondaise yi makpe na kuti bini maka u azu di lie sakpa omaYuda-o. <sup>15</sup> Ngauo-o, u abhøø Ngámá Yesu di ne opolofeta gba Ebhe, u atsia ato di mbolo li ya. U nga li Ebhe di ne li okpála de. <sup>16</sup> Padhá de, anga u ngamene ne kpéke me o ni kpadji pi ya me ya akpókpo Bádha Ngali pi okpála inde ne omaYuda ade-e de, ngubula me u akóbho de. U ngamene lie mo-o, u ngabe ndu siti 'ngú gba o ndu 'kpí hana. La ali soso-o, ke 'ngú gba Ebhe-e atí pí uo.

*Gumu gba Polo ngu nau omabhuka na Tesalonike*

<sup>17</sup> Ondaise ya, pi ya-a, pita nedhinga bedi ní agbo bhusu ní lie ne yi bhú kute, bua ní nde bha ne yi bhú dabili bini-e, ya amene ne kpéke hana me ya nu u yi, anga ya adu ne gumu naali me ya u matá yi. <sup>18</sup> Ya adu ne gumu me ya gie liya agba yi. Ngama Polo, ma ale bhutsibhutsi. La-a, Satana ani kpadji pi ya. <sup>19</sup> A ko paká. Ta na'o 'to ya 'to Ngámá-a, a ko yi. Ta djali gba ya-a, a ko yi. Nedhinga li Ngámá gba ní Yesu Kilisito agó lie, yi adú pi ya maka ndata na ngámá inde uahaha e pi okpála inde agboko 'gú-o. Ya tsia dú kala ani ne gindaginda. <sup>20</sup> A moko, ya ne gindaginda kabula yi, ya la di ngakpi djali kabula yi.

### 3

<sup>1</sup> Abhomu-o, i nde lie me ya nde ti da nako nakibila nagbo bhusu ní ne yi de-e, ya au ndjindji me ya tigala bhú gudhu na Atene

títí ya, <sup>2</sup> amba ya tima ndai ní Timoté agba yi mada ya. Ani ngamene kulu bhú dabili bini ne Ebhe ngu nakpokpo Bádha Ngali gba Kilisito-o. Ya atima ani me ani be ndu nabhuka gba yi, amba ani tsia to di masi bhú yi, <sup>3</sup> ngubula me suka yi bini a'ó ká nabhuka gba e ka olikabhu yi ngazu e mbia inde-e de. Padhá de, anga ngayi makpe-e, yi mbila ndjindji me Ebhe aziba ngae me ní zu ngua likabhu bhomu. <sup>4</sup> A na paká me, nedhinga ya adu lie agba yi-e, ya adu apa pi yi me okpála ató mbolo li ní. Yi mbila me, a la bhadi ngae inde akolo li yi inde. <sup>5</sup> Li ma au lie me ma ti matá da nagbite bua ma de-e, ma atsia atima Timoté me ani nu tsia lele nabhuka gba yi-o. Ma atima ani, anga ma adu akpe me djabulu alé yi de, di me kulu gba ya inde ya amene e bhú ká yi-e, akólo padhá de.

*Polo asia angu li bua e ka nabhuka gba okpála na Tesalonike*

<sup>6</sup> Engú bini, Timoté akolo li ya mbia inde-e bhú 'nu ani ayie lie agba yi-o. Ani apa pi ya bádha ngali me yi alu kpekpeke bhú nabhuka di me yi ne mukunda sunda yi. Ani apa di pi ya me yi ngabhundja ya ndu 'kpí hana ne bádha bua, yi la di ngakunda me yi u matá ya maka ya ngakunda di lie me ya u yi-o. <sup>7</sup> Ondaise ya, ka nadjé engú li Timoté apa e pi ya-a, abana ya ngazu likabhu di ne u ngato mbolo li ya lie, ya asia angu li bua ya ka yi. Padhá de, anga ya adje me yi ngalila nabhuka gba yi bhú Yesu-o ndjindji. <sup>8</sup> Mbia inde-e, ya abi matá angu, anga yi alu kpekpeke bhú nabhuka Ngámá. <sup>9</sup> Ya ti da nagie heni pi Ebhe lele pi ka ngua djali ya abedhe ne e li 'ngú gba yi kala ani-e? <sup>10</sup> Ngbikpi ne sukpe, ya ngazi kekele li nayo

Ebhe me ani mene me ní u matá liní ne yi, amba ya bedhe 'bhè 'he inde aneke bhú nabhuka gba yi-o.

<sup>11</sup> A ayo me Ebhe 'Dyi ní ngae makpe, di ne Ngámá gba ní Yesu bhulu kpadji pi ya li pápá gba yi. <sup>12</sup> A ayo me Ngámá be ndu mukunda yi nde ne e sunda yi di ne bhe yi nde ne e pi ndu okpála hana li lele mukunda ya nde di ne e pi yi ko. <sup>13</sup> A ayo me ani ha di angu pi yi li bua yi, amba yi du bubu, amba 'Dyi ní Ebhe aú siti 'ngú napapa li yi de, bhú nedhinga li Ngámá gba ní Yesu agó lie bhú dabili bini ne okpála na bububu gba e hana-o. [A adu moko.]

#### 4

*Nadu bhú mukobho inde ngaha djali pi Ebhe*

<sup>1</sup> Ngú nabu tata-a, ondaise ya, ya asuno pi yi lele maka ayo lie me mukobho gba yi-e ha djali pi Ebhe-o. A na paká me yi la bhadi ngamemene moko. Ya la ngayo ka yi di ne nakikiliki liya pi yi ne 'li Ngámá Yesu me, yi nu matá ne di ne kalanu ane bhende yi ngamene e ko. <sup>2</sup> Padhá de, anga yi mbila olili inde ya aha e pi yi bhú nasuno inde ya asuno e pi yi ne 'li Ngámá Yesu-o hana. <sup>3</sup> Ebhe akunda me yi du bubu ngú nasuno me yi libhomu pi ni. A akunda napa me, yi adú akunda olisi di ne obhosi ngangá de, <sup>4</sup> kpála bini ne bini bhú ká yi mbila nalila kute e\* me adu bubu da napa me u manga yi.

<sup>5</sup> Yi a'ó de me gumu kute ha angu yi maka li omupagano inde i mbila Ebhe de-e ngamemene lie de. <sup>6</sup> Bhú engú bhomu-o, a ayo de me kpála bini mene siti 'ngú li pá bili gba kilí e de. Ani apite la di ani de. Ya agbele nako 'dje yi tété

kpekpeke me, Ngámá a'ó 'ngú pí okpála inde ngamene ngua 'ngú bhomu. <sup>7</sup> Padhá de, anga Ebhe 'i ní ngú nadu bhú zibotu de, ani a'i mangbo ní ngú nadu bubu kala ni. <sup>8</sup> Kaka-a, kpála inde ngandjo lili bhomu-o, ani ndjo kpála bini de, ani ngandjo mangbo Ebhe inde ngaha Bu Bhobua gba e pi yi-o.

<sup>9</sup> Pindji 'ngú bhe atsia mukunda sunda yi-e, yi ne gumu ade me ya ye engú pi yi pépé-e de. Padhá de, anga ngayi makpe-e, Ebhe asuno pi yi lele maka a ayo lie me yi kanda liyi-o. <sup>10</sup> A ko la bhadi koli mukunda bini inde yi ngasuno e pi ondaise ní hana na ndu doto na Makedonia-o. La-a, ya ngayo ka yi me yi nu ne di ne kalanu. <sup>11</sup> La di-e, yi du nadu ne guo 'ngú sunda yi. Yi adú ali bhú 'ngú bhe i tsia yi de-e de. Yi du amene kulu ne 'kpa yi makpe ngubula mukobho gba yi-e maka ya apa nako pi yi lie ko. <sup>12</sup> Yi mene mo-o, li omupagano mánga yi, yi dhá la di bhú kpála bini de.

*Nagie lie ka Ngámá Yesu*

<sup>13</sup> Ondaise ya, ya akunda me yi mbila kukulu 'ngú pindji engú gba okpála inde amu, ngubula me yi adú ne likabhu maka okpála bhende i bhuka de-e de. Padhá de, anga pi uo-o, pita nakpi-e, okpála amu-o zúku de. <sup>14</sup> Ní abhuka me Yesu akpi, ani atsia azuku. Ní abhuka bhadi moko me Ebhe apó bhúla okpála inde amu me u nde abhuka Yesu-o bhú dabili bini ne ani.

<sup>15</sup> A inde-e engú ya ngapa e pi yi maka li Ngámá asuno lie me, li 'kpí nago ka ni-e, nganí okpála bhende adú nga uu-o, ní kódho 'kpí kala okpála inde amu-o de. <sup>16</sup> Padhá de, anga Ngámá ayie abhúla ngae makpe ngú nako píla doto. Li nedhinga ang-o,

\* 4:4 4:4 Nambila nalila kute o: A akunda napa me u manga yi. U ti da napa di li bili inde-e me: «Naha lio li lelele.»

ani há líli kpekpeke, li ngámá gba oandjelu-o bini tsia súla, li toti gba Ebhe 'ú lie. Abhomu-o, li okpála inde amu me u nde abhuka Kilisito tsia zúku ngaiza kalanu ngao. <sup>17</sup> Pipita-a, nganí okpála bhende adú bhú mukobho li nedhinga bhomu-o, Ebhe a'é ní bhú ndindi bhú dabili bini ne obhende azuku-o ngubula me ní nu kə liní ne Ngámá abhú 'kpí. Abhomu-o, ní tsia dú bhú dabili bini ne Ngámá duduma ne duduma. <sup>18</sup> Kaka-a, yi teteke liyi sunda yi ne oeli bhomu.

## 5

<sup>1</sup> Ondaise ya, li bhende atsia ekpí li Yesu agie lie lie, yi ne gumu ade me u ye 'ngú pi yi pépé-e de. <sup>2</sup> Padhá de, anga yi mbila ndjindji me ekpí nago ka Ngámá-a akóto li ní bhú gbilikiti maka bhulu 'zi agógo lie sukpe me 'to kpála nde 'to ani ade-o. <sup>3</sup> Nedhinga li okpála apá lie me: «Egú ade, ní bhú guo 'ngú-o», a la bhomu-o nedhinga li likabhu atí pí uo lie má kii-o. A atí pí uo maka kuo nazu ká bhú 'bu eho na 'bhi adhidhika lie-o. Likabhu ang-o néke uo de.

<sup>4</sup> Engú bini, ngayi ondaise ya-a, yi bhú biti ade. Kaka-a, ekpí ang-o kóto li yi bhú gbilikiti maka bhulu 'zi agógo lie de. <sup>5</sup> Ma apa pi yi mo-o, anga ndu yi hana yi ne okpála na zi 'kpí, yi la di ne okpála na ngbikpi. Ní ne okpála na sukpe ade, ní la di ne okpála na biti ade. <sup>6</sup> Kaka-a, a ayo de me ní du tila maka okpála koko-o de. Engú bini, a ayo me ní du li zuku, amba ní du bedhe ndu nedhinga hana. <sup>7</sup> Padhá de, anga obhulu nala ela, lala sukpe, obhulu nalangba, lalangba sukpe.

<sup>8</sup> Engú bini, nganí okpála na ngbikpi-e, a ayo me ní du bedhe

ndu nedhinga hana. Ní ha nabhuka ne mukunda maka kopí. Ní abhuka me Yesu akóbho ní makobho. Kaka-a, ní lila mabhundja bhomu-o maka ndata li osudha atoto e\* ngú nalila lie bhú 'gú-o. <sup>9</sup> Padhá de, anga Ebhe 'i ní ngú nasia ke 'ngú gba e de. Engú bini, ani a'i ní me ní sia mukobho li kpadji gba Ngámá gba ní Yesu Kilisito. <sup>10</sup> Yesu akpi pi ní ngubula me abana i du me ní nde nga bha tété, ne me ní mu-o, nedhinga ani agie lie lie, ní de du bhú mukobho bhú dabili bini ne ní. <sup>11</sup> Kaka-a, yi to masi bhú yi sunda yi, amba yi tsia teteke liyi bhú nabhuka maka yi nde ngamemene lie-o.

### *Polo aha olili na soso*

<sup>12</sup> Ondaise ya, ya ngayo ka yi me yi du ne mazima pi obhende ngamene kpeke kulu bhú ká yi, inde li Ebhe a'o o me u du alu kala yi, inde di ngaha líli pi yi-o. <sup>13</sup> Yi du pi uo ne mazima di ne mukunda naali ka kulu gba uo-o. Yi du ne guo 'ngú sunda yi.

<sup>14</sup> Ondaise ya, ya ngayo ka yi me yi gbele 'dje okpála bhe na ipio-o. Yi to masi bhú obhende ne tsulu-o. Yi teteke obhende bhuhuku-o. Yi du ne 'ndjá bua pi ndu okpála hana. <sup>15</sup> Yi lila liyi me kpála bini agie siti pi siti de. Engú bini, yi gili namene bádha 'ngú sunda yi ndu 'kpí hana, di ne pi ndu okpála hana.

<sup>16</sup> Yi du ne djali ndu 'kpí hana. <sup>17</sup> Yi zi kekele li nayo Ebhe. <sup>18</sup> Yi gie heni pi Ebhe li ndu 'ngú hana, anga a bhomu-o engú inde li Ebhe akunda me yi mene e bhú mukobho gba yi bhú Yesu Kilisito-o.

<sup>19</sup> Yi aní kpadji li kulu gba Bu Bhobua-a de. <sup>20</sup> Yi andjó 'li opolofeta de. <sup>21</sup> Engú bini, yi gili 'ngú pindji ndu 'ngú hana, amba yi dhedhe li bhe na babadha-o.

\* 5:8 5:8 Ndata li osudha atoto e: A ko ndata na kalase inde li osudha atoto e ngú nalila 'ndji o bhú 'gú-o.

22 Yi lila liyi ka ndu osisiti 'ngú hana.

23 A ayo me Ebhe ngae makpe inde bhulu guo 'ngú-o mene me yi du libhomu pi ni. Ani lila 'lá yi libhomu, ne bua yi, ne mukobho gba yi, ne kute yi me okpála aú engú na sisiti napapa li yi de, akólo li 'kpí li Ngámá gba ní Yesu Kilisito agié lie lie-o. 24 Ebhe inde nga'i yi-e améne me yi du libhomu pi ni, anga ani memene ndu 'ngú hana inde ani apapa e-o.

25 Ondaise ya, yi yo di Ebhe ngú ya.

26 Yi yi ndu ondaise ní hana ne nakama uo li kute yi.

27 Ma ayo ka yi ne 'li Ngámá me, yi tanga balua inde-e pi ndu ondaise ní hana.

28 A ayo me bádha bhú 'bu gba Ngámá gba ní Yesu Kilisito-o du ne yi bhú dabili bini.

## **Balua na bhisi gba Polo pi omabhuka na gudhu na Tesalonike Eli na kalanu**

Li nadjé lio de-e pindji nago gba Kilisito adu lie agbe tolo bhú Dadjua gba Ebhe na Tesalonike-e, Polo atsia aye balua na bhisi gba e inde-e pindji nabhuka inde me ekpi nago gba ngámá-a akolo. Ani atsia apa me a mo-o ade, do ani de-e, kala nago ka Kilisito-o, engú nasisiti di ne bhe nato mbolo li okpála-a, inde ayie ka kpála na tsulutsulu u a'i me «Bhulu yala» adú naali ané mane (2:3). Kpála ango-o adú naga Kilisito.

Polo ngapa pi okpála i ngatanga balua inde-e me, u lu bha kpekpeke bhú nabhuka, abana okpekpeke da 'ngú ne olikabhu du bha pi-ie, u du bha namene kulu ngubula nasia mukobho maka li Polo ne obi e ngamemene lie-o, amba u du ne 'ndjá bua ne namene bádha 'ngú.

### **Ongbengbe ongú inde bhú bhuku inde-e ngae inde:**

Eli na kalanu 1:1-2

Natoko ne nadhogé 1:3-12

Lili pindji nago gba Kilisito 2:1-17

Engú inde a ayo ngubula mukobho gba makilisito 3:1-15

Eli na soso 3:16-18

*Polo ne obi e yi omabhuka na gudhu na Tesalonike mayi*

<sup>1</sup> Ngayi omabhuka na Dadjua gba 'Dyi ní Ebhe di ne Ngámá gba ní Yesu Kilisito na gudhu na Tesalonike-e, ya yi yi mayi. Ma aye balua inde-e ngama Polo, bhú dabili bini ne Silivano di ne Timoté. <sup>2</sup> A ayo me bádha bhú 'bu ne guo 'ngú gba 'Dyi ní Ebhe di ne

Ngámá gba ní Yesu Kilisito-o du ne yi bhú dabili bini.

*Polo agie heni pi Ebhe, ani atsia ato masi bhú omabhuka*

<sup>3</sup> A ayo me ya gie heni pi Ebhe ndu 'kpi hana ngubula yi ondaise ya. A la bhadi ndjindji me ya mene moko, anga nabhuka gba yi-e nganu ne kalanu naali. La di-e, mukunda li ndu yi hana nde ne e sunda yi-e nganu ne kalanu. <sup>4</sup> Kaka-a, ya ngapa 'ngú gba yi-e ne gindaginda bhú oDadjua gba Ebhe kabula kekele di ne nabhuka gba yi, abana u ngato mbolo li yi lie di ne yi ngazu likabhu lie ne ndu kpadji hana-o.

<sup>5</sup> Bhothomu-o ngasuno me Ebhe ngakodho 'ngú ngbingbili. Padhá de, anga ka olikabhu inde yi ngazu e-e, Ebhe aú me yi ati ne nali bhú Nau gba ni inde yi ngazu likabhu ngú e ko. <sup>6</sup> Li Ebhe nde lie ne ngbili kpála-a, ani agie olikabhu pi okpála inde i ngaha likabhu pi yi ko. <sup>7</sup> La di-e, ani ahá guo 'ngú pi yi okpála inde ngadje likabhu, ani tsia há di guo 'ngú pi ya. Ani améne ongú bhomu-o li 'kpi li Ngámá gba ní Yesu ayie lie abhulá, ani tsia gó bhú dabili bini ne oandjelu na angu gba e-o. <sup>8</sup> Ani agó bhú dingidhi djua ngubula na'o 'ngú pi okpála inde i kunda nambila Ebhe de, inde ngayala di naziba Bádha Ngali gba Ngámá gba ní Yesu-o. <sup>9</sup> Makalá na siti 'ngú gba uo-o, adú likabhu na duduma, li bili inde u adú lie de Ngámá Yesu ne Nau na sangu di ne angu gba e tsutsu-o. <sup>10</sup> Engú ango-o akódho 'kpi li 'kpi ani agó lie ngubula me ndu okpála gba ni hana inde abhuka ni-e, dhogé ni, amba u toko di ni. Ngayi di-e, yi adú bhú ká okpála bhomu. Padhá de, anga yi abhuka ngali inde ya akpokpo e pi yi-o.



<sup>11</sup> Kaka-a, ya di ngayo Ebhe ndu 'kpí hana ngubula yi me Ebhe gba ní-e mene me yi dhuku li lele maka aní a'i yi lie-o. Ya ngayo ka aní me bhú angu gba aní-e, aní ha angu pí yi ngú namene obabadha kulu inde yi akunda namene e akólo li soso, kabula nabhuka gba yi bhú Yesu-o. <sup>12</sup> Ya la di ngayo Ebhe ngubula me, okpála dhogò 'li Ngámá gba ní Yesu kabula yi, amba u dhogò di yi kabula aní. Bhobhomu-o améne lie ka bádha bhú 'bu inde li 'Dyi ní Ebhe di ne Ngámá gba ní Yesu Kilisito asuno e pí yi-o.

## 2

*Bhulu Nayala líli gba Ebhe-e agó ngaiza kalanu*

<sup>1</sup> Ondaise ya, Ngámá gba ní Yesu Kilisito agó mago, ní tsia pékòbhe bhúla ní de aní. Li 'ngú angó-o, ya ngayo ka yi me, <sup>2</sup> bua yi angámá má gala de, 'ndji yi angbínjí di-i de. Yi dje ka kpála bini me Bu Bhobua apa pí ni me: «Ekpí nago ka Ngámá akolo», ne me ya apa pí ni mo-o, i du di-e me ya aye bhú balua mo-o, yi azíba de. <sup>3</sup> Kpála bini apíte belegu yi de má kpó! Padhá de, anga kala nago ka Ngámá Yesu-o, agó ngaiza ne nedhinga na kpéke 'ndji li 'ngú gba Ebhe. Pipita-a, li Bhulu Nayala líli gba Ebhe-e kóto. Kpála angó-o ngakpata kpadji na djua na duduma. Ebhe andjia engú gba aní-e mandjia. <sup>4</sup> Kpála angó-o ayie bhúlá, aní há 'gú ne Ebhe di ne ndu oehe koko hana inde li okpála ngau e maka oebhe, inde u nde la di ngadhogò o-o. Aní tsia pá me ní ane ndu uo hana. Aní anú nadu belegu bhú 'ngbé 'ti Ebhe gba omaYuda, aní tsia pá me ní ne Ebhe.

<sup>5</sup> To yi a'fí de me nedhinga ní adu nga bha lie ne yi-e, ma adu apa engú inde-e pí yi uu-o de.

<sup>6</sup> Yi mbila la bhadi hana me ehe inde ngani kpadji pí kpála angó-o me aní akóto mbia inde-e de-e ne ní-ie, amba aní koto bha bini li nedhinga inde li Ebhe a'o e pí aní-o. <sup>7</sup> Padhá de, anga angu inde awo lie mawo gba kpéke 'ndji bhomu-o akpo lita kulu akpo. Engú bini, kpála inde ngani kpadji pí aní-e adu nga bha o-o akólo li nedhinga u a'é aní lie-o.

<sup>8</sup> Abhomu-o, li Bhulu Nayala líli gba Ebhe-e tsia kóto. Ngámá Yesu bhéle aní bha ne mbulu 'wo e, aní tsia ndjia angu aní ne sangu inde aní agó ne e-o. <sup>9</sup> Bhulu Nayala líli angó-o agó bhú angu gba Satana, aní tsia méne ndu djua ongamba 'ngú, ne ndu okiaka 'ngú hana, di ne ongbengbe 'ngú ngú napite okpála. <sup>10</sup> Aní améne ndu djua osisiti 'ngú hana ngubula napite okpála bhende ngakpata kpadji na djua na duduma-o. Ebhe andjia engú gba uo-o mandjia, anga u kunda kukulu 'ngú inde i tí da nako nakobho uo-o de, u tsia bhuka di kukulu 'ngú angó-o de. <sup>11</sup> Kaka-a, Ebhe ató siti mabhundja bhú uo, i tsia píte uo ngubula me u bhuka ongú na eu, <sup>12</sup> amba Ebhe 'o 'ngú pí ndu okpála hana inde i bhuka kukulu 'ngú de-o, inde adu akpi mangbo ndjili li siti 'ngú-o.

*Yi lu kpekpeke bhú 'bu nabhuka*

<sup>13</sup> Ondaise ya inde li Ngámá akunda o, pí ya-a, a ayo me ya gie heni pí Ebhe ndu 'kpí hana li 'ngú gba yi-o. Padhá de, anga Ebhe abhu nani yi nayie li lilita ngubula me yi sia mukobho li kpadji gba Bu Bhobua inde ngamene me yi du bubu, di ne li kpadji na nabhuka inde yi nde ne e bhú kukulu 'ngú-o. <sup>14</sup> Ebhe a'i yi me yi sia mukobho bhomu-o li kpadji na Bádha Ngali inde ya akpokpo e pí yi-o. Aní a'i yi me yi sia di sangu

gba Ngámá gba ní Yesu Kilisito-o. <sup>15</sup> Kaka-a, ondaise ya, yi lu kpekpeke bhú 'bu nabhuka gba yi-o. Yi lila kpekpeke ongú inde ya asuno e pi yi nedhinga ya adu lie agba yi di ne bhe ya aye e pi yi bhú balua-o.

<sup>16-17</sup> A ayo me Ngámá gba ní Yesu Kilisito ngae makpe di ne 'Dyi ní Ebhe, bedhe bua yi ne masi. A ayo me u ha angu pi yi ngubula me yi du namene ndu 'kpi hana bádha 'ngú, abana i du bhú nagama 'ngú, abana i du bhú namene kulu. Padhá de, anga Ebhe akunda ní, ani aha di kpeke bua na duduma pi ní ka bádha bhú 'bu gba e-o. Ani atsia amene di me ní 'o 'to ní 'to ni na paká paká.

### 3

*Polo apa pi omabhuka me u yo Ebhe ngú ni*

<sup>1</sup> Ngú nabu tata-a, ondaise ya, yi yo Ebhe ngú ya, amba eli gba Ngámá-a yangba má gala, amba okpála inde ngadjedje-e, mene engú inde li eli ango-o ngapa e maka yi ngamemene lie-o. <sup>2</sup> Yi yo di Ebhe me ani kobho ya sakpa osisiti okpála na mbedhembdeho. Padhá de, anga a ko de me ndu okpála hana akunda nabhuka Bádha Ngali-e de. <sup>3</sup> Engú bini, Ngámá Yesu ne kpála inde amemene engú maka ani apa lie-o. Ani ahá angu pi yi bhú nabhuka, ani tsia lila yi sakpa Siti. <sup>4</sup> Ya abhuka ne 'li Ngámá Yesu me, engú inde ya ngapa e pi yi-e, yi ngamemene moko, yi améne la bhadi mo-o ne kalanu. <sup>5</sup> A ayo me Ngámá leke bua yi ngú nambila lele maka li Ebhe akunda yi lie, di ne lele maka li Kilisito ngaha kpeke bua pi yi lie bhú nabhuka-o.

*Polo agbele 'dje omabhuka li 'ngú na ipio*

<sup>6</sup> Ondaise ya, ya apa pi yi ne 'li Ngámá gba ní Yesu Kilisito me, yi akpétse liyi bhú dabili bini ne ondaise ní na ipio, inde i kpata líli inde ya aha e pi yi de-e de. <sup>7</sup> Padhá de, anga ngayi makpe-e, yi mbila maka a ayo lie me yi kpata lele mukobho gba ya-a ndjindji. Nedhinga ya adu lie agba yi-e, ya du ne ipio de. <sup>8</sup> Ya yo ka kpála bini de me ani ha 'zu pi ya padhá-a de. Engú bini, ya aziba ndala ne likabhu, ya atsia amene kulu ngbikpi ne sukpe ngú napa me ya adhá bhú kpála bini bhú ká yi de. <sup>9</sup> A ayo nako me ya sia 'he ka yi padhá, engú bini, ya mene nako mo-o de, anga ya akunda me yi kpata lele mukobho gba ya-o. <sup>10</sup> Nedhinga ya adu lie agba yi-e, ya aha líli inde-e pi yi me: «Li kpála kunda namene kulu de-e, a ayo di de me ani zu 'he-e de.»

<sup>11</sup> Ya ngapa mo-o, anga ya adje me okpála koko bhú ká yi ne ipio. U memene kulu de. U bha bini nga'o 'to o li 'ngú bhe i tsia o de. <sup>12</sup> Pi okpála bhomu-o, ya ngagbele 'dje uo, ya di ngayo ka uo ne 'li Ngámá Yesu Kilisito me, a ayo me u mene kulu maka ayo lie, amba u sia ezú inde akoto li 'kpa o makpe.

<sup>13</sup> La pi yi ondaise ya-a, yi andála li namene bádha 'ngú de. <sup>14</sup> Li kpála kpata engú inde ya aye e pi yi bhú balua inde-e de-e, yi de bhele djila yi li ani. Yi améne 'he bhú dabili bini ne ani de, ngubula me ani dje numu. <sup>15</sup> Engú bini, yi aú ani maka bhulu yala ka yi de. Yi gbele mangbo 'dje ani maka saka yi.

*Polo ayo bisagu pi omabhuka na gudhu na Tesalonike*

<sup>16</sup> A ayo me Ngámá na guo 'ngú-o, ha guo 'ngú pi yi ngae makpe ndu 'kpi hana ne bhú ndu 'ngú hana. A ayo me Ngámá du ne ndu yi hana bhú dabili bini.

<sup>17</sup> Ngama Polo, ma aye engú na soso inde apa me ma yi yi mayi inde-e ne 'kpa ma makpe. A bhomá-o lele nadele 'kpa ma bhú balúa gba ma-o.

<sup>18</sup> A ayo me bádha bhú 'bu gba Ngámá gba ní Yesu Kilisito-o dú bhú dabili bini ne ndu yi hana.

## Balua na bini gba Polo pi Timoté Eli na kalanu

Timoté ne makombi bini inde adu nani makilisito bhú Adji Minele. 'Hi ani nani ne maYuda, 'dyi ani atsia adu nani ne Giliki. Ani akolo nani kpála nateteke Polo bhú dholo gba e nakpokpo Bádha Ngali gba Yesu Kilisito . Balua na bini gba Polo pi Timoté-o, ngakpokpo 'ngú pindji ong-bengbe 'ngú bata.

Balua ango-o ngakpo ngaiza 'ngú pindji nalila lio ka omusuno na eu inde bhú Piga gba Ebhe-o. Nasuno ango-o a ko nakpetse mabhundja pindji omaYuda ne okpála inde ne omaYuda ade inde adu nani pindji napa me bádha 'ngú pála doto ade. A la di ngapa me, u ti da bha nasia makobho ka imbila 'ngú inde awo lie mawo, a la di ne nakpe nazu oehe koko, di ne naha lio maka eḷe ne bhoko de. **Ongbengbe ongú inde bhú bhuku inde-e ngae inde:**

Eli na kalanu 1:1-2

Líli pindji Piga gba Ebhe ne okpála inde ngadjedjele-o 1:3 - 3:16

Líli pi Timoté pindji kulu gba e-o 4:1 - 6:21

*Polo yi Timoté mayi*

<sup>1-2</sup> Timoté, kukulu ndili gba ma bhú 'bu nabhuka-a , a ayo me bádha bhú 'bu ne ndjinga di ne guo 'ngú gba 'Dyi ní Ebhe ne Yesu Kilisito , Ngámá gba ní-e du bhú dabili bini ne mu. Ma aye balua inde-e pi mu ngama Polo. Ma ne bhulu titima gba Yesu Kilisito maka li Ebhe, Makobho gba ní, ngauo ne Yesu Kilisito inde ní nga'o 'to ní 'to e aha líli muma lie ngú nakpokpo Bádha Ngali ko.

*Polo apa me a ayo nayoko omusuno na eu-o mayoko*

<sup>3</sup> Maka ma aha nako líli pi mu lie li nedhinga ma adu anu lie bhú ndu doto na Makedonia-a, du bha bhú gadhu na Efeso oo, amba mu pa pi omusuno na eu inde oo me, u 'o nasuno bhomu-o ma'o. <sup>4</sup> Pa pi uo me, u 'o nakpokpo ongú na padhá padhá inde li okpála ngagbe e bhú 'ndji o ma'o. U 'o di nakpokpo ndjandja okpokpodumu ma'o. Padhá de, anga ongú bhomu-o ngagbe okpekebhe na padhá padhá inde i dyudyo kulu inde li Ebhe ngamene e bhú makobho gba okpála de. Kulu ango-o ngadyudyo lie ne kalanu ka nabhuka.

<sup>5</sup> Olíli ma aha e pi mu bhomu-o, a ngubula me okpála du ne mukunda sunda o. Mukunda ango-o ngayie li bádha bua, li bua nakpokpo kú 'ngú ndjindji, la di ne bhú nabhuka na kukulu. <sup>6</sup> Okpála koko ayie li ngbili kpadji bhomu-o ayie, u atsia azi 'ndji o bhú namene okpekebhe na padhá padhá. <sup>7</sup> U ngapa me o ne omusuno na líli gba Ebhe, engú bini, ngauo makpe-e, u ke mboli engú inde u ngasuno e pi okpála koko ne angu o hana-a belega de bini.

*Ebhe aha líli gba e pi ní ngubula ní?*

<sup>8</sup> Ní mbila hana me líli gba Ebhe-e ndjindji, i du me u nde ngakpakpata maka a ayo lie ko.

<sup>9</sup> Ní mbila la di hana me, Ebhe 'o líli pi okpála bhende ngadhaku ngbingbili-e de. Engú bini, ani a'o pi obhende ngau líli gba ani-e padhá di ne pi okpála na kpekpeke 'ndji. Ani a'o pi okpála bhende ngandjo 'li ani, di ne pi obhende ngamene siti 'ngú-o. Ani a'o pi okpála inde i manga ani de, i manga la di ohe na bububu gba ani-e de-o. Ani a'o pi okpála

bhende ngabhili odyi o, i du di-e ohi o-o. Ani a'o pi okpála bhende ngabhili obi o bhú gandji.

<sup>10</sup> Ani a'o pi obhosi bhende ngakunda olisi di ne pi olisi bhende ngakunda obhosi ngangá-o. Ani a'o pi obhosi bhende ngakunda lio ne obi o obhosi, i du di-e olisi bhende ngakunda lio ne obi o olisi. Ani a'o pi okpála bhende ngatsindji obalise. Ani a'o pi obhulu eu di ne pi okpála bhende ngatú silika pí eu. Ani a'o pi ndu okpála hana inde ngamene engú kpi ne bhende na kukulu ní ngasuno e ko. <sup>11</sup> Nasuno angoo bhú Bádha Ngali inde li Ebhe aha e muma-o. Bádha Ngali angoo ngasuno sangu gba Ebhe inde ngaha bádha 'ngú pi okpála-o.

### *Polo agie heni pi Ebhe*

<sup>12</sup> Ma ngagie heni pi Yesu Kilisito, Ngámá gba ní inde aha angu muma ngú namene kulu gba e-o. Ma ngagie heni pi ani, anga ani au me ma ti da namemene, Abhomu-o, ani atsia abhu ma nganga. <sup>13</sup> La nani kalanu-o, ma adu apa osisiti 'ngú li ani, ma adu ato mbolo li okpála koko ka u abhuka ani lie-o, ma adu la di asosobho ani. Abana ma adu amene lie mo-o, ani adje ndjinga ma. Padhá de, anga ma bhuka nga nani ani de. Ma mbila la di nani de me Yesu ne Masiya-a de.

<sup>14</sup> Engú bini, Ngámá gba ní-e atsia asuno bádha bhú 'bu gba e muma ane mane. Ani aha nabhuka muma, di ne mukunda inde bhú nakpøtø liní ne Yesu Kilisito-o. <sup>15</sup> Engú inde ma adji apa e inde-e, a ko kukulu 'ngú inde a ayo me ndu okpála hana bhuka e ne bua o bini. Engú angoo me, Yesu Kilisito ago nani píla doto ngú nakobho okpála na sisiti. Yi mbila la me ngámá ngámá bhú

ká uo ne ma. <sup>16</sup> Abana ma adu lie ne ngámá ngámá bhú ká uo ngama-a, Ebhe adje ndjinga ma. Ebhe amene muma mo-o ngubula me ndu okpála hana inde abhúka Yesu Kilisito-o, u u lele 'ndjá bua gba ni-o, amba u bhuka-a, u de sia mukobho na duduma. <sup>17</sup> A ayo me ndu okpála hana dhøø Ebhe, amba u toko ani duduma ne duduma. A adu moko. A ko 'Ngbé Ngámá na duduma, i kpi kpi de, li kpála uu di-e de. A ko bha koli Ebhe bha ngae kpi e kpi!

<sup>18</sup> Timoté, ndika ma, ma ngaha olíli bhomu-o pi mu nakpata oeli inde li opolofeta akpokpo nani e li 'ngú gba mu-o. A ayo me oeli angoo teteke mu ngubula nakpokpo Bádha Ngali-e ne angu, abana li okpála du nayaya mu. <sup>19</sup> A ayo me mu gu egú angoo ne nabhuka bhú dabilí bini ne bua nakpokpo kú 'ngú ndjindji. Okpála koko a'o ká bua nakpokpo kú 'ngú gba o a'o. Kaka-a, u ayie li kpadji na nabhuka ayie. <sup>20</sup> Imene ne uo ne Alekidjandele bhú ká ongua okpála bhomu. Ma atsia apu uo pi Satana, \* amba u mbila lio ne napa me a ayo nasobho Ebhe de.

## 2

### *A ayo nayo Ebhe ngubula ndu okpála hana*

<sup>1</sup> Kala ndu 'ngú hana-a, ma ngayo ka yi me yi 'o gumu gba ndu okpála hana kala Ebhe, yi yo Ebhe pi uo, yi kikeliki liyi pi ani ngubula uo, amba yi gie la di heni pi ani ngubula ndu uo hana. <sup>2</sup> Yi yo Ebhe pi ongbengbe ongámási, di ne pi ndu ongámási hana ngubula me kpéke 'ngú adú-u de, amba ní du bhú guo 'ngú, ní du namanga Ebhe ne nagbite liní li ani na paká paká. <sup>3</sup> A bhomu-o engú inde

\* **1:20** 1:20 Napu kpála pi Satana: Ti da napa li bili inde-e me nagbe kpála bhú Piga gba Ebhe.

ndjindji, inde la di nganga li Ebhe, Mukobho gba ní-o.

<sup>4</sup> Aní akúnda me ndu okpála hana kobho, amba u mbila la di kukulú 'ngú. <sup>5</sup> Padhá de, anga koli Ebhe bha bini, a la bhadi ne koli kpála bini inde lúdu sunda Ebhe ne okpála-kuti. Kpála angoo, a ko Yesu Kilisito, <sup>6</sup> inde apu mukobho gba e ngubula nagbegbe ndu okpála hana bhú bali-o. Aní amene mo-o bhú nedhinga nani li Ebhe a'o e ngú nasuno me Ebhe akúnda me ndu okpála hana kobho. <sup>7</sup> Ka 'ngú angoo, Ebhe abhu ma bhulu titima gba Yesu di ne bhulu nakpokpo Bádha Ngali. Aní abhu ma me ma suno nabhuka di ne kukulú 'ngú pi okpála inde ne omaYuda ade-o, amba u bhuka. Ma ngapa kukulú 'ngú, ma pa eu de.

<sup>8</sup> Kaka-a, ma akúnda me obhosi yo Ebhe ne ndu bili hana. U yo Ebhe me u nde a'e'e 'kpa o ne abhúlá ne naha lio libhomu pi Ebhe. U adú ne engú sunda o de, u adú la di ne kpekebhe de.

<sup>9</sup> Pi olisi-e, ma akúnda me u du adyi bongo maka a ayo lie. U adú adyi bongo bhe a'é bua kpála bhú da e ma'e-e de. U du adyi bongo li lelele. U adú apulu sundjo o nane dada mane de. U adú adyi omayaka ne oimagege na olo di ne ohe na zizi de. U adú di nadyi obongo na mase naali de. <sup>10</sup> Engú bini, u suno mangbo bádha gba o bhú obabadha kulu inde u ngamene e-o. A bhomu-o engú inde ati ne olisi inde ngasuno me o ngamanga Ebhe-o.

<sup>11</sup> Nedhinga li bhoko ngaha olili lie bhú Piga gba Ebhe-e, a ayo me elo ndjili má bulu, aní ko lie ne kuto. <sup>12</sup> Ma ha kpadji pi elo ngú nasuno di ne nau pí 'ndji bhoko de. Engú bini, a ayo me aní ndjili má bulu! <sup>13</sup> Padhá de, anga Ebhe abho ngaiza nani kalanu-o

Adamu, pipita-a aní atsia abho Eva. <sup>14</sup> La di-e, Satana pite nani Adamu de, engú bini, aní apite mangbo nani elo-el. Abhomu-o, elo-o atsia andjo 'li Ebhe. <sup>15</sup> Abana i nde lie mo-o, Ebhe akóbho elo ka ezu gba e-o. Ebhe akóbho aní i du me aní nde alu kpekpeke bhú 'bu nabhuka, ne mukúnda, ne na'o lie bubu kala Ebhe, di ne na'o lie bhú da e.

### 3

*Lili pi okpála natsia 'kpí li Piga gba Ebhe*

<sup>1</sup> Engú ma adji apa e inde-e, a ko kukulú 'ngú: i du me kpála nde akúnda natsia 'kpí li Piga gba Ebhe-e, aní akúnda namene bhomu-o bádha kulu. <sup>2</sup> Kaka-a, a ayo de me u u kpála inde ngatsia 'kpí li Piga gba Ebhe-e ne siti 'ngú-o de. A ayo me aní du ne koli elo bini. Aní du naholo bua e ka 'ngú maholo. A ayo me aní du namene 'ngú li lelele, aní du la di namene babadha 'ngú. Aní du nasia ogomago ndjindji, aní mbila la di nasuno 'ngú pi okpála. <sup>3</sup> Aní ahá lie pi pandi de, adú la di kpála nagu gbele de. Engú bini, a ayo me adu kpála na bhuku 'ngú. Adú kpála nagbe bhayiki ne okpála koko de, adú la di kpála na gumu tia naali de.

<sup>4</sup> A ayo me adu kpála inde ngatsia 'kpí li piga gba e makpe-e ndjindji, inde li ongisi gba e ngamanga e ne ndu kpadji hana. <sup>5</sup> Padhá de, anga i du me kpála nde mbila natsia 'kpí li piga gba e makpe ndjindji de-e, aní ti da nalila Piga gba Ebhe-e lele pi? <sup>6</sup> A ayo de me kpála natsia 'kpí li Piga gba Ebhe-e du kpála inde adji bua e na mbia de. Padhá de, anga i du me a nde kpála inde adji bua e na mbia-a, 'ngbé 'ndji ti da nali bhú aní, aní tsia lí bhú mangimbo maka Djabulu ali nani lie-o. <sup>7</sup> La

matá di-e, a ayo me adu kpála inde li okpála bhe i bhuka de-e ngakpo 'ngú gba e ndjindji, ka napa me okpála aú ani bhú djila o padhá de-o, la di ngubula me ani atí bhú oekú gba Djabulu-o de.

*Líli pí okpála nateteke kulu bhú Piga gba Ebhe*

<sup>8</sup> A bhadi moko, a ayo me okpála nateteke kulu bhú Piga gba Ebhe-e du okpála inde ngamene 'ngú inde li okpála ti da namanga o ka e. U adú la di ne eli bhisi bhisi de, u ahá lio pí pandi de, u adú di nagilitia li siti kpadji de. <sup>9</sup> A ayo me u gbite lio ne bua bini li kukulu 'ngú inde li Ebhe ambamba ta e-o. U gbite lio tété ne bua nakpokpo kú 'ngú inde ndjindji.

<sup>10</sup> Kala me u bhú uo me u kolo okpála nateteke kulu bhú Piga gba Ebhe-e, a ayo ngaiza me okpála tsia uo ndjindji, pipita-a, i du me u nde u uo ne engú na sisiti de-e, u de bhú uo ngú namene kulu angoo. <sup>11</sup> A ayo me, olisi gba uo-o du bhadi namene engú inde li okpála ti da namanga uo ka e. U adú napa sisiti 'ngú li okpála koko de. U du naholo bua o ka 'ngú maholo. U du okpála inde li okpála koko ngaziba o bhú ndu 'ngú hana. <sup>12</sup> A ayo me, kpála nateteke kulu bhú Piga gba Ebhe-e du bha ne koli elø bini. Adu kpála inde ngatsia 'kpí li ongisi gba e di ne piga gba e makpe-e ndjindji. <sup>13</sup> Padhá de, anga okpála inde ngamene kulu nateteke kulu bhú Piga gba Ebhe-e ndjindji-e, ndu okpála hana ngamanga uo mamanga, u gáma la di engú pindji nabhuka gba o inde bhú Yesu Kilisito-o ne tsulu belegu de bini.

*Engú na ngbéngbé inde li Ebhe asuno e*

<sup>14</sup> Ma ngaye balua inde-e pí mu ne nabhundja me ma akólo li mu oo má gala! <sup>15</sup> La-a, i du me ma

nde kolo li mu oo má gala de-e, balua inde-e de suno pí mu lele maka a ayo lie me okpála dhuku bhú piga gba Ebhe-o. Piga angoo, a ko Piga gba Ebhe inde uu-o. Dadjua angoo ngabi kukulu eli-e maka nepanda abibi eti lie-o. <sup>16</sup> A na paká me, engú inde li Ebhe ambamba ta e pí ní pindji nabhuka gba ní-e ngbéngbé. Engú angoo me:

Kilisito ago píla doto bhú kute maka kpála-kuti,

Bu Bhobua asuno me, ani ngbingbili,

oandjelu atsia au ani.

U akpokpo engú gba ani-e pí okpála inde ne omaYuda ade, okpála na píla doto libhomu abhuka ani, Ebhe atsia a'e ani abhúlá bhú sangu gba e-o.

## 4

*Omusuno na eu*

<sup>1</sup> Bu Bhobua apa mbámbá me bhú onedhinga na soso-o, okpála koko a'ó ká nabhuka gba o, u tsia kpáta osisiti bua na eu, u kpáta di ongú inde li osisiti bua ngato e bhú okpála me u suno e-o. <sup>2</sup> Obhulu kali inde ngapa eu-o apíte uo me u yie li ngbili kpadji-e mayie. Bua nakpokpo kú 'ngú gba obhulu kali angoo asiti mugito me u atsulu ne kalase inde u ato e bhú djua. <sup>3</sup> Okpála angoo ngasuno me a ayo de me obhosi ne olisi du naha lio-o de. U di ngapa me a ayo de me okpála du nazu ozu koko de. Ebhe abho la nani ozu bhomu-o ngae. Omabhuka inde ambila kukulu 'ngú-o ti da nazuzu ne nagie heni pí ani. <sup>4</sup> Padhá de, anga ndu 'he hana inde li Ebhe abho e ndjindji. A ayo de me ní tse ehe bini bhú káká-a de. Engú bini, a ayo nahaha ne nagie heni pí Ebhe, <sup>5</sup> anga eli gba ani bhú dabili bini ne mayo

ngamene me ndu 'he hana kolo bubu kala ani.

*Bádha kpála na kulu gba Yesu Kilisito*

<sup>6</sup> Suno ongú bhomu-o pi ondaise ní omabhuka. Li mu mene mo-o, mu dú bádha kpála na kulu gba Yesu Kilisito . Mu tsia suno di me mu ngaku bua mu ne oeli na nabhuka, di ne nasuno na kukulu mo okpata e ko. <sup>7</sup> Engú bini, gbe limu li otodu na padhá padhá inde i ti ne nabhuka de-e magbe. Mene mangbo ne kpéke me mu gbite limu li namene engú inde anga li Ebhe. <sup>8</sup> Namene ngeme ngu nakpekepeke kute-e, a ndjindji ngu ongú masudha. Engú bini, a ndjindji nane mane pi kpála ne nadhuku maka li Ebhe akunda lie-o. Padhá de, anga namene mo-o, kpála ango-o ambila me ni asia inde-e mukobho na mbia, mukobho ango-o adú duduma ne duduma. <sup>9</sup> Eli inde ma apa e bhomu-o, a ko kukulu 'ngú inde ayo me ndu okpála hana ziba e ne bua bini. <sup>10</sup> Kaka-a, i du me ní nde ngamene kulu kpekepeke di ne angu ní hana-a, a ko anga ní nga'o 'to ní li Ebhe inde mu-o. A ko Mukobho gba ndu okpála hana, a ane la mane pi okpála bhende abhuka ani-o.

<sup>11</sup> A bhomu-o ongú inde a ayo me mu gbele 'dje okpála lie, amba mu suno di-e pi uo-o. <sup>12</sup> Mo oká kpadji pi kpála bini de me ani u mu padhá ka mu nde lie ne makombi-e de. Engú bini, du mangbo ne kpála inde ngasuno kpadji pi omabhuka. Du nasuno kpadji pi uo bhú eli inde mu ngapa e, ne bhú lele namene 'ngú gba mu, ne bhú mukunda gba mu, ne bhú nabhuka, di ne bhú nadu ka mu bubu kala Ebhe.

<sup>13</sup> Nedhinga mu ngadjeke nago ka ma lie-e, ha limu ngu natanga 'li Ebhe-e kala ndu okpála hana.

To masi bhú uo, amba mu suno ta eli gba Ebhe-e pi uo. <sup>14</sup> Mo ou kulu li Ebhe aha e pi mu-o bhú bádha bhú 'bu gba e-e padhá de, kulu inde mo osia e nedhinga li opolofeta akpokpo 'ngú gba mu-o lie, la di ne li nedhinga li obhelesi okpála a'o 'kpa o pi 'ndji mu lie-o. <sup>15</sup> A bhomu-o kulu inde a ayo me mu 'o bua mu li e ko. Ha limu ngu namemene ne bua mu hana, amba ndu okpála hana u me mu nganu li kpadji gba Ebhe-e ne kalanu. <sup>16</sup> Lila limu ngamu makpe ndjindji bhú ongú inde mu ngamene e di ne bhende mu ngasuno e pi okpála koko-o. Nu ne di ne kalanu, anga i du me mu nde amene mo-o, mu kóbho limu ngamu makpe, mu tsia kóbho di okpála bhende ngadje mu-o.

## 5

*Lili pi ndu omabhuka hana*

<sup>1</sup> I du me mu nde ngali bhele kpála li 'ngú-o, mo ombembe bhú 'ndji ani mambembe de, engú bini, gama 'ngú pi ani bhuhuku mugito me a ko 'dyi mu. Gama 'ngú pi omakombise maka ondaise mu na obhosibhosi. <sup>2</sup> Pi olisi na obhelesi-bhelesi-e, gama 'ngú pi uo mugito me a ko ohi mu. Pi otsalisi-e, gama 'ngú pi uo maka ondaise mu na olisilisi me bua mu nde tuko li uo de.

*Engú pindji oekosi na olisilisi*

<sup>3</sup> Teteke oekosi na olisilisi bhende li kpála nde ngu nateteke o ade-e mateteke. <sup>4</sup> Engú bini, i du me a nde ka ekə na ələ bini ne ongisi, i du di-e odi ye e, ngu nasuno me ongisi ango-o ngamene engú inde li Ebhe akunda e, a ayo me u teteke ngaiza opiga gba o makpe. U mene mo-o, u gie bádha 'ngú pi okpála inde azu o, di ne pi onguo ogbi o bhú da bhende u amene nani e pi uo-o. Abhomu-o engú



inde li Ebhe aziba e ko. <sup>5</sup> Oko inde ngadu bha ndju kpi e kpi, li kpála bini nde ka e ngu nateteke e ade-e, ani nga'o 'to e 'to Ebhe. Ani ngazi kekele li nayo Ebhe sukpe ne ngbikpi ngubula me Ebhe teteke ni. <sup>6</sup> La-a, pi oko bhende akunda bha naae odjali na doto-o, ani akpi li bua e akpi, abana ani nde lie uu-o. <sup>7</sup> A bhomu-o engú inde a ayo me mu pa e pi uo ngubula me kpála bini apa 'ngú li uo sisiti de-o. <sup>8</sup> I du me kpála nde teteke omaha e de-e, a ane la mane piga gba e makpe-e, ani abala 'kpa li nabhuka gba e abala, ani ane belegu mapagano ne siti.

<sup>9</sup> La di-e, ngu napa me u ye 'li oko bini bhú ká obhende li Piga gba Ebhe-e ngabi o-o, a ayo me ani du mbo ne kalanga ndjikpa madhia. Adu la bhadi ole inde i kunda bhoko sa 'ku 'ko e de.\* <sup>10</sup> A ayo la di me okpála mbila ani ka obabadha kulu inde ani amene e-o. A akunda napa me, ani aku ongisi gba e ndjindji, ani asia ogomago, ani avalu 'dhu omabhuka, † ani ateteke okpála inde adu bhú mbolo. Adu la di kpála inde amene ndu babadha kulu hana.

<sup>11</sup> Engú bini, pi okosi bhende na otsalisi tsalisi-e, mo oyé 'li uo bhú ká obhende li Piga gba Ebhe-e ngabi o-o de. Padhá de, anga nedhinga li gumu naha bhoko koko ali bhú uo lie, i méne me u dji 'ngbu o li Kilisito. <sup>12</sup> Li u mene mo-o, u lí bhú mangimbo. Padhá de, anga u apa nani me o oha lio pi Kilisito, la mbia bhomu-o, u mene maka u apa lie de. <sup>13</sup> La di-e, mu ye 'li uo-o, u kólo obhulu ipio, u hóló nadjakadha gba okpála ngangá. U kólo bha bini obhulu

ipio de, engú bini, u hóló nagama 'ngú naali, u hóló nali bhú ongú bhe i tsia o de, u tsia dú di nagama 'ngú gbөлөгө. <sup>14</sup> Kaka-a, ma akunda me, okosi bhende na otsalisi tsalisi-e ha matá obhosi, u zu ongisi, u tsia 'kpi li opiga gba o-o, amba u aká kpadji pi obhulu yala gba ní-e napa 'ngú li ní sisiti de. <sup>15</sup> Ma pa mo-o padhá de, a ko anga okosi koko ayie li ngbili kpadji-e ayie, u atsia agbida nganda Satana.

<sup>16</sup> I du me mabhuka bini na ole nde ne okosi na olisilisi bhú piga gba e-e, a ayo me ani teteke uo. Ani a'ó de me Piga gba Ebhe-e bi uo ngae de, amba Piga gba Ebhe-e bi obhende li okpála nde ka o ngubula nateteke o ade ko.

### *Engú pindji obhelesi okpála na Piga gba Ebhe*

<sup>17</sup> Obhelesi okpála inde ngatsia 'kpi li Piga gba Ebhe ndjindji-e, a ayo me u manga uo, amba u tsia ha di makalá na kulu gba uo-o pi uo li lelele. A ane la mane pi obhende ngatse kute o ngu nakpokpo di ne nasuno 'li Ebhe-o. <sup>18</sup> Padhá de, anga Bhuku gba Ebhe-e ngapa me: «Nedhinga li bagala ngatu ngano lie, mo ogbite 'bhe ani de.» A apa matá di me: «Kpála na kulu ati ne makalá na kulu gba e-o.†»

<sup>19</sup> I du me, kpála bini nde apa 'ngú li bhele kpála na Piga gba Ebhe-e sisiti-e, mo obhuka de. Ziba bha bini me okpála bhisi nde alu pi engú ango-o, i du okpála bhisi de-e, a de du okpála bata. <sup>20</sup> Mbe bhú 'ndji obhelesi okpála inde ngamene siti 'ngú-o bhú djila

\* **5:9** 5:9 Ole inde i kunda bhoko sa 'ku 'ko e de: A akunda napa me nedhinga li 'ko ani adu lie tété-e, ani kunda bhoko koko de. † **5:10** 5:10 Ani avalu 'dhu omabhuka: Nani agba omaYuda-a, kulu nagbe maleko bhú 'dhu ogomago ne navalu 'dhu uo-o, a ko nani kulu ka obalise di ne okpála na padhá. A di ngu nasuno mukunda ne nako lio ne kuto. Tsia bhú Dja. 13:1-17. † **5:18** 5:18 Tsia bhú Det. 25:4; ne bhú 1 Kol. 9:9; ne bhú Mat. 10:10; di ne bhú Luk. 10:7.

ndu okpála hana, amba okoko dje tsulu.

<sup>21</sup> Ma ngaha líli pí mú kala Ebhe, ne kala Yesu Kilisito, di ne kala oandjelu gba Ebhe inde ani abhu o me, mene olíli inde-e hana bhú ngbili 'ngú , mú nde kúnda kpála bini ane okoko mane de. <sup>22</sup> Mo o'ó 'kpa mú pí 'ndji kpála má gala de ngú naha kulu pí ani bhú Piga gba Ebhe-o. Mú 'o 'kpa mú pí 'ndji ani má gala-a, lí okpála u sídi me ani bhú siti 'ngú-o, akúnda napa bhomu-o me yí akpètse líyí ne ani bhú siti 'ngú gba e-o. Lila límú me ní dú bubu kala Ebhe.

<sup>23</sup> Mo odú bha bini nandji engu de, engú bini, ndji mbo di vino bedi uu ka kuo na bhú 'bu inde ngaha bhuku kute pí mú piko-o.

<sup>24</sup> Okpála koko ngamene siti 'ngú bhú mbasu, lí okpála mbíla kala nakpata 'ngú tété. Pí okoko-o, a ayo ngaíza nakpata 'ngú tété kalanu ngú nambimbíla. <sup>25</sup> A bhadi moko pí obabadha kulu, a ngau lie lí zí 'kpí, belegu obhende u u e gbulu de-e, a tí da nadu ndu 'kpí hana de me a nde awo lie mawo-o de.

## 6

### *Líli pí obalise*

<sup>1</sup> A ayo me omabhuka inde bhú bali-e manga omakulasi o ne ndu kpadji hana. U manga uo, amba kpála bini asóbho 'lí Ebhe de, amba u asóbho la di nasuno gba ní-e de. <sup>2</sup> Í dú me, omakulasi uo nde ne omabhuka-a, u apá de me o mánga uo de-e de, anga a ko ondaise o-o de. Engú bini, a ayo me, u mene kulu pí omakulasi o ndjindji naali, anga okpála inde u ngamene kulu pí o bhomu-o, a ko omabhuka, a ko la di ondaise uo na mukúnda. A bhomu-o líli inde ayo me mú suno e pí okpála ne nato masi bhú uo me u mene e ko.

### *Engú pindji gumu tia*

<sup>3</sup> Í dú me kpála bini nde ngasuno engú koko kpi, ani dhika lí okukulú oeli gba Ngámá gba ní Yesu Kilisito di ne ongú inde ní ngasuno e pindji namanga Ebhe de-e, <sup>4</sup> a ko kpála na 'ngbé 'ndji, ani mbíla la di 'ngú belegu de bini. Ani ambíla lie bha bini ne namene kpekebhø di ne natsi pindji oeli. Ongú bhomu-o ngagbe gumu 'he, ne natsi, ne nasobho lío, ne nabhundja siti 'ngú pindji obi o, <sup>5</sup> di ne bhayiki inde í ndjindja de-e sùnda okpála inde lí 'ndji o asiti-o. Okpála angu-o mbíla la di matá kukulu 'ngú belegu de bini. U ngabhundja me nabhuka Ebhe-e, a ko kpadji nasia tia.

<sup>6</sup> A moko, nabhuka Ebhe-e, a ko tia na ngbéngbé, í dú me kpála nde ngakpi djali lí ehe inde ka e-o. <sup>7</sup> Padhá de, anga ní go nani píla doto inde-e ne ehe bini de, ní gie la di líní ne 'he bini na doto inde-e de. <sup>8</sup> Kaka-a, í dú me a nde ka ní ne ehe nazu mazú di ne bongo ngú nadyídyi-e, amba bhobhomu-o ale pí ní ale. <sup>9</sup> Engú bini, okpála bhende ngakúnda nakpo-o, u ngali bhú nale ne bhú ogumu 'he bhelé na padhá padhá di na sisiti inde lí okpála ngasiti ka e, inde lí okpála nde di ngamu ka e-o. <sup>10</sup> Padhá de, anga gumu tia ngazu ndu ongú na sisiti hana. Okpála koko ka nakúnda tia naali-e, u ayie lí kpadji na nabhuka ayie, u atsia alí bhú líkabhu naali ka o makpe.

### *Bádha gbele ní nde bhú e kabula nabhuka gba ní-o*

<sup>11</sup> Engú bini, ngamu kpála gba Ebhe-e, kpe ndu sisiti 'ngú bhomu-o hana makpe. Gbite límú lí ngbili 'ngú , ha límú pí Ebhe, dú ne nabhuka, ne mukúnda, ne 'ndjá bua, di ne bhuku 'ngú. <sup>12</sup> Gú bádha gbele inde ní nde bhú e ka nabhuka gba ní-o. Lila mukobho

na dũdũma ndjindji, anga Ebhe a'i nani mu ngũ mukobho ang-o, mo otsia apa ne djali kala okpála bhelé me ni abhuka. <sup>13</sup> Ma ngaha líli pi mu kala Ebhe inde ngaha mukobho pi ndũ 'he hana, di ne kala Yesu Kilisito inde akpokpo nani kukulu 'ngũ pindji nabhuka kala Pose Pilatø ndjindji-e me, <sup>14</sup> lila líli inde ma aha e pi mu-o ndjindji, mene ndũndũ hana maka ma apa pi mu lie. Mene me kpála bini agũ líli ang-o de, akólo li ekpí li Ngámá gba ní Yesu Kilisito agie lie lie-o.

<sup>15</sup> Ekpí ang-o, Ebhe a'o ngae. A ko Ebhe inde ngaha bádha 'ngũ pi okpála, a ko koli Ngámá bini inde ngau pi 'ndji ndũ 'he hana. A ko 'ngbé Ngámá pi 'ndji ongbengbe ongámási, a ko la di Ngámá gba ongámási. <sup>16</sup> Ani kpikpi de, ani ngadu bhú zi 'kpí inde li kpála bini ti da nakolo li e de. Kpála bini u nga ani de, kpála bini tí la di da nau ani de. A ayo me okpála dhøgø ani! A ayo me ani u dũdũma ne dũdũma! A adũ moko.

### *Líli pi obhulu tia*

<sup>17</sup> Pa pi obhulu tia na doto inde-e me, 'ndji uo abé kaka de, u a'ó la di 'to o 'to tia na doto inde-e de, anga tia ang-o ngakodho 'kpí makodho. Engũ bini, u 'o mangbo 'to o 'to Ebhe inde ngaha ndũ 'he hana pi ní bhibhiti, ngubula me ní kpí djali ne di ko. <sup>18</sup> Pa pi uo me, u mene bádha 'ngũ, u dũ mangbo obhulu tia bhú namene obabadha 'ngũ. U dũ okpála napũ 'he pi obi o ne bádha bua, u dũ bedhe ngũ naha 'he pi okpála koko. <sup>19</sup> U mene mo-o, u pó bhúla ohe na babadha inde di ngabhue mabhue pi o ngũ okpí inde ngago-o. Abhomu-o, u tsia tí da nasia kukulu mukobho.

<sup>20</sup> Timoté, lila kulu inde li Ebhe aha e pi mu-o ndjindji. Kpe agøø na padhá padhá inde i ti

ne nabhuka de-e makpe. Kpe di obhayiki li okpála koko nga'i e ne eu me a ko imbilangu-o makpe. <sup>21</sup> Okpála koko abhundja me o ne ngua imbilangu ang-o, u atsia ayie li kpadji na nabhuka-o.

A ayo me, bádha bhú 'bu gba Ebhe-e dũ ne yi bhú dabili bini.

## Balua na bhisi gba Polo pi Timoté Eli na kalanu

Bhú balua na bhisi gba Polo pi Timoté-e, ani aha líli pi Timoté maka kilí e na kulu inde la di ngateteke ani. Engú na ngbéngbé a ko bua nakibila 'ngú. Polo aha líli pi Timoté ne nato masi bhú ani ngabula nakpokpo 'ngú gba Yesu Kilisito ngbingbili ne nasuno Bádha Ngali na Gandja na Didili di ne bhe na Mbia ndjindji. Pí bhobhomu-o, a ayo di me ani suno eli gba Ebhe-e ndjindji abana likabhu ani ngazu e di ne lí okpála ngagu ani lie-o.

Polo atsia agbele 'dje Timoté pindji okpekpeke da 'ngú inde i tí da nakolo lí ani ka nalí bhú okpekbhe na ngingi inde lí tata nde lie ade (2:23) i zu la di ngua ade, a la nga'e okpála inde ngadjedje lí ngbili kpadji.

Bhú ndu 'ngú bhomu-o hana-a, Polo ngayo ka Timoté me ani kpata nganda ní di ne namene ongú inde lí Polo ngamene e maka nabhuka gba Polo, ne ndja bua gba ani, ne mukunda gba ani, ne nakibila 'ngú gba ani la di ne likabhu ani ngasia bhú mbolo u ngato e lí ani-o.

### **Ongbenge ongú inde bhú bhuku inde-e ngae inde:**

Eli na kalanu 1:1-2

Natoko ne 'he inde a ayo me u mene e 1:3 – 2:13

Líli ne nagbele 'dje ngú nalila lí e 2:14 – 4:5

Ongú inde atsia bha Polo kpi e kpi 4:6-18

Eli na soso 4:19-22

*Polo yi Timoté mayi*

1-2 Timoté ndika ma na mukunda, ma aye balua inde-e pi mu ngama Polo. Ebhe abhu nani ma me ma du ne bhulu titima gba YesuKilisito ngu nakpokpo engu na mukobho na duduma. Ani apa nani me ni aha mukobho ango-o pi ni li kpadji gba Yesu Kilisito ko. A ayo me 'Dyi ni Ebhe ne Ngama gba ni Yesu Kilisito suno badha bhú 'bu gba o-o pi mu, u dje ndjinga mu, amba u ha di guo 'ngu pi mu.

*Polo agie heni pi Ebhe, ani atsia ato di masi bhú Timoté*

<sup>3</sup> Ma ngagie heni pi Ebhe li 'ngu gba mu-o. Ma ngamene kulu lima pi ani maka onguo ogbi ma adu nani amemene lie-o. Ma ngamemene ne bua nakpokpo ku 'ngu ndjindji. Ma nga'o mu kala Ebhe ndu 'kpi hana. Ngbikpi ne sukpe, nedhinga ma ngayo Ebhe lie, ma nga'o mu kala ani. <sup>4</sup> Ma bhundja egba\* nani mo oku e, gumu nau mu ma gala bedhe ma bedhe, amba ma bedhe ne djali bedhe. <sup>5</sup> 'To ma 'ili 'to nabhuka na kukulu inde bhú mu-o de. 'Hi mu Enise ne bhe azu ani na eole, Loisi abhuka ngaiza nani pi mu kalanu. Ma abhuka na paká me ngamu di-e, mu ne nabhuka ango-o.

<sup>6</sup> Kaka-a, ma mata ngapa engu inde-e pi mu ne toto: kpo djua bhú angu inde li Ebhe aha e pi mu-o bhú badha bhú 'bu gba e-e ne kalanu. Ebhe aha nani angu ango-o pi mu nedhinga ma a'o 'kpa ma pi 'ndji mu lie ko. <sup>7</sup> Padha de, anga Bua li Ebhe aha e pi ni-e, a ko bua na tsulu de. Engu bini, Bua ango-o ngabedhe mangbo ni ne angu, ne mukunda di ne namene 'ngu li lelele.

<sup>8</sup> Kaka-a, mo odje namu li nakpokpo 'ngu gba Ngama gba ni-e de. Abana ma nde lie bhú

\* 1:4 1:4 Egbá: Polo a'o nani ka Timoté bhú gudhu na Efeso, ani atsia atapa bhú ndu doto na Makedonia. Ekpi ango-o, Timoté aku nani egba naali. Tsia bhú 1 Tim. 1:3.

tikpu li 'ngú gba ani-e, mo odjé di numu ka bhobhomu-o de. Engú bini, ziba mangbo nazu likabhu ne ma bhú dabili bini ngubula Bádha Ngali ní ngakpokpo e-o. Zu likabhu ang-o me mu nde alu ne angu inde li Ebhe ahaha e ko. <sup>9</sup> Ebhe akobho ní ngae, ani atsia a'i ní me ní du ne piga gba ni-o. Ani kobho ní ka bádha 'ngú gba ní-e de, engú bini, ani akobho ní ka bádha bhú 'bu gba e di ne ka anga ani akunda nani me a adu moko. Kala me ani bho kokpi ne doto-o, ani atima Yesu Kilisito pi ní maka ani abhundja lie, amba ní sia bádha bhú 'bu ang-o. <sup>10</sup> Bádha bhú 'bu bhomu-o akoto mbia inde-e bhú mbasu, anga Ngámá gba ní Yesu Kilisito ago. Ani andjia angu kuo ngae. Ani asuno pi ní bhú Bádha Ngali-e me ní asia mukobho na duduma masia.

<sup>11</sup> Ngama-a, Ebhe abhu ma me ma du bhulu titima, ma du di ne bhulu nakpokpo Bádha Ngali ang-o pi okpála, amba ma suno di pi uo. <sup>12</sup> Ma bhadi ngazu likabhu inde-e kabula nakpokpo Bádha Ngali ang-o. Engú bini, ma tété ne numu ade, anga ma mbila kpála inde ma a'o 'to ma 'to e hana. Ma abhuka la bhadi na paká me ani ne angu ngu nalila kulu inde ani aha e muma-a nakolo li 'kpi ní agó lie-o. <sup>13</sup> Ongú inde mo odje me ma nde ngasuno e-e, a ko ongú na kukulu inde a ayo me mu kpata e-o. Lu kpekpeke bhú nabhuka, ne bhú mukunda inde ní nde ne e bhú nakpotsé liní ne Yesu Kilisito-o. <sup>14</sup> Lila bádha nasuno inde li Ebhe aha e pi mu-o ndjindji. Lila nasuno ang-o ne angu gba Bu Bhobua inde ngadu bhú ní-o.

<sup>15</sup> Mu mbila hana me omabhuka bhelé na ndu doto na Adjia hana a'o ka ma a'o. Fidjene ne Elemojene di bhú ká uo. <sup>16</sup> A ayo

me Ngámá dje ndjinga piga gba Onesifole-o, anga ani ateteke ma bhutsibhutsi, ani dje di numu li naama 'ngú ka ma nde lie bhú tikpu-o de. <sup>17</sup> Engú bini, nedhinga ani akolo lie bhú gudhu na Loma-a , ani agili ma ne kekele hana nakolo bha bini li nedhinga ani au ma lie-o. <sup>18</sup> Mu mbila ndjindji me nedhinga ma adu lie bhú Efeso-o, ani ateteke ma naali. A ayo me, Ngámá gba ní-e gie bádha 'ngú pi ani li 'kpi inde ani akódho 'ngú gba okpála lie-o.

## 2

### *Lili pi sudha gba Yesu Kilisito*

<sup>1</sup> Ngamu Timoté ndika ma, sia angu bhú bádha bhú 'bu inde li Yesu Kilisito ngaha e pi ní-o. <sup>2</sup> Ongú inde mo odje ma me ma nde ngakpokpo e kala bhiti okpála inde adu adje ma-a, suno pi okpála li okpála koko ngaziba o, inde i ti da nasusuno di pi okpála koko.

<sup>3</sup> Kibila likabhu maka sudha na babadha gba Yesu Kilisito. <sup>4</sup> Kpála inde bhú kulu na sudha-a lili bhú ongú ngangá na doto inde-e de, i du me ani kunda me ni mene engú inde anga li ngámá gba ni-o. Mene bhadi moko. <sup>5</sup> Bhundja la di me, i du me okpála nde ngamene ngeme nagu holo-o, li kpála gu maka li lili na ngeme aziba lie de-e, ani sia makalá de. <sup>6</sup> Kpála inde ngamene kpéke kulu nalu edyi-e, asia ngaiza ezu na edyi ang-o kalanu ngae. <sup>7</sup> Bhundja pindji ongú ma ngapa e pi mu inde-e ndjindji, mu mene mo-o, li Ngámá gba ní-e há angu pi mu ngu naké mboli ndu ongú hana.

<sup>8</sup> Bádha Ngali inde ma ngakpokpo e pi okpála-a, a me Yesu Kilisito ne ndili gba Davidi, Ebhe azuku ani bhú ká okpála inde amu-o. Mo o'fli 'to mu li

ani de. <sup>9</sup> Ma ngazɔ likabhu inde e kabula Bádha Ngali ang-o. U ato belegɔ ma bhú tikpɔ mugito me ma amene siti 'ngú. Engú bini, u to eli gba Ebhe-e bhú tikpɔ de, eli ang-o nganɔ bha bini ne kalanɔ. <sup>10</sup> Kaka-a, ma ngakibila ndɔ likabhu inde ma ngazɔ e hana ngubula nateteke okpála li Ebhe abhɔ o-o, amba ngauo di-e, u sia mukobho di ne sangu inde ngadɔ dɔdɔma ne dɔdɔma ka Yesu Kilisito-o. <sup>11</sup> Engú inde ma adjɔ apa e inde-e, a ko kukulɔ 'ngú. Engú ang-o ngae inde:

«I dɔ me ní nde amu bhú dabilɔ bini ne Yesu-o,

ní dɔ bhadi bhú mukobho bhú dabilɔ bini ne ani.

<sup>12</sup> I dɔ me ní nde alɔ kpekpeke bhú likabhu

ní ngazɔ e kabula Bádha Ngali-e,

ní ú bhadi ne ani bhú dabilɔ bini.

Engú bini, i dɔ me ní nde apa me ní mbila ani de-e,

ngaani di-e, ani pá bhadi me ní mbila ní de.

<sup>13</sup> I dɔ me ní nde ngamene engú inde i nga li ani de-e,

ngaani-e, ani djidji lie de,

ani améne ndɔ 'ngú inde ani apa me ní améne e hana.

Padhá de, anga ani tí da namene 'ngú kpi ne bhende ani ngapa e de.»

*Kpála na kulu inde li Ebhe abhuka e*

<sup>14</sup> Ongú inde ma apa e pi mɔ bhomɔ-o, kpokpo pi omabhuka ngubula me u bhundja pépé. Gbele 'dje uo li 'ngú inde-e ne 'li Ebhe me u atsí pindji oeli de. Padhá de, anga tata tété ade, a mangbo ngasiti bua okpála inde ngadjedje-o. <sup>15</sup> La ngamɔ makpe-e, mene ne kpéke ngú nadɔ maka li Ebhe akúnda lie-o. Dɔ maka kpála na kulu inde ne nɔmɔ li kulu gba e ade, a akúnda napa me,

kpokpo eli na kukulɔ-o pi okpála koko li lelele.

<sup>16</sup> Kpe agole na padhá padhá inde i ti ne nabhuka de-e makpe. Padhá de, anga okpála inde adhika li ngua ongú bhomɔ-o ngayie li kpadji gba Ebhe-e bhubhuku. <sup>17</sup> La di-e, 'li uo ngayangba bhú ká okpála maka eka inde ngazidhaka mazidhaka. Imene ne Filete bhú ká okpála ang-o. <sup>18</sup> U ayie li kpadji na kukulɔ 'ngú ayie. U ngapa eu pi okpála me nedhinga nazuku ka okpála akodho 'kpí akodho. Kaka-a, okpála koko ayie ka uo li kpadji na nabhuka ayie. <sup>19</sup> Engú bini, kukulɔ eli gba Ebhe-e yie bhú da e de. Eli ang-o maka nepanda inde alɔ kpekpeke. U atsia aye balɔa tété me: «Ngámá mbila okpála gba e hana.†» U atsia aye di me: «A ayo me ndɔ okpála hana inde ngapa me ní ne okpála gba Ngámá-a, 'o namene siti 'ngú ma'o.»

<sup>20</sup> Adɔdɔ bhú 'ngbé 'ti ne limbi osaani bhelé. U abho osaani koko li olo, u abho okoko li aladja, u agolo okoko li ndula. A pise bha bini li obhobhomɔ-o de, u abho matá okoko li doto. Osaani bhomɔ-o li okulu kpikpikpi. U nga'o obhende na babadha-a ngú okpí na anokomia, okoko-o, u ngamene kulu ne di ndɔ 'kpí hana. <sup>21</sup> A bhadi pi ní moko. Li kpála 'o namene ndɔ sisiti 'ngú inde ma ngapa 'ngú lie bhomɔ-o hana-a, li Ebhe 'ó ani kpi pi e. Ani dɔ maka saani na olo, anga ngaani-e, ani bedhe ngú namene ndɔ obabadha kulu hana.

*Líli pi bádha kpála na kulu gba Ngámá*

<sup>22</sup> Timoté, gbe limɔ li osisiti 'ngú inde li omakombise koko ngamene e magbe. Ngamɔ bhú dabilɔ bini ne okpála bhende

† 2:19 2:19 Tsia bhú Nom. 16:5.

ngayo Ngámá ne bua o bini-e, yi gili namene ngbili 'ngú , ne nadu ne nabhuka, ne mukunda di ne guo 'ngú sánda yi. <sup>23</sup> Gbe limu li otodu na padhá padhá li tata nde lie ade-e magbe. Padhá de, anga mu mbila ndjindji me ndu 'ngú bhomu-o hana ngagbe tolo. <sup>24</sup> A ayo de me kpála na kulu gba Ngámá-a du natsi-e de, a ayo mangbo me ani du ne guo 'ngú pi ndu okpála hana. Ani du kpála inde ngasuno 'ngú pi okpála ndjindji. Ani du la di kpála nakibila 'ngú nedhinga li okpála ziba engú ani ngapa e lie de ko. <sup>25</sup> A ayo me, ani suno 'ngú pi okpála bhende nga'o bhayiki li engú inde ani ngapa e ne bhuku bua. Padhá de, anga nedhinga koko-o, li Ebhe há kpadji pi uo ngú nadi mabhundja gba o ngubula me u mbila eli na kukulu-o. <sup>26</sup> Abhomu-o, u hólo matá nabhundja 'ngú ndjindji. U tsia zé bhú ekú gba Djabulu inde aholo uo, a atsia a'o di uo sa líli gba ani-o.

### 3

*Engú inde akódho 'kpí li sokpí-o*

<sup>1</sup> Mbila ndjindji me bhú onedhinga na sokpí-e, kpekpeke da 'ngú adú naali. <sup>2</sup> Padhá de, anga okpála adú nambila bha engú gba o makpe, u adú akunda tia naali, u adú apa 'li o, u adú obhulu 'ngbé 'ndji, u adú nasobho Ebhe, u dú nadi okpála inde azu o-o de. U gie heni pi okpála inde amene bádha 'ngú pi o-o de, u mánga ehe gba Ebhe-e de. <sup>3</sup> U dú ne mukunda pi okpála koko de, u djé ndjinga obi o de, u adú apa 'ngú li okpála koko sisiti. U hólo bua o ka 'ngú de, u akúnda bha bini namene obi o sisiti, u kúnda bádha 'ngú de. <sup>4</sup> U apú obi o pi obhulu yala gba o, bua uo adú

ape má pupupu, u tsia dú na'o lío ne abhúlá. U akúnda mangbo engú inde a nga li o, u kúnda Ebhe de. <sup>5</sup> U adú namene mugito me o ne okpála gba Ebhe, engú bini, u ziba angu gba ani-e de. Gbe limu de okpála bhomu-o magbe!

<sup>6</sup> Okpála koko bhú ká okpála bhomu-o ngali bhú okuti, u tsia hólo li ekú gba o-o olisi na padhá padhá 'ngú inde oo. Olisi angoo abedhe ne gumu 'he ngangá, u atsia abedhe di ne sisiti 'ngú bedhe. <sup>7</sup> U ngagili ndu 'kpí hana nambila 'ngú, engú bini, angu uo kolo li nambila kukulu 'ngú-o belegu de bini. <sup>8</sup> Okpála bhomu-o ngayala nakpata kukulu 'ngú maka Djanesi ne Djambelesi ayala nani nadi 'li Moidje lie-o. A ko okpála li 'ndji o asiti, u bhuka Ebhe na paká paká de. <sup>9</sup> La-a, u lúka matá ne di tsutsu de, anga ngingi 'ngú u ngamene e akóto bhú djila ndu okpála hana ngbadha, maka bhe nani i mene Djanesi ne Djambelesi-o.

*Engú inde a ayo nabhundja pindji e*

<sup>10</sup> La ngamu-o, mo okpata ma ndjindji bhú nasuno gba ma-o, mo ou lele nadhuku gba ma-o, mu mbila mabhundja gba ma-a hana, mu mbila nabhuka gba ma-a hana, mu mbila 'ndjá bua gba ma-a hana, mu mbila mukunda gba ma-a hana, mu mbila kpéke bua gba ma-a hana. <sup>11</sup> Mu mbila likabhu ma azu e ne mbolo u ato e li ma-a hana. Mu mbila ndu 'ngú inde apu pi ma bhú Atiokia, ne bhú Ikoniomu di ne bhú Lisitele hana. Ma azu likabhu na paká paká, engú bini, Ngámá agbegbe ma bhú ndu likabhu bhomu-o hana. <sup>12</sup> A ne okpála koko inde akunda nakobho maka li Ebhe akunda lie, bhú makpese gba ní ne Yesu Kilisito-o . A na paká me u ató mbolo li ndu uo hana.

<sup>13</sup> La-a, obhulɔ nazi 'gú, inde di ngapite okpála-a, anú bhú siti 'ngú ne kalanɔ. U ngapite okpála, li okpála koko píte di uo.

<sup>14</sup> Engú bini ngamɔ-o, lu kpekpeke bhú 'ngú inde mo okpata e, mo osia di-e ne bua mu hana ko. Mu mbila okpála asuno pi mu-o hana. <sup>15</sup> Nayie bhú ndili li mu-o, mu mbila Bhuku gba Ebhe-e ndjindji. Bhuku ango-o ti da naha pi mu imbilangú inde ngato kpála bhú mukobho na dɔdɔma ka nabhuka Yesu Kilisito-o. <sup>16</sup> Ndu 'ngú inde u aye e bhú Bhuku gba Ebhe-e hana ayie ka Ebhe. A ne tata ngú nasuno ngbili 'ngú pi kpála, ngú napaná pulu 'ngú gba kpála pi e, ngú nali kpála, di ne ngú nasuno pi kpála namene 'ngú maka li Ebhe akúnda lie-o. <sup>17</sup> Ebhe amene mo-o ngubula me kpála gba ni-e du bedhe na paká paká ngú namene ndu babadha 'ngú hana.

## 4

### *Kpokpo 'li Ebhe*

<sup>1</sup> Yesu Kilisito agó galikpe mago, aní tsia ú ngámá píla doto. Aní akódho 'ngú gba okpála inde uu ne obhende amu-o. Kaka-a, ma ngaha líli inde-e pi mu kala aní ne kala Ebhe me: <sup>2</sup> kpokpo 'li Ebhe, lu pépé kpekpeke bhú bádha nedhinga abana bhú siti nedhinga. Mbe bhú 'ndji okpála inde ngamene siti 'ngú-o, pa pi uo me u 'o namene siti 'ngú ma'o. To masi bhú okpála koko ngú namene bádha 'ngú. Suno ndu ongú bhomu-o pi uo hana li lelele di ne 'ndjá bua. <sup>3</sup> Padhá de, anga ekpí akólo makolo, okpála kúnda matá nadje nasuno pindji kukulú 'ngú de. Engú bini, u adú nakpata gumu gba o makpe, u tsia pó bhúla omusuno na eu de o. Omusuno ango-adú apa

pi uo ongú inde anga li uo-o. <sup>4</sup> U aníni 'dje o li nadje kukulú 'ngú, u tsia kpáta ongú na padhá padhá inde li okpála ngagbe e bhú 'ndji o-o. <sup>5</sup> Engú bini ngamɔ-o, du naholo bua mu bhú ndu 'ngú hana maholo. Kibila nazu likabhu makibila. Mene kulu nakpokpo Bádha Ngali-e ndjindji. Ndjia kulu li Ebhe aha e pi mu-o.

<sup>6</sup> Muma-a, nedhinga nandala 'kpa li mukobho gba ma-a ngubula me u bhøle ma-a akolo masikpe. Nedhinga nabhana lima pi doto inde-e ale. <sup>7</sup> Ma agu bádha gbele, ma agu holo akolo ali soso. Ma ndala 'kpa li nabhuka de. <sup>8</sup> Mbia inde-e, Ebhe aleke makalá muma abhúlá. A ko ndata na 'ngbø ndua inde li Ngámá ahá e muma li 'kpi aní akódho 'ngú gba okpála lie-o. Ndata ango-o, a ko ndata na mukobho. Ngámá gba ní-e, a ko Ngámá inde ngakodho 'ngú gba okpála ngbingbili. Aní há bha ndata ango-o muma kpi ma kpi de, engú bini, aní ahá di pi ndu okpála hana inde ne djali li nago ka aní-o.

### *Polo apa pi Timoté me aní go bhaka ni*

<sup>9</sup> Mene ne kpéke me mu go bhaka ma má gala! <sup>10</sup> Padhá de, anga Demasi a'o ká ma ka gumu 'he na doto na naki inde-e a'o. Aní atapa bhú gudhu na Tesalonike. Kelesasi atapa bhú gudhu na Galatia. Tito atapa bhú gudhu na Dalamatia. <sup>11</sup> Luka atigala ne ma si ngae kpi e kpi. Mu du ago-o, ha Maloko, mu go ne aní bhú dabili bini, anga aní tí da nateteke ma li kulu ma nde ne e ko. <sup>12</sup> Ma atima Tisike bhú gudhu na Efeso. <sup>13</sup> Li mu du nago-o, mu de go muma ne koti gba ma inde ma 'o nako ká e bhú gudhu na Tuluasi agba Kalipusi ko. Go di muma ne obhuku gba ma-o, ane



la mane obhende u amene e li kó  
'nɔ-o.

<sup>14</sup> Alekidjandele, bhulu nabho bolo-o amene ma sisiti naali. Ngámá agie pi ani nakpata lele siti 'ngú ani amene e li ma-a ngae. <sup>15</sup> Lila di limu ka ani malila, anga ani ngagu nasuno gba ní-e kpekpeke.

<sup>16</sup> Nedhinga ma akpokpo 'ngú gba ma-a lie bhatsibhatsi na bini kala okpála nakodho 'ngú-o, kpála bini teteke ma de. Ndú uo hana a'o ká ma. Ebhe mbu li uo tété. <sup>17</sup> Engú bini, Ngámá ateteke ma ngae, ani aha angu muma ngubula me ma kpokpo eli gba ni-e ndjindji. Ndú omupagano hana inde adu oo adje. Ani atsia agbegbe ma sakpa kuo. <sup>18</sup> Ngámá agbégbe matá ma sakpa ndu egú li okpála ngagu ma ne e hana, ani tsia tó ma bhú Nau gba e na abhúlá-o. A ayo me u dhogò Ngámá duduuma ne duduuma! A adu moko.

*Oeli na soso*

<sup>19</sup> Pa pi Pilisila ne Akuila, a la di-e piga gba Onesifole me ma yi uo mayi. <sup>20</sup> Elasite atigala bhú gudhu na Kolito. Ma a'o ká Tolofime bhú gudhu na Milete, anga adu li ani ne kuo. <sup>21</sup> Mene ne kpéke me mu go ei kala nedhinga na zini. Ebulosi, ne Pudene, ne Line ne uo ne Kolodia, a la di-e ondaise ní inde ei-e hana apa me o yi mu mayi.

<sup>22</sup> Ngámá du ne mu. A ayo me, bádha bhú 'bu gba Ebhe-e du ne yi.

## **Balua gba Polo pi Tito Eli na kalanu**

Tito inde akolo nani kpála na kulu bhú dabilì bini ne Polo, ani atsia adu di ateteke ani bhú kulu gba e na Ebhe inde ani adu adholo ne e, ani adu nani mupagano inde adji bua e, ani atsia aziba Kilisito . Polo aye balua inde pi Tito, makombi inde adu ateteke ani bhú Dadjua gba Ebhe na Kelete-o. Polo a'o nani ká ani oo ngubula natsia 'kpí li kulu na Dadjua gba Ebhe ango-o. Ngbengbe 'ngú bhú balua inde bata.

Engú na kalanu u aye bhú balua inde-e, ko nasuno pi Tito dasundu inde a ayo me obhelesi okpála na Dadjua gba Ebhe du ne e, adu kpi ne bhe na sisiti inde li okpála na Kelete nde ne e ko. Pipita-a, Polo ngaha líli pi Tito me ani du musuno pi limbi okpála ngangá na Dadjua gba Ebhe-o. Limbi okpála maka: obhosi na bhelesibhelesi, omakombise, obalise ne olisi bhe na bhelesibhelesi (inde a ayo me u ha líli pi otsalisi). Li soso-o, Polo ngaha líli pi Tito pindji lele nadholo gba makilisito, ne nadu ne mukunda, ne nadu ne guo 'ngú ngubula nakpe yala, ne nakpe tolo, a la di na gbogbo bhusu bhú Piga gba Ebhe.

### **Ongbengbe ongú inde bhú bhuku inde-e ngae inde:**

Eli na kalanu 1:1-4

Obhelesi okpála na Piga gba

Ebhe 1:5-16

Engú a ayo me limbi okpála mene e bhú Piga gba Ebhe 2:1-15

Naha líli gba Ebhe ne napa me kpála du ne nalila li e 3:1-11

Eli na soso 3:12-15

*Polo yi Tito mayi*

<sup>1</sup> Ma aye balua inde-e ngama Polo, bali gba Ebhe, la di bhulu titima gba YesuKilisito . Ebhe aha kulu napanu kpadji na nabhuka pi okpála inde ani abhu o-o mama ngubula me u bhuka ni, amba u ke di mboli kukulu nasuno inde ati ne mukobho inde ngadhogo ani-o. <sup>2</sup> Abhomu-o, u ti da nadu ne 'to o me o osia mukobho na duduma masia. Ebhe inde i papa eu de-e, apana nani mukobho ango-o pi omaha e bhutode kala me ani bho kokpi ne doto. <sup>3</sup> Nedhinga inde li Ebhe a'o e akolo lie, Ebhe, Mukobho gba ní-e amene me omaha ni mbila 'li ni li kpadji nakpokpo Bádha Ngali . A bhomu-o kulu inde ani aha líli me ma mene e-o.

<sup>4</sup> Ma ngaye balua inde-e pi mu Tito. Mu maka kukulu ndili gba ma bhú 'bu nabhuka inde ngakpotse ní ko. A ayo me bádha bhú 'bu ne guo 'ngú gba 'Dyi ní Ebhe, di ne Yesu Kilisito Mukobho gba ní-e du ne mu bhú dabilì bini.

### *Lele mukobho gba obhelesi okpála na Piga gba Ebhe*

<sup>5</sup> Ma a'o ka mu bhú kpomè na Kelete, amba mu ndjia naleke ndu 'ngú hana inde atigala-o. A ayo me mu bhu obhelesi okpála na Piga gba Ebhe-e bhú ndu gudhu hana bini ne bini nakpata olíli nako ma aha e pi mu-o moko me, <sup>6</sup> a ayo de me u u bhele kpála na Piga gba Ebhe-e ne siti 'ngú-o de. Ani du ne koli olè bini. A ayo me ongisi gba ani-e du omabhuka . U améne engú bini de inde u 'í uo ka e me, a ko ongisi na sisiti, di ne me, a ko ongisi na ndjondjo.

<sup>7</sup> Bhele kpála na Piga gba Ebhe-e ngalila kulu gba Ebhe-e ngae. Kaka-a, a ayo de me u u ani ne siti 'ngú-o de. A adú kpála na 'ngbé 'ndji de. Ani adú nake 'ngú lie má gala de. Ani ahá lie pi pandi de. A adú bhulu nagu gbele de. Ani adú nagili tia li siti kpadji de.

<sup>8</sup> Engú bini, aní dɛ nasia ogomago ndjindji. Aní kɛnda bádha 'ngú. Aní dɛ nabhundja 'ngú ndjindji. Aní dɛ ngbingbili. Aní dɛ bubu kala okpála dí ne kala Ebhe. Aní dɛ kpála naholo bua e ka 'ngú maholo. <sup>9</sup> A ayo me aní gbite lie kpekpeke lí Eli na kúkulu inde atí ne engú inde ní asuno e pí aní-o. Abhomɔ-o, aní tí da nato masi bhú okpála koko ne nasuno na ngbingbili-o. Aní tsia tí la dí da nasuno pí okpála inde nga'o bhayiki lí nasuno gba aní-e me uo lí pulu kpadji.

*Polo agbele 'dje Tito pindji nasuno na eu*

<sup>10</sup> Okpála bhelé ne kpéke 'ndji, a ane la mane bhú ká okpála inde ngasuno me a ayo me omakilisito kpata líli gba omaYuda lí kpadji nali gandja-o . U ngapite okpála koko, u dí ngapa ongú na padhá padhá. <sup>11</sup> A ayo nagbite 'bhø uo, anga u ngangbingi 'ndji opiga libhomu ne nasuno ongú inde a ayo nasuno e de, ngubula nasia tia lí siti kpadji.

<sup>12</sup> Saka kpála bini na kpemø na Kelete-e, adɛ nani bhulu imbilangu. Aní apa nani ne 'bhø e me: «Okpála na Kelete-e, a ko odidili obhulu eu, uo maka onɔ na 'gú. A ko obhulu ipio, u ngabhundja bha bini bula 'ngú na 'zu.» <sup>13</sup> Engú inde aní apa e bhomɔ-o, a ko kúkulu 'ngú. Kaka-a, mbe bhú 'ndji uo tété kpekpeke, ngubula me u lu kpekpeke bhú nabhuka, <sup>14</sup> u a'ó la dí 'ndji o lí ongú na padhá padhá inde lí omaYuda ngagbe e bhú 'ndji o de. U adú dí namene líli gba okpála bhende ngayala kúkulu 'ngú-o de. <sup>15</sup> Pí okpála bhende kala Ebhe bubu-o, ndɛ 'he hana bhadi bubu. La-a, pí okpála bhende kala Ebhe bubu ade-e, inde ayala nabhuka-a, ehe bini pí uo bubu belegu ade bini. Padhá de, anga imbilangu dí

ne bua nakpokpo kú 'ngú gba uo-o asiti. <sup>16</sup> U ngapa me, o mbila Ebhe hana, engú bini ongú inde u ngamene e ngasuno me u mbila aní de. Engú inde u ngamene e nga lí okpála de, a nga la dí lí Ebhe de. A ko okpála na kpekpeke 'ndji. Uo la dí ne angu namene bádha 'ngú belegu ade bini.

## 2

*Polo aha líli pí omabhuka*

<sup>1</sup> Engú bini, ngamɔ Tito-o, pa engú inde atí ne nasuno na ngbingbili-o. <sup>2</sup> Pa pí obhosi bhende na gbebgbe-e me, u dɛ naholo bua o ka 'ngú maholo. U dɛ ne okpála inde u ngamanga o mamanga. U dɛ nabhundja 'ngú ndjindji. U lu la dí ne angu bhú nabhuka , ne mukunda, dí ne 'ndjá bua. <sup>3</sup> Ha dí líli pí olisi bhe na obhelesibhelesi-o. Pa pí uo me mukobho gba uo-o dɛ bubu kala Ebhe. U adú napa osisiti 'ngú lí okpála koko de. La dí-e, u adú obalise na pandi de. A ayo me u suno pí okpála koko ongú na ndjindji. <sup>4</sup> U mene mo-o, í tsia súno pí otsalisi me, u dɛ ne mukunda pí obhosi gba o, dí ne pí ongisi gba o, <sup>5</sup> u dɛ nabhundja 'ngú ndjindji, u adú akunda obhosi ngangá de, u 'o 'to o 'to piga gba o, u dɛ ndjindji. U mene la dí olíli gba obhosi gba o makpe, ngubula me kpála bini asóbho eli gba Ebhe-e de.

<sup>6</sup> Ha dí líli pí omakombise me, u dɛ namene ndɛ 'ngú hana lí lelele. <sup>7</sup> Ngamɔ makpe-e, a ayo me mɔ suno bhú okulu gba mɔ-o ongú na ndjindji, inde lí okpála tí da nakpata nganda e. A ayo me nasuno gba mɔ-o dɛ ngbingbili, amba adú dí bhe lí okpála tí da namanga e. <sup>8</sup> A ayo me 'lí mɔ dɛ ngbingbili, eli inde lí okpála tí da naboyo e de, amba obhulu

yala gba ní-e asía engú na sisiti napapa li ní de. Abhomu-o, u tsia djé numu na paká paká.

<sup>9</sup> A ayo me, obalise mene líli gba omakulasi o bhú ndu 'ngú hana. A ayo me u du amene engú inde anga li omakulasi o. U adu adjidji 'ngú sa 'li uo de. <sup>10</sup> U azí 'he gba omakulasi o de. Engú bini, u du ndu 'kpí hana ngbingbili li pápá gba uo-o. U mene mo-o, li okpála tsia ú me nasuno inde pindji Ebhe, Mukobho gba ní-e ndjindji ka nau lele maka u ngakobho lie-o.

*Yesu akunda me ní du piga gba ní*

<sup>11</sup> A moko, Ebhe asuno bádha bhú 'bu gba e inde ngakobho ndu okpála hana bhú siti 'ngú-o asuno. I dú kaka de-e, kpála bini de kóbho de. <sup>12</sup> Bádha bhú 'bu angoo ngasuno pi ní nayala siti 'ngú. A la di ngasuno pi ní nayala ogumu ongú na doto, amba nedhinga ní nde nga lie pí doto inde-e, a ayo me ní du nabhundja 'ngú ndjindji, ní du namene engú inde ngbingbili, di ne bhende nganga li Ebhe manga. <sup>13</sup> Ní du namene moko ngubula nadjeke ekpi na djali inde ní nga'o 'to ní 'to e-o. Li 'kpí angoo, Yesu Kilisito inde Ebhe gba ní na ngbéngbé, di ne Mukobho gba ní-e, agie lie píla doto bhú sangu gba e ko. <sup>14</sup> Ani aha mukobho gba e makpe pi ní ngubula nagbegbe ní bhú ndu osisiti 'ngú hana. Ani abhu ní me ní kolo piga gba ní makpe, piga inde bubu kala ní-o, amba ní du piga inde abedhe ne gumu namene babadha 'ngú.

<sup>15</sup> A bhomu-o engú inde ayo me mu suno e ne angu mu hana, nedhinga inde mu ngato masi lie bhú okpála inde ngadje mu, di ne nedhinga inde mu ngambe lie bhú 'ndji obhende i dje mu de ko. Mo oká kpadji pi kpála bini de me ani u mu padhá-a de.

### 3

*Lele nadu ka omabhuka bhú ká omupagano*

<sup>1</sup> Bhundja pi ndu omabhuka hana me, a ayo me u manga ongámási, di ne okpála bhende ngau pí 'ndji uo-o. A ayo me u mene líli gba uo-o, amba u du bedhe ngú namene ndu ongú na babadha hana. <sup>2</sup> A ayo de me u di kpála-a de. U adu obhulu gbele de. A ayo me u du okpála na guo 'ngú. A ayo me u du ndu 'kpí hana ne bhuku bua pi ndu okpála hana. <sup>3</sup> Padhá de, anga nganí di-e, ní adu nani ongingi. Ní adu nani okpála na kpekpeke 'ndji. Ní adu nani li pulu kpadji. Ondu ngangá gumu 'he, di ne oehe nanga li ní manga a'o nani ní obalise. Mukobho gba ní-e adu nani sisiti. Ní abedhe di nani ne ogumu 'he bedhe. Ní adu ayala okpála koko, u atsia adu di ayala ní.

<sup>4</sup> Engú bini, nedhinga li Ebhe, Mukobho gba ní-e asuno bádha 'ngú di ne mukunda gba e lie pi okpála-a, <sup>5</sup> ani atsia akobho ní. Ani kobho ní ka ongú na ngbingbili inde ní amene e-e de. Engú bini, ani akobho ní ka ani adje ndjinga ní lie ko. Ani akobho ní li kpadji naha Bu Bhobua pi ní. Bu Bhobua angoo a'e osisiti 'ngú gba ní-o, ani atsia aha mukobho na mbia pi ní, ne lele nadu na mbia. <sup>6</sup> Ebhe atuko Bu Bhobua angoo pí ní bhelé li kpadji na okulu inde li Yesu Kilisito, Mukobho gba ní-e amene e ko. <sup>7</sup> Abhomu-o, Ebhe atsia amene me ní kolo ngbingbili ka bádha bhú 'bu gba ní ko, amba ní ti la di da nasia mukobho na duduma, inde ní nde ne 'to ní 'to e-o. <sup>8</sup> Eli bhomu-o, a ko eli na kukulu. Ma akunda la di me, mu lu pépé kpekpeke, amba okpála hana inde abhuka Ebhe-e, ha lio ngú namene ongú na babadha. A

bhomu-o engú inde ndjindji, inde di ne tata pi ndu okpála hana ko.

<sup>9</sup> Engú bini, mo odú namene obhayiki na ngingi de. Mo odú namene kpekebhe li nakpokpo ndjándjá kpokpodumu de. Mo odú namene otolo di ne bhayiki pindji líli gba Moidje-e de. Padhá de, anga ndu ongu bhomu-o hana padhá, tata la di tété ade.

<sup>10</sup> Mbe bhú 'ndji bhulu nagbogbo bhusu omabhuka bhutsibhutsi na bini, mu mbe bhú 'ndji ani bhutsibhutsi na bhisi, amba pipita ani dje mu de-e, mu de gbe ani bhú ká uo magbe. <sup>11</sup> Mu mbila ndjindji me, ngua kpála bhomu-o ayie li ngbili kpadji ayie. Ani atsia a'o lie bhú mangimbo ngae makpe, ka ani azi 'ndji e lie bhú namene siti 'ngú-o.

*Polo aha olíli na soso pi Tito*

<sup>12</sup> Ma ngatima Alatemasi pi mu. F du ani de-e, li ma atima Tisike. Nedhinga ani akólo lie, mu de mene ne kpéke ngú nago nabhaka ma bhú gudhu na Nikopolisi. Padhá de, anga ma apa me nedhinga na zini-e ané ma me, ma nde oo ko. <sup>13</sup> Tsia 'kpí li 'ngú na dhuku gba avuka Djenasi, ngauo ne Apolosi-e ndjindji, amba u adú bhú ndibhili 'he bini de. <sup>14</sup> A ayo di me okpála gba ní-e mbila lio ne namene ongu na babadha ngubula me u du ne oehe ngubula nateteke okpála inde ne gugumu-o ne di. U mene mo-o, kulu gba uo-o tsia zú nguwa.

<sup>15</sup> Ndu okpála hana inde bhú dabili bini ne ma-a apa me, o yi mu mayi. Pa pi ondaise ní na mukunda, inde ní nde ne o bhú 'bu nabhuka me, ya yi uo mayi. A ayo me, Ebhe tuko bisagu pí ndu yi hana!

## Balua gba Polo pi Filemo Eli na kalanu

Filemo nani ne makilisito na kpekpeke, a mana me a ko nani sũka okpala na Dadjua gba Ebhe na Kolosai. La die, adu nani ka ani ne bali bini inde adu 'li e me Onedjime. Bali ango-o, akpe nani makula e, ani anu au li e ne Polo me ani nde bhũ tikpu. Ani adje Bádha Ngali gba Kilisito ka Polo, ani atsia akolo makilisito. Abhomu-o, Polo atsia aye balua pi Filemo ne nayo ka ani me, a ayo me u dje lio ne bali gba e-o. Polo atsia atima Onedjime agba Filemo ne nakikiliki li e pi Filemo me, ani sia ani ne bádha bua, ani asia bha ani maka bali inde u ambu li e de. Engũ bini, ani sia ani maka ndai e inde makilisito.

### Ongbengbe ongu inde bhũ bhuku inde-e ngae inde:

Eli na kalanu 1-3

Napa 'ngũ ndjindji li kute

Filemo 4-7

Nakikiliki lie ngubula Onedjime

8-22

Eli na soso 23-25

*Polo ne Timoté yi Filemo ne obi e mayi*

<sup>1</sup> Ma aye balua inde-e pi mu ngama Polo. Ngama-a, ma bhũ tikpu kabula 'li Yesu Kilisito. Ya aye pi mu ngaya bhũ dabili bini ne ndai ní na mukunda Timoté. Ya aye pi mu ndai ya Filemo, ngamu kpala inde ngakpokpo Bádha Ngali bhũ dabili bini ne ya-o. <sup>2</sup> Ya aye di balua ango-o pi ndai ní na ølø Apia, ne pi Alisipe inde ngagu gbele bhũ dabili bini ne ní-o. Ya aye di pi ondaise ní inde ayoyo Ebhe bhũ 'ti gba mu-o. <sup>3</sup> A ayo me Ebhe 'Dyi ní, bhũ dabili bini ne Ngámá Yesu Kilisito suno

bádha bhũ 'bu pi yi, amba u ha di guo 'ngũ pi yi.

*Polo agie heni pi Ebhe ngubula Filemo, ani atsia ayo di Ebhe pi ani*

<sup>4</sup> Ndu nedhinga hana ma ngayo Ebhe lie-e, ma ngabhundja mu Filemo. Ma la di ngagie heni pi ani ngubula mu ndu 'kpi hana. <sup>5</sup> Padhá de, anga ma ngadje me mu ne mukunda naali pi ndu omabhuka hana, mu la di ne nabhuka bhũ Ngámá Yesu. <sup>6</sup> Ma ngayo Ebhe ngubula me nabhuka inde ní akpøtø liní ne mu bhũ e-e, zu obabadha nguwa, amba mu kø mboli obabadha ndu 'ngũ hana inde li Ebhe aha e pi ní-e má kpulakutu! Li mu mene mo-o, ndu okpala hana dhégø Kilisito. <sup>7</sup> Ndaí ma, mukunda mu nde ne e pi ondaise ní-e aha djali muma naali, atsia ato di masi bhũ ma, anga mo okø bua omabhuka koko-o.

*Polo ayo ka Filemo me ani sia Onezime ndjindji*

<sup>8</sup> Kaka-a, abana ma nde lie ne angu nayo 'he ka mu maka li bua ma akunda lie bhũ 'bu nabhuka ní nde ne mu bhũ e, <sup>9</sup> ma ayó ka mu mo-o de. La-a, ma ayó mangbo 'he ka mu kabula mukunda ní nde ne mu bhũ e ko. Ma ngapa 'ngũ bhomu pi mu ngama bhele kpala Polo, ma la di mbia inde-e bhũ tikpu kabula Yesu Kilisito. <sup>10</sup> Ma ngakikiliki lima pi mu ngubula Onezime, ndili gba ma bhũ 'bu nabhuka. Ani abhuka Yesu sa 'kpa ma ei, nedhinga ma nde lie bhũ tikpu-o. Kaka-a, ani maka ndili gba ma, ma maka 'dyi ani. <sup>11</sup> Nako kalanu-o, ani du pi mu li kulu bini de, engũ bini mbia inde-e, ani akolo pi ndu ní bhisi hana li kulu.

<sup>12</sup> Ngaani-e, a ko kpukpú na bua ma. Mbia inde-e, ma ngagie ani pi mu. <sup>13</sup> Ma nde lie bhũ tikpu ei kabula Bádha Ngali-e, bua ma apa muma me ani du de ma si ngũ

nateteke ma mada mu. <sup>14</sup> Engú bini, ma kúnda nako namene mo-o padhá de me mu nde ziba de-e de. Padhá de, anga ma kúnda nagbite mu li namene mo-o ne ekpú de. Ma akúnda mangbo me mu mene engú ango-o ne bádha bua.

<sup>15</sup> Nedhinga koko-o, Ebhe amene me Onezime nu li bili koko ngubula nedhinga bedi, amba pipita-a, ani gie lie agba mu, ngú nadu ne mu bhú dabili bini ndu 'kpí hana. <sup>16</sup> Padhá de, anga mbia inde-e, a ko matá bali de, engú bini ani ane bali mane. A ko ndai ní na mukúnda. Ngama Polo-o, ma kúnda ani naali. La ngamu-o, mukúnda gba mu pi ani-e ané la matá mane, anga a ko kpála-kuti, a ko la di ndai mu makilisito.

<sup>17</sup> Kaka-a, i du me mu nde ngau ma maka ndai mu-o, mu de sia ani mugito me mo osia ma makpe. <sup>18</sup> Li ani mene mu sisiti-e, i du di me ani nde ne bopulu nagigie pi mu-o, ma agie pi mu ngama. <sup>19</sup> Ngama Polo-o, ma aye pi mu ne 'kpa ma makpe me: «Ma agie pi mu ngama.» La-a, mu ti da nayo ehe bini li ma de, anga mukobho na duduma inde mo osia e-e, mo odje 'ngú ango-o ka ma. <sup>20</sup> A moko ndai ma, mene engú bhomu-o muma kabula mukúnda gba Ngámá gba ní-o. Teteke bua ma, anga ní akpètse liní bhú 'bu Kilisito.

<sup>21</sup> Nedhinga ma ngaye balua inde-e pi mu lie, ma aziba na paká me mo oméne engú ma ngayo e ka mu-o mamene. Ma ambila la di me mo oméne belegu ané bhende ma ngayo e ka mu-o mane. <sup>22</sup> Nedhinga inde mo osia Onezime lie agba mu-o, mu de leke di dabili muma ngú nasi ka ma tété. Padhá de, anga ma abhundja me Ebhe asúno bádha bhú 'bu bhú mayo gba yi-e masuno.

Ani tsia bhúlu kpadji muma me ma kolo li yi oo ko.

*Oeli na soso*

<sup>23</sup> Epafalasi, inde bhú tikpu bhú dabili bini ne ma kabula Yesu Kilisito-o yi mu mayi. <sup>24</sup> Maloko, ne Alisitaluka, ne Demasi di ne Luka ndu uo hana ngamene kulu ne ma bhú dabili bini. U apa di me o yi mu mayi. <sup>25</sup> A ayo me bádha bhú 'bu gba Ngámá gba ní Yesu Kilisito-o du ne yi.

## Balua u aye e pi omaEbele Eli na kalanu

Balua inde u aye nani e pi omaEbele, u aye nani pi limbi omakilisito inde akolo masikpe de na'o ká nabhuka gba o bhú Kilisito ka nato mbolo li uo adu anu bha ne kalanu-o. Kpála inde aye balua ang-o, adu ato masi bhú uo ane mane bhú nabhuka ne nasuno pi uo me, Yesu Kilisito ne polofeta na kukulu, a ko la di polofeta na soso inde li Ebhe apana lie bhú e pi okpála gba e-o.

Bhú 'ngú na Ebhe gba omaYuda-a, odimandø adu amene mayo ne natsulu onu ngubula me Ebhe mbu li siti 'ngú gba okpála. Engú inde u adu amene bhomu-o, adu kulu Yesu inde Ndili na duduma gba Ebhe, inde aha lie ngae makpe maka enu inde natsulu matsulu. Kaka-a, Ebhe a'o aní ngbéngbé ane opolofeta, ane oandjelu, ane Moidje ngae makpe, Ebhe atsia pa me a ko dimandø na duduma. Li pápá gba aní-e, ndu omabhuka hana asia mukobho li tsulu u adu ne e li pápá na siti 'ngú gba o ne li pápá na kuo.

### Ongbengbe ongú inde bhú bhuku inde-e ngae inde:

Eli na kalanu: Ebhe ngasuno li e mbámbá bhú Kilisito 1:1-3  
Kilisito ngbéngbé ane opolofeta, ane oandjelu, ane Moidje, ane Djodjue, ane odimandø, ane gandja a la di-e makiso 1:4 – 10:39

Engú na ngbéngbé a ko nabhuka 11:1 – 12:29

Nanga li Ebhe 13:1-19

Mayo na soso 13:20-21

Eli na soso 13:22-25

### Yesu Kilisito ne Ndili gba Ebhe makpe

<sup>1</sup> Nani kalanu-o, Ebhe akpokpo 'ngú pi onguo ogbi ní bhutsibhutsi di ne li okpadji bhelé bhú 'li opolofeta . <sup>2</sup> La bhú oekpí na soso inde-e, aní akpokpo 'ngú pi ní bhú 'li Ndili gba e inde aní a'o e ngámá pí 'ndji ndu 'he hana, di u abho nani ndu 'he hana bhú dabili bini ne e-o. <sup>3</sup> Aní aha bha 'Dyi e hana, kaka-a, kpála bhende au sangu gba Ndili-e au bhomu-o sangu gba Ebhe makpe. Aní abi ndu 'he hana ne 'li e na angu-o. Pita aní agbegbe okpála lie bhú siti 'ngú gba o-o, aní atsia atapa abhúlá ngú nadu li bili na ngámá li pá 'kpa na kokpa gba Ebhe Angbamili.

### Ndili gba Ebhe-e ane oandjelu mane

<sup>4</sup> Ndili gba Ebhe-e ane oandjelu mane, kaka Ebhe agisila 'ili li aní inde ane bhende gba uo-o mane.

<sup>5</sup> Padhá de, anga Ebhe pa nga pi andjelu bini de me:

«Ngamu-o, mu ne Ndili gba ma, naki inde-e, ma asuno 'ngú ang-o mbámbá.» †

Aní pa di li 'ngú gba andjelu bini de me:

«Ma adu ne 'dyi aní, aní tsia du ne Ndili gba ma-o.» †

<sup>6</sup> Li nedhinga li Ebhe adu natima gina Ndili gba e lie pála doto-o, aní apa me:

«A ayo me ndu oandjelu gba ma-a hana dhøgø aní.†»

<sup>7</sup> Aní atsia apa li 'ngú gba oandjelu-o me:

«Oandjelu gba ma-a ngamene kulu mu ma maka anvi, u ngateteke ma maka djua inde ngatsi matsi.†»

<sup>8</sup> La-a, aní atsia apa li 'ngú gba Ndili-e me:

† 1:5 1:5 Tsia bhú Ets. 2:7. † 1:5 1:5 Tsia bhú 2 Sam. 7:14. † 1:6 1:6 Tsia bhú Det. 32:43.

† 1:7 1:7 Tsia bhú Ets. 104:4.



«M̄ ne Ebhe! Nau gba m̄-o adú  
duduma ne duduma,  
M̄ ngau pí 'ndji okpála gba  
m̄-o ne ngbili 'ngú .

<sup>9</sup> M̄ kunda ngbili 'ngú, mo oyala  
engú na sisiti.

Kaka-a, Ebhe gba m̄-o, a'o  
m̄ kpi pí e,  
ani abh̄ m̄ bhú ká obi m̄,  
ani atsia atuko em̄ na djali pí  
'ndji m̄.†»

<sup>10</sup> Ebhe atsia apa matá me:

«Ngámá, mo obho doto nayie li  
lilita ngam̄,  
kokpí ne nganda 'kpa m̄.

<sup>11</sup> Ndu 'ngú bhom̄-o hana angíta  
mangita, la ngam̄-o,  
mo otígala matigala.  
Nd̄nd̄ hana akádha maka  
bongo .

<sup>12</sup> Mo onúnu uo maka u anunu  
koti lie,  
u tsia yípa di maka li bongo  
ayiyipa lie.

La ngam̄-o, m̄ yiyipa de,  
kalanga gba m̄-o ndjía la  
di-i de.†»

<sup>13</sup> Ebhe pa nga belegu pí andjelu  
bini de me:

«Ngam̄-o, go du kuto li pa  
'kpa ma na kokpa,  
ma abú obh̄lu yala gba m̄-o  
dabili na sa 'dh̄ m̄.†»

<sup>14</sup> Oandjelu bha ne obua inde  
ngamene kulu pí Ebhe. Ani nga-  
tima uo me u n̄ nateteke okpála  
inde ayo me u sia mukobho-o.

## 2

*Mukobho inde u akpokpo 'ngú  
na e-e, a ko kukulu mukobho*

<sup>1</sup> Kaka-a, a ayo me ní gbite liní  
kpekpeke li kukulu 'ngú inde ní  
adje e-o, amba ní ambú li kpadji-e  
de. <sup>2</sup> Engú inde li Ebhe akpokpo  
e bhú 'li oandjelu-o , asuno lie me  
a ko kukulu 'ngú. Okpála bhende  
i lila eli ango-o de-e, inde agum̄

líli-e, u asia ke 'ngú inde ati ne uo-  
o. <sup>3</sup> La nganí-e, ní ti da naneke  
ke 'ngú-o lele pí, i du me ní nde  
'o 'to ní 'to kukulu mukobho-o de-  
e? Ngámá ngae makpe akpokpo  
'ngú na mukobho ango-o kalan̄  
ngae. Pipita-a, okpála bhende  
adje-e atsia apa pí ní me a ko  
kukulú 'ngú. <sup>4</sup> Abhom̄-o, Ebhe  
atsia asuno me engú u akpokpo  
e-e, a ko kukulu 'ngú ne ongú na  
ngangamba, di ne nd̄ okiaka 'ngú  
hana. Ebhe apana ongú ango-o  
bhú naha Bu Bhobua maka ani  
akunda lie-o.

*Yesu akpi ngubula nakobho nd̄  
okpála hana*

<sup>5</sup> Ebhe ha angu pí oandjelu  
ngú nako pí doto inde ngago ya  
ngakpokpo 'ngú na e inde-e de.  
<sup>6</sup> Engú bini, bhú Bhuku gba Ebhe-  
e , kpála bini apa me:

«Kpála-kuti ne da, ngubula me  
m̄ bhundja engú gba ani-  
e?

Nd̄li gba kpála-kuti ne da me  
mo 'o 'to m̄ 'to ani-e?

<sup>7</sup> Mo o'o nani ani sa oandjelu  
ngubula nedhinga bedi.

Mo otsia ato ndata na asasaua  
ne mazima bhú 'ndji ani.

<sup>8</sup> Mo otsia a'o nd̄ 'he hana sa  
ani.†»

Ebhe a'o nani kpála-kuti ngámá pí  
'ndji nd̄ 'he hana. A kunda napa  
me, ani 'o nani ehe bini de me  
aneke nad̄ sa ani-e de. La mbia  
inde-e, ní u de me kpála ne ngámá  
pí 'ndji nd̄ 'he hana-a de.† <sup>9</sup> Engú  
bini, ní ngau me Yesu ad̄ nani sa  
oandjelu ngubula nedhinga bedi,  
amba ka bádha bhú 'bu gba Ebhe-  
e , ani ti da nakpi pí nd̄ okpála  
hana. Ní ngau mbia inde-e me, ani  
adyi ndata na asasaua ne mazima,  
anga ani asia nani likabhu bhú  
nakpi ka e. <sup>10</sup> Padhá de, anga  
Ebhe abho nd̄ 'he hana ngae,

† 1:9 1:9 Tsia bhú Ets. 45:7-8. † 1:12 1:12 Tsia bhú Ets. 102:26, 28. † 1:13 1:13 Tsia bhú  
Ets. 110:1. † 2:8 2:8 Tsia bhú Ets. 8:5-7. † 2:8 2:8 Tsia bhú Ets. 8:5-7.

ndu 'he hana la di ne naani. Ani akunda me ongisi gba ni-e bhelé sia di sangu gba ni-o. I nde lie me Yesu Kilisito ngasuno kpadji na mukobho pi uo ngae, a ayo nani me ani du bedhe hana li kpadji nazu likabhu.

<sup>11</sup> Yesu ngagbegbe okpála bhú siti 'ngú gba o-o ngae. La di-e, 'dyi ndu okpála hana inde ani agbegbe o bhú siti 'ngú-o bha bini. Kaka-a, numu li ani ade ngú na'i uo me ondaise ni. <sup>12</sup> Ani apa pi Ebhe me: «Ho Ebhe! Ma apa engú gba mu-o pi ondaise ma.

Ma atóko mu kala ndu okpála hana.†»

<sup>13</sup> Ani apa di me:

«Ma a'ó nabhuka gba ma-a bhú Ebhe.†.»

La di me:

«Tsia ya bhú dabili bini ne ongisi inde li Ebhe aha o mumu-o.†»

<sup>14</sup> La di-e, ongisi gba Ebhe-e, a ko okpála-kuti inde bhú kute, a la di bhú uo ne ngute. Yesu ngae makpe akolo bhadi maka uo, ani asia di kute ne ngute maka uo. Abhomu-o, bhú nakpi ka ani-e, ani atsia aha angu djabulu inde li angu na kuo nde ka e-o.

<sup>15</sup> Yesu amene di mo-o ngubula nakobho okpála inde akolo maka obalise gba kuo bhú mukobho gba o libhomu. <sup>16</sup> Padhá de, anga a na paká me ani go nani nateteke oandjelu de. Engú bini, ani ago mangbo ngú nateteke piga gba Abalahama. <sup>17</sup> Kaka-a, a ayo nani me ani kolo bhú ndu 'ngú hana maka ondaise e, amba ani du 'ngbé dimandø . A ayo nani me ani kolo 'ngbé dimandø inde abedhe ne ndjinga, inde di ngamene kulu gba Ebhe-e li lelele, ngubula mambu na siti 'ngú gba okpála-o. <sup>18</sup> Mbia inde-e, ani ti

da nateteke okpála inde ngali bhú nale-o, anga ngaani makpe-e, ani apu bhú nale, ani atsia azu di likabhu.

### 3

*Yesu ane Moidje mane*

<sup>1</sup> Kaka-a, ondaise ma omakilisito, ngayi okpála inde li Ebhe a'i o-o, yi 'o mabhundja gba yi-e pi Yesu. Padhá de, anga Ebhe atima ani ngubula me ani du bhulu titima di ne 'ngbé dimandø gba ní-o, ní atsia abhuka la bhadi ka ani. <sup>2</sup> Ani amene kulu kala Ebhe inde abhu ani ngú kulu ang-o ndjindji. Ani amene kulu ang-o li lelele maka li Moidje amene nani lie bhú Piga gba Ebhe-e libhomu-o.† <sup>3</sup> Kpála inde ayiki eti-e, sisia nadhogø nane eti inde ani ayiki e-o. A moko, a ayo me u dhogø Yesu nane Moidje mane. <sup>4</sup> Ayiyiki eti hana ne kpála bini. La-a, kpála inde abho ndu 'he hana-a ne Ebhe. <sup>5</sup> Moidje ngae makpe amene nani kulu li lelele bhú Piga gba Ebhe-e libhomu. Ani adu nani kpála na kulu inde adu nakpokpo 'ngú li Ebhe adu nakunda napa e sidi-o. <sup>6</sup> Engú bini, Kilisito ne Ndili inde ngamene kulu li lelele. Ani maka nepanda li Ebhe a'o e li eti gba e-o. Eti ang-o-o, a ko ní, i du me ní nde abhuka na paká paká, i du la di me ní nde ne gindaginda li 'ngú ní nga'o 'to ní 'to e-o.

*Bili naguo inde li Ebhe aleke e pi okpála inde ngamanga ani-o*

<sup>7</sup> Kaka-a, a maka li Bu Bhobua apa lie me:

«† du me yi nde adje 'li Ebhe naki inde-e,

<sup>8</sup> yi agbite bua yi de, maka yi agbe nani kpéke 'ndji lie li ani,

ekpi inde yi ale ani lie abhu mili bili-o.

† 2:12 2:12 Tsia bhú Ets. 22:23. † 2:13 2:13 Tsia bhú Isa. 8:17. † 2:13 2:13 Tsia bhú Isa.

8:18. † 3:2 3:2 Tsia bhú Nom. 12:7.

9 Bhú 'gu oo, onguo ogbi yi ale nani ma ngubula nambila 'ndjá bua gba ma-o,

abana u au ndu 'ngú ma amene e, ngubula kalanga ndjikpa badha lie hana-o.

10 Kaka-a, bua ma atsia ake ne uo. Abhomu-o, ma atsia apa me: «Uo ngadji 'ngbu o li ma ndu nedhinga hana bhú mab-hundja gba o.

U mbila engú inde ma akunda e pi uo-o belegu de bini.»

11 Li bua ma ake lie, ma atsia atu silika me:

«U lí li bili ma aleke e ngú naguo pi uo-o belegu de bini!†»

12 Ondaise ma, yi lila liyi ngubula me kpála bini bhú ká yi adú ne siti bua de. Aní adú di ne bua na nabhuka de-e de, inde nga'e okpála li kpadji gba Ebhe na mukobho-o. 13 Aní nga'í yi ndu 'kpí hana. Ka 'ngú angoo, li ekpí na naki inde li Bhuku ngapa 'ngú e nde nga bha ngabhue lie, yi teteke liyi sunda yi nedhinga yi ngadje e'í angoo lie-o. † du mo-o, siti 'ngú píte yi de, kpála bini bhú ka yi yála la di namanga Ebhe de.

14 Padhá de, anga ní ne okpála gba Kilisito, † du me ní nde alila nabhuka inde ní asia nani e li lilita kpekpeke akolo alí soso-o.

15 Bhuku gba Ebhe-e apa me:

«† du me yi nde adje 'li Ebhe naki inde-e,

yi agbíte bua yi de, maka yi agbe nani kpéke 'ndji lie li ani-o.†»

16 La-a, a ko okpála bhedho inde adje 'li Ebhe, atsia agbe nani kpéke 'ndji li ani-e? A ko ndu okpála hana inde li Moidje agbe o bhú Edjipeto-o. 17 La-a, Ebhe ake 'ngú lie pi oda ngubula kalanga ndjikpa badha-a? Aní ake 'ngú lie

pi okpála inde amene siti 'ngú, u atsia amu abhú 'gu. 18 Ebhe atu nani silika me: «U lí li bili ma aleke e ngú naguo pi uo-o belegu de bini.†» Aní atu nani pi oda? Aní atu pi okpála inde agbe nani kpéke 'ndji li ani-o. 19 Ní au me, u li nani li bili naguo bhomu-o de, anga u bhuka nani-i de.

## 4

1 Ebhe apa nani me ní alí li bili naguo inde ní aleke e mali. Kaka-a, 'e-e! Yi lila liyi, amba kpála bini bhú ka yi anéke nali li bili angoo de. 2 Ní asia eli gba Ebhe-e bhadi maka okpála bhende adu nani abhú 'gu-o. La-a, u sia eli angoo ne tata de. Padhá de, anga li u adje eli angoo lie, u sia ne nabhuka de. 3 Nganí okpála bhende abhuka-a, ní alí li bili naguo bhomu-o mali, li Ebhe apa 'ngú e me:

«Li bua ma ake lie, ma atsia atu silika me: «U lí li bili inde ma aleke e pi uo ngú naguo belegu de bini!†»

Abhomu-o, kulu gba ni-e atsia andjia nayie li ani abho doto lie-o. 4 Padhá de, anga bhú Bhuku gba Ebhe-e, u apa pindji ekpí na mananika-a me: «Ebhe aguo bhú 'kpí na mananika, li ani amene ndu kulu gba e lie hana-o.†» 5 Ebhe atsia apa matá di me: «U lí li bili inde ma aleke e pi uo ngú naguo belegu de bini.†»

6 Okpála bhende asia nani Bádha Ngali gba Ebhe-e kalanu-o, li nani li bili naguo angoo de. Padhá de, anga u ayala nani namene líli gba Ebhe. Abhomu-o, Ebhe atsia ade kpadji pi okpála koko ngú nali li bili angoo-o.

† 3:11 3:7-11 Tsia bhú Ets. 95:7-11. † 3:15 3:15 Tsia bhú Ets. 95:7-8. † 3:18 3:18 Tsia bhú Nom. 14:1-35; di ne bhú Ets. 95:11. † 4:3 4:3 Tsia bhú Ets. 95:11. † 4:4 4:4 Tsia bhú Dje. 2:2. † 4:5 4:5 Tsia bhú Ets. 95:11.

7 Kaka-a, Ebhe a'o matá ekpí koko, ekpí inde u a'i e me: «Nakí inde.» Aní apa nani engú na ekpí ango-o sidi naali bhú 'li Davidi, bhú lukuluku inde u apa 'ngú li e kalanu-o me:

«† du me yi nde adje 'li Ebhe naki inde-e,

yi agbíte bua yi de.†»

8 Padhá de, anga i dú me Djodjue dhúku nani ne okpála li bili nago ango-o, Ebhe de pa matá 'ngú na 'kpí koko nago de.

9 Kaka-a, nago maka ekpí nago na mananika-a, atigala pi okpála gba Ebhe-o. 10 Padhá de, anga kpála bhende ali li bili nago inde li Ebhe aleke e, ngaguo li okulu gba e maka li Ebhe aguo lie li obhe gba e-o. 11 Kaka-a, ní mene ne kpéke me ní li li bili nago ango-o. Ní mene me kpála bini bhú ká ní atí ka kpéke 'ndji de maka onguo ogbi ní inde adu nani ne kpéke 'ndji-e, li lie li bili ango-o de-o.

12 Padhá de, anga eli gba Ebhe-e bhú mukobho, a la di ne angu. A dhédhé ane mbotia inde u adyi 'te e ne pasu bhisi hana. A adudu kpála, i tsia kólo makolo li bhobua ani. A ngadu kpála akólo makolo li bili li biki di ne mbilika akó lio lie-o. Eli ango-o ngasuno engú inde awo lie li bua kpála ne bhende ani ngabhundja e-o. 13 Ehe bini nabho mabho inde awo lie kala Ebhe-e ade. Ndu 'he hana inde ani abho e ngau lie mbámhá kala ani. La di-e, ní akpókpo ndu 'ngú gba ní-e hana kala ani.

*Yesu ne 'ngbé dimandø gba Ebhe*

14 Kaka-a, ní lu kpekpeke bhú nabhuka inde ní ngakpokpo 'ngú na e-o. Padhá de, anga a ka ní ne 'ngbé dimandø na angu inde anu akolo makolo abhúlá kala Ebhe. A ko Yesu, Ndili gba Ebhe. 15 'Ngbé

dimandø gba ní-e ne angu ngu nadje likabhu bhú dabili bini ne ní bhú bhuku gba ní-o. Aní ali bhú nale ne ndu kpadji hana maka ní, engú bini, ngaani-e, ani mene siti 'ngú belegu de bini. 16 Kaka-a, ní dyudyo liní de kiti na ngámá gba Ebhe-o, li bili na bádha bhú 'bu gba ani-o. Oo, ní asia mambu, ani tsia súno bádha bhú 'bu gba e pi ní ngubula nateteke ní bhú nedhinga ayo lie-o.

## 5

1 U bhuhhu 'ngbé dimandø gba Ebhe-e bhú ká okpála ngubula me ani mene kulu gba Ebhe-e bhú ka uo. Aní tsutsulu enu maka makiso pi Ebhe ngubula siti 'ngú gba uo-o. 2 'Ngbé dimandø gba Ebhe-e ngae makpe di bhuhhuku. Kaka-a, ani ti da nadje ndjinga okpála inde li imbilangu nde bhú 'ndji o ade, inde di ambu li kpadji-o. 3 Li 'ngbé dimandø gba Ebhe-e ngae makpe nde lie bhuhhuku-o, ani tsutsulu enu na makiso pi Ebhe bha bini ngubula siti 'ngú gba okpála de. Engú bini, ani tsutsulu di ngubula siti 'ngú gba e makpe. 4 Kpála bini ti da nato ndata na 'ngbé dimandø gba Ebhe-e bhú 'ndji e ngae makpe de. Kpála kokolo bha 'ngbé dimandø gba Ebhe-e me Ebhe nde a'i ani ngae, maka ani a'i nani Alona lie-o.

5 A bhadi pi Kilisito moko. Aní to nani ndata na 'ngbé dimandø gba Ebhe bhú 'ndji e ngae makpe de. Engú bini, Ebhe aha nani pi ani ngae, Ebhe atsia apa pi ani me: «Ngamu-o, mu ne Ndili gba ma, nayie pi naki inde-e, ma ne 'Dyi mu.†»

6 Aní atsia apa di li bili koko me: «Mu ne dimandø gba ma dudu ma ne dudu ma,

maka Malekisedeke.†»

<sup>7</sup> Nedhinga li Yesu adu lie pila doto-o, ani adu nayo Ebhe di ne nakikiliki lie pi ani ne nasusula kpekpeke la di ne ngula bhú djila e. Ani ayo Ebhe inde i ti da nani nakobho ani bhú kuo-o. Abhomu-o, Ebhe atsia adje ani, anga ani a'o nani lie ne kuto kala Ebhe. <sup>8</sup> Abana ani adu nani lie Ndili gba Ebhe-e, ani ambila lie ne namanga Ebhe bhú likabhu inde ani azu e-o. <sup>9</sup> Pita ani andjia kulu gba e lie hana ndjindji kala Ebhe-e, ani atsia akolo kpongu na mukobho na daduma pi ndu okpála hana inde ngamanga ani-o. <sup>10</sup> A moko, Ebhe a'o ani 'ngbé dimandø gba e maka Malekisedeke.

*A ayo me yi bhele bhú nabhuka gba yi-o*

<sup>11</sup> Ya ne engú bhelé napapa pindji 'ngú bhomu-o. Engú bini, da nambamba tata-a kpekpeke, anga yi ti da nakpokpo kúkú má gala de. <sup>12</sup> Yi adu nako ne nedhinga bhelé ngubula me yi kolo omusuno. Engú bini, yi matá ne gumu me u suno ongú na kalanu na eli gba Ebhe-e pi yi ne toto. Yi nga bha ne gumu nandji miliki bhú da nazu ezu na kpekpeke. <sup>13</sup> Padhá de, anga kpála bhende nga bha ngandji miliki-e ne ndili. Ani mbila nga nagbogbo bhusu bádha 'ngú ne siti 'ngú de. <sup>14</sup> La-a, ezu bhe na kpekpeke-e pi obhelesi okpála. A ko okpála inde ambila lio ne nagbogbo bhusu siti 'ngú di ne bádha 'ngú ka okulu inde u amene e-o.

## 6

<sup>1</sup> Kaka-a, ní kodho 'kpí li nasuno bhende ati ne obhelesi okpála-o. Ní dji 'ngbu ní li nasuno na lilita gba omakilisito. Ní a'ó matá 'dhu nasuno inde-e ne toto de: nadji bua o di ne na'o okulu inde ngato kpála bhú kuo, <sup>2</sup> nasuno pindji

obatisimo di ne na'o 'kpa o pí 'ndji kpála, nakpokpo 'ngú pindji nazuku ka okpála inde amu, di ne nakodho 'ngú na daduma. <sup>3</sup> A bhomu-o ongú inde a ayo me ní 'o e-o, i du me Ebhe nde akunda-o.

<sup>4-6</sup> Padhá de, anga engú gba okpála bhende ngagie lio bhú siti 'ngú gba o-o, lele pi? U asia nani zi 'ke gba Ebhe-e asia. U ale bádha 'ngú inde li Ebhe ngaha e pi omaha e pí 'mi o. U atsia asia di Bu Bhobua bhú dabili bini ne okpála koko. U ambila ndjindji me eli gba Ebhe-e babadha. U ambila angu na doto inde ngago-o. Pipita-a, u atsia a'o ká nabhuka gba o-o! U ti da matá namene de me u dji bhobua o bhutsibhutsi na bhisi-e de. Padhá de, anga u ngagie matá Ndili gba Ebhe-e li kulusi ne toto. U la di ngaka kpadji pi okpála me u du nasobho ani.

<sup>7</sup> Li doto du nandji ngubha inde ngadhi pépé ndu nedhinga hana-a, li i du la di me a nde ngagbe ezu pi okpála inde alu edyi angoo ndjindji-e, li Ebhe túko bisagu pí doto angoo. <sup>8</sup> La-a, i du me doto angoo nde azu ulu na eti ne bhe na sisiti-e, tata dú tété de. Doto angoo masikpe me Ebhe tu pedje tété. Pipita-a, u tsia bú bhú djua.

<sup>9</sup> Abana ya pa mo-o, ondaise ma na mukunda, ya ambila ndjindji me yi li bádha kpadji, kpadji na mukobho. <sup>10</sup> Ebhe ne kpála na ngbingbili. Ani 'li 'to e li kulu gba yi-e de. Ani 'li la di 'to e li mukunda yi asuno e pi ani li kulu inde yi amene e, inde la di yi matá ngamene e pi omakilisito koko de. <sup>11</sup> Gumu gba ya-a me ndu yi hana bini ne bini, yi suno ngua mukunda bhomu-o nakolo makolo ali soso, ngubula me ndu 'ngú hana inde yi nde ne 'to yi 'to e-e, tsia mene lie hana. <sup>12</sup> Yi andála de. Engú bini, yi kpata nganda okpála bhende ngabhuka

ne kekele, inde la di ngasia ehe inde li Ebhe apa me ni ahá e-o.

## 7

*Ní 'o 'to ní 'to ehe inde li Ebhe apa me ni ahá e pí ní-o*

<sup>13</sup> Li Ebhe apa nani lie pí Abalahama me ni ahá ehe pí ani-e, ani apa 'ngú ang-o ne natu silika ne 'li e makpe. Ani amene mo-o, anga kpála koko inde ngbéngbé ane ani ade. <sup>14</sup> Ani apa nani me:

«Ma atu silika me ma atúko bisagu pí m̄, ma tsia méne me odi m̄ kolo bhelé.†»

<sup>15</sup> Abalahama adjeke ne 'ndjá bua, ani atsia asia ehe inde li Ebhe apa nani me ni ahá e pí ani-o. <sup>16</sup> Li okpála d̄ natu silika-a, u tutu ne 'li okpála inde ane uo mane. La di-e, natu silika ngandjia kpekebh̄e s̄unda okpála.

<sup>17</sup> Ebhe asuno bhom̄ mbámbá pí okpála inde ayo me u sia ehe inde ani apa me ni ahá e-e, a anéke belegu de bini. Kaka-a, ani atsia atu silika pí 'ngú ang-o.

<sup>18</sup> A ne ongu bhisi inde u ti da nadjí e de, a ko natu silika di ne ehe inde li Ebhe apa me ni ahá e-o. Bhú ongu bhisi ang-o, Ebhe ti da napa eu belegu de bini. Ngani okpála inde awo liní bhú Ebhe-e, ní ala kpekpeke, ní a'o la di 'to ní na paká paká 'to ehe inde ani apa me ni ahá e pí ní-o. <sup>19</sup> 'To ní inde ní nga'o e ang-o ngamene me ní lu kpekpeke maka kalase inde ahoholo zabu-o. 'To ní ang-o kukul̄, a la di kpekpeke. A ngamene me ní gulu 'ngbé pála bongo inde ngabuku tina 'ti na bubu na 'ngbé 'ti Ebhe gba omaYuda inde abhulá-o, amba ní kolo makolo bhú tina 'ti ang-o. <sup>20</sup> Oo, Yesu ali nani pí ní kalanu, la di ngubula ní. Ani akolo 'ngbé dimand̄ gba Ebhe-e pí ní d̄duma ne d̄duma maka Malekisedeke.

*Malekisedeke adu nani ne dimand̄ gba Ebhe*

<sup>1</sup> Malekisedeke ang-o adu nani 'ngbé ngámá na Saleme, ani atsia adu di nani dimand̄ gba Ebhe Apí 'Kpí. Li Abalahama adu agie lie lie bhú egú inde ani agboko ongbengbe ongámási bhú e lie, Malekisedeke anu nak̄e lio ne ani, ani atsia atuko bisagu pí ani. <sup>2</sup> Abalahama atsia aha bini bhú ká ndjikpa bhú ndu 'he hana inde ani agbulu e-e pí ani. Ta 'lilí na Malekisedeke apa ngaiza kalanu me: «'Ngbé ngámá na ngbili 'ngú .» La di-e, ani adu nani ngámá na Saleme, inde akunda napa me: «'Ngbé ngámá na guo 'ngú .» <sup>3</sup> U mbila 'dyi ani ne 'hi ani de. U mbila la di ongu ogbi ani de. U kpo belegu engú bini pindji ekpí u azu ani lie ne ekpí ani akpi lie de. Ani maka Ndili gba Ebhe, kulu gba ani na dimand̄ gba Ebhe-e d̄duma ne d̄duma.

<sup>4</sup> Yi tsia nga maka li Malekisedeke nde lie ngbéngbé-o! Abalahama ogbi omatsalaele aha nani bini bhú ká ndjikpa na ndu 'he hana inde ani asia nani e bhú egú-o pí ani. <sup>5</sup> La-a, okpála na piga gba Levi-e, inde ne odimand̄ gba Ebhe-e, ne angu ngú nayo bini bhú ká ndjikpa na ndu 'he hana inde ka ongisi na tsalaele, maka li lilí apa lie-o. A kunda napa me u ngayoyo li ondaise o makpe, inde la di ne odi Abalahama. <sup>6</sup> Malekisedeke d̄ nani bhú piga gba Levi de. Engú bini, ani asia bini bhú ká ndjikpa sakpa Abalahama bhú ndu 'he hana inde ani agbulu e bhú 'gú-o. La di-e, Malekisedeke atuko bisagu pí Abalahama, kpála inde li Ebhe apa nani me ni ahá oehe pí e-o.

† 6:14 6:14 Tsia bhú Dje. 22:16-17.

7 Kpekebhe belegu ade bini me kpála bhende ngatuko bisagu pi kpála-a ngbéngbé ane kpála bhende ngasia-o. <sup>8</sup> Okpála inde na piga gba Levi-e, inde ngasia bini bhú ká ndjikpa-a, a ko okpálakúti inde amú mamu. Engú bini, pi Malekisedeke inde u aha bini bhú ká ndjikpa pi e ne kpála inde i kpikpi de, maka li Bhuku gba Ebhe-e apa lie-o. <sup>9</sup> Ngú nabu tata-a, u ti da napa me, li Abalahama aha nani bini bhú ká ndjikpa na ohe gba e lie, Levi inde li odi e ngasia bini bhú ká ndjikpa na ndu 'he hana-a, atsia aha di. <sup>10</sup> Padhá de, anga Levi inde u zu nga nani e de-e, adu bhú 'bu ogbi e Abalahama, nedhinga inde u aké lio lie ne Malekisedeke-o. Bhothomu-o asuno me Malekisedeke ane Levi mane.

<sup>11</sup> Ebhe aha nani líli pi omatsalaele me, u du nabhu odimandø gba ni-e bhú piga gba Levi. U adu odimandø gba Ebhe maka Alona. Engú bini, kulu na dimandø gba Ebhe bhú piga gba Levi-e ti nani da nabadhe 'bhø kulu gba Ebhe-e de. Padhá de, anga li kulu gba uo-o tí nani da nabadhe 'bhø kulu gba Ebhe-e uu-o, u de du nani ne gumu dimandø koko maka Malekisedeke de. <sup>12</sup> La di-e, li u yipa dimandø gba Ebhe-e, a ayo bhadi me líli-e yipa. <sup>13</sup> Padhá de, anga Ngámá gba ní inde u ngakpokpo ongu inde-e pindji e-e, naae bhú piga koko kpi. Bhú piga ang-o, kpála bini mene nga belegu kulu na dimandø gba Ebhe li bili u atsutsulu 'he lie pi Ebhe-e de. <sup>14</sup> Ní mbila ndjindji me Ngámá gba ní-e adu nani bhú piga gba Yuda. Piga ang-o, Moidje gama 'ngú tété de, nedhinga ani agama 'ngú lie pindji odimandø gba Ebhe-o.

*Yesu ne dimandø gba Ebhe*

† 7:17 7:17 Tsia bhú Ets. 110:4. † 7:21 7:21 Tsia bhú Ets. 110:4.

*maka Malekisedeke*

<sup>15</sup> Engú inde ngasuno nayipa ka dimandø la matá mbámá-a ngae inde: dimandø koko akoto, ani maka Malekisedeke. <sup>16</sup> Ani kolo dimandø gba Ebhe li lele líli gba okpála-kúti de. Ani akolo mo-o bhú angu na mukobho inde i ndjia de. <sup>17</sup> A maka li Bhuku gba Ebhe-e apa li me:

«Mu ne dimandø gba ma duduma ne duduma,

maka Malekisedeke.†»

<sup>18</sup> Kaka-a, u atsia a'e líli na kalanu-o, anga líli ang-o adu bhuhukú, tata tsia du la di tété de. <sup>19</sup> Padhá de, anga líli gba Moidje ti nani da namene de me okpála kolo ngbingbili kala Ebhe-e de. Engú bini, ní asia engú bini inde ane ne bádha naali, inde ní nga'o 'to ní 'to e-o. Padhá de, anga engú ang-o ngamene me ní dyudyo liní de Ebhe masikpe.

<sup>20</sup> La di-e, Ebhe atu nani silika. Engú bini, okpála koko akolo nani odimandø me u nde tu silika de.

<sup>21</sup> La pi Yesu-o, Ebhe atu nani silika nedhinga li ani apa lie pi ani me:

«Ngámá atu silika-a, ani dji 'li e de:

«Mu ne dimandø gba ma Ebhe Ngámá,

duduma ne duduma.†»

<sup>22</sup> Kaka-a, Yesu di ne kpála inde ngamene me ní du bhú gandja na babadha naali.

<sup>23</sup> Engú koko inde kpi-e ngae inde: odimandø koko adu nani bhelé naali, anga kuo adu nani kpadji pi uo me u adu odimandø duduma de. <sup>24</sup> Engú bini, Yesu bhú mukobho duduma ne duduma, kulu gba ani na dimandø-o ti da nandjia de. <sup>25</sup> Kaka-a, ani ti da nakobho okpála inde ngadyudyo lio de Ebhe li kpadji gba ani-e ngubula duduma ne duduma. Padhá de, anga ani ndu

'kpí hana bhú mukobho ngú nayo Ebhe pí uo.

<sup>26</sup> Kaka-a, Yesu ne 'ngbé dimandø inde ati ne ní-o. Aní bubu, pũlũ 'ngú bhú aní ade, sítí 'ngú la di bhú aní ade. Aní agbo bhasu e ne obhulu mugwe. Ebhe atsia a'e'e aní tsutsu abhúlá. <sup>27</sup> Aní maka ongbengbe odimandø koko ade. Aní ne gumu natsulu 'he pí Ebhe ndu 'kpí hana ngaiza ngubula sítí 'ngú gba e makpe, pipita ngubula bhende gba okpála koko ade. Aní amene nani bhatsibhatsi bini má kpikili, lí aní aha lie lie ngae makpe-o. <sup>28</sup> Líli gba Moidje adu nani na'o maka ongbengbe odimandø lí okpála-kutí inde í dú ngbingbili hana ade-o. Engú bini sílika lí Ebhe atu e-e, líli-e atsia a'o maka 'ngbé dimandø Ndili inde adu ndjindji hana libhomu maka lí Ebhe akunda lie, ngubula duduma ne duduma.

## 8

*Yesu ne 'ngbé dimandø gba ní-e ngae*

<sup>1</sup> Engú na ngbéngbé bhú ká ongú inde ní ngapa e ngae inde: a bhomu-o ngua 'ngbé dimandø gba Ebhe inde ka ní-o. Aní adu abhúlá lí pápá na kokpa de kiti na ngámá gba Ebhe na angu na ngbéngbé-o. <sup>2</sup> Aní ngamene kulu na 'ngbé dimandø gba e bhú tina 'tí na bubu, a akunda napa me bhú 'tí ngbangbali na kakulũ. Ayiki ne Ngámá, ayiki ne kpála-kutí de.

<sup>3</sup> U bhubhu ongbengbe odimandø gba Ebhe-e hana ngubula natsulu enu maka makiso pí Ebhe. Kaka-a, a ayo me adu di ka 'ngbé dimandø gba ní-e ne ehe natsutulu maka makiso pí Ebhe. <sup>4</sup> Í dú nani me aní dú píla doto-o, aní de ne dimandø gba Ebhe-e

ade. Padhá de, anga a ne odimandø gba Ebhe koko inde ngat-sulu ehe maka makiso pí Ebhe maka lí líli gba omaYuda apa lie-o. <sup>5</sup> Kulu inde lí odimandø angoo ngamene e-e, a ko lele kulu ongú inde ngamene lie abhúlá-o. Engú angoo viti bini ne ehe inde lí Ebhe apana nani e pí Moidje-o. Lí Moidje adu akunda nayiki 'tí ngbangbali lie, Ebhe apa pí aní me: «Tsia ndjindji ngubula me mu mene ndu 'ngú hana lí lele bhende ma asuno e pí mu apí 'ta-o.†»

<sup>6</sup> Engú bini, mbia inde-e, Yesu asia kulu inde kpi, ane bhende gba odimandø koko gba Ebhe-e mane. A ko ludu sunda ní ne Ebhe bhú gandja na babadha naali. Gandja angoo alu di pí oehe na babadha naali inde ní nga'o 'to ní 'to e-o.

*Ebhe apa me ní akódho gandja na mbia ne okpála gba ní*

<sup>7</sup> Í dú nani me gandja na kalanu-o mene me okpála kolo ngbingbili kala Ebhe-e, u de yipa ne koko de. <sup>8</sup> Engú bini, lí Ebhe au lie me gandja na kalanu-o du ndjindji hana de-e, aní atsia ambembe bhú 'ndji okpála gba e me:

«Ngámá apa me: oekpí akólo makolo,

lí 'kpí ma akódho gandja na mbia lie  
bhú dabili bini ne piga gba Isalaele di ne bhende gba Yuda-o.

<sup>9</sup> A adú maka bhende ma akódho nani e ne onguo ogbi uo-o de,

lí 'kpí inde ma agbe uo lie bhú doto na Edjipito-o.

Bhú gandja ya akódho e ne uo-o, u kpata líli angoo de.

Kaka-a, ma adjí 'ngbu ma lí uo, Ngámá apa mo-o.

<sup>10</sup> Ngámá atsia apa matá me:

† 8:5 8:5 Tsia bhú Eki. 25:40.



a bhomu-o gandja inde ma akódho e ne ongisi na Isalaele pita oekpí bhomu-o.

Ma ató olíli gba ma-a bhú imbilangú gba uo-o.

Ma ayé olíli ango-o li bua uo.

Ma adú ne Ebhe gba uo, u tsia dú okpála gba ma.

11 Kpála bini bhú ká uo dú matá ne gumu nasuno 'ngú pi ndili na kúti gba e,

di ne pi ndai e de me ani mbila ma-a de-e de.

Padhá de, anga ndu okpála hana ambila ma,

nayie li okpála na padhá nakolo makolo li okpála na kukulu.

12 Ma ambú li ndanda 'ngú gba uo-o.

Ma abhúndja matá osisiti 'ngú gba uo-o de.†»

13 Li nedhinga li Ebhe ngagama 'ngú lie pindji gandja na mbia-a, ani a'o bhe na kalanu-o me akolo didili. A na paká me, li ehe de akolo didili akolo-o, i du la di me a nde akadha-a, ehe ango-o masikpe de nangita.

## 9

### *Olíli na gandja na kalanu*

1 A adu nani bhú gandja na kalanu-o ne olíli ngú nayo Ebhe. La di-e, bili nayo Ebhe atsia adu di pila doto. 2 U ayiki nani 'ti ngbangbali bini ne tina 'ti bhúbhú

bhisi. Bhú titina na kalanu-o, u a'i e me dabili na bubu-o, u a'o misa u a'o'o tala pí e bhúbhú. U atsia a'o di misa ne mapa inde u aha e pi Ebhe-e bhúbhú. 3 Kele 'ngbé pála bongo-o, adu tina 'ti bhe u a'i e me bili na bubu naali-o.

4 Li bili ango-o, u a'o nani misa na olo inde u adu atsulu mangotsi pí e, di ne sanduku na gandja\* inde u abuku nani

kate e ne olo libhomu-o. Bhú sanduku ango-o, adu bhúbhú ne lusa inde u amene e li olo, mana atsia adu bhúbhú. Bhú sanduku ango-o, adu di bhúbhú ne ndula gba Alona inde agbe nani felele, a la di-e opapala teme inde li u aye nani líli na gandja-a pí e-o.

5 Pí sanduku ango-o, u a'o nani okulu kelube. Okelube ango-o adu asuno me Ebhe li bili bhomu-o. Kulu zini na mbudha u adu abuku bili inde li 'ngbé dimandé gba Ebhe-e aha ngute maka makiso pi Ebhe lie ngú nambu li siti 'ngú gba okpála-o. La mbia inde-e, a ko nedhinga nagama 'ngú li 'ngú ango-o bini bini de.

6 U aleke nani bili bhú 'ti ngbangbali ango-o me, bhú tina 'ti na kalanu, odimandé gba Ebhe-e du nali ndu 'kpi hana ngú namene kulu gba o-o. 7 La-a, bhú titina bhe na bhisi-e, a adu bha bini nali ne 'ngbé dimandé gba Ebhe-e ngae kpi e kpi. Sunda kalanga bini-e, ani adu nali bhútsibhútsi bini. A ayo di nani me ani li bhú dabili bini ne ngute enu, inde ani adu aha e pi Ebhe ngubula siti 'ngú gba e, di ngubula siti 'ngú li okpála amene e me u nde mbila de-o. 8 Bu Bhobua asuno me kpadji na tina 'ti bhe u a'i e me bili na bubu naali bhulu nga nani lie de, i du me 'ti ngbangbali na kalanu-o nde ngabha u-o.

9 'Ti ngbangbali ango-o ne kulu ongu inde ngamene lie bhú onedhinga inde-o. Bhobhomu-o asuno me oehe natsulu matsulu maka makiso pi Ebhe-e ti da navulu bhobua kpála inde ngamemene-e de. 10 Omakiso ango-o, a ko bha bini ongu nazu 'he, ne nandji 'he di ne ngangá mayo navulu lio ngú nakolo bubu kala Ebhe. Ndu olíli bhomu-o hana nani ne bhe gba okpála-

† 8:12 8:8-12 Tsia bhú Djlm. 31:31-34. \* 9:4 9:4 Sanduku na gandja: A ko sanduku inde u abu nani opapala teme inde u aye olíli ndjikpa gba Ebhe-e bhú e-o.

kuti, atsia adu la bhadi ngubula nedhinga bedi nakolo li nedhinga li Ebhe ayipa ndu 'ngú hana lie ndjindji-o.

*Kilisito agbegbe ní bhú siti 'ngú gba ní-e ne ngute e makpe*

<sup>11</sup> Engú bini, Kilisito ago maka 'ngbé dimandø gba Ebhe ngubula naha obabadha 'ngú inde ngago-o. 'Ti ngbangbali inde ani amene kulu gba e bhú e ngbéngbé naali, a la di babadha naali ane bhende na kalanu-o mane. A yiki 'ti ngbangbali angoo ne okpála-kuti de, a akunda napa me, a ko 'ti ngbangbali na doto inde-e de. <sup>12</sup> Kilisito ali nani bhutsibhutsi bini má kpikili li bili na bubu naali angoo. Ani ha nani ngute meme de, ani ha la di ngute ndili bagala de. Engú bini, ani aha nani ngute e makpe. Kaka-a, ani atsia agbegbe ní bhú siti 'ngú gba ní-e duduma ne duduma.

<sup>13</sup> Ngute meme, i du di-e ngute bhoko bagala di ne mbi bagala inde u atsutsulu e, u tsia bála e pí okpála bhende bubu kala Ebhe ade-e ti da namene me u kolo bubu kala ani li pápá na kute. <sup>14</sup> I nde lie mo-o, ngute Kilisito ane la matá ne angu! Ani aha lie pí Ebhe kabula Bu Bhobua na duduma maka makiso inde ndjindji libhomu. Ngute ani avulu bua nakpokpo kú 'ngú gba ní-e bhú ndu 'ngú hana inde ngato kpála bhú kuo-o, ngubula me ní mene kulu pí Ebhe inde bhú makobho-o.

*Kilisito ne ludu sunda ní ne Ebhe bhú gandja na mbia*

<sup>15</sup> Kaka-a, Kilisito ne ludu sunda ní ne Ebhe bhú gandja na mbia, amba okpála inde li Ebhe a'i o-o, ti da nasia babadha 'ngú na duduma inde li Ebhe asuno nani

e pí okpála gba e-o. U ti da nasisia anga Kilisito akpi ngubula nagbegbe uo bhú siti 'ngú inde u amene e-o. U amene nani siti 'ngú angoo li nedhinga u adu lie bhú gandja na kalanu-o.

<sup>16</sup> Ní mbila ndjindji me li kpála ziba me u gbogbo bhusu ohe gba ní-e pita nakpi ka ní-e, kala me u gbogbo bhusu ohe angoo, a ayo ngaiza me u u mbámbá me kpála angoo akpi. <sup>17</sup> Padhá de, anga i du me kpála inde aziba nagbogbo bhusu ohe gba e nde nga bha uu-o, tata li nagbogbo bhusu ohe inde ani aziba me u gbogbo bhusu e ade. Tata li nagbogbo bhusu ohe bha bini me kpála angoo nde akpi. <sup>18</sup> Kaka-a, gandja na kalanu-o asia bha bini angu li ngute atuko lie-o.

<sup>19</sup> Moidje atanga ngaiza nani olili kala ndu okpála hana maka u aye lie-o. Pipita-a, ani atsia aha ngute ndili bagala di ne ngute meme bhú dabili bini ne engu, ani ato ndjiga inde u agbite e ne mbe bongo bhú ngute ne engoo. A adu ndjiga ndula inde u a'i e me idjope.† Pipita-a, ani abobolo pí bhuku na líli-o, di ne pí ndu okpála hana. <sup>20</sup> Ani atsia apa me: «A inde-e ngute na gandja li Ebhe apa me yi manga e-o.†» <sup>21</sup> Abhomu-o, Moidje abolo di ngute-e pí 'ti ngbangbali di ne pí ndu ohe hana inde u adhdhøgø Ebhe ne e-o. <sup>22</sup> Maka li líli apa lie, masikpe de ndu 'he hana kokolo bubu kala Ebhe bha ka ngute. La di-e, Ebhe mbumbu bha li siti 'ngú me ngute nde atuko bha ngae.

*Kilisito aha lie ngae makpe maka makiso ngú na'e siti 'ngú gba ní-o*

† 9:19 9:19 Idjope: A ko suka ondula na gba omaYuda. Epondje nani u ato e bhú kpongadha pandi inde u aha nani e pí Yesu me ani ndji-e, nedhinga ani adu lie li kulusi-e, u agbite nani li Idjope. † 9:20 9:20 Tsia bhú Eki. 24:8.

<sup>23</sup> Ma apa pi yi me ndu 'ngú hana inde na kukulu li Moidje asuno nani e pi okpála-a, a ko okulu okukulu 'ngú na abhúlá. Kaka-a, a ayo la bhadi me ongú ango-o kolo bubu kala Ebhe bhú ngute onu. Engú bini, ongú na kukulu na abhúlá makpe ne gumu enu natsulu matsulu inde ane ne bádha. <sup>24</sup> Padhá de, anga Kilisito li nani bhú 'ti ngbangbali inde li okpála amene e ne kpa o-o de. 'Ti ngbangbali ango-o ne kulu 'ti ngbangbali na kukulu-o. Ani ali abhúlá makpe, li bili inde ani ngagama 'ngú lie mbia inde-e kala Ebhe ngubula ní-o.

<sup>25</sup> 'Ngbé dimandé gba Ebhe gba omaYuda lili nani li bili na bubu naali-e ndu kalanga hana bhú dabili bini ne ngute 'nu. Engú bini, Kilisito li nani ngú naha lie ngae makpe bhutsibhutsi bhelé de. <sup>26</sup> I dú nani mo-o, ani de azu likabhu bhutsibhutsi, nayie maka li Ebhe abho nani doto lie-o. Engú bini, ani akoto bhutsibhutsi bini má kpikili li nedhinga na sokpi ngú na'e siti 'ngú gba ní li kpadji naha lie ngae makpe maka makiso pi Ebhe. <sup>27</sup> Ndu okpála-kuti hana kpikpi bha bhutsibhutsi bini. Pipita-a, li Ebhe tsia kódho 'ngú gba uo-o. <sup>28</sup> A bhadi moko, Kilisito aha lie maka makiso bhutsibhutsi bini, ngubula na'e siti 'ngú gba okpála bhelé. Ani akóto lie bhutsibhutsi na bhisi-e, a adú matá ngubula na'e siti 'ngú de. Engú bini, a adú ngubula me okpála inde ngadjeke nago ka ani-e sia mukobho.

## 10

*Makiso gba Yesu Kilisito ane ndu omakiso na kalanu-o hana*

<sup>1</sup> Lili gba Moidje ngasuno kukulu 'ngú hana má kpolukutu ade. A ko mangbo kulu ongú

na babadha inde ngago-o. Lele pi li makiso inde li ngua e nde bha ndu 'kpí hana bini, inde u ngaha e ndu kalanga hana ti da lie namene me, okpála bhende ngadyudyo lio dengo Ebhe-e kolo ndjindji kala ani-e? <sup>2</sup> I dú me okpála inde ngaha ngua makiso bhomu-o pi Ebhe-e dú bubu kala ani-e, u de 'ó nabhundja siti 'ngú gba o-o. U tsia 'ó la di naha makiso ango-o. <sup>3</sup> Engú bini, naha makiso ngamene me okpála du nabhundja siti 'ngú gba o-o ndu kalanga hana. <sup>4</sup> Padhá de, anga ngute bhoko bagala ne ngute meme ti da na'e siti 'ngú belegu de bini.

<sup>5</sup> Kaka-a, li Kilisito adu ago lie pila doto-o, ani apa pi Ebhe me:

«Ma kunda nani ehe natsulu matsulu,

i du di-e makiso de,  
engú bini, mo oha kute muma ngubula me ma mene kulu gba mu-o nedi.

<sup>6</sup> Enu inde u atsulu e pí misa inde u atsulsulu 'he pí e,

di ne ehe natsulu matsulu koko inde u aha e ngubula na'e siti 'ngú-o nga nani li mu de.

<sup>7</sup> Abhomu-o, ma atsia apa me:

«O Ebhe! Tsisia,  
ma ngago ngama makpe ngú namene engú inde mo okunda e-o,  
maka u aye engú gba ma-a lie bhú bhuku na lili-o.†»

<sup>8</sup> Kilisito apa ngaiza pi Ebhe me: «Ma kunda nani ehe natsulsulu matsulu de, i du di-e makiso de. Enu u atsulu e pí misa inde u atsulsulu ehe pí e, di ehe koko inde u atsulu e ngú na'e siti 'ngú-o nga nani li mu de.» Engú bini, u haha makiso bhomu-o nakpata lele maka li lili apa lie ko. <sup>9</sup> Pipita-a, ani atsia apa me: «Ma ngago ngama makpe ngú namene engú

inde mo okunda e-o.» Kilisito a'e omakiso na kalanu-o hana, ani atsia ayipa ne bhe gba e-o. <sup>10</sup> Yesu Kilisito amene mukunda gba Ebhe-o. Ani atse kute e ngae makpe maka makiso bhutsibhutsi bini má kpikili, abhomu-o, ní atsia aze bhú siti 'ngú gba ní-o.

<sup>11</sup> Dimandø gba Ebhe-e bini ne bini lulu ndu 'kpi hana ngubula namene kulu gba e-o. Ani ngaha piko piko koli ngua omakiso bini. La-a, omakiso ango-o ti da na'e osisiti 'ngú belegu de bini. <sup>12</sup> Engú bini, Kilisito aha koli makiso bini má kpikili ngú osisiti 'ngú gba okpála duduma ne duduma. Pipita-a, ani atsia anu adu li pá 'kpa na kokpa gba Ebhe. <sup>13</sup> Mbia inde-e, ani ngadjeke me Ebhe 'o obhulu yala gba ni-e dabili na sa 'dhu ni. <sup>14</sup> Abhomu-o, ne koli makiso bini inde ani aha e, ani adjí okpála inde ani avulu o bhú siti 'ngú-o me, u kolo bubu kala Ebhe ngubula duduma ne duduma.

<sup>15</sup> Bu Bhobua la bhadi ngapapa pi ya moko, ani apa ngaiza lie me:

<sup>16</sup> «Yi tsia nga gandja inde ma akódho e ne uo pita oekpi bhomu-o,

Ngámá apa mo-o.

Ma ayé olíli gba ma-a li bua uo, ma tsia tó olíli ango-o bhú imbilangu gba uo-o. †»

<sup>17</sup> Pipita-a, ani atsia apa matá me: «Ma abhúndja matá opapulu 'ngú di ne osisiti 'ngú gba uo-o de.†»

<sup>18</sup> La-a, i du me Ebhe nde ambu li siti 'ngú ambu-o, gumu naha makiso matá ngú na'e e ade.

*Ní a'ó ká nabhuka gba ní-e de*

<sup>19</sup> Kaka-a, ondaise ma, ní ambila ndjindji me ní alí li bili na bubu naali-e kabula ngute Yesu inde atuko-o. <sup>20</sup> Ani abhulu kpadji na mbia pi ní, inde di na mukobho li pápá na kpadji na 'ngbé pála

bongo na 'ngbé 'ti Ebhe gba omaYuda, akunda napa me, bhú kute e makpe. <sup>21</sup> A ka ní ne 'ngbé dimandø inde ngatsia 'kpi li eti gba Ebhe-o. <sup>22</sup> Kaka-a, ní dyudyo liní de Ebhe ne bua ní bini di ne nabhuka hana. Padhá de, anga osisiti bua nakpokpo ku 'ngú adjí lie akolo bubu kala Ebhe, kute ní atsia avulu lie bhú engu inde li siti 'he nde bhú e ade. Ndu 'ngú bhomu-o hana amene lie bhú ngute Yesu.

<sup>23</sup> Ní lila engú inde ní nga'o 'to ní 'to e, inde ní nde ngakpokpo e kpekpeke-o. Padhá de, anga Ebhe améne engú inde ani apa me ní améne e mamene. <sup>24</sup> Ní tsia 'kpi liní sunda ní ngú nandu ne mukunda na kukulu di ne namene obabadha kulu. <sup>25</sup> Ní a'ó ka dadjua gba ni-e de maka li okpála koko ambila lio lie ne namemene-o. A ayo mangbo me ní to masi bhú ní sunda ní. Padhá de, anga yi ngau me ekpi gba Ngámá-a akolo bha ndju masikpe.

<sup>26</sup> Padhá de, anga pita nambila kukulu 'ngú-o, i du me ní nde ngamene siti 'ngú bhú gandji-e, makiso inde u ti da naha e ngubula na'e osisiti 'ngú-o matá ade. <sup>27</sup> Engú bini, ehe inde atigala pi ní-e, a ko bha nadjeke ne tsulu hana nakodho 'ngú gba Ebhe di ne dingidhi djua inde atsúlu obhulu yala gba ani-o. <sup>28</sup> Ndu okpála hana inde adu agumu líli gba Moidje-e, u adu abhili uo. U du nadje ndjinga uo de, i du me okpála bhisi, i du di-e okpála bata nde apa me a ko kukulu 'ngú-o. <sup>29</sup> La-a, kpála bhende ngau Ndili gba Ebhe-e bhú djila e padhá-a, ani asia ke 'ngú inde ane la matá mane. A mo-o adi? Padhá de, anga kpála ango-o manga ngute na gandja na mbia inde avulu ani bhú siti 'ngú-o de. Ani ngasobho

Bu Bhobua inde ngasuno bádha bhú 'bu gba Ebhe-e pi ní-o. <sup>30</sup> A na paká me ní mbila ndjindji me, a ko kpála inde apa me:

«Ma agie siti 'ngú inde u amene e ngama.

Ma ahá pi kpála ne kpála ehe inde

ati ne ani-o. †»

Ani atsia apa di me:

«Ngámá akódho 'ngú gba okpála gba e makodho.†»

<sup>31</sup> A ko siti 'ngú na kuo kuo ngú nati bhú 'kpa Ebhe na mukobho.

<sup>32</sup> Yi bhundja nga engú inde akolo nani li yi li nedhinga inde yi asia zi 'kpi gba Ebhe-e lie-o. Bha kolo pipita-a, yi azu likabhu naali. Engú bini, yi alu kpekpeke bhú naga egú ang-o. <sup>33</sup> U asobho okpála koko bhú ka yi, u atsia amene uo sisiti kala ndu okpála hana. Engú bini, okpála koko adu bedhe ngú nateteke okpála inde u adu ato mbolo lio bhomu-o. <sup>34</sup> Yi azu likabhu bhú dabili bini ne okpála inde adu bhú tikpu-o. Li u agbulu ohe gba yi-e lie, yi aziba ne djali hana me u nu nedi. Padhá de, anga yi ambila ndjindji me a ka yi ne tia inde ndjindji naali, inde ngadu duduma ne duduma.

<sup>35</sup> Kaka-a, yi adú ne tsulu de. Padhá de, anga yi asia makalá na ngbéngbé kaka. <sup>36</sup> A ayo me yi du ne kekele ngubula namene engú inde li Ebhe akunda e, di ne nasia ehe inde ani apa me ni ahá e-o. <sup>37</sup> Padhá de, anga u aye bhú Bhuku gba Ebhe-e me:

«A tigala nedhinga bedi, belegu bedi naali,

li kpála inde a ayo me ani go-o tsia gó.

Ani bhúe de.

<sup>38</sup> La-a, kpála inde ngbingbili bhú djila ma-a tsia sia mukobho na duduma kabula nabhuka.

Engú bini, i du me ani nde agie lie ne sidi-e,

bua ma ngá matá ne ani de.†»

<sup>39</sup> Nganí-e, ní bhú ká okpála bhende ngagie lio ne sidi, inde di ngangita-a ade. Engú bini, ní ne okpála bhende ngabhuka, inde di li kpadji na mukobho-o.

## 11

*Ní le nadu ne ngua nabhuka gba onguo ogbi ní-o*

<sup>1</sup> Na'o nabhuka gba o bhú Ebhe-e, a ko naziba me ní asia ehe inde ní nde nga'o 'to ní 'to e asia. A ko nadu ne nabhuka me ehe inde ní u e ne djila ní de-e uu. <sup>2</sup> Ebhe aziba nani okpála na kalanu-o ka nabhuka gba o-o.

<sup>3</sup> Ka nabhuka-a, ní ambila me Ebhe abho nani doto ne 'li e. Abhomu-o, ohe inde ní ngau e ne djila-a, abho lie li ohe inde ní u e ne djila de-o.

<sup>4</sup> Ka nabhuka-a, Abele aha makiso na babadha naali pi Ebhe, inde ane bhe gba Kaina mane. Ka nabhuka ang-o, Ebhe au ani bhú djila e ngbingbili. Padhá de, anga Ebhe ngae makpe aziba makiso gba ani-o. Ka nabhuka gba Abele-e, ani bha bini ngagama 'ngú, abana ani akpi lie-o.

<sup>5</sup> Ka nabhuka-a, Enoka kpi nani i de. Engú bini, Ebhe aha ani abhúlá. Kpála bini ti da nani nau ani de, anga Ebhe aha nani ani ngú na'o ani de e. Bhuku gba Ebhe-e apa me, kala me Ebhe ha ani abhúlá-a, ani amene nani engú inde anga li Ebhe. <sup>6</sup> La-a, i du me nabhuka nde bhú kpála ade-e, ani ti da namene engú inde anga li Ebhe-e de. Padhá de, anga kpála inde ngadyudyo lie de Ebhe-e, a ayo me ani bhuka me: Ebhe uu, ani la di ngaha makalá pi okpála inde ngagili ani-o.

† 10:30 10:30 Tsia bhú Det. 32:35. † 10:30 Tsia bhú Abk. 2:3-4.

10:30 Tsia bhú Det. 32:36. † 10:38 10:37-38

<sup>7</sup> Ka nabhuka-a, Nua adje engú inde li Ebhe apa nani e pi ani pindji ongú inde agó, inde u u nga nani e de. Ani au me Ebhe pa eu de, ani atsia abho 'ngbé zabu inde ani akobho piga gba e bhú e-o. Namene ka ani mo-o, ani a'o mangimbo pí 'ndji okpála na píla doto. Ka nabhuka gba ani-e, Ebhe atsia au ani bhú djila e me a ko kpála na ngbingbili.

<sup>8</sup> Ka nabhuka-a, Abalahama amene líli gba Ebhe li nedhinga inde ani a'i nani ani lie-o. Ani anu bhú doto inde li Ebhe apa nani lie me ni ahá e pi ani, amba akolo naani-o. Ani anié bhú doto gba e padhá me ani nde mbila de me, ni adji bhú doto bhedhoie de. <sup>9</sup> Ka nabhuka-a, ani anu adu maka gandji kpála bhú doto inde li Ebhe apa nani me ni ahá e pi ani-o. Ani adu nadu bhú 'ti ngbangbali, Isaka ne Yakobho atsia adu di nadu bhú 'ti ngbangbali. A bhomu-o okpála inde li Ebhe apa di nani pi o me ni ahá di doto ango-o pi o-o. <sup>10</sup> Padhá de, anga Abalahama adu nadjeke gudhu inde li 'dhu e alu kpekpeke. Ebhe amene lele maka li gudhu ango-o adú lie ngae, ani atsia ayiki bhadi ngae.

<sup>11</sup> Ka nabhuka-a, Abalahama asia nani angu ngubula nazu ndili bhú nedhinga ani akolo lie ne kalanga bhelé, belegu li Sala adu lie ne i zu de-o. Ani adu ne nabhuka me engú li Ebhe apa me ni améne e-e, ani améne mamene. <sup>12</sup> Kaka-a, koli ogbi ní bini Abalahama, inde adu de kuo masikpe-e, azu opiga bhelé. Ongisi inde li opiga ango-o azu o-o bhelé maka ikupala inde abhúlá. Uo bhelé di maka sike inde lingo 'ngbé 'ngu, inde li kpála ti da natanga e de.

<sup>13</sup> Ndu okpála bhomu-o hana amu bhú nabhuka me, u nde sia

oehe inde li Ebhe apa nani me ni ahá e pi uo-o de. Engú bini, u au oehe ango-o tsutsu, u atsia akpi djali. Abhomu-o, u atsia ambila ma kpulukutu me o ne ogomago, o la di ne okpála na dhuku píla doto ei. <sup>14</sup> Okpála inde ngapa ngua engú bhomu-o ngasuno mbámbá me o ngagili doto gba o makpe. <sup>15</sup> I dú me u du nakina doto inde u aze nani bhú e-e, u de agie lío bhú doto ango-o agie. <sup>16</sup> A na paká me, u adu ne gumu doto inde babadha naali. A akunda napa me doto inde abhúlá ko. Kaka-a, Ebhe ne numu ade me, u 'i ni me ni ne Ebhe gba uo-o. Padhá de, anga ani aleke gudhu bini pi uo.

<sup>17</sup> Ka nabhuka-a, Abalahama aha Isaka maka makiso, li Ebhe ale ani lie-o. Abalahama li Ebhe apa nani me ni ahá 'he pi e-e, adu bedhe ngú naha koli ndili gba e bini-e maka makiso. <sup>18</sup> Ebhe apa nani pi ani me: «Li kpadji gba Isaka-a, mo osía opiga inde ma apa nani me ma ahá o pi mu-o.†» <sup>19</sup> Engú bini, Abalahama adu abhundja me Ebhe ne angu nazuku Isaka. Kaka-a, Ebhe atsia agie ndili gba ani-e pi ani maka kpála inde u azuku e me ani nde akpi.

<sup>20</sup> Ka nabhuka-a, Isaka atuko bisagu pi ongisi gba e bhisi-o, Yakobho ne Esau, natsia lele ongú inde abháka uo sisi-o.

<sup>21</sup> Ka nabhuka-a, Yakobho atuko bisagu pi ongisi bhisi gba Djodjefu-o, kala me ani kpi. Ani ateke lie li duku gba e, ani atsia adhögö Ebhe.

<sup>22</sup> Ka nabhuka-a, Djodjefu apa li ani akolo lie masikpe de nakpi ka e me, omafsalaele azé bhú Edjipeto maze. Ani atsia asuno engú inde a ayo me u mene e ne biki ni-o.

<sup>23</sup> Ka nabhuka-a, li u azu Moidje lie, okpála inde azu ani-e awo ndje

ani ngubula epe bata. U au nani me ani babadha naali, u tsia dje tsulu ka líli gba 'ngbé ngámá-a de.

<sup>24</sup> Ka nabhuka-a, li Moidje abhele lie-e, ani ayala me okpála 'i ní me ndílí gba ndílí na elè gba Falao. <sup>25</sup> Aní aziba nazú likabhu bhú dabilí bini ne piga gba Ebhe-o. Aní atsia ayala nakpi djali inde ngubula nedhinga bedi-e bhú siti 'ngú. <sup>26</sup> Padhá de, anga ani adu abhundja me li kpála zu likabhu kabula Masiya-a , bhobhomu-o pí ani ne tia na ngbéngbé ane bhende na Edjipeto mane. Kaka-a, ani a'o nani djila e li makalá inde ani asia e bhú oekpí inde ngago-o.

<sup>27</sup> Ka nabhuka-a, Moidje ayie nani bhú Edjipeto me ani nde kpe ke 'ngú gba 'ngbé ngámá-a de. Aní atsia alu kpekpeke mugito me ani ngau Ebhe inde u uu e de-o. <sup>28</sup> Ka nabhuka-a, Moidje aha nani líli me u leke anokomia na Pasika . Aní atsia aha líli me u pulu ngute li obhè bhoti, amba andjelu na kuo abhili ongisi na kalanu gba omafalaale de.

<sup>29</sup> Ka nabhuka-a, omafalaale agulu nani 'ngbé 'ngu na Mbembe-e mugito me u ngadholo pí doto inde a'ulu má kekele! Engú bini, li omaEdjipeto ale di lie me ogulu 'ngu-o maka uo-o, engu-o atsia abuka uo. <sup>30</sup> Ka nabhuka gba omafalaale, aga inde asa nani gudhu na Djeliko-o agumu pita nadi ngongo ngubula 'kpí mananika. <sup>31</sup> Ka nabhuka-a, Lahaba, elè na zabhe-e akobho nani. Aní kpi bhú dabilí bini ne okpála inde adu agu Ebhe-e de. Padhá de, anga ani asia nani omafalaale, inde u atima nani o ngú natsia lele gudhu-o ne guo 'ngú .

<sup>32</sup> Ma ti da napa matá pí? Nedhinga ka ma ade ngú nakpokpo 'ngú gba Djedeo, gba Balaka, gba Samisona, gba

Djefete, gba Davidi, gba Samuele, di ne bhe gba opolofeta-o . <sup>33</sup> Ka nabhuka-a, u agboko ongbengbe ongámási na okuti bhelé bhú 'gú. U amene ongú inde adu ngbingbili, u asia 'he inde li Ebhe apa nani me ni ahá e pí uo-o, u atsia agbite 'bhè okingbi. <sup>34</sup> U abulu odjua inde adu nade má ka ka ka! U akobho bhú nakpi sakpa mbotia. U adu bhuhuku, la-a, u atsia akolo kpekpeke. U adu kpekpeke bhú egú, u atsia aha angu osudha na gandji gandji. <sup>35</sup> Ka nabhuka-a, olisi au matá okpála gba o inde amu-o. Padhá de, anga okpála ango-o azuku.

U ato mbolo li okoko nakolo masikpe de nakpi. U ayala me u gbegbe o sakpa okpála adu ato mbolo li o-o. U amene mo-o ngubula me o zuku ngú nasia mukobho na ndjindji naali. <sup>36</sup> U amu okoko, u atsia abhi di uo ne fimbo. U agbigbite okoko ne gbindjili, u atsia amba di uo bhú tikpu. <sup>37</sup> U abhili okoko ne teme. U akokodho bhusu okoko bhisi ne sii. U atsia abhili okoko ne mbotia. Okoko adu anu ne ndu bili hana me u nde ato ko kandele, i du di-e ko meme. U adu obhulu ndibhili. U adu nato mbolo li uo, u atsia adu namene uo kpekpeke. <sup>38</sup> U ti nani da nadu pala doto inde-e de. U adu nadjakadha abhu 'gu, di ne apí oeta. U adu nadu bhú oedú di ne bhú ogudho teme.

<sup>39</sup> Ebhe aziba nani ndu okpála bhomu-o hana ka nabhuka gba o-o. La-a, u sia ehe inde li Ebhe apa nani me ni ahá e pí u-o de. <sup>40</sup> Padhá de, anga Ebhe aleke nani ehe na babadha naali pí ní. Aní kanda nani de me u kolo ndjindji hana mandi ní-e de.

## 12

*Yi lu kpekpeke bhú olikabhu inde yi ngazu e-o*

<sup>1</sup> Pi ní-e, ndu ndindi okpála bhomu-o hana inde abhuka nani Ebhe-e, asa dengo ní ngbalina u ngau 'ngú inde ní ngamene e ne djila o. Kaka-a, ní gbe liní li ongu bhende ngagbigbite ní me ní adhuku ndjindji de-e magbe. A ane la mane pi siti 'ngú bhende ní ngali bhú e má gala gala-o! Holo inde li Ebhe apa me ní gu e-e, ní gu akólo makolo ali soso. <sup>2</sup> Ní banga djila ní li Yesu inde li nabhuka gba ní-e ala pí e, nayie li lilita akólo makolo ali soso-o. Ani aziba nakpi li kulusi. Nakpi li kulusi-e, a ko nakpi na numu. Engú bini, ani dje numu tété de. Padhá de, anga ani adu nau djali inde ani asia e-o. Mbia inde-e, ani adu li pá 'kpa na kokpa dengo kiti na ngámá gba Ebhe-o.

<sup>3</sup> Yi bhundja nga Yesu maka ani akibila yala inde li okpála namene siti 'ngú-o adu nayala ani ne e-o. Kaka-a, yi a'ó de me ndala ha angu yi-e de. <sup>4</sup> Padhá de, anga bhú gbele inde yi ngagu e ne siti 'ngú-o, yi gu nga nakolo bhú nakpi ka yi-e de. <sup>5</sup> To yi a'ili li lili inde li Ebhe aha e pi yi maka ongisi gba e-e a'ili? Lili ango-o me:

«Ndia ma, i du me Ngámá nde ngali mu-o,  
mo oboyo de.

I du me ani nde ngambembe bhú 'ndji mu-o,

bua mu abí la di ndala de.

<sup>6</sup> Padhá de, anga Ngámá ngali kpála inde ani akunda e-o.

Ani ngabhi kpála inde ani ambila me a ko ndili gba ni-o.†»

<sup>7</sup> Kaka-a, yi kibila okpekpeke da 'ngú inde li Ebhe ngali yi ne e-o. Ani ngamene yi maka ongisi gba e. A ko ndili bhedho li 'dyi e lili e de-e? <sup>8</sup> I du me Ebhe nde li yi maka ndu ongisi koko gba e hana de-e, a akunda napa me yi

ne kukulu ongisi gba ani-e ade. Yi ne ongisi inde u mbila 'dyi o de. <sup>9</sup> A li ní pála doto inde-e ne odyidiyi. U adu nani nali ní. Ní atsia adu di namanga uo. A ane la matá mane me ní manga 'Dyi ní inde abhúlá, ngubula me ní sia mukobho. <sup>10</sup> Odyi ní adu nali ní ngubula nedhinga bedi, maka u adu abhubhundja lie-o. Engú bini, Ebhe ngali ní ngubula bádha 'ngú gba ní-o. Ani akunda me ní du bubu maka ni. <sup>11</sup> Nedhinga u ngali ní lie mbia inde-e, a ngau lie maka u de ngaha pi ní likabhu, a ha djali pi ní de. La-a, pipita-a, okpála inde akodho 'kpi li ngua kpadji bhomu-o ngasia nguwa na guo 'ngú inde akpotsé lie ne mukobho na ngbingbili-o.

<sup>12</sup> Kaka-a, yi 'e 'kpa yi inde andala-a ne bhúlá. Yi mene la di me 'dhu yi inde andala-a, a kolo kpekpeke! <sup>13</sup> Yi dhuku li okpadji inde ngbingbili, amba 'dhu kpála bhende ndjindji ade-e agumu de. Ani kobho mangbo makobho.†

*Yi du nagbo 'dje yi ndu 'kpi hana li Ebhe*

<sup>14</sup> Yi gili nadu ne guo 'ngú ne ndu okpála hana. Yi du la di bubu. Padhá de, anga li kpála du bubu de-e, ani ú Ngámá de.

<sup>15</sup> Yi lila liyi me kpála bini ayie sa bádha bhú 'bu gba Ebhe-e de. Kpála bini akólo la di bhú ká yi maka ndula inde susu-o de. Ndula ango-o aké lie, a asiti mukobho gba okpála bhelé ne songo inde bhúbhú-o. <sup>16</sup> Kpála bini bhú ká yi adu nakunda olisi, i du di-e obhosi ngangá de. Kpála bini bhú ká yi aú oehe gba Ebhe-e bhú djila e padhá de, maka Esau. Ani atsindji nani nadu ka e ndili na kalanu ngubula koli sani 'zu bini. <sup>17</sup> Yi ambila ndjindji me sidi-e, ani adu ne gumu me 'dyi ni tuko bisagu pí

† 12:6 12:5-6 Tsia bhú Gbt. 3:11-12. † 12:13

12:13 Tsia bhú Isa. 35:3; di ne bhú Gbt. 4:26.



ni. Engú bini, 'dyi ani abebe ani. Padhá de, anga abana nani ani ale nadjí engú inde ani amene e lie ne naku 'gbá-a, ani sia kpadjí de.

*Nau inde i ti da nadyiki de*

<sup>18</sup> Yi kolo nga dengo eta bini de inde u ti da nabu 'kpa lie maka eta na Sinai, inde adu nani ne dingidhi djua-o. A adu ne biti, di ne anvi na kpekpeke naali. <sup>19</sup> Eta ang-o adu di ne tolo toti, di ne tolo nagama 'ngú. Li omafsalaele adje eli bhomu-o lie, u ayo me Ebhe agáma matá engú koko pí bhobhomu-o de. <sup>20</sup> U ti nani da nakibila líli inde-e de. Líli ang-o me: «Kpála inde abú 'kpa e li kute eta-a, abana i du di-e enu-o, u abhéle ani ne teme.†» <sup>21</sup> Engú inde u adu nau e adu na tsulu tsulu. Belegu Moidje atsia apa kaka me: «Ma ngadje tsulu naali, ma la di ngaguku maguku.†»

<sup>22</sup> Engú bini, yi akolo dengo eta na Siona, dengo gadhu gba Ebhe na mukobho-o. A ko Yelusalema na abhúla bhú dabili bini ne oandjelu gba e inde ketè ne ketè apo bhúla o bhú anokomia-o. <sup>23</sup> Yi akolo dengo ongisi na gigina inde apo bhúla o, inde u aye 'li o abhúla-o. Yi akolo dengo Ebhe, kpála nakodho 'ngú gba ndu okpála hana-o. Yi akolo dengo okpála inde ngingbili, li Ebhe amene me u kolo ndjindji hana kala ni-o. <sup>24</sup> Yi akolo dengo Yesu, kpála inde ne ludu sunda ní ne Ebhe bhú gandja na mbia inde li Ebhe akodho e ne ní-o. Yi akolo dengo ngute ani inde atuko, inde ngaha bádha 'ngú pí ní inde ane bhe gba Abele mane-o.

<sup>25</sup> Yi lila liyi! Yi ayála nadjé kpála inde ngagama 'ngú pí yi-e de. Padhá de, anga okpála inde ayala nani nadjé kpála inde adu naha líli pí o píla doto-o, neke

nasia ke 'ngú de. A adu bhadi pí ní moko. A ne la matá mane, i du me ní nde ayala nadjé kpála inde ngagama 'ngú pí ní nayie abhúla-o. <sup>26</sup> 'Li ani adyiki nani doto. Engú bini, mbia inde-e, ani apa pí ní me: «Ma adyiki matá doto bhutsibhutsi bini. A dú bha bini doto de, ma adyiki di ne abhúla hana.†» <sup>27</sup> Eli inde me «matá bhutsibhutsi bini», akunda napa me oehe inde u abho e mabho-o adyiki, i tsia ngíta, amba ehe bhende i ti da nadyiki de-e tígala bha ngae.

<sup>28</sup> Ní ngasia nau inde i ti da nadyiki de. Kaka-a, a ayo me ní gie heni pí Ebhe. Ní mene la di pí ani kulu inde anga li ani ne tsulu hana di ne namanga ani. <sup>29</sup> Padhá de, anga Ebhe gba ní-e, a ko djua inde ngade made.†

## 13

*Yi mene engú inde nganga li Ebhe*

<sup>1</sup> Mukunda inde sunda yi-e nu bha ne kalanu maka ondaise . <sup>2</sup> 'To yi a'li nasia ogo-mago de. Padhá de, anga bhú namene mo-o, okpála koko asia nani oandjelu me u nde mbila de. <sup>3</sup> Yi bhundja okpála bhende bhú tikpu-o mugito me, yi ne uo bhú tikpu bhú dabili bini. Yi bhundja okpála bhende u ngato mbolo lio-o, mugito me u ngato mbolo ang-o li yi.

<sup>4</sup> A ayo me ndu okpála hana manga kuva mamanga. A ayo me bhoko lila kute e pí wala e, amba elè lila di kute e pí 'ko e. Padhá de, anga Ebhe akódho 'ngú gba okpála inde ngakunda olisi, i du di-e obhosi ngangá-a makodho. Ani akódho di engú gba okpála inde ngakunda olisi di ne obhosi ngangá, a la di-e

† 12:20 12:20 Tsia bhú Eki. 19:12, 13. † 12:21 12:21 Tsia bhú Det. 9:19. † 12:26 12:26 Tsia bhú Adj. 2:6. † 12:29 12:29 Tsia bhú Det. 4:24.

okpála inde ngakúnda olisi, i du di-e obhosi koko.

<sup>5</sup> Gámu tia ahá angu yi bhú makobho gba yi-e de. Yi kpi djali li ehe bhende ka yi-o. Padhá de, anga Ebhe apa me:

«Ma 'ó ka mu de,  
ma bála 'kpa li mu  
belegu de bini.†»

<sup>6</sup> Kaka-a, ní ti da napa ne nabhuka hana me:

«Ngámá ne kpála inde ngateteke ma,  
ma djé tsulu li 'ngú bini de.  
Okpála ti da namene ngú ma mangua 'ngú dho?†»

<sup>7</sup> Yi bhundja nga okpála inde adu nani pí 'ndji yi kalanu-o, inde akpokpo eli gba Ebhe-e pi yi-o. Yi bhundja nga lele maka u akpata nani Ebhe lie, di ne maka u amu lie-o. Yi bhuka maka u abhuka nani lie ko. <sup>8</sup> Yesu Kilisito yiyipa de, lili, naki, duduma ne duduma. <sup>9</sup> Yi a'ó de me nasuno na gandji gandji 'e yi li kpadji-e de. A ndjindji me bua ní sia angu ka bádha bhú 'bu gba Ebhe , a alú pí olíli inde atsia ezu-o de. Padhá de, anga okpála bhende ngamene ngua olíli bhomu-o sía bádha 'ngú tété belegu de bini.

<sup>10</sup> Odimandø gba Ebhe inde ngamene kulu bhú 'ti ngbangbali-e ti nani da nazu enu inde u atsutsulu e pí misa gba ní natsulu enu-o \* de. <sup>11</sup> 'Ngbé dimandø gba Ebhe nganu ne ngute onu li bili na bubu naali, ngubula nahaha maka makiso ngú na'e siti 'ngú. Engú bini, u tsutsulu kuo onu ang-o li ngongo, a adudu bhú ká okpála de. <sup>12</sup> Kaka-a, Yesu akpi di lingo gudhu na Yelusalema ngubula na'e siti 'ngú gba okpála ne ngute e makpe. <sup>13</sup> A ayo me ní nu kò liní ne ani ali ngongo, ní kibila ngua pádha inde u apadha

ani ne e-o. <sup>14</sup> Padhá de, anga pála doto ei-e, gudhu inde ní ngadu bhú e duduma ne duduma ade. Engú bini, ní mangbo ngagili gudhu inde adú galikpe ko. <sup>15</sup> La li kpadji gba Yesu-o, ní dhøgø Ebhe ndu nedhinga hana maka makiso, a akunda napa me, ní dhøgø 'li ani ne 'bhø ní. <sup>16</sup> 'To yi a'íli li namene bádha 'ngú, di ne nateteke liyi sunda yi de. Padhá de, anga ngua makiso bhomu-o ngangá li Ebhe ngae.

<sup>17</sup> Yi manga okpála inde pí 'ndji yi-e mamanga. Yi mene la di líli gba uo-o. Padhá de, anga u ngatsia 'kpí li yi ndu nedhinga hana ne nambila ndjindji me ekpí bini, o kpókpo kú kulu inde o amene e kala Ebhe. Yi 'o me u mene kulu gba o-o ne djali hana. U améne ne nalopolo lío de, anga u mene ne nalopolo lío-o, bhobhomu-o téteke yi de.

<sup>18</sup> Yi yo Ebhe pí ya. Ya ambila me bua nakpokpo kú 'ngú gba ya-a ndjindji. Padhá de, anga ya ngagili ndu 'kpí hana namene engú inde li lelele. <sup>19</sup> Ma ngayo ka yi ne kekele me yi yo Ebhe ngú ma, amba ani bhulu kpadji me ma gie líma de yi má gala!

<sup>20</sup> Ebhe inde li guo 'ngú ngayie ka e,  
azuku Ngámá gba ní Yesu bhú ká okpála inde amu-o.

Ani akolo 'ngbé málila gba okandø ne ngute e  
i nde ani aha e maka makiso.  
Ani amene me gandja na duduma-a lu pí ngute ang-o.

<sup>21</sup> A ayo me Ebhe ang-o mene me yi kolo ne angu ngú namene 'ngú inde ndjindji ngubula namene mukúnda gba ani-o.

† 13:5 13:5 Tsia bhú Det. 31:6, 8. † 13:6 13:6 Tsia bhú Ets. 118:6. \* 13:10 13:10 Enu inde u atsulu e pí misa si-e, a ko makiso inde u apa 'ngú e bhú olukuluku 15-16.

A ayo me Ebhe 'o bhú ní engú inde  
 ndjindji kala e  
 li pápá gba Yesu Kilisito.  
 A ayo me u dhөгө ani duduа ne  
 duduа.  
 A adu moko!

*Engú na soso*

<sup>22</sup> Ondaise ma, ma ngayo ka yi  
 me yi dje eli inde ma ngato masi  
 bhú yi ne e bhomu-o ne 'ndjá bua.  
 La di-e, balua ma aye e pi yi inde-e  
 ndjándjá ade. <sup>23</sup> Ma akunda napa  
 pi yi me u atse 'kpa li ndai ní  
 Timoté atse. I du me ani nde akolo  
 má gala-a, ya anú natsia yi bhú  
 dabili bini ne ani.

<sup>24</sup> Yi yi ndu okpála hana inde  
 pí 'ndji yi-e mayi. Yi yi la di  
 ndu okpála gba Ebhe-e hana mayi.  
 Ondaise ní na Itali yi yi mayi. <sup>25</sup> A  
 ayo me bádha bhú 'bu gba Ebhe-e  
 du bhú dabili bini ne ndu yi hana.

## Balua gba Djaki Eli na kalanu

Balua gba Djaki-e, apo bhúla ongu inde a ayo me u mene e. Aní aye pi ndu okpála gba Ebhe inde atsambala pila doto libhomu. Djaki agama 'ngú ne bádha 'li pindji ongu inde atsia imbilangu, engú inde a ayo me u mene e bhú dasundu gba omakilisito.

Balua ango-o ngalu kpekpeke pindji bádha 'ngú inde bhú okulu di ne nabhuka, ne pindji namene 'ngú na Ebhe maka makilisito.

### **Ongbenge ongu inde bhú bhuku inde-e ngae inde:**

Eli na kalanu 1:1

Nabhuka, a la di-e imbilangu 1:2-8

Nadu bhú ndibhili ne nadu ne tia bhelé 1:9-11

Nali bhú nale 1:12-18

Nadje 'kpí, a la di-e okulu 1:19-27

Nagbele 'dje kpála pindji nag-bogbo bhusu o 2:1-13

Nabhuka, a la di-e okulu 2:14-26

Makilisito ne 'mi e 3:1-18

Makilisito, a la di-e ongu na doto 4:1 - 5:6

Olíli ngangá 5:7-20

*Djaki yi okpála gba Ebhe-e mayi*

<sup>1</sup> Ngama, Djaki, bali gba Ebhe, bali di gba Ngámá Yesu Kilisito-o, ma yi ndu okpála gba Ebhe hana inde atsambala pila doto libhomu-o mayi.

*Yi du ne kpéke bua bhú okpekpeke da 'ngú*

<sup>2</sup> Ondaise ma, li okpekpeke da 'ngú du abhaka yi ne li okpadji ngangá-a, yi de du bhúbhú ne djali naali. <sup>3</sup> Padhá de, anga yi mbila ndjindji me, i du me nabhuka gba yi-e nde alu kpekpeke

bhú okpekpeke da 'ngú-o, nabhuka ango-o tsia há pi yi kpéke bua. <sup>4</sup> Kaka-a, yi lila liyi uu! Padhá de, anga a ayo me kpéke bua gba yi-e kolo bha bini ali soso, ngubula me yi bhele li bua yi, amba yi a'ó ká suka bádha 'ngú bini de.

<sup>5</sup> I du la me kpála bini bhú ká yi nde aneke imbilangu-o, a ayo me aní yo ka Ebhe, amba Ebhe ha pi aní. Padhá de, anga Ebhe ngahaha pi ndu okpála hana ne bádha bua, la di ne bua na keke de. <sup>6</sup> Engú bini, a ayo me aní yo ne nabhuka. Aní adú ne bua na bhisi bhisi de. Padhá de, anga kpála inde ne bua na bhisi bhisi-e, aní maka ngbo 'ngu inde li anvi ngatamba e pí djila 'ngbé 'ngu.

<sup>7</sup> Kpála ango-o a'ó 'to e de me ni asia 'he ka Ebhe Ngámá-a de, <sup>8</sup> anga aní ne bua na bhisi bhisi. Aní mbila la di de me bhú ká ondu 'ngú gba ni-e hana-a, ni améne pi-ie de.

*Engú inde akólo li obhulu ndibhili ne obhulu tia*

<sup>9</sup> A ayo me mabhuka inde bhú ndibhili-e kpi djali. Padhá de, anga Ebhe nga'e'e aní abhúla.

<sup>10</sup> La di-e, mabhuka inde ne bhulu tia-a, a ayo me aní kpi djali, anga Ebhe ngaké aní ne kuto. Padhá de, anga aní akódho 'kpí maka felele na ulu inde abhú bili.

<sup>11</sup> Ela ngakoto ne kpéke djua gba e, i tsúlu ulu, li ulu-o 'úlu. Li ulu a'ulu lie, li felele felele tí kuto. Abhomu-o, li bádha gba ulu ango-o tsia kólo padhá. A bhadi moko pi bhulu tia.

Padhá de, anga kpála ango-o akólo padhá bhú ká ondu 'he gba e hana inde aní ngamene e-o.

*Ebhe ti da nato kpála bhú nale de*

<sup>12</sup> A ko djali pi kpála inde ne kpéke bua bhú okpekpeke da 'ngú. Padhá de, anga pita aní ane okpekpeke da 'ngú lie, aní

tsia sía makalá inde li Ebhe apa nani me ni ahá e pi okpála bhende akúnda ni ko. Makalá ang-o, a ko mukobho na duduma. <sup>13</sup> Li nale\* bhaka kpála-a, ani apá de me: «Ebhe ngato ma bhú nale-e ngae» de. Padhá de, anga mabhundja nale kpála bhú Ebhe ade. La di-e, Ebhe ngae makpe-e, ti da nale kpála bini de. <sup>14</sup> Kpála ngali bhú nale ka gumu na sisiti inde li bua e-o. Gumu na sisiti ang-o gbéle ani, i tsia tó ani bhú nale. <sup>15</sup> Pipita-a, gumu na sisiti-e bí 'bhi, i zú siti 'ngú. Siti 'ngú ang-o bhele-e, i tsia zú nakpi.

<sup>16</sup> Ondaise ma na mukúnda, yi apíte liyi de. <sup>17</sup> Ndu 'ngú na babadha hana, la di ne ndu tia inde ane ne bádha hana ngayie ka Ebhe, inde abho ndu 'he na zizi inde abhúlá-a† hana ngae-o. La pi ani-e, zi ani djidji lie de, ani yie la di bhú da e 'kpí bini de. <sup>18</sup> Ebhe akúnda nani ngae makpe naha mukobho pi ní li kpadji na eli gba e na kakulu-o. A ko ngubula napa me ní du ogina nguwa bhú ká ondu 'he hana inde ani abho e-o.

*Nadje eli gba Ebhe, di ne namene maka li eli ang-o apa lie-o*

<sup>19</sup> Ondaise ma na mukúnda, yi mbila engú inde-e ndjindji: kpála ne kpála du adje 'ngú má gala! La-a, ani adu agama 'ngú má gala gala de! Ani adú di ake 'ngú lie má gala gala de! <sup>20</sup> Padhá de, anga ke 'ngú gba kpála-a, ngagbe ngbili 'ngú kala Ebhe ade. <sup>21</sup> Kaka-a, yi yala ndu 'ngú bhende na sisiti-e hana. Yi yala di ndu kulu na sisiti-e hana. Yi sia eli inde li Ebhe ngalu e li bua yi-e ne nako liyi ne kuto. Padhá de, anga eli ang-o ne angu ngú nakobho yi.

<sup>22</sup> Yi mene engú inde li 'li Ebhe ngapa me yi mene e ko. Yi adú bha nadjedje madje de. I du mo-o de-e, amba yi ngapite bhomu-o liyi ngayi makpe. <sup>23</sup> Padhá de, anga kpála bhende ngadje eli, ani tsia mene maka li eli ang-o ngapapa lie de-e, ani maka kpála bhende ngatsia bhúla e bhú bitolobi. Ani ú maka ani nde lie-o. <sup>24</sup> Pita ani atsia bhúla e lie, ani há lie, ani tsia tápa. La-a, bha kolo má gala, ani mbíla matá de me bhúla ni de igini pie de. <sup>25</sup> Engú bini, kpála koko ngazi 'ndji e bhú líli inde babadha na kuo kuo inde ngagbegbe kpála bhú bali-e ndjindji. Ani la di ngadhedhe tété. Ani ngadje eli-e lie, ani 'li 'to e tété de. Bhú namene maka li eli-e ngapapa lie, kpála bhomu-o adú ne djali.

<sup>26</sup> I du me kpála nde ngabhundja me ni ngamene engú na Ebhe, engú bini, ani mbila nalila 'mi e de-e, kpála ang-o ngapite lie ngae makpe. Engú na Ebhe inde li kpála ang-o ngamene e, a padhá. <sup>27</sup> Engú na Ebhe inde kakulu-o, inde la di babadha bhú djila 'Dyi ní Ebhe-e, a ngae inde: a ko nanu nateteke otsulosi di ne ookosi bhú likabhu gba o-o, a la di-e nalila lie, amba engú na doto inde-e asiti ni de.

## 2

*Yi aú okpála koko ngbéngbé ane okoko de*

<sup>1</sup> Ondaise ma, yi abhuka Ngámá gba ní Yesu Kilisito, inde abedhe ne sangu bedhe-o. Kaka-a, yi aú okpála koko ngbéngbé ane okoko de. <sup>2</sup> Ní pa nga me: bhulu tia bini inde adyi kati na olo, di ne obabadha bongo na kuo kuo, ali li bili inde yi apekobho bhúla yi lie-o. Pipita-a, li bhulu ndibhili

\* 1:13 1:13 Bhú eli na giliki-e, kpéke da 'ngú ne nale-e, a ko bha koli 'he bini. † 1:17 1:17 Ndu 'he na zizi inde abhúlá: A akúnda napa me ela, epe ne oikupala.

inde adyi naae okakadha bongo lí di oo. <sup>3</sup> Yi tsia ú bhulú tia inde adyi obabadha bongo na kuo kuo ngbéngbé ane mane. Kaka-a, yi tsia pá pi ani me: «Ngamu-o, dú si, li bádha bili inde!» Yi tsia pá la naae pi bhulú ndibhili-e me: «Ngamu-o, lu malú», ne me: «Dú kuto bhú doto bhú li 'dhu ma sil» <sup>4</sup> † dú me yi nde amene mo-o, amba yi ngau okpála koko ngbéngbé ane okoko mane. Yi la di ngakodho 'ngú ne mabhundja na sisiti.

<sup>5</sup> Ondaise ma na mukunda, yi djedje nga: Ebhe alo okpála bhende naao ne obhulú ndibhili bhú djila okpála na doto-o. Ani akunda me u dú ne nabhuka naali, ngubula me u li bhú Nau gba ni inde ni apa me ni ahá e pi okpála bhende ngakunda ni ko. <sup>6</sup> Engú bini, yi ngau obhulú ndibhili-e bhú djila yi padhá! La-a, a ngato mbolo li yi-e da? A la di ngagbe yi bhú ngbanga da? A ko obhulú tia di? <sup>7</sup> A ko matá bhadi uo di inde ngasobho 'ili na babadha inde li Ebhe aha e pi yi-e?

<sup>8</sup> Bhuku gba Ebhe-e apa me: «Kunda kilí m̄ maka mo okunda lim̄ lie ngam̄ makpe ko.†» A bhom̄-o líli inde bhú Nau gba Ebhe ko. † dú me yi nde ngalila líli angoo, amba yi ngamene bhom̄-o ndjindji. <sup>9</sup> Engú bini, i dú me yi nde ngau okpála koko ngbéngbé ane okoko mane-e, amba yi ngamene siti 'ngú. La di-e, líli-e agbite yi, anga yi ngam̄ bhom̄-o líli. <sup>10</sup> Padhá de, anga i dú me kpála bini nde agum̄ té líli-e, ani nde la ngamene dudu-o hana ndjindji-e, amba ani agum̄ bhom̄-o líli-e libhomu. <sup>11</sup> Padhá de, anga Ebhe inde apa me: «Mo okúnda bhoko, i dú di-e ēle gba kpála koko de», ani apa di ngae

me: «Mo obh̄le kpála de.» Kaka-a, i dú me m̄ nde kunda bhoko, i dú di-e ēle gba kpála koko de-e, engú la bini, m̄ bh̄le kpála-a, amba mo ogum̄ líli-e agum̄.†

<sup>12</sup> Ka 'ngú bhom̄-o, yi gama 'ngú, yi mene di 'he me yi nde ngambila ndjindji me líli akódho 'ngú gba yi-e makodho, líli angoo, a ko bhende ngagbegbe kpála bhú bali-o. <sup>13</sup> Padhá de, anga bhú nedhinga nakodho 'ngú-o, pi kpála bhende i dje nani ndjinga okpála koko de-e, Ebhe djé di ndjinga ani de. Engú bini, kpála bhende ngadje ndjinga okpála koko-o, ekpí nakodho 'ngú gba okpála-a 'ó tsulú li ani de.

*Nabhuka inde ne kulu ade-e, a kuku*

<sup>14</sup> Ondaise ma, kpála bini ti da napa me ni ne nabhuka. Engú bini, i dú la me ani nde suno kulu kulu-o de-e, nabhuka angoo tí da nakobho ani uu? <sup>15</sup> Ní pa nga me: ndai yi bini na bhobhoko, i dú di-e bhe na ēle, u ne bongo ade, u di ne ezú ngú ekpí bini ade. <sup>16</sup> Lí kpála bini bhú ká yi pa pi uo me: «Yi n̄ ne guo 'ngú ! Yi n̄ dyi bongo, amba yi zú 'he, yi 'u'u ma'u'u!» Oeli bhom̄-o améne pi uo mangua bádha 'ngú dho, i dú me yi nde ha ehe inde u nde bhú ndibhili e pi uo de-e? <sup>17</sup> A si maka nabhuka. † dú me m̄ nde abhuka-a, engú bini, m̄ suno kulu kulu-o de-e, amba nabhuka gba m̄-o kuku.

<sup>18</sup> Engú bini, kpála ti da napa me: «Okpála koko aha lío pi nabhuka, okoko aha lío pi kulu.» Lí kpála pa mo-o, ma gie pi ani me: «Suno m̄ma, lele pi m̄ ti da nadu lie ne nabhuka me m̄ nde mene kulu kulu-o de-e! Ngama la di-e, ma asúno nabhuka gba ma-a pi m̄ bhú namene kulu angoo.»

† 2:8 2:8 Tsia bhú Lev. 19:18. † 2:11 2:11 Tsia bhú Eki. 20:13, 14; di ne bhú Det. 5:17, 18.

<sup>19</sup> Ngayi-e, yi ngabhuka me koli Ebhe bha bini. A ndjindji naali. Osisiti bua ngabhuka bhadi moko. La di-e, u ngaguká ne tsulá.

<sup>20</sup> Yi ne ongingi! Yi akúnda me u suno pí yi me nabhuka inde li kulu kulu nde lie ade-e padhá-a?

<sup>21</sup> Lele pí li ogbi ní Abalahama akolo nani lie ngbingbili bhú djila Ebhe-e? A ko nani li pápá na okulu gba ani-e di? Li nedhinga inde ani aha ndili gba e Isaka lie, ani atsia a'o ani li bili natsulu enu pí Ebhe-e?

<sup>22</sup> Yi ngau me nabhuka, di ne okulu gba ani-e, adu nani adholo bhú dabili bini. Ka okulu gba ani-e, Ebhe atsia au me nabhuka gba ani-e abhele.

<sup>23</sup> Abhomu-o, eli inde li Bhuku gba Ebhe-e apa e-e, atsia amene lie. A ko eli inde apa me: «Abalahama abhuka Ebhe. Kaka-a, Ebhe atsia au ani me, a ko ngbili kpála .†» Ebhe atsia a'i la di ani me olia ni. <sup>24</sup> Yi ngau me Ebhe ngaziba me kpála inde-e ngbingbili li pápá na okulu gba e-o. A ko bha bini ka nabhuka kpi e kpi de.

<sup>25</sup> A bhadi si maka Lahaba, eḷe inde adu akúnda obhosi ngangá-o. Ebhe aziba nani me a ko kpála na ngbingbili ka okulu gba ani-o. Padhá de, anga ani asia nani okpála inde li omaṣsalaele atima nani o agba e. Ani atsia amene la di me u gie lio li kpadji koko.

<sup>26</sup> A moko. Maka li ewo du lie bhú kute de-e, amba kute bhomu-o kuku, a bhadi moko, li nabhuka du ne kulu bhú e de-e, amba nabhuka ango-o kuku.

### 3

#### *Ní lila 'mi ní malila*

<sup>1</sup> Ondaise ma, bhelé na okpála bhú ká yi agili nadu omusuno de. Padhá de, anga a ayo me yi mbila ndjindji me Ebhe akódho 'ngú gba ní omusuno-o kpekpeke naali ané

okpála koko mane. <sup>2</sup> Ndu ní hana ní ngati bhú ongú bhelé. I du me kpála nde ti bhú engú inde ani ngagama e de-e, amba kpála ango-o abhele. Ani ti da nadu ne angu pí 'ndji kute e libhomu. <sup>3</sup> I du me ní nde ato mboye kalase bhú 'bhé opunda ngubula me ní to bhúla uo li pápá inde ní ngakúnda e, ní ti da namene di ne kute uo libhomu maka ní akúnda lie.

<sup>4</sup> Yi tsia nga ongbengbe zabu. A ngbengbengbe. Anvi na kpekpeke ngatutumba nae. La-a, mboye 'he masudha inde ngalili bhúla 'ngbé zabu-o ngadjidji nae. Li zabu-o tsia nú li pápá inde li kpála nadjedjele ngakúnda e ko. <sup>5</sup> A bhadi moko pí emi. A ko mboye ehe masudha bhú kute. Engú bini, a ngabhi 'kpa e pí 'ka e li ongú na ngbengbengbe.

Yi tsia nga me ne mboye dhegu djua masudha, u ti da natsulu 'ngbé gbendé na ngbéngbé! <sup>6</sup> Emi bhadi maka djua, a ko dabili gba siti-o. A ko saka yá ní, a la di ngasiti kute ní libhomu. Djua na likabhu na duduma pí 'mi ní. 'Mi ní la di ngatsulu mukobho gba ní e libhomu ne djua ango-o. <sup>7</sup> Kpála-kuti ne angu ngú na'o mboli li ndu djua oenu na bili hana, abana oedhu, onu inde ngagbele lio ne 'bu o, abana osungu. Ani a'o la bhadi mboli li uo a'o. <sup>8</sup> Engú bini, kpála-kuti ne angu ade ngú na'o mboli li 'mi e. Emi ne ehe na sisiti. A tili naali. A abedhe la di ne sili na bhele kpála bhú e bedhe!

<sup>9</sup> Bha ne emi bini bhomu-o, ní ngadhögé Ngámá inde 'Dyi ní-o. La bhadi ne emi bini bhomu-o, ní sosobho okpála inde li Ebhe abho o maka e makpe ko. <sup>10</sup> Oeli na dhögé di ne oeli natu pedjé-o, a ngaze bha bhú koli ebhe bini. Ondaise ma, a ayo moko de. <sup>11</sup> Koli kpongu bini ti da nagbe engu na

abadha, di ne engu na s̄s̄u de.  
 12 Ondaise ma, ndula na figi ti da nali lí ndula na olive uu? Ne me 'lá ndula na vino ti da nali lí ndula na figi uu? Kpongu na 'ngu ngatu ti da nagbe engu na abadha de.

*Imbilangu inde ayie abhúlá*

13 Kpála bhende na imbilangu, inde di akè mboli 'ngú bhú ká yi uu? A ayo me aní suno bhú dasundu gba e na abadha. Aní suno di bhú kulu inde aní ngamene e ne nakè lie ne kuto di ne imbilangu. 14 Engú bini, i d̄ me yi nde ne 'ngbé bua naali-e, di ne bua me o one okpála koko mane-e, yi 'o nabhi 'kpa yi pí 'ka yi ma'o. Yi asíti engú na kukulu-o ne eu gba yi-e de. 15 Ngua imbilangu bhomu-o yie abhúlá de, a ko bhe na doto. A ko bhe na kute, a ko bhe gba kpála inde bhú e ne siti bua . 16 Padhá de, anga bili inde lí okpála nde lie ne 'ngbé bua-a, bili u nde lie ne gumu nane okpála koko mane-e, oo-o, nadje lío dú-̄ de. A adú bha bini oo ne ondu 'ngú hana bhe na sisiti.

17 Engú bini, imbilangu inde ayie abhúlá-a, a naae kpi hana. La di-e, a ne guo 'ngú , a ne bua na bh̄bh̄k̄, di ne namanga kpála. A abedhe di ne nadje ndjinga okpála koko, a ngazu obabadha nguwa. A ngau okpála koko ngbéngbé ane okoko mane ade, a la di ne kali bhú e ade. 18 Okpála bhende akunda guo 'ngú-o, maka okpála alulu 'dyi. Nguwa inde u alulu e, a ko guo 'ngú, a ngazu pi uo ngbili 'ngú .

## 4

*M̄ kunda engú na doto-o, amba m̄ ne bhulu yala gba Ebhe*

1 Okpekebhe di ne ogbele-e ngayie bhú ká yi su? A ngayie bhú

osisiti gumu na ndu 'ngú ngangá inde ngagu gbele bhú kute yi-o.

2 Yi kukunda nasia ehe bini, engú bini, yi ti da nasisia de. Kaka-a, yi bedhe ngú nabhili okpála. Yi dudu ne gumu na sisiti ngú nasia ehe bini, engú bini, yi ti da nasisia de. Kaka-a, yi ngamene kpekebhe, yi la di ngagu gbele. Yi sisia ehe inde yi akukunda e de. Padhá de, anga yi yoyo ka Ebhe de. 3 Belegu yi ayoyo lie, yi sisia de anga yi yoyo maka ayo lie de. Yi yoyo bha bini ehe inde i ngangá lí yi-o. 4 Ngayi obambakuya inde-e! Yi mbila de me nakunda engú na doto-o, a ko nadu bhulu yala gba Ebhe-e di? Kpála bhende akunda engú na doto-o, aní nga'o lie bhulu yala gba Ebhe. 5 A aye nani lie padhá de me: «Ebhe akunda bua gba e inde aní a'o nani e bhú ní-e naali.»\* 6 Engú bini, bádha bhú 'bu inde lí Ebhe nde ne e pi ní-e, ane ne engbé. Kaka-a, u aye bhú Bhuku gba aní-e me:

«Ebhe ne bhulu yala gba okpála na 'ngbé 'ndji,  
 engú bini, aní ne bádha bhú 'bu pi obhende ngakè lío ne kuto ko.†»

7 Kaka-a, yi manga Ebhe. Yi holo bhú 'dhu yi ka Djabalu kpekpeke, amba aní kpe yi tsutsu. 8 Yi dyudyo liyi de Ebhe masikpe, amba aní dyudyo di lie de yi masikpe. Ngayi okpála na siti 'ngú, yi vulu 'kpa yi! Ngayi okpála lí bua o agbolo ngangá-a, yi vulu bua yi! 9 Yi mbila ndjindji me yi bhú líkabhu. Yi ku 'gbá, amba yi lopolo liyi. A ayo me ezo gba yi-e dji lie, a akolo egbá, amba djali gba yi-e dji lie, a akolo líkabhu.

10 Yi kè liyi bhú djila Ngámá ne kuto, amba aní tsia 'e'e yi ne

\* 4:5 4:5 Ebhe akunda bua gba e inde aní a'o nani e bhú ní-e naali: U ti da napa matá me: «Bua inde lí Ebhe a'o e bhú ní-e abedhe ne osisiti gumu 'he.» † 4:6 4:6 Tsia bhú Gbt. 3:34.



abhúlá.

*Mo okódho 'ngú gba kpála koko de*

<sup>11</sup> Ondaise ma, yi adú apa siti 'ngú li yi sunda yi de. Kpála bhende ngapa siti 'ngú li ndai e, i dɔ di-e nakodho 'ngú gba ani-e, ani ngapa siti 'ngú bhomu-o li líli gba Ebhe, di ne nakodho 'ngú tété. Bhú nedhinga bhomu-o, ani ngamene líli ade, ani mangbo ngakodho 'ngú tété. <sup>12</sup> La-a, Ebhe aha líli ngae makpe. Ani tí la bhadi da nakodho 'ngú tété ngae kpi e kpi. Ngaani kpi e kpi, ani tí da nakobho kpála, di ne na' o me kpála kpi. Ngamu-o, mu la naamu ne da, mu ngakodho 'ngú gba kpála koko lie?

*Yi adú ne 'ngbé 'ndji de*

<sup>13</sup> Yi dje nga ma mbia inde, ngayi okpála bhende ngapa me: «Naki, i dɔ di-e mambi, ya anú bhú gudhu bhe. Ya así oo kalanga bini. Ya atsíndji 'he, ya tsia sía falanga.» <sup>14</sup> La-a, yi mbila de me mukobho gba yi-e adú mambi pi-ie de! Padhá de, anga yi maka nguwa inde ngau lie ngubula nedhinga bedi, pipíta-a, u u matá-a de ko! <sup>15</sup> A ayo mangbo me yi pa me: «Í dɔ me Ngámá nde akúnda-a, ya adú bhú mukobho. Ya tsia méne engú inde, i dɔ mo-o de-e, ya méne engú koko.» <sup>16</sup> Engú bini, mbia inde-e, yi ne okpála na 'ngbé 'ndji. Yi la di ngabhi 'kpa yi pí'ka yi. Ndɔ ngua ongbengbe 'ndji bhomu-o hana sisiti. <sup>17</sup> Kaka-a, li kpála mbila namene bádha 'ngú-o, engú bini, ani mene la bádha 'ngú ango-o de-e, amba ani amene siti 'ngú.

## 5

*Ngayi obhulu tia-a, yi ku 'gbá*

<sup>1</sup> Ngayi obhulu tia-a, yi dje nga ma mbia inde! Yi ku 'gbá, amba

yi tu di 'ue ka olikabhu inde akólo li kute yi ko! <sup>2</sup> Tia gba yi-e azi. Okokó azu la di obongo gba yi-e azu. <sup>3</sup> Olo gba yi, la di ne aladja gba yi-e agba mbelende. Mbelende ango-o a'ó 'ngú pí yi ngae. Mbelende azú la di kute yi maka djua. Yi apo ibili bhúla tia gba yi-e mbia inde-e ali sokpí! <sup>4</sup> Yi ayala naha tia pí okpála na kulu inde ngamene kulu bhú 'dyi gba yi-o. Kaka-a, u ngalopolo lio. La di-e, Ngámá na abhúlá, Angbamili adje nalopolo lie gba uo-o adje. <sup>5</sup> Píla doto-o, yi adú bhú ká tia, yi atsia adú akobho ndjindji naali. Yi akolo ne tsikpa maka oenu inde akolo ne tsikpa ngubula ekpí inde u abhéle uo lie ko. <sup>6</sup> Yi a' o mangimbo pí kpála na ngbingbili-o. Yi atsia abhele la di ani. La-a, ani lu kala yi ne gbele de.

*Yi dɔ ne 'ndjá bua, anga Ngámá ngago*

<sup>7</sup> Kaka-a, ondaise ma, yi dɔ ne 'ndjá bua akólo bha bini li 'kpí inde li Ngámá agó lie ko. Yi tsia nga kpála inde ngalu 'dyi-o. Ani ngadjeke nguwa inde ane ne bádha-a ne 'ndjá bua. Ani ngadjeke bhadi nedhinga inde li ebha na kalanu, di ne bhende na soso-o adhi lie-o. <sup>8</sup> Ngayi di-e, yi dɔ ne 'ndjá bua. Yi dɔ ne masi. Padhá de, anga nago gba Ngámá-a akolo masikpe. <sup>9</sup> Ondaise ma, yi apá siti 'ngú li yi sunda yi de, amba u akódho 'ngú gba yi-e de. Padhá de, anga kpála nakodho 'ngú-o alu li obhehoti. <sup>10</sup> Ondaise ma, opolofeta inde akpokpo nani 'ngú ne 'li Ngámá-a, abi nani likabhu ne 'ndjá bua. Yi kpata engú inde u amene e-o. <sup>11</sup> Ní ngapa me okpála bhomu-o, a ko okpála na djali. Padhá de, anga u adú bhú likabhu ne kpéke bua. Yi adje maka li Djobe abi nani likabhu lie

ne kpéke bua-o. Yi atsia au la di ehe inde li Ngámá aha e pi ani ali soso-o. Padhá de, anga Ngámá abedhe ne ndjinga, la di ne bua na babadha.

<sup>12</sup> A ane la mane ondaise ma, yi atú silika de. Yi atú silika ne 'li kokpi de. Yi atú silika ne 'li doto de. Yi atú di silika ne 'li 'he koko belega de bini. I du me a nde mo-o, yi de pa bha me: «A moko.» I du la di me a nde mo-o ade-e, yi de pa bha me: «A mo-o ade», ngubula me yi asía mangimbo ka Ebhe de.

*Nayo gba kpála na ngbingbili-e, a ne angu naali*

<sup>13</sup> Bhú ká yi-e, kpála bini bhú likabhu uu? A ayo me ani yo Ebhe. Bhú ká yi-e, kpála bini ne djali uu? A ayo me ani dhөгө Ngámá bhú oetsi. <sup>14</sup> A li kpála bini bhú ká yi ne kuo uu? A ayo me ani 'i obhelesi okpála na Piga gba Ebhe . U yo Ebhe ngubula ani, amba u tuko la di emu pi 'ndji ani ne 'li Ngámá. <sup>15</sup> I du me u nde ayo bhú dabili bini ne nabhuka-a , li nayo ango-o kóbho kpála na kuo-o, li Ngámá 'é ani bhúlá. I du me ani nde amene siti 'ngú-o, li Ebhe tsia 'é siti 'ngú ango-o. <sup>16</sup> Kaka-a, yi mbamba ta osisiti 'ngú gba yi-e sunda yi. Yi yo Ebhe ngú yi sunda yi, amba okuo gba yi-e yie. Nayo gba kpála na ngbingbili-e, a ne angu naali. <sup>17</sup> Eliya nani ne kpála-kuti maka ní. Ani ayo nani Ebhe ne bua e hana ngubula me ebha adhi-i de. Ebha tu píla doto belega de bini, ngubula kalanga bata ne epe madhia. <sup>18</sup> Pipita-a, ani ayo matá Ebhe. Abhomu-o, ekpi atse 'kpa li ebha kuto, doto atsia aholo di nazu nguwa gba e-o.

*Yi gie kpála inde a'o ká ngbili kpadji-e li kpadji na kukulu*

<sup>19</sup> Ondaise ma, kpála bini bhú ká yi ti da na'o ká ngbili kpadji.

Pipita-a, li kpála koko tsia gie matá ani li kpadji na kukulu. <sup>20</sup> Yi mbila ndjindji me kpála inde agie kpála bini na siti 'ngú, inde a'o ká ngbili kpadji li kpadji na kukulu-o, ani akóbho bua kpála bhomu-o bhú kuo, ani tsia méne me u mbu li bhiti osisiti 'ngú gba kpála bhomu-o.

## Balua na bini gba Piele Eli na kalanu

Piele aye nani balua na bini gba e pi omakilisito inde u a'i o li bili inde me okpála inde nani li Ebhe abhu o. Okpála ang-o atsambala nani bhú Adji Minele, ali pápá na abebe. Engú na ngbéngbé inde bhú balua inde-e, a ko nato masi bhú okpála inde ngatanga. Padhá de, anga u adu nani ato mbolo li uo, kabula nabhuka gba o-o. Ani aye balua ang-o ngubula naha Bádha Ngali gba Yesu Kilisito pi uo, inde nakpi, ne nazuku gba e ngaha pi okpála na'o 'to o 'to engú inde ani apa me ni améne e nedhinga nago ka ni ko. Nau ongú bhomu-o, uo ne kpadji koko ade, a ayo bha me u ziba nakibila olikabhu ne nambila ndjindji me, a ko nale inde u ngale uo ne e bhú nabhuka gba uo na kukulú-o. A ko la di me, u asía makalá li 'kpi inde li Yesu Kilisito ago lie (1:7).

Bhú nato masi inde li Piele ato e bhú okpála bhú nedhinga na likabhu-o, ani aha di líli pi okpála inde ngatanga balua inde me: u kobho maka okpála gba Kilisito.

### **Ongbengbe ongú inde bhú bhuku inde-e ngae inde:**

Eli na kalanu 1:1-2

Nagama matá 'ngú ne toto pindji mukobho inde li Ebhe ngaha e 1:3-12

Líli pindji mukobho na bubu 1:13 - 2:10

Ongú inde a ayo me makilisito mene e bhú nedhinga na likabhu 2:11 - 4:19

Namene kulu ne nako li o ne kuto ka makilisito 5:1-11

Eli na soso 5:12-14

### *Piele yi omabhuka inde agbong-bolo ne bili-e mayi*

<sup>1</sup> Ma aye balua inde-e pi yi ngama Piele, ma ne bhulu titima gba YesuKilisito . Ma aye pi yi okpála inde li Ebhe abhu o, ngayi okpála inde ngadu maka ogandji okpála bhú kuti koko, ngayi inde atsambala bhú ondu doto na Pote, ne Galatia, ne Kapadose, ne Adjia di ne Bitinia-o. <sup>2</sup> Ebhe 'Dyi ní abhu nani yi bhutode maka ani aleke nani engú ang-o lie-o. Ani alo yi li kpadji gba Bu Bhobua, ani a'o yi kpi ngú nadu piga gba e, ngubula me yi du namanga Yesu Kilisito, amba ngute ani vula yi ngú nadu bubu kala ni. A ayo me bádha bhú 'bu gba Ebhe-e du ne yi, amba ani ha di guo 'ngú pi yi ane mane.

### *Piele adhөгө Ebhe, anga ani akóbho omabhuka makobho*

<sup>3</sup> A ayo me ní dhөгө Ebhe, 'Dyi Ngámá gba ní Yesu Kilisito. Padhá de, anga ani abedhe ne ndjinga pi ní bedhe, ani atsia aha mukobho na mbia pi ní bhú nazuku Yesu Kilisito bhú ká okpála inde amu-o. Kaka-a, ní abhele djila ní li ani me ní azúku di mazuku. <sup>4</sup> Ní ti la di da na'o 'to ní 'to tia inde li Ebhe awo e pi ní opiga gba e-o. Ani awo tia ang-o pi ní abhúlá. Tia ang-o zizi de, a sisiti de, a pádha la di-de. <sup>5</sup> Nganí okpála inde abhuka Ebhe-e, ani ngalila ní ne angu gba e, ngubula me ní sia mukobho na duduma ang-o. Mukobho ang-o asúno lie li sokpi.

<sup>6</sup> Ka ongú ang-o, yi kpi djali, abana ayo lie me yi zu olikabhu mbia inde-e li okpadji ngangá ngú nedhinga bedi-o. <sup>7</sup> Belegu olo inde asisiti masiti-e, okpála tsutsulu ngaiza bhú djua ngú naleleke me a kolo ndjindji. A si la masi maka nabhuka gba yi-e ane olo lie mane-e? Yi ngazu olikabhu bhomu-o ngubula me okpála mbila me a li nabhuka gba

yi-e ne tata. A bhadi moko ne nabhuka gba yi-o. Ebhe améne mo-o ngú namene me, kabula nabhuka gba yi-e, aní toko yi, aní dhege di yi, aní mene di me 'lì yi kolo ngebéngbé li 'kpí li Yesu Kilisito asúno lie lie bhú sangu gba e-o. <sup>8</sup> Belegu yi u aní lie de-e, yi ne mukunda pí aní. Abana yi nde lie ngau aní ade-e, yi ngabhuka aní. Kaka-a, yi ngakpi djali naali, djali inde li kpála ti da nakpokpo lele e de, <sup>9</sup> anga yi asía makalá na nabhuka gba yi-e masia. Makalá ang-o, a ko li bua yi akóbho lie-o.

<sup>10</sup> Nani kalanu-o, opolofeta agili má bhotobhoto me o mbila kpadji li Ebhe akóbho okpála lie-o. U adu akpokpo 'ngú kalanu pí okpála pindji bádha bhú 'bu inde li Ebhe a'o nani e pí yi-o. <sup>11</sup> Bua gba Kilisito inde adu bhú uo-o apa pí uo kalanu me, Kilisito azú líkabhu. Pipita-a, aní tsia sía sangu gba Ebhe-o. Opolofeta ang-o agili nambila me ongú bhomu-o akódho 'kpí nadho. U atsia agili di nambila me a adú lele pí. <sup>12</sup> Ebhe atsia asuno pí opolofeta bhomu-o me ongú ang-o kódho 'kpí bhú nedhinga gba uo-o de, engú bini, akódho mangbo 'kpí bhú 'kpí gba yi. Mbia inde-e, okpála inde ngakpokpo Bádha Ngali-e, akpokpo ongú bhomu-o pí yi akpokpo. U akpokpo pí yi ne angu gba Bu Bhobua inde li Ebhe atima e-o. Belegu oandjelu, u akunda nau ongú ang-o.

*Piele apa pí omabhuka me u du bubu kala Ebhe*

<sup>13</sup> Kaka-a, yi du bedhe ndu 'kpí hana. Yi bhulu djila yi, yi 'o 'to yi libhomu 'to bádha bhú 'bu inde li Ebhe ahá e pí yi li 'kpí li Yesu Kilisito asúno lie lie bhú sangu gba e-o. <sup>14</sup> Yi manga Ebhe maka ongisi na babadha. Yi akpáta matá

kpadji na sisiti inde nani yi adu nakpata e kala me yi nde mbila Yesu Kilisito de-e de. <sup>15</sup> Engú bini, yi du bubu bhú mukobho gba yi-e libhomu, maka li Ebhe inde a'i yi-e nde lie bubu-o. <sup>16</sup> Padhá de, anga u aye bhú Bhuku gba Ebhe-e me: «Yi du bubu, anga ma bubu.†»

<sup>17</sup> Nedhinga yi ngayo Ebhe lie, yi nga'i aní me «'Dyi ní». Padhá de, anga aní ngakodho 'ngú gba okpála nakpata lele kulu gba kpála ne kpála. Aní tsia la di bhúla kpála bini de. Kaka-a, nedhinga yi nde nga bha lie píla doto-o, yi manga aní bhú ndu 'ngú hana inde yi ngamene e-o. <sup>18</sup> Yi mbila ndjindji maka li Ebhe agbegbe yi lie li kpadji ndu ongú hana na padhá padhá inde li odyi yi apana e pí yi-o. Ebhe kala yi ne ehe inde ngasiti masiti maka aladja, i du di-e olo de. <sup>19</sup> Engú bini, aní akala yi ne ngate Kilisito inde ane ndu 'he hana-o. Kilisito maka ndili kandele inde aha mukobho gba e, u atsia abhele e-o. Aní bubu kala Ebhe, ehe na sisiti bhú aní belegu ade bini. <sup>20</sup> Ebhe abhu nani aní ngú nakpi li 'ngú gba okpála kala me aní bho doto, la mbia inde-e, aní atsia asuno aní bhú onedhinga na soso inde-e mbámhá ngubula me aní kobho yi. <sup>21</sup> Kabula Kilisito-o, yi abhuka Ebhe inde azuku aní bhú ká okpála inde amu-o, aní atsia aha sangu pí aní. Kaka-a, yi nga'o nabhuka gba yi-e bhú Ebhe, yi la di nga'o 'to yi 'to aní.

<sup>22</sup> Yi avulu bua yi avulu ngú nadu ne mukunda na kukulu sunda yi. Yi avulu bua yi ang-o li kpadji nakpata ongú na kukulu inde li Ebhe asuno e pí yi-o. Ka 'ngú ang-o, ma apa pí yi me, yi du ndu 'kpí hana ne mukunda na kukulu sunda yi di ne bádha bua. <sup>23</sup> Yi mbila ndjindji me Ebhe aha

† 1:16 1:16 Tsia bhú Lev. 19:2.

mukobho na mbia pi yi li kpadji na eli gba e na duduma, inde di ngaha mukobho pi okpala-o. Ebhe inde i kpikpi de-e aha mukobho angoo pi yi ngae makpe. Yi sia mukobho angoo ka odyi yi inde amú mamu-o de. <sup>24</sup> Padhá de, anga u aye bhú Bhuku gba Ebhe-e me:

«Ndu okpala hana ngamu maka ulu a'ú'ulu lie-o.

Bádha gba kpala-kuti ngandjia maka bádha gba felele andjindjia lie,

i du me a nde anuku-o.

<sup>25</sup> Engú bini, eli gba Ngámá-a ngadu duduma ne duduma.†»

Eli angoo, a ko Bádha Ngali inde u akpokpo e pi yi-o.

## 2

*Piele apa me omabhuka du maka teme na mukobho*

<sup>1</sup> Yi bala ndu sisiti 'ngú hana kabula mukobho na mbia inde li Ebhe aha e pi yi-o. Yi apite kpala bini de, yi adú amene engú na kali de, yi adú ne gumu 'he gba kpala de, yi adú di apa 'ngú li okpala koko sisiti de. <sup>2</sup> Yi du maka ongisi u azu o na mbia, inde ndu 'kpi hana ne gumu nandji 'ka. Yi du bhadi ne gumu Eli gba Ebhe-e moko ngubula me yi bhele, akólo li ekpi li Ebhe akóbho yi lie libhomu-o. <sup>3</sup> Yi du bha ne gumu eli angoo na paká paká, anga yi ambila bádha 'ngú inde li Ngámá ngaha e li bua yi ambila.

<sup>4</sup> Yi dyudyo liyi de Ngámá Yesu Kilisito masikpe, a ko teme na mukobho, inde li okpala abhike nani e ne 'ili me a li kulu ade-o. La-a, bhú djila Ebhe inde alo nani teme angoo, ani atsia au me a li kulu ane ndu oteme koko hana. <sup>5</sup> Ngayi makpe-e di-e, yi du maka teme inde na mukobho, amba

Ebhe ha yi, ani tsia yiki eti gba Bu Bhobua ne yi maka 'ngbé 'ti Ebhe gba omaYuda-o. Bhú 'ti angoo, yi akólo piga gba odimandé inde aha lio pi Ebhe, ngubula naha makiso na Bu Bhobua, inde ndjindji pi Ebhe li kpadji gba Yesu Kilisito. <sup>6</sup> Padhá de, anga u aye bhú Bhuku gba Ebhe-e me:

«Yi gbo nga 'dje yi, ma alo teme bini na mase,

ma a'ó bhú gudhu na Siona

maka teme inde abi eti-e libhomu.

Kpala inde aziba teme angoo-sia namu belegu de bini.†»

<sup>7</sup> Pi yi okpala inde abhuka-a, teme angoo pi yi li kulu ane ndu oteme koko hana. Engú bini, pi okpala bhende i bhuka de-e, a mo-o ade. Padhá de, anga u aye bhú Bhuku gba Ebhe-e me:

«Teme inde li okpala nayiki eti-e abhike e-e,

akolo teme inde abi eti-e libhomu ngae.†»

<sup>8</sup> U aye matá di bhú Bhuku gba Ebhe-e me:

«Okpala ngado 'dhu o li teme angoo,

i tsia méne me u gu 'i o kuto.†»

U ngado 'dhu o tété, anga u ayala nakpata 'li Ebhe, Ebhe apa nani bhutode me a méne lie mo-o.

<sup>9</sup> La pi yi-e, yi ne piga inde li Ebhe abhu o-o. Yi ne piga gba odimandé inde ngamene kulu pi 'ngbé Ngámá Ebhe. Yi ne piga okpala inde li Ebhe a'o o kpi pi e. Ani abhu yi ngubula me yi kpokpo ongbengbe 'ngú inde ni amene e pi okpala. Ani a 'i yi me yi ze bhú biti, amba yi go li zi 'ke gba ni inde ngatsi ane ndu 'he hana-o. <sup>10</sup> Nani kalanu-o, yi du ne okpala gba Ebhe de, engú bini mbia inde-e, yi akolo okpala gba ani. Nani

† 1:25 1:25 Tsia bhú Isa. 40:6-8. † 2:6 2:6 Tsia bhú Isa. 28:16. † 2:7 2:7 Tsia bhú Ets. 118:22. † 2:8 2:8 Tsia bhú Isa. 8:14.

kalanu-o, yi sia ndjinga gba Ebhe-e de, engú bini mbia inde-e, yi asia ndjinga gba ani asia.

*Piele aha líli pí omabhuka pindji lele namanga lío, di ne namanga Ebhe*

<sup>11</sup> Ondaise ma na mukunda, yi mbila ndjindji me yi píla doto ei ne ogomago. Kuti gba yi-e píla doto inde-e ade. Kaka-a, ma ayo ka yi me, yi adú améne osisiti 'ngú lí gamu e nde lí bua yi-e de, anga ongu bhomu-o ngazu bili lí bhobua yi ngae. <sup>12</sup> Yi mene ehe liyi bhú ká omupagano ndjindji ngubula me, abana u du apa 'ngú lí yi sisiti-e, u de u obabadha 'ngú inde yi ngamene e-o, amba ekpi lí Ebhe asúno lie pí uo lie, u de dhogé ani.

<sup>13</sup> Yi ké liyi ne kuto kala ndu okpála hana inde ngau píla doto, kabula Ngámá gba ní Yesu Kilisito inde yi ngakpata nganda e-o. Yi ké liyi ne kuto kala ongbengbe ongámási na doto inde ngau pí ndu okpála hana-o. <sup>14</sup> Yi ké liyi ne kuto kala oguvelenele inde lí 'ngbé ngámá a'o o-o. Ani a'o uo ngubula me u mene okpála inde ngamene siti 'ngú-o kpekpeke, di ne me u dhogé obhende ngamene bádha 'ngú-o. <sup>15</sup> Padhá de, anga Ebhe akunda me yi gbite 'bhe ngingi 'ngú gba okpála inde ayala nambila Ebhe-e ne namene bádha 'ngú. <sup>16</sup> Yi mene ehe liyi maka okpála inde bhú bali ade. Engú bini, yi apá de me, o nde lie bhú bali ade-e, o mene siti 'ngú bhú gandji-e de. Yi mene mangbo liyi maka obalise gba Ebhe. <sup>17</sup> Yi manga ndu okpála hana. Yi du ne mukunda pí ondaise yi bhú 'bu nabhuka . Yi manga ongbengbe ongámási mamanga. Yi dhogé Ebhe.

<sup>18</sup> Ngayi obalise-e, yi ké liyi kala omakulasi yi ne kuto. Yi manga uo ndjindji. Yi amanga bha bini obhende na bhuku 'ngú-o de, inde ngamene yi ndjindji-e de, yi manga di obhende ngamene yi sisiti-o. <sup>19</sup> Padhá de, anga Ebhe ngasuno bádha bhú 'bu pí kpála inde ngazu likabhu sakpa okpála koko padhá me ani nde mene siti 'ngú de, lí ani tsia kíbila likabhu anga-o kabula 'lí Ebhe. <sup>20</sup> Yi du azu bhikpa ka siti 'ngú yi amene e, a dhogé yi tété da? Engú bini, i du me yi nde ngazu likabhu sakpa okpála koko kabula bádha 'ngú inde yi amene e, lí yi kíbila likabhu anga-o, a ko bádha 'ngú bhú djila Ebhe. <sup>21</sup> Ani a'i yi me yi mene moko, anga Kilisito azu bhadi likabhu pí yi moko. Ani apana kpadji pí yi, amba yi mene bhadi maka ní.

<sup>22</sup> Ngaani-e, ani mene siti 'ngú de.  
Ani pa eu belegu de bini.†

<sup>23</sup> Lí okpála asobho ani lie, ani gie sobho pí uo de.

Abana u ato mbolo lí ani lie, ani gu okpála anga-o de.

Ani a'o mangbo lie sakpa Ebhe inde ngakodho 'ngú ngbingbili-o.

<sup>24</sup> Ani abha sisiti 'ngú gba ní-e, ani atsia abi lí kute e.

Ani abi siti 'ngú anga-o nedhinga u abhelo ani lie lí kulusi ngubula me,

ní du maka okpála inde amu lí pápá na siti 'ngú amu,

di ne me ní du mangbo bhú mukobho inde ngbingbili.

Yi akobho ka oeka lí ani abi e-o.

<sup>25</sup> Padhá de, anga yi du nani maka okandole inde angita.

Engú bini, mbia inde-e, yi agie liyi agba mulila, inde ngalila bua yi-o.

† 2:22 2:22 Tsia bhú fsa. 53:9.

## 3

*Lele dasundũ sũnda olisi ne obhosi*

<sup>1</sup> Ma ngapa di pi yi olisi moko, yi kɛ liyi kala obhosi gba yi-e ne kuto da napa me abana li bini bini bhú ká uo bhuka 'li Ebhe de-e, u de dji bua o ka nau lele mukobho gba yi, abana yi pa 'ngú pi uo pindji eli gba Ebhe-e de-e, <sup>2</sup> u de bhuka kabula nau me lele dasundũ gba yi-e ndjindji, yi la di ngamanga uo. <sup>3</sup> Yi adũ bha bini aleke kate yi akilidjo de, abana i dũ bhú napulũ sundjo yi, abana i dũ nadyi omagege na olo, abana i dũ di-e bhú nadyi obongo bhe na mase naali. <sup>4</sup> Engú bini, yi leke mangbo liyi bhú naleke bua yi. Yi kɛ liyi ne kuto, yi dũ di ne guo 'ngú. Padhá de, anga a bhomũ-o bádha bhe i zizi de-o, a nganga li Ebhe naali. <sup>5</sup> Olisi na kalanũ inde adũ akpata Ebhe-e, inde adũ di na'o 'to o 'to ani-e, adũ nani aleke lio ne ngua bádha kulu bhomũ. U adũ la di namene líli gba obhosi gba o-o. <sup>6</sup> Yi bhundja nga pindji Sala. Ani adũ amene nani líli gba 'ko e Abalahama ndjindji. Ani adũ a'i ani me ngámá gba ni. Yi ne ongisi na olisilisi gba Sala na paká paká, i dũ me yi nde ngamene bádha 'ngú, yi nde 'o la di de me tsulũ ha angu yi de-o.

<sup>7</sup> A bhadi moko pi yi obhosi, a ayo me dasundũ gba yi ne olisi gba yi-e dũ ndjindji. Yi mbila ndjindji me uo bhúbhukũ ane yi. Yi manga uo mamanga, anga mukobho inde li Ebhe ahá e pi yi bhú bádha bhú 'bu gba e-e, ani ahá pi ndũ yi ne uo hana. Yi mene mo-o, ehe bini ní kpadji kala mayo gba yi-e de.

*Lele dasundũ gba omabhuka*

<sup>8</sup> Ngú nabu tata-a, yi dũ ndũ yi hana ne bua bini, yi dũ amene bádha 'ngú li yi sũnda yi, yi dũ ne

mukunda sũnda yi maka ondaise . Yi dũ ne ndjinga sũnda yi, yi kɛ la di liyi sũnda yi ne kuto. <sup>9</sup> Yi agié siti pi siti de, i dũ di-e sobho pi sobho de. Li kpála sobho yi-e, yi agié sobho pi ani de, engú bini, yi yo mangbo Ebhe me ani tuko bisagu pí ani. Padhá de, anga nedhinga li Ebhe a'i yi lie me yi dũ piga gba ni-e, ani apa nani pi yi me ni atúko bisagu pí yi. <sup>10</sup> A maka u aye lie bhú Bhuku gba Ebhe-e me:

«Li kpála kũnda me mukobho gba ni-e dũ ndjindji-e,

ani kũnda la di me ni dũ bhú djali-e,

a ayo de me ani dũ apa siti 'ngú-o de,

a ayo la di de me ani dũ apa eu-o de.

<sup>11</sup> A ayo me ani dji 'ngbũ e li siti 'ngú,

ani mene mangbo bádha 'ngú.

Ani gili guo 'ngú ne kekele hana.

<sup>12</sup> Padhá de, anga Ngámá ne djila e li okpála inde ngamene ngbili 'ngú,

ani bedhe ngú nadjẽ mayo gba uo.

Engú bini, ani ngadji 'ngbũ e li okpála bhende ngamene osisiti 'ngú-o.†»

*Piele apa me omabhuka kibila likabhu me u nde ngamene bádha 'ngú*

<sup>13</sup> I dũ me yi nde nga'o bua yi hana li namene bádha 'ngú-o, a ko da inde améne yi sisiti-e? <sup>14</sup> Yi dũ ne djali nedhinga yi ngazũ likabhu lie ka bádha 'ngú inde yi ngamene e-o. Ka 'ngú ang-o-o, yi adú ne tsulũ okpála inde ngakũnda namene yi sisiti-e de, bua yi abáka di-i de. <sup>15</sup> Yi dhogẽ mangbo Kilisito li bua yi maka Ngámá gba yi. Yi dũ bedhe ndũ 'kpi hana ngú nakpokpo 'ta yi

nga'o 'to yi lie 'to Kilisito pi okpála bhende ngayi yi tété-o. <sup>16</sup> Engú bini, yi kpokpo ne bhuku bua, amba yi manga la di uo mamanga. Yi mene ndu 'kpí hana engú inde yi au e li bua yi me a ndjindji-o, amba okpála bhende ngapa 'ngú li yi sisiti-e, sia namu nedhinga u ngasobho bádha kulu yi ngamene e kabula 'li Kilisito lie-o. <sup>17</sup> Padhá de, anga yi sia likabhu ka siti 'ngú inde yi ngamene e, engú tété ade. La-a, yi sia likabhu kabula bádha 'ngú inde yi ngamene e, i du me Ebhe nde aziba mo-o, bhobhomu-o ane ne bádha ngae.

<sup>18</sup> Padhá de, anga Kilisito adje di likabhu kabula siti 'ngú gba ní-e bhutsibhutsi bini má ngbi! Ngaani kpála inde i mene siti 'ngú de-e, ani akpi ngubula nakobho ní okpála inde ngamene siti 'ngú-o, ngubula me ani mba bhúla ní agba Ebhe. Okpála abhele ani bhú kute, engú bini Ebhe atsia azuku ani li kpadji gba Bu Bhobua .

<sup>19</sup> Ka angu gba Bu Bhobua bhomu-o, ani atsia anu belegu di nakpokpo Bádha Ngali gba Ebhe-e pi obua inde amu inde bhú tikpu-o. <sup>20</sup> A ko bua okpála inde ayala nani nadi bua o nedhinga li Nua adu abho 'ngbé zabu lie-o. La-a, Ebhe adjeke nani uo ne 'ndjá bua. Okpála inde li engu-o akobho nani o-o, u du bhelé de. A adu bha nani okpála madjina padhá inde a'u'u nani bhú zabu-o. <sup>21</sup> Engu bhomu-o, a ko kulu batisimo. Ebhe ngakobho yi mbia inde-e li kpadji na batisimo bhomu. Batisimo angu-o ngubula na'e zibotu na kute ade, engú bini, a ngubula naha lio libhomu pi Ebhe ne bua nambila ngbili 'ngú. Ebhe ngakobho yi li kpadji na batisimo angu-o ka li Yesu Kilisito azuku lie-o. <sup>22</sup> Ani atapa abhúla, ani adu de Ebhe li pápa na kokpa. Ani ngau

pi 'ndji oandjelu di ne pi 'ndji ndu obua hana inde ne angu abhúla oo-o.

## 4

*A ayo me omabhuka mene engú li lele mukobho na mbia*

<sup>1</sup> Ní mbila ndjindji me Kilisito adje likabhu bhú kute. Kaka-a, ngayi di-e, yi du bedhe ngú likabhu maka ani. Padhá de, anga kpála inde adje likabhu bhú kute-e, a'o namene siti 'ngú a'o. <sup>2</sup> Nayie pi mbia inde-e, nedhinga hana inde yi améne e pála doto-o, a ayo me yi mene bhú mukobho gba yi-e engú inde li Ebhe akunda e-o. Yi améne engú na sisiti inde li bua yi ngakunda e de. <sup>3</sup> Padhá de, anga yi abala nako nedhinga gba yi-e bhelé bhú namene engú li omupagano amemene e-o. Yi améne matá mo-o de. Yi adu nani akunda olisi di ne obhosi ngangá, gumu kute aha di nani angu yi maha. Yi adu abhele kuo yi ne pandi, yi adu apo bhúla yi ngú nandji pandi, yi adu adho 'bi na sisiti. Yi adu di amene engú inde ayo la ndju nako de me yi mene e de-o, anga yi adu adhögø oebhe na eu.

<sup>4</sup> La mbia inde-e, omupagano ngangamba, u la di ngasobho yi, anga yi kə matá nganda uo bhú siti 'ngú inde u ngamene e na mugwe mugwe-e de. <sup>5</sup> Engú bini, ekpi akólo makolo. Li 'kpí angu-o, u akpókpo 'ngú gba o-o kala Ebhe inde bedhe ngú nakodho 'ngú gba okpála inde uu, di ne okpála bhende amu-o. <sup>6</sup> Ka 'ngú angu-o, Kilisito anu nani belegu nakpokpo Bádha Ngali pi okpála inde amu-o. Ani akpokpo pi uo ngubula me, maka li Ebhe akodho 'ngú gba okpála hana lie, ngauo di-e, Ebhe akódho 'ngú gba uo-o nakpata lele maka u adu nani lie pála doto, amba u du bhú



mukobho maka Ebhe li kpadji gba Bu Bhobua .

*Piele apa me omabhuka mene kulu ne makalá u asia e ka Ebhe-o*

<sup>7</sup> Sokpí akolo masikpe. Kaka-a, yi dú ne bádha mabhundja, yi bhulu djila yi, amba yi dú nayo Ebhe. <sup>8</sup> Kala ndú 'ngú hana-a, yi dú ne mukunda na paká paká sunda yi, anga bhobhomu-o méne me yi mbu li bhiti osisiti 'ngú li okpála koko ngamene e-o. <sup>9</sup> Yi sia okpála inde ngago agba yi-e ndjindji. Yi asia uo ne nadi mutokono de. <sup>10</sup> A ayo me yi teteke liyi ne makalá inde li Ebhe aha e pi yi bhú bádha bhú 'bu gba e-o. Yi mene mo-o, yi dú maka obabadha okpála inde ambila namene kulu ne makalá li Ebhe aha e pi yi kpi kpi kpi-o. <sup>11</sup> A ayo me kpála inde asia makalá nagama 'ngú-o, kpokpo oeli gba Ebhe-o . A ayo me kpála inde asia makalá namene kulu pi okpála koko-o, mene ne angu li Ebhe aha e pi ani-e hana, amba bhú ndú 'ngú hana-a, okpála dhogò Ebhe ka Yesu Kilisito. Padhá de, anga ndú okpála hana ngadhogò Ebhe, ndú angu hana sakpa ani duduma ne duduma. A adu moko!

*Piele apa me omabhuka kibila likabhu ka 'li Kilisito*

<sup>12</sup> Ondaise ma na mukunda, yi angamba ka okpekpeke da 'ngú yi ngali bhú e de. Ongú bhomu-o ngakolo li yi ngubula nambila lele nabhuka gba yi-e nde lie-o. Yi abhúndja de me a ko ongu koko kpi-e de. <sup>13</sup> Engú bini, yi kpi djali, anga yi ngabi bhomu-o té likabhu inde li Kilisito adje e, amba li 'kpí ani asúno sangu gba e lie pi ndú okpála hana-a, yi de bedhe di ne djali na kuo kuo. <sup>14</sup> Yi dú ne djali nedhinga li okpála nde

ngasobho yi lie kabula 'li Kilisito-o. Padhá de, anga Bua na asasaua gba Ebhe-e ngadu bhú dabili bini ne yi. <sup>15</sup> I dú me saka yi nde ngazu likabhu-o, adú de me ani amene siti 'ngú-o de. A ayo di de me ani zu likabhu anga ani abhelo kpála de, ne me ani azi 'he-e de, i dú di-e me ani ali bhú 'ngú gba kpála koko-o de. <sup>16</sup> Engú bini, i dú me kpála nde ngadje likabhu anga a ko makilisito-o, a ayo de me ani dje numu tété-e de. Ani gie mangbo heni pi Ebhe, anga a ko kpála ka Kilisito.

<sup>17</sup> Nedhinga akolo, nedhinga inde li Ebhe akódho 'ngú gba okpála lie-o. Yi mbila la me, ani akpó lita nakodho 'ngú ango-o li okpála gba e makpe. I dú la mo-o, bhende gba okpála inde ngayala naziba Bádha Ngali gba Ebhe-e adú la ibili naae lele pi? <sup>18</sup> U aye bhú Bhuku gba Ebhe-e me:

«I dú me da nakobho ka okpála inde ngbingbili-e nde kpekpeke-e, engú bhe gba okpála inde ngayala Ebhe, inde la di ngamene siti 'ngú-o, adú la ibili lele pi?†»

<sup>19</sup> Kaka-a, okpála bhende ngadje likabhu anga Ebhe aziba mo-o, nu ne namene bádha 'ngú ne kalanu. U 'o la di lio makpe sakpa kpála inde abho ní, inde amemene 'ngú maka ani apa lie-o.

## 5

*A ayo nalila okandelo gba Ebhe-e malila*

<sup>1</sup> Ma ngagama 'ngú mbia inde e pi okpála bhende bhú ká yi ne obhelesi okpála na Piga gba Ebhe-o . Ma di ne bhele kpála na Dadjua gba Ebhe maka uo. Ma au likabhu li Kilisito azu e ne djila ma. Ma asia la di té sangu gba Kilisito inde

li Ebhe asúno e pí ní-o. Kaka-a, ma ngayo ka yi me: <sup>2</sup> yi lila okpála inde li Ebhe a'o o sakpa yi-e malila. Yi lila uo maka li kpála nalila okandələ alilila okandələ gba e lie-o. Yi alíla uo ka napa de me u agbite yi tété ne kpéke-e de. Engú bini, yi lila uo ne bádha bua maka li Ebhe akúnda lie-o. Yi améne kulu ngubula nasia tia de, engú bini yi mene me yi nde abedhe ne mukúnda bedhe. <sup>3</sup> Yi alíla okpála li Ebhe a'o o sakpa yi-e de me yi nde ako angu yi pí uo mako-o de. Engú bini, yi mene me okpála kpata lele dasúnda gba yi-o. <sup>4</sup> Li yi mene mo-o, ekpí li Yesu Kilisito inde ngalila ní-e agó lie-e, yi sía makalá na sangu ka ani. Makalá ang-o ngadu dáduma ne dáduma.

*Yi kə liyi kala Ebhe ne kuto*

<sup>5</sup> A bhadi moko pí yi omakom-bise, yi kə liyi ne kuto kala obhelesi okpála gba yi-o. Ma ngapa pí ndu yi omabhuka hana me, yi kə liyi ne kuto sūnda yi. Yi teteke liyi sūnda yi, padhá de, anga u aye bhú Bhuku gba Ebhe-e me:

«Ebhe ngadji 'ngbu e li obhulu 'ngbé 'ndji,  
engú bini, ani ngaha bádha bhú 'bu pí okpála inde ngakə lio ne kuto.†»

<sup>6</sup> Kaka-a, ma ngapa pí yi me yi kə liyi ne kuto kala Ebhe inde ne angu, amba ani 'e'e yi ne abhúlá li nedhinga ani akúnda lie-o. <sup>7</sup> Yi 'o ndu 'ngú hana inde ngato mbolo li yi-e sakpa ani, anga ani ngalila yi.

<sup>8</sup> Yi du bedhe, yi lila liyi, padhá de, anga djabulu bhulu yala gba ní-e ngadji bili maka kingbi inde ngangulumba. Ani ngagili me ni azú da-ie. <sup>9</sup> Yi lu kala ani kpekpeke bhú nabhuka. Yi mbila ndjindji me omabhuka koko

pála doto libhomu-o bhadi ngadje likabhu maka yi. <sup>10</sup> Yi adjé nga matá likabhu ngubula nedhinga bedi. Engú bini, Ebhe inde bhulu bádha bhú 'bu-o, a'i yi ngú nali bhú sangu na dáduma gba e bhú nakpetse liyi bhú dabili ne Kilisito. Ani aléke yi ngae makpe, ani tsía méne me yi lu kpekpeke bhú ndu 'ngú hana má kpəkəbhə! <sup>11</sup> A ayo me ani u dáduma ne dáduma. A adu moko.

*Oeli na soso*

<sup>12</sup> Silivano ateteke ma li naye mbo ndu balua inde-e pí yi ngae. Ma ambila me a ko ndai ní makilisito inde ngamene 'ngú li lelele. Ma aye balua inde-e ngubula nato masi bhú yi, di ne napa pí yi me a inde-e bádha bhú 'bu na kəkulu gba Ebhe, yi gbite liyi tété.

<sup>13</sup> Omabhuka inde bhú Babilona\* ei, inde li Ebhe abhu o maka ani abhu di yi lie-e, yi yi mayi. Ndili gba ma Maloko yi di yi mayi. <sup>14</sup> Yi yi liyi sūnda yi, yi kama liyi sūnda yi ngú nasuno me yi ne mukúnda sūnda yi. A ayo me guo 'ngú du bhú dabili bini ne yi okpála inde bhú 'bu Kilisito hana.

† 5:5 5:5 Tsia bhú Gbt. 3:34. \* 5:13 5:13 Babilona: Okpála bhelé ngabhundja me li bili inde-e, a akúnda nasuno gudhu na Loma.

## Balua na bhisi gba Piele Eli na kalanu

Piele aye balua gba e na bhisi pi 'ngbé limbi omakilisito na kalanu. Engú na ngbéngbé inde bhúbhú-o, a ko ngubula nagu kulu gba omusuno na eu di ne ongú na zabhe inde ngayie bhú ongú angoo. Ngú naha angu engú bhomu-o, a ayo nagbite lio li nambila Ebhe na kakulu di ne Ngámá Yesu Kilisito, ne nasuno inde li okpála inde au Yesu ne djila o akpokpo e-o. Piele alu kpekpeke li nasuno na eu inde li okpála adu apa lie me Yesu go matá de-o. Aní atsia apa me nabhue inde li Yesu ngabhue lie, a ko anga Ebhe kunda de me kpála bini kpi-e de. Engú bini, aní ngakunda me okpála hana koto bhú siti 'ngú (3:9).

### Ongbengbe ongú inde bhú bhuku inde-e ngae inde:

Eli na kalanu 1:1-2

Na'i inde li Ebhe a'i makilisito ne e-o 1:3-21

Omusuno na eu 2:1-22

Nago na soso gba Kilisito 3:1-18

### Simo Piele yi omabhuka mayi

<sup>1</sup> Ma aye balua inde-e ngama Simo Piele. Ma ne bali gba Yesu Kilisito, ma la di ne bhulu titima gba aní-o. Ma aye balua inde-e pi okpála bhende asia nabhuka ka ngbili 'ngú gba Yesu Kilisito-o. A ko Ebhe gba ní, a ko di Mukobho gba ní-o. Nabhuka angoo viti bini ne bhe gba ya-o. <sup>2</sup> A ayo me bádha bhú 'bu gba Ebhe di ne Ngámá gba ní Yesu Kilisito-o, du bhú dabili bini ne yi, amba u ha di guo 'ngú pi yi ane mane ka yi ambila uo lie ndjindji-o.

*Lele nadhuku ka omakilisito*

<sup>3</sup> Yesu Kilisito bhú angu gba e aha ndu 'he hana ní nde ne gumu e ngú nakobho di ne nadu ka ní libhomu pi Ebhe. Aní amene me ní mbila Ebhe inde a'i ní bhú sangu gba e di ne bhú ngamba kulu gba e na paká paká. <sup>4</sup> Ebhe amene mo-o ngubula me ní sia oehe na mase naali di na ngbengbengbe inde nani aní apa me ní ahá e pi ní-o. Aní aha oehe bhomu-o ngubula me yi kpe osisiti gumu 'he na doto inde ngabhili okpála-o, di ne ngubula me yi kpetsé liyi bhú dabili bini ne ni.

<sup>5</sup> Ka 'ngú angoo, yi mene ne kpéke me nabhuka gba yi-e be ndu e ne nadhuku ngbingbili, pí nadhuku ngbingbili-e, yi 'o nambila Ebhe na paká paká, <sup>6</sup> pí nambila Ebhe na paká paká-a, yi 'o naholo bua yi, pí naholo bua yi-e, yi 'o kekele, pí kekele-e, yi 'o naholo lio li Ebhe, <sup>7</sup> pí naholo lio li Ebhe-e, yi 'o nadu ne mukunda sunda yi. Pí nadu ne mukunda sunda yi-e, yi 'o mukunda pi ndu okpála hana. <sup>8</sup> I du me yi nde nganu ne namene ndu ongú bhomu-o hana ne kalanu-o, i tsia méne me yi mene kulu, i méne di me yi zu nguwa bhú nambila Ngámá gba ní Yesu Kilisito-o.

<sup>9</sup> La-a, kpála bhende i mene oehe bhomu-o de-e u 'kpí tsutsu de, aní maka kpála inde i u 'kpí de. Aní a'ili 'to e me Ebhe avulu osisiti 'ngú gba ní nani ní amene e-o. <sup>10</sup> Kaka-a, ondaise ma, yi mene la matá ne kpéke me yi lu ne angu bhú e'i li Ebhe a'i yi lie, di ne maka aní abhu yi lie-o. Li yi mene mo-o, yi lí bhú siti 'ngú 'kpí bini de. <sup>11</sup> Abhomu-o, li Ebhe ká kpadji pi yi ne bua e bini me yi li bhú Nau na duduma gba Ngámá gba ní Yesu Kilisito, inde di Mukobho gba ní-o.

*Piele apa pi omabhuka me u 'o*

'to o li 'li Ebhe

<sup>12</sup> Kaka-a, a ayo me ma 'o 'ngú bhomu-o bhú 'dje yi ndu 'kpí hana belegu yi ambila nani lie bhutode, yi atsia agbite liyi li kukulú 'ngú inde yi asia e-o. <sup>13</sup> Ma abhundja me nedhinga ma nde nga bha lie uu-o, a ndjindji me ma du na 'o 'ngú bhomu-o bhú 'dje yi ngubula me yi alá-a de. <sup>14</sup> Padhá de, anga ma ambila me nedhinga nakpi ka ma-a akolo masikpe maka li Ngámá gba ní Yesu Kilisito apa mama lie-o. <sup>15</sup> Kaka-a, ma améne di ne kpéke me, pita ma akpi lie, 'to yi a'li 'to ongu bhomu-o de.

<sup>16</sup> Nani ya akpokpo 'ngú lie pi yi pindji nago gba Ngámá gba ní Yesu Kilisito bhú angu gba e-e, ya kpokpo pi yi ongu na padhá padhá inde li okpála ngapandja e bhú o-o de. Engú bini ya aní bhú zi e ne djila ya makpe. <sup>17</sup> Padhá de, anga Ebhe 'Dyi aní adhege aní nane mane. Abhomu-o, eli ayie agba Ebhe na angu di na asasua atsia apa me: «Kpála inde-e, a ko Ndili gba ma, ma kunda aní naali, bua ma nga ne aní naali.†» <sup>18</sup> Ya adje eli inde ayie abhúla-a ne 'dje ya makpe, nedhinga ya adu lie ne Ngámá Yesu Kilisito apí 'ta li Ebhe asuno lie pi ya pí e-o.

<sup>19</sup> Ka 'ngú angu-o, ya abhuka na paká paká ngali inde li opolofeta akpokpo nani e bhú Bhuku gba Ebhe-o. A ayo me yi gbo 'dje yi tété ndjindji, anga a maka zi 'ke inde ngatsi bhú biti. Yi gbo 'dje yi tété akólo li ekpí ahólo naseke lie-o, ekpí inde li Yesu Kilisito asúno lie lie li bua yi maka zi ikupala na kékpi asusu lie-o. <sup>20</sup> Kala ndu 'ngú hana-a, yi mbila ndjindji me kpála bini ade inde i ti da nakpokpo ne imbilangu gba e makpe kú oeli inde nani li opolofeta akpokpo e, inde u aye di-e bhú Bhuku

gba Ebhe-o. <sup>21</sup> Padhá de, anga 'li opolofeta yiyie ka kpála bini de. Engú bini, Bu Bhobua apa pi okpála ngae makpe me u kpokpo 'ngú ne 'li Ebhe.

## 2

*Piele agbele 'dje omabhuka li 'ngú gba omusuno na eu*

<sup>1</sup> Nani kalanu-o, opolofeta na eu adu bhú ká omafalaale, Omusuno na eu azé bhadi bhú ká yi moko. U agó ne kali, u tsia súno ongu na eu inde a'é okpála li kpadji na makobho-o. U ayála belegu Yesu Kilisito, Musuno gba ní inde agbegbe o bhú bali gba siti 'ngú-o. U améne lie mo-o, u ngagili bhomu-o me kpéke 'ngú na kpekpeke go ti pí o má gala! <sup>2</sup> Okpála bhelé akpáta kpadji na numu gba uo-o. Kaka-a, li okpála tsia sóbho kpadji na kukulú 'ngú inde li Yesu Kilisito asuno e ka uo. <sup>3</sup> Ka gumu 'he-e, omusuno na eu angu-o apite yi ne oeli na eu, u tsia gbúlú oehe gba yi-o. La-a, Ebhe akodho 'ngú gba uo-o nani didili, kpéke 'ngú na kpekpeke atí pí uo mbia.

*Engú inde akodho 'kpí bhú nedhinga gba okpála na kalanu*

<sup>4</sup> Padhá de, anga belegu oandjelu inde amene nani siti 'ngú-o, Ebhe dje ndjinga uo de. Engú bini, aní abala uo bhú tsu 'dú má ngbongobho, inde bhú e ne biti má ndundulundu me, u nde agbigbite uo ne gbindjili akólo li 'kpí aní akódho 'ngú gba okpála lie-o. <sup>5</sup> Abana okpála nani di amene siti 'ngú-o, Ebhe dje di nani ndjinga uo de, engú bini, aní amene me engu si píla doto, amba a bhili okpála inde andjo 'li ni-o. Aní akobho bha bini Nua, inde adu apa pi okpála me u dji bua o, a la di-e okpála mananika koko.

† 1:17 1:17 Tsia bhú Mat. 17:5; ne bhú Mlk. 9:7; di ne bhú Luk. 9:35.

6 Ngubula nasuno ongú inde akólo galikpe li okpála inde ngandjo 'li Ebhe-e, Ebhe atsulo ogudhu na Sodomo ne Gomolo hana má kpəkəbhə! 7 Engú bini, Ebhe akobho Loto. A adu nani ngbili kpála . Bua ani adu nani ake ne siti 'ngú li okpála bhomu-o adu amene e bhú poli-e naali. 8 Ani adu nadu bhú ká obhulu poli bhomu. Ndu 'kpí hana, ani adu nau di ne nadje osisiti 'ngú gba uo-o. Ongú ango-o atsia adu nake bua ani na kuo kuo. Padhá de, anga adu ngbili kpála. 9 I du me a nde mo-o, Ngámá mbila kpadji inde ani akóbho okpála inde ngakpata 'li e bhú okpekpeke da 'ngú-o ndjindji. Ani mbila la di kpadji inde ani ahólo okpála inde ngandjo 'li e ngubula me u zu likabhu li 'kpí ani akódho 'ngú gba okpála lie ndjindji. 10 Ebhe ahá likabhu ango-o, ane mane pi okpála inde ambila lio ne nakpata osisiti gumu na kute, inde di ngau angu gba Ebhe-e bhú djila o padhá-o.

*Engú inde akólo li omusuno na eu*

Tsulu 'ngú li omusuno na eu-o ade. U dje kpála de, u manga la di oandjelu inde li o ne zizi-e\* de. Engú bini, u ngasobho uo. 11 Belegu li oandjelu ane omusuno na eu-o lie ne angu-o, u sobho oandjelu na ndjondjo bhomu-o kala Ngámá de. 12 Omusuno na eu bhomu-o ngamene 'ngú bhú 'ndji o maka onu inde u azu o ngubula me okpála dhe o li 'kú. U ngasobho oehe inde u mbila e de. U amú maka onu.

13 U azú likabhu bhomu-o mada siti 'ngú inde u amene e li okpála koko-o. U ne gumu namene siti 'ngú belegu ne ngbikpi. Nedhinga yi nde ne uo lie bhú anokomia,

u ngapite yi. Engú ango-o ngaha pi uo djali naali, la-a, a ko 'ngú na numu. 14 U abedhe ne gumu nakunda olisi gba okpála koko bhú o bedhe. U ndandala li namene siti 'ngú de. U ngadhe okpála bhende ne kpéke bua ade-e li 'kú gba o-o. U ngapite uo masikpe de nato uo bhú siti 'ngú. U abedhe ne gumu 'he bedhe. Ebhe atu nani pedje li uo bhutode. 15 U ayie li kpadji na ngbingbili-e ayie, u angita. U ngakpata kpadji gba Balama, ndili gba Bosolo, inde akunda nani namene siti 'ngú ngubula nasia tia-o. 16 Engú bini, Ebhe ambe bhú 'ndji ani kabula siti 'ngú gba e-o. Li nedhinga bhomu-o, punda, enu i gagama 'ngú de-e, agama 'ngú maka kpálakuti. Ani atsia ani kpadji pi polofeta bhomu-o me ani amene matá engú na pele bhomu-o de.

17 Omusuno na eu-o maka okpongu li engu a'ulu bhú e hana, di maka ndindi inde li anvi ngandjindjimba e. Ebhe aleke dabili gba uo-o bhú biti má ndundulundu! 18 U ngatolo bha bini ne ongbengbe 'ngú na padhá padhá inde li tata nde li e ade. La di-e, u ngato okpála bhende aze nga bha na mbia bhú ká okpála inde ngamene siti 'ngú-o bhú ngita. U ngato uo bhú ngita li kpadji na gumu na kute gba o-o. 19 U ngapa pi okpála ango-o me u azé bhú bali maze, engú bini, ngauo omusuno na eu bhomu-o bhú bali na siti 'ngú. Padhá de, anga kpála ne bali pi engú inde ako pí ani-o.

20 A ne okpála koko inde a'o osisiti 'ngú na doto anga u ambila Ngámá Yesu Kilisito, inde di ne Mukobho gba ní-o. I du me u nde agie matá lio bhú namene osisiti 'ngú bhomu-o, li siti 'ngú bhomu-

\* 2:10 2:10 Oandjelu inde li o ne zizi: A akunda napa me oandjelu inde ngamanga 'li Ebhe.

o gaga uo, i ko angu e pí uo-o, u kólo la matá sisiti nane da bhe na kalanu-o mane. <sup>21</sup> Padhá de, anga nako me u nde mbila ngbili kpadji-e de-e, engú du tété de. La mbia inde-e, u ambila, u atsia adji 'ngbu o li líli inde li Ebhe aha e-o. Bhobhomu-o la matá pi uo sisiti ane mane ngae. <sup>22</sup> Engú inde ngakolo li uo-o ngasuno me engú li gbitaku ngapa e-e, a ko paká. Gbitaku apa me: «Búlu gie bha lie ngú nazu zie e.†» U papa di matá me: «Pame inde u avulu kute e mbia inde-e, gie matá bha lie nato lie ne ngbedhe.»

### 3

*Ngámá Yesu Kilisito agie galikpe lie magie*

<sup>1</sup> Ondaise ma na mukunda, a inde-e balua na bhisi li ma aye e pi yi-o. Bhú ndu balua bhisi bhomu-o hana-a, ma aye matá pi yi ongu yi ambila e ne toto ngubula nakpo djua li bua yi li kpadji na ngbili 'ngú. <sup>2</sup> Ma akunda me 'to yi a'li de li ongu li opolofeta gba Ebhe, di ne líli li Ngámá gba ní, inde di Mukobho gba ní-e apa nani e pi yi bhú 'bhe obhulu titima inde ani atima o pi yi-o. <sup>3</sup> Kala ndu 'ngú hana-a, yi mbila me li sokpi-e, okpála inde adú namene 'ngú li gumu gba o makpe akunda e azé píla doto. U adú amu yi. <sup>4</sup> U adú napa me: «Mugito me Yesu Kilisito apa nani me ni agie lini magie, ani la dho? Padhá de, anga maka nani li onguo ogbi ya amu lie, ndu 'ngú hana bha bhú da e maka li lilita nani li Ebhe abho kokpi ne doto lie-o!»

<sup>5</sup> Okpála inde ngapa 'ngú bhomu-o ngamemene bhú gandji. U ngamene 'he mugito me u a'li

'to o li 'ngú bini. Engú angu-o me, Ebhe abho nani kokpi ne 'li e. Ani abho doto li kute engu. Ani atsia asa dengo doto ne engu ngbalina. <sup>6</sup> Ani atsia abhøle la bhadi doto na kalanu-o ne engu, engu inde asi nani píla doto libhomu-o. <sup>7</sup> Ani apa di ne 'li e makpe me kokpi ne doto na naki inde-e, a adúdu tété, nakolo li 'kpi ni akódho 'ngú gba okpála lie-o. Ni tsia tsúlu okpála bhende ngamene siti 'ngú-o.

<sup>8</sup> Ondaise ma na mukunda, a ne koli 'ngú bini inde a ayo me 'to yi a'li lie de. Pi Ebhe-e, ekpi bini maka kalanga kutu bini, kalanga kutu bini maka ekpi bini. <sup>9</sup> Okpála koko bhundja naao me, Ebhe ngamene engú inde ani apa me ni améne e má gala ade! A mo-o ade. Ebhe mangbo ne 'ndjá bua pi yi, anga ani kunda de me suka kpála bini ngita-a de. <sup>10</sup> Ngámá Yesu agó galikpe bhú gbilikiti, maka li bhulu 'zi agógo lie me 'to kpála nde 'to ani ade-o. Ekpi angu-o, okpála adjé tolo na mugwe mugwe, li djua gó tsúlu kokpi ne ndu 'he inde abhúla-a hana, li doto tsámbara ka djua má mbu.\*

<sup>11</sup> I nde lie me ndu ohe hana nde andjia mo-o, a ayo me lele nadhuku gba yi-e du ndjindji, yi du di libhomu hana pi Ebhe. <sup>12</sup> Yi 'o 'dje yi li 'kpi li Ebhe a'o e ngú ongu angu-o, amba yi mene ne kpeke me ekpi angu-o go má gala! Li 'kpi angu-o, djua atsúlu kokpi, li ohe na abhúla tsúlu hana má kpøkøbhø! <sup>13</sup> La-a, Ebhe apa pi ní me ni abhó kokpi di ne doto na mbia. Oo-o, adú bha ne engú na ngbingbili. A bhomu-o engú inde ní ngadjeke e-o.

<sup>14</sup> Kaka-a, ondaise ma na mukunda, i nde lie me yi ngadjeke

† 2:22 2:22 Tsia bhú Gbt. 26:11. \* 3:10 3:10 Doto tsámbara má mbu: Bhú obhuku koko-o, u aye me: doto tsia tsúlu hana. Bhú okoko-o, u aye me: Ebhe tsia kódho 'ngú gba okpála na doto ne ndu 'he inde bhúbhú-o hana. Bhú okoko-o, u aye me: doto dá matá tété de.

ongú bhomu-o, yi mene ne kpéke me lele nadhuku gba yi-e du ndjindji, di ne me Ebhe aú engú na sisiti napa mapa li yi de. Yi mene di me bua yi du ne guo 'ngú kala ani. <sup>15</sup> Yi mbila me 'ndjá bua gba Ebhe-e ngubula me yi sia nedhinga ngú nadji bua yi, amba yi kobho. Ndai ní na mukunda Polo aye bhadi pi yi moko, ne imbilangu maka li Ebhe aha pi ani lie ko. <sup>16</sup> Ani aye bhú ndu obalua gba e hana nedhinga ani ngakpokpo 'ngú lie pindji ongu bhomu-o. Da nambila ta ongu koko inde ani aye e kpekpeke. Okpála inde li imbilangu nde bhú 'ndji o ade, inde di ne kpéke bua ade-e ngakpedhele tata-a makpedhele. U di ngamemene li oli koko inde bhú Bhuku gba Ebhe-e moko. U bhomu-o ngagili kuo ngú o ngao.

*Oeli na soso*

<sup>17</sup> Pi yi ondaise ma na mukunda, yi ambila ongu bhomu-o ambila. Kaka-a, ma apa pi yi me yi bhulu djila yi ngubula me okpála inde ngayala Ebhe-e apite yi ngú nato bhúla yi li pulu kpadji gba o-o de. Yi kpata uo-o, amba yi ayie li kpadji li yi alu lie kpekpeke-e ayie. <sup>18</sup> La-a, yi dhika bha li nakpata Yesu Kilisito inde Ngámá, inde di ne Mukobho gba ní-o, ngubula me ani suno bádha bhú 'bu gba e pi yi ane mane, di ne me yi mbila ani ane mane. A ayo me ndu okpála hana dhogè ani duduma ne duduma. A adu moko.

## Balua na bini gba Djaa Eli na kalanu

Ngbengbe ongu inde li Djaa aye e bhú balua inde-e bhisi: Engú na bini ani aye e, a pindji nato masi bhú okpála inde ngatanga balua gba ani, ngubula me u du bhú makpetse na kukulu bhú dabili bini ne Ebhe, di ne Ndili gba ani Yesu Kilisito, la di ne napa me u lila lio ka nasuno nasisiti inde i ti da nabhele makpetse angoo. Nasuno angoo, alu pi engú inde u ngapa lie me, i du me kpála nde abu 'kpa e li ndu 'ngú hana inde atsia kute kpála-a, ani kólo sisiti. Kaka-a, a ayo nani de me Yesu Ndili gba Ebhe kolo kpála-kuti-e de. Omusuno bhomu adu apa me, a ayo me kpála koto bhú ndu 'ngú hana inde atsia kute-e makoto. U atsia asuno di me, mukobho na duduma tsia engú napa de me kpála du amene bádha 'ngú, ne me ani du ne mukunda pi okpála koko de.

La-a, ngubula napa me engú li okpála bhomu apa e a ko eu-o, Djaa atsia apa mbamba me, Yesu Kilisito nani ne kpála-kuti. Ani atsia apa di me, ndu okpála hana inde abhuka Yesu-o, inde la di ne mukunda pi Ebhe-e, a ayo me u du ne mukunda sunda o.

### **Ongbengbe ongu inde bhú bhuku inde-e ngae inde:**

Eli na kalanu 1:1-4

Zi 'kpi, a la di-e biti 1:5 – 2:29

Ongisi gba Ebhe, a la di-e ongisi gba Djabulu 3:1-24

Ongbili 'ngú, ne pulu 'ngú 4:1-6

Ongu inde a ayo me u ue bhú mukunda 4:7-21

Nabhuka na kpekpeke 5:1-21

*Eli inde ayie agba Ebhe-e, a ko Eli na mukobho*

<sup>1</sup> Ya ngaye balua inde-e pi yi pindji Eli na mukobho. Eli angoo adu nani kala ndu 'ngú hana nayie li lilita. Ya adje Eli angoo. Ya au Eli angoo ne djila ya makpe. Ya atsia ne kpeke djila, ya atsia abu di 'kpa ya tété. <sup>2</sup> Li mukobho angoo apana lie lie, ya au ne djila ya. Kaka-a, ya ngakpokpo 'ngú pi yi tété. Ya la di ngasuno pi yi mukobho na duduma angoo, inde adu nani agba 'Dyi ní, inde apana la di lie pi ya ko. <sup>3</sup> Ya au engú inde-e ne djila ya, ya atsia adje di ne 'dje ya. Ya ngasuno pi yi, amba ngayi di-e, yi kpetse liyi ne ya bhú dabili bini, bhú makpetse inde ya nde bhú e ne 'Dyi ní, la di ne Ndili gba e, Yesu Kilisito ko. <sup>4</sup> Ya ngaye la di engú angoo pi yi, ngubula me ni\* bedhe ne djali.

*Ebhe ne zi 'kpi*

<sup>5</sup> Ngali inde ya adje e ka Yesu Kilisito-o, inde ya asuno la di e pi yi-e ngae inde: Ebhe ne zi 'kpi, biti la di bhú ani belegu ade bini. <sup>6</sup> I du me ní nde apa me: «Ya akpetse liya ne ani bhú dabili bini» me ní nde ngadholo bhú biti-e, amba ní ngapa eu, ní mene la di engú na kukulu de. <sup>7</sup> Engú bini, i du la me ní nde ngadholo li zi 'kpi maka ngaani Ebhe makpe nde lie li zi 'kpi-e, amba ní akpetse liní bhú dabili bini ne ondaise ní akpetse. La di-e, ngute gba Yesu, Ndili gba ani-e, ngavulu ní ne ndu siti 'ngú hana.

<sup>8</sup> I du me ní nde apa me ní mene siti 'ngú de-e, amba ní ngapite liní ngani makpe, kukulu 'ngú la di bhú ní ade. <sup>9</sup> Engú bini, i du me ní nde apandja osisiti 'ngú gba ní-e kala Ebhe-e, ka ani nde lie ne kpála na ngbingbili-e, inde amemene di engú ani apa e-e,

\* 1:4 1:4 Ní: Bhú obhuku koko-o, u a aye me: «Djali gba yi.»



ani 'é osisiti 'ngú angó-o, ani tsia vúlú ní bhú ndu 'ngú hana inde ngbingbili bhú djila ani ade-o. <sup>10</sup> Ɔ du me ní nde apa me ní mene siti 'ngú de-e, amba ní nga'o Ebhe kpála na eu, eli gba ani-e la di bhú ní ade.

## 2

<sup>1</sup> Odi ma, ma ngaye engú inde-e pí yi, amba yi améne siti 'ngú de. Engú bini, i du la me kpála bini nde amene siti 'ngú-o, a ka ní ne kpála inde ngakpokpo 'ngú gba ní-e pí 'Dyi ní. A ko Yesu Kilisito, kpála na ngbingbili-o. <sup>2</sup> Ngaani makpe-e, ani aha nani mukobho gba e ngubula me Ebhe 'e osisiti 'ngú gba ní ko. La-a, a ko bha bini ngubula osisiti 'ngú bhe gba ní-e de. Engú bini, a ko di ngubula osisiti 'ngú gba okpála na pála doto libhomu.

### *Yi lila olíli gba Ebhe-e malila*

<sup>3</sup> Ɔ du la me ní nde ngalila olíli gba Ebhe-e, ní tsia mbíla me ní mbíla Ebhe hana. <sup>4</sup> Li kpála pa me ni mbíla Ebhe hana, engú bini, i du la me kpála angó-o nde lila olíli gba ani-e de-e, amba a ko kpála na eu, kukulú 'ngú la di bhú ani ade. <sup>5</sup> Engú bini, kpála bhende ngalila 'li Ebhe ndjindji-e, a ko kpála bhende akunda Ebhe kukulú. A bhomu-o engú inde ní ambíla ka e me ní akpètse líni bhú dabilí bini ne Ebhe-o. <sup>6</sup> Kpála bhende ngapa me ni akpètse líni bhú dabilí bini ne Ebhe-e, a ayo me mukobho gba kpála angó-o du di maka bhende gba Yesu adu nani lie ko.

<sup>7</sup> Ondaise ma na mukunda, líli inde ma ngaye e pí yi inde-e, a ko líli na mbia de. Engú bini, a ko líli na didili. Yi asia nani líli angó-o

nayie lí lilita.\* Líli na didili angó-o, a ko eli inde yi adje e-o. <sup>8</sup> La-a, ma ngaye pí yi inde-e líli na mbia. Kukulú 'ngú na líli angó-o ngau lie bhú Yesu, la di ne bhú yi. Padhá de, anga bití aholo nandjia aholo, zi 'kpí na kukulú-o aholo la di nasu aholo.

<sup>9</sup> Kpála bhende ngapa me ni bha ndju lí zi 'kpí me ani nde ngayala ndai e-e, kpála angó-o nga bha ngadu bhú bití. <sup>10</sup> Kpála bhende ngakunda ndai e-e, kpála angó-o ngadu lí zi 'kpí. Kaka-a, engú inde i tí da nato kpála koko bhú siti 'ngú-o bhú ani belegu ade bini. <sup>11</sup> Engú bini, kpála bhende ngayala ndai e-e, kpála angó-o ngadu bhú bití. Ani ngadholo bhú bití, ani mbíla la di de me ní adji ne su-oie de, anga bití anini djila ani manini.

### *Yi lila líyi ka ongú na doto malila*

<sup>12</sup> Odi ma, ma ngaye engú inde-e pí yi,

anga ka 'li Kilisito-o, Ebhe a'e siti 'ngú gba yi-e a'e.

<sup>13</sup> Odyi ma, ma ngaye engú inde-e pí yi,

anga kpála inde adu nani kala ndu 'ngú hana nayie lí lilita-a, yi mbíla ani hana.

Omakombise, ma ngaye engú inde-e pí yi,

anga yi aha angu Siti aha.

<sup>14</sup> Odi ma, ma aye engú inde-e pí yi.

Padhá de, anga yi mbíla 'Dyi ní hana.

Odyi ma, ma aye engú inde-e pí yi,

anga kpála inde adu nani kala ndu 'ngú hana nayie lí lilita-a, yi mbíla ani hana.

Omakombise, ma aye engú inde-e pí yi, anga yi ne angu bhú nabhuka .

\* 2:7 2:7 Nayie lí lilita: A ko nayie lí nedhinga inde u adje nani 'li Ebhe lie ko. Tsia bhú 1 Djaa. 2:24, 3:11, di ne bhú 2 Djaa. 1:5.

La di-e, 'li Ebhe ngadu bhú yi, yi atsia aha la di angu Siti.

<sup>15</sup> Kaka-a, yi akúnda doto inde-e de. Yi akúnda di oehe inde bhúbhú-o belegu de bini. Li kpála kunda doto-o, amba ani kunda 'Dyi ní Ebhe de. <sup>16</sup> Padhá de, anga ndu oehe na doto-o hana maka: gumu na sisiti inde bhú kpála, gumu nasia ndu 'he hana inde li djila ngau e, a la di-e, nadu ne 'ngbé 'ndji ka otia na doto, ndu 'he bhomu-o hana ngayie ka 'Dyi ní Ebhe ade. Engú bini, a ko ndu 'he na doto. <sup>17</sup> La-a, doto ngakodho 'kpí, di ne ndu 'he inde bhúbhú-o hana. Engú la bini, kpála bhende ngamene engú li Ebhe akunda e, ani ngadu bhú mukobho dadama ne dadama.

*Yi lila liyi ka obhulu yala gba Kilisito malila*

<sup>18</sup> Odi ma, sokpi-e akolo masakpe! Yi adje nani engú inde u apa e adje. U apa nani me: «A ayo me bhulu yala gba Kilisito-o go.» Mbia inde-e, obhulu yala gba Kilisito aze bhibhiti. Kaka-a, ní ngambila me sokpi-e akolo masakpe. <sup>19</sup> Okpála angoo ayie bhú ká ní. Padhá de, anga a ko nani okpála ka ní de. I dú me u dú nani ne okpála ka ní-e, u de adu ne ní bhú dabili bini. Engú bini, u ayie bhú ká ní, mbia inde-e, a au lie mbámbá me ndu okpála bhomu-o hana, a ko nani naao okpála ka ní de.

<sup>20</sup> La pi yi-e, yi asia nani naayi Bua gba Ebhe. A atuko Bua angoo pi yi ne Kpála na bubu. Kaka-a, yi ambila engú na kukulu-o ndu yi hana. <sup>21</sup> Engú inde ma aye e pi yi-e, a ko de ka me yi mbila engú na kukulu de-e de. Engú bini, ma aye pi yi anga yi mbila engú na kukulu-o hana. La di-e, eu ti da nakoto bhú engú inde kukulu-o belegu de bini.

<sup>22</sup> Kpála na eu-o, a ko da? A ko kpála bhende ngapa me Yesu ne Kilisito ade ko. Kpála angoo, a ko bhulu yala gba Kilisito. Ani ayala Ebhe, ani atsia ayala di Ndili gba ani-o. <sup>23</sup> Padhá de, anga kpála bhende ayala Ndili-e, ani ayala di bhomu-o 'Dyi ani. Kpála bhende ngapa 'ngú gba Ndili-e mbámbá-a, ani ngapa di bhomu-o engú gba 'Dyi ani.

<sup>24</sup> Kaka-a, eli inde yi adje nani e nayie li lilita-a, a ayo me asi kuti e li bua yi. Padhá de, anga i du me eli inde yi adje nani e nayie li lilita-a nde asi kuti e li bua yi-e, ngayi di-e, yi dú ne Ndili-e kpála bini, yi tsia dú la di ne 'Dyi ani kpála bini. <sup>25</sup> A bhomu-o ehe inde li Kilisito apa nani me ni ahá e pi ní-e, a ko mukobho na dadama.

<sup>26</sup> Ma aye engú inde-e pi yi pindji obhende ngagili napite yi ko. <sup>27</sup> Engú bini ngayi-e, Kilisito atuko Bua gba e pi yi. Bua angoo ngadu bhú yi. Kaka-a, yi matá ne gumu musuno koko ade. Padhá de, anga Bu Bhobua ngasuno ndu 'ngú pi yi hana. La di-e, engú inde ani ngasuno e, a ko kukulu 'ngú, a ko eu de. Kaka-a, yi du bhú Kilisito maka li Bu Bhobua asuno lie pi yi ko.

<sup>28</sup> A moko odi ma, yi du bhú Kilisito, amba nedhinga inde ani akoto lie, ní adú ne tsulu de, ní adú kala ani ne numu de. <sup>29</sup> Yi mbila ndjindji me Kilisito ngbingbili. Kaka-a, ayo me yi mbila la di me ndu kpála hana inde ngamene engú na ngbingbili-e, kpála angoo, Ebhe azu ani ngae.

### 3

*Engú inde asuno me ongisi gba Ebhe-e kpi ne obhende gba Djabulu-o*

<sup>1</sup> Yi tsia nga maka li 'Dyi ní asuno mukunda gba e pi ní lie-o. Mukunda angoo, a ko me ní asia

'ili me ní ne ongisi gba Ebhe. Ní la bhadi mo-o na paká! Kaka-a, okpála na doto mbila ní de, anga u mbila di nani Ebhe de. <sup>2</sup> Ondaise ma na mukunda, mbia inde-e, ní ne ongisi gba Ebhe. Engú la bini, lele maka ní adú lie, asuno nga lie mbámbá de. La-a, ní ngambila me, nedhinga inde li Kilisito akólo lie, ní adú maka ani. Padhá de, anga ní aú ani maka ani nde lie-o. <sup>3</sup> Kaka-a, kpála ne kpála inde nga'o 'to e 'to ani-e, nga'o lie bubu maka ani nde lie bubu ko.

<sup>4</sup> Ndú okpála hana inde ngamene siti 'ngú-o, ngagumu líli gba Ebhe. Padhá de, anga siti 'ngú, a ko nagumu líli. <sup>5</sup> Engú bini, yi mbila hana me Yesu Kilisito ago ngubula na'e ongú na sisiti. La di-e, siti 'ngú bhú ani belegu ade bini. <sup>6</sup> A moko, kpála inde ngadu me ani nde bhú Yesu-o, ani memene siti 'ngú de. La-a, kpála inde amemene siti 'ngú-o, kpála ang-o u nga ani de. Ani mbila la di ani de.

<sup>7</sup> Odi ma, a ayo de me kpála bini pite yi-e de! Kpála inde ngamene ngbili 'ngú, ngaani makpe-e, ani ngbingbili maka li Yesu Kilisito nde lie ngbingbili ko. <sup>8</sup> Kpála bhende adhedhe li namene siti 'ngú-o, a ko kpála ka Djabulu. Padhá de, anga nayie bha bini ali lilita-a, Djabulu bha naae ne kpála na siti 'ngú. Ta nago ka Ndili gba Ebhe-e ngae inde: ani ago ngubula nabhelo okulu gba Djabulu-o.

<sup>9</sup> Kpála bhende li Ebhe azu e ngae, ani dhédhe matá li siti 'ngú belegu de bini. Padhá de, anga nguwa\* inde ngayie ka Ebhe-e, ngadu bhú kpála ang-o ko. Ani ti da nadhedhe matá li siti 'ngú belegu de bini, anga Ebhe azu ani ngae. <sup>10</sup> Engú inde-e ngag-bogbo bhusu ongisi gba Ebhe ne

obhende gba Djabulu-o ngae inde: ndu kpála hana inde i mene 'ngú na ngbingbili de-e, inde i kunda la di ndai e de-e, a ko ndili ka Ebhe de.

*Ní dū ne mukunda sūnda ní*

<sup>11</sup> Engú inde yi adje nani e nayie li lilita-a, ngae inde: a ayo me ní dū ne mukunda sūnda ní. <sup>12</sup> Ní adú maka Kaina de, inde adu nani kpála gba Siti-o. La di-e, ani abhelo ndai e. Ani abhelo la nani ani ngubula ní? Ani abhelo ani anga okulu bhende gba ani-e adu nani sisiti. Engú bini, obhende gba ndai ani atsia adu nani ngbingbili. <sup>13</sup> Ondaise ma, i dū me okpála na doto inde-e nde ngayala yi-e, yi angamba de. <sup>14</sup> Engú bini nganí-e, ní ambila me ní ayie bhú kuo, ngú nali bhú mukobho, anga ní ngakunda ondaise ní. Kpála bhende li mukunda nde bhú e ade-e, ani ngadu nga bha bhú kuo.

<sup>15</sup> Ndú kpála hana inde ngayala ndai e-e, a ko bhulu nabhelo kpála. Yi mbila la di ndjindji me bhulu nabhelo kpála bini ade inde ne mukobho na duduama bhú e. <sup>16</sup> Mukunda-a, a ko ní? Ní ngambila mukunda li ehe inde: Yesu Kilisito aha nani mukobho gba e pi ní. Kaka-a, ngani di-e, a ayo me ní ha mukobho gba ní-e pi ondaise ní. <sup>17</sup> Ní pa nga me, kpála bini inde ka e ne oehe, ani au ndai e inde li ehe nde ka e ade, la-a, ani dje ndjinga ani de. Lele pi u ti da napa lie me kpála ang-o akunda Ebhe-e? <sup>18</sup> Odi ma, a ayo de me ní dū bha napa 'ngú na mukunda ne babadha eli-e de. Engú bini, a ayo me ni suno bhú kulu, di ne bhú engú na kukulu.

*Ní adú kala Ebhe ne tsulu de*

<sup>19</sup> A bhomu-o engú inde ní ambila ka e me ní bhú kukulu 'ngú ko. La di-e, li bua ní tsia dú guguu kala Ebhe. <sup>20</sup> Padhá

\* 3:9 3:9 Nguwa: Nguwa gba Ebhe-e, a ko Bu Bhobua.

de, anga i du me bua ní nde ngapa pi ní me ní ne engú-o, ní ngambila ndjindji me Ebhe-e, ani ngbéngbé ane bua ní mane. La di-e, ani ambila ndu 'ngú hana má kpekebhe! <sup>21</sup> Ondaise ma na mukunda, i du me bua ní nde apa me ní ne engú ade-e, ní dú kala Ebhe ne tsulu de. <sup>22</sup> Ní ngasia 'he inde ní ngayo e ka anie, anga ní ngalila olíli gba ani, ní la di ngamene engú inde ani akunda e-o. <sup>23</sup> Líli gba ani inde ani aha e pi ní-e ngae inde: a ayo me ní bhuka 'li Ndili gba ani Yesu Kilisito. A ayo la di me ní du ne mukunda sunda ní maka lí Kilisito aha líli lie pi ní ko. <sup>24</sup> Kpála bhende ngalila olíli gba Ebhe-e, kpála ango-o ngadu bhú Ebhe, Ebhe ngadu la di bhú ani. A inde-e engú inde ní ngambila ka e me Ebhe ngadu bhú ní-o: ní ngambimbila lí Bu Bhobua inde lí Ebhe aha e pi ní-o.

#### 4

*Yi gbo bhusu Bua na kukulu 'ngú ne bua na eu*

<sup>1</sup> Ondaise ma na mukunda, yi abhúka ndu okpála hana bhende ngapa me a bhú o ne Bua gba Ebhe-e de. Engú bini, yi le ngaiza uo kalanu-o male, amba yi mbila ne me bua inde bhú uo-o, ayie ka Ebhe na paká. Padhá de, anga opolofeta na eu, aya naali píla doto. <sup>2</sup> Ehe inde yi ambíla Bua gba Ebhe-e ka e, a ngae inde: kpála ne kpála bhende ngapa me Yesu Kilisito ago nani bhú kute na kpála-kuti na paká-a, kpála ango-o, a bhú ani ne Bua bhende ayie ka Ebhe. <sup>3</sup> La-a, kpála bhende ngapa me Yesu Kilisito go bhú kute na kpála-kuti de-e, kpála ango-o, bua bhende bhú ani-e, ayie ka Ebhe de. Engú bini, bua bhende bhú kpála ango-o, a ko

mangbo bhende gba bhulu yala gba Kilisito ko. Yi adje nani adje me, a ayo me bhulu yala gba Kilisito go. Mbía inde-e, ani píla doto.

<sup>4</sup> Engú bini, odi ma, ngayie, yi naayi ne okpála gba Ebhe. Yi aha angu opolofeta na eu-o aha. Padhá de, anga Bua bhende bhú yi-e ne angu naali ane bua bhende bhú okpála na doto-o mane. <sup>5</sup> Opolofeta ango-o, a ko okpála na doto. U ngakpo la bhadi engú na doto. Kaka-a, okpála na doto ngadje uo ndjindji. <sup>6</sup> Engú bini, nganí-e, ní ne okpála gba Ebhe. Kpála bhende ambila Ebhe-e ngadje ní ndjindji. Kpála bhende naae ne kpála gba Ebhe ade-e, ani djé ní de. A bhomu-o engú inde ní ngambila Bua na kukulu 'ngú di ne bua na eu-o ka e ko.

*Ebhe-e, a ko mukunda*

<sup>7</sup> Ondaise ma na mukunda, ní du ne mukunda sunda ní, anga mukunda ayie ka Ebhe. Kpála bhende ne mukunda bhú e-e, Ebhe azu ani ngae, ani mbila la di Ebhe hana. <sup>8</sup> Kpála bhende lí mukunda nde bhú e ade-e, ani mbila Ebhe de, anga Ebhe-e, a ko mukunda. <sup>9</sup> Lele maka lí Ebhe asuno mukunda gba e lie pi ní-e ngae inde: ani atima koli Ndili gba e bini píla doto, ngubula me ní du bhú mukobho ka ani. <sup>10</sup> Lele maka lí mukunda nde lie ngae inde: ní kunda nani Ebhe nganí de, engú bini, ani akunda mangbo nani ní ngae, ani atsia atima Ndili gba e pi ní maka tia mangimbo, ngubula na'e osisiti 'ngú gba ní ko.

<sup>11</sup> Ondaise ma na mukunda, i du me Ebhe nde akunda ní naali mo-o, nganí di-e, a ayo me ní du ne mukunda sunda ní. <sup>12</sup> Kpála u nga Ebhe belegu de bini. I du me ní nde ne mukunda sunda ní-e, amba Ebhe ngadu bhú ní. La

di-e, mukunda gba ani inde bhú ní-e bedhe má kpambi!

<sup>13</sup> Ehe inde ní ngambila ka e me ní ngadu bhú Ebhe, Ebhe la di ngadu bhú ní-e, a ngae inde: Ebhe aha Bua gba e pi ní. <sup>14</sup> 'Dyi ní atima Ndili gba e ngubula nadu Mukobho gba okpála. Ní au, ní la di ngakpokpo 'ngú tété. <sup>15</sup> Kpála ne kpála inde apa mbámbá me Yesu ne Ndili gba Ebhe-e, Ebhe ngadu bhú kpála ango-o. Kpála ango-o la di ngadu bhú Ebhe. <sup>16</sup> La di nganí-e, ní ngambila mukunda inde li Ebhe nde ne e pi ní-o. Ní atisia abhuka la di mukunda ango-o ko. Ebhe-e, a ko mukunda. Kpála bhende ngadu bhú mukunda-a, ngadu bhú Ebhe, Ebhe la di ngadu bhú ani.

<sup>17</sup> I du me mukunda inde bhú ní-e nde bedhe-e, ní dú ne tsulu li ekpi inde li Ebhe akódho 'ngú gba okpála lie de. Padhá de, anga pila doto inde-e, mukobho gba ní-e mana lie ne bhende gba Ebhe ko. <sup>18</sup> Tsulu bhú mukunda ade, anga li mukunda du bedhe-e, a nga'e tsulu hana. A moko, kpála bhende ngadje tsulu-o, a pa me mukunda gba ani-e kolo nga bedhe de. Padhá de, anga kpála bhende ngadje tsulu-o, abhú ani ne mabhundja me u améne ni sisiti.

<sup>19</sup> Engú bini, nganí-e, ní sunda ní ne mukunda, anga Ebhe akunda ngaiza ní kalanu ngae. <sup>20</sup> I du me kpála bini nde apa me: «Ma akunda Ebhe», ani nde la ngayala ndai e-e, amba kpála ango-o ne bhulu eu. Padhá de, anga ani ti da nakunda Ebhe inde ani u e de-e de, i du me ani nde kunda ngaiza ndai e inde ani nde ngau e mau-o de ko. <sup>21</sup> Lili inde li Kilisito aha e pi ní-e ngae inde:

kpála inde akunda Ebhe-e, a ayo me ani kunda di ndai e.

## 5

*A ti da naha angu engú na doto da?*

<sup>1</sup> Ndu kpála hana inde ngabhuka me Yesu ne Kilisito-o, Ebhe azu kpála ango-o ngae. La di-e, kpála inde ngakunda Ebhe inde azu kpála bhomu-o, ani ngakunda bhadi ongisi inde li Ebhe azu o moko. <sup>2</sup> Ehe inde ní ambila ka e me ní ngakunda ongisi gba Ebhe-e ngae inde: a ko nakunda Ebhe, di ne namene olili gba ani ko. <sup>3</sup> A moko, lele nakunda Ebhe-e ngae inde: a ko namene olili gba ani-o. La di-e, olili gba ani-e pi ní kpekpeke ade. <sup>4</sup> Padhá de, anga ndu kpála hana inde li Ebhe azu e, ani aha angu engú na doto aha. Nabhuka gba ní-e ngaha angu pi ní ngú naha angu engú na doto ngae. <sup>5</sup> A ti da naha angu engú na doto da? A ko bha bini kpála bhende abhuka me Yesu ne Ndili gba Ebhe.

*Nakpokpo 'ngú pindji Yesu Kilisito*

<sup>6</sup> Yesu Kilisito, a ko kpála inde nani ago-o. Ani ago nani ne engu di ne ngute\* Ani go bha bini ne engu de, engú bini, ani ago ne engu di ne ngute. La di-e, Bua gba Ebhe-e ngakpokpo 'ngú gba ani-e ngae, anga Bua gba Ebhe-e, a ko kakulu 'ngú. <sup>7</sup> A ngakpokpo 'ngú tété ne oehe bata: <sup>8</sup> a ko Bu Bhobua, a ko engu, a la di-e ngute. Ndundu bata hana aziba ne bua bini.

<sup>9</sup> Ní ziziba engú inde li okpála ngakpokpo e ndjindji. La-a, engú bhende li Ebhe akpokpo e ngae-e, ane bhende gba okpála-a mane. A bhomu-o engú bhende li Ebhe akpokpo e pindji Ndili gba e-o.

\* 5:6 5:6 Engu di ne ngute: Bhelé na okpála ngabhundja me engu-o, a ko batisimo gba Yesu-o, ngute-e, a ko nakpi gba ani-o.

<sup>10</sup> A na paká me kpála bhende abhuka Ndili gba Ebhe-e, kpála ang-o asia engú inde akpokpo lie bhomu-o li bua e makpe asia. Engú bini, kpála bhende i bhuka Ebhe de-e, kpála ang-o nga'o Ebhe bhulu eu. Padhá de, anga engú inde li Ebhe akpo e pindji Ndili gba e, kpála ang-o bhuka naae de. <sup>11</sup> Engú ang-o ngae inde: Ebhe aha nani mukobho na duduma pi ní, mukobho ang-o la bhú Ndili gba ani ko. <sup>12</sup> Kpála bhende li Ndili-e nde bhú e, abhú kpála ang-o ne mukobho. Engú bini, kpála bhende li Ndili gba Ebhe-e nde bhú e ade-e, mukobho bhú kpála ang-o ade.

*Engú pindji mukobho na duduma*

<sup>13</sup> Ma aye balua inde-e pi yi, ngayi okpála bhende abhuka 'li Ndili gba Ebhe-o. Ma aye pi yi, amba yi mbila me yi asia mukobho na duduma asia. <sup>14</sup> Engú ní nde lie ne tsulu kala Ebhe belegu ade bini-e ngae inde: ní ngambila ndjindji me, i du me ní nde ayo 'he ka ani maka ani ngakukunda lie, ani djé ní. <sup>15</sup> I du la me ní nde ambila me ani ngadje ní bhú ndu mayo gba ní-e hana-a, ní ambila di ndjindji me ní asia 'he inde ní ayo e ka ani-e asia.

<sup>16</sup> I du me kpála bini nde au ndai e ngamene siti 'ngú-o, li siti 'ngú ang-o du bhende i tó ani bhú kuo de-e, a ayo me ani yo Ebhe ngú ani, amba kpála na siti 'ngú ang-o sia mukobho. Bhob-homu ndjindji pi kpála bhende ngamene siti 'ngú inde i tó ani bhú kuo de ko. Engú bini, a ne siti 'ngú inde ató kpála bhú kuo, ma pa de me u yo Ebhe ngú bhende bhomu-o de. <sup>17</sup> Ndu 'ngú hana inde ngbingbili bhú djila Ebhe ade-e, a ko siti 'ngú. La-a, ndu 'ngú hana toto kpála bhú kuo de.

<sup>18</sup> Ní ngambila ndjindji me kpála inde li Ebhe azu e ngae dhedhedhe li namene siti 'ngú belegu de bini. Padhá de, anga Yesu Ndili gba Ebhe-e ngalila ani ngae, la di-e, Siti ti da namene 'he ngú ani belegu de bini.

<sup>19</sup> Ní ambila me ní naaní ne okpála gba Ebhe, engú la bini, doto libhomu sa 'kpa Siti.

<sup>20</sup> Ní ambila me Ndili gba Ebhe-e ago, ani atsia aha imbilangu pi ní, amba ní mbila Ebhe na kukulu-o. Ní akpøtø liní ne Ebhe na kukulu-o, li pápá gba Ndili gba ani Yesu Kilisito. Ngaani-e, a ko Ebhe na kukulu, a ko la di mukobho na duduma.

<sup>21</sup> Odi ma, yi lila liyi ka oebhe na eu-o ndjindji.

## Balua na bhisi gba Djaa Eli na kalanu

Bhele kpála Djaa , aye nani balua gba e na bhisi pi elø bini ne ongisi gba e. A mana mugito me, u aye pi Dadjua gba Ebhe inde u adu ayo Ebhe bhú e ne okpála inde bhúbhú. Engú na ndundu inde adu bhúbhú-o, a ko bha me u du ne mukunda sunda o. Ani atsia apa me u lila lio ka omusuno na eu, ne nasuno gba o-o.

### Ongbengbe ongú inde bhú bhuku inde-e ngae inde:

Eli na kalanu 1-3

Engú na kalanu inde a ayo me mukunda mene e 4-6

Nalila lio ka nasuno na eu 7-11

Eli na soso 12-13

### Djaa yi okpála inde li Ebhe abhu o-o mayi

<sup>1</sup> Ngama, Bhele Kpála , ma ngaye balua inde-e pi yi, Ohi ní,\* ngamã kpála inde li Ebhe abhu e di ne ongisi gba e inde ma ngakunda o na kukulu-o. Ma ngakunda bha yi ngama kpi ma kpi ade, ndu okpála hana inde ambila kukulu 'ngú-o akunda bhadi yi moko. <sup>2</sup> Padhá de, anga a ngadu bhú ní ne engú na kukulu. La di-e, kukulu 'ngú ango-o adú bhú dabili bini ne ní ndu 'kpi hana.

<sup>3</sup> A ayo me Ebhe 'Dyi ní, di ne Yesu Kilisito , Ndili gba 'Dyi ní-e, bhú mukunda di ne kukulu 'ngú gba o-o, suno bádha bhú 'bu pi ní, u dje ndjinga ní, amba u ha la di guo 'ngú pi ní.

\* 1:1 1:1 Ohi ní: Okpála bhelé ngabhundja me Ohi ní inde si-e, a ko Piga gba Ebhe, ongisi gba ani-e, a ko omabhuka. † 1:5 1:5 Nayie li lilita: A ko nayie li nedhinga inde u adje nani 'li Ebhe lie ko. Tsia bhú lukuluku 6, di ne bhú 1 Dja. 2:7, 24, 3:11.

### Engú pindji engú na kukulu di ne mukunda

<sup>4</sup> Ma akpi djali naali, anga ma abhaka ongisi koko gba mu-o ngadhola bhú engú na kukulu, maka líli inde ní asia e ka 'Dyi ní ko. <sup>5</sup> Pi mbia inde-e, Ohi ní, engú inde ma ngayo e ka mu-o, a ngae inde: ní du ne mukunda sunda ní. A ko de me ma ngaye pi mu líli na mbia de, a ko líli inde ní asia e nayie bha bini li lilita† ko. <sup>6</sup> Lele li mukunda nde lie ngae inde: a ko namene olíli gba Ebhe-o. La di-e, líli ango-o, a ko bha bhende yi adje nani e nayie li lilita me, a ayo me yi du bhú mukunda.

### Yi lila liyi ka okpála napite okpála-a malila

<sup>7</sup> Okpála bhelé inde ngapite okpála atsambala ne bilí ngangá píla doto. U ziba naao de me Yesu Kilisito ago nani bhú kate na kpála-kuti-e de. Kpála inde ngapa mo-o, a ko bhulu napite okpála, a ko la di bhulu yala gba Kilisito. <sup>8</sup> 'E-e! Yi lila liyi ngayi makpe-e ndjindji, ngubula me yi anéke makalá na kulu gba ya-a de. Engú bini, a ayo me yi sia makalá-a libhomu.

<sup>9</sup> Kpála ne kpála inde i lila nasuno inde u aha e pi yi pindji Kilisito de-e, inde i nga'o la di engú koko pépé-e, kpála ango-o bhú Ebhe ade. Kpála inde la ngalila nasuno ango-o, kpála ango-o ngadu bhú 'Dyi Ndili-o, di ne Ndili-o. <sup>10</sup> I du me kpála nde ago, ani suno la di pi yi engú koko kpi-e, yi asia ani agba yi de, yi abhia di kúo li ani de. <sup>11</sup> Padhá de, anga kpála inde abhia kúo li ani-e, a asuno bhomu-o me u akpøtø lio ne ani bhú osisiti 'ngú gba ani-o.

<sup>12</sup> Ma ne engú bhelé ngú napapa pi yi. La-a, ma kúnda nayeye maye de, anga ma ne 'to ma 'to nanu agba yi oo, ngubula me ní gama 'ngú ne yi me ní nde ngau liní mau, amba ní kpi djali ndjindji.

<sup>13</sup> Ongisi gba Ndai mu na Өөлө, kpála inde li Ebhe abhu e-e† apa me, o yi mu mayi.

---

† **1:13** 1:13 Ongisi gba Ndai mu na Өөлө li Ebhe abhu e-o: A akunda napa me omabhuka na Dadjua na Ebhe li Dja adu nadu lie-o.



## Balua na bata gba Djaa Eli na kalanu

Bhele kpála Djaa , aye balua inde-e pi bhele kpála natsia 'kpí li Dadjua gba Ebhe inde 'lì e me Gaiusi. Djaa adu agama 'ngú gba ani-e ndjindji, anga ani adu asia omakilisito inde adu ago agba ani-e ndjindji-e naali. Ani atsia a ayo ka ani me, ani lila li e ka bhoko bini inde a du 'lì e me Diotelefe malila.

**Ongbengbe ongú inde bhú bhuku inde-e ngae inde:**

Eli na kalanu 1-4

Nakpo 'ngú ndjindji li kute

Gaiusi 5-8

Na'o 'ngú pindji Diotelefe 9-10

Na'o 'ngú pindji Demetiliusi 11-12

Eli na soso 13-15

*Djaa yi Gaiusi mayi*

<sup>1</sup> Ngama, Bhele Kpála , ma ngaye balua inde-e pi mu Gaiusi, ngamu ndai ma na mukunda, inde ma kunda e kukulu-o.

<sup>2</sup> Ndai ma na mukunda, gumu gba ma me ndu 'ngú gba mu-o hana dholo ndjindji, mu du ne kute na angu, maka mu nde lie ne angu li bua mu ko.

*Gaiusi ngadholo bhú engú na kukulu*

<sup>3</sup> Ma akpi nako djali naali, anga li nedhinga inde li ondaise ní ago lie, u akpokpo muma me mu ngamene engú na kukulu. A moko, mu ngadholo bhú engú na kukulu. <sup>4</sup> Ehe inde la ngaha djali muma ane ndu ongú koko hana-a, a ko naje me ongisi gba ma-a ngadholo bhú engú na kukulu.

<sup>5</sup> Ndai ma na mukunda, mu ngamene engú inde na babadha pi ondaise ní, belegu di ne pi

obhende mu mbila o de-o. <sup>6</sup> U akpokpo engú na mukunda gba mu-o kala okpála na Piga gba Ebhe. Mene 'he inde ndjindji bhú djila Ebhe, ne naha ehe inde atéteke uo li kpadji-e pi uo. <sup>7</sup> Padhá de, anga u ngadholo ngubula 'li Kilisito . La di-e, u ti da nasia 'he ka omupagano belegu de bini. <sup>8</sup> Kaka-a, a ayo me nganí makpe-e, ní teteke ngua okpála bhomu-o nganí, amba ní kpetse di liní ne uo ngú nakpokpo 'ngú na kukulu.

*Engú pindji Diotelefe ngauo ne Demetiliusi*

<sup>9</sup> Ma aye nako mboye balua pi okpála na Dadjua gba Ebhe. Engú bini, Diotelefe, kpála inde akunda naae me bhú ndu 'ngú hana u dje bha ni-e, atsia au engú angu-o bhú djila e padhá. <sup>10</sup> Kaka-a, ma agó lie, ma ambamba ta engú na sisiti inde ani ngamene e-o. Ani ngapa ongú na sisiti di ne eu li kute ya. Engú bini, ani pise bha bini li bhende bhomu-o de, ani ngayala nasia ondaise ní. Ani ngapa la di pi obhende ngakunda nasia uo me u mene mo-o, ni pándja uo bhú Piga gba Ebhe-o.

<sup>11</sup> Ndai ma na mukunda, mo oméne 'ngú maka okpála na sisiti de. Engú bini, mene mangbo engú maka okpála na babadha. Kpála bhende ngamene bádha 'ngú-o, a ko kpála gba Ebhe. Kpála bhende ngamene siti 'ngú-o, kpála bhomu-o mbila Ebhe de.

<sup>12</sup> Ndu okpála hana ngakpo 'ngú pindji Demetiliusi ndjindji. La di-e, engú na kukulu ngae makpe ngakpokpo 'ngú gba ani-o. Nganí di-e, ní bhadi ngakpokpo 'ngú gba ani-e moko. Mu ngambila la di me engú inde ní ngakpokpo e, a ko kukulu 'ngú.

<sup>13</sup> Ma ne ongú bhelé napapa pi mu. La-a, ma kunda nayeye maye de, <sup>14</sup> anga ma akunda nau mu má

gala, amba ní gama 'ngú me ní  
nde ngau liní mau.

<sup>15</sup> A ayo me guo 'ngú du bhú  
dabili bini ne mụ! Ondaise ní inde  
ei-e apa me, o yi mụ mayi. Pa la  
di pi ondaise ní inde oo me, ya yi  
kpála bini ne bini mayi.

## Balua gba Djude Eli na kalanu

Djude aye nani balua inde-e ngubula napa me, omabhuka lila lio ka omusuno na eu inde adu apa me ni ne omabhuka-a malila. Bhú ndu balua inde-e, ongu inde bhúbhú-o, maka bhende bhú balua na bhisi gba Piele-o. Djude ngato masi bhú okpála inde ngatanga me, u gu gbele ngubula nabhuka inde li Ebhe aha nani e pi okpála gba e ngubula ndu 'kpí hana-o.

### Ongbengbe ongu inde bhú bhuku inde-e ngae inde:

Eli na kalanu 1-2

Dasundu, ne nasuno, a la di-e likabhu gba omusuno na eu 3-16

Lili ngubula nalila nabhuka 17-23

Bisagu 24-25

### *Djude yi omabhuka mayi*

<sup>1</sup> Ma aye balua inde-e ngama Djude. Ma ne bali gba Yesu Kilisito, ma la di ne ndai Djaki. Ma aye balua inde-e pi okpála inde li Ebhe, 'Dyi ní a'i o-o. Aní ne mukunda pi uo, aní di ngalila uo bhú 'bu Yesu Kilisito. <sup>2</sup> A ayo me Ebhe dje ndjinga yi, aní ha guo 'ngú pi yi, amba aní bedhe yi ne mukunda gba e ane mane.

*Yi lila liyi ka omusuno na eu-o malila*

<sup>3</sup> Ondaise ma na mukunda, ma adu nako ne gumu naali me ma ye balua pi yi pindji mukobho inde ngakpøtø ndu ní hana-o. La mbia inde-e, ma au ndjindji me ma ye balua pi yi ngú nato masi bhú yi me yi gu gbele ngú nabhuka

inde li Ebhe aha e pi omaha e-o. Nabhuka ango-o dji galikpe lie belegu de bini. <sup>4</sup> Padhá de, anga okpála koko bhú ká yi sisiti, u ali bhú ká yi bhú pepe. U ngadji ta bádha bhú 'bu gba Ebhe gba ní-e ngú nasia kpadji me o mene ndu osisiti 'ngú inde u akunda e hana. U bhomu-o ngayala koli Musuno inde di Ngámá gba ní Yesu Kilisito-o. Okpála ango-o, u aye nani mangimbo gba uo-o bhú Bhuku gba Ebhe-e bhutode.

<sup>5</sup> Belegu yi ambila nani ndu ongu inde-e lie hana didili-e, ma akunda matá napapa pi yi ne toto me, Ebhe Ngámá gba ní-e agbegbe nani okpála na Isalaele bhú bali bhú doto na Edjipeto agbegbe. Aní atsia abhili obhende i bhuka aní de-o. <sup>6</sup> Yi kina nga me oandjelu inde i lila nani kulu gba o-o de-e, inde a'o ká dabili gba o-o, Ebhe agbigbite uo ne gbindjili na duduama, aní atsia abu uo li bili na biti bhe má ndundulundu ngú nadjeko 'ngbé 'kpí nakodho mangimbo gba okpála-o. <sup>7</sup> Yi kina nga me okpála na Sodomu ne Gomolo di ne ogudhu koko na ngo ogudhu bhomu-o amene bhadi nani siti 'ngú maka oandjelu bhomu. U adu amene 'ngú na sisiti inde li kpála-kuti ti da namene e de. Kaka-a, u naki ngazu likabhu bhú djua na duduama ngú nasuno pi okpála me, a ayo namene ngua siti 'ngú bhomu-o de.

<sup>8</sup> Okpála na sisiti inde ali bhú ká yi bhomu-o bhadi ngamene ngua siti 'ngú bhomu-o moko. Ka 'ngú na ngingi inde bhú 'ndji uo-o, u ngasiti kate o. U kunda de me Ebhe u ngámá pí 'dji o-o de. U manga la di oandjelu inde li o ne zizi-e\* de. <sup>9</sup> La-a, belegu Mikaele ngámá gba oandjelu-

\* 1:8 1:8 Oandjelu inde li o ne zizi: A akunda napa me oandjelu inde ngamanga 'li Ebhe.

o mene nani mo-o de. Bhú nagbe bhayiki gba uo ne Djabulu-o, u adu amene kpeke 'bhø lie ngabula kuo Moidje-e, Mikaele pa 'ngú na nũmu li kate djabulu de. Engú bini ani apa bha pi ani me: «Ebhe mene bhado mu sisiti!»† <sup>10</sup> Engú bini, okpála na sisiti inde bhú ká yi-e, ngagama 'ngú sisiti li kate engú bhende u mbila e de. Uo maka onu abhú bili, u ngabhuhundja ade. U ngamene bha bini engú bhende akoto bhú 'ndji o. Engú ango-o la ngabhili uo ngae.

<sup>11</sup> A ko likabhu pi uo! Padhá de, anga u akpata kpadji li Kaina akpata nani e-o. U akpata nganda Balama ka gumu tia gba o-o. U amu anga u ngamene kpéke 'ndji pi Ebhe maka li Kole amene nani lie-o.

<sup>12</sup> Uo ngaha nũmu pi yi bhú obili li yi apøpekøbhø bhúla yi li e ngú nazu 'he na mukunda sũnda yi-o. U ngabedhe 'bu o ne ezu má kpambi! Nũmu li uo ade, uo bha bini ngabhundja engú gba o makpe. Uo maka ndindi inde li anvi ngandjindjimba e, li ebha nde bhú e ade-o. Uo maka ndula inde i li lílí de bhú nedhinga nali lílí-o, inde u agbe du e, a tsia akpi hana má kpekøbhø-o! <sup>13</sup> Uo maka ongbengbe 'ngbo 'ngu na ngade 'ngu. U ngapandja ongu na nũmu gba o-o maka li ngade 'ngu agbegbe efu lie. Uo maka oikupala inde ambu li kpadji o. Ebhe aleke dabili na duduma ne duduma pi uo bhú biti má ndundulundu!

<sup>14</sup> Enoka, nani ne ogbi ní na mananika nayie li Adamu. Ani akpokpo nani maka polofeta li 'ngú gba okpála ango-o me: «Yi tsitsia nga Ngámá ngago bhú dabili bini ne bhiti obubu okpála gba e na bhíbhiti-o, <sup>15</sup> ngú nakodho 'ngú gba ndu okpála

hana. Ani a'ó mangimbo pí ndu okpála na sisiti hana ngabula ndu osisiti 'ngú inde u amene e, nedhinga li u agbe kpéke 'ndji lie li Ebhe, di ne ngabula sisiti oeli inde li okpála na mugwe apa e li kate ani-o.» <sup>16</sup> Okpála ango-o ngadi mutokono di ne nalopolo lio ndu 'kpí hana, uo ngadhuku bha bini maka li gumu gba uo makpe apa lie. U ngapa bha bini ongu inde ane dada mane, u la di ngapa 'li okpála koko ngabula me o sia 'he ka uo.

### *Dapo pi omakilisito*

<sup>17</sup> La pi yi ondaise ma na mukunda-a, yi bhundja oeli inde li obhulu titima gba Ngámá gba ní Yesu Kilisito apa nani e pi yi-o. <sup>18</sup> U apa nani pi yi me: «Li sokpi-e, adu ne okpála inde amú yi, u tsia dú akpata osisiti gumu gba o makpe.» <sup>19</sup> Okpála ango-o, a ko okpála inde ngagbo bhusu okpála. A bha bini bhú 'ndji uo ne imbilangu bhe na kate, Bua gba Ebhe-e bhú uo ade. <sup>20</sup> La pi yi ondaise ma na mukunda-a, yi mene ne kpéke me yi teteke liyi sũnda yi ngabula me ndu yi hana yi lu kpekpeke bhú nabhuka inde bubu naali-o. Yi yo Ebhe ne angu gba Bu Bhobua. <sup>21</sup> Yi du nadhuku li lele da napa me Ebhe du nasuno mukunda gba e pi yi. Yi 'o 'to yi li nedhinga li Ngámá gba ní Yesu Kilisito apána ndjinga gba e lie pi yi, ani tsia há mukobho na duduma pi yi-o. <sup>22</sup> Yi dje ndjinga okpála bhende ne bua na bhisi bhisi bhú ká yi-o. <sup>23</sup> Yi kobho uo, amba u atsulu bhú djua de. Yi dje ndjinga okpála koko, la-a, yi lila liyi me, belegu bongo gba uo inde asiti ne osisiti 'ngú gba uo inde u ngamene e, atunu lie li kate yi de.

† 1:9 1:9 Engú koko inde bhú lukuluku inde-e, a bhú obhuku koko na gandja na didili-e ade. A ko ongu inde li omaYuda adu nani akpokpo e maka tsingũ. A viti bini ne bhende bhú lukuluku 14-15.

24-25 Sangu pi koli Ebhe bini inde akobho ní li kpadji gba Yesu Kilisito, Ngámá gba ní-o. Anì tí da nayoko me yi atí bhú siti 'ngú de, anì tí da namene me yi koto kala ni me engú na sisiti nde bhú yi ade, di ne me yi nde abedhe ne djali bedhe. A ayo me okpála dhөгө anì, a ayo me anì Ʃ, a ayo me angu di ne ngámá dɔ bhú dabili bini ne anì mbia inde, dɔdɔma ne dɔdɔma. A adɔ moko!

Yelusalema na mbia, eḷe gba  
Ndili Kandele 21:9 – 22:21

## Apokalipisi Ongú inde u ambamba ta e Eli na kalanu

Djaa aye bhuku na Apokalipisi inde-e bhú nedhinga u adu ato mbolo li omakilisito lie kabula nabhuka bhú Yesu Kilisito maka Ngámá gba o. Engú na ngbéngbé inde bhú bhuku inde-e, Djaa ngapa pi okpála inde ngatatanga me u du ne nabhuka di ne masi. Djaa atsia aha líli pi uo me, u lu kpékpéke bhú 'ngú na kukulú nedhinga na likabhu di ne bhú onedhinga u ngato mbolo li uo lie-o.

Bhú bhuku inde-e, u aye bhúbhú ongú bhelé pindji nambamba ta ongú, di ne pindji nau ongú maka loto li da e nde kpékpéke ngú nambimbila. Engú na ngbéngbé bhúbhú-o mbámbá. A ko ongú inde me: li pápá gba Kilisito Ngámá gba ní-e, a li soso-o, Ebhe ahá angu obhulu yala gba e hana, ani há di angu Satana . Ani há di makalá pi okpála na ngbingbili gba e, ne bisagu na abhulá na mbia di ne doto na mbia inde ani ako angu e pi ndu 'ngú lie hana-o.

### Ongbengbe ongú inde bhú bhuku inde-e ngae inde:

Eli na kalanu 1:1-20

Balua pi oDadjua mananika gba  
Ebhe 2 – 3

Malika 4:1 – 8:5

Ototi mananika 8:6 – 11:19

Nau ongú mananika maka loto  
12:1 – 15:8

Okópo mananika na ke 'ngú gba  
Ebhe 16:1-21

Ongú mananika u apa e pindji  
babilona 17:1 – 19:10

Nabu ta 'ngú pindji nau ongú  
mananika maka loto 19:11 –  
21:8

*Lita 'ngú-o*

<sup>1</sup> Bhuku inde-e ngakpokpo 'ngú pindji engú inde li Ebhe ambamba ta e pi Yesu Kilisito-o . Ebhe ambamba tata pi ani ngubula me ani suno pi obalise gba ni-o, engú inde améne lie mbia inde-o. Abhomu-o, Yesu Kilisito atsia atima andjelu gba e me ani mbamba ta engú ang-o pi bali gba ni Djaa . <sup>2</sup> Djaa akpokpo ndu 'ngú inde ani au e hana. Ndu 'ngú inde ani au e hana-a, a ko 'li Ebhe, a ko la di kukulú 'ngú inde li Yesu Kilisito ambamba ta e pi ani-o. <sup>3</sup> A ko djali pi kpála inde ngatanga bhuku inde, ne obhende i ngadje ongú inde li Ebhe ambamba ta e bhúbhú-o, inde di ngakpata ongú inde aye lie bhú bhuku inde-o. Padhá de, anga nedhinga na ongú ang-o akolo masikpe.

*Djaa yi okpála na oDadjua mananika gba Ebhe-e mayi*

<sup>4-5</sup> Ngama Djaa, ma atima balua inde-e bhú oDadjua mananika inde bhú ndu doto na Adjia-o.

A ayo me Ebhe inde uu inde adu nani uu, inde la di ngago-o, suno bádha bhú 'bu ne guo 'ngú gba e pi yi. A ayo di me obua mananika inde kala kiti na ngámá gba Ebhe-e, bhú dabili ne Yesu Kilisito suno bádha bhú 'bu ne guo 'ngú pi yi. Yesu Kilisito-o, a ko kpála inde akpokpo ngbili 'ngú . A ko di kpála na kalanu inde azuku bhú ká okpála inde amu, a ko la di ngámá gba ongbengbe ongámási na doto.

Kilisito ngakunda ní, ani atsia agbegbe ní bhú osisiti 'ngú gba ní-e ne ngute e. <sup>6</sup> Ani amene me ní kolo okpála na Nau gba Ebhe . Ani amene di me ní kolo odimandé ngubula namene kulu liní pi Ebhe, 'Dyi ni. A ayo me sangu di ne angu

dụ pi ani dụdụma ne dụdụma! A adụ moko.

<sup>7</sup> Yi tsitsia, ani ngago bhú ndindi!

Ndụ okpála hana aú ani, belegụ obhende adụ nani kala ani ne mandambi-o.

Ndụ opiga inde pílá doto lib-homu adú bhú 'gbá li 'ngú gba ani-o.

Heni, a adụ moko!

<sup>8</sup> Ebhe Ngámá Apí 'Kpí apa me: «Ma ne Kpála inde akpo lita ndụ 'ngú hana, ma di ne Kpála inde abú ta ndụ 'ngú hana.» Ebhe ne Kpála inde ụ, Kpála inde adụ nani ụ, Kpála inde di ngago.

*Djaa au Kilisito bhú 'he maka loto*

<sup>9</sup> Ngama Djaa, ma ne ndai yi inde ngakobho bhú dabilí bini ne yi bhú líkabhu, ne bhú Nau ne nazi kekele bhú nabhuka Yesu. Ngama-a, ma dụ nako bhú kpata bhú kpeme inde u a'i e me Pate-mosi kabula 'li Ebhe, la di anga ma ngakpokpo kukulú 'ngú inde lí Yesu ambamba ta e-o. <sup>10</sup> Bhú 'kpí gba Ngámá-a, Bu Bhobua abedhe ma, ma atsia adje ne akele ma kpéke eli bini maka mbala. <sup>11</sup> Eli ango-o apa me: «Ehe inde mụ ngau e-e, ye bhú bhuku bini, amba mụ tima bhú oDadjua mananika gba Ebhe inde bhú Efeso, bhú Similine, bhú Pel-egame, bhú Tiatile, bhú Salade, bhú Filadelefi ne bhú Laodisé.»

<sup>12</sup> Abhomụ-o, ma adji lima ngú natsia kpála inde adụ nagama 'ngú mụma-o. Ma adji lima lie, ma au otala na olo mananika. <sup>13</sup> Bhú ka otala ango-o, ehe bini adụ maka kpála-kuti. Ani adyi 'ndjá bongo akolo bhú 'dhụ e, ani atsia agbite mbulu e ne mukabha inde u amene e li olo.† <sup>14</sup> 'Ndji ani ne sundjo ani avu má tuu, maka kato! Djila ani adụ nade maka zi djua. <sup>15</sup> 'Dhụ ani adụ nasụ maka

kalase na kpéke mase inde u ato e bhú djua, zizi atsia aholo nasụ. 'Li ani adụ maka tolo wowo 'ngu. <sup>16</sup> Ani aholo ikúpala mananika ne 'kpa e na kokpa. A adụ akoto bhú 'bhẹ ani ne mbotia inde adhe ne ndụ pasụ bhisi hana. Bhúla ani adụ asụ maka kpéke zindjila na tulukpe.

<sup>17</sup> Ma au ani lie, ma atí bhú lí 'dhụ ani maka kpála inde akpi. Pipita-a, ani a'o 'kpa e na kokpa-a pí ma, ani atsia apa mụma me: «Mo okpé-e de! Ma ne Kpála inde akpo lita ndụ 'ngú hana, ma di ne Kpála inde abú ta ndụ 'ngú hana. <sup>18</sup> Ma la di bhú mukobho. Ma adụ nako me ma nde akpi, la mbia inde-e, ma bhú mukobho na dụdụma. Ma ne angu pí 'ndji kuo di ne pí 'ndji bilí gba okpála inde amu. <sup>19</sup> Kaka-a, ye ongú inde mo ou e inde. A ko ongú inde ngakodho 'kpí, di ne ongú inde a ayo me ago pipita ko. <sup>20</sup> Pindji oikúpala mananika inde mo ou e sa 'kpa ma na kokpa, di ne otala mananika na olo-o, gbo nga 'dje mụ, ma mbamba kukulú tata-a pí mụ. Mbila me, oikúpala mananika-a, a ko oandjelu na oDadjua mananika gba Ebhe, otala mananika-a, a ko oDadjua mananika gba Ebhe-o.»

## 2

*Balua pi okpála na Dadjua na Efeso*

<sup>1</sup> Kpála inde ma au e apa matá mụma me: «Ye balua pi andjelu na Dadjua na kuti na Efeso me:

«Kpála inde aholo oikúpala mananika sa 'kpa e na kokpa, inde ngadholo bhú ká otala mananika na olo-o apa me: <sup>2</sup> Ma mbila okulu gba mụ-o hana. Ma mbila hana me mo omene kulu kpekpeke, me mụ di ne bua na kekele. Ma mbila hana me mụ tí

† 1:13 1:13 Tsia bhú Dan. 7:13.

da naziba osisiti okpála de. Ma mbila hana me mo ole okpála inde ngapa me o ne obhulu titima gba ma-a me u nde la mo-o ade-e, mo atsia au me a ko obhulu eu. <sup>3</sup> Ma mbila hana me a bhú mü ne kekele, mo osia likabhu ngubula 'li ma, mü tsia ndala de.

<sup>4</sup> La-a, siti 'ngú inde ma au e li pabili gba mü-o, a ko me mo o'o ká mukunda inde mo okunda nani ma ne e a'o. <sup>5</sup> Kaka-a, bhundja nga bili inde mo oti li e-o. Dji bua mü, amba mü mene okulu maka mo odu nako namemene lie kalanu ko. I du mo-o de-e, ma agó li pabili gba mü, ma a'é tala gba mü li bili i nde li e-o, i du me mü nde dji bua mü de ko. <sup>6</sup> Engú bini, bádha 'ngú inde bhú mü-o ngae inde: mü ngayala okulu inde li oNikolaite ngasuno e, maka ngama makpe di-e, ma ngayayala lie-o.

<sup>7</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá lí ndula na mukobho inde bhú edyi gba Ebhe-e pi ani me ani du nazuzu. Edyi ango-o bhú kuti na mundeysi gba Ebhe-o.»

#### *Balua pi okpála na Dadjua na Similine*

<sup>8</sup> Kpála inde ma au e apa matá muma me: «Ye balua pi andjelu na Dadjua na Similine me:

«Kpála inde akpo lita ndu 'ngú hana, inde di abú ta ndu ongú hana, Kpála inde akpi nani, engú bini atsia azuku-o apa me: <sup>9</sup> Ma mbila likabhu gba mü di ne ndibhili gba mü-o hana, engú bini, kukulu tia mangbo ngae inde ka mü-o. Ma mbila la di maka li okpála inde ngapa me o ne omaYuda me u nde ne omaYuda ade-e, ngadi mü

lie hana. La ngauo-o, a ko omaYuda de, a ko okpála gba Satana ! <sup>10</sup> Mo odjé tsulu ka likabhu inde mo osia e de. Djedje nga, djabulu andi okpála bini bini bhú ká yi bhú tikpu ngú nale yi. U ató mbolo li yi ngubula ekpi ndjikpa. Mo oyála ma de, abana i yo bha me u bhelø mü. Pipita-a, ma ahá ndata na 'ngbø ndua pi mü maka makalá gba mü-o. Ndata na 'ngbø ndua ango-o, a ko mukobho na duduma.

<sup>11</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ani sia likabhu gba nakpi na bhisi-e belegu de bini.»

#### *Balua pi okpála na Dadjua na Pelegame*

<sup>12</sup> Kpála inde ma au e apa matá muma me: «Ye balua pi andjelu na Dadjua na Pelegame me:

«Kpála inde ka e ne mbotia inde ngadhe ne ndu pasu bhisi hana-a, apa me: <sup>13</sup> Ma mbila bili inde mü ngadu li e hana, bili ango-o, Satana ne ngámá oo ngae. Mü ngalila 'li ma. Mü ndala 'kpa li nabhuka gba mü bhú ma-a de, abana bha li nedhinga u abhelø Atipasi lie agba yi, li bili li Satana ngadu li e-o. Atipasi adu nani nakpokpo 'ngú gba ma mbámabá kala okpála.

<sup>14</sup> La-a, siti 'ngú inde ma au e li pabili gba mü-o, a ko me, a agba mü ne okpála koko inde ngadhedhe li 'ngú li Balama adu nani nasuno e pi Balaka-o. Balama adu nani nasuno pi Balaka me ani to omafsalaele bhú siti 'ngú. Ani adu apite uo me u zu oenu inde u aha o pi oebhe na eu, amba u du di



nakunda olisi, i du di-e obhosi ngangá. <sup>15</sup> A bhadi moko, a di bhú ká okpála gba m̄-o ne obhende adhedhe li nasuno siti líli maka oNikolaite ngasusuno lie-o. <sup>16</sup> Kaka-a, dji bua m̄. Padhá de, anga i du mo-o de-e, ma ngago agba m̄ má gala, ma tsia gú okpála ango-o ne mbotia inde ngakoto bhú 'bh̄e ma-o.

<sup>17</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá mana inde awo lie mawo-o pi ani. Ma ahá la di linga pi ani. U aye pí linga ango-o 'ili na mbia inde li kpála bini mbila ta e de, bha bini kpála inde asia linga ango-o ko!»

### *Balua pi okpála na Dadjua na Tiatile*

<sup>18</sup> Kpála inde ma au e apa matá m̄ma me: «Ye balua pi andjelu na Dadjua na Tiatile me:

«Ndili gba Ebhe inde li Djila e ngade maka djua, li zi 'dh̄e e nde ngasu maka kalase na kpéke mase, apa me: <sup>19</sup> Ma mbila okulu gba m̄-o hana. Ma mbila mukunda gba m̄-o hana. Ma mbila nabhuka gba m̄-o hana. Ma mbila kulu mo omemene e pi okpála di ne kekele gba m̄-o hana. Ma mbila hana me kulu m̄ ngamene e mbia inde-e ane bhe na kalanu-o ne bhelé. <sup>20</sup> La-a, siti 'ngú inde ma au e li pabli gba m̄-o, a ko me, m̄ ngaziba Djedjabele, ēle inde ngapa me ni ne polofeta gba Ebhe-o. Ani ngapite obalise gba ma-a ne nasuno pi uo engú na zabhe, di ne nazu onu inde u aha o pi oebhe na eu-o. <sup>21</sup> Ma a'o nako nedhinga pi ani me ani dji bua e. Engú bini, ani kunda

nadji bua e de me ni 'o nakunda obhosi ngangá ma'o-o de.

<sup>22</sup> Kaka-a, ma agú 'i ani pí polo na 'ngbé likabhu bhú dabili bini ne obhende ngakunda obhosi, i du di-e olisi gba okpála koko bhú dabili bini ne ani-o, i du me okpála ango-o nde dji 'ngbu o li sisiti kulu gba ani de-o. <sup>23</sup> Ma abhili okpála inde ngakpata nganda ani-o, li ndu okpála na oDadjua gba Ebhe e hana mbila me ma ne kpála inde i ngambila mabhundja di ne gumu gba okpála hana. Ma ahá pi kpála ne kpála bhú ká yi makalá nakpata bha lele siti 'ngú inde ani amene e ko. <sup>24</sup> La ngayi okpála na Dadjua na Tiatile, inde i dhedhe li nasuno na sisiti bhomu-o de-e, inde i kpata di engú li okpála bhomu-o nga'i e me, «Engú nawo mawo gba Satana» de-e, ma ne líli koko na'o'o pí yi ade. <sup>25</sup> Engú bini, yi dhedhe bha li engú inde ka yi akólo bha bini li 'kpí inde ma agó lie ko.

<sup>26-28</sup> Kpála inde agbóko 'gú bhomu-o, inde alila okulu gba ma nakolo ali soso-o, ma ahá pi ani angu inde ma asia e ngama makpe ka 'Dyi ma-o. Ma a'ó ani ngámá pí 'ndji opiga. Ani aú ngámá pí 'ndji uo. Ani ahólo kalase sa 'kpa e, ani tsia dú agugumu uo maka u agugumu omadakpa lie ko.† Ma ahá di ikupala inde asusu kekpi-e pi kpála ango-o ngú nasuno me ani agboko 'gú-o agboko.

<sup>29</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

## 3

### *Balua pi okpála na Dadjua na*

† 2:26-28 2:26-28 Tsia bhú Ets. 2:8-9.

*Salade*

<sup>1</sup> Kpála inde ma au e apa matá muma me: «Ye balua pi andjelu na Dadjua na Salade me:

«Kpála inde li obua mananika gba Ebhe, di ne oikupala mananika nde ka e apa me: Ma mbila okulu gba ma-o hana. Okpála ngapa me mu uu, engú bini, mo okpi. <sup>2</sup> Zuzuku, mene ne kpéke me mo obulu bha má pii de! Padhá de, anga ma au me kulu gba ma-o kolo nga li lelele de. <sup>3</sup> Kaka-a, bhundja nasuno inde mo osia nani e-o ne lele maka mo odje nani lie-o. Dji bua mu, amba mu lila nasuno ango-o malila! I du la me mu nde zuku de-e, ma gó maka bhulu 'zi, ma koto li mu bhú gbilikiti, me mu nde mbila nedhinga ango-o de.

<sup>4</sup> Engú bini, a bhú ka yi okpála na Salade ne okpála bini bini inde i siti obongo gba o-o de. U adyí obongo na bububu, ngaya ne uo-o, ya tsia dhólo bhú dabili bini. Padhá de, anga u ati ne nadhuku ne ma bhú dabili bini ngao. <sup>5</sup> A moko, kpála inde agbóko 'gú bhomu-o, adyí obubu bongo. Ma búlu 'li ani bhú bhuku na mukobho-o de. La di-e, ma aziba kala 'Dyi ma, di ne kala oandjelu gba ani-e me, a ko kpála ka ma.

<sup>6</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

*Balua pi okpála na Dadjua na Filadelefi*

<sup>7</sup> Kpála inde ma au e apa matá muma me: «Ye balua pi andjelu na Dadjua na Filadelefi me:

«Kpála inde bubu, inde i papa eu de, inde li fungula gba Davidi nde ka e-e, inde i 'u bhoti-e, kpála bini ti da nanini de, inde i ni la di bhoti-e, kpála bini ti da

na'u'u de-e, apa me: <sup>8</sup> Ma mbila okulu gba ma-o hana. Ma mbila hana me mu kpékpéke ade. La-a, mo olila 'li ma ndjindji. Mo opa mbámábá me mu ne kpála ka ma. Kaka-a, ma a'u bhoti kala mu, bhoti ango-o, kpála bini ti da nanini de. <sup>9</sup> Tsia nga engú inde ma améne e li okpála gba Satana, obhulu eu inde ngapa me o ne omaYuda me a nde omaYuda ade-o: ma agbéle uo kala mu, u tutu lipaku o kuto kala mu ngú nadhogé mu, amba u mbila me ma ngakunda mu. <sup>10</sup> Mo olila líli gba ma pindji naholo bua o ndjindji. Kaka-a, ngama di-e, ma alila bhadi mu moko li nedhinga na kpéke da 'ngú inde agó píla doto libhomu ngú nale okpála na doto ko. <sup>11</sup> Ma agó mbia! Dhedhe li nasuno inde mo odje e ndjindji, ngubula me kpála bini adhépe ndata na 'ngbø ndua gba ma-o de.

<sup>12</sup> Kpála inde agbóko 'gú bhomu-o, ma a'ó ani maka nepanda bhú 'ngbé 'ti Ebhe gba Ebhe gba ma-o. Ehe bini ti da nagbe matá ani oo belegu de bini. Ma ayé 'li Ebhe gba ma-a li kute ani, bhú dabili bini ne 'li gudhu gba Ebhe gba ma-o. Gudhu ango-o, a ko Yelusalema na mbia inde ayie abhúlá, inde li Ebhe atíma galikpe e-o. La di-e, ma ayé 'li gba ma na mbia li kute ani.

<sup>13</sup> A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

*Balua pi okpála na Dadjua na Laodisè*

<sup>14</sup> Kpála inde ma au e bhomu-o atsia apa muma li soso me: «Ye balua pi andjelu na Dadjua na Laodisè-e me:

«Kpála inde 'li e me “A dũ moko”, kũkũlũ kpála inde ngakpokpo 'ngũ me anĩ nde 'o kolo pépé de-e, inde lita ndũ 'he li Ebhe abho e hana-a apa me: <sup>15</sup> Ma mbĩla okulu gba mũ-o hana. Mũ kpikpina ade, mũ di kpákpá ade. A ayo igini me mũ de adũ kpikpina, i dũ mo-o de-e, mũ dũ kpákpá. <sup>16</sup> I nde lie me mũ nde yapayapa-a, mũ nde kpikpina adi-e, mũ la di kpákpá adi-e, ma azie mũ mazie!

<sup>17</sup> Mũ ngapa me: “Ma ne bhũlũ tia, ma asia tia bhelé, ma ne gumũ 'he belegũ ade bini.” Engũ la bini, mũ mbĩla de me ni bhũ likabhu-o de. Mũ mbĩla de me ni nga'o li ma ndjĩnga-a de. Mũ mbĩla de me ni ne bhũlũ ndibhĩli-e de. Mũ mbĩla de me ni u 'kpĩ de-e de. Mũ mbĩla la di de me ni ndumbu-o de. <sup>18</sup> Kaka-a, ma ngayo ka mũ me, a ayo nakala olo inde li djua aleke e ndjĩndji-e ka ma, ngũbula me mũ kolo bhũlũ tia. Ma ngayo ka mũ me, a ayo nakala di obongo na bububu ka ma ngũ nadyidyĩ li kute mũ, amba numũ améne mũ ka ndumbu gba mũ-o de. Ma ngayo ka mũ me, a ayo nakala la di elá ngũ nasese bhũ djila mũ, amba mũ dũ au 'kpĩ ndjĩndji.

<sup>19</sup> La pi ma-a, ndũ okpála inde ma akũkũnda o hana, ma ngambe bhũ 'ndji uo, ma di ngasuno oehe inde u mene e ndjĩndji de-e pi uo. Kaka-a, a ayo me mũ dji bua mũ, amba mũ dũ kpákpá. <sup>20</sup> Djedje nga, ma alũ li 'bhø bhoti-o, ma ngabhĩbhi. Li kpála dje 'li ma, anĩ 'u 'bhø bhoti-e, ma lí agba anĩ, li ngaya ne anĩ-e, ya tsia zũ 'he ne anĩ bhũ dabilĩ bini.

<sup>21</sup> Kpála inde agboko 'gũ bhomu-o, ma azĩba pi anĩ nadũ

bhũ dabilĩ bini ne ma pí kiti na ngámá gba ma maka ngama di ma agboko 'gũ lie, ma atsia adũ bhũ dabilĩ bini ne 'Dyi ma pí kiti gba e na ngámá ko.

<sup>22</sup> A ayo me kpála inde li e ne djedje-e, dje engũ inde li Bu Bhobua ngapa e pi oDadjua gba Ebhe ko!»

## 4

*Abhũlá-a, ndũ okpála hana ngadhøgø Ebhe*

<sup>1</sup> Pipĩta-a, ma au engũ koko bhũ 'he maka loto. Ma au bhoti inde adũ baba abhũlá.

Eli ma adje igini e kalanũ mugito me u nga'u toti-e, apa mũma me: «'E ei, amba ma suno engũ inde ngago sisi-e pi mũ.»

<sup>2</sup> Kolo me-e, Bu Bhobua abedhe ma. Abhũlá oo, kiti bini na ngámá adũ oo, kpála bini atsia adũ pépé.

<sup>3</sup> Zi kpála ang-o adũ nasũ maka oteme\* na zizi. Makilima asa deno kiti na ngámá inde anĩ adũ pí e ne zi e ngbalina. Zizi adũ di maka zi teme na zizi. <sup>4</sup> Okiti na ngámá ndjikpa bhisi ne ká badha asa deno kiti na ngámá ang-o ngbalina. Obhelesi okpála ndjikpa bhisi ne ká badha atsia adũlũ pépé. U adyidyĩ obubu bongo, u atsia adyidyĩ ondata na ngámá inde u amene e li olo-o bhũ 'ndji o. <sup>5</sup> Li bili li kiti ang-o adũ lie, ekpĩ adũ andjendjengene, mugbalá adũ asusũla. O'i 'ke mananika inde adũ atsi matsi adũ kala kiti ang-o. O'i 'ke ang-o, a ko obua mananika gba Ebhe-o. <sup>6</sup> Kala kiti ang-o, ma au 'he bini maka 'ngbé 'ngu inde li píla e adũ nasũ má ngĩngĩngĩ maka bitolobi. A adũ má ngilili maka teme† na zizi.

\* 4:3 4:3 Oteme: Bhũ eli na giliki-e, u aye limbi oteme bata: djasepe, saladũane ne emelode.

† 4:6 4:6 Teme: Bhũ eli na giliki-e, u aye me «Teme na kilisitale.»

## 5

Lingo kiti na ngámá ang-o, okpála badha na ngangamba† adu oo. (A akunda napa me sunda kiti na ngámá di ne bili li obhelesi okpála ndjikpa bhisi ne ká badha adu lie-o.) Djidjila abedhe li bhúla uo di ne li 'ngbá uo bedhe. <sup>7</sup> Kpála bhe na bini-e, adu maka kingbi. Bhende na bhisi-e, adu maka folo bagala na bhobhoko. Bhende na bata-a, bhúla ani adu maka kpálakuti. Bhende na badha-a atsia adu maka ndua inde bhú holo. <sup>8</sup> Ndu uo badha hana, u adu ne mbumbudha madhia madhia. Djidjila atsia abedhe tété bedhe bedhe, ali ngbungbu di ne asabusabu. U ngali 'tsi sukpe ne ngbikpi mandí nágua me:

«Ebhe Ngámá Apí 'Kpí, Bubu, ani Bubu, ani Bubu.

A ko Kpála inde adu nani mu, inde mu, inde di ngago!»

<sup>9</sup> Ndu nedhinga hana li okpála badha bhomu-o ngali 'tsi ngú nadhogo kpála inde adu pí kiti na ngámá, kpála inde la di bhú mukobho duduma ne duduma, u ngaha sangu di ne nagie heni pí e lie, <sup>10</sup> obhelesi okpála ndjikpa bhisi ne ká badha-a ngatutu lipuku o kuto kala kpála ang-o. U ngadhogo kpála inde bhú mukobho duduma ne duduma-o. U ngapandja ndata na ngámá gba o-o, u ngabubu kala kiti na ngámá-a ne napa me:

<sup>11</sup> «Ebhe Ngámá gba ya, mo oti ne napa me okpála toko mu, u dhogo mu, amba mu sia sangu kabula ngámá gba mu-o.

Padhá de, anga mo obho ndu 'he hana ngamu.

A atsia amene lie, anga mo okunda nani me a amene lie moko.»

*Ndili Kandole-o abhulu 'kpá balua inde agagala lie magagala-o*

<sup>1</sup> Pipita-a, ma au 'kpá balua bini sakpa kpála inde adu pí kiti na ngámá-o, ani aholo li pá 'kpa e na kokpa. U aye 'he pépé ne ndu pasu bhisi hana. U agagala, u atsia ayele ne malika li obili mananika. <sup>2</sup> Abhomu-o, ma au andjelu bini na angu inde adu asusula me: «A ti da nasosoko malika li kute 'kpá balua inde-e ngú nabhubhulu-o da?» <sup>3</sup> Engú bini, kpála bini inde ati da nabhubhulu di ne natsia 'kpí bhúbhú-o du de, abana abhúlá, abana píla doto, abana asa doto. <sup>4</sup> Kaka-a, ma aku 'gbá naali, anga kpála inde ati da nabhubhulu di ne natsia 'kpí bhúbhú-o du de. <sup>5</sup> Engú bini, saka obhelesi okpála apa muma me: «Mo okú 'gbá de. Tsitsia nga, kingbi na piga gba Yuda, ndili gba 'ngbé ngámá Davidi-e agboko egú-o agboko. Ani ti da nasosoko malika mananika bhomu-o, ani tsia bhulu di 'kpá balua ang-o.»

<sup>6</sup> Abhomu-o, ma au Ndili Kandole bini alu tutu, li bili na kiti na ngámá-o. Okpála badha na ngangamba bhú dabili bini ne obhelesi okpála-a asa ani ngbalina. Ani adu mugito me u akodho ngulu ani makodho. A adu bhú 'ndji ani ne odidi mananika di ne djidjila mananika. Odjidjila mananika bhomu-o, a ko obua mananika gba Ebhe li ani atima o píla doto libhomu-o. <sup>7</sup> Ndili Kandole-o ago, ani atsia aha 'kpá balua sakpa kpála inde adu pí kiti na ngámá-o. 'Kpá balua ang-o adu sakpa ani li pápá na kokpa. <sup>8</sup> Nedhinga ani aha 'kpá balua lie, okpála badha na ngangamba di ne obhelesi

† 4:6 4:6 Okpála badha na ngangamba: Li bili inde-e, u mbila de me ne me a ko okpála-kuti, ne me a ko oandjelu-o de.

okpála ndjikpa bhisi ne ká badha-a, atuko ne lipúku o kuto kala Ndili Kandələ-o. A adu sakpa ndu uo bini ne bini hana ne dumu di ne kópo na olo inde abedhe ne bandele bedhe. Bandele ango-o, a ko mayo gba okpála gba Ebhe-o.

<sup>9</sup> U adu nali etsi na mbia me:

«Mu ti da naha 'kpá balua-o  
ne nasosoko malika ango-o,  
anga u abhələ nani mu,

mo otsia agbegbe okpála inde  
adu bhú balie  
ne ngute mu pi Ebhe.

A ko okpála na ndu bili hana,  
ne ndu opiga hana,  
ne ndu okongú hana.

<sup>10</sup> Mo otsia amene me  
u kolo pi Ebhe gba ní-e okpála  
na kuti-ngámá gba aní,  
u kolo di odimandə pi aní,  
u tsia u pıla doto.»

<sup>11</sup> Pipita-a, ma au, ma atsia adje  
'li bhiti oandjelu. U adu nani  
oketə ne ketə. U alulu denگو  
kiti na ngámá-o, ne denگو okulu  
'he badha-o, di ne denگو obhe-  
lesi okpála-o. <sup>12</sup> U adu asusula  
kpekpeke me:

«Ndili Kandələ nani inde u  
abhələ e  
ati ne nasia sangu ,  
aní ati ne nasia tia, ne imbilangu,  
di ne ngámá.

A ayo me okpála toko aní,  
u manga aní.

A ko kpála na angu.»

<sup>13</sup> Ma atsia adje di ndu ohe na pıla  
doto libhomu ne ohe na abhúlá ne  
obhe na sa doto, ne obhe na abhú  
'ngu-o hana aholo nali etsi me:

«A ayo me duduma ne duduma ní  
toko,

ní dhəgə, amba ní ha di sangu  
ne ngámá pi kpála inde  
ngadu pí kiti na ngámá-a

bhú dabili bini ne Ndili  
Kandələ-o.»

<sup>14</sup> Okpála badha na ngangamba-  
a adu abhuka engú u adu apa

e bhomu-o me: «A adu moko!»  
Obhelesi okpála atsia adu atutu  
lipuku-o kuto kala kiti na ngámá  
ne nadhəgə Ebhe bhú dabili bini  
ne Ndili Kandələ-o.

## 6

*Ndili Kandələ-o aholo na-  
sosoko omalika mananika li kute  
'kpá balua-o*

<sup>1</sup> Abhomu-o, ma atsia 'kpí, ma  
au Ndili Kandələ-o asoko saka  
omalika mananika li 'kpá balua-  
o. Aní asoko lie, ma adje saka  
okpála badha na ngangamba-a  
ngagama 'ngú kpékpéke mugito  
me mughalá ngasusula ngae. Aní  
me: «Gogo!» <sup>2</sup> Ma me ma tsia 'kpí  
me-e, ma au punda bini na bubu  
akoto. A adu sakpa kpála inde  
adu pí aní-e ne adili. U ato ndata  
na ngámá bhú 'ndji aní. Aní anu  
maka kpála inde agboko 'gú ngú  
nagboko matá egú koko.

<sup>3</sup> Nedhinga aní asoko malika  
na bhisi-e lie, ma adje kulu 'he  
na bhisi-e apa me: «Gogo!»

<sup>4</sup> Abhomu-o, li punda koko akoto  
lie-e, kute aní ambe maka djua.  
U aha pi kpála inde adu pí aní-  
e angu na'e guo 'ngú pıla doto  
ngubula me okpála bhili lio. U  
atsia aha di pi aní mbotia na  
ndjándjá.

<sup>5</sup> Li Ndili Kandələ-o, asoko  
malika na bata lie, ma adje kulu  
'he na bata-a apa me: «Gogo!»  
Ma me ma tsia 'kpí me-e, ma au  
punda na bibili. A adu sakpa  
kpála inde adu pí aní-e ne kilo.

<sup>6</sup> Ma adje 'he mugito me kpála  
agama 'ngú bhú ká okpála badha  
na ngangamba-a me: «Li kpála  
mene kulu ekpi bini libhomu-o,  
aní de sia tia inde i ti da nakala  
bha bini koli kilo na ngano bini, i  
du mo-o de-e, aní de sia tia inde i  
ti da nakala bha bini koli kilo na

\* 6:6 6:6 Bili inde si-e akunda napa me adyindi adu naali. Mase ezu akpeke na kuo kuo.

olodje bata.\* Engú bini, vino ne emu-o adúla lie de.»

7 Li Ndili Kandølo-o asoko malika na badha-a lie, ma adje kulu 'he na badha-a apa me: «Gogo!»<sup>8</sup> Ma me ma tsia 'kpí me-e, ma au punda na 'ngu kpadhi. A adu 'li kpála inde adu pí ani-e me «kuo.» Bili gba okpála inde amu-o adu li 'ngbu ani. U aha nani angu pí uo ngubula nabhili té okpála na píla doto. I du me okpála nde badha-a, u bhéle kpála bini bhú ká uo. U abhili té okpála bhomu-o ne egú, ne gumu, ne okuo di ne onute.

9 Li Ndili Kandølo-o asoko malika na bhuluvue lie, ma au bua okpála inde u abhili nani o sa misa natsulu enu pí Ebhe-o. U abhili nani okpála bhomu-o ka anga u abhuka 'li Ebhe, u atsia akpokpo di mbámbá.<sup>10</sup> U adu asusula kpekpeke me: «Ngámá na bubu, mu ne kakulu ngámá ngamu. Mu ngadjeke ni ngú nakodho 'ngú sanda ya ne okpála na doto-o? Ngauo, u abhili nani ya. Kodho 'ngú bhomu-o kokodho, amba mu 'o 'ngú pí uo.»<sup>11</sup> Abhomu-o, u aha pí ndu uo hana bini ne bini lobe na bubu. U atsia apa pí uo me: «Yi djeke nga mbo bedi, alo gba yi-e le nga de. A ne ondaise yi koko inde ngakpata nganda Ebhe. A ayo me okpála na doto bhili nga di uo maka u abhili nani yi lie ko. Pipita-a, u tsia kódhó 'ngú gba yi ne uo bhú dabili bini.»

<sup>12</sup> Pipita-a, ma au Ndili Kandølo-o asoko malika na madhia-o. Abhomu-o adjigidjo na ngbéngbé amene lie. Ela abili bhúla e má mbilili maka bongo na pili. Epe libhomu atsia andju má ngua maka ngute.<sup>13</sup> Oikupala ayie abhúlá, abala kuto maka lí 'lá bhe i mbe de-e ababala lie ka kpéke anvi-o.<sup>14</sup> Kokpí angita maka 'kpá balua inde u agagala e magagala.

Ndu oeta hana ne okpøme hana ayie bhú dá o.<sup>15</sup> Ongbengbe ongámási na doto, ne ongbengbe okpála, ne ongbengbe ongámási na sudha, ne obhulu tia, ne okpála na angu di ne ndu okpála koko hana, obalise ne okpála inde bhú bali ade, ndu uo hana awowo lio bhú ogudho teme ne bhú oeta.<sup>16</sup> U aholo apa pí oeta di ne pí ongbengbe teme me: «Yi bala pí ya, amba yi wo ya tsutsu. Yi wo ya me kpála inde adu pí kiti na ngámá-a aú ya de. Yi wo ya ka kpéke ke 'ngú gba Ndili Kandølo-o.<sup>17</sup> Padhá de, anga 'ngbé 'kpí na ke 'ngú gba uo akolo. A ti da nalu kakala da?»

## 7

*Okpála kutu kámá bini ne ndjikpa badha ne ká badha*

<sup>1</sup> Pipita-a, ma au oandjelu badha, u nde alulu li odje doto badha hana. U adu ayoko me anvi bini apé pí doto, i du di-e pí 'ngbé 'ngu ne pí ondula de.<sup>2</sup> Abhomu-o, ma au andjelu koko bini ayie ne andjonga. A adu sakpa ani ne kasé gba Ebhe na mu-o. Ani asala ne angu hana pí oandjelu badha inde li Ebhe aha nani angu nabhili doto pí o bhú dabili bini ne angu nasiti 'ngbé 'ngu-o pí o me:<sup>3</sup> «Yi abhili nga doto ne ondula padhá de. Yi asiti nga di 'ngbé 'ngu padhá de. Yi djeke nga me ya tu kasé pidi obalise gba Ebhe gba ní-e paká.»

<sup>4</sup> Ma atsia adje alo gba okpála inde u atu kasé lio-o. A adu okpála kutu kámá bini ne ndjikpa badha ne ká badha bhú ndu opiga gba omafsalaele hana.<sup>5</sup> Bhú piga gba Yuda, okpála bhe u atu kasé lio-o adu okpála kutu ndjikpa ne ká bhisi. Bhú piga gba Lubeni-e, okpála adu kutu ndjikpa ne ká bhisi. Bhú piga gba Gada-a,

okpála adu kutu ndjikpa ne ká bhisi. <sup>6</sup> Bhú piga gba Asela-a, okpála adu kutu ndjikpa ne ká bhisi. Bhú piga gba Nefitali-e, okpála adu kutu ndjikpa ne ká bhisi. Bhú piga gba Manase-e, okpála adu kutu ndjikpa ne ká bhisi. <sup>7</sup> Bhú piga gba Simeona-a, okpála adu kutu ndjikpa ne ká bhisi. Bhú piga gba Levi-e, okpála adu kutu ndjikpa ne ká bhisi. Bhú piga gba Isakala-a, okpála adu kutu ndjikpa ne ká bhisi. <sup>8</sup> Bhú piga gba Djabulona-a, okpála adu kutu ndjikpa ne ká bhisi. Bhú piga gba Djodjefu-o , okpála adu kutu ndjikpa ne ká bhisi. Bhú piga gba Bendjame-e, okpála adu kutu ndjikpa ne ká bhisi. U atu kasé li ndu okpála bhomu-o hana.

*Libi okpála inde li Ebhe alo o-o*

<sup>9</sup> Pipita-a, ma atsia matá 'kpí, ma au bhiti okpála na bhibhiti inde li kpála bini ti da nako alo gba o-o de. A du okpála na ndu bili hana, ne ndu opiga hana, ne ndu okongú hana. U alulu kala kiti na ngámá di ne kala Ndili Kandøle-o . U adyidiyí olobe na bububu, adu sakpa uo ne okpá ngulu. <sup>10</sup> U adu asusula ne angu o hana me:

«Mukobho ngayie ka Ebhe gba ní inde adu pí kiti na ngámá-o, di ne ka Ndili Kandøle-o!»

<sup>11</sup> Ndu oandjelu hana alulu dengo kiti na ngámá-o, ne dengo obhelesi okpála di ne dengo okpála badha na ngangamba-o. U atutu bhúla o ne kuto kala kiti na ngámá-o, u atsia adhøge Ebhe.

<sup>12</sup> U adu apa me:

«A adu moko!

A ayo me okpála toko Ebhe gba ní-o.

A ko Ebhe na sangu, a bhú ani ne imbilangu.

A ayo me okpála gie heni pí ani, u manga ani.

A ko Ebhe na angu.

Ani kpekpeke, duduma ne duduma!

A adu moko!»

<sup>13</sup> Suka obhelesi okpála bhomu-o ayi ma me: «Okpála inde adyi obubu lobe-e, a ko oda? U ayie la di su?» <sup>14</sup> Ma agie pí ani me: «Bhele kpála-a, mu mbila hana.» Ani atsia apa muma me: «A ko okpála inde apu bhú 'ngbé likabhu na ngbéngbé-o. U avulu olobe gba o-o, u atsia aleke ne ngute Ndili Kandøle-o ngubula me akolo bubu.

<sup>15</sup> Ka 'ngú angu-o, u alulu kala kiti na ngámá gba Ebhe-o.

U ngamene kulu lio pí ani sukpe ne ngbikpi hana bhú 'ngbé 'ti gba ani-o.

Kpála inde adu pí kiti na ngámá-a adú bhú dabili bini ne uo ngú nalila uo.

<sup>16</sup> U djé matá gumu belega de bini, u djé di matá gumu 'ngu belega de bini.

Ela, i du di-e mangua kpá bili dho-ie tsulu matá uo de.

<sup>17</sup> Padhá de, anga Ndili Kandøle inde alu kala kiti na ngámá-a adú

maka mulila gba uo ngae.

Ani ató bhúla uo li bili li okpongu na mukobho nde lie-o.

Ebhe tsia kúo ngula sala uo hana.»

## 8

*Ndili Kandøle-o asoko malika na mananika-o*

<sup>1</sup> Nedhinga li Ndili Kandøle-o asoko malika na mananika-a lie, sukpe andjili abhúla má bulu, masikpe de miniti ndjikpa bata. <sup>2</sup> Pipita-a, ma au oandjelu mananika inde alulu kala Ebhe-o. U aha ototi pí uo mananika.

<sup>3</sup> Andjelu koko bini ago alu dengo misa natsulu mangotsi pí Ebhe-o. A adu sakpa ani ne saani na olo ngú natsulu bande. U aha bandele pí ani bhelé ngú napa me ani tsulu pí Ebhe bhú dabili bini

ne omayo gba okpála gba Ebhe-o. Aní tsulu pí misa inde u abho e li olo-o. Misa ango-o adu kala kiti na ngámá-o. <sup>4</sup> Ngúwa bandele li andjelu-o adu atsulu e-e, a'e'e lie abhúlá bhú dabili bini ne omayo gba okpála gba Ebhe, anu a'u kala Ebhe. <sup>5</sup> Pipita-a, andjelu-o aha saani natsulu bandele-o. Aní abedhe ne djua inde adu oo-o, aní atsia abhike píla doto. Ekpí andjengene, mugbálá asula, adjigidjo adhika.

*Ototi badha na kalanu-o asula*

<sup>6</sup> Abhomu-o, oandjelu mananika inde aholo ototi mananika-a aleke lio ngu na'u'u.

<sup>7</sup> Andjelu na bini-e a'u toti gba e-o. Itimeli, ne djua bhú dabili bini ne ngute abala píla doto. A tsia atsulu té doto di ne ondula. I du me u nde agbo bhusu doto di ne ondula hana bata-a, akunda napa me bini bhú káká atsulu bhomu-o ngae.

<sup>8</sup> Pipita-a, andjelu na bhisi-e a'u toti gba e-o. Ehe bini maka 'ngbé 'ta djua ati bhú 'ngbé 'ngu. Engu agbo bhusu e bata, bhe bini-e atsia adji lie ngute. <sup>9</sup> Té ndu 'he li Ebhe abho e hana inde ngadu abhú 'ngbé 'ngu, bhú dabili bini ne ozabu-o atsia amu. U po bhúla ndu 'he inde li Ebhe abho e bhú 'ngbé 'ngu, u po di bhúla ozabu hana-a, u tsia gbo bhusu bhusu bata-a akunda napa me akpi bhomu-o ne bini bhú káká.

<sup>10</sup> Abhomu-o, andjelu bhe na bata a'u toti gba e-o. 'Ngbé ikupala bini inde li zi e adu atsi maka zi 'ké na ngbéngbé ayie abhúlá, ati kuto. A atsia ati pí té ongade 'ngu di ne okpongu-o. I du me u nde apo bhúla ongade 'ngu di ne ondjingu hana-a, u tsia gbo bhusu bhusu bata-a, akunda napa me ati bhomu-o pí bini bhú

káká. <sup>11</sup> A adu 'li ikupala ango-o me «Ehe na susu.» Abhomu-o, té oengu-o akolo susu. Bhelé na okpála inde andji-e atsia amu, anga akolo susu.

<sup>12</sup> Pipita-a, andjelu na badha-a a'u toti gba e-o. A asu té ela ne té epe di ne té oikupala. I du me u nde agbo bhusu ela ne epe di ne oikupala ne ndundundu bata-a, akunda napa me a asu bhomu-o bini bhú ká ndundu hana. A atsia abili bhúla uo hana li pápá bini bini. Zi ngbikpi du matá nasu libhomu de, abana di zi epe. I du me u nde agbo bhusu zi ngbikpi ne ndundundu bata, u gbo di bhusu zi epe ne ndundundu bata-a, akunda napa me bini bhú ká ndu uo bini bini hana du matá nasu-u de.

<sup>13</sup> Pipita-a, ma atsia matá 'kpí, ma adje ndua bini me aní nde ngakodho 'kpí abhúlá tsutsu naali. Aní adu nasusula me: «A ko likabhu! A ko likabhu! A ko likabhu pi okpála na doto li oandjelu bata bhe koko a'ú toti gba o-o lie ko.»

## 9

*Andjelu na bhuluvue a'u toti gba e-o*

<sup>1</sup> Abhomu-o, andjelu na bhuluvue a'u toti gba e-o. Ma au ikupala bini ayie abhúlá, ati píla doto. U atsia aha lifungula na 'bhø tsu 'dú-o\* pi ikupala ango-o. <sup>2</sup> Ikupala bhomu-o abhulu bhøbhø. Ngúwa bini akoto bhøbhú maka ngúwa na ndingidhi djua. Bhúla ela ne bhúla 'kpí atsia abili ka ngúwa ango-o má pi! <sup>3</sup> Omakilingbo aze bhú ngúwa bhomu, u atsia ayangba píla doto. U aha nani pi uo silí maka bhende gba oapekebhe. <sup>4</sup> U aha líli pi uo me u améne ulu sisiti de, u améne ondula sisiti de, u améne di ohe

\* 9:1 9:1 Tsu 'dú: A ko bili inde li osisiti bua ngadu li e.



inde ngakø bhú doto sisiti de. Engú bini, u mene mangbo sisiti bha bini okpála bhende li kasé gba Ebhe-e nde pidi o ade-o. <sup>5</sup> U ha kpadji pí uo ngú nabhili okpála bhomu-o de, engú bini, u to mbolo li uo ngú epe bhuluvue. Mbolo ango-o adú ami li uo maka ngabhø apekebhe amimi lie me a nde adho kpála-o. <sup>6</sup> Bhú epe bhuluvue bhomu-o, okpála agáli kuo, engú bini, u úu de. U adú ne gumu namu, engú bini, kuo akpé de uo tsutsu.

<sup>7</sup> Omakilingbo bhomu-o adú maka opunda inde bedhe ngú egú. A adú pí 'ndji uo ne ehe maka ndata na ngámá inde u abho e li olo. Bhúla uo adú maka bhúla okpála-kuti. <sup>8</sup> Sundjo adú bhú 'ndji uo ndjandjandja maka sundjo olisi. 'Te uo adú maka ote okingbi. <sup>9</sup> Mbulu uo adú mugito me u adyi tété bongo na kalase. Gili mbudha uo adú aú mugito me a ko gili bhiti opunda inde adji bhú 'gú. <sup>10</sup> A adú li uo ne soso maka 'so apekebhe, atsia adú bhúbhú ne síli inde u adú ato mbolo li okpála ne e ngubula epe bhuluvue-o. <sup>11</sup> Ngámá gba uo adú ne andjelu na tsu 'dú. A adú 'li ani bhú eli gba omaYuda me: «Abadona.» Bhú eli gba oGiliki-e, a adú 'li ani me: «Apoliona.» A akúnda napa me bhulu nabhele kuti.

<sup>12</sup> Likabhu na bini-e akodho 'kpí akodho. 'E-e! Likabhu koko bhisi matá ngago pipíta.

*Andjelu na madhia a'u toti gba e-o*

<sup>13</sup> Pipíta-a, andjelu na madhia a'u toti gba e-o. Ma adje eli ayie ne li odje misa natsulu bandele pí Ebhe-e badha hana. Misa ango-o adú kala Ebhe, u amene li olo. <sup>14</sup> Eli ma adje e apa pí andjelu na madhia inde adú ne toti sakpa e me: «Bhulu oandjelu badha inde u agbigbite o ne

ekpú dengo ngade 'ngu na Efalate-o.» <sup>15</sup> U atsia abhulu oandjelu badha-o. Li nedhinga bhomu-o, bhú ekpí bhomu, bhú epe bhomu di ne kalanga bhomu-o, oandjelu bhomu-o adú nani bedhe ngú nabhili té okpála na doto. A akúnda napa me, i bhaka okpála bata-a, u bhéle bini bhú ká uo.

<sup>16</sup> U atsia apa di alo na osudha inde adú agu 'gú me u nde ne punda-a muma. A adú osudha koto ne koto. <sup>17</sup> Lele li opunda di ne osudha inde adú pí uo akoto li ma lie bhú 'he maka loto-o adú me: u adyidi ombulu bongo na kalase me a nde andjundju maka djua, bíbílí maka kokpí, a adú di ndjendje maka 'kpá bhugá. 'Nnji opunda ango-o adú maka ondji kingbi. Adú naze bhú 'bhø uo ne djua, ne ngúwa di ne baluti. <sup>18</sup> Té okpála na doto atsia amu ka olikabhu bata inde adú aze bhú 'bhø opunda bhomu-o. A akúnda napa me okpála adú amu ka djua, ne ngúwa di ne baluti. I bhaka okpála bata-a, akúnda napa me a bhéle kpála bini bhú ká uo. <sup>19</sup> Padhá de, anga angu opunda bhomu-o bhú 'bhø o di ne bhú 'so o, anga 'so uo mana kpálu. A tété ne 'ndji 'ndji inde u ngamene okpála ne e sisiti-o.

<sup>20</sup> Dú okpála bhe atigala-a, inde i mu ka olikabhu bata bhomu-o de, u dji bua o li nadhøgø oehe inde u amene e ne 'kpa o-o de. U 'o nadhøgø osisiti bua de, ne okulu 'he na olo ne aladja di ne bhe na kalase na kpéke mase, ne obhe na teme, i dú di-e obhe na ndula-a de. Okulu 'he ango-o u 'kpí de, u dje 'kpí de, u dhakú di-i de. <sup>21</sup> Okpála ango-o dji bua o li nabhili okpála de. U dji di bua o li kobha gba o-o de. U dji di bua o li namene zabhe gba o-o de. U dji di bua o li ezi gba o-o de.

## 10

*Andjelu inde adu sakpa e ne mboye 'kpá balua-o*

<sup>1</sup> Pipita-a, ma au andjelu koko bini na angu ayie abhúlá. Bongo gba ani-e adu maka ndindi, atsia abuku ani má bhelele! Makilima aga 'ndji ani ngbalina, bhúla ani adu maka ela. 'Dhu ani adu maka dingidhi djua. <sup>2</sup> A adu sakpa ani ne mboye 'kpá balua inde u abhulu e mabhulu. Ani a'o 'dhu e na kokpa-a pí 'ngbé 'ngu, ani atsia a'o bhe na gali-e pí doto. <sup>3</sup> Ani asula kpekpeke maka kingbi inde ngangulumba. Ani asula lie, muḡbálá mananika atsia asula. <sup>4</sup> Ma di me ye engú inde li omuḡbálá mananika bhomu-o apa e bhú nasula ka o-o. Engú bini, ma adje eli bini ayie abhúlá, atsia apa muma me: «Wo engú inde li omuḡbálá mananika bhomu-o apa e mawo. Mo oyé-e de.»

<sup>5</sup> Abhomu-o, andjelu inde ma de au e me ani nde a'o 'dhu e bini pí 'ngbé 'ngu, koko pí doto-o a'e 'kpa e na kokpa-a ne bhúlá. <sup>6</sup> Ani atsia atɔ silika ne 'li Ebhe inde bhú mukobho dudama ne dudama-o, Ebhe inde abho kokpí di ne ndu 'he hana inde bhúbhú-o, abho doto di ne ndu 'he hana inde bhúbhú-o, inde abho 'ngbé 'ngu di ne ndu 'he hana inde bhúbhú-o. Andjelu ango-o apa me: «Nedhinga matá-a ade! <sup>7</sup> Engú bini, nedhinga li andjelu na mananika-a ahólo na'u totí gba e lie, abhomu-o Ebhe tsia méne engú inde ani awo nani e ko. Ani améne maka ani apa nani pí obalise gba e opolofeta lie ko.»

<sup>8</sup> Abhomu-o eli ma de adje igini e ayie abhúlá-a apa matá muma me: «Nu ha mboye 'kpá balua inde abhulu lie mabhulu-o sakpa andjelu alu me ani nde a'o 'dhu e bini pí 'ngbé 'ngu, ne koko pí doto

ko.» <sup>9</sup> Ma atuto lima de andjeluo. Ma atsia ayo ka ani me ani ha mboye 'kpá balua-a muma. Ani agie muma me: «Haha, amba mu zu. A adú bhú 'bhø mu kpikpili maka 'mu eú, la mo obhí lie, a adú bhú 'ndja mu susu.» <sup>10</sup> Ma aha mboye 'kpá balua sakpa andjeluo, ma atsia azu. A adu bhú 'bhø ma kpikpili maka 'mu eú. Engú bini, ma azu lie, a adu bhú 'ndja ma susu. <sup>11</sup> Abhomu-o, u atsia apa muma me: «A ayo matá me mu kpokpo 'ngú li Ebhe apa me ni améne e pí bhiti okpála na ndu bili hana-o, engú ani apa me ni améne e pí bhiti okongú, di ne pí bhiti ongbengbe ongámási-o.»

## 11

*Ebhe atima opolofeta bhisi*

<sup>1</sup> Pipita-a, u aha mbamba muma bini. A adu maka ndula u apipima 'he ne e-o. U atsia apa muma me: «Nu pima 'ngbé 'ti Ebhe di ne misa natsulu enu pí Ebhe-o. Mu tsia ko di alo gba okpála inde ngadhøø Ebhe bhú 'ngbé 'ti gba ani-o. <sup>2</sup> Engú bini, 'o mbadhasu na 'ngbé 'ti Ebhe-e li ngongo. Mo opíma de, anga Ebhe apu nani bhobhomu-o pí okpála inde ne omaYuda ade-o. U adédele ḡadhu na bubu gba Ebhe-e ngubula epe ndjikpa badha ne ká bhisi. <sup>3</sup> Ma atíma obhulu nakpo 'ngú gba ma bhisi-e me u nde adyi bongo na talia. Ma atíma uo ngú nakpokpo engú gba Ebhe. U akpókpo 'ngú ango-o ngubula ekpí kòtø bini, kámá bhisi ne ndjikpa madhia.»

<sup>4</sup> Obhulu nakpokpo 'ngú bhisi bhomu-o, a ko ondula na olive bhisi di ne otala bhisi inde ngalu kala Ngámá na doto-o. <sup>5</sup> Li kpála le namene uo sisiti-e, djua kóto bhú 'bhø uo, i tsia bhíli obhulu yala gba uo-o. A bhomu-o lele maka u abhóle bhulu yala gba

o lie-o. <sup>6</sup> A bhú uo ne angu nagbite kokpí ngubula me ebha adhí-i de, nakolo li 'kpí inde u andjía nakpokpo engú gba Ebhe-e lie-o. A di bhú uo ne angu nadji engu me akolo ngáte. A bhú uo ne angu natu pèdjè pí doto me ndu olikabhu ngangá mene doto li ndu nedhinga hana inde u akunda lie.

<sup>7</sup> Nedhinga u andjía nakpokpo 'ngú li Ebhe atima uo ne e lie, enu inde adu bhú tsu 'dú-o há 'gú ne uo. Aní há angu uo, aní tsia bhíli uo. <sup>8</sup> Kuo uo atígala li 'ngbé 'hi kpadji na 'ngbé gadhú inde u agi nani Ngámá gba uo lie li kulusi-o. U agisila li gadhú angoo 'hí. U agisila lili me Sodomu, i du di-e Edjipeto. <sup>9</sup> U ziba de me okpála zi kuo uo-o de. Okpála na ndu bili hana, ne ndu opiga hana, ne ndu okongú hana adú ago natsia okuo uo ngú okpí bata ne ndundu. <sup>10</sup> Okpála na doto akpí djali li nakpi ka uo-o. U améne anokomia na djali, u tsia dú apu 'he sunda o. U améne mo-o anga opolofeta bhisi bhomu-o amene uo kpékpéke naali.

<sup>11</sup> Engú bini, pita ekpí bata ne ndundu bhomu-o, ewo bini na mukobho ayie agba Ebhe ali bhú uo, u atsia ayie bhúlá. Abhomu-o, 'ngbé tsulu na ngbéngbé ati pí okpála bhende adu natsia uo-o. <sup>12</sup> Opolofeta bhisi bhomu-o atsia adje eli na kpékpéke inde ayie abhúlá. Eli angoo apa pí uo me: «Yi 'u eil.» U atsia a'u abhúlá bhú ndindi me obhulu yala gba uo nde ngatsia uo. <sup>13</sup> Bha bhú nedhinga bhomu-o, kpéke adjigidjo adyiki bili, té gadhú-o atuko. I du me u nde agbo bhusu gadhú-o ne ndundundu ndjikpa-a, akunda napa me adjigidjo bhomu-o adyiki bini bhú káká. Abhomu-o, okpála ketè mananika amu ka

adjigidjo angoo. Obhe atigala-a, tsulu abedhe uo bedhe. U atsia adhègè Ebhe inde abhúlá-o.

<sup>14</sup> Likabhu bhe na bhisi-e akodho 'kpí akodho. 'E-e! Bhe na bata agó mbia inde?

*Andjelu na mananika-a a'u toti gba e-o*

<sup>15</sup> Abhomu-o, andjelu na mananika-a a'u toti gba e-o. Oandjelu atsia asula abhúlá kpekpeke me:

«Nau na doto ibili sakpa ngámá gba ya,  
ne Masiya gba e-o.

Ngámá gba ya-a aú duduma ne duduma!»

<sup>16</sup> Obhelesi okpála ndjikpa bhisi ne ká badha inde adulu pí odabili na ngámá gba o kala Ebhe-e atutu bhúla o ne kuto. U atsia adhègè Ebhe, <sup>17</sup> u apa me:

«Ebhe Ngámá Apí 'Kpí, ngamu kpála inde uu,  
inde adu di nani uu,  
ya ngatoko mu,  
anga mo opana angu gba mu,  
ndu 'ngú hana agie lie sakpa mu.  
Mo otsia au ngámá pépé.

<sup>18</sup> Opiga na doto azi nani mbutu li mu naali,  
la mbia inde-e,  
ke 'ngú gba mu-o ago pí uo ago.

Nedhinga nakodho 'ngú gba okpála inde amu-o akolo.

A ko nedhinga inde mo ogie bádha 'ngú lie

pí obalise gba mu opolofeta di ne ndu okpála gba mu-o hana,

inde di ngamanga mu,  
ongbengbengbe ne odjedjedje-o.

A ko nedhinga ngú nabhili obhe ngabhèle doto-o.»

<sup>19</sup> Abhomu-o, 'ngbé 'ti Ebhe inde abhúlá-a abhulu lie, u atsia au

\* 11:19 11:19 Sanduku na gandja: A ko sanduku inde u abu nani opapala teme inde u aye olíli ndjikpa gba Ebhe-e bhú e-o.

sanduku na gandja-o.\* Ekpí and-jengene, mɔgbálá asula, adjigidjo di ne itimeli na kpekpeke adhika.

## 12

*Engú na ngangamba inde abhaka elə inde adu nazu*

<sup>1</sup> Pipita-a, ma au engú bini na ngangamba ngamene lie abhúlá: a adu elə bini inde adyi li kute e ela. Epe adu sa 'dhu ani. A adu bhú 'ndji ani ne ndata na ngámá inde li e ne oikupala ndjikpa ne ká bhisi. <sup>2</sup> Elə ango-o adu ne ebhi. Nedhinga ani adu adjeke nazu lie, ani adu natu 'ue ka nazu ka bhú 'bu e-o.

<sup>3</sup> Engú na ngangamba koko amene matá lie abhúlá: a adu 'ngbé kpulu na ngbéngbé. Kute ani adu mbembe má ngua! A adu li ani ne ondji 'ndji mananika, di ne odidi ndjikpa. A adu pí ndu ondji ani hana ne ndata na ngámá. <sup>4</sup> Ani apo té oikupala ne 'so e, ani atsia abala uo kuto. A akunda napa me u po bhúla ndu oikupala hana-a, u tsia gbo bhusu bhusu bata-a, ani abala kuto bhomu-o bini bhú káká. Ani atsia anu alu kala elə inde adu akunda nazu-o ngubula me, ni zu ndili li elə bhomu-o azú e bha li nedhinga nakoto ka ani-o. <sup>5</sup> Abhomu-o, elə-o azu ndili na bhobhoko. Ani aú pí 'ndji ndu opiga hana ne angu. Kolo me-e, u atsia a'e ndili bhomu-o anu ne ani denko Ebhe, di ne denko kiti na ngámá gba ani-o. <sup>6</sup> Elə-o atsia akpe abhú 'gu li bili inde li Ebhe aleke nani e pi ani, ngu napa me ni ku ani ngubula ekpí ketə bini, kámá bhisi ne ndjikpa madhia-o.

<sup>7</sup> Abhomu-o, gbele aka abhúlá. Mikaele ne oandjelu gba e agu 'ngbé kpulu-o. Kpulu ango-o atsia aholo di gbele bhú dabili bini ne oandjelu gba e-o. <sup>8</sup> Engú bini, Mikaele ne oandjelu gba e agboko egú-o. Kaka-a, 'ngbé kpulu-o ne

oandjelu gba e sia matá bili da nadu abhúlá de. <sup>9</sup> U atsia abhike 'ngbé kpulu-o kilidjo. A ko kpulu na didili, inde u nga'i e me Djabulu, i du di-e Satana, bhulu napite okpála na doto libhomu-o. U abhike ani kuto bhú dabili bini ne oandjelu gba e-o.

<sup>10</sup> Pipita-a, ma adje kpéke eli bini ayie abhúlá. Eli ango-o adu apa me:

«Nedhinga li Ebhe gba ní-e ngakobho okpála lie akolo!

Mbia inde-e, Ebhe gba ní-e asuno angu gba e me ni ne ngbé Ngámá-a asuno!

Mbia inde-e, angu sakpa Masiya gba ani-o.

Padhá de, anga u abhike bhulu napa 'ngú li ondaise ní-e akilidjo,

ngaani kpála inde adu apa 'ngú li uo pi Ebhe gba ní-e ngbikpi ne sukpe-o.

<sup>11</sup> Ondaise ní aha angu ani ka ngute gba Ndili Kandole di ne ka nakpokpo 'li Ebhe pi okpála.

U kpe kuo de, u atsia atse 'kpa li mukobho gba o ngubula me o mumu.

<sup>12</sup> Kaka-a, ne kokpí ne yi okpála inde ngadulu bhúbhú hana-a, yi du bhú djali!

A ko la mangua likabhu dho pi yi okpála inde ngadulu píla doto ne yi obhe ngadulu bhú 'ngbé 'ngu-o, anga djabulu akə agba yi akə.

Ani abedhe ne egú bedhe, anga ani mbila hana me nedhinga atigala pi ni bedi.»

<sup>13</sup> Li 'ngbé kpulu-o au lie me u abhike ni kuto abhike-e, ani aholo nabhike elə inde azu igini ndili na bhobhoko bhomu-o. <sup>14</sup> Engú bini, u aha mbudha 'ngbé ndua pi elə bhomu-o ngu napa me ani 'ulu, amba ani nu du li bili inde u aleke

e pi ani abhú 'gu-o. U atsia adu akú ani oo ngubula kalanga bata ne ndundu me 'ngbé kpulú-o nde to mbolo li ani de. <sup>15</sup> Abhomú-o, kpulú-o atsia azie engu bhelé nganda elé-o maka ngade 'ngu, da napa me akpe ne ani. <sup>16</sup> Engú bini, doto ago ateteke elé-o. Doto abhulu 'bhé e, atsia abhi engu li 'ngbé kpulú-o azie e-o. <sup>17</sup> Li bua kpulú-o ake lie ne elé-o, ani anu aha 'gú ne dú ongisi gba elé-o, obhende ngamanga Ebhe inde di ngalila kakulú 'ngú inde li Yesu ambamba ta e-o. <sup>18</sup> Pipita-a, 'ngbé kpulú-o anu adu pi sike lingo 'ngbé 'ngu.

### 13

*'Ngbé kpulú-o aha angu gba e pi nute koko*

<sup>1</sup> Pipita-a, ma au enu bini ngakoto abhú 'ngbé 'ngu. 'Di ani adu ndjikpa, 'ndji ani adu mananika. Ani adyi ndata na ngámá ne ndu odi e hana. Ani atsia adyi di o'ili nasobho Ebhe ne pi 'ndji e hana. <sup>2</sup> Enu inde ma au e adu maka sia. Odhu ani adu maka bhe gba onute, 'bhé ani adu maka 'bhé kingbi. 'Ngbé kpulú-o aha angu na ngbéngbé gba e pi enu-o. Enu-o atsia adu pi kiti na ngámá gba ani-o. <sup>3</sup> Suka ondji ani adu mugito me u abi eka bhe na mugwe mugwe, engú bini eka na mugwe mugwe angoo atsia ambe. Engú bhomu-o atsia angamba okpála na doto libhomu. Kaka-a, u atsia akpata enu bhomu-o. <sup>4</sup> Ndu okpála hana atsia aholo nadhögö 'ngbé kpulú-o, anga ani aha angu pi enu-o. Ndu okpála hana adhögö di enu-o ne napa me: «A ko da inde maka enu inde? Ati da nagu ani da?»

<sup>5</sup> U aha nani kpadji pi enu bhomu-o me ani du napa oeli na 'ngbé 'ndji, amba ani du di nasobho Ebhe. U aha angu pi ani

ngú namene engú bhomu-o ngú epe ndjikpa badha ne ká bhisi. <sup>6</sup> Ani aholo napa osisiti 'ngú li Ebhe, ne nasobho 'li ani di ne nasobho bili inde ani adudu li e, di ne okpála hana inde adudu abhúlá-o. <sup>7</sup> U aha kpadji pi ani me ani gu okpála gba Ebhe di ne naha angu uo. U aha angu pi ani pí 'ndji okpála na ndu bili hana, ne ndu opiga hana, ne ndu okongú hana. <sup>8</sup> Ndu okpála na píla doto hana inde u ye nani 'li o bhú bhuku na mukobho-o de-e, adhögö ani. Bhuku angoo, a ko bhe gba Ndili Kandelö inde u abhelö e-o. U ye nani 'li uo bhúbhú de, nayie maka li Ebhe abho doto lie-o.

<sup>9</sup> Yi dje ndjindji, i du me a nde li yi ne djedje nadjé 'kpí ko.

<sup>10</sup> Kpála inde ayo me ani nu bhú tikpu-o,

anú bha bhú tikpu.

Kpála inde ayo me ani kpi li mbotia-a,

akpí bha li mbotia.

Kaka-a, a ayo me okpála gba Ebhe-e du ne 'ndjá bua,

di ne nabhuka .

*Enu koko akoto bhú doto*

<sup>11</sup> Pipita-a, ma au enu koko ngakoto bhú doto. Adu bhú 'ndji ani ne didi bhisi maka ndili kandelö. Ani atsia adu agama 'ngú maka 'ngbé kpulú. <sup>12</sup> A adu di bhú ani ne angu maka angu inde adu bhú enu bhende akoto bhú 'ngbé 'ngu-o. Ani adu amene 'he ne di kala enu bhe na 'ngbé 'ngu-o. Ani adu apa pi ndu okpála na doto hana me, u dhögö enu na 'ngbé 'ngu li eka na mugwe mugwe gba e ambe-o.

<sup>13</sup> Enu bhe na bhisi inde-e adu amene ongamba 'ngú na ngbengbengbe. Ani adu belegu nagbele djua nayie abhúlá nakö pí doto. Ani adu amemene li djila ndu okpála hana. <sup>14</sup> Ani adu apipite ndu okpála na píla doto hana inde

u ye nani 'li o bhú bhuku na mokobho-o de-o. Ani adu apipite uo ne ongamba 'ngú inde ani adu amene e li djila enu na 'ngbé 'ngu-o. Ani adu akata uo me u bho kulu enu inde abi nako eka na mugwe mugwe li mbotia, eka ango-o atsia ambe-o.

<sup>15</sup> Enu na bhisi-e asia angu ngú nato ewo bhú kulu enu na bini-o, ngubula me a du nagama 'ngú, amba a du nabhili ndu okpála hana inde i dhogè ni de-o. <sup>16</sup> Enu ango-o aye tele li ndu okpála hana. Ani aye li okpála koko li 'kpa o na kokpa, ani aye li okpála koko pidi o, abana i du mboye ndili, abana i du bhele kpála, abana i du bhulu tia, abana i du bhulu ndibhili, abana i du bali, abana i du kpála inde bhú bali ade. <sup>17</sup> Kpála bini ti da nakala 'he de, i du di-e natsindji 'he de, i du me tele nde li kute ani ade-o. Tele ango-o, a ko 'li enu bhomu, i du di-e alo na 'li ani-o. <sup>18</sup> A inde-e nedhinga inde ayo ne imbilangu. Kpála inde ne imbilangu-o tí da nambila ta alo gba enu-o, anga alo ango-o viti bini ne 'li kpála-kuti. Alo ango-o kámá madhia, ndjikpa madhia ne ká madhia.

## 14

*Okpála inde li Ndili Kandèlè-o akala o*

<sup>1</sup> Ma atsia matá 'kpí, ma au Ndili Kandèlè-o me ani nde alu pí eta na Siona . Okpála ketè kámá bini, ndjikpa badha ne ká badha inde u aye 'li Ndili Kandèlè di ne 'li 'Dyi ani pidi o alulu de ani. <sup>2</sup> Pipita-a, ma adje eli ayie abhúla. Eli ango-o adu mugito me a ko gili wowo 'ngu, maka gili mugbalá na kpekpeke. Eli inde ma adje e adu maka gili dumu, nedhinga li obhubhulu-o abhibhi lie-o. <sup>3</sup> Bhiti okpála bhomu-o adu ali etsi na mbia kala kiti na ngámá, di ne kala okpála

badha na ngangamba ne obhelesi okpála-o . Kpála bini ti da nale etsi ango-o de, bha bini okpála ketè kámá bini, ndjikpa badha ne ká badha li Ndili Kandèlè-o akala o píla doto-o. <sup>4</sup> Ngauo-o, u siti lio ne olisi de. U alila lio bubu kala Ebhe. U ngakpata Ndili Kandèlè-o ne ndu bili hana ani nganu li e-o. Ani akala nani uo bhú ká okpála-kuti ngubula napu uo pi Ebhe di ne pi e bhubhulu maka gina ngua. <sup>5</sup> Eu koto nani bhú 'bhe uo belegu de bini. Engú na sisiti napapa li uo ade.

*Oandjelu bata akpokpo 'ngú pindji lele maka li Ebhe akódho 'ngú lie-o*

<sup>6</sup> Pipita-a, ma au andjelu koko. Ani adu akodho 'kpí abhúla tsutsu naali maka edhu. Adu ka ani ne Bádha Ngali na duduma inde ani adu akpokpo e pi okpála na píla doto, okpála na ndu bili hana, ne ndu opiga hana, ne ndu okongú hana. <sup>7</sup> Ani adu nasusula kpekpeke me: «Yi kpe Ebhe, amba yi dhogè di ani! Padhá de, anga nedhinga me ani kodho 'ngú gba okpála na doto akolo. Yi dhogè kpála inde abho kokpi ne doto ne 'ngbé 'ngu di ne okpongu-o.»

<sup>8</sup> Pipita-a, andjelu na bhisi-e akpata bhe na kalanu-o. Ani adu apa me: «Babilona na ngbéngbé-e ati! A ati na paká paká! Ani ase ndu opiga hana ne siti vino gba e-o. Vino ango-o, a ko zabhe inde ani ngamene e-o!»

<sup>9</sup> Pipita-a, andjelu na bata akpata obhe bhisi bhomu-o. Ani adu asusula me: «Li kpála dhogè enu-o, ne kulu ani-e, li u aye di tele gba enu-o pidi e, i du di-e li 'kpa e, <sup>10</sup> kpála ango-o ndji bhadi vino na ke 'ngú gba Ebhe-o! Ebhe atúko ngili vino ango-o bhú kópo na ke 'ngú gba e-o! Ngua kpála bhomu-o asia likabhu bhú djua na baluti kala oandjelu na bububu di ne

kala Ndili Kandøle-o. <sup>11</sup> Ngúwa na djua inde ngato mbolo li uo-o nga'ɔ abhúlá ndu 'kpí hana. Ndu okpála hana inde ngadhøge enu, inde di ngadhøge kulu ani, inde u aye tele gba ani-e li o-o, ngazu likabhu ngbikpi ne sukpe. U guguo de.» <sup>12</sup> Kaka-a, a ayo me okpála gba Ebhe inde ngakpata líli gba ani-e, inde di ngalila nabhuka gba o bhú Yesu-o du ne 'ndjá bua.

<sup>13</sup> Pipita-a, ma adje eli bini ayie abhúlá, a atsia apa muma me: «Ye me: «A ko djali pi okpála inde amu nayie pi mbia inde-e me u nde abhuka Ngámá-o!» Bu Bhobua apa me: «A na paká, u guo ka bhiti kulu u amene e guguo. Padhá de, anga kulu gba uo-o ngakpata uo.»»

*Nedhinga na'e nguwa na píla doto*

<sup>14</sup> Pipita-a, ma atsia matá 'kpí, ma au ndindi bini na bubu. A adu pi ndindi angoo ne ehe maka kpála. A adu pí 'ndji ani ne ndata na ngámá inde u abho e li olo. A adu sakpa ani ne dhádha bini na dhedhe.† <sup>15</sup> Abhomu-o, andjelu koko bini akoto bhú 'ngbé 'ti Ebhe inde abhúlá-o. Ani atsia asula pi kpála inde adu pí ndindi-e me: «Ha dhádha gba mu-o, amba mu holo na'e nguwa abhiye. Padhá de, anga nedhinga na'e'e-e akolo. Nguwa na píla doto abhele ngú nakoko abhele!» <sup>16</sup> Abhomu-o, kpála inde adu pí ndindi-e apu ne dhádha gba e píla doto. Nguwa na píla doto atsia a'e lie.

<sup>17</sup> Pipita-a, andjelu koko akoto bhú 'ngbé 'ti Ebhe inde abhúlá-o. A adu di ka ani ne dhádha na dhédhé.

<sup>18</sup> Pipita-a, andjelu koko akoto li bili natsulu enu pi Ebhe-o. A adu bhú ani ne angu pí djua. Ani asula pi bhe adu ne dhé dhádha sakpa e me: «Ha dhé dhádha gba mu-o,

amba mu ko vino inde píla doto-o nedi. Líli-e ambe.» <sup>19</sup> Andjelu-o atsia apu ne dhádha gba e píla doto. Ani atsia ako vino na píla doto-o. Ani atsia abu bhú 'ngbé ngbøgele na ke 'ngú gba Ebhe-o. <sup>20</sup> U agbe ngbøgele-o bhú gudhu-o kilidjo, u atsia api lí vino-o. Abhomu-o, ngute atsia aze bhú ngbøgele-o. Ngute angoo anu a'ɔ nakolo li 'bhø opunda. A atsia ayangba masikpe de kilometele kámá bata.

## 15

*Oandjelu mananika ago ne olikabhu mananika*

<sup>1</sup> Pipita-a, ma atsia 'kpí, ma au matá engú na ngangamba koko akoto abhúlá. A adu engú na ngbéngbé inde di na tsulu tsulu. Ma au oandjelu mananika, a adu sakpa uo ne gba olikabhu mananika. Pipita-a, likabhu koko matá ade, anga a ngasuno ke 'ngú inde li Ebhe apana e li soso-o ngae.

<sup>2</sup> Pipita-a, ma au ehe bini maka 'ngbé 'ngu i mana bitolobi, a atsia amata lie ne djua. Ndu okpála hana inde aha nani angu enu-o, inde aha di angu kulu ani bhú dabili bini ne alo inde ngasuno 'li ani-e, alulu pí 'ngbé 'ngu angoo. A adu sakpa uo ne odumu li Ebhe aha e pi uo-o. <sup>3</sup> U adu ali etsi gba Moidje, bali gba Ebhe-o, di ne etsi gba Ndili Kandøle-o. Etsi angoo adu me:

«Ebhe Ngámá Apí 'Kpí,  
okulu gba mu-o ngbeng-  
bengbe.

A di na ngangamba.

'Ngbé Ngámá gba okpála,  
okpadji gba mu-o ne okukulu  
kpadji,  
a la di ngbingbili.

<sup>4</sup> A mánga mu de da, Ngámá?  
A adhége mu de da?

† 14:14 14:14 Tsia bhú Dan. 7:13.

Padhá de, anga m̄u bubu ngam̄u  
kpi m̄u kpi.

Ndu opiga hana agó atutu  
lipuku o kala m̄u.

Padhá de, anga mo opana ngbili  
'ngú gba m̄u-o pí uo apana.»

<sup>5</sup> Pipita-a, ma atsia 'kpí, ma  
au 'ngbé 'ti Ebhe inde abhúlá-  
a abhulu lie. A adu bhúbhú  
ne 'ti ngbangbalí lí Ebhe adu  
asuno lie bhú e-o. <sup>6</sup> Abhom̄u-  
o, oandjelu mananika inde adu  
ne gba olikabhu mananika sakpa  
o-o akoto bhú 'ngbé 'ti Ebhe-o.  
U adyidyí obongo inde na kpéke  
mase,\* inde avuvu má tuu tuu! U  
agbigbite di mbulu o ne mukabha  
na olo. <sup>7</sup> Suka okpála badha  
na ngangamba-a aha kópo na olo  
mananika pí oandjelu mananika-  
o. Okópo ang-o adu bedhe bedhe  
ne oke 'ngú gba Ebhe inde bhú  
mukobho duduma ne duduma-  
o. <sup>8</sup> Abhom̄u-o, 'ngbé 'ti Ebhe-  
e abedhe ne ngúwa bedhe ka zi  
Ebhe di ne angu gba ani-o. Kaka-  
a, kpála bini tí da nali bhú 'ngbé  
'ti Ebhe-e de, nakolo lí nedhinga  
lí olikabhu mananika lí oandjelu-  
o adu ne e amene lie lie-o.

## 16

*Okópo na ke 'ngú gba Ebhe*

<sup>1</sup> Pipita-a, ma adje kpéke eli ayie  
ne bhú 'ngbé 'ti Ebhe . Eli ang-o  
apa pí oandjelu mananika-a me:  
«Yi n̄n̄n̄, amba yi tuko okópo na  
ke 'ngú mananika gba Ebhe-e píla  
doto!»

<sup>2</sup> Andjelu na bini-e anu, ani atsia  
atuko ke 'ngú inde adu bhú kópo  
gba e píla doto. Abhom̄u-o, oeka  
na sisiti, inde di nake make atsia  
aze lí kute ndu okpála hana inde  
adu ne tele gba enu-o, inde adu di  
natoko kulu ani-o.

<sup>3</sup> Andjelu na bhisi-e atuko ke  
'ngú inde adu bhú kópo gba e pí  
'ngbé 'ngu. 'Ngbé 'ngu-o akolo

maka ngute kpála inde akpi. Ab-  
hom̄u-o, ndu ohe hana inde adu  
bhú 'ngbé 'ngu-o me a nde nu-o  
atsia amu.

<sup>4</sup> Andjelu na bata-a atuko ke  
'ngú inde adu bhú kópo gba e bhú  
ongade 'ngu, ne bhú okpongu. A  
atsia adji lie ngute. <sup>5</sup> Ma atsia adje  
andjelu inde adu ne angu pí ongu-  
o ngapa me:

«Ngam̄u kpála na bubu, inde nu,  
inde adu di nani nu-o, m̄u  
ne ngbili kpála ,  
anga mo opana ngbili 'ngú  
gba m̄u-o.

<sup>6</sup> Padhá de, anga okpála ab-  
hili okpála gba m̄u-o di ne  
opolofeta .

Mo oha bhadi pí uo ngute me  
u ndji.

U asia engú inde ati ne uo-o!»

<sup>7</sup> Pipita-a, ma adje eli akoto pí  
misa natsulu mangotsi pí Ebhe-o.  
Eli ang-o adu apa me:

«A ko paká, Ebhe Ngámá Apí 'Kpí,  
ndu 'ngú mo okodho e hana-a,  
mo okodho lí lelele,  
a la bhadi ngbingbili.»

<sup>8</sup> Andjelu na badha-a atuko ke  
'ngú inde adu bhú kópo gba e píla  
ela. Ani atsia aha kpadji pí ela me  
a atsulu okpála ne djua gba e-o.  
<sup>9</sup> Abhom̄u-o, bilí akpa na mugwe  
mugwe, okpála atsia atsulu kaka.  
U asobho 'lí Ebhe inde adu bhú e  
ne angu ngú natima ngua oke 'ngú  
bhom̄u-o. Engú bini, u dji bua o  
ngú nadhögö Ebhe de.

<sup>10</sup> Andjelu na bhuluvue atuko ke  
'ngú inde adu bhú kópo gba e pí  
kiti na ngámá lí enu-o adu nadu  
pí e-o. Abhom̄u-o, biti agba kuti-  
ngámá gba enu-o. Okpála atsia  
adu nazu 'mi o ka likabhu. <sup>11</sup> U  
adu asobho 'lí Ebhe abhúlá ka  
olikabhu gba o di ne ka oeka inde  
adu lí uo-o. Engú bini, u dji bua o  
lí osisiti 'ngú inde u adu namene  
e de.

\* 15:6 15:6 Bongo na kpéke mase: U abho nani bongo ang-o lí lene.



<sup>12</sup> Andjelu na madhia-a atuko ke 'ngú inde adu bhú kópo gba e pí ngade 'ngu na Efalata. Engu-o atsia a'ulú hana ngú naka kpadji pí ongámási inde ngayie ne ndjongu-o. <sup>13</sup> Abhomu-o, ma au osisiti bua bata ngakoto bhú 'bhé 'ngbé kpulú-o ne bhú 'bhé enu-o, di ne bhú 'bhé polofeta na eu-o. Osisiti bua ango-o adu maka omabi-anga. <sup>14</sup> A ko osisiti bua inde li djabulú atima o-o. U adu amene ongamba 'ngú . U adu nanu agba ongbengbe ongámási na doto libhomu ngú napo bhúla uo ngubula gbele na 'ngbé 'kpí gba Ebhe Apí 'Kpí-o.

<sup>15</sup> Ngámá Yesu apa me: «Tsitsia! Ma ngago maka bhulú 'zi! A ko djali pí kpála inde li zuku, inde ngalila obongo gba e li kate e ngú napa me ni anú ndumbu de, me ni asía nümü de ka nakoto bhú djila okpála ndumbu-o.»

<sup>16</sup> Osisiti bua apo bhúla ongbengbe ongámási li bili inde u a'i e bhú eli gba omaYuda me Alamagedo.

<sup>17</sup> Andjelu na mananika-a atuko ke 'ngú inde adu bhú kópo gba e atú 'kpí. Kpéke eli bini atsia akoto abhú 'ngbé 'ti Ebhe. A ayie li pápá na kiti na ngámá-o. A apa me: «A amene lie amene!» <sup>18</sup> Abhomu-o, ekpí andjengene, mugbálá asula, adjigidjo na kpekpeke adhika. Ngua 'ngú bhomu-o mene nga nani lie kalanu de, nayie maka li Ebhe abho kpála píla doto lie-o! <sup>19</sup> 'Ngbé gudhu na Babilona agugumu bhusu e ne ndundundu bata. Abhomu-o, ndu ogudhu na okuti hana atuko kuto. Abhomu-o, Ebhe atsia a'o nga la 'to e 'to 'ngbé gudhu na Babilona. Ani atsia aha pí ani kópo na vino na ke 'ngú gba e na sisiti inde adu adula bhú e madula me ani ndji. <sup>20</sup> Ndu okpeme hana atsia angita, ndu oeta hana atsia

angita di. <sup>21</sup> Ongbengbe itimeli na titili masikpe de kilo ndjikpa badha atsia abala pí okpála. Abhomu-o, okpála atsia asobho Ebhe ka likabhu na itimeli-o. Padhá de, anga likabhu ango-o adu kpekpeke na kuo kuo.

## 17

### *Nakodho 'ngú gba okpála na Babilona*

<sup>1</sup> Abhomu-o, suka oandjelu mananika inde i de ne okópo na ke 'ngu-o sakpa o ago apa muma me: «Gogo, ma asúno pí mu lele maka li Ebhe akodho 'ngú gba 'ngbé bhulú zabhe-e lie-o. A ko 'ngbé gudhu inde u ayiki e lingo ongbengbe ongade 'ngu bhelé. <sup>2</sup> Ongbengbe ongámási na doto amene zabhe ne ani. Okpála na doto atsia alangba ne vino gba ani na zabhe-o.»

<sup>3</sup> Abhomu-o, Bu Bhobua abedhe ma, Andjelu-o atsia anu ne ma abhú mili bili. Ma au ele bini inde adu pí enu na mbembe má ngua! Enu ango-o abuku kate e libhomu ne o'ili inde ngasobho Ebhe, 'ndji 'ndji adu li ani mananika di ne didi ndjikpa. <sup>4</sup> Ele ango-o adyi obongo na mbembembe na tia naali. Ani atsia adyi omagege na olo ne obhe na teme na mase naali di ne omayaka li kate e bedhe. A adu sakpa ani ne kópo na olo inde abedhe ne zibotu bhú e bedhe ka zabhe gba ani-o. <sup>5</sup> U aye pídi ani 'ili bini inde li ta e awo lie mawo. 'Ili ango-o me: «BABILONA NA NGBÉNGBÉ, 'HI OBHULU ZABHE DI NE OSISITI 'NGÚ NA DOTO-O.» <sup>6</sup> Ma au me ele ango-o alangba ne ngute okpála gba Ebhe-o, ngute obhe u abhili o ka u abhuka Yesu lie-o. Ma au ani lie, ma angamba naali.

<sup>7</sup> Abhomu-o, andjelu-o apa muma me: «Mu ngangamba ka ni? Ngama-a, ma ambamba ta 'ngú gba ele bhomu-o ne enu inde

abi ani-e pi mu, enu inde li e ne 'ndji 'ndji mananika di ne odidi ndjikpa-o. <sup>8</sup> Enu inde mo ou e bhomu-o, adu nani tété. La-a, ani matá ade. Ani akóto bhú tsu 'dú-o, ani tsia nú bhú ngita gba e-o. Okpála na doto inde u ye nani 'li o bhú bhuku na mukobho-o de nayie maka nani li Ebhe abho doto lie, angamba li nau enu-o. Padhá de, anga ani adu nani tété, la-a ani matá ade. Engú bini, ani akóto matá ne toto.

<sup>9</sup> A ayo mbia inde-e nadu ne imbilangú di ne bua nakpokpo kú 'ngú. Ondji 'ndji mananika-a, a ko oeta mananika inde li elø-o ngadu pí e-o. A ko di ongbengbe ongámási mananika-o. <sup>10</sup> Obhe bhuluvue bhú ká uo-o, kulu gba uo-o andjia, bhe na madhia ngabha bhú kulu, bhe na mananika-a go nga de. Ani agó lie, ani améne bha nedhinga masudha. <sup>11</sup> Enu inde adu nako tété-e, inde matá tété ade bhomu-o, ngaani makpe-e, a ko 'ngbé ngámá na madjina. Ani bhú ká ongbengbe ongámási mananika-o. Ani adji bhú ngita gba e-o.

<sup>12</sup> Odidi ndjikpa inde mo ou e bhomu-o, a ko ongbengbe ongámási ndjikpa inde i 'u nga pí kiti na ngámá de-o. Engú bini, u asia angu ngú nau bhú dabili bini ne enu-o ngú saa bini. <sup>13</sup> Ndu ongámási ndjikpa bhomu-o hana bha ne koli mabhundja bini. U ne gumu naha angu di ne ngámá gba o ngú namene kulu lio pi enu-o. <sup>14</sup> U agú gbele ne Ndili Kandølo-o, la-a, Ndili Kandølo-o ahá angu uo. Padhá de, anga a ko Ngámá gba ongámási, a ko 'Ngbé Ngámá gba ongbengbe ongámási. Omaha Ndili Kandølo inde ani a'i o-o, ani atsia alo o-o, u ahá bhadi angu uo bhú dabili bini ne ani. U ngakpata Ndili Kandølo-o ne bua o bini.»

<sup>15</sup> Pipita-a, andjelu-o apa matá mama me: «Oengu inde mo ou e

li bili inde li elø na zabhe alu li e bhomu-o, a ko okpála na ndu bili hana, a ko bhiti okpála, a ko opiga di ne okongú. <sup>16</sup> Odi 'nu ndjikpa ne enu inde mo ou e bhomu-o, ayála elø na zabhe-o. U bhá 'he li ani hana, u a'ó ká ani ndumbu, u azú mbilika ani, u tsia bú dú ani bhú djua. <sup>17</sup> Padhá de, anga Ebhe a'o li bua uo me u mene mukunda gba ani-o. U améne ne bua bini me o ha angu na ngámá gba o me o mene kulu lio nedi pí enu-o, nakolo li nedhinga li 'li Ebhe améne lie lie-o. <sup>18</sup> La di-e, elø inde mo ou e-e, a ko 'ngbé gudhu inde ngau pí ongámási na doto-o.»

## 18

### *Nati ka gudhu na Babilona*

<sup>1</sup> Pipita-a, ma au andjelu koko ayie abhúlá ngakø kuto. A adu bhú ani ne angu na ngbéngbé. Abhomu-o zi ani abha doto libhomu. <sup>2</sup> Ani asula kpekpeke me:

«'Ngbé Babilona ati-e ngae! 'Ngbé Babilona ati-e ngae!

A akolo ibili bili li odjabulu ngadulu li e, bili inde li ndu osisiti bua hana ngadulu li e.

A bhomu-o bili li odhu ne onu inde kala Ebhe sisiti-e ngadulu li e-o.

<sup>3</sup> Padhá de, anga ndu okpála na doto hana andji siti zabhe gba ani-e

maka okpála andjindji vino lie-o.

Ongbengbe ongámási na doto amene zabhe ne ani, obhulu natsindji 'he na píla doto atsia akpo di li angu na bhiti tia gba ani-o.»

<sup>4</sup> Pipita-a, ma adje eli koko ayie abhúlá. A adu apa me:

«Ngayi okpála gba ma-a, yi ze bhú Babilona zeze, amba yi améne siti 'ngú bhú dabili bini ne ani de,

ngú napa me yi asía olikabhu inde  
abháka aní-e bhú dabili  
bini ne aní de.

<sup>5</sup> Padhá de, anga osisiti 'ngú gba  
aní-e apo 'ta e akolo makolo  
abhúlá.

Ebhe atsia abhundja osisiti  
'ngú gba aní-o.

<sup>6</sup> Yi mene aní maka aní amene  
okpála koko lie-o.

Yi gie siti 'ngú aní amene e pi  
aní bhútsibhútsi bhisi.

Yi ha pandi inde ane bhe gba  
aní-e ne kpéke bhútsibhútsi  
bhisi-e pi ani

bhú kópo inde aní adu a'o  
pandi gba e bhú 'bhé  
okpála ne e ko.

<sup>7</sup> Aní adu akpi ndjili naali bhú  
asasaua na tia gba e-o.

Kaka-a, yi gie di likabhu ne  
mulo polo pi aní li lelele.

Padhá de, anga aní ngapa li bua e  
me:

«Ma adu pí kiti na olo gba  
ngámá, ma ne oké ade,

ma adú galikpe bhú talia de.»

<sup>8</sup> Kaka-a, ndu okpekpeke da 'ngú  
inde a'o lie pi aní-e agó  
galikpe atí pí ani

li koli 'kpí bini ndundu hana.

Okpekpeke da 'ngú ango-o ngae  
inde: nakpi ka okpála, talia  
di ne gumu,

li djua tsia tsulu di aní hana  
má kpékébhé!

Padhá de, anga Ngámá Ebhe inde  
akodho 'ngú gba aní-e, ne  
kpála na angu.»

<sup>9</sup> Abhomu-o, ongbengbe  
ongámási na doto inde-e amene  
zabhe bhú dabili bini ne aní. U  
akpi ndjili ne aní li bhiti tia gba  
aní-o. Li u aú ngúwa djua atsulu  
aní-e lie, u kú 'gbá, u tsia lópolo di  
lio ngú aní. <sup>10</sup> U alúlu de aní tsutsu  
ka nakpe likabhu inde abhaka  
aní-o. U tsia pá me:

«A ko likabhu na ngbéngbé pi mu,  
Babilona!

Mu ne 'ngbé gudhu, mu la di  
ne angu.

La-a, Ebhe akodho 'ngú gba mu-o  
bha bhú saa bini padhá!»

<sup>11</sup> Obhulu natsindji 'he di gaku  
'gbá, uo di bhú talia li 'ngú gba  
aní-o. Padhá de, anga kpála bini  
ngakala matá ehe gba uo-o ade.

<sup>12</sup> Abana i du di-e olo, ne oaladja,  
ne oteme na mase ne omayaka,  
kpála bini ngakakala ade. Abana  
i du obongo na kpéke mase,  
ne ombembe obongo na zizi, ne  
obongo inde u abho e li dele gba  
okéké, kpála bini ngakakala ade.  
Abana i du ndu djua ondula na  
babadha sese hana, abana i du  
ndu djua oehe inde u abho e li  
'te 'ya hana di ne obhe u abho  
e li ondula na mase hana, ne  
obhe u abho e li teme, kpála bini  
ngakakala ade. Abana i du di-  
e ndu djua kalase hana, kpála  
bini ngakakala ade. <sup>13</sup> Abana  
i du oehe ne okpála koko inde  
u aleleke se bili abhú 'ti ne e,  
ne mila di ne omungotsi koko,  
ne bandele, kpála bini ngakakala  
ade. Abana i du pandi, ne emu,  
ne fufú, kpála bini ngakakala ade.  
Abana i du obagala, ne okandole,  
ne opunda, ne okpulukpulu, kpála  
bini ngakakala ade. Abana i du  
'lá kpála-kuti, kpála bini ngakala  
susuka ade.

<sup>14</sup> Obhulu natsindji 'he bhomu-o  
apa pi gudhu bhomu-o me:

«Ndu oehe inde mo okukunda e  
hana andjia gba mu andjia!

Ndu otia gba mu di ne oba-  
badha 'he gba mu-o

andjia ka mu andjia,

u ú matá gba mu belegu de  
bini!»

<sup>15</sup> Obhulu natsindji 'he inde akpo  
li tia na gudhu ango-o alulu de  
aní tsutsu ka nakpe likabhu inde  
abhaka aní-o. U adú aku 'gba, u  
tsia lópolo di lio ngú aní. <sup>16</sup> U adú  
apa me:

«A ko likabhu na ngbéngbé pi yi,

okpála na 'ngbé gũdhũ-o!  
 Yi adyi li kũte yi babadha  
 bongo inde na kpéke mase.  
 Yi atsia adyi di li yi obongo na  
 mase naali inde na mbembe  
 má ngua,  
 inde li e ne zizi.  
 Yi adyi di omagege na olo bhú  
 dabili bini ne oteme na  
 kpéke mase di ne omayaka.

17 Ndũ 'he bhomũ-o hana angíta  
 bha li saa bini má kpikili!»

Abhomũ-o, ndũ obhũlũ nad-  
 jele zabũ hana, bhú dabili bini  
 ne okpála inde u abi o, okpála  
 nadhukũ pí 'ngbé 'ngu bhú dabili  
 bini ne obhũlũ nagili tia pí 'ngbé  
 'ngu-o alũlũ mbo tsutsu. <sup>18</sup> U atsia  
 adũ asũsula ka nau ngúwa adũ  
 aze ka natsi ka gũdhũ-o me: «A  
 akpo 'ndji e li 'ngbé gũdhũ inde-  
 e ne bhedho?» <sup>19</sup> U adũ aba embi  
 bhú 'ndji o, u adũ aku 'gbá, u atsia  
 adũ alopolo lio me:

«A ko likabhu na ngbéngbé pí yi,  
 okpála na 'ngbé gũdhũ-o!

Bhiti tia gba yi-e ngae inde li  
 okpála inde ngamene kulu  
 pí 'ngbé 'ngu-o

akpo ka e ko.

La-a, ndũ 'he bhomũ-o hana  
 andjia bha li saa bini má  
 kpikili!»

20 Ngayi okpála inde abhúlá-a, yi  
 kpi ndjili li nakpi ka gũdhũ  
 ango-o!

Ngayi omaha Ebhe, ne yi  
 obhũlũ titima gba Ebhe, di  
 ne yi opolofeta , yi kpi  
 ndjili!

Padhá de, anga Ebhe akodho 'ngú  
 gba ani-e ka siti 'ngú inde  
 ani amene e li yi ko!

21 Abhomũ-o, andjelu bini na  
 angu aha teme bini maka 'ngbé  
 teme nadyi ngano, ani atsia  
 atũmba bhú 'ngbé 'ngu ne napa  
 me:

«U atũmba bhadi ngbé gũdhũ na  
 Babilona ne kpéke me,

kpála bini ú matá galikpe ani  
 de.

22 Obhũlũ nabhi dũmũ bhí matá  
 galikpe agba mũ de.

Obhũlũ na'u toti 'ú matá ga-  
 likpe agba mũ de.

Obhũlũ nali 'tsi li matá galikpe  
 agba mũ de.

Obhũlũ ikalana dú matá di  
 agba mũ de.

Okpála dyí di matá ngano agba  
 mũ de.

23 Zi tala dú matá di agba mũ de.

U djé matá di 'li okpála inde  
 aha lio agba mũ de.

Padhá de, anga obhũlũ natsindji  
 'he inde adũ bhú gũdhũ gba  
 yi-e,

adũ ongbengbe kpála na doto.

Obhũlũ kobha gba yi-e apite ndũ  
 okpála hana.

24 Okpála na Babilona abhili  
 opolofeta,

ne okpála gba Ebhe di ne ndũ  
 okpála hana inde u abhili o  
 pála doto-o.»

## 19

### *Etsi ngú nadhego Ebhe*

<sup>1</sup> Pipíta-a, ma adje eli kpekpeke  
 ayie abhúlá. Eli ango-o adũ  
 mũgito me bhiti okpála ngagama  
 'ngú. U adũ apa me:

«Aleluya! Yi toko Ebhe, Ngámá  
 gba ní-o!

A ko mũkobho, a ko Ebhe na  
 sangu , a ko Ebhe na angu!

<sup>2</sup> Engú ani ngakodho e hana-a, ani  
 ngakokodho li lelele, a la  
 bhadi ngbingbili.

Padhá de, anga ani akodho  
 'ngú gba 'ngbé bhũlũ zabhe  
 inde adũ nako

asiti 'ndji okpála na doto ne zabhe  
 gba e ko.

Ani atsia agisila engú nabhili  
 obalise gba e li ani.»

<sup>3</sup> U atsia apa matá me:

«Aleluya! Yi toko Ebhe, Ngámá  
 gba ní-o!

Ngúwa inde ngakoto bhú  
gudhu-o nga'u abhúlá  
duduma ne duduma.»

<sup>4</sup> Obhelesi okpála ndjikpa bhisi  
ne ká badha bhú dabili bini  
ne okpála badha na ngangamba-  
a atutu lipaku o kuto, u atsia  
adhogè Ebhe inde ngadu pí kiti na  
ngámá-o. U adu apa me:

«A du moko! Aleluya! Yi toko  
Ebhe, Ngámá gba ní-o!»

*Anokomia gba Ndili Kandølo-o*

<sup>5</sup> Abhomu-o, eli bini ayie ne li  
pápá na kiti na ngámá-o. Eli ango-  
o apa me:

«Yi toko Ebhe gba ní-o, ndu yi  
obalise gba ani-e hana,  
ngayi okpála inde ngamanga  
ani-o,  
abana ngayi ongbengbe okpála ne  
yi odjedjedje!»

<sup>6</sup> Pipita-a, ma adje tolo mugito me  
a ngagama 'ngú ne bhiti okpála.  
Tolo ango-o adu mugito me a ko  
gili wowo 'ngu, mugito me kpéke  
mugbalá ngasusula ngae. A adu  
apa me:

«Aleluya! Yi toko Ebhe, Ngámá  
gba ní-o!

Padhá de, anga a ko Apí 'Kpí.  
Ani ngau maka ngámá.

<sup>7</sup> Ní kpi ndjili, amba ní du di bhú  
djali!

Ní dhogè ani!

Padhá de, anga nedhinga na  
anokomia na kava  
gba Ndili Kandølo-o akolo,  
wala\* ani aleke lie aleke.

<sup>8</sup> U aha bongo inde na kpéke  
mase pi ani.

Zi bongo ango-o ngasu masu,  
zibotu bini tété ade.»

(Bongo na kpéke mase bhomu-o  
ngasuno me okpála gba Ebhe-e  
amene obabadha kulu lio pi ani.)

<sup>9</sup> Abhomu-o, andjelu-o apa  
mama me: «Ye engú inde-e me:  
«A ko djali pi okpála inde u a'i o

bhú anokomia na kava gba Ndili  
Kandølo-o!» Ani atsia apa matá  
mama me: «A bhomu-o okukulú  
eli inde ayie ka Ebhe-o.»

<sup>10</sup> Abhomu-o, ma atutu lipaku  
ma kuto bhú li 'dhu ani ngú  
nadhogè ani. Engú bini, ani  
apa mama me: «Mo oméne mo-  
o de. Ma ne bali gba Ebhe maka  
mu. Ma bhadi maka ondaise mu  
inde ngakpokpo kukulu 'ngú inde  
li Yesu ambamba 'ta e-o. Tutu  
mangbo lipaku mu kala Ebhe.»

Padhá de, anga ngbili 'ngú inde  
li Yesu akpokpo e ngaha angu pi  
opolofeta ngae.

*Kpála inde adu pí punda na  
bubu-o aha 'gú ne obhulú yala gba  
e*

<sup>11</sup> Pipita-a, ma au kokpí abhulu  
lie. Abhomu-o, punda bini na  
bubu akoto. Kpála inde adu pépé-  
e, adu 'li ani me: «Kpála inde  
ngamene kulu lie pi Ebhe ne bua e  
bini.» Ani ngakodho 'ngú ngbing-  
bili, ani di ngagu egú bhú ngbili  
'ngú. <sup>12</sup> Djila ani adu nade maka  
zi djua. Adu di bhú 'ndji ani ne  
ondata na ngámá bhelé. U aye 'ili  
bini li kute ani. Ani ambila bha  
bini 'ta 'ili ango-o ngae.

<sup>13</sup> Ani adyi koti bini inde u azi  
e bhú ngute-e li kute e. Adu 'li  
ani me: «Li Ebhe.» <sup>14</sup> Osudha  
na abhúlá adu akpata ani me u  
nde a'u'u pí opunda na bububu.  
U adyidiyi obongo na kpéke mase.  
Bongo ango-o adu bubu, zibotu  
bini du tété de. <sup>15</sup> Mbotia inde li  
'bhø e adu bebedhe-e adu akoto  
bhú 'bhø ani. Mbotia ango-o adu  
ngubula nabhili opiga ne di. Ani  
aú pí 'ndji uo ne angu e hana. Ani  
tsia pí vino bhú 'ngbé ngbengøle  
na ke 'ngú gba Ebhe Ngámá Apí  
'Kpí-o. Ke 'ngú ango-o adu nadula  
madula.† <sup>16</sup> U aye 'ili bini li koti  
gba ani di ne pí 'ku ani. U aye

\* 19:7 19:7 Ndili Kandølo ne wala e: Ndili Kandølo-o, a ko Kilisito, wala ani-e, a ko Piga gba  
Ebhe. Tsia bhú Efe. 5:25, 32. † 19:15 19:15 Tsia bhú Ets. 2:9.

'ili ang-o me: «'NGBÉ NGÁMÁ GBA ONGBENGBE ONGÁMÁSI, NGÁMÁ GBA ONGÁMÁSI.»

<sup>17</sup> Pipita-a, ma au andjelu bini, alu tu ela. Ani asula kpekpeke pi ndu odhu hana inde adu adholo abhulá tsutsu naali-e me; «Yi go po bhula yi ngu 'ngbé anokomia gba Ebhe-o! <sup>18</sup> Yi go zu mbilika ongbengbe ongámási ne ongámási gba osudha di ne osudha. Yi go zu mbilika opunda di ne mbilika osudha inde adhudhuku ne di-o. Yi go zu mbilika okpála, abana i du obhende bhú bali ne obhe bhú bali ade-o, abana i du odjedjedje ne ongbengbengbe.»

<sup>19</sup> Abhomu-o, ma au enu inde i de akoto bhú 'ngbé 'ngu-o, ne ongbengbe ongámási na doto, bhú dabili bini ne osudha gba o me u nde apo bhula o ngu naha 'gú pi kpála inde adu pi punda ne osudha gba e-o. <sup>20</sup> Abhomu-o, kpála inde adu me ani nde a'u pi punda aholo enu-o bhú dabili bini ne polofeta na eu inde adu nani amene ongamba 'ngu li djila ani-o. Ani adu nani amene ongamba 'ngu bhomu-o ngu nato okpála inde u aye nani tele gba ani-e li kute o bhú ngita, inde adu di adhogo kulu ani-o. Kpála bhomu-o abhike enu-o bhú dabili bini ne polofeta na eu-o bhú dé djua na baluti. Ani abhike uo bhúbhú me u nde mu de. <sup>21</sup> Ani atsia abhili osudha gba uo ne ngise inde adu akoto bhú 'bhe ani-o. Abhomu-o, ndu odhu hana azu mbilika uo. U atsia a'u u ne di.

## 20

*U agbite Satana ngu kalanga ketø bini*

<sup>1</sup> Pipita-a, ma au andjelu bini ayie abhulá, ani atsia akø pila doto. A adu sakpa ani ne lifangula na tsu 'du-o. A adu di sakpa ani ne

'ngbé gbindjili na ngbéngbé. <sup>2</sup> Ani ago aholo 'ngbé kpulu na didili-o. 'Ngbé kpulu ang-o, a ko Satana inde djabalu. Andjelu ang-o agbite ani ngubula kalanga ketø bini. <sup>3</sup> Ani abhike ani bhú tsu 'du. Ani adho bhøbhø nganda ani, ani atsia aye balua pépé. Balua ani aye e adu me, ngubula kalanga ketø bini-e, ani ngbingi matá 'ndji okpála de. Pipita-a, u atsé mbo 'kpa li ani ngu nedhinga bedi.

<sup>4</sup> Pipita-a, ma au okiti na ngámá. Okpála inde adulu pépé-e, u aha pi uo angu nakodho 'ngu gba okpála. Ma au di bua okpála bhende u ava nani ngulu o ka u abhuka kukulu 'ngu inde li Yesu ambamba ta e di ne 'li Ebhe lie-o. U dhogø nani enu-o de. U dhogø di kulu ani-e de. U ye di nani tele gba ani-e pidi uo, i du di-e li 'kpa uo de. U azuku matá, u atsia au ngámá bhú dabili bini ne Kilisito ngubula kalanga ketø bini. <sup>5</sup> A bhomu-o bhøtsibhøtsi na bini me Ebhe zuku okpála-o. Okpála bhe koko adjéke ngaiza me kalanga ketø bini-e le paká, li Ebhe tsia zuku uo. <sup>6</sup> A ko djali pi okpála inde azuku bhú ká okpála inde li Ebhe azuku o kalanu bhomu-o. A ko okpála gba Ebhe, la di-e, nakpi na bhisi-e ne angu pi uo ade. U adu odimandø gba Ebhe di ne gba Kilisito. U au ngámá bhú dabili bini ne ani ngubula kalanga ketø bini.

### *Satana ati*

<sup>7</sup> Li kalanga ketø bini-e de ale-e, u gbé Satana bhú tikpu gba e-o. <sup>8</sup> Ani tsia nu napite opiga inde agbolo pila doto libhomu. A akunda napa me nayie bhú Gogo nakolo bhú Magogo.\* Ani apó bhula uo ngubula gbele. U tsia du bhelé nane sike lingo 'ngbé 'ngu mane. <sup>9</sup> U abha doto libhomu, u

\* **20:8** 20:8 Gogo ne Magogo: A ko 'ili ngu nasuno obhula yala gba omafsalaele.

atsia asa bili li omaha Ebhe apo bhúla o lie-o. U atsia asa di gũdhũ gba okpála li Ebhe akunda o-o. Engú bini, djua ayie abhúla, atsia ago atsulu uo hana. <sup>10</sup> Abhomũ-o, Ebhe atsia atũmba djabũũ, kpála inde adũ nako napite uo, bhú dé djua na baluti nganda enũ-o bhú dabili bini ne polofeta na eu-o. U adú nazũ likabhu oo ngbĩkpi ne sukpe dũdũma ne dũdũma.

*Lele maka li Ebhe akodho 'ngú na soso-o lie-o*

<sup>11</sup> Pipita-a, ma au 'ngbé kiti na ngámá bini me kpála bini nde adũ pépé. Kiti ango-o adũ bubu. Kokpí ne doto akpekpe de ani tsutsu. Kpála tsia u matá uo de. <sup>12</sup> Abhomũ-o, ma au okpála inde amu-o, ongbengbengbe ne odjedjedje, alũũ kala kiti na ngámá-o. U abhulu obhuku. U atsia abhulu di bhuku koko, a adũ bhuku na mukobho-o. Abhomũ-o, Ebhe atsia akodho 'ngú gba okpála inde amu-o nakpata lele kulu gba uo-o, nakpata engú inde u aye e bhú obhuku-o. <sup>13</sup> 'Ngbé 'ngu azie okpála inde amu inde adũ bhúbhú-o. Kuo ne kuti gba okpála inde amu-o azie di okpála inde adũ agba uo-o. Abhomũ-o, Ebhe atsia akodho 'ngú gba kpála ne kpála nakpata lele kulu gba e-o. <sup>14</sup> Abhomũ-o, Ebhe atsia atũmba kuo bhú dabili bini ne kuti gba okpála inde amu-o bhú dé djua-o. Dé djua bhomũ-o, a ko nakpi na bhisi. <sup>15</sup> Abhomũ-o, ndũ kpála hana inde u ye 'li e bhú bhuku na mukobho-o de-e, u abhike ani bhú dé djua bhomũ-o.

## 21

*Ebhe abhó ndũ 'he hana ne toto*

<sup>1</sup> Pipita-a, ma au kokpí na mbia ne doto na mbia, anga kokpí na kalanũ ne doto na kalanũ-o andjia. 'Ngbé 'ngu dũ matá di-i de.

<sup>2</sup> Ma atsia au gũdhũ na bubu-o ngayie abhúla. Gũdhũ ango-o, a ko Yelusalema na mbia. Ebhe atima gũdhũ ango-o ngae. A adũ akø kuto me a nde bedhe maka øle inde aleke lie ngú nanũ nakø lie ne 'ko e. <sup>3</sup> Ma adje kpála bini ngatobhila kpekpeke li pápá li kiti na ngámá-a adũ li e me: «Mbia inde-e dabili nadũ gba Ebhe-e bhú ká okpála. Ani adú ne uo, u tsia dũ omaha ani. Ebhe ngae makpe adú bhú dabili bini ne uo, ani adú Ebhe gba uo. <sup>4</sup> Ani akúo ndũ ngũla sa kũla uo hana, okpála mú matá-a de. Engú na da kuo dũ matá-a de, egbá dũ di-i de, likabhu dũ di-i de, anga doto na kalanũ-o nde andjia.»

<sup>5</sup> Abhomũ-o, kpála inde adũ pí kiti na ngámá-a atsia apa me: «Mbia inde-e, ma ngabho ndũ 'he hana na mbia.» Pipita-a, ani apa mũma me: «Ye 'ngú inde, anga eli ma ngapa e-e, a ko kukulu 'ngú, inde a ayo la di me okpála bhuka e ko.» <sup>6</sup> Ani atsia apa matá mũma me: «A amene lie amene! Ngama-a, ma ne Alafa di ne Omega. Ngama-a, ma ne Kpála inde akpo lita ndũ 'ngú hana, ma di ne Kpála inde abú ta ndũ 'ngú hana. Kpála inde lie ne gumũ 'ngu-o, ma ahá engu nandji mandji pi ani padhá bhú kpongu inde ngaha mukobho. <sup>7</sup> Kpála inde agbóko egú-o, ma ahá ndũ 'he bhomũ-o hana pi ani, ma adú ne Ebhe gba ani, ani tsia dũ ndili gba ma. <sup>8</sup> La pi okpála bhende ngamene siti 'ngú-o, dá uo abhú dé djua na baluti na dũdũma ne dũdũma. A bhomũ-o nakpi na bhisi. A ko okpála namene ngua siti 'ngú inde: obhũũ tsulũ, okpála ayala nabhuka, obhũũ namene zabhe, obhũũ nabhele kpála, obambakũya, obhũũ køle, obhũũ nayo oebhe na eu, ne obhũũ eu.»

*Yelusalema na mbia*

<sup>9</sup> Abhomu-o, saka oandjelu mananika inde adu sakpa o ne okópo mananika, inde abedhe ne olikabhu mananika na soso-o ago apa muma me: «Gogo, ma nu suno eɓe na kava-a pi mu. A ko wala Ndili Kandole-o .»

<sup>10</sup> Bu Bhobua ago abedhe ma, abhomu-o andjelu-o anu a'o ma pi 'ndja 'ta. Eta ango-o adu ngbéngbé. Ani asuno gudhu na bubu-o muma. Gudhu ango-o, a ko Yelusalema li Ebhe atima e ngae-o. A aye abhulá, a atsia adu akɔ kuto. <sup>11</sup> Zizi adu asu ka sangu gba Ebhe-o. Zi gudhu ango-o adu nasu má ngingingi mugito me a ko teme\* na mase. <sup>12</sup> Aga inde u asa e li kukate-e adu ngbéngbé, di ndjándja. Bhəbhə adu tété ndjikpa ne ká bhisi, oandjelu ndjikpa ne ká bhisi atsia adu nalilila. U atsia aye 'li opiga ndjikpa ne ká bhisi na Isalaele-e tété. <sup>13</sup> Ne ndu pasu hana bhəbhə adu tété bata: bata ne ndjongu, bata ne kati, bata li pápá na abebe, bata li pápá na yoyoko. <sup>14</sup> U ayiki aga bhomu-o pi oteme ndjikpa ne ká bhisi. U atsia aye 'li obhulu titima ndjikpa ne ká bhisi gba Ndili Kandole-o tété.

<sup>15</sup> Andjelu inde adu apa 'ngú muma-a, adu sakpa ani ne mbamba na olo inde ani adu napima ne e gudhu-o, ne obhəbhə, di ne aga ango-o. <sup>16</sup> Gudhu ango-o adu ne odjedje badha. A aviti bhú 'ndja ne bhú bá, ne bhú 'ngbé-e bini. Li andjelu-o apima gudhu-o lie ne mbamba gba e-e, mbamba-a ali bhúbhú bhutsibhutsi kɔtɔ <sup>12</sup>† ne ká bhisi ne ndu pasu hana. <sup>17</sup> Ani apima di aga-o, mbamba gba ani-e ali bhúbhú bhutsibhutsi kɔtɔ <sup>14</sup>†

bhú 'ndja abhulá. Ani apima bha maka li okpála apipima 'he lie-o.

<sup>18</sup> U ayiki nani aga ne teme inde u a'i e me djasepe. Gudhu-o libhomu adu ngili olo. A atsia adu má ngilili maka tsupa na bubu. <sup>19</sup> Oteme inde u amene 'dhu aga na gudhu-o ne e, u aye nani tele tété ne ndu djua oteme na mase hana: bhe na bini-e adu teme na djasepe, bhe na bhisi-e adu teme na safile, bhe na bata-a adu teme na kalaseduane, bhe na badha-a adu teme na emelode, <sup>20</sup> bhe na bhuluvue adu teme na saladuane, bhe na madhia adu teme na kolonaline, bhe na mananika adu teme na kilidj-lite, bhe na madjina adu teme na belile, bhe na odukpabini-e adu teme na topadje, bhe na ndjikpa-a adu teme na kilidjopaladje, bhe na ndjikpa ne ká bini-e adu teme na yasete, bhe na ndjikpa ne ká bhisi-e adu teme na ametisite. <sup>21</sup> Obhoti ndjikpa ne ká bhisi-e adu omayaka ndjikpa ne ká bhisi. U abho nani bhoti bini ne bini li li mayaka bini má kpikili! 'Ngbé 'hi kpadji na gudhu-o adu nani ngili olo. A atsia adu má ngilili maka tsupa na bubu.

<sup>22</sup> Ma u belegu 'ngbé 'ti Ebhe bhú gudhu bhomu-o de, anga Ebhe Ngámá Apí 'Kpi ngae makpe bhú dabili bini ne Ndili Kandole-o ne 'ngbé 'ti Ebhe ango-o ngao. <sup>23</sup> Gudhu ango-o du ne gumu ela abana di epe ngú naha zi kpi oo de, anga sangu gba Ebhe-e ngasu zi e oo ngae, Ndili Kandole-o la di ne tala ango-o ngae. <sup>24</sup> Opiga na doto adu adhuku li zi gudhu ango-o. Ongbengbe ongámási na doto tsia gó di ne tia gba o bhú gudhu ango-o. <sup>25</sup> Obhe bhoti na gudhu ango-o adu ndu nedhinga

\* **21:11** 21:11 Teme: Bhú eli na giliki-e, u aye me «Teme na djasepe ne kilisitale.» † **21:16** 21:16 Mbamba bhutsibhutsi kɔtɔ 12: Gudhu bhomu-o adu bhú 'ndja-a masikpe de kilometele kɔtɔ bhisi ne 'he pépé ndu pasu hana. † **21:17** 21:17 Mbamba bhutsibhutsi kɔtɔ 144: A ko masikpe de metele ndjikpa mananika ne ká bhisi.



hana báábá, u ní galikpe-e de, anga ekpí bí galikpe oo de. <sup>26</sup> Opiga na doto adu nali bhúbhú ne sangu di ne obabadha tia gba o-o. <sup>27</sup> Ehe bini na sisiti lí oo de, abana okpála namene engú inde lí Ebhe ayala e, abana obhúlu eu. A alí bha bini oo ne okpála inde u aye 'lí o bhú bhuku na mukobho-o, bhuku gba Ndili Kandole-o.

## 22

<sup>1</sup> Pipita-a, andjelu-o asuno muma ngade 'ngu inde ngaha mukobho pi okpála-o. Ngade 'ngu ang-o adu má ngilili maka tsupa na bubu. A adu ayie lí bilí lí kiti na ngámá gba Ebhe ne Ndili Kandole-o adu lí e-o. <sup>2</sup> Engu ang-o atsia adu akpe lí 'ngbé 'hi kpadji na gudhu na bubu-o. Ne ndu pasu bhisi na ngade 'ngu-o hana adu tété ne ndula inde ngaha mukobho. Ndula ang-o ngali lílí bhútsibhútsi ndjikpa ne ká bhisi bhú kalanga bini. A ngali lílí bhútsibhútsi bini ndu epe bini ne bini hana. Kpákpá-a atsia adu nateteke ngubula nakobho okuo gba opiga.

<sup>3</sup> Ohe inde lí Ebhe tú matá pedje lí e, lí bhú gudhu ang-o de. Kiti na ngámá gba Ebhe ne uo ne Ndili Kandole-o adu bhú gudhu-o. Obalise gba Ebhe-e tsia dú nadhogè ani. <sup>4</sup> U aú bhúla ani, u tsia yé 'lí ani pidi uo. <sup>5</sup> Sukpe dú matá-a de, u dú di matá ne gumu zì tala abana zì ela de, anga zì Ebhe Ngámá asú pi uo ngae, u tsia ú ngámá duduma ne duduma.

### *Nago ka Yesu*

<sup>6</sup> Pipita-a, andjelu-o apa muma me: «Ongú inde ma apa e, a ko kukulu 'ngú inde ayo me okpála bhuka e. Ebhe Ngámá inde ngato 'lí e bhú opolofeta-a , atima andjelu gba e ngú nasuno pi obalise

gba e engú inde ayo me akolo mbia inde-o.»

<sup>7</sup> Yesu apa me: «Gbo 'dje mu, Ma ngago mbia inde! A ko djali pi kpála inde ngalila ongú inde lí Ebhe ambamba ta e bhú bhuku inde-o!»

<sup>8</sup> Ngama Djaa , ma adje ongú bhomu-o ne 'dje ma, ma atsia au di ne djila ma. Pita nadjedje ne nauu-o, ma ati bhú lí 'dhu andjelu inde asuno ongú bhomu-o muma-a ngú nadhogè ani. <sup>9</sup> Engú bini, ani apa muma me: «Mo oméne mo-o de! Ma ne bali gba Ebhe-e maka mu. Ma bhadi maka ondaise mu inde ngakpokpo kukulu 'ngú inde lí Yesu ambamba ta e-o. Ma maka ndu okpála hana inde ngalila engú inde u aye e bhú bhuku inde. A ayo mangbo me mu dhogè Ebhe!»

<sup>10</sup> Pipita-a, andjelu-o apa muma me: «Mo owó ongú inde lí Ebhe ambamba ta e bhú bhuku inde-e de, anga nedhinga ngú namene lie ka ongú ang-o akolo masikpe. <sup>11</sup> A ayo me kpála bhende ngamene siti 'ngú-o nu bha nedi ne kalanu, kpála bhende ngamene engú inde lí Ebhe ayala e nu bhadi nedi ne kalanu. Kpála bhende ngamene ngbili 'ngú nu bhadi nedi ne kalanu, amba kpála bhende ngamene engú inde nganga lí Ebhe-e nu bhadi ne di ne kalanu.» <sup>12</sup> Yesu apa me: «Gbo 'dje mu, ma ngago mbia inde! Ma ngago sakpa ma ne makalá inde ayo me ma ha e pi kpála ne kpála nakpata lele kulu inde ani amene e-o. <sup>13</sup> Ngama-a, ma ne Alafa di ne Omega, a kunda napa me ma ne kpála na kalanu, ma la di ne kpála na soso. Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.»

<sup>14</sup> A ko djali pi okpála inde ngavulu obongo gba o-o. Ebhe Ngámá ahá kpadji pi uo me, u lí lí obhoti na gudhu na bubu-o, amba

u zu di lí 'lá inde ngaha mukobho-o. <sup>15</sup> Engú bini, ndu okpála bhe koko hana, u lí bhú gadhu-o de. Okpála ango-o ngao inde: okpála inde li Ebhe atu pedje li o, obhulu kele, obhulu zabhe, obhulu nabhili okpála, okpála inde ngadhogo oebhe na eu, di ne ndu okpála hana inde ngakpi ndjili li eu, inde di ngapa eu-o.

<sup>16</sup> «Ngama Yesu-o, ma atima andjelu gba ma-a ngu nago nambamba ta ongu bhomu-o pi yi bhú oDadjua gba Ebhe-o. U azu ma bhú piga gba 'ngbé ngámá Davidi. Ma ne ikupala inde asusu kəkpi-o.»

<sup>17</sup> Bu Bhobua ngauo ne olo na kuva apa me: «Gogo!»

A ayo me kpála inde adje engú inde-e pa di me: «Gogo!»

A ayo me kpála inde li e ne gumu 'ngu-o gogo.

A ayo me kpála inde li e ne gumu engu inde ngaha mukobho-o sia padhá.

### *Engú na soso*

<sup>18</sup> Ngama Djaa, ma ngagbele 'dje ndu okpála hana inde ngadje ongu inde li Ebhe ambamba ta e bhú bhuku inde-e me, li kpála bini 'o engú koko pépé-e, Ebhe 'ó bhadi ndu olikabhu hana inde u aye e bhú bhuku inde-e pí ani! <sup>19</sup> Li kpála bini 'e la di ehe bini bhú ká ongu inde li Ebhe ambamba ta e bhú bhuku inde-e, Ebhe 'é makalá gba ani inde u akpokpo 'ngu e bhú bhuku ango-o. Makalá ango-o, a ko lí 'lá inde ngaha mukobho pi okpála, a ko la di nali bhú gadhu na bubu-o.

<sup>20</sup> Kpála inde alu pí ndu 'ngu inde-e hana apa me a ko kukulu 'ngu-o apa me: «A moko, ma ngago mbia inde!»

Ngama Djaa, ma atsia apa me: «A adu moko! Gogo, Ngámá Yesu.»

<sup>21</sup> A ayo me Ngámá Yesu suno bádha bhú 'bu gba e pi ndu yi hana.